


Maija'quë Huajë Ca
Nëose'e



New Testament in Secoya (EC:sey:Secoya)

Maija'quë Huajë Ca Nëose'e

New Testament in Secoya (EC:sey:Secoya)

copyright © 2012 Wycliffe Bible Translators, Inc.

Language: Secoya

Translation by: Wycliffe Bible Translators, Inc.

Secoya [sey], Ecuador

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Secoya

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022
995e68c5-fe57-54e6-bf8e-0637526d3f7d

Contents

SAN MATEO	1
SAN MARCOS	46
SAN LUCAS	74
SAN JUAN	121
HECHOS	156
ROMANOS	197
1 CORINTIOS	216
2 CORINTIOS	234
GÁLATAS	246
EFESIOS	253
FILIPENSES	259
COLOSENSES	264
1 TESALONICENSES	268
2 TESALONICENSES	272
1 TIMOTEO	274
2 TIMOTEO	279
TITO	283
FILEMÓN	286
HEBREOS	287
SANTIAGO	300
1 SAN PEDRO	305
2 SAN PEDRO	310
1 SAN JUAN	313
2 SAN JUAN	318
3 SAN JUAN	319
SAN JUDAS	320
APOCALIPSIS	322

SAN MATEO

Jesús Ñecuöhua'i
(Lc 3.23-38)

¹ Iye a'ë, Abraham cui'ne David tsëcapë acohua'ire cuëcuese'e ja yë'ta'a Jesucristo pa'ima'në pa'isicohua'ire.

² Isaac pëca ja'quë paji'i, Abraham. Jacob pëca ja'quë paji'i, Isaac. Cui'ne Judá cui'ne j yo'je tsj pëca ja'quë paji'i, Jacob.

³ Fares cui'ne Zara pëca ja'quë paji'i, Judá. Cui'ne johua'i pëca ja'co paco'ë, Tamar. Esrom pëca ja'quë paji'i, Fares. Aram pëca ja'quë paji'i, Fares.

⁴ Aminadad pëca ja'quë paji'i, Aram. Naasón pëca ja'quë paji'i, Aminadad. Salmón pëca ja'quë paji'i, Naasón.

⁵ Booz pëca ja'quë paji'i, Salmón. Cui'ne j pëca ja'co paco'ë, Raab. Obed pëca ja'quë paji'i, Booz. Obed pëca ja'co paco'ë, Rut. Isaí pëca ja'quë paji'i, Obed.

⁶ Pai ëjaë David pëca ja'quë paji'i, Isaí. Salomón pëca ja'quë paji'i, David. Cui'ne Urías nëjo pa'isicopi Salomón ja'co paco'ë.

⁷ Roboam pëca ja'quë paji'i, Salomón. Abías pëca ja'quë paji'i, Roboam. Asa pëca ja'quë paji'i, Abías.

⁸ Josafat pëca ja'quë paji'i, Asa. Joram pëca ja'quë paji'i, Josafat. Uzías pëca ja'quë paji'i, Joram.

⁹ Jotam pëca ja'quë paji'i, Uzías. Acaz pëca ja'quë paji'i, Jotam. Esequías pëca ja'quë paji'i, Acaz.

¹⁰ Manases pëca ja'quë paji'i, Esequías. Amón pëca ja'quë paji'i, Manases. Josías pëca ja'quë paji'i, Amón.

¹¹ Jeconías cui'ne j yo'je tsj conj pëca ja'quë paji'i, Josías. Jaohua'i cato coasicohua'i paë'ë, Israelita paire tseani Babilonia yejana sa maca.

¹² Israelita pai sa cuañosi jeteyo'je Salatiel pëca ja'quë paji'i, Jeconías. Zorobabel pëca ja'quë paji'i, Salatiel.

¹³ Abiud pëca ja'quë paji'i, Zorobabel. Cui'ne Eliquin pëca ja'quë paji'i, Abiud. Azor pëca ja'quë paji'i, Eliquin.

¹⁴ Sadoc pëca ja'quë paji'i, Azor. Aquim pëca ja'quë paji'i, Sadoc. Eliud pëca ja'quë paji'i, Aquim.

¹⁵ Eleazar pëca ja'quë paji'i, Eliud. Matán pëca ja'quë paji'i, Eleazar. Jacobo pëca ja'quë paji'i, Matán.

¹⁶ José pëca ja'quë paji'i, Jacobo. José cato Jesucristo pëca ja'co María ëjë paji'i.

¹⁷ Jaje pa'ina, Abrahampi cui'ne David pa'i macaja'a cuëcuetto catorce pa'ye de ai de'huase'e pa'iji. Davidpi cui'ne Israelita mañare Babiloniana tseseni sasi macaja'a cuëcuetto cui'ne catorce pa'iji. Cui'ne yequë catorce pa'i maca Cristo ai de'opi.

Jesucristore Coase'e
(Lc 2.1-7)

¹⁸ Jesucristore coase'e ñeje pa'iji: María j pëca ja'co, José ja're huejaja'coa, ca nëosico paco'ë. Jaje ca nëosicopi ja yë'ta'a tsioni pa'ima'në tsj ëtapë de'o Maija'quë joyo tutupi.

¹⁹ José jo ëjë nuñerepa pa'i paji'i. Jaje pa'ita'a nëjo Mariare si'aohua'i pai asajëna, jeoñe coepi. Coa ai jerepa paije ti asama'pëna ise'e jeosi'i cuasapi.

²⁰ Jaje cuasaquë pa'ina, Ejaë huiñaëpi ite huëo hue'ñaja'a ñaini capi: "José David tsëcapë aquë, Mariare ca'rama'ë pa'ijë'ë, nëjore de'huani paye. Jo paja'quë cato Maija'quë joyo tsequë api.

²¹ Tsihuaë'ni paja'coa. Pacona, j mami Jesure sëojë'ë, huasoquëre. Jaje hue'equë pa'ija'quë api, j paire co'aye yo'ocohua'ire huasoja'quë sëte."

²² Si'aye jaje tj'api, tsoe hue'ña Maija'quëre quëacaiquë ca nëoquë pa'ise'epi, ñeje:

²³ Nomio tsjo, ëmë ti yo'oma'copi tsj quë'io de'oni tsihua'ëre pasio.

Jaëpi j mami hue'equë pasipi, Emanuel.

Jaje cani cayë, Maija'quë mai ja're pa'iji.

²⁴ Ja maca José sëtani mai Ejaë cuañese'ëje Mariare nëjore pao cuasaquë ti pëani nëjore papi.

²⁵ Jaje pa'iquëta'are huejasicohua'i pa'iyepi pa'iyë pahüë, mamaquëre té'ya dani j mami Jesús hue'yo macaja'a.

¹ Judea yejana Jesús coasiqué paji'i, a'ri daripé Belén hué'e daripéna. Ja mu'seña Herodes paji'i, Pai Éjaé, ja yeja cuañequé. Ja mu'seña Jerusalémpi daé'ë, ésë mëi te'tepi, yequë éméohua'i Magos hue'ecohua'ipi. Jaohua'i cato pairiohua'i paé'ë, ésë mëi te'te qué'ro acohua'i. Ma'ñoco yo'oye ye'yecohua'ipi cui'ne de'hue ta'ñe cacohua'i paé'ë, iti yo'oyere ñajé.

² Jaohua'ipi dani sei'ë: “¿Jerore pa'iqué'ni, judío pai Éjaé yure coasiqué? Jeto ésë mëi te'tepi ñahué, i ma'ñocore. Jaje ñani daé'ë, ite do're ja'rujé se'ñu'u cajé iñona.”

³ Cajëna, pai éjaé Herodes asani ai cuasapi, ¿me yo'ose'ere caye'ni? caquë, cui'ne si'a Jerusalén pa'icohua'i ai cuasahué, itire asani.

⁴ Ja maca pai éjaé si'aohua'ire soipi, Maija'quë hué'e ñacaicohua'i éjaohua'ire cui'ne cuañese'e paire ye'yacohua'ire. Soini seni asapi, jaohua'ire, ¿jerona Cristore coa ja'ñe ca nëose'e pa'iqué'ni? caquë.

⁵ Caquëna, jaohua'ipi cahué, ite: Belén Judea yejana coaja'quë api, caquë. Maija'quë jëjo daoquë tsoe aqué toyapi, ñeje:

⁶ Belén maca, Judá yeja pa'ico.

Mé'ere cuañecohua'i jerepa a'rico maca pa'ima'o pa'iyé, mé'ë.

Jaje pa'ina, mé'ëpi etaja'quë api, Éjaérepá, Israel paire ñacaija'quë.

⁷ Cajëna, asani ja maca Herodes Magos hua'ire yahuerepa soini iohua'ise'ere seji'i, ¿je yéhua ma'ñoco ñaina, ñare'ni? caquë.

⁸ Seni asani ja maca Beléna jaohua'ire jëjo saoque capi: “Saijé'ë. Jarona sani asajé'ë, de'oyerepa tsihua'ë pa'iyere pa'ire pama'quë. Jaje ini ti'asicohua'i pani yé'ere dani quëajé'ë. Yé'ëje sani do're ja'ruquë sejas'i, ite.”

⁹ Jaje pai éjaé caëna, Magos maña saé'ë. Saijëna, ma'ñoco iohua'i ésë mëi te'te ñasiquëpi du'ru sai sapi. Jaje saiquëpi tsihua'ë pa'i hue'ñana nëajani huesëpi, sa tējini.

¹⁰ Ja maca Magos maña ma'ñocopi jaje yo'ouna, ñani ai sihuahué.

¹¹ Sihuajé hué'ena sa cacajé ñahué, tsitu'ure péca ja'co María ja're uina. Ñani do're ja'runi tsihua'ëre de'oque macani cajé sihuahué. Ja jeteyo'je iohua'i mahuëa mañare hui'yoni oro, hué'o señe cui'ne mirra ite isihué, jai do'ire.

¹² Ja jeteyo'je Maija'quëpi hué'o hue'ñaja'a quëapi, Herodes qué'ro co'ima'pé pa'ijé'ë, caquë. Jaje quëaëna, yequë ma'aja'a co'ihué, iohua'i yejana.

Egiptona Catise'e

¹³ Jaohua'i Magos saisi jeteyo'je Éjaé huiñaépi hué'o hue'ñaja'a ñani Josére capi: “Huëni tsihua'ëre cui'ne péca ja'core sai saje'ë, Egipto yejana. Jarona sani péajé'ë, yé'ëpi yeque yo'oye pa'ito caëna, yo'oja'quë. Yure cato Herodespi tsihua'ëre huani jëosi'i caquë co'ëja'quë api. Ja do'ire saijé'ë.”

¹⁴ Jaje caëna, José huëni tsihua'ëre cui'ne i péca ja'core sëttoni ñani sai sapi, Egiptona.

¹⁵ Jarote paé'ë, Herodes ju'i macaja'a. Tsoe aqué Maija'quëre quëacaiquëpi Éjaépi caquëna, toyapi: “Egiptopi yé'ë mamaquëre soihué” ja toyase'epi ti'aëna, jaje yo'ohué.

Tsire Huaise'e

¹⁶ Ja maca Herodes, Magos hua'i yé'ere co'aquë api cajé yo'ore caquë ai péi tsire caya ometéca pacohua'ire cui'ne ai tsitu'ñare huani jeajé'ë, cuañëpi. Belén pa'icohua'ire, cui'ne iti yé'ehue pa'icohua'ireje caquë, caya ometéca ma'ñoco pa'i hué'ose'e pa'iji, Israel pai ta'ñe pa'iohua'i case'ere cuasaquë jaje yo'opi.

¹⁷ Jaje yo'oqueña, ti'api, Maija'quëre quëacaiquë Jeremias ñeje toyaquë pa'ise'e.

¹⁸ Rama qué'ropi, cuiye cui'ne jaiye oi yé'o jutaquëna asahué.

Ja'o cato Raquelpi mamajëni oco'ë.

Yéhuotoje asaye coeo,

Mamajëpi tsoe jujusicohua'i pa'ijëna.

¹⁹ Herodes ju'isi jeteyo'je, Éjaé huiñaépi Josére hué'o hue'ñaja'a ñaini capi, Egiptore pa'ina:

²⁰ “Huëni tsihua'ëre mé'ëpi coani, cui'ne péca ja'core huëoni co'ijé'ë, Israel yejana. Tsoe tsihua'ëre huajo yéjé pa'isicohua'i juju sahué.”

²¹ Ja maca José huëni tsihua'ëre cui'ne péca ja'core sai sapi, Israel yejana.

²² Jaje saiquëta'a José asapi, Herodes mamaquë Arquelaopi péca ja'quë yo'ora'ase'ere yo'oji cajëna. Jaje asani jaro saiye ca'raquëna, hué'o hue'ñaja'a Maija'quëpi quëaëna, Galilea yeja qué'rona saji'i.

²³ Jarona ti'ani Nazaret hué'e daripéna péapi. Jaje yo'oqueña, Maija'quëre quëacaihua'i ca nëojé pa'ise'e ti'api, “Jesús Nazareno pa'ija'quë api” case'e.

3

Juan Oco Doquë Cuene Yeja Pa'iye
(Mr 1.1-8; Lc 3.1-9, 15-17; Jn 1.19-28)

¹ Ja mu'seña Juan oco doquëpi Judea cuene yejana soquë peo huë'fiana Maija'quë cocare quëaquë daji'i.

² Ñeje caquë: "Ma'tëmo cuañeñe ja'yere pa'iji. Ja do'ire ja'rë cuasase'e jeoni ponëjë'ë."

³ Iquë Juan yo'o ja'ñere Maija'quëre quëacaiquë Isaías toya'aji'i, ñeje:

Cuene yejapi pa'i ñeje cuiye asa cuañoji.

Ne de'huajë'ë, Ëjaërepa ma'are.

Nui ma'arepa hui'yocaijë'ë.

⁴ Juan ju'i ca camello nañapi nesico paji'i. Cui'ne j tēicaje ca'ni me paji'i. Jaje pa'ipi pu'suni aji'i. Cui'ne mejaë payare ocuequë paji'i.

⁵ Jerusalén daripë pa'icohua'i, cui'ne si'ahua'i Judea yeja pa'icohua'ije, cui'ne Jordán tsiaya ja'ye maca pa'icohua'ije j quëaye daijë asahuë.

⁶ Jaohua'ipi johua'i co'aye yo'ose'ere oijë quëacohua'ini Juanpi Jordán tsiayana dopi.

⁷ Jaje yo'okuëna, jai pa'i fariseohua'i cui'ne saduceohua'i coní oco do cuañoñu'u cajë daijëna, Juanpi ñani capi, jaohua'ire: "¡Ñña tsëcapë acohua'! ¿Nepi mësarute quëare'ni, Maija'quë nejoñe, tijañere jëajë'ë, cajë?"

⁸ Jaje pa'ito nuñerepa ponësicohua'i yo'oyere yo'ojë'ë, tijañerepa ja'në pa'ise'e jeoni.

⁹ Cui'ne mësaruja'a sa'ñe yëquë Abraham tsëcapë acohua'i a'ë cama'pë pa'ijë'ë. Care payë, Maija'quëpi iye quëna pëaque ipi yëni Abraham tsëcapëre neñe pa'iji.

¹⁰ Jaje pa'ina, tsu'upo tsoe niusicoa, soquë ñëa cueja'core. Si'a soquë ñëa de'o ca quëi ma'ñe cueni tãoni ëo ja'ñe a'ë.

¹¹ Yë'ë nuñerepa ocopi doyë, mësarute, ja'në cuasase'e jëoñere iño ja'ñere. Jaje pa'iquëta'are jeteyo'je daiquë api. Jaëpi yureta'a Maija'quë joyopi cui'ne toapi doja'quë api, jerepa pa'ipi. Yë'ë cato jte de'oye necaiye tija'ma'quë a'ë.

¹² Tsoe j jëtëpi pala cajiji, trigo ne de'huaquë jorose'e tirona huahueja'core. Iti care pase'e huë'ena de'huaquë, iti jorose'e se yayama'a toana ëoja'quë api."

Jesure Doye
(Mr 1.9-11; Lc 3.21-22)

¹³ Juanpi dojaquë caquë Jesús Galileapi Jordán tsiayana daji'i.

¹⁴ Jaje daquëna, Juan du'ru macarepa coepi, doyë. Jaje coequë capi, Jesure:

"Yë'ëpi më'ëni do cuaño'ñe pa'i a'ë. ¿Me yo'oquë yë'ë quë'rona daquë'ni?"

¹⁵ Caquëna, Jesús jte capi:

"Yures'e jaje pa'ijaquë. Coa Maija'quë yëyeje pa'ye yo'oye pa'iji."

Caëna, ja maca Juanpi sehuoni dopi.

¹⁶ Jesús do cuañosiquëpi tsiayapi tumasi maca, ma'tëmopi hui'yo sai maca Jesús ñapi, Maija'quë joyopi su'teje pa'ipi j siopë quë'rona nëca meina.

¹⁷ Ja maca ma'tëmopi yë'ose'e ñeje pisiquëna, asahuë: "Iquë api, yë'ë mamaquë. Jaëni sihuaquë pa'iyë."

4

Jesure Neñañe
(Mr 1.12-13; Lc 4.1-13)

¹ Ja jeteyo'je Maija'quë joyopi sai sapi, cuene yejana, huati neñaquë caquë.

² Jarote paji'i, cuarenta mu'seña cui'ne cuarenta ñamiña ti aõ aima'quëpi. Jaje pa'ina, aõ ëaye nëji'i, jte.

³ Ja maca huatipi Jesure tsio dani neñasi'i caquë capi:

"Maija'quë mamaquërepa pani iye quëna pëare pan de'huajë'ë."

⁴ Jaje caquëna, Jesupi jte sehuopi:

"Toyase'e caji: Coa pan aiñe mañapi pa'iyë peoji, pa'i. Coa ai jerepa Maija'quë cayere yo'oyepi pa'iyë pa'iji."

⁵ Ja maca huatipi Jerusalénna sapi, Maija'quëre se huë'e ëmëje'ena.

⁶ Cui'ne jaron a capi, jte: "Maija'quë mamaquërepa pani iño pi tømëjë'ë, yejana. Toyase'e caji, ñeje:

Maija'quëpi j huiñaohuaire cuañeina, jëñapi tse'e pajëna, quëna pëna j quëo ja'hua a'si tømëñe peoye tømëja'quë api."

⁷ Caquëna, Jesupi jte sehuopi:

"Yequë huë'ñapi toyase'eje caji:

'Më'ë Ëjaë Diusure neñasi'i caquë yo'oma'ë pa'ijë'ë: "

⁸ Tijupë huatipi sa copi, jai cutihuëna. Jarona sani si'a yejaña pa'iyere cui'ne si'aye jo de'oyere ifiopi.

⁹ Iñoquë capi, ite: "Yë'ëpi më'ëre si'aye iyere isisi'i, më'ëpi yë'ëni do're ja'runi de'oquëre pani caquë pa'ito."

¹⁰ Caquëna, ja maca Jesupi ite capi: "Saijë'ë, Satanás. Toyase'e caji: Më'ë Ejaë, Diosuni de'oquëre pa'ni caquë sihuajë'ë.

Cui'ne jaëse'ere te'ire necaijë'ë."

¹¹ Ja maca Jesure josa yo'osiquë huati saquëna, huiñaohua'i dani de'oyerepa necaë'ë.

Jesús Galilea Yejana Yo'o Huëoye
(Mr 1.14-15; Lc 4.14-15)

¹² Juan co cuañisiquë pa'iji. Asani Galilea yejana saji'i, Jesús.

¹³ Jaje saisiqüeta'a pëama'ë pajji'i, Nazaret daripë. Pëama'ë Capernaum daripëna sani pajji'i, jaira të'tëpa pa'icona, Zabolón cui'ne Neftalí yeja quë'rona.

¹⁴ Jaje yo'opi, Isaiás Maija'quëre quëacaiquë toyaquë pa'ise'epi ti'ajaquë caquë i toyase'e caji:

¹⁵ "Zabolón cui'ne Neftalí yeja pa'icohua'ipi,

Jai tsiaya të'tëpa ma'a pa'icohua'ipi,

Jordán tsiaya je te'te pa'icohua'ipi,

Galilea judío pai peo hue'ña pa'icohua'ipi.

¹⁶ Nea hue'ñare pa'isicohua'ipi

Jaiye miañere ñahuë.

Cui'ne ju'iñepi tëhuosicohua'i pa'isicohua'ini,

Miañere papi ñata saopi."

¹⁷ Ja maca Jesús quëa huëopi, ñeje caquë: "Ja'në cuasase'e jeoni ponëjë'ë, ma'tëmo cuañeñe ja'yere pa'iji."

Cuatro Hua'i Yo'ecohua'ire Jesús Soiye
(Mr 1.16-20; Lc 5.1-11)

¹⁸ Jesús Galilea jaira të'tëpajala saiquëpi ja maca ñapi, cayahua'ire, yo'jeipi cui'ne maja'yëpi pa'ijëna. Simón jare ipi yequë mami Pedro hue'equëpi, cui'ne i yo'jei Andrés paë'ë. Hua'i yo'ecohua'i sête tsiayana yo'eñu'u cajë yo'e nëare jea dësohuë.

¹⁹ Ja maca Jesús capi, jaohua'ire:

"Tuijë'ë, yë'ëni. Yë'ëpi paire yo'ecohua'ire nesi'i, mësarute."

²⁰ Jaje ca maca iti macapi johua'i yo'e nëa se jeoni i ja're coní saë'ë.

²¹ A'ri maña seña maca Jesús saiquëpi ñapi, cui'ne cayaohua'ire yo'jeipi, maja'yëpi pa'ijëna. Jaohua'i cato Zebedeo mamajë paë'ë, Jacobo cui'ne Juan. Jaohua'ipi pëca ja'quë ja're coní johua'i yo'e nëare que'quejë jai yohuëre paë'ë. Pa'ijëna, jaohua'ire Jesupi soipi.

²² Soina, iti macapi yohuëre jeoni cui'ne pëca ja'quëre saiyë caní i ja're coní saë'ë.

Jesús Jai Paire Ye'yaye
(Lc 6.17-19)

²³ Jesús si'a hue'ña Galilea quë'ro ye'yarojaji'i, pai tsi'si hue'ñana. De'o cocare quëaquë, cui'ne Maija'quë cuañeñe ayere quëaquë cui'ne si'a ju'i dahuë jujuquë cuji'i.

²⁴ Jaje yo'ocuëna, Jesús yo'oye Siria yeja pa'icohua'i asahuë. Asani si'aohua'i ai yo'ocohua'ire dahuë, i quë'rona. A'si ju'icohua'ire, co'a joyo hue'ecohua'ire, hue'huë dahuë ju'icohua'ire, cui'ne quë'quë dahuë ju'icohua'ire dahuë. Dajëna, Jesupi jujupi.

²⁵ Jaje yo'ocuëna, jai pai Galilea acohua'ipi Decápolis pa'icohua'ipi, Jerusalén pa'icohua'ipi, cui'ne Judea yeja pa'icohua'ipi cui'ne Jordán tsiaya je te'te pa'icohua'ipi coní ite pe'tehuë.

5

Cutihüë Pa'i Quëase'e

¹ Si'a paire Jesús ñani ai cutihuë mëni jarona ja'rupi. Ja'runa, ite ye'yecohua'ipi i quë'rona tsi'sihuë.

² Ja maca Jesupi ye'ya huëopi, ñeje caquë:

³ "Joyo pa'iyë caraji cajë asacohua'ipi sihuacohua'i pa'iyë, Ma'tëmo johua'i tseco pa'iyë sête.

⁴ Oicohua'ipi sihuacohua'i pa'iyë, Maija'quëpi johua'i oiyere ne de'huacaija'quëni.

⁵ Teaye pa'i a'ë cuasa joyo hue'ecohua'i maña sihuacohua'i pa'iyë, Maija'quë ca nëosi yejare pa'ija'cohua'ipi.

⁶ Sihuacohua'i pa'iyë, nuñere pare yo'oñu'u cajë aó ëa ju'iñeje pa'ye cui'ne oco ëa ju'iñeje pa'ye nuñerepa yo'oyere yëcohua'i cato. Jaje pa'ina, Maija'quëpi cöcaina, de'hue yo'o tija'acohua'i a'ë, johua'i yëye.

⁷ Ai yo'ocohua'ire oijë cöcaicohua'ipi sihuacohua'i pa'iyë, johua'ireje Diusupi oi ñaquë cöcaija'quëni.

⁸ De'ó joyo hue'ecohua'i cato sihuacohua'i pa'iyë, Maija'quëre ñaja'cohua'ipi.

⁹ De'oye jo'cua pa'iyere cajë ai yo'ocohua'i cato sihuacohua'i pa'iyë, Maija'quë mamajërepa pa'ija'cohua'ipi.

¹⁰ Maija'quë yëyere yo'ojëna, yecohua'ipi sañope josa yo'ojëna, ai yo'ocohua'i cato sihuacohua'i pa'iyë, ma'tëmo johua'i tseco pa'iyë sëte.

¹¹ Mësarute paipi co'acohua'i a'ë cajë, co'aye yo'ojë, cosojë sañope cacohua'i pa'ito sihuacohua'i pa'iyë, yë'ë do'ire ca cuañojë.

¹² Ai yo'osicohua'i cato jaiye ma'tëmona de'huacaisi co'amaña payë. Jaje pa'ito ai sihuajë de'oye pa'ijë'ë, co'a ju'iñe peoyerepa, yure mësarute yo'oyeje pa'ye Maija'quëre tsoe quëacacohua'ireje sañope yo'ojë pa'ahuë'ë.

Asije Pa'iyë Cui'ne Iye Yeja Pa'ire Miacaieye
(Mr 9.50; Lc 14.34-35)

¹³ Mësarü a'ë, asije pa'iohua'i, iye yeja pa'ini. Jaje pa'iohua'ita'a sai ja'ñere carajaisicohua'i pani cöcaie peoji. Jaje pa'ina, ti cöcaie peocore yejana jöcöyë pa'iji, paipi tsa'cujëna, ujja'core.

¹⁴ Mësarü toaje pa'iohua'i pa'iyë, yecohua'ire miacaieye iye yeja pa'ini. Pai daripëpi ai cutihuëre pa'ini peoji, catiye.

¹⁵ Mahuë sa'nahuëna nëcöja'coni toaje tsëoma'cohua'i a'ë. Coa ai jerepa huë'e pa'icohua'ire miacajja'coni tñarepa nëcöcohua'i a'ë.

¹⁶ Jaje mësarujë tñarepa pa'ire miacaicohua'i pa'ijë'ë. Jaje pa'ijëna, paije mësarü de'oye pa'iyere ñajë mësarü ja'quë ma'tëmo pa'iquëre jaohua'ijë sihuajë de'oquë api, caja'cohua'ire.

Jesús Cui'ne Cuañese'e

¹⁷ Yë'ëpi Moisés cuañese'ere cui'ne Maija'quëre quëacacohua'i ye'yase'ere nejosi'i caquë daisiquë api cuasama'pë pa'ijë'ë. Yë'ë cato jaohua'i case'ejë pa'ye yo'o tija'si'i, caquë daisiquë a'ë.

¹⁸ Jaje pa'ina, nuñerepa cayë, mësarute. Ja yë'ta'a ma'tëmo cui'ne yeja pa'ito cuañese'ere te'le toya e'quehuëje nejoñe peoji, cui'ne te'le coca yë'opoje. Jaje pa'ina, si'aye ca nëose'e tija' macajja'a pa'i ja'ñe a'ë.

¹⁹ Jaje pa'ina, iye cuañese'e ayere de'oye sehuoma'quëpi ai a'riquë macapi, paini i yo'oyeje pa'ye se ye'yasiquë pani, ai a'riquë maca ma'tëmo cuañe hue'ñana pa'ija'quë api. Jaje pa'iquëta'are de'oye sehuocaiquëpi yecohua'ire i yo'oyeje pa'ye se ye'yasiquë cato Maija'quë cuañe te'tena jaiquë pa'ija'quë api.

²⁰ Jaje pa'ina, mësarute cayë. Mësarupi cuañese'e ye'yacohua'ire cui'ne fariseohua'ire tëto sani nuñerepa Maija'quë yëyere yo'oma'cohua'i pani ma'tëmo cacaye peoji.

Jesupi Ye'yaye, Pëñe Ayere
(Lc 12.57-59)

²¹ Mësarupi asahuë, mësarü aiohua'ire case'e: 'Huani jëoma'ë pa'ijë'ë. Jaje pa'iquëta'are huani jëosiquë pani pa'ito i yo'osi do'ire saiñe pa'iji cajë ña de'huaye pa'iji.'

²² Jaje pa'iquëta'are yë'ëpi cayë, coa yo'jeire pëisiquëje i pëisi do'ire saiñe pa'ina. Ña de'hua cuañöñe pa'iji cui'ne yo'jeire tea ju'iquëreje i tea ju'i do'ire saiñe pa'ina, ca tëji ëjaohua'ipi ña de'huaye pa'iji. Cui'ne yo'jeire huesë ai caquë cato toa yejana saiyere pa'iji.

²³ Jaje pa'iyë sëte, Maija'quëre isisi'i caquë saquëpi më'ë yo'jeipi më'ëre sañope cayë payere cuasani.

²⁴ Iti macana më'ë isisi'i caquë saye çani co'ini më'ë yo'jei jare cajei de'ojë'ë. Ja maca yureta'a sani më'ë isisi'i caquë dase'e Maija'quëna isijë'ë.

²⁵ Jaje pa'ina, më'ëni co'aye yo'opi caquë yequëpi, pai yo'oye ña de'hua hue'ñana saquë pa'ito iti më'ëre co'aye yo'opi caquë saquëni ja sai ma'ana ca de'huajë'ë, pai yo'oye ñaquëna, quëaye paja'quëre. Pañe cato pai yo'oye ñaquëna, quëaëna, asani jãëpi yureta'are më'ëre pa'ire cocohua'ina se cuañëina, co hue'ñana cöja'cohua'i a'ë.

²⁶ Nuñerepa cayë, cosi maca yureta'a, jaropi etaye peosipi, më'ë curiquë të'ña maña si'aye saima'ë pani.

Yequë Nomiore Yo'oye Ayere Jesús Case'e

²⁷ Mësarupi asacohua'i a'ë, tsoe case'e: 'Yequë nëjore yo'oma'pë pa'ijë'ë.'

²⁸ Jaje pa'iquëta'are yë'ëpi cayë. Nomioni yëjë ëaye ñasicohua'i pani, tsoe yeconi nomiore yo'ose'e pa'iji, joyopi iote se cuasase'epi.

²⁹ Jaje pa'ina, më'ë ëja te'te ñacoapi tayoyena ne taoco pa'ito dutani so'ona jeocojë'ë. Ai jerepa de'oji, më'ë capë acose'ere nejoñepi si'a më'ë capë toa yejana nejo cuañoñe paja'core.

³⁰ Cui'ne yeque panita'a, më'ë ëja te'te jëtëpi tayo yo'oyena sa yëto tëto tëani so'ona jeocojë'ë. Ai jerepa de'oji, te'e te'te capë nejoto si'a capë toa yejana nejo cuañoñe paja'core.

Jesús Ye'yase'e, Huejasicohua'ipi Jeocoyere
(Mt 19.9; Mr 10.11-12; Lc 16.18)

³¹ Ja'në tsoe case'e pa'iji: 'Nëjore jeoque pani iti jeoco do'ire quëaquë toyasi ja'huare isiyepa'iji.'

³² Jaje pa'iquëta'are yë'ëpi cayë. Ejëpi yequë ëmëohua'ire yo'oma'coni nëjore coa jeocoquë pani i do'ire yequë ëmëre yo'ojacore neji. Jaje pa'ina, jeocosisconi yequëpi huejani yequë nëjore yo'oque de'oji. Ja do'ire si'a jupë co'aye yo'o huesëyë.

Jesús Ye'yaye, Care Payë Caye Ayere

³³ Mësarupi asacohua'i a'ë, tsoe acohua'ire case'e: 'Mai Ejaë ña hue'ñana care payë ca huesosicohua'i cato jare neñe pa'iji, iti ca nëose'e.'

³⁴ Jaje pa'iquëta'are yë'ëpi cayë. Yequena se ca co'ijaijë care payë cajë cama'pë pa'ijë'ë. Ma'tëmona se ca co'ijaijë care payë cama'pë pa'ijë'ë. Jaro cato Maija'quë ñu'i saihuë a'ë.

³⁵ Yejana se ca co'ijaijë care payë cama'pë pa'ijë'ë. Jaroje Maija'quë tsa'cupa hue'ña'ë. Jerusalëna se ca co'ijaijë care payë cama'pë pa'ijë'ë. Jaoje Mai Ejaërepa daripë a'ë.

³⁶ Cui'ne më'ë siopëna co'ye ca co'ijai care payë cama'ë pa'ijë'ë. Je poja'icore cui'ne neacore ne t'iañu'ju caye'ni. Coa Maija'quëse'e neñe pa'iji. Jaje pa'ito jaje caye pajë'ë.

³⁷ Coa te'e nuñe cajë'ë, 'jaë'ë' panita'a 'pañë'. Jaje pa'iquëta'are ai jerepa se tuajë caye cato huati aye a'ë.

Jesús Ye'yayere, Pëijë Saiñe Ayere
(Lc 6.29-30)

³⁸ Mësarupi asacohua'i a'ë, Moisés cuañese'e caye: 'Yequë ñacoare nejocaiquë pani i ñacoapi sañe pa'iji. Cui'ne yequë cujire tëto jëyoquë pani i cujipi sañe pa'iji, cui'ne nejo cuañoquë.'

³⁹ Jaje pa'iquëta'are yë'ëpi cayë, mësarute. Co'a paire sañope saima'pë pa'ijë'ë. Coa ai jerepa tsiana tëtoquë pa'ito, yequë te'te tsiaje nëocaijë'ë, tëtojaquë.

⁴⁰ Cui'ne, yecohua'ipi më'ëre isijë'ë cajë, më'ë camisare jio pa'ito, dëi ju' caje isijë'ë, sajjä.

⁴¹ Yeque co'amañare hue'equë te'e kilómetro sacaijë'ë, cajë cuañesicohua'i pa'ito ai jerepa caya kilómetros hue'ecaijë'ë.

⁴² Yequëpi më'ë co'amañare sequë pa'ito isijë'ë. Cui'ne ne tējini co'yosi'i caquë pa'ito isijë'ë. Coa ësema'ë pa'ijë'ë.

Më'ëre Sañope Yo'ocohua'ire Oijë'ë
(Lc 6.27-28, 32-36)

⁴³ Cui'ne asacohua'i a'ë, mësarut tsoe case'e: 'Oijë'ë, më'ë cajeire, më'ëre oiquëni, cui'ne më'ëre sañope yo'oqueñi oima'ë pa'ijë'ë.'

⁴⁴ Jaje pa'iquëta'are yë'ëpi cayë, mësarute. Oijë'ë, mësarute sañope yo'ocohua'ire. Mësarute co'aye cacohua'ire, de'oye pa'ija'ñere cacaijë'ë, mësarute cocohua'ire de'oye yo'ojë'ë cui'ne mësarute tea ju'ijë cui'ne co'aye yo'ocohua'ire oijë Maija'quëre seccaijë'ë.

⁴⁵ Jaje mësarut yo'ojë Maija'quë mamajë pa'ija'cohua'i a'ë, i yo'oyeje yo'ojë. I je'quë co'acohua'ire, cui'ne de'ocohua'ire ëšëcayie necaji'i. Cui'ne ocoyeje si'aohua'ire necaji'i.

⁴⁶ Jaje pa'iquëta'are mësarupi mësarute oicohua'ise'ere de'oye yo'ojë pa'icohua'i pani, ¿Iquëre mësarut isi cuañoja'cohua'i a'ni, ja yo'osi do'ipi? Curiquë pa'i do'i seccohua'i yo'oyeje yo'osicohua'i pani.

⁴⁷ Mësarut yo'je tsise'ere pëpajë yo'oni ¿Iquere de'oye yo'oye'ni? Si'ahua'i Maija'quëre sehuoma'cohua'i yo'oyere yo'oni.

⁴⁸ Nuñerepa de'oye yo'ocohua'i pa'ijë'ë, mësarut ja'quë nuñe yo'oque ma'tëmo pa'iquëje pa'iohua'i.

6

Jesús Ye'yaye, De'oyerepa Yo'oye Ayere

¹ Pa'ini de'oye yo'oyere iñoñu'u cajë yo'oma'pë pa'ijë'ë. Jaje cuasajë yo'ocohua'ire cato mësarut ja'quë ma'tëmo pa'iquëpi de'huacaisi co'amaña isiyepoaji.

² Jaje pa'ina, mësarupi peocohua'ini cocaisicohua'i pani si'a pa'i asajajë cajë carojaima'pë pa'ijë'ë, coa cacohua'i yo'oyeje. Jaohua'i cato pa'i tsi'sisi huë'ñana cui'ne ma'añana

carojaicohua'i a'ë, paipi de'ocohua'i a'ë, cajajë cajë. Jaje pa'ina, yë'ë mësarute nuñerepa cayë, jaje yo'ocohua'i cato tsoe payë, iohua'i yo'o do'ire isi cuañose'e pai sihuacaiyere.

³ Jaje pa'ina, mël'ëpi peocohua'ire co'amaña isiquë pani, mël'ëse'e yahurepa isi tējijj'ë, mël'ë de'o cajeireje quëaye peoye. Coa ne ma'ñeje pa'i pa'ijj'ë.

⁴ Coa yahue yo'ojj'ë. Cui'ne mël'ëpi jaje yahue yo'oquëna, më Ja'quëse'e ñasiquëpi mël'ëre co'amaña isisipi, de'huacaise'ere.

Jesupi Ye'yapi Señere
(Lc 11.2-4)

⁵ Cui'ne mësarupi secohua'i pani coa cacohua'i yo'oyeje yo'oma'pë pa'ijj'ë. Coa cacohua'i cato pai tsi'sisi huë'ñana huëni nëcani cui'ne ma'aña sonohuëapi señere yëcuhua'i a'ë, paipi ñajajë cajë. Care payë, ja yo'ose'epi tsoe payë, iohua'i yo'o do'ire isi cuañose'e pai sihuacaiyere.

⁶ Jaje pa'ina, mël'ëpi sequë pani mël'ë tu'rihuëna cacani eta sa'ro sioni më ja'quë mël'ë ja're con'i pa'iquëni sej'ë, jaropi. Ja maca mël'ë ja'quë mël'ë yahue yo'oye ñaquëpi, mël'ëre de'huacaisi co'amañare isija'quë api.

⁷ Maija'quëre se maca cui'na yë'ore ca co'ma'pë pa'ijj'ë, do'i peoyepi. Maija'quëre sehuoma'cohua'ipi jaiye te'oni cajëna, Diusu asacasipi cajë cuasacohua'i a'ë.

⁸ Jaohua'ijë pa'iohua'i pa'ima'pë pa'ijj'ë, mësaru cato. Mësaru ja'quë cato tsoe ñaji, mësarute caraye ja yë'ta'a mësaru ite sema'në.

⁹ Jaje pa'ina, mësarupi secohua'i pani ñeje sej'ë:

'Ma'tëmo pa'iquë yëquë ja'quë,
De'oyere pa'ë case'e pa'ijaquë, mël'ë mami.

¹⁰ Mël'ë cuañeñepi daijaquë yëquëna.

Mël'ë yëyepi yo'oye pa'ijaquë, iye yejaje jaro ma'tëmo yo'oyeje pa'ye.

¹¹ Yurepi isijj'ë, ao mañaje yëquëre caraye.

¹² Yëquë co'aye yo'ose'ere oi ne de'huacaij'ë, yequëre co'aye yo'osicohua'ire yëquë oijë ne de'huacaiyeje pa'ye.

¹³ Yëquëre neñañepi daina, coa ñama'ë, co'ayere esa nejocaij'ë. Mël'ë tse a'ë cuañeñe, jerepa pa'i pa'iyë cui'ne de'oyerepa, carajaiñe peoyerepa. Jaje pa'ijaquë.

¹⁴ Jaje pa'ina, mësarute co'aye yo'ocohua'ire oijë ne de'huacaij'ë. Mësarupi jaje yo'ocohua'i pa'ito, Diusu ma'tëmo pa'iquëje mësaru tayoyere oi ne de'huacaija'quë api.

¹⁵ Jaje pa'iquëta'are mësarupi yecohua'ire co'aye yo'oyere oijë pa'ijaquë cajë ne de'huacaiye pato mësaru ja'quë ma'tëmo pa'iquëje mësaru tayo yo'oyere oi ne de'huacaiye pasipi.

Aoma'pë Señe

¹⁶ Jaje pa'ina, mësarupi ao aima'pë secohua'i pani coa cacohua'i yo'oyeje pa'ye oiyeye pa'i tsia neni yo'oma'pë pa'ijj'ë. Jaje yo'ocohua'i cato paipi ao aima'cohua'ipi yo'oyë cajajë cajë yo'oyë. Care payë, jaje yo'oni tsoe iye yejana payë, de'huacaisi co'amaña.

¹⁷ Jaje pa'iquëta'are mël'ëpi ao aima'quëpi sequë pani, tsia si'sini cui'ne nañaje de'oye yojj'ë.

¹⁸ Mël'ë ao aima'quëpi seña pajje ña ti'añe paja'cohua'ire, coa mël'ë ja'quë mël'ë ja're con'i pa'iquëse'e asajaquë, mël'ëre de'huacaisi co'amaña isija'quëse'e.

Ma'tëmo Co'amaña
(Lc 12.33-34)

¹⁹ Iye yejana jaiye co'amaña tsi'o timëma'pë pa'ijj'ë, pu'ju ai hue'ñana, co'amaña ne huesë hue'ñana, co'amaña ñacohua'i cacajë ima hue'ñana.

²⁰ Ai jerepa ma'tëmo co'amañana tsi'so timëj'ë, pu'juje aima'tona, co'amañaje ne huesëma'tona, cui'ne co'amaña yahue imama'tona.

²¹ Ja maca yureta'a mësaru joyopi co'amaña pa'i hue'ñare cuasajë pa'ija'cohua'i a'ë, mël'ë.

Mai Capëre Miacaiye
(Lc 11.34-36)

²² Mël'ë ñaco ca cato mël'ë capë miacaiye a'ë. Jaje pa'ina, mël'ë ñaco capi de'oye pa'ito, si'ao mël'ë capëje io miacaiyere pasipi.

²³ Jaje pa'iquëta'are mël'ë ñaco capi co'ayere cuasaquë ñaño pa'ito, si'a mël'ë capëje nea hue'ñare pa'iji. Jaje pa'ina, mël'ë ñaño nea'ñere pa'ito, ñaco ca neaño jerepa neaño pa'iji, yequeje!

Diusu Cui'ne Curiquë
(Lc 16.13)

²⁴ Te'ipi caya ëjaohua'ire necani t'i'añe peoji. Jaje pa'ina, yo'o jujani yequëni coequë, yequëni oipe pa'iji panita'a yequëni de'oye sehuoquë, yequëni de'oye sehuoma'ë sañope caye pa'iji. Jaje pa'ina, Maija'quëre cui'ne curiquëre necani t'i'añe peoji.

Maija'quë I Mamajëre Ñacaiye
(Lc 12.22-31)

²⁵ Mësarute cayë, ¿jere aija'cohua'i a'ni? ¿jere ucujë pa'ija'cohua'i a'ni? panita'a ¿jere caña ju'ija'cohua'i a'ni? cuasajë co'a ju'ima'pë pa'ijë'ë, caquë. Mësarü pa'iyepi aó aña jerepa do'i quë'ye a'ë. Cui'ne capëpi caña jerepa do'i quë'ye a'ë. Jaje pa'ito ¿me airepa co'a ju'iñe'ni?

²⁶ Ñajë'ë, pi'ani peo de'oto cu'icohua'ini aó tama'cohua'ita'a, tëama'cohua'ita'a tëani huë'ena de'huama'cohua'ita'a, de'hue mësarü ja'quë ma'tëmo pa'iquëpi aóquëna, pa'icohua'ini. Mësarü cato pi'a jerepa do'icohua'i a'ë.

²⁷ Jaje pa'ina, mësarü aquë ¿nepi ai jerepa co'a ju'i do'ipi jerepa tsoaquë ai de'oja'quë a'ni?

²⁸ Jaje pa'ito ¿Me yo'ojë caña ju'iyere cuasajë co'a ju'iñe'ni? Ñajë'ë, airo de'o joro mëañere, co'amaña ne ma'ñepi cui'ne oya ma'ñeta'a,

²⁹ pai ëjaë Salomón maca ju'ise'e seña maca de'o joro a'ë. De'o huë'ñare pare pa'inije jorohuëje pa'irepa ju'iyepi.

³⁰ Jaje taya je'quë esa paní tomeñeta'a Maija'quëpi de'o joro suñacaji, se ñataquëna, toapi ëo ja'ñeta'a. Jaje pa'ina, mësarü paire pare sëte Maija'quë jerepa de'oye ñacasipi. ¡Necaiye paja'quë api, cuasacohua'i maña!

³¹ Jaje pa'ito, co'a ju'ima'pë pa'ijë'ë, ¿iquere aija'cohua'i a'ni, cajë panita'a iquere ucuj'a'cohua'i a'ni, cajë panita'a iquere ju'ija'cohua'i a'ni? cajë.

³² Iye yeja pai cato jaje cajë oijë pa'iyë. Jaje pa'iquëta'are mësarü cato payë, ja'quëre, ma'tëmo pa'iquëre, si'aye mësarute caraye ñaquë pa'iquëre pani.

³³ Jaje pa'ina, Maija'quë quë'rore cuasajë cui'ne ¡yëyere de'oye yo'ojë pa'ijë'ë, Jaje cuasajë yo'ocohua'ini si'aye iti caraye isija'quë api.

³⁴ Jaje pa'iyepi sëte co'a ju'ima'pë pa'ijë'ë, ñamina'a pa'i ja'ñere. Ñamina'a cato yeque co'a ju'iñere isija'coa. Jaje pa'ina, ñamina'a pa'i ja'ñere se co'a ju'ima'pë pa'ijë'ë. Jaje pa'ina, mu'seña ñape tñe co'a ju'ijë ai yo'oye daji.

7

Pai Yo'oyere Ña De'hua Caye
(Lc 6.37-38, 41-42)

¹ Yecohua'i tayoyere pai yo'oyere ña de'huacohua'i cayeje cama'pë pa'ijë'ë, Maija'quëpi mësarü tayoyere sañope caye paja'quëre.

² Jaje pa'ina, mësarü yecohua'ire tayoyë case'eje pa'ye, cui'ne mësaruteje tayoyë caja'quë api cui'ne mësarü yecohua'ire yo'ose'eje pa'ye cui'ne yo'oja'quë api.

³ Jaje pa'ito ¿me më'ë yo'jei ñacoa ju'i ne'cua ña t'i'aë'ni, më'ë ñacoa ju'iconire jai soquë tsaroje pa'ioire ña t'i'ama'quëta'a?

⁴ ¿Me më'ë ñacoare soquë tiroje pa'ioipi ju'iona, 'Dajë'ë. Dutacasi'i, më'ë ñacoa ne'cua ju'icore casi'ni?

⁵ ¡Cua caquë maca! Du'ru macarepa më'ë ñacoa tiro ju'iconi duta jëoni, ja maca de'oye ñaquë më'ë yo'jei ñacoa ne'cua ju'icoreje dutacaiye pa'iji.

⁶ Jo'ya yaina de'oyere pare isima'pë pa'ijë'ë, mësarüna co'ye ponëni cucu huesojë peo huë'ñarepa. Sesena mësarü jai do'i yi'yore qeacaima'pë pa'ijë'ë, tsa'cu huesojë.

Señe Co'eye, Cui'ne Eta Sa'rona Tëcaye
(Lc 11.9-13; 6.31)

⁷ Isijë'ë cajë sëto Diosupi isija'quë api. Co'ecohua'ipi t'i'aja'cohua'i a'ë. Eta sa'rona të'cacohua'ini hui'yocaiye pa'iji.

⁸ Jaje pa'ina, isijë'ë caquë sequëpi isi cuañoja'quë api. Cui'ne co'equëpi t'i'añe pa'iji. Cui'ne eta sa'rona të'caquëni hui'yocaiye pa'iji.

⁹ Ique ëmëpi ¿Mësarü aquë mamaquëpi panre seina, quëna përe isiquë pa'iquë'ni?

¹⁰ Panita'a ¿tsiaya hua'ini seina, añani isiquë pa'iquë'ni?

¹¹ Jaje pa'ina, cayë, mësarü ai co'acohua'ita'a mësarü mamajëre de'o co'amañare isicohua'i a'ë. ¡Jaje pa'iyepi sëte mësarü ja'quë ma'tëmo aquëpi ai jerepa de'o co'amañare isiye pa'iji, ite secohua'ire!

¹² Jaje pa'ito, mësarü yecohua'ire de'oye yo'ó cuañone yëyeje pa'ye cui'ne de'oye yo'ojë'ë, yecohua'ire. Jaje cuañëji, Moisés cuañese'e cui'ne Maija'quëre quëacaicohua'i toyase'eje.

A'ri Jato Sa'ro
(Lc 13.24)

¹³ Cacajë'ë, a'ri jato sa'roja'a. Nejo hue'ñana sacco cato jai jato sa'ropi cui'ne jai ma'a'ë. Ja ma'ana jai pai cacayë.

¹⁴ Jaje pa'iquëta'are a'ri ma'api cui'ne a'ri sa'ro a'ë, pa'i hue'ñare pana sacco. Ja ma'a cacacohua'ipi a'ri pai pa'iyë.

Më'ë Yo'oyere Ñajë Asaja'cohua'i A'ë, Më'ëre
(Lc 6.43-44)

¹⁵ De'hua ñajë'ë, cosocohua'ire Maija'quë cocare cayë cajë cacohua'ire, yëi ñama ca'nire suñase'eje pa'iohua'ipi sa'nahuë cato yaijë pa'iohua'ipi ai yëcohua'ipi cacohua'ire.

¹⁶ Mësarü ñañe pa'iji, iohua'i yo'oyena. Miu soquë yëna tëama'cohua'i a'ë, cuiya'ire. Cui'ne ëne ñëna tëama'cohua'i a'ë, toa pëa.

¹⁷ Jaje pa'ina, jare de'o soquë yëpi de'o care quëiñe pa'iji, cui'ne co'a soquë yëpi jare co'a care quëiñe pa'iji.

¹⁸ De'o soquë yëpi co'a ca quëiñe peoji, cui'ne co'a soquë yëpi de'o ca quëiñe peoji.

¹⁹ Jaje pa'ina, si'a soquë de'o ca quëi ma'ñe cato cuëni toana ëo jë'o'ñe pa'iji.

²⁰ Jaje pa'ina, mësarü iohua'i yo'oyena ñaja'cohua'i a'ë.

Si'ahua'irepa Ma'tëmo Cacaye Peoji
(Lc 13.25-27)

²¹ Yë'ë, 'Ëjaë, Ëjaë', cacohua'ipi si'aohua'irepa ma'tëmo cuañe hue'ña cacama'pë pa'ija'cohua'i a'ë. Jaje pa'ina, yë'ë ja'quë ma'tëmo pa'iquë yëye yo'ocohua'ise'e caja'cohua'i a'ë.

²² Iti mu'se t'i'asi maca jai pai yë'ëre caja'cohua'i a'ë, 'Ëjaë, Ëjaë, yëquë më'ë mamire quëahuë, cui'ne më'ë mamipi cajë huatiahua'ire eto saohuë, cui'ne më'ë mamipi cajë jaiye pai yo'o t'i'a ma'ñe nehuë.'

²³ Jaje cajëna, yë'ëpi quëaquë caja'quë a'ë, jaohua'ire: "Ti ñama'quë a'ë, mësarute. Yë'ë quëno maca pa'ima'pë saijë'ë, co'ayere yo'osicohua'i."

Caya Huë'ña Ne Hue'ña
(Mr 1.22; Lc 6.47-49)

²⁴ Jaje pa'ina, yë'ë caye asani cui'ne yo'oquë cato, quëna yejana ta'ñe asaquëpi, huë'e nese'eje pa'i api.

²⁵ Jaje quëna yejana nesiconi oconi tsiaña col'jeni jai tutu dani yo'onije ne ta'one pao.

²⁶ Jaje pa'iquëta'are yë'ë caye asaquëta'a yë'ë cayeje yo'oma'quë cato mejahuëna huesëquëpi huë'e nese'eje pa'i api.

²⁷ Jaje huesëquë nesicopi, oconi tsiaña col'jeyena cui'ne, tutuyena, huë'e tani meadona, ija maca ai yo'oye pajji!"

²⁸ Jaje Jesús ca tëjisi maca paipi ai cuasahuë, ¿i ye'yayere de'oyerepa ye'yaquëni cajë?

²⁹ I ye'yaye cato cuañequë Ëjaërepa ye'yayeje pajji', pani cuañese'e ye'yacohua'i ye'yayeje pa'ye.

8

Jesús Jujucaye, Ja'ju Dahuë Ju'iquëre
(Mr 1.40-45; Lc 5.12-16)

¹ Jesús ai cutihuëpi cajëina, jai pai ite pe'tehuë.

² Pe'tejëna, ja'ju dahuë ju'iquëpi Jesús quë'rona tsiojani do're ja'runi capi.

"Ëjaë më'ëpi yë'ëre ju'i dahuë jujucaye yëni necaijë'ë."

³ Jaje caquëna, Jesupi jëtëpi patoquë capi:

"Yëyë, si'si peoquë pa'ijë'ë."

Jaje ca maca ja'ju dahuë ju'iquë pa'isiquëpi tsoe de'oquë pajji'.

⁴ Cui'ne ja maca Jesupi capi, ite:

"Ina, yecohua'ire quëama'pë pa'ijë'ë. Coa Maija'quë huë'ere necaiquëse'ere sani iñojë'ë. Iñoquë Moisés cuañequë pa'ise'ere isijë'ë, Maija'quëna. Jaje yo'oquëna, si'aohua'i ju'i dahuë peoquë tmesiquëpi yo'o'ji, cuasajë ñaja'cohua'ire."

Jesús Jujucaye, Romano Jo'yaëre
(Lc 7.1-10)

⁵ Jesús Capernaum yejana sa t'i'acquëna, te'i Capitán romanopi tsio dani ite seji'i,

⁶ ñeje caquë:

"Ëjaë, yë'ë huë'e ñacaiquëpi yë'ë jo'yaëpi ju'iji. Ti cui'ma'ë cui'ne ai a'si ju'iji."

⁷ Caquëna, Jesupi capi, ite:

"Yë'ëpi sani jujusi'."

⁸ Caquëna, Capitánpi sehuopi:

“Co'acquë maca'ë, Ëjaë, yë'ë huë'ena daima'ë pa'ijë'ë. Coa co'ya ja'ñese'e se cuañejë'ë. Jaje yo'ouna, yë'ëre necaiquëpi co'yajaquëre.

⁹ Jare yë'ëpi ëjaëohua'ipi meñe cuañesiquëpi pa'iyë. Jaje pa'ita'a yë'ë soldado paireje se meñe payë, yë'ë cuañecohua'ire. Yë'ëpi jaohua'i aquëni 'saijë'ë' cato saiji. Cui'ne 'daijë'ë' ca maca daiji. Cui'ne yë'ëpi yë'ë jo'yaëre 'jaro nejë'ë' caquë cuañeru, yë'ë cuañese'ere nequë api.”

¹⁰ Jaje caquëna, Jesús asani ta'ñerepa caquë a'ni cuasaquë ñapi, ite. Ja maca ite pe'tecohua'ire capi:

“Nuñerepa cayë, si'a Israel pai ti peohuë, iquë cuasayeje ta'ñe cuasacohua'i.

¹¹ Jaje pa'ina, yë'ëpi cayë, jai pai ëšë mëi huë'ñapi cui'ne ëšë du'i huë'ñapi daija'cohua'i a'ë, Abraham, Isaac, cui'ne Jacobo ja're çoni ma'tëmona aija'cohua'ipi.

¹² Jaje pa'iquëta'are iti ma'tëmo pati'ñe pa'iohua'ipi nea huë'ña huë'sena jeococohua'i pa'ija'cohua'i a'ë. Jaropi oijë cuji qui'coja'cohua'i a'ë.”

¹³ Ja maca Jesús capitánre capi:

“Saijë'ë më'ë huë'ena, më'ë cuasase'eye yo'ose'le pa'ijaquë.”

I jaje ca maca j jo'yaë co'yasiquë paji'i.

Pedro Huaore Jujucaye

(Mr 1.29-31; Lc 4.38-39)

¹⁴ Pedro huë'ena Jesupi saji'i. Sani ñapi, Pedro huaopi çai saihuëre suña dahuëre ju'icopi uiona.

¹⁵ Ñani ja maca jote jëtëpi patoquëna, suña dahuë peo huë'ña jeouna, huëni jopi ite necai huëo.

Jai Paire Jujucaye

(Mr 1.32-34; Lc 4.40-41)

¹⁶ Ñami de'oye ja'i maca jai pai Jesús quë'rona huati quë'iohua'ire dahuë. Darena, te'e yë'opo cayepi huatiohua'ire eto saopi, cui'ne ju'icohua'ireje jujupi.

¹⁷ Iye cato Maija'quëre quëacaiquë Isaiás caquë pa'ise'epi ti'aëna, yo'opi. Ñeje case'epi: “Ipi mai ju'ñere huë'equë saji'i cui'ne mai ju'i dahuëje jujucaji'i.”

Jesure Pe'teye Yëcohua'i Ayere Quëaye

(Lc 9.57-62)

¹⁸ Jesús j quë'rona jai pai tsi'sijëna, ñani jaira je te'tena jeñu'u ne de'huajë'ë cuañepi, j ye'yacohua'ire.

¹⁹ Caquëna, ja maca cuañese'e ye'yaquëpi Jesús quë'rona tsio dani capi:

“Ye'yaquë, coa si'a huë'ña më'ë saina, tuiye yëyë.”

²⁰ Caquëna, Jesupi sehuopi, ite:

“Airo yai mañaje coña pacohua'i a'ë, cui'ne pi'aje iohua'i tsianoa pacohua'i a'ë. Jaje pacohua'ita'are Pai Mamaquë cato peoquë api, j siopë tëoni pëa huajë huë'ñaje.”

²¹ Caquëna, j ye'yacohua'i aquëpi ite capi:

“Ëjaë, du'ru yë'ëta'a yë'ë ja'quëre tajasi'i.”

²² Caquëna, Jesupi sehuopi, ite:

“Yë'ëni pe'tejë'ë, iohua'ise'e tajajë ju'isicohua'ire jare cui'ne ju'isicohua'ije pa'iohua'ipi.”

Jesupi Tuture Cui'ne To'añere Cuañëne

(Mr 4.35-41; Lc 8.22-25)

²³ Ja maca Jesús jai yohuëna aya mëni saina, j ye'yacohua'ije çoni saë'ë.

²⁴ Jaje saijëna, jairana ai tutu dapi, yohuëna to'añepi cacayerepa. Jaje yo'otoje Jesuta'a çaisiquëpi paji'i.

²⁵ Pa'ina, ja maca j ye'yacohua'ipi ite sani ne sëttojë cahuë:

“iËjaë, huasojë'ë! jMai ea du'iyë!”

²⁶ Ca maca jpi sehuopi:

“¿Ina me yo'ojë airepa ca'raye'ni? jMësarü, Maija'quëpi nequë api, cuasayere a'ri maña payë!”

Cani huëni nëcani tuture cui'ne co'poyere yo'oma'o capi. Ca maca jairapi ti yo'oma'corepa de'o nëco'ë, tutujë peoyerepa.

²⁷ Iohua'ipi jare ñani ai cuasajë cahuë:

“¿Iqueire pa'ni, iquë, ja jerepa tutupi cui'ne jai tsiayapi asani sehuoquërepa?”

Gadara Yeja Acohua'ipi Huati Quë'iohua'i Pa'ise'e

(Mr 5.1-20; Lc 8.26-39)

²⁸ Jesús jaira je te'tena, Gadara yejana ti'asi maca huati quë'iohua'ipi caya ëmëohua'i ju'isicohua'ire ta huë'ñapi etani daicohua'ipi j quë'rona tsio daë'ë. Cayahua'i huati

quë'iohua'i paë'ë. Jaje pa'iohua'ipi pa'ijëna, yecohua'ijë ja ma'a ti cu'iyë pahuë, ai pëti yëcuhua'i pa'ijëna, ca'rajë.

²⁹ Jaohua'ipi ñani cuihuë, ñeje:

“¿Me nesi'quë yëquëre josa yo'osi'i caquë daquë'ni, Maija'quë mamaquë? ¿Ja yë'ta'a nejoñe ti'ama'në yëquëre ai yo'oyena, nejosi'i caquë daquë?”

³⁰ Jaropi a'ri maña so'ore jai sese tsëcapë aore aijë nëtërojajë'ë.

³¹ Jaje nëtërojajëna, asajë co'a joñoapi Jesure seë'ë:

“Më'ëpi yëquëre eto saoquë pani, coa ñajë'ë yequëse'e sesena cacaja'cohua'ire.”

³² Cajëna, Jesupi capi:

“De'oji, cacajë'ë.”

Caëna, ja maca jaohua'ire pa'isicohua'ipi, co'a joñoapi etani sesena caca maca sesepi tëtëpajaja' hua'que tòmëjë jairana dutu jujuhuë.

³³ Ja maca sesere ñacohua'ipi quëquëni huë'huëjë pai daripëna ti'ani si'aye iti yo'ose'e quëajë cui'ne huati quë'iohua'i pa'isicohua'ire yo'ose'eje quëahuë.

³⁴ Quëajëna, asani pai daripë pa'icohua'ipi si'aohua'i Jesús pa'i huë'ñana daë'ë. Dani ite ñani se'i'ë, saijë'ë, iño yëquë quë'ro pa'ima'ë, cajë.

9

Quë'quë Dahuë Ju'iquëre Jujuye

(Mr 2.1-12; Lc 5.17-26)

¹ Jaje cajëna, Jesús asani yohuëna aya mëni jaira je te'tena jëji'i, i pa'i daripëna.

² Jarote pa'ina, quë'quë dahuë ju'iquëpi cai saihuëre uina, dahuë. Jujuquë api cuasajë yo'orena, ñani capi, ju'iquëre:

“Tsihua'ë co'ya huajësi'i caquë yo'ojë'ë. Më'ë co'aye yo'ose'e yurepi oi ne de'huacaiyë.”

³ Jaje caquëna, cuañese'e ye'yacohua'i acohua'ipi cuasahuë: “Iquë Maija'quëni cue'cuequë jaje caji cajë.”

⁴ Jaje cuasajëna, Jesús asaquë capi, jaohua'ire:

“¿Me yo'ojë mësaruru co'ayerëpa cuasayere paye'ni?”

⁵ Jaje pa'ito ¿me cayëpi de'okuë'ni, ‘Më'ë co'aye yo'ose'ere oi ne de'huacaiyë’ cayë, panita'a ‘huëni saijë'ë’ cayë?”

⁶ Jaje se cani capi: “De'oji. Iñosi'i, Pai Mamaquë iye yëjare pa'i tutu quë'irepa pa'iyere, pai tayo co'aye yo'oyere oi ne de'huacaiyere.” Cani quë'quë dahuë ju'iquëre capi:

“Huëjë'ë. Huëni më'ë ui daisicore de'huani huë'ena saijë'ë.”

⁷ Jaje ca maca quë'quë dahuë ju'iquëpi huëni i huë'ena saijë'ë.

⁸ Paipi ja yo'ose'ere ñani ai ca'rajë Maija'quëre de'okuëre pa'ni cajë sihuahuë, paina Maija'quëpi iye tutu isise'ere, cuasajë.

Jesús Mateore Soiye

(Mr 2.13-17; Lc 5.27-32)

⁹ Ja yo'o sitopi jëoni saji'i, Jesús. Saisiquëpi Mateore ñapi, pa'i do'i sai huë'ñare ñu'i curiquëre seina. Ñani capi:

“Pe'tejë'ë, yë'ëre.”

Jaje caëna, Mateo huëni i ja're saji'i.

¹⁰ Mateo huë'ena aq ai saihuëre Jesús ñu'i aina, pa'i do'i secohua'i cui'ne co'aye yo'ocohua'i dani te'e Jesús ja're con i aq ai saihuëre paë'ë. I ye'yacohua'ijë jarote con paë'ë.

¹¹ Jaje yo'ojëna, fariseohua'ipi ñani i ye'yacohua'ire se'i'ë. “¿Me yo'okuë mësarute ye'yaquë curiquë pa'i do'i secohua'i ja're cui'ne co'aye yo'ocohua'i ja're con aiquë'ni?”

¹² Jesupi iye asani capi:

“De'oye huajëcohua'i pa'icohua'ipi jujuquëre co'ema'cohua'i a'ë. Ju'icohua'ipi co'ecohua'i a'ë, jujuquëre.”

¹³ Jaje pa'ito sani iye toyase'e cayere ye'yëjë'ë: ‘Ai yo'ocohua'ire teaye ñani coçaiyere yë'ë cato yëyë. Coeyë, nëicohua'ire huani isiyë cato.’ Jaje pa'ina, yë'ë cato daima'ë paë'ë, de'ocohua'ini soisi'i caquë. Tayo yo'ocohua'ini caquë daë'ë, jaohua'ipi johua'i yo'oye jëoni ponëjajë caquë.”

Jesure Señe, Aima'pë Señere

(Mr 2.18-22; Lc 5.33-39)

¹⁴ Juan oco doquë ye'yacohua'ipi Jesure tsio dani se'i'ë:

“Yëquë cui'ne fariseohua'i ja're aq aima'pë seña. ¿Me yo'ojë më'ë ye'yacohua'ise'e yo'omapë pa'iyë'ni?”

¹⁵ Cajëna, Jesupi sehuopi:

“Mësarupi ñacohua'i a'ë, hueja posë pa'ina, ñañu'u cajë daisicohua'ijë oima'cohua'i pa'iyë. Jajë pa'isicohua'ita'are t'ï'aja'coa, hueja posëni yequë mu'se jio jëocaiye. Ja macata'a aõ aima'pë seja'cohua'i a'ë.

¹⁶ Yecohua'ijë ai ju'i çana huajëcopi se sëo de'huama'cohua'i a'ë, huajëcore se sëosicopi jujëña, quërësiõ ai jerepa huajëcore ne yeto saoye pa'iji, ai ju'i çare.

¹⁷ Cui'ne ai ca'ni topëna huajë cuiya'i çonore ayama'coa. Jajë pa'iquëta'are ayasico pa'ito ai ca'nihuëpi o'saona, joni saiona, si'aye o'sa çono cui'ne topë nejoñe pa'iji.”

Jairo Mamaco Cui'ne Jesús Cañare Patoco

(Mr 5.21-43; Lc 8.40-56)

¹⁸ Ja yë'ta'a Jesús iyere caquëna, Judío pai ëjaëpi tütani i ña hue'ñana do're ja'runci capi: “Yë'ë mamacopi ja'arepa juni huesëo. Jajë pa'iquëta'are më'ëpi dani jëñapi iona patoquë pa'ito cui'naopi huajëco huë'ijä'coa.”

¹⁹ Caquëna, Jesupi asani huëni i ja're çoni saji'i. Saina, i ye'yacohua'i çoni saë'ë.

²⁰ Ja mu'se si'anë tsie cajequëna, doce õmetëca ju'icopi Jesús jeteyo'jeja'a tsiojani yahuerëpa i ju'i çana pato,

²¹ I ju'i çana patoni co'yaja'coa'ë cuasaco.

²² Jajë yo'ocona, Jesupi co'ye ponëni iote ñani capi:

“Co'ya huajëj'ë, tsihua'o, jujuquë api, më'ë cuasasi do'ire.”

Ca maca jare iti macapi co'yasico paco'ë.

²³ Jesús pai ëjaë huë'ena t'ï'aque ñaquëna, musica yo'ocohua'i ne de'huasicohua'ipi paë'ë, ta maca yo'ocaija'cohua'ipi. Pa'ijëna, paije ai cuijë oicohua'ijë paë'ë, iti maca.

²⁴ Pa'ijëna, ñani capi:

“Etajë'ë. Tsihua'o ju'ïma'co paco'ë, coa çäico.”

Jajë caquëna, paipi coa cani cuasajë cue'cuejë sohuë.

²⁵ Jajë cuasatoje Jesupi paire hue'sena eto saopi. Eto saoni, cacani tsihua'ore jëtëpi tseaquëna, huajëcorepa huëco'ë.

²⁶ Ja yo'ose'ere si'a hue'ña jaro pa'icohua'i asahuë, yecohua'ipi se quëajëna.

Jesupi Cayaohua'ire Ñama'cohua'ire Jujuse'e

²⁷ Jaropi Jesús etani sai maca caya ëmëohua'i ñama'cohua'ipi i David mamaquë yëquëre oijë'ë! i Teaye ai yo'oyël cajë cuijë daë'ë.

²⁸ Huë'ena Jesús cacasi maca ñama'cohua'ipi i quë'rona tsio datena, ipi seji'i, iohua'ire: “¿Mësarü yë'ëpi necaiquë api ñeje pa'ye cuasaye?”

Caquëna, iohua'ipi cahuë:

“Jajë cuasayë, Èjaë.”

²⁹ Cajëna, Jesupi iohua'ï ñaco çana patoquë capi:

“Mësarü cuasase'eje nese'le pa'ijäquë.”

³⁰ Ca maca ñacohua'ï ponëhuë. Ponësi maca Jesús jaohua'ire cuañëpi, ñeje caquë:

“De'hua yecohua'ire quëaye peoyerepa cu'ijë'ë.”

³¹ Jajë casiquëta'are coa sa etani quëahuë, si'a huë'ña pa'icohua'ire, Jesús iohua'ire jujuse'ere.

Coca Cama'quëre Jujucaiye

³² Ñama'cohua'ï pa'isicohua'ipi eta maca, Jesús quë'rona dahuë, coca cama'quëre huati quë'ire.

³³ Dasi maca Jesupi huatire eto saona, coca cama'quë pa'isiquëpi coca ca huëopi. Jajë caquëna, paipi ñani ai cuasahuë.

³⁴ Jajë cuasajë fariseo paipi cahuë:

“Iquë cato huatïohua'ï ëjaëpi de'oye sehuojëna, huatire eto saoji.”

Jesús Paire Oiyë

³⁵ Pai ñape daripëa pai tsi'si huë'ña pa'iyena Jesús cu'i ye'yarøjaji'i. Maija'quë cuañë te'te ayere de'ococare quëaquë. Cui'ne si'a ju'ï dahuë jujucaï, cui'ne a'si ju'ijë ai yo'ocohua'ireje jujucaji'i.

³⁶ Yëi ñama iohua'ire ñacaiquëre peocohua'ijë pa'iohua'ipi pai maña ai yo'ojë cui'ne co'a ju'ijë pa'ijëna, ñani oji'i.

³⁷ Jajë oi i ye'yacohua'ire capi:

“Nuñërepa jaiye a'ë, tëaye. Jajë pa'iquëta'are necohua'ipi a'ri pai pa'iyë.

³⁸ Jajë pa'ina, Maija'quëni sejë'ë, iti tse aquëni, jaëpi iti tëacohua'ire jëjo daoja'quëre.”

10

Jesús Doce Ye'yecohua'ire Soiye
(Mr 3.13-19; Lc 6.12-16)

¹ Jesupi ñ doce ye'yacohua'ire soini tutu isipi, huatiohua'ire etoye cui'ne si'a ju'i dahuë jujuye cui'ne ai yo'ojë a'si ju'icohua'ire jujuyeje.

² Ñeje hue'ecohua'i paë'ë. I doce jëjo saocohua'i cato: Simón cui'ne jare ñpi Pedro hue'equë paji'i. I yo'jei Andrés paji'i. Jacobo cui'ne ñ yo'jei Juan paë'ë, Zebedeo mamajë.

³ Felipe, Bartolomé, Tomás paë'ë. Cui'ne Mateo pa'i do'i curiquë tsi'soquë pa'isiquë paji'i.

⁴ Yequë Simónje paji'i, judío pairepa de'oye pa'iyere cuasajë yo'o tsëcapë aquë. Cui'ne Judas paji'i, Jesure yehuoja'quëje.

Jesús Jëjo Saoye, I Ye'yacohua'ire
(Mr 6.7-13; Lc 9.1-6)

⁵ I ye'yacohua'ire Jesús ñeje quëani jëjo saopi:

“Judío pai peocohua'i quë'ro saima'pë caquë cui'ne cacama'pë pa'ijë'ë, Samaria quë'roje.

⁶ Coa judío pai quë'rose'e sani quëajë'ë, yëi ñama ne huesëse'eje pa'iohua'ise'ere.

⁷ Tsoe tñ'api, Maija'quë cuañe te'tere pa'iyë, cajë quëajë'ë.

⁸ Ju'icohua'ire jujucaijë'ë. Ju'isicohua'ire ne huëojë'ë. Si'si dahuë ju'icohua'ire a'si peocohua'ire necaijë'ë. Huatire eto saojë'ë. Do'i peoye jujucaijë'ë, mësarute do'i peoye isise'eje cui'ne.

⁹ Curiquë sama'pë pa'ijë'ë.

¹⁰ Mësaruru ju'icose'ere ju'ijë saijë'ë. Te'le ju'i ca sajë'ë. Topëje saye pajë'ë, zapatoje. Soquë tupëje si'aye peocohua'i saijë'ë. Co'amaña nequë cato ñ ne do'ipi aiquë api.

¹¹ Jaje pa'ina, mësarupi pai daripëna panita'a te'ohua'ise'e pa'li hue'ñana tñ'asichua'i pani co'ejë'ë, de'oye ca paini. Tñ'ani ñ huë'ena pëajë'ë, quëa tëjini sai macaja'a.

¹² Huë'ena cacocohua'i pani pëpajë'ë, de'oye pa'ijajë cuasacaijë.

¹³ Jaje pëpajëna, ja huë'e pa'icohua'ipi yëjëna, iohua'ina de'oye pa'iyë jeocani pëpani saijë'ë. Jaje pa'iquëta'are jaje pëpajëna, coecohua'i pa'ito, ja pëpase'e jiojë'ë.

¹⁴ Cui'ne mësarute co'ejë cui'ne asayeje coecohua'i pa'ito, ja maca ja huë'epi panita'a ja daripëpi etani ne'ña mësaru tsa'cuse'ere hue'sena tñ'to tojë'ë.

¹⁵ Nuñerepa cayë. Jaje yo'osicohua'ire sañfe pasipi, pai yo'ose'e ña mu'se tñ'asi maca. Ja maca jaohua'ire Sodoma cui'ne Gomorra daripëa yo'ose'e seña maca co'ayere papi yo'oye pasipi.

Ai Yo'oye

¹⁶ Ai yo'oyena mësarute yë'ë jëjo saoyë, yëi ñamaje pa'iohua'ini yai jopona. Jaje pa'ina, añaje pa'iohua'i pa'ijë'ë, ta'ñe asajë yo'ocohua'i. Jaje pa'iohua'ita'a yecohua'ire sañope nema'cohua'ipi su'teje pa'iohua'i pa'ijë'ë.

¹⁷ De'hua ñajë'ë, mësarute paipi co'acohua'i a'ë cajë ëjaohua'ina isija'cohua'i a'ë, cui'ne të'caja'cohua'i a'ë, pai tsi'sisi huë'ñapi.

¹⁸ Cui'ne mësarute saja'cohua'i a'ë, cuañecohua'i quë'rona cui'ne pai ëjaohua'i quë'rona, yë'ë do'ire. Jaje yo'ojëna, mësaru quëaja'cohua'i a'ë yë'ë pa'iyë ayere. Jaohua'i asajëna, cui'ne judío pai peocohua'i asajëna, quëaja'cohua'i a'ë.

¹⁹ Mësaruni ëjaohua'ina isisicohua'i pa'ito co'a ju'ima'pë pa'ijë'ë. ‘¿Me caja'cohua'i a'ni?’ cuasajë ca ja'ñere co'ema'pë pa'ijë'ë. Maija'quëpi isija'quë api, coca caye tñ'asi maca.

²⁰ Maija'quë joyo isiyepi caja'cohua'i a'ë, jaje pa'ina.

²¹ Maja'yë jupëpi yo'je tsire tsea jeo cuañoja'cohua'i a'ë, huani jeaja'cohua'ire. Cui'ne pëca ja'quëohua'ipi mamajëre tsea jeo cuañoja'cohua'i a'ë. Mamajëpi pëca ja'quëohua'ire sañope yo'oja'cohua'i a'ë. Jaje yo'ojë mamajëpi pëca ja'quëohua'ire huahuo jeoja'cohua'i a'ë.

²² Si'a pai mësarute coeja'cohua'i a'ë, yë'ë do'ire. Jaje pa'itoje quëcoquë cui'ne nuñerepa pa'i carajaisiquëpi jaëpi huasosiquë pa'ija'quë api.

²³ Pai daripëre pa'ijëna, tseañu'u cajë co'ecohua'i pa'ito catijë'ë, yequë daripëna. Jaje pa'ina, nuñerepa cayë. Pai Mamaquë, ja yë'ta'a mësaru si'a Israel pai dari quëa saoma'ne daija'quë api.

²⁴ Ye'yequë cato ite ye'yaquëje pa'irepa peoji. Necaiquëje ñ ëjaëje pa'irepa peoji.

²⁵ Ye'yequëpi ite ye'yaquëje pa'i tñ'ani jje pa'i a'ë cuasaye pa'iji. Cui'ne co'amaña necaiquëpi ñ ëjaëje pa'i tñ'ani jje pa'i a'ë cuasaji. Jaje pa'ina, yë'eni yure ñti huati ëjaëpi caní ¿Me mësaruteje caye pañe'ni?

Neni Mai Ca'raye Pa'iquë'ni
(Lc 12.2-7)

²⁶ Ca'rama'pë pa'ijë'ë, paire. Si'aye ña ja'ñese'e pa'iji. Yahue sitona yo'ose'eje ña ja'ñese'e pa'iji. Si'aye asa ja'ñese'e pa'iji.

²⁷ Yë'è nea hue'ña case'ere mësarupi mia hue'ñana cajë'è. Cui'ne yë'è yahuese'ere, mësarupi tiñarepa hue'ña ëmëje totopi nëcajë cuijë'è.

²⁸ Ca'rama'pë pa'ijë'è, capë huani jeocohua'ire joyo huani ti'ama'cohua'ire. Ai jerepa ca'rajë'è, capë nejoquë cui'ne joyojë toa yejana nejoquëre pani.

²⁹ Te'e curi të'quire caya pi'are isicohua'i a'è, mësaru. Jaje a'ri do'icohua'ita'are, ja'quëpi ësequëna, te'ijë tomeñe pacohua'i a'è.

³⁰ Jaje pa'ina, mësaru sipòpë nañaje cuëcuese'e a'è, te'e mease'e si'aye cuëcuese'epi pa'iji.

³¹ Jaje pa'ina, ca'rama'pë pa'ijë'è. Mësaru a'è, pi'a jerepa do'icohua'i.

Jesure Cacaiye Pa'iji

(Lc 12.8-9)

³² Pai ña hue'ñana Jesús acohua'i a'è cacaisicohua'ire yë'ëje cui'ne yë'è ja'quë ma'tëmo pa'iquë ña hue'ñana yë'è pai a'è, caquë quëasi'i.

³³ Jaje pa'iquëta'are pai ña hue'ñana yë'ëre cacaima'cohua'ire yë'ëje cui'ne ja'quë ma'tëmo pa'iquë ña hue'ñana cacaiye paja'quë a'è.

Jesús Do'ire Paipi Hua Saiye

(Lc 12.51-53; 14.26-27)

³⁴ De'oye pa'iji ja'ñere necaisiquë iye yejana daji'i, cuasama'pë pa'ijë'è, yë'ëre. Yë'è cato coa ai jerepa sañope yo'oyere dahuë.

³⁵ Paipi pëca ja'quëre sañope yo'o ja'ñere dahuë. Mamacopi pëca ja'core sañope yo'oyere, cui'ne mamaquë nëjopi huaore pëicore paja'coa.

³⁶ Jaje yo'ojë cajë te'e tsëcapëta'a pai ñape johua'i pëicohua'ire paja'cohua'i a'è.

³⁷ Pëca ja'quëni cui'ne pëca ja'coni yë'ëre oiye jerepa oiquë pani do'i peoquë pa'iji. Cui'ne mamaquëni panita'a mamaconi yë'ëre oiye jerepa oiquë pani do'i peoji, yë'ëre.

³⁸ Cui'ne i pa'iyere ai oi yë'ëre pe'tema'quë pani do'i peoquë pa'iji, yë'ëre.

³⁹ Jëasi'i caquë yo'okuëpi i pa'iyere coa nejo huesoja'quë api. Jaje pa'iquëta'are yë'è do'ire yo'okuë i pa'iyere cuasaquë jëasi'i caquë yo'okuëpi i pa'iyere coa nejo huesoja'quë api. Jaje pa'iquëta'are yë'è do'ire yo'okuë i pa'iyere nejosiquëpi pa'iyere ti'aja'quë aquëpi.

Yo'osi Do'ire Isi Co'amaña

(Mr 9.41)

⁴⁰ Mësarute de'oye tsioquë pani yë'ëni de'oye tsioji. Yë'ëni de'oye tsioquë pani yë'ëre jëjo daosiquëni de'oye tsioji.

⁴¹ Maija'quë yo'o ja'ñere quëacaiquëni de'oye yo'okuë pani jare jaohua'ire isi co'amaña ayere ñne pa'iji, nesi do'i. De'o paini de'oye tsioquë pani jare nuñerepa pa'icohua'ire isi co'amaña ayere ñne pa'iji, nesi do'i.

⁴² Yë'ëre tuiquë macani oco mañare ocuasicohua'i pani de'o co'amaña isi cuañoja'cohua'i a'è."

11

Juan Ti Doquë Jëjo Saocohua'i Jesuna

(Lc 7.18-35)

¹ Jesús i doce ye'yacohua'ire johua'i yo'o ja'ñe quëa tëjini saji'i, ye'yaquë cui'ne quëasi'i caquë ja yeja pa'i daripëana.

² Juan co sitore ñu'iquëpi Cristo yo'oyere asani i ye'yacohua'ire Jesús quë'rona jëjo saopi, seni asaja'cohua'ire.

³ Më'è a'è, Cristo iti daija'quëre ca nëosiquë panita'a yequëre uteye pa'iquë cajë.

⁴ Jëjo saosicohua'ipi sejëna, Jesupi sehuopi, jaohua'ire:

"Sani Juanre cajë'è, mësaru ñase'ere cui'ne mësaru yure asase'ere.

⁵ Ñama'cohua'i pa'isicohua'ipi ñañere, cu'ima'cohua'i pa'isicohua'ipi cu'iyere, si'si dahuë ju'icohua'i pa'isicohua'ipi tome sayere, asama'cohua'ipi asayere, ju'isicohua'i pa'isicohua'ipi huajëcohua'i huëoyere, cui'ne co'amaña peocohua'ina de'o coca quëayere quëajë'è.

⁶ Yë'ëre jëa coema'cohua'ipi de'oye sihuajë pa'ija'cohua'i a'è, ire papi cuasacohua'ipi.

⁷ Jaohua'i saisi maca Jesús Juan pa'iyere ayere ca huëopi, paire. Ñeje capi: ¿Iquere mësaru soquë peo hue'ña saiscohua'i ñare'ni, catë ja'ore tutupi ju'acquëna, huahuëquëna, ñare?

⁸ ¿Iquëini ñare'ni, jaje pa'ito? ¿De'o caña suñasiquëni ñare? Tsoe mësarupi ñacohua'i a'è, pai ëjaohua'i huë'e pa'icohua'i cato de'o caña ju'icohua'i pa'iyere.

⁹ Jaje pa'ina, tëjiyerepa cayë. ¿Iquëini ñare'ni, sani? ¿Maija'quëre quëacaiquë? Jaje pa'ijë'è. Jaëpi Maija'quëre quëacaiquëni aquë jaëje pa'iohua'i peoahue'è, iquë Juan cato jerepa pa'i api.

¹⁰ Jaë, Juan ayere toyase'e caji, ñeje:

Yé'èpi jèjo saoyè, yé'ère quèacaiquère mè'è ña hue'ñana,
Mè'ère ma'a ne de'huacaija'quère.

¹¹ Nuñerepa cayè, mèsarute. Si'a pai tsoe pa'isicohua'ipi cui'ne yure pa'icohua'ije Juan oco doquère tètò saiscicohua'i peoyè. Jaje pa'iquèta'are ma'tèmo cuañe tètère a'riquè pa'iquèpi Juanre tètò saisiquè pa'iji.

¹² Juan oco doquè daisi maca acohua'ipi yureje tutu yo'oyè, ma'tèmo cuañe tètèna tì'añu'u cajè. Jaje yo'ojè tutu què'iohua'ise'e de'hue tì'añè.

¹³ Si'aohua'i Maija'quère quèacaiçohua'i cui'ne Moisés cuañese'e ye'yacohua'i cahuè, ma'tèmo ayere, Juan dai macaja'a.

¹⁴ Juan cato Elíaspi jà'èni Maija'quère quèacaiçohua'i ca'ahue'è, 'daija'què api'. Jaje pa'ina, mèsarupi i api cuasajè'è.

¹⁵ Cajoro hue'ecohua'ipi asajè'è, iye.

¹⁶ ¿Iquena conì quèa ññora'ye iye'nè pai pa'iye? Cani capi: Tsipi co'amaña huero hue'ñana ja'rusicohua'ipi dujè cajeohua'ire.

¹⁷ Ñeje cuiyeje pa'iohua'i a'è. Pi'cohuèapi juitoje pairama'pè paè'è, mèsarupi. Oi èaye jèjètoje mèsarupi oima'pè paè'è.

¹⁸ Juan cato daji'i, jaiye aò aima'quèpi cui'ne o'sa cono ucuma'quèpi. Jaje pa'ini mèsarupi cayè, huati què'i api. Jaje pa'iquèta'are Maija'què tã'ñe yo'oye cato ññoji, iti yo'oyepi.

¹⁹ Ja jeteyo'je daji'i, Pai Mamaquè aò aiquèpi cui'ne o'sa cono ucuquèpi. Jaje pa'ini cayè, jai aipi, cui'ne jai conoupi, co'aye yo'ocohua'i cajeipi cui'ne curiquè tsi'sohua'i cajeipi. Jaje cajèta'are Maija'què tã'ñe yo'oye cato ññoji, iti yo'oyepi."

Sehuoma'cohua'i

(Lc 10.13-15)

²⁰ Ja maca Jesús pai yo'o tì'a ma'ñere ne ññosi darire tutu yèhuopi, ñohua'i pa'iye ponèma'pè pa'isi do'ire caquè.

²¹ Yèhuoquè capi:

"¡Teayerepa Corazín daripè! ¡Betsaida daripè! Mèsarute ne ññose'eye pa'ye Tiro cui'ne Sidón darina ne ññoñe pa'ito tsoe asani ponèra'huè, ja'rè pa'ise'e jeoni. Cui'ne oijè suña cañani huatapi co'ye jo'jèni oijè ññora'huè, ñohua'i oiye.

²² Jaje pa'ina, mèsarute cayè. Pai yo'ose'e ña mu'se tì'asi maca ai co'ayerepa mèsarute sañe pa'iji, Tiro cui'ne Sidón daripèa sañe seña maca pa'yepi.

²³ Capernaum daripè ¿Mè'è ma'tèmore pana sa cuañoja'coa'è, cuasaco? Coa ai jerepa mè'è cato meñe caje huesèja'coa'è, ju'isicohua'i què'rona. Sodoma yejañana, mèsarute ññoñe pa'ye ññoñe pa'ito ñohua'i yo'oye jeoni ponèra'huè, cui'ne ja pai daripè ja yè'ta'a yureje patira'o.

²⁴ Jaje pa'ina, cayè, mèsarute. Pai ñape yo'ose'e ña mu'se tì'asi maca mèsarupi ai jerepa co'ayerepa saì cuañoja'cohua'i a'è, Sodoma yejaña què'ro pa'icohua'ire yo'ose'e jerepa pa'yepi."

Jesuna Sani Pèa Huajèye

(Lc 10.21-22)

²⁵ Ja mu'seña Jesús capi:

"Sihuayè, ja'què mè'ère ma'tèmo cui'ne yeja èjaère. Mè'èpi ññoñe, teaye pa'iohua'ini, tã'ñe pa'iohua'ire cui'ne tã'ñe asacohua'ire yahuesi co'amañare.

²⁶ Jaje pa'ijè'è. Ja'què mè'èpi yè jaje yo'ohuè.

²⁷ Yè'è ja'quèpi yè'èna si'a co'amaña isipi. Pèca ja'quèse'e mamaquère ñaji. Cui'ne mamaquèse'e pèca ja'quère ñaji. Cui'ne mamaquè ññoñe yè'ècohua'ise'e asaye pa'iji, ite.

²⁸ Daijè'è, yè'èna. Si'aohua'i co'amaña neje, cui'ne hue'ejè jè'josicohua'i yè'èpi pèa huajèye isisi'i, mèsarute.

²⁹ Yè'è pa'iyere ñani cui'ne yo'oñu'u cuasajè'è caquè yè'è yo'oye isiyè. Ye'yejè'è, yè'èni. Yè'è cato esa yo'o jujama'què a'è cui'ne jerepa pa'i a'è cuasama'què a'è. Jaje yo'onita'a tì'aja'cohua'i a'è, joyo pèa huajè hue'ña.

³⁰ Yè'è quèrè saihuère mèsarute isiyè, a'jiñe sayere cui'ne pèañe hue'eyere."

12

Jesure Yè'yecohua'ipi Huajè Mu'se Yo'oye

(Mr 2.23-28; Lc 6.1-5)

¹ Jesús tã sitoja'a saji'i. Jaje saina, i ye'yacohua'i aò èaye nèina, trigo sa'ñare tèa huèohuè. Tèani iti care aè'è.

² Jaje yo'ojèna, fariseohua'ipi ñani cahuè, Jesure:

"Ñajè'è, mè'è ye'yacohua'i co'amaña neñere. Co'amaña nema'a mu'se a'è."

³ Jaje cajëna, ìpi jaohua'ire capi:

“¿Nama'cohua'i a'ni, mësaru, David yo'ose'e ì cajeohua'i ja're conì aò èa ju'i maca?

⁴ Aò èa ju'ijë Maija'quë huë'e necaicohua'ise'e aifere Maija'quë huë'ena cacani David cui'ne ì cajeohua'i aë'è, ite cui'ne yecohua'ire ësese'ere, Maija'quëna isise'ere.

⁵ Moisés cuañese'epi toyase'e caji: 'Maija'quë huë'e necaicohua'i cato huajë mu'seje neñe payë.' Jaje pa'iquëta'are johua'ire sañope caye peoji.

⁶ Jaje pa'ina, cayë mësarute ìñore pa'iji, Maija'quë huë'e seña maca pa'ire papi.'

⁷ Iye toyase'e caye asama'pë paë'è, mësaru. Japi caji: 'Mësarupi paire teaye ñajë oicohua'i pa'iyere yë'è cato yëyë. Coeye nëicohua'ire huaijë isiye cato.' Paire oiyere asacohua'i pani paire do'i peocohua'ini co'acohua'i a'è caye para'huë, mësaru.

⁸ Jaje pa'ina, Pai Mamaquë cato huajë mu'se Ejaëpi."

Jëtë Cuenesicore Paquëre Jujuye

(Mr 3.1-6; Lc 6.6-11)

⁹ Ja maca Jesús jaropi sani pai tsi'si huë'ena cacapi.

¹⁰ Jarote te'ì jëtë cuenesicore hue'equëpi paji'i. Jaje pa'ina, ñani Jesupi tayo caëna, ìte sañope cayeque pa'iji cuasajë sei'è:

“¿Ju'iquëre jujuye de'oquë huajë mu'se pa'itoje?"

¹¹ Cajëna, Jesupi sehuopi:

“¿Nepi mësaru acohua'i yëi ñamapi cojena duquëna sani dutama'cohua'i a'ni, huajë mu'se pa'itoje?"

¹² Jaje pa'ina, paipi do'iji, yëi ñamare jerepa. Jaje huajë mu'se pa'itoje de'oye yo'oye pa'ito yo'oye pa'iji."

¹³ Cani ja maca ìte capi:

“Jëtëre mëajë'è."

Jaje caquëna, ìpi se mëaquëna, yequë te'te jëtëje pa'io huajëco ponëo.

¹⁴ Ja maca fariseohua'ipi etani Jesure huani jëo ja'ñere ca huëohuë, ¿me neni huani jëoja'cohua'i a'ni? cajë.

Jesús Ayere, Tsoe Quëase'e

¹⁵ Jesús jare asani jaropi yequë huë'ñana saji'i. Saina, jai pai ìte tuë'è. Jesupi coa si'a ju'ì dahuë ju'icohua'ire jujupi.

¹⁶ Jujuquë cui'ne ësëpi, yecohua'ire se quëayeje.

¹⁷ Iye cato yo'oreña, Maija'quëre quëacaiquë Isaías toyaquë caquë pa'ise'epi ti'a ja'ñere, ñeje:

¹⁸ Iquë api, yë'è jo'yaë yë'è sahuani tseasiquë,

Ìte oiyë, cui'ne ìni sihuaquë pa'iyë.

Ìna, yë'è jayo jëocaija'quë a'è.

Cui'ne ìpi si'a paire yë'è nuñerepa pa'ì yo'oyere quëacaija'quë api.

¹⁹ Paini co'a cocare cama'è pasipi, cuima'è pasipi.

Cui'ne ì cayeje asacaiye paja'cohua'i a'è, cu'ì huë'ñana.

²⁰ Catëpë ca'huere quë'ioereje ne jëyoma'è pasipi.

Cui'ne picose'e mëicoreje yayoma'è pasipi.

Ì nuñerepa cuañeñe ne macaja'a jaje yo'oja'quë api.

²¹ Si'a pai maña ìni necaija'quë api cajë utejë pa'ija'cohua'i a'è.

Jesupi Huati Tutupi Yo'oji, Coa Caye

(Mr 3.20-30; Lc 11.14-23; 12.10)

²² Jesús quë'rona sahuë, ñama'quëre cui'ne coca cama'quëre huatire hue'equëre. Sarena, Jesupi jujupi. Jujuna, ñaquë cui'ne coca caquë ponëpi.

²³ Jare si'a pai ña quëquëni cahuë:

“¿Iquë David mamaquëre papi?"

²⁴ Jaje cajëna, fariseohua'ipi asani cahuë:

“Iquë cato huatìohua'ire eto saoji, johua'ì ëjaë Beelzebú tuture hue'equëpi."

²⁵ Jesupi johua'ì cuasaye asani capi, jaohua'ire:

“Te'e yeja ëjaëpi jopore paja'a huani ìti paija'a sa'ñe uihuajë yo'ocohua'ì pani peo huë'ñarepa carajaiñe pa'iji. Pai daripëpi, panita'a te'e tsëcapëpi sa'ñe pëicohua'ì pani quëcoye peoji, yecohua'ire.

²⁶ Jaje cui'ne huati ëjaëje ija'a co'ye eto saokuë pani ¿Me cui'ne ì tutu paquë'ni, ija'a sañope yo'okuë pani?"

²⁷ Mësarupi yë'ère cayë, Beelzebú tutupi huatìohua'ire eto saoji. Jaje pa'ito ¿nepi tutupi isiye'ni, mësarute tuicohua'ire eto sao tutu? Jaohua'ini seni asato mësarupi coa tayo huesëhuë, caja'cohua'ì pa'ini.

²⁸ Yè'è cato huatìohua'ire eto saoyè, Maija'què joyo tutupi. Yè'è yo'oye cato quèaji, Maija'què cuañe te'tepi mèsaruna títase'ere.

²⁹ ¿Tutu què'i huè'e pa'ito cacani i co'amaña sioye peoji, du'ru ìni tseama'cohua'i pani? Jaje pa'ina, ìni tseanita'a de'hue cacani i co'amaña ìne pa'iji.

³⁰ Yè'è yo'oyere cò yo'oma'què cato yè'ère sañope yo'oquè api. Cui'ne yè'è ja're còni tèama'què cato coa ne ña'ñe saoque'api.

³¹ Jaje pa'ina, cayè, mèsarute. Si'aye co'aye pa'ire yo'ose'e pa'itoje saì de'huacaiye pa'iji, si'aye co'aye case'e pa'itoje. Jaje pa'iquèta'are Maija'què joyore co'aye casicohua'i pa'itota'a ti saì de'huacaiye peoji.

³² Cui'ne yè'è Pai Mamaquèni co'aye casicohua'ireje saì de'huaye pa'iji. Jaje pa'iquèta'are Maija'què joyore sañope casicohua'ire saì de'huacaiye peoji.

Soquè Yè Ña'ne Pa'iji, Io Quèi'ne
(Lc 6.43-45)

³³ De'o soquè yèpi de'o care quèi'ne pa'iji. Co'a soquè yèpi jare co'a care quèi'ne pa'iji. Jaje pa'ina, io quèi'ne ña'ne pa'iji, soquè yè.

³⁴ ¡Aña tsécapé acohua'ì! ¿Me de'oye ca tì'a'ne'ni, mèsaru, jare mèsarupi co'acohua'i pa'ini? Jaje pa'ina, yè'opo cato joyo pa'iyere caye pa'iji.

³⁵ De'o pai cato de'o cocare caji, jare ì joyo pa'iyepi. Cui'ne co'a paipi caji co'ayere, jare ì joyo co'aye pa'iyeye pa'ye.

³⁶ Jaje pa'ina, yè'è cayè. Jaohua'ire pai ñape yo'ose'e ña mu'se tì'asi maca si'aohua'i ìño'ne pa'iji, si'aye johua'i cuasama'pè case'ere.

³⁷ Jaje pa'ina, mè'è case'eje pa'ye ña de'hua cuaño'ne pa'iji, do'i peoque panita'a do'i què'i."

Co'acohua'ipi Se'ne, Pai Yo'o Tì'a Ma'ñere
(Mr 8.12; Lc 11.29-32)

³⁸ Ja maca Jesure fariseohua'i cui'ne cuañese'e ye'yacohua'i còni cahuè:

"Ye'yaquè, yèquè ña'ne yèyè, mè'èpi pai yo'o tì'a ma'ñe yo'oquèna."

³⁹ Cajèna, Jesupi sehuopi, jaohua'ire:

"Co'a paipi nuñerepa cuasama'cohua'ipi pai yo'o tì'a ma'ñe yo'oquèna, ña'ñu'ua cajè, se'ne. Jaje se'jèta'are Maija'quère quèacaiquè Jonás ìñoquè pa'ise'eje pa'ye jerepa ìño'ne peosipi.

⁴⁰ Coa Jonás jai hua'ì ètapè pa'ise'eje pa'yese'e ìño'ne pa'iji. Jaè je'què toaso mu'seña cui'ne toaso ñami pa'ajji'ì. Jaje pa'ye Pai Mamaquèje toaso mu'seña cui'ne toaso ñami pa'ija'què api, yeja sa'nahuère.

⁴¹ Tsoe huè'ña Nínive daripè pa'isicohua'ipi huèni pai ñape yo'ose'e ña mu'se tì'aèna, iye'nè pa'icohua'ire nejaja'cohua'ì a'è. Nínive acohua'ì cato de'hue asani ja'rè pa'ise'e jeoni ponèahuè'è, Jonás Maija'què coca quèaquèna, asani. Yure ìnore pa'iji, Jonás seña maca pa'ipi.

⁴² Cui'ne huè'ehuè te'te pai èjaoje huèija'coa, nejo mu'se tì'asi maca. Huèni iye'nè pa'icohua'ì yo'ose'e ñani cui'ne nejone pa'iji, caji'coa. Jaò cato so'o yejapi Salomón tã'ne yo'oyere asasi'ì caco daisico sète. Yure ìnore pa'iji, Salomón jerepa pa'ipi.

Co'a Joyo Co'iyè
(Lc 11.24-26)

⁴³ Huatipi pa'ire pa'isiquèpi etani saisiquè pani cu'iji, cuènesi yejañare pèa huajè huè'ñare co'equè tì'ama'è co'e jujani cuasaji:

⁴⁴ 'Co'isi'ì, cui'naona, yè'è huè'ena yè'è etani daisiconi.' Jaje cani co'iquè ñaquèna, pai peo huè'èpi coa yuasicopi cui'ne de'oye ne de'huasicopi pa'iji.

⁴⁵ Pa'ina, ñani ja maca sani siete huatìohua'ire ì jerepa co'acohua'ini quèrèjani, dani ìna cacani pèayè. Pèarena, ja maca ja'ne pa'ise'e seña maca co'aque pa'ija'què api. Jaje cui'ne iye co'a pa'ire yo'oye pa'ija'coa."

Jesús Pèca Ja'co Cui'ne Ì Yo'je Tsi
(Mr 3.31-35; Lc 8.19-21)

⁴⁶ Jesús ja yè'ta'a pa'ini caquèna, tìtahuè, pèca ja'co cui'ne ì yo'je tsi còni. Dani hue'sena pèahuè, ìni cajè daisicohua'ipi.

⁴⁷ Jaje pa'ijèna, yecohua'ipi Jesure quèahuè:

"Mè ja'co cui'ne mè yo'je tsi hue'sere pa'iyè, mè'èni cajè dani."

⁴⁸ Caquèna, iti quèaquère capi, Jesús:

"¿Ne a'ni, yè'è ja'co cui'ne ne a'ni, yè'è yo'je tsi?"

⁴⁹ Cani ì ye'yacohua'ire ìñoquè quèapi:

"Icohua'ì a'è, yè'è ja'co cui'ne yè'è yo'je tsi.

⁵⁰ Paipi yè'è ja'què ma'tèmo pa'iquè yèyere yo'ocohua'ipi jaohua'ì a'è, yè'è yo'jei panita'a yo'jeo cui'ne ja'co."

13

*Taquëpi Pa'iye**(Mr 4.1-9; Lc 8.4-8)*

- ¹ Ja mu'se Jesús huë'epi etani sani jaira tët'tè macana ja'rupi.
² Jarote pa'ina, jai pai i quë'rona daijèna, ñani jai yohuëna aya mëni ja'rupi. Si'a pai mejahuëna pëa sahuë.
³ Ja maca jaiye ye'yapi iohua'i ñañe ayena çoni quëaquë capi:
 "Taqüëpi tasi'i caquë saji'i.
⁴ Sai taquëna, yequë capi tomepi, ma'ana. Ja tomese'ere pi'api dani peo hue'ña ocue saohuë.
⁵ Yequë capi tomepi, quëna pëa quë'rona, jaiye yeja peo hue'ñana. Ja capi esa sacapi, ya'opi huajine peoquëna.
⁶ Jaje mëasicota'a ësëpi ëo huëapi, jaiye tsita mese'e peoye sëte juji'i.
⁷ Yequë capi tomepi, miu quë'rona. Tomeina, miupi mëani ne huëapi.
⁸ Jaje tomequëta'are yequë capi tomepi, de'o yejana. Tomeni mëani jaiye quëquëna, tëahuë. Yequë ñëapi quëji'i, cien çä. Yequë ñëapi quëji'i, sesenta çä. Cui'ne yequë ñëapi quëji'i, treinta çä.
⁹ Mësarupi cajoro quë'iohua'i pani jasajë'ë!"

*Me Ne Ja'ñere Pai Ñañena Çoni Quëaë'ni**(Mr 4.10-12; Lc 8.9-10)*

- ¹⁰ Ja maca i ye'yacohua'ipi Jesús quë'rona tsio dani sei'ë, Ite:
 "¿Me ne ja'ñere paire iohua'i ñañena çoni jaje quëaquë'ni?"
¹¹ Sejèna, ìpi sehuopi:
 "Mësarute Maija'quëpi ta'ñe asaye isipi, yahuese'ere ma'tëmo tët'te ayere. Jaje pa'iquëta'are jaohua'i cato asa ti'añe pañë.
¹² Jaje pa'ina, paquëna, ai jerepa yeque se isiyë pa'iji, isina, jaiye paja'quëre. Jaje pa'iquëta'are peoquëni ai jerepa jero sa'ana se sio huesoye pa'iji, a'ri maña i payeque.
¹³ Jaje pa'ina, iohua'i ñañe ayena çoni caquëna, ñajëta'a ña ma'ñeje pa'iohua'i ña huesëyë. Cui'ne asajëta'a ti asama'cohua'ije pa'iohua'i asa huesëyë.
¹⁴ Jaje yo'o ja'ñere Maija'quëre quëacaiquë Isaías capi:
 Mësarú cato asaja'cohua'i a'ë. Jaje asajëta'a asa ti'ama'pë pa'ija'cohua'i a'ë.
 Ñañe cato ñaja'cohua'i a'ë. Jaje ñajëta'a ña ti'ama'pë pa'ija'cohua'i a'ë.
¹⁵ Pai joyopi jëacorepa ne huesësi do'ire,
 Co'ayerëpa asaja'cohua'i a'ë.
 Cui'ne iohua'i ñaco çaje sïose'ere hue'eja'cohua'i a'ë ñaco capi.
 Ñama'pë pa'ija'cohua'i.
 Cui'ne asama'pë pa'ija'cohua'i a'ë.
 Cui'ne joyopi asa ti'ama'pë pa'ija'cohua'i a'ë.
 Cui'ne ye'ëna juju cuañoñu'u cajë yo'oma'pë pa'ija'cohua'i a'ë.
¹⁶ Jaje pa'iquëta'are mësarú cato sihuajë'ë, ñaco capi ñajë cui'ne cajoropi asa do'ire.
¹⁷ Nuñerepa cayë, mësarute. Jai pai Maija'quëre quëacaiquë cui'ne de'o pai ñañe yëhuë, mësarú yure ñañere. Jaje yëjëta'a ñama'pë paë'ë. Asaye yëhuë, mësarú asayere. Jaje yëjëta'a asama'pë paë'ë.

*Taquëre Quëase'e Ayere**(Mr 4.13-20; Lc 8.11-15)*

- ¹⁸ Asajë'ë. Jaje pa'ito taquëre quëase'e ayere.
¹⁹ Ma'ana ìti çä tomese'e cato quëaji, ma'tëmo pa'i tët'te ayere asacohua'ita'a asa ti'ama'cohua'ini cui'ne huatipi iohua'i de'o coca asase'ere peo hue'ña sioyere.
²⁰ Quëna pëa quë'rona tomësi çä cato quëaji, du'ru macare pase'e sihuajë asani sehuocohua'ini.
²¹ Jeteyo'je jaiye tsita peoye sëte quëcoma'pë neñañepi cui'ne yecohua'ipi josa yo'ojëna, ai yo'oyepi pa'ina, yo'o jujani jecohua'ini.
²² Miu quë'rona tasi çä cato quëaji, Maija'quë coca asajëta'a iye yeja co'amañare ai cuasajë jaiye co'amaña ëayena coso cuañoñere. Si'aye iye Maija'quë cocare pë'pë huesoye a'ë. Jaje yo'ocuëna, paipi quëñeje pa'ye de'oye yo'o ti'añe peoye a'ë.
²³ Jaje pa'iquëta'are de'o yejana tasi çä cato quëaji, Maija'quë coca asani jecoma'pë tuicohua'ini, de'oyerepa quëicohua'ini. Jaje pa'ina, yecohua'ipi cien çä, yecohua'ipi sesenta çä cui'ne yecohua'ipi treinta çä quëicohua'i pa'iyë."

Co'a Taya Ayere Quëaye

- ²⁴ Ja'ne quëase'eje pa'ye neni iñoquë Jesús quëapi, ñeje:

“Trigo care pare taquëpi yejana tase'eje pa'ye a'ë, ma'tëmo pa'i te'te aye.

²⁵ Tasiquëta'are ite sañope yo'oguëpi si'aohua'i çaisi maca dani co'a care ñani saji'i.

²⁶ Saquëna, trigopi ai de'oni iti tsã'ña ne maca te'e co'a tayaje etapi.

²⁷ Ja maca jo'yaohua'ipi iti tse aquëre sani cahuë: 'Ëjaë, më'ë tsio de'o case'e tasicohua'ita'a çjero ayepi iye co'a taya çoni mëaë'ni'?

²⁸ Cajëna, iti tse aquëpi capi, jaohua'ire: 'Yequë co'acquëpi yo'opi yë'ëre sañope yo'oguëpi.' Caquëna, j jo'yapi cahuë, ite: 'çYëquëpi ja co'a taya du'te jeocaiye yëma'quë'?

²⁹ Cajëna, ipi capi, jaohua'ire: 'Pani, co'a tayare dutajë trigoge duta jeoma'cohua'ipi yo'oye'ni.

³⁰ Jose'e mëajaco tã mu'se ti'aëna, nejo ja'ñepi, ja macata'a co'amaña necohua'ire jëjo saosi'i, co'a tayare ti pëa huëni toana ëo jeoja'cohua'ire, ja jeteyo'je trigo care pase'e yë'ë de'hua hue'ñana de'huacaijajë.' ”

Mostaza Ca Ayere Ye'yaye

(Mr 4.30-32; Lc 13.18-19)

³¹ Quëaye neni Jesús quëapi, ñeje:

“Ma'tëmo pa'i te'te cato mostaza care yejana paipi tase'eje pa'ye a'ë.

³² Mostaza cato nuñerepa a'ri ca'ë. Jaje pa'isicota'a ai de'oco jai soquë yë de'ona pi'api jona daijë capëana tsianoa necohua'i a'ë.”

Pan Ne Pore Ayere Ye'yase'e

(Lc 13.20-21)

³³ Yeque cui'ne quëaye neni quëapi, ñeje:

“Ma'tëmo pa'i te'te cato pan ne poreje pa'ye a'ë. Jaje pa'yere nomiopi tres jai ji'so harina neona, si'a sëpë o'saco jujucoa.”

³⁴ Jesús si'aye paire quëapi, johua'i ña'ne ayepi caquë. Co'arepa ña ma'ñepi caquë quëama'ë paji'i.

³⁵ Iye cato yo'ose'e pa'iji, Maija'quëre quëacaiquë toyaquë pa'ise'epi ti'ajaquë caquë j toyaquë pa'ise'epi caji:

“Caja'quë a'ë, johua'i ña'ne ayepi çoni.”

Caja'quë a'ë, yahuesi co'amaña pa'ise'ere yeja de'huanë ayere.

Co'a Taya Ayere Ye'yaye

³⁶ Ja maca Jesús paire ca tējini huë'ena cacapi. Cacaëna, jaronã ite ye'yecohua'i tsiojani cahuë:

“Quëajë'ë, co'a tayapi tsiona mëase'e ayere.”

³⁷ Cajëna, Jesupi capi, jaohua'ire:

“De'o çã taquë cato Pai Mamaquë api.

³⁸ Cui'ne tsio cato si'a yeja'ë. De'o çã cato Maija'quë te'te acohua'ini quëaji, cui'ne taya cato quëaji, huati te'te acohua'ini.

³⁹ Sañope yo'oguëpi co'a taya taçaisiquë cato huati ëjaëpi. Tëaye cato quëaji, yeja carajai ja'ñere, cui'ne iti çã tãcohua'i cato huññaohua'i a'ë.

⁴⁰ Co'a taya tsi'soni toana ëo jeoñeje pa'ye cui'ne yeja carajai maca yo'oye pa'ija'coa.

⁴¹ Pai Mamaquëpi jëjo daoja'quë api, huññaohua'ire j cuã'ne te'tere pa'ijë tayo yo'oye yecohua'ire necohua'ire, cui'ne co'acohua'ire tsi'soja'cohua'ire.

⁴² Tsi'soni toana ëo jeoja'cohua'i a'ë. Jaropi yureta'a oijë cui'ne cuji qu'i'coja'hua'i a'ë.

⁴³ Ja maca Maija'quë yëye yo'ocohua'ipi ëšë miañeje miaja'cohua'i a'ë, johua'i pëca ja'quë te'tere pa'ijë. Jaje pa'ina, mësarupi cajonoã hue'ecohua'i pani jasajë'ë!

Curi Mahuë Ayere Ye'yaye

⁴⁴ Ma'tëmo pa'i te'te cato curi mahuë yejana quëni yahue çase'eje pa'io. Jaje pa'ioni te'i paipi curi mahuëre ti'ani cui'naoni iti macana se yahue çani ai sihuaquë sani si'aye j paye isi saoni curi quë'i yejare huerose'eje pa'ye a'ë.

Jai Do'i Quënare Pare Ye'yaye

⁴⁵ Ma'tëmo pa'i te'te cato co'amaña isiquëpi jai do'i quënare pare perla hue'yosi quëna përe, co'equë cu'iyeye pa'ye a'ë.

⁴⁶ Jaje co'equë jai do'ire ti'ani si'aye j pase'e isi jeani, jai do'i quënare pare hueroyeje pa'ye a'ë.

Hua'i Yo'eco Ayere Ye'yaye

⁴⁷ Ma'tëmo pa'i te'te cato hua'i yo'econi jai tsiayana jëo dëoni coã si'a hua'ire neñeje pa'ye a'ë.

⁴⁸ Hua'i yo'eco timësi maca hua'i yo'ecohua'ipi mejahuëna naë mani jaropi ñu'ijë sahuajë de'o hua'ise'ere do'rohuëna ayajë co'acohua'ise'ere jëococohua'i a'ë.

⁴⁹ Jaje yeja carajaisi maca huiñaohua'ipi etani co'acohua'ire cui'ne de'o hua'ire sahuajë huahueja'cohua'i a'ë.

⁵⁰ Ja maca co'acohua'ire cato toa cojena jeo deorena, jaropi cuji qui'cojë oija'cohua'i a'ë."

Ye'yacohua'ipi Asaye

⁵¹ Ja maca Jesús seji'i, jaohua'ire:

"¿Asaye mësaru si'aye iye?"

Seina, sehuohuë:

"Jaje pa'ijë'ë asayë, Ëjaë."

⁵² Cajëna, Jesupi capi:

"Cuañese'e ye'yaquëpi Maija'quë cuañe te'te ayere ai ye'yequë pani huë'e paquëje pa'i ponëji, i de'huase'ere co'amaña cui'ne ai co'amaña etoquë isiyeje pa'irepa."

Jesús Nazaretre Pa'iyë

(Mr 6.1-6; Lc 4.16-30)

⁵³ Ja maca Jesús jaje quëaquë ye'ya tëjini saji'i, yequë huë'ñana.

⁵⁴ Sai ti'api, i yejana i ai de'o sitona. Jarona ti'asiquëpi pai tsi'si huë'ñana ye'yapi. Ye'yaquëna, paipi ai cuasajë ñajë cahuë:

"¿Jerona iquë ye'yei'ni, jerepa ta'ñe caye? ¿Merepa cui'ne pai yo'o ti'a ma'ñe yo'oquë'ni?"

⁵⁵ Carpintero mamaquëta'a cui'ne ñnore pa'iyë, i pëca ja'co María. Cui'ne Jacobo, José, Simón, Judas pa'iyë, i yo'je tsije.

⁵⁶ Ñnore i yo'je tsi nomiohua'ije pa'iyë. ¿Jaje pa'ito jerona iye si'aye ye'yei'ni?"

⁵⁷ Jaje cajë coejë asaye pahuë, i caye. Jaje coejëta'are Jesupi capi, jaohua'ire:

"Si'aohua'i yëyë, Maija'quë jëjo daoquëre. Jaje pa'iquëta'are i ai de'osi yeja acohua'i cui'ne huë'e acohua'irepa coeyë, ite."

⁵⁸ Ite ire papi cajë asama' do'ire ñaquë jaro cato jaiye pai yo'o ti'a ma'ñe neñe papi.

14

Juan Ti Doquëre Huaiye

(Mr 6.14-29; Lc 9.7-9)

¹ Ja mu'seña Herodes Galilea cuañequë paji'i. Jaje pa'ipi Jesús pai yo'o ti'a ma'ñere yo'oyere asapi.

² Asani i ja're çoni pa'icohua'ire capi:

"Juan oco doquëpi huëni tutu paquë yo'oma'quë."

³ Jaje cuasapi, Herodes cato Juanre tseani huëni co'acohua'ire co huë'ñana cosiquë sëte yo'jei Felipe nëjo do'ire.

⁴ Juan cato caëña, Herodesre:

"Më nëjore payeje pama'ë pa'ijë'ë."

⁵ Jaje caquëna, Herodes Juanre huani jëosi'i caquëta'a paini ca'raquë papi, si'aohua'i Juanre Maija'quë coca quëaquë api ca do'ire ca'raquë.

⁶ Jaje pa'iquëta'are ite Herodesre çoasi mu'seña ti'asi maca Herodías mamacopi pai tsi'isiscohua'i ñajëna, etani pairacona, Herodes ñani ai sihuaquë.

⁷ Ca nëopi si'aye më'ë señe pa'ito isisi'i, co'amaña.

⁸ Jaje ca maca pëca ja'copi du'ru yëhuosico sëte cao, Herodes:

"Juan oco doquë sjo'përe quëna de'huana ayasiconi isijë'ë."

⁹ Jaje ca maca Herodes oi çayerëpa asapi. Jaje ipi tsoe si'aohua'i soisicohua'i asajëna, isisi'i, më señere ca nëo huesosiquë sëte jëjo saopi, isijë'ë caquë.

¹⁰ Ja maca cuañëña, ñani Juan cosiquë pa'iquëre sjo'pëse'e tëto tëajani,

¹¹ quëna de'huana ayasiconi dani isihuë, nomi tsjona. Jaopi se isio, pëca ja'cona.

¹² Jaje yo'orena, Juanre ye'yecohua'ipi dani i çapëse'e sani tãhuë. Tani ja jeteyo'je sani Jesure quëahuë, iti yo'ose'ere.

Cinco Mil Ëmëohua'ire Aoñe

(Mr 6.30-44; Lc 9.10-17; Jn 6.1-14)

¹³ Jaropi jare asani Jesús saji'i, pai peo huë'ñana yohuëja'a. Jaje saisiquëta'are paipi asa ti'ani ite tui huëohuë, yejaja'a pai daripë pa'icohua'ipi.

¹⁴ Jesús yohuëpi etaquë ñaquëna, jai pai paë'ë. Jaje pa'ijëna, teaye oi jaohua'ire ñani jujupi, ju'icohua'ire johua'i dacohua'ire.

¹⁵ Tsoe na'iquëna, ñani i ye'yacohua'ipi Jesús quë'rona dani cahuë:

"Tsoe na'iji. Ñno pai peo huë'ña'ë. De'o'ji. Ja macaja'a ca tëjijë'ë, sani pai pa'i huë'ñana hueroni ço maña aijajë."

¹⁶ Cajëna, Jesupi capi, jaohua'ire:

"Saiye peoji. Jaohua'ire mësarupi çojë'ë."

17 Caquëna, jaohua'ipi cahuë, ìte:

“Peoyë. Coa cinco pan cui'ne caya hua'ire pare payë, ìño.”

18 Cajëna, Jesupi capi:

“Dajë'ë, ìñona ìtìre.”

19 Cani cui'ne paire cuañepi, tayahuëna ja'ru sajë'ë, caquë. Ja jeteyo'je ì jëñapi cinco pan pëa cui'ne cayaohua'ire ìni cajiquë ma'tëmona ñaquë, Maija'quëre de'o'ji caquë pëpapi. Pëpapi panre jë'yeni ì ye'yacohua'ina ìsipi. Isina, jaohua'ipi paire se aohuë.

20 Si'aohua'i ani huajësicohua'i paë'ë. Ja jeteyo'je ani jujase'ere doce do'rohuëarepa ayahuë.

21 Ja aísicohua'i cato paë'ë, cinco mil ëmëohua'ise'e. Nomiohua'ire cui'ne tsìre cuëcuye peoyerepa jaohua'ique pa'ini ai jerepa pa'iyë.

Jesupi Oco Ëmëjeja'a Cu'ise'e

(Mr 6.45-52; Jn 6.16-21)

22 Ja jeteyo'je Jesús paini pëpa tëjiquë ì ye'yacohua'ise'e du'ru jai yohuëna aya mëjì'ë caëna, aya mëtena, jaira je te'tena jëjo saopi.

23 Paire pëpa tëjini mëjì'i, jai cutihuëna te'i, Maija'quëre sësi'i caquë. Ñami de'osi maca Jesús jarote te'i pajì'i.

24 Jai yohuë cato jopo jairare ja yë'ta'a saio nëco'ë, to'añepi yohuëna tutu ju'aquëna, saë'ë.

25 Ñataquëna, Jesús johua'i quë'rona tsiojajì'i, oco da'ca ëmëjeja'a nëcaquë.

26 Ja maca ì ye'yacohua'i tsiayaja'a nëcaquë daina, ñani quëquë huesëjë ca'rajë cuihuë:

“¡Pai joyo huatio!”

27 Jaje cajëna, Jesupi capi, jaohua'ire:

“Quëcojë'ë, yë'ë a'ë. Ca'rama'pë pa'ijë'ë.”

28 Caquëna, ja maca Pedropi capi, ñeje:

“Ejaë, më'ërepa pani yë'ëreje cuañejë'ë, tsiayaja'a nëcaquë sasi'i, më'ë quë'rore pana.”

29 Caquëna, Jesupi capi:

“Dajë'ë.”

Caëna, Pedropi yohuëpi cajeni tsiayaja'a nëcaquë sai huëopi, Jesús pa'ì huë'ñana tì'asi'ì caquë.

30 Jaje saiquëta'a tutu ju'ayena asaquë, quëquëquë du'ì huëoquë cui'pi:

“¡Huaso'jë'ë, Ejaë!”

31 Jare ìti macapi Jesús jëñana tseaquë capi, ìte:

“¡Yë'ëna quëcoyere a'ri maña paquë, më'ë! ¡Me yo'oquë nema'quëje pa'ire cuasaë'ni!”

32 Jai yohuëna aya mëisi maca tutu tompì.

33 Ja maca jai yohuë pa'icohua'ipi Jesuna do're ja'rùni cahuë:

“Nuñerepa më'ë Maija'quë mamaquëre pa'ë.”

Genesaret Pa'icohua'ire Jujuse'e

(Mr 6.53-56)

34 Jë'ejë tì'ahuë, Genesaret yejana.

35 Tì'arena, paipi Jesús daise'ere asa tì'ani si'a huë'ña ìti yeja pa'icohua'ire quëahuë. Quëarena, ì pa'ì huë'ñana ju'icohua'ire dahuë.

36 Dajë sëi'ë, ì ju'ì çana patoni co'yato de'oma'quë cajë. Jaje cani si'aohua'ì ì ju'ì çana patocohua'ìpi co'ya sahuë.

15

Paire Co'aye Neñe

(Mr 7.1-23)

1 Jerusalëmpi fariseohua'ì cui'ne cuañese'e ye'yacohua'ìpi daisicohua'ìpi Jesús quë'rona tsio dani sëi'ë:

2 “¿Me yo'ojë më'ë ye'yacohua'ì mai aipë cuañese'e sehuocaiye pañe'ni, ja yë'ta'a aò aima'në jëña tsoajë'ë, cuañese'e?”

3 Jaje cajëna, Jesupi seji'ì, jaohua'ire:

“¿Cui'ne mësarù me yo'ojë Maija'quë cuañese'e de'oye sehuocaima'pë pai cuañese'ere de'oye sehuoye'ni?”

4 Maija'quë cato capi: “Më ja'core cui'ne më ja'quëre ëjaohua'ire ñaquë pajë'ë.” Cui'ne capi: “Pëca ja'quëre cui'ne pëca ja'core co'aye sañope caquë cato huani jëo cuañoja'quë.”

5 Jaje pa'iquëta'are mësarupì cayë pëca ja'quëre cui'ne pëca ja'core cayë de'o'ji: “Tsoe si'aye yë'ë paye Maija'quëna ìsi saohuë. Jaje pa'ina, coçaiye peoyë.”

6 Cui'ne jaje cacohua'ìpi pëca ja'quëre panita'a pëca ja'core coçaiye peoyë, cuasajë pa'iyë. Jaje yo'ojë Maija'quë cuañese'ere do'ì peoye ne huesoni coa pa'ì cayere sehuocaijë pa'iyë.

7 ꞑCoa cacohua'i! Nuñerepa Maija'quëre quëacaiquë Isaías capi, mësarü ayere toyaquë ñeje:
8 Iye paꞑ yë'ëre yë'opose'e oiyë,
Iohua'i joyo cato so'ore pa'ina.

9 Mësarü Maija'quëre seña do'i peoye a'ë,
Paise'e cuañeñepi huëojë yo'ojëna."

10 Ja maca paire soini capi:

"De'hua asajë cuasa ti'ajë'ë.

11 Yë'opoja'a cacaye cato paire co'a de'hua ma'ñe a'ë. Coa ai jerepa paire co'a de'huaye cato yë'opopi etaye a'ë."

12 Ja maca i ye'yacohua'ipi Jesús quë'róna tsio dani cahuë:

"¿Asaë, më'ë fariseo paꞑ më'ë cayere asajë oise'e?"

13 Jaje cajëna, ipi sehuopi, jaohua'ire:

"Yë'ë ja'quë, ma'tëmo pa'iquë ta ma'ñe cato peo huë'ñarepa duta ja'ñe a'ë.

14 Coa ñajë'ë, johua'ise'e pa'ijajë. Jaohua'i cato ñaco ca peocohua'i a'ë. Cui'ne ñama'cohua'ini cuacohua'i a'ë. Jaje pa'ina, ñama'quëpi cui'ne ñama'quëni sai saquë pani si'a jupë cojena du'iye pa'iji."

15 Pedropi ja maca capi, Jesure:

"Quëajë'ë, më'ë quëase'e ayere."

16 Caquëna, Jesupi capi:

"¿Mësarüje ja yë'ta'a asa ti'ama'pë pa'iye?"

17 ¿Huesëye, mësarü, si'a aꞑ yë'opoja'a cacani ëtatu'una saise'epi jeteyo'je eta saiye?"

18 Jaje pa'iquëta'are yë'opoja'a etaye cato joyo pa'iyepi etaji. Ja'ë, paire co'ayerëpa neñe.

19 Jaje pa'ina, joyopi etaji, co'aye cuasaye, huani jëo ëaye, nomi ëaye cuasaye, co'amaña ñañe, coa cosoye, cui'ne co'a coca caye.

20 Iye a'ë, paire co'a de'huayerëpa. Jëña tsoajë'ë cuañese'ere sehuoma'pë aiñe cato paire co'aye ne ma'ñe a'ë."

*Yequë Yeja Acopi Jesure Sehuoye
(Mr 7.24-30)*

21 Jesupi jaropi etani saji'i, Tiro cui'ne Sidón yejana.

22 Jarote paco'ë, cananea nomio jaopi Jesús quë'róna cuico daco'ë, ñeje:

"¿Ëjaë, David mamaquë oijë'ë, yë'ë macare! Yë'ë mamacopi huati joyore hue'eco, ai ai yo'oco co'ayerëpa."

23 Jaje catoje Jesús ti a'ri mañaje sehuoma'ë saji'i. Saina, i ye'yacohua'ipi dani ïte seï'ë:

"Quëa saojë'ë, te'ija. Co'aye mai jeteyo'jeja'a cui daoco."

24 Cajëna, Jesupi capi:

"Maija'quë yë'ëre jëjo daopi, Israel paini caquë yëi ñama ne huesëse'ëje pa'ioni caquë."

25 Jaje pa'iquëta'are i ña huë'ñana do're ja'runi cao:

"¿Ëjaë, cocaijë'ë!"

26 Jaje cacona, Jesupi capi, jaote:

"De'oma'coa, mamajë aiconi aore jioni jo'ya yaina aoto."

27 Jaje catoje ipi ïte cao:

"Jaje pa'ijë'ë, Ëjaë. Jaje pa'iquëta'are jo'ya yaije aicohua'i a'ë, paꞑ ani to ñe'ña mañaje."

28 Jaje cacona, Jesupi capi, jaote:

"¿Nomio ta'ñerepa neñe pa'iji, cuasayë, më'ë! Më'ë yëse'e nese'ëje pa'ijaquë."

Caëna, ïti macapi jo macaco co'yasico paco'ë.

Jesupi Ju'icohua'ire Jujuse'e

29 Jesús jaropi etani Galilea jaira të'tëpaja'a tëto sani cutihuëna mëni jarona ja'rupi.

30 Jarote pa'ina, jai paꞑ daë'ë, i pa'i huë'ñana. Daijë dahuë, do'pëcöhua'ire, ñama'cohua'ire, asama'cohua'ire, peo tupëare, cui'ne jai paꞑ yeque ju'icohua'ire dahuë. Dani i quëo yë'quë macana oijëna, Jesupi jupupi, ju'icohua'ire.

31 Paꞑ ña quëquëyerepa yo'opi, asama'cohua'ipi cui'ne coca cama'cohua'ipi asajë cajëna, nëcañoa peo tupëapi de'ocohua'i pönëjëna, do'pëcöhua'ipi cu'ijëna cui'ne ñama'cohua'ipi, ñacohua'i pönëjëna. Jaje yo'oquëna, ñajë Israel paꞑ Maija'quëre ai de'oji cajë sihuahuë.

*Jesupi Cuatro Mil Ëmëohua'ire Aopi
(Mr 8.1-10)*

32 Ja maca Jesús i ye'yacohua'ire soini capi:

"Teaye iye paꞑ mañare oi ñañë. Tres mu'seña pa'iji, iño johua'i pa'iye. Jaje pa'ijë ti peoyë, johua'i ai mañaje. Jaje pa'ina, aima'cohua'ire huë'ëna jëjo saoye pa'iji saijë ma'ana dahuëra ju'ima'cohua'ini."

33 Caquëna, ja maca i ye'yacohua'ipi cahuë, ïte:

“Jaje pa'iquèta'are çme ñño paije peo hue'ña ão hueroni año'e'ni, jai paire pare?”

³⁴ Cajëna, Jesupi seji'i:

“Çje sq pan paye'ni, mësarü?”

Seina, ñohua'ipi cahuë:

“Siete pan cui'ne a'ri maña tsiaya hua'ire payë.”

³⁵ Cajëna, ja maca paire cuañepi, yejana ja'ru sajë'ë caquë.

³⁶ Ja'rusi maca siete pan cui'ne hua'ire ñni Maija'quëre de'oji caquë seji'i. Seni tëjini j ye'yacohua'ina se isina, jaohua'ipi paire se aohuë.

³⁷ Ja maca si'aohua'i ani huajëhuë. Jaje pa'itoje ja yë'ta'a siete do'rohuëa ani jujase'e nëaëna, ayahuë.

³⁸ Iti aïsicohua'i cato cuatro mil pai paë'ë, nomiohua'ire cui'ne tsire cuçcuema'pëna.

³⁹ Ja jeteyo'je Jesús paire sai pëpa tëjini jai yohuëna aya mëni saji'i, Magdala yejana.

16

Pai Yo'o T'i'a Ma'ñe Yo'ojë'ë Cajë Señere
(Mr 8.11-13; Lc 12.54-56)

¹ Fariseohua'i cui'ne saduceohua'i çoni Jesure neñañu'u cajë dani ma'tëmo ayere pai yo'o t'i'a ma'ñere ññojë'ë sei, ñpi yo'ouna, ñani tseañu'u cajë.

² Jaje cajë sejëna, ñpi sehuopi, jaohua'ire:

“Na'iquëna, ma'tëmo maja'ico pa'ina, ñani mësarü cacohua'i a'ë, 'De'o mu'se pa'ija'coa.’

³ Cui'ne ñataquëna, nea siri pa'ina, ñani cacohua'i a'ë, 'yure cato co'a mu'se pa'ija'coa.’
ñani ta'ñe cama'pë ja yë'ta'a huesëcohua'i pa'iyë'ni?

⁴ Iye co'a pai nuñe yo'oma'cohua'ipi señë, ma'tëmo yo'oyere nejë'ë ññañu'u cajë. Jaje sejëta'are Jonásre yo'ose'eje pa'yepi ñnose'e pasipi. Jerepa yo'o ññoñe peoji.”

Jaje cani jeoni saji'i.

Fariseohua'i O'sa
(Mr 8.14-21)

⁵ Jaira je të'huina je'ejë j ye'yacohua'i pan sayere huanëye'i'ë.

⁶ Huanëyesicohua'ini Jesupi jaohua'ire capi:

“Ina de'hua ñajë'ë, fariseohua'i cui'ne saduceohua'i o'saque pa'iji.”

⁷ Caquëna, j ye'yacohua'ipi sa'ñe ñohua'ija'a cahuë:

“Mai panre dama'pë patena, caji.”

⁸ Jaje yahue caye Jesupi asani capi, jaohua'ire:

“Çme yo'ojë pan peoyë caye'ni? Çai jerepa mësarü, yë'ëre nequë api, cuasayere peoye'ni?

⁹ Çja yë'ta'a asa t'i'añe pañe, cui'ne ñañe pare cinco pan pa'ise'ere cinco mil paire aose'eje cui'ne ani jujarena, do'rohuëana de'huase'eje?

¹⁰ Çcui'ne siete pan pa'ise'epi cuatro mil paire aõ maca do'rohuëa nëase'eje cuasaye pañe?

¹¹ Çme yo'ojë mësarü yë'ë ca maca panre caji, cuasare'ni? De'hua ñajë'ë, fariseohua'i cui'ne saduceohua'i o'sana co'me huesëye.”

¹² Jaje ca maca cuasa t'i'ahuë, Jesús pan neñere cama'ë pa'ise'ere. Coa ai jerepa Fariseo cui'ne saduceohua'i ye'yayere case'ere.

Pedropi Jesús Ayere Caye
(Mr 8.27-30; Lc 9.18-21)

¹³ Jesús Cesarea Filipo yeja quë'rona t'i'ani j ye'yacohua'ire seji'i:

“Çiqueipi caye'ni, Pai Mamaquëre?”

¹⁴ Caquëna, jaohua'ipi cahuë:

“Yecohua'ipi cayë, Juan oco doquë api. Yecohua'ipi cayë, Elíaspi. Cui'ne yecohua'ipi ja yë'ta'a yeque cayë, Jeremiaspi panita'a yequë Maija'quë jëjo daoquë api, caye.”

¹⁵ Ja maca jaohua'ire capi:

“Cui'ne mësaruta'a çiqueipi caye'ni?”

¹⁶ Caquëna, Simón Pedropi capi:

“Më'ë cato Cristo a'ë, Diosu huajëquërepa mamaquë a'ë.”

¹⁷ Caquëna, Jesupi sehuopi:

“De'oji. Simón Jonás mamaquë yecohua'ijë më'ëre quëaye pahuë. Coa yë'ë Ja'quë ma'tëmo pa'iquëpi ññoipi.

¹⁸ Jaje pa'ina, yë'ëpi më'ëre cayë Pedro jare iye quëna pë ëmëje'ena yë'ë huë'e nesi'i. Neina, ju'ñe tutuje quëcoquë ti neñe peoji.

¹⁹ Yë'ëpi më'ëre ma'tëmo pa'i te'te hui'yocore isija'quë a'ë. Më'ëpi iye yejana sëaquë pa'ito ma'tëmoje sëaye pa'iji. Cui'ne më'ëpi iye yejana joyequë pa'ito ma'tëmoje joyeye pasipi.”

²⁰ Ja maca Jesupi cuañepi, j ye'yacohua'ire. Yë'ëre Cristo api, cajë paire quëama'pë caquë.

Jesús Capi, Ju'ija'quë A'ë
(Mr 8.31-9.1; Lc 9.22-27)

²¹ Jare ja macapi Jesupi quëa huëopi, i ye'yacohua'ire. Jerusalénna sani ai yo'oja'quë a'ë, Maija'quë huë'e ñacaicohua'i ëjaohua'ipi cui'ne cuañese'e ye'yacohua'ipi yo'ojëna, caquë. Cui'ne capi, jaje yo'ojë huani jeoja'cohua'i a'ë. Jaje huani jeosicohua'ita'are toaso mu'seña pa'i maca huëija'quë a'ë.

²² Ja maca Pedropi tirona ite sani yëhuosi'i caquë capi:

“¡Maija'quëje jaje yo'oye coeji, Ejaë! ¡Jaje yo'oye ti peojaquë më'ëre!”

²³ Jaje caquëna, Jesús co'ye ponëni ñani ite Pedrore capi:

“Saijë'ë. Yë'ë quë'ro pa'ima'ë, huati ëjaë. Yë'ëre josa tëhuoquë, ai. Më'ë cato Maija'quë cuasayeje cuasama'quë a'ë. Coa pai cuasayeje cuasaquë a'ë.”

²⁴ Ja maca Jesupi i ye'yacohua'ire capi:

“Yë'ëre tuiye yëcohua'i pani huänëyeye pa'i co'ye de'oye pa'yere. Jaje yo'oni ai yo'oye pa'ito quëcojë tuiye pa'iji, co'ye cuasama'pë.

²⁵ Jaje pa'ina, co'ye de'oye pa'yere cuasaquë yo'oquëpi coa ne huesoja'quë api, i pa'ie. Jaje pa'iquëta'are yë'ë do'ire ai yo'oquë i pa'ie ne huesosiquëpi ti'aja'quë api, pa'ie.

²⁶ Jaje pa'ina, ¿Iquere cöcayie pa'iquë'ni, paipi si'aye iye yejana co'amañare pajëta'a joyore ne huesoto? ¿Je ja'ye sañie pa'iquë'ni, i joyo do'ire?

²⁷ Jaje pa'ina, Pai Mamaquë daija'quë api, si'a i pëca ja'quë de'o tutu quë'ipi cui'ne i huñnaohua'ina cöni. Ja maca ipi saija'quë api, te'ohua'ise'e yo'ose'eje pa'ye.

²⁸ Jaje pa'ina, nuñerepa cayë, ja yë'ta'a yure pa'icohua'i ju'ima'pë Pai Mamaquë i quë'ropi daina, ñaja'cohua'i a'ë.”

17

Jesús Tiñe Pa'i Ponëse'e
(Mr 9.2-13; Lc 9.28-36)

¹ Seis mu'seña tëto sai maca Jesupi sapi, Pedrore, Jacobore cui'ne Juanre Jacobo yo'jeire te'i jaohua'i ja're saji'i, jai ëmë cutihuëna.

² Jarona i capë johua'ique ñajëna, tiñerepa ponëpi. I tsia cato ësë mëñeje pa'yere miaco ponëpi. Cui'ne i ju'i capi toaje pa'ioyerepa ponëpi, miañerepa.

³ Cui'ne ja maca ñañu'u cuasama'pë pa'ise'ere ñahuë, Moisés cui'ne Elías, Jesús ja're cocare cajëna.

⁴ Ja maca Pedropi capi, Jesure:

“Ejaë, ¡De'oji. Yureta'a iñore pañu'u! Më'ëpi yëto neñu'u toaso a'ri huë'ña: më'ë tsecore te'ore, Moisés tsecore, cui'ne Elías tsecore yecore.”

⁵ Ja yë'ta'a Pedro cocare caquëna, miacore papi sirio nëca meni peo huë'ña ca'ne huesona sirio jopopi yë'ose'e ñeje pisiquëna, asahuë:

“Iquë yë'ë mamaquëre papi ñni ai sihuaquë pa'iyë. Asajë'ë, i cayere.”

⁶ Iyere asani i ye'yacohua'i yejana johua'i tsiapi meñe simeni uë'ë, quëquëquë huesëni.

⁷ Ja maca Jesupi johua'i quë'rona tsiojani patoquë capi:

“Huëijë'ë. Ca'rama'pë pa'ijë'ë.”

⁸ Caquëna, huëijë coa Jesuse'e te'i pa'ina, ñahuë, yecohua'ita'a peojëna.

⁹ Jaropi cajëna, Jesupi cuañepi, jaohua'ire:

“Quëama'pë pa'ijë'ë, yecohua'ire, iye mësarü ñase'e. Pai Mamaquë ju'isiquëpi cui'naëpi huëima'ë pa'ito juni huëisi maca quëajë'ë.”

¹⁰ Ja maca i ye'yacohua'ipi Jesure sei'ë:

“¿Me yo'ojë cuañese'e ye'yacohua'i jaje pa'ito Elíaspi du'ru daija'quë api, cayë'ni?”

¹¹ Cajëna, Jesupi sehuopi:

“Nuñerepa cayë. Du'ru daija'quë api. Si'aye ne de'huaja'quë api.

¹² Jaje pa'iquëta'are yë'ëpi cayë, mësarute. Elíaspi tsoe daji'i. Daisiquëta'are johua'ipi de'hua ñama'pë coa johua'i yëyeje yo'ohuë, ite. Jaje cui'ne Pai Mamaquëje ai yo'oja'quë api, jare jaohua'i jëñapi yo'ojëna.”

¹³ Ja maca i ye'yacohua'ipi cuasa ñaja'ë, Juan oco doquë pa'isiquëni caji cuasajë.

Jesupi Hue'hue Dahuë Paquëre Jujuye
(Mr 9.14-29; Lc 9.37-43)

¹⁴ Pai pa'i hue'ñana daisi maca Jesús quë'rona te'li tsio dani i ña hue'ñana do're ja'rundi capi:

¹⁵ “Ejaë, oijë'ë, yë'ë mamaquëre. Ai yo'oji, hue'hue dahuëre hue'equë. Jaje pa'ipi jaiye toana tai yequere tsiajana du'i yo'oji.

¹⁶ Iye macana dahuë, ite. Më'ë ye'yacohua'ina, iñosiquëta'are juju ti'ama'pë pa'ë'ë.”

¹⁷ Caquëna, Jesupi sehuopi:

“¡Ina, necaiquë api cuasama' paí cui'ne co'acohua'! ¿Je yëhuarepa pa'ija'quë a'ni, mësarú ja're coní? ¿Je yëhuarepa quëcoja'quë a'ni? Dajë'ë, iñona tsihua'ëre.”

¹⁸ Cani ja' macapi Jesupi co'a joyore pëni eto saopi, tsihua'ëre pa'isicore. Jare iti macapi tsihua'ë huajëquë co'yapi.

¹⁹ Ja jeteyo'je ise'ere i ye'yacohua'i cahuë:

“¿Me yo'ojë yëquë huatire eto saoye pare'ni?”

²⁰ Sejëna, Jesupi capi:

“Mësarú ne t'iañe peoji, cuasayere payë. Nuñerepa cayë. Mësarupi mostaza ca ja'iore ne t'iañe pa'iji cuasayere hue'ecohua'i pani cara'huë ja cutihuëre: ‘Saijë'ë, iye macapi yequë hue'ñana.’ Carena, ai cutihuëpi saija'coa. Ti coa ca jujaye peoji, mësarupi neñe pa'iji cuasacohua'i pani.

²¹ Jaje pa'iquëta'are iye co'a joñoare cato, eto saoye pa'iji Maija'quëre señepi cui'ne ao aima'pë señepi.”

Tijupë Jesús Capi, I Ju'ine Ayere
(Mr 9.30-32; Lc 9.43-45)

²² Si'a jupë Galilea quë'rore cu'i maca Jesupi capi, jaohua'ire:

“Paí Mamaquëre tseani paina isi huesoja'cohua'i a'ë.

²³ Jaje yo'ojë huani jeoja'cohua'i a'ë. Jaje huani jeosicohua'ita'are toaso mu'seña pa'i maca cui'naëpi huëija'quë api.”

Jaje quëaquëna, ai oi ëaye asahuë.

Pai Tsi'si Huë'e Do'i Saiñe

²⁴ Jesús cui'ne i ye'yacohua'i Capernaum daripëna t'iasi maca Maija'quë huë'e do'ire curiquë secohua'ipi Pedrorre sani ñani se'i'ë:

“¿Mësarú ye'yaquë curiquë saiquë Maija'quë huë'e do'i?”

²⁵ Cajëna, Pedropi sehuopi:

“Jaje pa'ijë'ë. Saiji.”

Jaje cani huë'ena Pedropi cacaquëna, Jesupi du'ru ite capi, ñeje:

“¿Me cuasaquë'ni, më'ë Simón? ¿Neni iye yeja ëjaohua'i co'amaña pa do'i cui'ne pa'i do'i señe'ni, johua'i tsecohua'i panita'a t'ohua'ini señe?”

²⁶ Caquëna, Pedropi sehuopi, ite:

“T'ohua'ini señë.”

Caquëna, Jesupi capi, ite:

“Jaje pa'ito johua'i tsecohua'i cato saiñe peoji.

²⁷ Jaje pa'iquëta'are sañope yo'oyere coeje saiñu'u. Jaje pa'ito jairana sani mojë'ë, hua'ini. Du'ru macarepa hui'yoquëni moni i yë'opore curiquë pa'ina, ini sani saijë'ë, si'aye, yë'ë pa'i do'i cui'ne më'ë do'i coní te'epi.”

18

Nepi Jerepa Do'i Pa'iquë
(Mr 9.33-37; Lc 9.46-48)

¹ Jare ja' macapi i ye'yacohua'i Jesús quë'rona tsiojani seteña, ite: “¿Nepi jerepa pa'iohua'i pa'ija'cohua'i a'ni, ma'tëmo?”

² Cajëna, ja' maca Jesupi tsihua'ëre soini johua'i jopona nëcoquë

³ capi:

“Nuñerepa cayë. Mësarupi ja'rë pa'ise'e jeoni cui'ne tsihua'ëje pa'iohua'i de'oma'pë pani ma'tëmo caca t'iañe peoji.

⁴ Jaje pa'ina, iti jerepa pa'i ma'tëmo pa'i te'tequëpi, ai jerepa pa'i a'ë cuasama'quëpi iquë tsihua'ëje pa'i pa'iji.

⁵ Cui'ne yë'ëni cuasajë iquëre tsihua'ëre de'oye necaicohua'i pani yë'ëni necaiyë.

Co'aye Yo'oyena Taiñe
(Mr 9.42-48; Lc 17.1-2)

⁶ Yë'ëre asaquëni yequëpi co'aye yo'oyere ye'yaquë pa'ito jai quëna pëpi ñaje tëcana séani jai tsiayana huai hue'ñana jeo dëoto de'oji.

⁷ ¡Co'acore pa'ni, iye yeja, paire co'aye yo'oyena ne taoco! Paire co'ayena ne tañoñere jëaye ti peoji. Jaje pa'iquëta'are yecohua'ire co'aye yo'oyena ye'yaquë ne tañoquëpi ai jerepa teaye co'acquëpi pa'iji.

⁸ Jaje pa'ina, më'ë jëtëpi panita'a më'ë nëcayopi co'aye yo'oyena sacco pa'ito tëto tëani so'ona jeocojë'ë. Ai jerepa de'oji, pa'i hue'ñana saiyepe peo tupëpi, panita'a do'pëquëpi, toa yejana caya jëña cui'ne caya nëcañoa hue'equëpi jëoco cuañofo co'aji.

⁹ Panita'a mē'ē ñacoapi co'ayena saco pa'ito duta jeoni so'ona jeocojē'ē. Ai jerepa de'oji, pa'i hue'ñana cacayepi te'e ñacoa hue'equē api, toa yejana caya ñaco ca hue'equēpi jeoco cuañoto co'aji.

Yēi Ñama Ne Huesēsico Ayere Ye'yaye
(Lc 15.3-7)

¹⁰ Coema'pē pa'ijē'ē, icohua'i a'ricohua'ire. Quēare payē. Jaohua'i cato hujñaohua'ire payē, ma'tēmore yē'ē ja'quē ña hue'ñare.

¹¹ Pai Mamaquē cato daisiquē api, ne huesēse'ere huasosi'i caquē.

¹² ¿Me yo'okuē a'ni? Cien yēi ñamare paquēni te'i ne huesēsiquē pa'ito sani co'equē api, noventa y nueve ñamare cutina jeo sani.

¹³ Jaje co'equē ne huesēsiquēre t̄'asiquē pani noventa y nueve ne huesēma'cohua'ire sihuaye jerepa sihuaquē api.

¹⁴ Jaje cui'ne mēsarū ja'quē ma'tēmo pa'iquēje co'ejī, te'e a'riquēje ne huesēye paja'quē caquē.

Cajeire Sai De'huacaiye
(Lc 17.3)

¹⁵ Mē'ē yo'jeipi co'aye mē'ēre yo'osiquē pa'ito ise'ere cajē'ē, i tayose'e asa sētaja'quēre. Jaje caquēna, mē'ē cayere asani sehuocaisiquē pa'ito, mē'ē yo'jeire se quēcōhuē, mē'ēpi.

¹⁶ Jaje pa'iquēta'are mē'ē caye asa yēma'ē pa'ito ja maca soijjē'ē, te'ire panita'a cayaohua'ire i yo'oye ñacohua'ipi te'e cui'ne pa'ye caja'cohua'ire.

¹⁷ Jaohua'ireje asama'ē pa'ito quēajē'ē, jai pai tsi'si sitona. Jai pai catoje asa yēma'ē pa'ina, ja maca Maija'quēre asa ma'ñeje pa'ire jeojē'ē, panita'a pa'i do'i curiquē sequēje pa'ire.

¹⁸ Nuñerepa cayē, mēsarute. Iye yejana mēsarū sēasiquē pani ma'tēmoje sēasiquē pasipi. Cui'ne mēsarupi iye yejana joyesiquē pani cui'ne joyesiquē pasipi, ma'tēmoje.

¹⁹ Cui'ne cayē, mēsarute yequeje. Mēsarupi cayaohua'i iye yejare pa'ijē te'e cuasajē Maija'quē co'amañare sēto yē'ē ja'quē ma'tēmo pa'iquēpi isija'quē api.

²⁰ Jaje pa'ina, cayaohua'i panita'a toasocohua'i yē'ē mamire cajē tsi'sicohua'i pa'ito jarote yē'ēje pa'ija'quē a'ē."

²¹ Ja maca Pedro sani Jesure seji'i:

“¿Ejaē, yē'ēni yē'ē yo'jeipi co'aye yo'okuē pa'ito je soñe sai de'huacaija'quē a'ni, ite?”

²² Caquēna, Jesupi sehuopi:

“Sietēja'a pa'ye sai de'huacaijē'ē caye pañē. Ai jerepa sai de'huacaijē'ē, siete pa'ye setenta.

Sai De'huaye Esequē

²³ Jaje pa'ina, ma'tēmo pa'i te'te cato pai ējaēpi ite necaicohua'i ne do'ire saiñeje pa'ye a'ē.

²⁴ Ja'a ne de'hua huēoquēna, jaiye curiquē i do'i saiñe paquēre dahuē.

²⁵ Darena, i jo'yaē curiquē peoquē paji'i. Jaje peoquē pa'ina, i ējaēpi cuañepi, isi jeojē'ē, ite cui'ne i ñejore, mamajēre cui'ne si'aye i co'amañaje ja curipi i do'i paye saija'quēre.

²⁶ Ca maca i jo'yaēpi i ējaē ña hue'ñana do're ja'rūni seji'i: 'Ejaē, quēcōjē'ē, yē'ē macare. Saija'quē a'ē, si'aye mē'ēre.'

²⁷ Caquēna, ējaēpi ite teaye caji cuasani oi ne de'huacani eto huasopi.

²⁸ Ja maca jo'yaēpi esa etani sai t̄'api, yequēre i cajeire, cui'ne necaiquēre t̄'ani ñaje tēcana tseani huani jeo huēopi, ñeje caquē: 'Saijē'ē, mē'ē yē'ēre do'i payere.' Jaē cato a'ri maña ite do'i paquēni jaje yo'opi.

²⁹ Ja maca i cajeipi do're ja'rūni seji'i: 'Quēcōjē'ē, saija'quē a'ē, si'aye mē'ēre do'i paye.'

³⁰ Jaje catoje yequēpi coequē coa ai jerepa paire co'a hue'ñana sani copi, saisi maca etoja'quē api, caquē.

³¹ Ja maca ējaē jo'yapi iyere ñani ai co'a ju'ijē sani quēahue, iohua'i ñase'ere si'aye.

³² Ja maca i ējaēpi jējo saopi, ite soija'cohua'ire. Soini capi, ite: 'Co'a merepa co'a jo'yaē. Yē'ēpi mē'ēre sai de'huacae'ē, si'aye mē'ē do'i pa'ise'e mē'ēpi seina.

³³ Mē'ēje cui'ne mē'ē cajeire quēcōquē sai de'huacaiye paji'i, yē'ē mē'ēre teaye caquēna, sai de'huacaise'je.'

³⁴ Ja maca i ējaēpi pēi jaje yo'osi do'ire cojē'ē, cuañepi, si'aye saina, jeojē'ē caquē."

³⁵ Jesupi jaje ca tējiquē capi:

“Jaje cui'ne yē'ē ja'quē ma'tēmo pa'iquēje mēsaruteje yo'oja'quē api, mēsarupi pai ñape cajeire joyore papi co'aye yo'ose'e sai de'huacaiye pa'cohua'ire.”

19

Jesús Ye'yase'e Nomiore Jeocoye Ayere
(Mr 10.1-12; Lc 16.18)

1 Jesús iye coca casi jeteyo'je Galileapi saji'i. Sai Judea quë'rona Jordán tsiaya quë'rona ësë mëi te'tena t'ł'api.

2 Jai pai ite pe'tehuë. Pe'terena, jaronna ju'icohua'ire jujupi.

3 Ja maca fariseohua'i Jesure tsiojani se'i'ë, tayo sehuouna, tseañu'u cajë ñeje:

“¿Nějore jeocoye pa'iquë coa a'ri maña yequere yo'ona?”

4 Cajëna, ipi jaohua'ire sehuopi:

“¿Ñama'cohua'i a'ni, toyase'e caye si'aye du'ru pa'i huëose'e nesiquëpi 'Nepi ëmëre cui'ne nomiore?”

5 Cui'ne caji: 'Jaje pa'ina, pëca ja'quëre cui'ne pëca ja'core jeoni nëjona tsioni cayaohua'i pa'ima'pë coa te'ije pa'iohua'i pa'ija'cohua'i a'ë.

6 Jaje pa'ina, cayaohua'i pa'iyë pajä'cohua'i a'ë. Coa ai jerepa te'i pa'ija'cohua'i a'ë. Jaje pa'ina, ëmëpi nëjore jeocoye peoji, Maija'quë ñaquë tsiose'e.”

7 Ja maca ite se'i'ë:

“¿Me yo'oquë Moisés nëjore jeocoye pa'iji, toya ja'huana jeocoo do'ire toyani cuañei'ni?”

8 Cajëna, Jesupi capi:

“Mësarü jëa joyo pa'i do'ire Moisés jeocoye de'o'ji, capi. Du'ru pa'i huëo maca cato jaje pa'iyë papi.

9 Jaje pa'ina, yë'ëpi cayë. Yequë ëmëohua'ire yo'oma'ona jeocoo yequë nomiore huejaquë pani tsoe co'a de'opi, yecore yo'o do'ire. Cui'ne jeocoo nomioni posëpi huejaquë panije cui'ne co'a de'o'ji, ëjëre paconi yo'oquë.”

10 Ja maca i ye'yacohua'ipi cahuë:

“Jaje pa'iyë sëte ëmëpi nomiore huejaye co'aji.”

11 Cajëna, Jesupi capi:

“Si'aohua'i iye asaye peoji. Coa Maija'quë ta'ñe asaye isisicohua'ise'e asaye pa'iji.

12 Iye do'ire yecohua'i ëmëohua'i huejama'cohua'i pa'iyë. Tsi'nëna co'a de'osicohua'i ai de'oyë, paipi huejama'pë pa'ijajë cajë co'a de'huasicohua'i pa'iyë. Yecohua'ipi huejama'cohua'i pa'iyë, ma'tëmo ayere cajë. Iye yë'ë case'e yëquëpi jaje pasi'i cuasani jaje huejama'quë pa'ijë'ë. Pai ñape tñe pa'i do'ire ëmëohua'i huejaye pañë. Yecohua'ipi hueja t'ł'añe pa'ija'cohua'ipi ai de'oyë. Paipi huejama'pë pa'ija'cohua'ire nesicohua'ipi pañë. Yecohua'ipi ma'tëmo pa'iyere cajë huejaye pañë. Jaje pasi'i cani jaje pa'ijë'ë, ai cuasaquëpi.”

Jesupi Tsire De'oyerepa Cacaiye

(Mr 10.13-16; Lc 18.15-17)

13 Ja maca tsire Jesús quë'rona dahuë, ipi jëñapi patoquë se'cacaijaquë cajë. Jaje yo'ojëna, i ye'yacohua'ipi tsire dacohua'ire dama'pë cajë ësehuë.

14 Jaje cajëna, Jesupi capi:

“Coa ñajë'ë, tsi johua'ise'e yë'ë quë'rona daijajë. E'sema'pë pa'ijë'ë. Ma'tëmo cato jaohua'ijë pa'iohua'i tsecoa.”

15 Ja maca tsire i jëñapi patoquë yo'o tëjini saji'i, yequë hue'ñana.

Posëpi Jaiye Co'amaña Paquëpi Jesure Case'e

(Mr 10.17-31; Lc 18.18-30)

16 Posëpi jaiye co'amaña paquëpi Jesure sani seji'i:

“De'o ye'yaquë. ¿Ique de'o co'amañare yo'oja'quë a'ni, ma'tëmo ti pani huesëye t'ł'asi'i cani?”

17 Caquëna, Jesupi capi, ite:

“¿Me yo'oquë de'oquë caquë'ni, yë'ëre? Peoji, de'oquë. Coa te'i pa'iji, jaë cato Diusupi. Jaje pa'iquëta'are më'ëpi ti pa'i hue'ña cacaye yëni sehuoye pa'iji, cuañese'ere.”

18 Caquëna, posëpi ite capi:

“¿Je a'ni, iti yë'ë sehuo ja'ñe?”

Caquëna, Jesupi capi, ite:

“Huani jeoma'ë pa'ijë'ë, yequë. Nějore yecore yo'oma'ë pa'ijë'ë. Co'amaña ñama'ë. Yecohua'ire cosoma'ë pa'ijë'ë.

19 De'oye sehuojë'ë, më'ë ja'quëre cui'ne më ja'core. Cui'ne oijë'ë, më quëno maca pa'iquëre më'ëja'a co'ye oiyeje pa'ye.”

20 Posëpi ite capi:

“Si'aye iye tsihua'ë pa'inëpi de'oye yo'osiquë a'ë. ¿Jaje pa'ito iquepi caraquë'ni, yë'ëre?”

21 Caquëna, Jesupi sehuopi, ite:

“Më'ëpi de'oquërepa pasi'i cani më'ë payere isiquë curiquë nequë cui'ne peocohua'ini coa isijë'ë. Ja macata'a më'ë ma'tëmore jaiye co'amaña paye pa'iji. Ja jeteyo'je dani tuijë'ë, yë'ëre.”

22 Jaje caquëna, iyere posë asani ai oi saji'i, jaiye co'amaña paquë sëte.

23 Ja maca Jesupi i ye'yacohua'ire capi:

“Nuñerepa cayë, mësarute. Ai jëaji, ma'tëmo jaiye co'amaña pacohua'ipi cacaye.

²⁴ Cayë, tìjupë mësarute. Camellore miu ñaca cojeja'a sa etojaiñe peoji. Jaje pa'ita'are ai jerepa jëaji, jaiye co'amaña pacohua'ipi ma'tëmo cacaye.”

²⁵ Jare i ye'yacohua'ipi asani ai cuasajë johua'ija'a sa'ñe sei'ë: “¿Jaje pa'ito nepi huasosicohua'i pa'iyë pa'iquë'ni, cajë?”

²⁶ Jesupi ñani capi, jaohua'ire:

“Paire cato caca tì'añe peoji. Jaje pa'iquëta'are Maija'quëre cato neñe pa'iji, si'aye.”

²⁷ Ja maca Pedropi capi, ite:

“Ëjaë, yëquë si'aye yëquë co'amaña pase'e jëoni më'ëre tuë'ë. ¿Jaje yo'osicohua'i iquere yëquë paja'cohua'i a'ni?”

²⁸ Cajëna, Jesupi sehuopi, jaohua'ire:

“Nuñerepa cayë, mësarute. Ja mu'se si'aye huajëye de'osi maca Pai Mamaquëpi i ñu'i saihuëna Ëjaërepa ja'rusi maca, mësaru yë'ëre tuisicohua'ije ja'ruja'cohua'i a'ë, doce ñu'i saihuëana, doce tsëcapëa Israel pai yo'ose'e ña de'huaja'cohua'ipi.

²⁹ Huë'e panita'a a'yëre, a'yore, panita'a ja'quëre, panita'a ja'core, panita'a nëjore, panita'a mamajëre, panita'a yejare yë'ë do'ire jëosicohua'i cato cien pa'ye jerepa paja'cohua'i a'ë, cui'ne ti pani huesëyere paja'cohua'i a'ë.

³⁰ Jaje pa'iquëta'are jai pai yure du'ru pa'icohua'ipi tējiohua'irepa pa'ija'cohua'i a'ë, cui'ne yure jeteyo'jerepa pa'isicohua'ipi du'ru acohua'i pa'ija'cohua'i a'ë.

20

Co'amaña Necohua'i Yo'oyeje Pa'ye Quëase'e

¹ Ma'tëmo pa'i tē'te cato jai tsio paquëpi nea huë'ñarepa co'amaña necaicohua'ire co'esi'i, cuiya'i tējaja'cohua'ire caquë saise'eje pa'ye a'ë.

² Co'amaña necaicohua'ire tì'ani te'e mu'se yo'lo do'ire te'e ëja ja'hua saisi'i, capi. Jaje quëani ne de'huani jëjo saopi, i tsio necaija'cohua'ire.

³ Nea huë'ña nueve pa'i maca etani saji'i. Sai ñaquëna, nema'cohua'ipi jai pai quë'rore coa pa'ë.

⁴ Pa'ijëna, capi, jaohua'ire: ‘Mësaruje sani yë'ë tsë tēacajj'ë, saisi'i, iti sañe pa'iyëje' caëna. Ja maca saë'ë, tējaja'cohua'ipi.

⁵ Mu'se jopo pa'i maca tsio aquë etani saji'i. Saisiquëpi tres pa'i maca sani copì, jare cui'ne paire co'equë.

⁶ Saisiquëpi cui'ne neato cinco pa'i maca, sani copì. Sani tì'api, pai coa pa'i huë'ñare yo'oma'pë coa nëcacohua'ire. Ñani capi: ‘¿Iquere yo'ojë si'a mu'se coa pa'iyë'ni?’

⁷ Caquëna, johua'ipi cahuë, ite: ‘Yëquëre yecohua'ije co'amaña nejë'ë cajë cuañese'e peocohua'i a'ë.' Cajëna, johua'ire capi: ‘Jaje pa'ito sani mësaruje yë'ë co'amañare necaij'ë'.

⁸ Ñami de'osi maca iti tsio aquëpi co'amaña necaicohua'ire ñacaiquëre soini capi: ‘Co'amaña nesi do'ire sajj'ë'ë. Jeteyo'je cacasicohua'ini sajj'ë'ë du'ru sañi jeteyo'je du'ru cacasicohua'ire sajj'ë'ë.’

⁹ Caëna, co'amaña nesicohua'ire soiquëna, neato cinco pa'i maca cacasicohua'ipi daë'ë. Datena, te'e mu'se yo'osi do'i ja'ye saipi.

¹⁰ Ja jeteyo'je du'ru cacasicohua'ire soiquëna, cuasahuë, jerepa curiquë nejaja'cohua'i a'ë, cajë. Jaje cuasasicohua'ita'are pai ñapere te'e mu'se yo'ose'e ja'ye saipi.

¹¹ Jaje sai cuañoni sañope ca huëohuë, iti co'amaña paquëni,

¹² ñeje cajë: ‘Icohua'i jeteyo'je cacasicohua'i cato coa te'e hora nehuë. Jaje nesicohua'ita'are yëquë si'a mu'se co'amaña nejë, ëšë uquëna, quëcojë nesicohua'ire sañe ja'ye saihuë, më'ë.’

¹³ Jaje cajëna, iti tsio aquëpi sehuopi, jaohua'i aquëre ñeje: ‘Cajei, co'aye yo'oma'ë pa'iyë, më'ëre. ¿Më'ëje paipi te'e mu'se ne do'ire, sajj'ë'ë caquë yë'ë ja're conì, ne de'huasiquëta'a?’

¹⁴ Jaje pa'ito iye më'ë ne do'i ñi sajj'ë'ë. Yë'ëpi yëë më'ëre isiyë ja'ye iquëreje isiyë, jeteyo'je cacasicuëreje.

¹⁵ ¿Më'ëpi cuasani yë'ë curiquëre, yë'ë yëyeje pa'ye yo'oye peoji, cuasaquë? ¿Panita'a coa jaiye pasi'i cuasaquëna, pëti ëaye më'ëre nëiquë yë'ëpi paire oiquëpi yo'oquëna?’

¹⁶ Jaje pa'ina, jeteyo'je pa'isicohua'ipi du'ru acohua'i pa'ija'cohua'i a'ë. Cui'ne du'ru acohua'ipi jeteyo'je pa'ija'cohua'i a'ë. Jaje pa'ina, jai pai soisicohua'i pa'iyë. Pa'ijëta'are, sahuani jo'ya nesicohua'ipi a'ri ja'i pai pa'iyë.”

Jesús I Ju'i Ja'ñere Quëaye
(Mr 10.32-34; Lc 18.31-34)

¹⁷ Jesús Jerusalén ma'are pa'a i doce ye'yacohua'ire johua'ise'ere tiro sani capi:

18 “Mësarupi ñañë, mai Jerusalénna mëi huëoye, Pai Mamaquëre Maija'quë hu'e ñacacohua'i ëjaohua'ina cui'ne cuañese'e ye'yacohua'ina isija'tona, isisi maca jaohua'ipi huani jeoja'quë api cajë,

19 ti pãina isija'cohua'i a'ë. Isirena, jaohua'ipi ite cue'cuejë t'ë'cajë yo'oni, soquë sarahuana quejajë cajë. Jaje yo'osicohua'ita'are toaso mu'seña pa'i maca huëija'quë api.”

Jacobo Cui'ne Juan Pëca Ja'co Sese'e
(Mr 10.35-45)

20 Jesús qu'ërona Jacobo cui'ne Juan pëca ja'copi Zebedeo mamajë ja're cõni do're ja'ruo, Jesús ña hu'eñana necai ja'ñere sesi'i caco.

21 Ja maca ipi seji'i, iote:

“¿Iquere yëco'ni, më'ë?”

Caquëna, sehuo, ñeje: “Y'ë caya mamajëre më'ë pa'i t'ë'tena ëjaohua'ire neni më'ë ëja t'ë'tena yequëre cui'ne ari t'ë'tena ñocaij'ë.”

22 Cacona, Jesupi sehuopi:

“Cuasaye peoye huesërepa señë, mësaruru. ¿Mësaruru de'hue t'ëto sani t'ü'añe, y'ë'ë sëje cõno t'ëto sai ja'ñeje pa'ye, cui'ne do cuaño t'ü'añe y'ë'ë do cuaño ja'ñeje pa'ye?”

Jaohua'ipi cahuë:

“T'ü'añë.”

23 Cajëna, ipi capi, jaohua'ire:

“Nuñerepa cayë, jaje pa'ij'ë'ë. Mësaruru t'ëto saija'cohua'i a'ë, iye sëje cõnoja'a. Cui'ne y'ë'ë do cuañose'ëje do cuañoja'cohua'i a'ë. Jaje pa'iquëta'are ëja t'ë'te cui'ne ari t'ë'tena ja'rurye cato y'ë'ëpi isiyi peoji. Y'ë'ë ja'quëpi i ne de'huacaisicohua'ina isija'quë api.”

24 Jaje caquëna, diez i ye'yacohua'ipi iyere asani sañope pëti huëohuë, caya hua'ire.

25 Jaje sañope yo'oye pa'ina, Jesupi soini capi, jaohua'ire:

“Mësaruru, tsoe t'ü'ne asayë. Iye yeja pai ëjaohua'i cato si'a co'amaña meñe payë, cui'ne jiohua'i huë'ehuë maca acohua'ipi mëñe ëjaohua'ire payë, jiohua'ire.

26 Jaje pa'ye peosipi, mësarute cato. Ai jerepa pa'i pasi'i caquëpi yecohua'ire necaiquë pa'iyë pa'iji.

27 Cui'ne mësaruru aquëpi du'ru aquë pasi'i caquë pani yecohua'ini necaiquëpi jo'yaë pa'iyë pa'iji.

28 Pai Mamaquëje pa'iohua'i pa'iyë pa'iji. Jaë jë'quë daima'ë paji'i, yecohua'ipi necaijajë caquë. Coa ai jerepa necasi'i caquë daji'i, i pa'iyë do'ipi jai pai de'oye pa'i ja'ñe necasi'i caquë.”

Jesupi Cayahua'ire Ñama'cohua'ire Jujuse'e
(Mr 10.46-52; Lc 18.35-43)

29 Jericó daripëpi etani saijëna, jai pai Jesure tuë'ë.

30 Saijëna, jarote cayahua'i ñama'cohua'ipi paë'ë, ma'a y'ë'quë macare. Pa'icohua'ipi Jesupi t'ëtosaiji asani cuihuë:

“Ëjaë, David Mamaquë, yëquë mañare teaye ñani cõcaij'ë'ë.”

31 Cajëna, paipi cuima'pë pa'ij'ë, cahuë. Jaje catoje ai jerepa cuihuë:

“Ëjaë, David Mamaquë yëquë mañare teaye ñani cõcaij'ë'ë.”

32 Ja maca Jesús nëcajaní ñama'cohua'ire soini seji'i, jaohua'ire:

“¿Iquere necaijaquë cajë yëye'ni, y'ë'ëre?”

33 Caquëna, jaohua'ipi sehuohuë:

“Ëjaë, yëquë ñañere yëy'ë.”

34 Cajëna, Jesupi teaye pa'iohua'ire ñani oi patopi, ñaco cãna. Jaje patoquëna, iti macapi tsoe ñacohua'i paë'ë. Pa'ij'ë Jesure tuë'ë.

21

Jesupi Jerusalén Cacase'e
(Mr 11.1-11; Lc 19.28-40; Jn 12.12-19)

1 Jerusalén ja'ye macare pa'ij'ë t'ü'ahuë, Betfagë daripëna, Olivos ai cutihuë quëno maca pa'icõna. Jaropi Jesús cayahua'ire i ye'yacohua'ire jëjo saopi.

2 Jëjo saoque capi, jaohua'ire:

“Saij'ë'ë, jë'ñerepa pa'i daripëna. Jarona t'ü'aja'cohua'i a'ë, burra sëa nëosicopi. Burrito ja're cõni nëiona, ñani jopeni dacaij'ë'ë.

3 Jaje saijëna, yecohua'ipi ¿me neja'quëni, saye? Cato caj'ë'ë: ‘Ëjaëpi cusi'i caëna, yo'oyë. Esa co'yoja'quë api, cuni t'ëjini.’

4 Iye cato yo'ose'e paji'i tsoe aquë Maija'quëre quëacaiquë toyaquë caquë pa'ise'ëpi t'ü'acquëna ñeje toyase'ëpi:

⁵ Sión daripëre cajë'ë:

“Ñajë'ë. Më'ë ëjaëre papi më'ëna daiji,
Jerepa pa'i a'ë cuasama'quëpi burroni ñu'i
Co'amaña hue'eco burra mamaquëni ñu'i.”

⁶ Ja maca i ye'yacohua'ipi sani Jesús cuañese'eje yo'ohuë.

⁷ Burrare cui'ne io mamaquëre dani cañapi iohua'i jetena jajehuë. Jajerena, ja maca Jesupi mëni ja'rupi.

⁸ Ja maca jai pai pa'iyë sëte cañapi ma'ana jajehuë. Yecohua'ipi soquë capëare tëtëjë ma'ana qehuë, sihuajë.

⁹ Ja maca du'ru sai pai cui'ne jeteyo'je dai paipi cui huëohuë:

“De'okuëre pani, pai ëjaë David mamaquë! ¡Ëjaërepa mami hue'equëpi daiji, de'okuëpi! De'okuëre papi, Maija'quë!”

¹⁰ Jesús Jerusalén cacasi maca si'a pai iti daripë pa'icohua'i ai cuasajë yecohua'ire sei'ë:

“¿Iquei'ni, iquë?”

¹¹ Cajëna, paipi cahuë:

“Iquë cato Maija'quëre quëacaiquë api Jesupi, Nazaret Galilea aquë api.”

Jesupi Maija'quë Huë'ere Tsoa Tose'e

(Mr 11.15-19; Lc 19.45-48; Jn 2.13-22)

¹² Ja jeteyo'je Jesús cacapi, Maija'quëre huë'ëna. Cacani si'ahua'ire huerojë cui'ne isijë yo'ocohua'ire hue'sena eto saopi, jaro pa'isicohua'ire mesaña po'ne taño saopi, curiquë paire cambiase'e cui'ne su'tere isicohua'i ñu'i saijë po'ne taño saopi.

¹³ Jaje yo'okuë capi, jaohua'ire:

“Toyase'e caji, ñeje: ‘Yë'ë huë'e cato Maija'quëre së huë'e hue'yosicoa.’ Jaje pa'iquëta'are mësarú cato co'amaña ñaohua'i tu'aro neni yo'oyë.”

¹⁴ Maija'quëre së huë'ëna ñama'cohua'i cui'ne do'pëcohua'i daë'ë. Jesús quë'rona daijëna, jipi jujupi.

¹⁵ Jaje yo'okuëna, Maija'quë huë'e ñacaicohua'i ëjaohua'ipi cui'ne cuañese'e ye'yacohua'ipi iye pai yo'o tì'a ma'ñere yo'okuëna, ñahuë. Cui'ne tsipi Maija'quë huë'ëpi ai ñeje cuijë cajëna, asahuë. De'okuëre papi David mamaquë pai Ëjaë! Jaje cajëna, asani pëijë,

¹⁶ Jesure cahuë:

“¿Asaquë, më'ë jaohua'i më'ëre cuijë caye?”

Cajëna, Jesupi sehuopi:

“Jëjë'ë, asayë. ¿Mësarú ñama'cohua'i a'ni, toyase'e ñeje caye?”

Më'ëpi a'ricohua'i mañare cui'ne oje tsu'sucohua'ire nehuë,

Maija'quëre de'oyerepa jëjëja'cohua'ëre.”

¹⁷ Jaje cani saji'i, yequë a'ri daripë Betaniana. Jarona ñami pëapi.

Quëima' Soquë Yëre Jesús Pëi Case'e

(Mr 11.12-14, 20-26)

¹⁸ Nea huë'ña Jesús pai daripëpi co'iquëna, ai ëaye nëji'i.

¹⁹ Nëina, ma'a yë'quë maca nëca yëre ja'ye maca tsiojani ñaquëna, ti peoyë paji'i. Quëima' ñë, coa ja'ose'e paji'i. Ja maca Jesupi capi, soquë yëre:

“¡Yureta'a ti quëima'o pa'ijë'ë cuañëñë, më'ëre!”

Jaje i ca macapi cuëne huesësico paco'ë.

²⁰ Iyere ñani i ye'yacohua'ipi ai cuasajë Jesure sei'ë:

“¿Me yo'okuë soquë yë esarepa cuëne huesëco'ni?”

²¹ Cajëna, Jesupi sehuopi, jaohua'ire:

“Nuñerepa cayë. mësarute. Mësarupi neñe pa'iji cuasacohua'i pani jëa coeye peoni yë'ë soquë yë caëna, yo'ose'eje yo'oye pa'iji. Iye cutihuëre cacohua'i pani cayë: Iye macapi sani jai tsiayana sa du'ijë'ë. Jaje ca maca tsoe yo'ose'e pa'iyë pa'iji.

²² Cuasare pajë secohua'i pani si'aye mësaruse'e tì'aja'cohua'i a'ë.”

Jesús Cuañëñerepa Pa'iyë

(Mr 11.27-33; Lc 20.1-8)

²³ Ja maca Jesús Maija'quë huë'ëna pa'i ye'yapi. Jarote ja yë'ta'a ye'yaquëna, Maija'quë huë'e ñacaicohua'i ëjaohua'i cui'ne judío pai aiohua'i tsio dani ite sei'ë:

“¿Ique cuañëñepi iye co'amaña yo'okuë'ni? ¿Nepi më'ëre iye cuañë tutu paquëre nere'ni?”

²⁴ Cajëna, Jesupi sehuopi, jaohua'ire:

“Yë'ëje cui'ne mësaruteje sësi'i. Iye sëse'ere sehuorena, yë'ëje quëasi'i iye co'amaña yo'o tutu aye.

²⁵ ‘¿Ne cuañësiquëpi paquë'ni, Juan oco doquë, Maija'quë panita'a paipi cuañësiquë paquë?’ ”

Caëna, ja maca sa'ñe ca huëohuë, jöhua'ija'a ñeje:

“Maija'quë jëjo daosiquë paji'i, cato ipi sehuoja'quë api, maire: ‘¿Jaje pa'iquëta'are me yo'ojë mësaru asama'pë pate'ni?’

²⁶ Cui'ne 'maipi pai cuañesiquë paji'i' canije ca'rayë, paire. Juanre cato Maija'quë cocare quëaquë paji'i cuasayë, paije.”

²⁷ Jaje pa'ina, cahuë, Jesure:

“Huesëyë, yëquë.”

Cajëna, ije capi:

“Yë'ëje quëaye pañë, iye co'amaña yo'o tutu cuañequëre.”

Caya Mamajë Yo'oye Ayere Quëaye

²⁸ Jesupi capi, jaohua'ire:

“¿Me cuasaye'ni, mësaru iyere asani? Paipi caya mamajëre paquëpi capi, jaohua'ia aquëni: 'Tsihua'ë, yure sani yë'ë co'amañare necaijë'ë, cuiya'i téayerë.’

²⁹ Mamaquëpi sehuopi: 'Pañë.' Jaje casiquëta'a tñe cuasa ñajani sani co'amaña nepi.

³⁰ Ja jeteyo'je sani yequëre capi, cui'ne caquëna, ipi sehuopi: 'Jaë, ja'quë sasi'i.' Casiquëta'a saiyë papi.

³¹ ‘¿Jaje pa'ito jequëpi pëca ja'quë yëse'e necaquë'ni, jaohua'ia aquë?’ ”

Caquëna, jaohua'ipi cahuë:

“Du'ru aquë.”

Ja maca Jesupi capi, jaohua'ire:

“Nuñerepa cayë, mësarute. Pa'i do'i curi secohua'i, cui'ne ëmëohua'ire yo'orojaicohua'ipi, ma'tëmo du'ru cacaja'cohua'i a'ë, mësaru ja cacama'pëna.

³² Juan oco doquëpi mësarute quëapi. Iti pa'iyere quëaquëta'are mësarupi asama'pë paë'ë. Jaje pa'iquëta'are pa'i do'i curiquë secohua'ipi cui'ne si'a ëmëohua'ire yo'ocohua'ipi asajë pönëhuë. Jaje si'aye ñajëta'a mësaru pönëma'pë paë'ë.

Co'acohua'i Yo'oye Ayere Quëaye

(Mr 12.1-12; Lc 20.9-19)

³³ Asajë'ë, yure iye quëayerë. Jai tsio paquëpi tapi, pisi cuiya'ire. Tani tsioja'a tëhuo të'ijaji'i cui'ne cuiya'i suja'coreje nepi, cui'ne jai ëmë huë'eje nepi, iopi tuijë si'a tsio ñaja'core yahue imacohua'ire. Ja jeteyo'je co'amaña necohua'ire co'eni necaijë'ë cani so'ona saji'i.

³⁴ Saisiquëpi tëa mu'sëña t'asi maca jëjo daopi, i jo'yare. Sani ite co'amaña necaico-hua'ina sejëna, jaohua'ipi ite cajë nëocaise'ere isijajë caquë.

³⁵ Jaje caquë jëjo saosiquëta'are co'amaña necohua'ipi i jo'ya mañare tseñani tëlcahuë, te'ire. Yequëni coa huani jëohuë. Cui'ne yequëni quëna pëapi jëa huëohuë.

³⁶ Jaje yo'oruje iti tse aquëpi t'ijupë du'ru jëjo daose'e seña maca jai paire jëjo daopi, i jo'yare. Jaje jëjo daoruje co'amaña necohua'ipi cui'ne jaohua'ireje yo'ohuë.

³⁷ Ai tējiyerepa jëjo daopi, i mamaquëre pani, 'oijë dahuëre ñaja'cohua'i a'ë, cuasaquë.’

³⁸ Jaje jëjo daosi maca i mamaquëni ñani, co'amaña necohua'ipi jöhua'ija'a sa'ñe cahuë: 'Iquë api, iti co'amaña tse aquë de'oja'quë. Jaje pa'ito huani jëoñu'u, maipi iye yeja tse acohua'i pa'ija'cohua'i.’

³⁹ Jaje cani tseñani tsiopi hue'sena etoni sani huani jëohuë.”

⁴⁰ Ca tējini Jesús seji'i:

“Iti tsio aquëpi daisiquë pani, ¿me neja'quë a'ni, co'amaña necohua'ire?”

⁴¹ Caquëna, jaohua'ipi cahuë, ite:

“Huani jëoja'quë api, ti oiye peoye co'acohua'ire. Yo'oni yecohua'ini co'eni tsio co'amaña neja'cohua'ire jëosipi. Jëona, quëi maca t'ia'ëna, tëani ite isija'cohua'i a'ë, ite cajë necaise'ere.”

⁴² Ja maca Jesupi capi, jaohua'ire:

“¿Ti ñama'cohua'i a'ni, toyase'e, mësaru? Caji ñeje:

Necohua'ipi yo'o jujani jëosi quëna pëpi,

Yure cato du'ru huëocorepa pönëo.

Iye cato ëjaëpi jaje neina, merepa jaje neini cajë ai cuasajë ña'ne pa'iji.

⁴³ Jaje pa'ina, mësarute cayë. Diusu pa'i te'te pasicohua'ire mësarute sioja'quë api. Tsioni yecohua'ina isija'quë api, i pa'i te'tena iti ca tëani isicohua'ina.

⁴⁴ Quëna pë cato, yecohua'ipi io ëmëje'ena tomecohua'ipi jë'yecoa. Cui'ne quëna pëpi yecohua'ia ëmëje'ena tomeco pani peo sëpëare ne'ne pa'iji.”

⁴⁵ Jaje caquëna, Maija'quë huë'e ñacai ëjaohua'ia cui'ne fariseohua'ipi maini caji cuasajë Jesús caye asahuë.

⁴⁶ Ja maca tseañe yëjëta'a päini ca'rajë pahuë, jai pai Jesure Maija'quëre quëacaiquë api cuasacohua'ia pa'ijëna, ñani.

22

Huejaye Fiesta

¹ Jesús tijupè ca huëo copì, paì ñañe ayeja'a iñoquë ñeje:

² “Ma'tëmo cato paì ëjaëpi mamaquëre huejaquëna, sihuaquë paìre tsi'soni yo'ose'eye pa'ye a'ë.

³ Jaje yo'oquë jëjo saopi, ì jo'yare, huëosicohua'ire quërëjajjè'ë, caquë. Jaje pa'iquëta'are huëosicohua'ipi daiye coehuë.

⁴ Tijupè ì jo'yare jëjo saocuë capi: ‘Quëajë'ë, soisicohua'ire. Tsoe si'aye aì ja'ñe de'hua saohuë. Huequëreje hui'yape quë'iohua'ini huani ne de'huahuë, huejaye ñaja'cohua'ì daijajë caquë.’

⁵ Caquëna, asani ì case'e quëajëna, huëosicohua'ì asacaima'pë paë'ë. Yequëpi tsiona saji'ì. Yequë co'amafña ìsi sapi.

⁶ Cui'ne yecohua'ipi ja ëjaë jo'yare tseani co'aye yo'ojë huani jëahuë.

⁷ Ja maca paì ëjaë pëi ì soldado paìre jëjo saopi, huaisicohua'ire. Huani jëani ìti daripëje ëo jëoja'cohua'ire.

⁸ Ja jeteyo'je capi, ì jo'yare. ‘Hueja aò ne de'huase'epi paji'ì. Jaje pa'iquëta'are soisicohua'ì daiye pahuë. Ja soisicohua'ì cato do'ì peocohua'ì paë'ë.

⁹ Jaje pa'ì do'ìre jai ma'añana sani huëojë'ë. Coa si'aohua'ire ma'a pa'icohua'ire dajë'ë, hueja aò aija'cohua'ire.’

¹⁰ Caëna, paì ëjaë jo'yapi etani sani ma'aja'a cui'ijë co'acohua'ire cui'ne de'ocohua'ire si'sohuë, huë'e timë huesëyerepa.

¹¹ Ja maca ëjaë cacani soisicohua'ire ñapi. Ñaquëna, te'ì hueja caña suñama'quëpi ñuji'ì.

¹² Ñani capi, ìte: ‘¿Cajei, me më'ë iño cacaë'ni, hueja caña suñama'quë?’ Jaje caquëna, ìpi ti sehuoma'ë paji'ì.

¹³ Cama'ëna, ja maca paì ëjaëpi mesa ñu'icohua'ire necajjè pa'icohua'ire capi: ‘Jaëte tseani nëcañoa cui'ne jëña sëani jëocojë'ë, nea hue'ña hue'sena. Jaropi oi cui'ne cuji qui'cojaquë.’

¹⁴ Jaje pa'ina, jai paì pa'iyë, soisicohua'ì. Jaje pa'iquëta'are a'ri maña pa'iyë, sahuani jo'ya nesicohua'ì.”

Paì Do'ì Saiñe Ayere Case'e

(Mr 12.13-17; Lc 20.20-26)

¹⁵ Ja maca fariseohua'ipi sani sa'ñe coca cajë te'e cuasahuë. Jaje cajëna, tayo sehuouna co'aye capi cajë ne ja'ñere.

¹⁶ Jaje cani jëjo saohuë, ìohua'ì acohua'ire Herodes tsëcapë acohua'ina conì te'e Jesure caja'cohua'ire ñeje:

“Ye'yaquë, asayë, yëquë më'ë nuñerepa caquë pa'iyë, cui'ne nuñerepa Maija'quë ma'are ye'yaquëpi paì cayere asacaima'quëpi cui'ne paì pa'iyë ëmëjese'e ñaquë cama'quë pa'iyë.

¹⁷ ¿Jaje pa'ipi me më'ë caquë'ni? ‘¿De'oquë pa'ì do'ìre si'a paì ëjaë Césarna curi saiñe panita'a pañe?’ ”

¹⁸ Jaje cajëna, Jesús tsoe asapi, ìohua'ì co'aye cuasajë seña. Jaje pa'ina, capi, jaohua'ire:

“Coa cacohua'ì, ¿Me yo'ojë yë'ëre cosojë neñu'u cajë caye'ni?

¹⁹ Iñojë'ë, pa'ì do'ì saì të'quire.”

Caquëna, te'le të'qui romano curi të'quire dahuë.

²⁰ Darena, Jesús ñani jaohua'ire seji'ì:

“¿Ne tsiare hue'eco'ni, iye të'qui ico cui'ne ne mamire hue'eco'ni?”

²¹ Caquëna, ìohua'ipi sehuohuë:

“Si'aohua'ì ëjaërepa mamipi pa'iji.”

Cajëna, Jesupi capi, jaohua'ire:

“Isijë'ë, paì ëjaë tsëco pa'ito jare ìti tsë aquëna. Cui'ne Maija'quë tsë pa'ito jare Maija'quëna isijë'ë.”

²² Caquëna, iyere asani ai cuasahuë. Jaje yo'oni ìte jëoni saë'ë.

Ju'isicohua'ì Huëiye Pa'iquë Cajë Señe

(Mr 12.18-27; Lc 20.27-40)

²³ Jare ja mu'se saduceohua'ì Jesure sani ñañu'u cajë saë'ë. Saduceo hua'ì cato ju'isicohua'ì huëiye peoji, cacohua'ì a'ë. Jaje pa'iohua'ipi iyere cahuë, ìte:

²⁴ “Ye'yaquë, Moisés capi, huejasiquëpi mamajëre peoquë ju'isiquë pa'ito yo'jeipi huejaye pa'iji, hua'jeore, maja'yë ju'isi do'ìre mamajëre pacajja'quëpi.

²⁵ Yëquë acohua'ipi siete yo'je tsj te'le tsëcapëre paë'ë. Pa'icohua'ipi du'ru maja'yëpi huejani juji'ì, mamajëre peoquë. Ju'ì yo'jeina jëocaji'ì, nëjore.

²⁶ Jaëje mamajëre peoquë juji'ì. Juquëna, toasoñe aquë huejapi. Huejani jare jaje peoquë juji'ì. Jajese'e si'a tsëcapë siete juju sahuë.

²⁷ Ai jeteyo'jerepa nomio juco'ë, si'aohua'i jutena.

²⁸ Jaje pa'ito ju'isicohua'i huëi maca ¿ne nêjo pa'ija'coa'ni, jaje si'aohua'i te'oni hueja-sico?"

²⁹ Jesupi sehuopi, jaohua'ire: "Mêsarupi tayo cuasayë, toyapë ñama'cohua'i sête cui'ne Maija'quë tutu ñama'cohua'i sête.

³⁰ Ju'isicohua'ipi huëisicohua'i huejama'pë pa'ija'cohua'i a'ë. Cui'ne mamajë nomiohua'ire huejoma'pë pa'ija'cohua'i a'ë. Ma'têmo acohua'i huññaohua'ije pa'iohua'i pa'ija'cohua'i a'ë.

³¹ Jaje pa'ito mësaru ju'isicohua'i huëiye aye Maija'quë case'ere toyase'e ñama'cohua'i a'ë. Toyase'e ñeje caji:

³² "Yë'ë cato Abraham, Isaac, cui'ne Jacobo Diusu a'ë." Diusu cato ju'isicohua'i Diusu peoji. Jajë cato huajëcohua'i Diusu api."

³³ Jaje caquëna, iyere paj asani ai cuasahuë, me ja jerepa ye'yaquë'ni, cuasajë.

Ai Jerepa Pa'ye Cuañese'e

(Mr 12.28-34)

³⁴ Jesupi saduceo paire ti sehuoye peoyerepa ca huesopi, asani fariseo paipi tsi'sihuë, coca cañu'u cajë. Ja maca dani

³⁵ Fariseo paj aquëpi cuañese'e ye'yaquëpi neñasi'i caquë ite seji'i:

³⁶ "Ye'yaquë, ¿jeco a'ni, cuañese'e si'aye seña maca pa'io paire ye'ya ja'ñe?"

³⁷ Seina, Jesupi capi:

"Oijë'ë, më Ëjaë Diusure, si'a më joyopi, si'a më pa'iyepi cui'ne si'a më'ë cuasayepi.

³⁸ Iye a'ë, si'aye seña maca jerepa pa'ye cui'ne du'ru macarepa cuañese'e.

³⁹ Yecoje jare cui'ne pa'io. Jaopi caji, ñeje: 'Oijë'ë, më quëno maca aquëre më'ëja'a co'ye cuasaquë oiyeje pa'ye.'

⁴⁰ Iye cayayena si'aye Moisés cuañese'e cui'ne Maija'quëre quëacaicohua'i ye'yase'e meñ quëco pajì."

¿Ne Mamaquë A'ni, Cristo?

(Mr 12.35-37; Lc 20.41-44)

⁴¹ Ja yë'ta'a fariseohua'i tsi'sisicohua'i pa'ijëna,

⁴² Jesús seji'i, jaohua'ire:

"¿Me cuasaye'ni, mësaru Cristore? ¿Ne mamaquë a'ni?" Caquëna, iohua'ipi sehuohuë: "David mamaquë api, jajë cato."

⁴³ Ja maca Jesupi capi, jaohua'ire: "¿Jaje pa'iquëta'are David Maija'quë joyopi quëaquëna, Ëjaë hue'you'ni, ite? Jaje pa'ina, Davidpi capi:

⁴⁴ Ëjaëpi capi, yë'ë Ëjaëre:

'Ja'rujë'ë, yë'ë ëja te'tena,

Më'ëre sañope yo'ocohua'ire më'ë quëo huë'ehuëna të'ya me macaja'a.'

⁴⁵ ¿Me jaje pa'ito Cristo David mamaquë pa'iquë'ni, Davidpi Ëjaë ite hue'yoto?"

⁴⁶ Ja maca te'ijë ti te'e yë'opojë caye paipi. Cui'ne jare ja mu'sepi cuañese'e ye'yacohua'ije jaiye seña jeohuë, ca'rajë.

23

Fariseohua'ire Cui'ne Cuañese'e Ye'yacohua'ire Sañope Case'ere

(Mr 12.38-40; Lc 11.37-54; 20.45-47)

¹ Ja maca Jesupi capi, paire cui'ne i ye'yacohua'ire:

² "Cuañese'e ye'yacohua'i cui'ne fariseo paj cato Moisésje pa'iohua'i a'ë.

³ Jaje pa'ina, mësaru si'aye jaohua'i caye sehuocaiye pa'iji. Jaje pa'iquëta'are iohua'i yo'oyere ye'yema'pë pa'ijë'ë. Jaohua'i cato ñeje yo'oye pa'iji casicohua'ipi iohua'i case'ere yo'oma'pë ai yequere yo'ocohua'i a'ë.

⁴ Jaohua'i cato hue'ocaiyë, dëquëyere pare. Quëco ëa ma'ñere pare jare paipi hue'ejajë cajë yo'oyë. Jaje yo'ojëta'a iohua'i cato moño maca pu'peyegue cocohua'i a'ë.

⁵ Si'aye iohua'i yo'oye cato paipi ñajajë cajë yo'oye a'ë. Jaje pa'ina, tsia tiñare pana cui'ne tata tuna caña ca'tina Maija'quë coca ayepi toyase'ere sëoni ju'lijë cui'yë. Cui'ne ju'i ca niamoaja'a de'oyerepa tsoa caña nëojë huatose'ere ju'iyë, yequë paj ju'iyë seña maca de'oyere.

⁶ De'o huë'ñana go añere yëcohua'i a'ë. Cui'ne sihua cuañocohua'i ñu'i saihuëna ja'ruye yëcohua'i a'ë, paj tsi'si huë'ñana.

⁷ Cui'ne paipi de'oyerepa ëjaohua'i a'ë cajë ca'rajë pëpayere yëcohua'i a'ë.

⁸ Jaje jaohua'i yo'ocohua'ita'are mäsaru cato paipi ye'yacohua'i a'ë hue'yojajë cajë yo'oma'pë pa'ijë'ë. Jaje pa'ina, si'aohua'i mäsaru cato te'e yo'je tsj a'ë. Cui'ne te'ere ye'yaquëre pacohua'i a'ë, Cristore.

⁹ Ja'quë hue'yoma'pë pa'ijë'ë, te'irejë iye yeja acohua'ire. Coa te'ire ma'tëmo pa'iquëse'ere ja'quëre payë, mäsaru.

¹⁰ Paipi mäsarute ëjahua'i a'ë, cajajë cajë yo'oma'pë pa'ijë'ë, te'i mäsaru ëjaë Cristo pa'ito me jaje yo'oye.

¹¹ Jaje pa'ina, mäsaru aquëpi yecohua'ire necaiquëpi ai jerepa pa'i pa'iji.

¹² Ija'a co'ye jerepa pa'i a'ë, cuasaquë cato meñe casa cuañofne pa'iji. Jaje pa'iquëta'are jerepa pa'i a'ë cuasama'quëni jerepa pa'ire neñe pa'iji.

¹³ ¡Teayerepa mäsaru cuañese'e ye'yacohua'i cui'ne fariseo pai! Coa cacohua'i. Teayerepa mäsaru cuañese'e ye'yacohua'i cui'ne fariseo pai, coa cacohua'i. ¿Me yo'ojë ma'tëmo caca sa'ro tēhuoye'ni? yecohua'i pa'ijajë cajë. Jaje yo'ojë mäsaruje cacama'pë yecohua'i cacañu'u cajë yo'ocohua'ireje ëseyë.

¹⁴ ¡Teayerepa, mäsaru cuañese'e ye'yacohua'i cui'ne fariseo pai. Coa cacohua'i! ¿Me neñu'u, cajë hua'jeohua'i huë'ña siojë yo'oye'ni, mäsaru? Jaje yo'ocohua'ipi paipi de'ocohua'i a'ë cuasajajë cajë tsoaye señë. Jaje yo'osi do'ire mäsarute jerepa co'ayerepa sañe pa'iji.

¹⁵ ¡Teayerepa mäsaru cuañese'e ye'yacohua'i cui'ne fariseo pai! ¡Coa cacohua'i! Mäsaru cato cu'icohua'i a'ë, yeja cui'ne jai tsiaya paini mäsaru sehuoyena ye'yañu'u cajë. Jaje yo'orojajë neni iti sehuoquëni mäsaru seña maca cayaye jerepa co'acquëre neñë, toana uja' quëre.

¹⁶ Teayerepa mäsaru ñaco ca peocohua'ije pa'iohua'ipi yecohua'ire sacohua'i pa'iyë. Jaje pa'iohua'ipi cayë, 'Maija'quë huë'e do'ipi ca nëose'e cato neñe peoji. Maija'quë huë'e pa'i oropi ca nëose'epi neñe pa'iji.'

¹⁷ Huesëohua'ipi cui'ne ñaco ca peocohua'ije pa'iohua'ipi. ¿Mäsaru ñato je a'ni, iti jerepa pa'ye, oro panita'a Maija'quë huë'epi orore Maija'quë tse necaiye a'ni, itirepa?

¹⁸ Yequeje mäsaru cayë, 'Maija'quëre isi saihuë do'ipi nesi'i ca nëofne peoji.'

¹⁹ ¡Huesëohua'i cui'ne ñaco ca peocohua'ije pa'iohua'i! ¿Ique a'ni, jerepa pa'ye, ëmëje'e tuiye panita'a iti saihuë, Maija'quë tse necai saihuë?

²⁰ Jaje pa'ina, iti saihuë do'ipi ca nëoquë pani coa jose'ere cama'ë pa'iji. Si'aye io ëmëje'e tuiye çoni caji.

²¹ Cui'ne Maija'quë huë'e do'ipi ca nëoquë pani jaro pa'iquëni Diusuni caye pa'iji.

²² Cui'ne ma'tëmo do'ipi ca nëoquë pani Maija'quë ñu'i saihuëna caye pa'iji. Cui'ne ìoni caquë Maija'quë jote ñu'iquëni caye pa'iji.

²³ ¡Teayerepa mäsaru cuañese'e ye'ya pai cui'ne fariseo pai! ¡Coa cacohua'i! Maija'quëre mäsaru isiyë, menta, anis cui'ne comino añe señe neñere, diez ayere te'ore huase'ere. Jaje yo'ojëta'a cuasaye pañë, ai jerepa do'i quë'yere, nuñerepa pa'iyere, paire oiyere, cui'ne Maija'quëre pa'iji cuasayere. Iyeje yo'ojë cui'ne ja yë'ta'a yequeje yo'oye pa'iji, jeoma'pë.

²⁴ Ñaco ca peocohua'ipi yecohua'ire sacohua'ipi pa'iyë, mäsaru. Mi'are de'oye ñajë ima jeocohua'ita'a camellore nëocohua'i a'ë.

²⁵ ¡Teayerepa mäsaru cuañese'e ye'yacohua'i cui'ne fariseo pai! ¡Coa cacohua'i! Ëmëje'ese'e ucu duruhuëa cui'ne quëna ne'ña tsoacohua'i a'ë. Sa'nahuë cato co'amaña yahue ìmañe cui'ne te'ohua'i jaiye co'amaña pañu'u caye tımësicohua'i pa'iyë.

²⁶ ¡Fariseo, ñaco ca peoquë! Du'ru macarepa ucu duruhuëre cui'ne quëna de'huare tsoajë'ë. Sa'nahuë pa'iyere jeteyo'je yureta'a hue'se pa'iyere si'si peoye pasipi.

²⁷ Teayerepa mäsaru cuañese'e ye'yacohua'i cui'ne fariseohua'i. Coa cacohua'i. Mäsaru cato paire tasi darije pa'iohua'i a'ë, huë'ese'e poja'icore tsoase'ejë pa'iohua'ipi. Jaje pa'iohua'ipi sa'nahuë cato ju'isi tara cui'ne si'aye si'si tımë huesësicohua'i a'ë.

²⁸ Jaje pa'iohua'i a'ë, mäsaru, pai ña hue'ñase'e de'ocohua'ipi. Sa'nahuë cato coa cosoyena cui'ne co'aye yo'oyena tımësicohua'i a'ë.

²⁹ ¡Teayerepa mäsaru cuañese'e ye'yacohua'i cui'ne Fariseo pai! ¡Coa cacohua'i! Mäsarupi de'oye necaicohua'i a'ë, cuasajë tsoe Maija'quëre quëacaicohua'i jutena, tasi darire cui'ne de'o paipi ju'isicohua'ini iohua'ire tasi darina quëna tupëa ëja de'huacohua'i a'ë.

³⁰ Jaje yo'ojë cayë: 'Maipi mai aipë pa'inë pa'icohua'i pani ço huaiye para'huë, Maija'quëre quëacaicohua'ire.'

³¹ Jaje iyere yo'ojë tsoe mäsaruja'a ñañë, Maija'quëre quëacaicohua'ire huasi tsëcapë acohua'i a'ë cajë.

³² Jaje pa'ito ja macaja'a yo'o tējijë'ë, mäsaru aipë yo'o huëojë pa'ise'e!

³³ ¡Añahua'i! ¡Aña tsëcapë! ¿Me jëaja'cohua'i a'ni, mäsaru toa yeja uye?

³⁴ Mäsarupi yo'o saojajë iyere caquë jëjo daoja'quë a'ë, yequë mu'seña pa'i ja'ñe quëacohua'ire, ta'ñe asacohua'ire, cui'ne cuañese'ere ye'yacohua'ire. Jaje pa'iquëta'are mäsarupi yecohua'ire huani jeojë soquë sarahuana quëni huani jeojë yo'ojä'cohua'i a'ë.

Jaohua'i acohua'ire cui'ne yecohua'ini tsi'si huë'ñana tseani të'caja'cohua'i a'ë. Cui'ne si'a pai dari ñape co'erojajjê josa yo'oja'cohua'i a'ë.

³⁵ Jaje yo'ojëna, mësaruna si'a de'o paire huani jëosi do'i tômeja'coa. Nuñerepa yo'oquë Abelre huani jëosi macapi Zacarias, Berequíás mamaquère huani jëosi macana, ëojê se saihuë cui'ne de'o huë'ña jopo sa'rona mësaru huani jëosiquëna tômesipi.

³⁶ Nuñerepa cayë. Si'aye iye do'i cato yure pa'i paipi sañie tômeja'coa.

Jerusalén Paire Jesús Ñaquë Oiye
(Lc 13.34-35)

³⁷ Jerusalén, Jerusalén, yequë mu'se pa'i ja'ñe quëacohua'ire cui'ne Maija'quë coca quëacohua'ire më'ëni caquë Maija'quë jëjo daoquëna, huani jëohuë, mësaru. Yo'ojëta'are de'huerepa më'ë mamajëre tsisosi'i caquë yo'ohuë, cura mamajëre io capëa huë'ehuëna de'huasi'i caco yo'oyeje. Yo'oquëna, coehuë.

³⁸ Ñajë'ë. Yure mësaru huë'e jëocosico pa'ico.

³⁹ Nuñerepa cayë. Yë'ëre mësaru ña coñe paja'cohua'i a'ë, 'mësarupi de'oquère pa'ni ëjaë mamirepa hue'equë daiquë' ca maca tija'ne pato."

24

Maija'quë Huë'e Nejosico Pa'i Ja'ñe
(Mr 13.1-2; Lc 21.5-6)

¹ Jesupi Maija'quë huë'epi etani jë'në saina, i ye'yacohua'ipi tsi'o dani ite Maija'quë se huë'e ayere ñajê ca huëohuë.

² Cajëna, Jesupi capi:

"¿Si'aye mësaru ñañe? De'oji, nuñerepa mësarute cayë. Si'aye ja mësaru ñañe nejose'le pa'ija'coa. Iye maca ti te'e quëna pëje jupë uñie paja'coa."

Ja Yë'ta'a Yeja Carajaima'ñë Ñño Ja'ñe
(Mr 13.3-23; Lc 21.7-24; 17.22-24)

³ Ja maca Olivos cutihuëna saë'ë. Sani Jesús ja'runi ñu'ina, i ye'yacohua'ipi ite yahuerepa cahuë:

"Ina, yëquère quëajë'ë. ¿Je yëhua jaje yo'ojacoa'ni? ¿Me ññoñe pa'ija'coa'ni, më'ë daiye cui'ne yeja carajaiñe?"

⁴ Cajëna, Jesupi capi:

"De'hua ñajê pa'ijë'ë, mësarute yecohua'ipi coso huesojë.

⁵ Jai pai yë'ë mamipi cajë daija'cohua'i a'ë: 'Yë'ë a'ë, Cristo' cajë. Cajëna, jai pai jöhua'ire tuija'cohua'i a'ë.

⁶ Si'a huë'ña sa'ñe huajo huaiyere mësaru asaja'cohua'i a'ë. Asani quëquëma'pë pa'ijë'ë. Jare jaje tëto saiye pa'iji. Pa'iquëta'a ja yë'ta'a tējaye peoji.

⁷ Yequë yeja pa'icohua'ipi yequë yeja pa'icohua'ire se uihuaja'cohua'i a'ë. Cui'ne yequë paipi yequë paini se uihuaja'cohua'i a'ë. Cui'ne añeje peoquëna, ai ëa juija'cohua'i a'ë. Cui'ne yeja ñu'cuyee pa'ija'coa, yequë huë'ña ñape.

⁸ Iye cato ja'la ai yo'o huëoyepi pa'ija'coa.

⁹ Cui'ne yë'ë do'ire mësarute co'aye yo'ojê tseani yecohua'ina isijë cui'ne huani jëojê yo'ojê cui'ne si'a pai mësarute coeja'cohua'i a'ë.

¹⁰ Ja mu'seña ai Maija'quëre cuasase'le nejo huesoja'cohua'i a'ë. Jaje yo'ojê yecohua'ire coejë cajeohua'ije pa'iohua'ita'a sañoje yo'ocohua'i pa'ija'cohua'i a'ë.

¹¹ Cui'ne jai pai coa cosocohua'ije pa'ija'cohua'i a'ë, Maija'quëre quëacaicohua'i a'ë caco-hua'ije. Jaje yo'ojëna, jai pai cosoyere asaja'cohua'i a'ë.

¹² Cui'ne jaje jaiye co'aye pa'ina, yo'ojê jai pai paire oiye jëoja'cohua'i a'ë.

¹³ Jaje pa'iquëta'are iti quëcoquë nuñe pa'isiquëpi jëpi huasosiquë pasipi.

¹⁴ Cui'ne iye de'o cocaje si'a huë'ña yeja pa'icohua'ire quëase'le pa'ija'coa, jaohua'ije asajajë cajë. Ja macata'a tija'coa, carajaiñerepa.

¹⁵ Maija'quëre quëacaicquë Daniel toyapi, paire co'a de'huaquë cui'ne paire ne huesoquë yo'oye ayere. Jaje pa'ina, iquëpi si'si peo huë'ñana tija'asi maca ñani toya ja'o ñaquëpi asaye pa'iji, tija'api, caquë.

¹⁶ Ja maca Judea pa'icohua'ipi catiye pa'iji, ai cutina.

¹⁷ Huë'e ëmëje'le totore pa'iquë pani cajeye peoji, sa'nahuë co'amaña pa'iye isi'i caquë.

¹⁸ Cui'ne tsiore pa'iquë pani co'iye peoji, caña imasi'i caquë.

¹⁹ Teayerepa ja mu'seña nomiohua'i tsj ëtapëa pa'icohua'i cui'ne oje tsu'sucohua'ire pacohua'i maña ai yo'oja'cohua'i a'ë.

²⁰ Jaje pa'ina, sejë'ë, Maija'quëre sësë tëcahuë catiye peoja'core, cui'ne huajë mu'seña catiye peoja'core.

²¹ Ja mu'seña cato jaiye ai yo'oye pasipi, ja'a yeja de'huasi maca ti peose'epi jeteyo'jeje peo ja'ñepi.

²² Ja mu'seña Maija'quëpi tēama'quē pa'ito te'li macaje huaso cuañoñe peora'pi. Jaje pa'iquēta'are Maija'quëpi j jo'ya nescicohua'ini oi tēaja'quē api.

²³ Mēsarate yecohua'ipi caja'cohua'i a'ē: 'Ñajë'ē, iñore pa'iji, Cristo panita'a Ñajë'ē, jarote pa'iji.' Jaje catoje carepa ma'ñe cuasama'pē pa'ijë'ē.

²⁴ Daija'cohua'i a'ē, yē'ē Cristo a'ē, cacohua'i coa cosocohua'ipi. Cui'ne Maija'quē coca quēacaicohua'i a'ē, cacohua'ipi. Jaohua'ipi cui'ne jaiye pai yo'o ma'ñe ne iñoja'cohua'i a'ē, coa cosoñu'u cajē. Jaje yo'ojēna, Maija'quērepa jo'ya nescicohua'ijē care payē cajē sehuoja'cohua'i a'ē, a'ji sehuocohua'i cato.

²⁵ Jaje pa'ina, tsoe du'ru cahuē iye mēsarate jaje yo'o ma'ñe caquē.

²⁶ Jaje pa'ina, yecohua'ipi mēsarate 'jeto cuēne yejare pa'iji, ñajë'ē' cacohua'i pa'ito saima'pē panita'a yeque 'Ñajë'ē, iño tu'rihuēre pa'iji,' catoje asama'pē pa'ijë'ē.

²⁷ Pai Mamaquē daiyerepa cato ēsē mēi hue'ñapi cui'ne ēsē sa du'li hue'ñana mujuē ye'hueyeje pa'yerepa pa'ija'coa.

²⁸ Ju'isiquē capē pa'li hue'ñana jarona pē'pēri tsi'sija'cohua'i a'ē.

Pai Mamaquē Dani Coñe

(Mr 13.24-37; Lc 21.25-33; 17.26-30, 34-36)

²⁹ Esa ai yo'o mu'seña tēto sai maca ēsē yayaja'quē api. Cui'ne ñañēje miama'ē pa'ija'quē api. Ma'ñocoje ma'tēmopi tomeja'cohua'i a'ē. Cui'ne ma'tēmo tutu pa'iyequē tsasija'coa.

³⁰ Ja maca Pai Mamaquē tutu yo'oye ñaja'cohua'i a'ē, ma'tēmopi yo'oquēna. Cui'ne si'a pai dari yeja pa'icohua'i oija'cohua'i a'ē. Ja maca ñaja'cohua'i a'ē, Pai Mamaquē ma'tēmopi sirija'a daiye, tutu quē'ire papi cui'ne de'oyepi quēcociquēpi daina.

³¹ Ja maca huiñaohua'ire cuañeja'quē api, j sahuasicohua'ire cajese'e yeja tē'ña, si'a yeja pa'icohua'ire tsi'sojë'ē, caquē ai tutu duruhué juiyepi.

³² Ye'yejë'ē, higuera soquē yē yo'oye ayere quēaquēna. Huiña capēa pa'li maca ja'o etaquēna, mēsaru ñani je'nē utēcahuē t'iaquēna, yo'oji cacohua'i a'ē.

³³ Jaje cui'ne si'aye iye tēto saina, ñani je'nē carajai mu'seña t'iaquēna, eta sa'rore pa'ina, yo'oji cuasajë'ē.

³⁴ Nuñerepa cayē, mēsarate. Si'aye iye yo'o ja'ñe a'ē, ja yē'ta'a iye mu'seña pai juju sama'pēna.

³⁵ Ma'tēmo cui'ne yeja carajai ja'ñe a'ē. Yē'ē cocata'a ti carajaiñe pa ja'ñe a'ē. Jare iti case'ejē t'iaquē pa'li ja'ñe a'ē.

³⁶ Jaje pa'iquēta'are peoji, iti mu'serepa cui'ne hora quēaye. Huesëyē, yecohua'ijē. Ma'tēmo pa'icohua'i huiñaohua'ijē cui'ne Maija'quē mamaquēje huesëji, coa Maija'quēse'e asaji, iti.

³⁷ Noé pa'li mu'seña yo'ojë pa'ise'ejē pa'ye pasipi, Pai Mamaquē dai macaje.

³⁸ Ja mu'seña ja yē'ta'a co'jema'nē paipi ao aijē, ucujē, nomi huejajē, cui'ne pēca ja'quēohua'ipi nomi tsire huejojë pa'ē'ē, Noé jai yohuēna caca macaja'a.

³⁹ Ja huesëjēna, jai co'je dani si'ahua'ire peo hue'ña co'je huea'co'ē. Jaje cui'ne pasipi, Pai Mamaquē dai macaje.

⁴⁰ Ja mu'seña caya ėmēohua'li tsiore pa'ija'cohua'li a'ē. Pa'ijēna, te'ire saquē cui'ne te'ire jeosipi.

⁴¹ Caya nomiohua'li hueare toaja'cohua'li a'ē. Toajēna, te'ore saquēna, cui'ne te'o jeo saisico pa'ija'coa.

⁴² Ėjaē daija'a maca huesëye sēte cui'ñanicohua'ipi pa'ijë'ē.

⁴³ Jaje pa'iquēta'are iyeje asajë'ē, iti huē'e aquēpi ñami ja hora pa'li maca co'amaña ñaquē daija'quē api asaquē pani sētasiquēpi j huē'e co'amaña cacani imañe ėseja'quē api.

⁴⁴ Jaje pa'ina, mēsaruje ne de'huasicohua'ipi pa'ijë'ē, mēsaru huañeyesi maca Pai Mamaquē dani quēcoquē.

Nuñerepa De'o Jo'yaē Cui'ne Co'a Jo'yaē

(Lc 12.41-48)

⁴⁵ JJequē a'ni, nuñerepa de'o jo'yaē, cui'ne asaquērepa iti t'iasa maca j huē'e acohua'ire aocaijë'ē, caquē jēoni saisiquē?

⁴⁶ Sihua cuañoja'quē api, j ėjaē cuañese'ejē yo'oquē pa'ina, t'itani ñasiquēpi.

⁴⁷ Nuñerepa cayē iti tse aquē si'aye j paye ñacaijë'ē caquē cuañe nēoja'quē api.

⁴⁸ Jaje pa'iquēta'are co'a jo'yaē pani cuasaji, tsoe nēija'quēre me je esa t'itasina, cuasaquē.

⁴⁹ Ėjaē jo'yare co'aye yo'o huēoni cui'ne ao ai huēoni cui'ne coño ucu huēoni cuepecohua'li ja're conī yo'oquē pasipi.

⁵⁰ Pa'ina, ja maca j ėjaē co'isipi, j jo'yaē huañeyeni je dasina caquē utema'ē yo'o maca.

⁵¹Ja maca ite ai co'ayerepa si'seni coa cacohua'ire nejoñepi nejoñe pa'iji. Ja maca oisipi, cunjje qui'coquë.

25

Diez Nomi Tsj Yo'ose'eje Pa'ye Quëaye

¹Jaje pa'ito ma'tëmo pa'i te'te cato diez nomi tsipi hui'yapepi dani toa tsëopëare imani hueja hue'ñana johua'i ëjère ti'añu'u cajë saise'eje pa'ye a'ë.

²Cinco pa'iohua'i ne de'huama'cohua'i paë'ë. Cui'ne cinco ne de'huasicohua'i paë'ë.

³Ne de'huama'cohua'ipi toa tsëo pëa sajëta'a hui'yapere sama'pë paë'ë.

⁴Ne de'huasicohua'ipi sahuë, quëna huëana hui'yape dose'ere cui'ne toa tsëo pëaje si'aye timëse'ere sahuë.

⁵Huejaja'quëpi esa daima'ë pa'ina, huëo çaj ëapi si'a nomiohua'ire jaje huëo çaj ëaquëna, ute jujani çäë'ë.

⁶Ja maca ñami jopo pa'i maca asahuë, cuiye: 'Je'nërepa daiji, huejaja'quëpi etani ite pëpajë'ë.'

⁷Cui maca si'a nomi tsj huëni johua'i toa tsëo pëa ne de'huahuë.

⁸Ja jeteyo'je cinco ne de'huama'cohua'ipi cahuë, cinco ne de'huasicohua'ire: 'Isijë'ë, a'ri maña mësarü hui'yapere yëquë toa tsëo pëapi yaya huëoji.'

⁹Jaje cajëna, cinco nomi tsj ne de'huasicohua'ipi cahuë: 'Pañë, ti'añe pama'coni yëquëre cui'ne mësarureje çme isiye'ni? Saijë'ë. Iti isi hue'ñana sani huerojë'ë, mësarü tsëo ja'ñese'e.'

¹⁰Carena, cinco nomi tsj ne de'huama'cohua'ipi hui'yape hueroñu'u cajë saijëna, tsoe titapi, huejaquë. Nomi tsj cui'ñani utesicohua'i cato j ja're çoni cacahuë, hueja hue'ña. Cacarena, eta sa'ro sjo huesopi.

¹¹Ja jeteyo'je titahuë, yequë nomi tsj titani cahuë: 'Ëjaë, ëjaë hui'yocaijë'ë.'

¹²Jaje cajëna, ipi çapi, jaohua'ire: 'Nuñerepa cayë, mësarute ñama'quë a'ë, yë'ë.' "

¹³Ja maca Jesupi çapi, jaohua'ire:

"Pai Mamaquë daija'a maca huesëyë, mësarü, iti dai mu'se cui'ne horaje. Jaje pa'ina, mësarü sëtasicohua'ipi pa'ijë utejë'ë.

Curiquë Yo'ose'e Ayere Quëaye

¹⁴Ma'tëmo pa'i te'te aye cato paipi yequë yejana sai huëoni, j jo'yare soini curiquë isisiquë cuañe nëose'eje pa'io.

¹⁵Jaohua'i aquëni isipi, cinco mil curiquë të'ña. Yequëni isipi, caya mil të'ña. Cui'ne yequëni isipi, te'e mil. Pai ñapere johua'i tutu pa'iye ja'ye isini ja maca saji'i, so'ona.

¹⁶Cinco mil të'ña isisiquëpi sani japi huëroni ai jerepa cui'ne cinco mil të'ña se ne çopi.

¹⁷Caya mil isisiquëje cui'ne yequë caya mil se ne çopi.

¹⁸Jaje yo'ojëta'are yequëpi te'e mil isi cuañosiquëpi sani yeja coje nesiconä, tapi, curiquë.

¹⁹Ai tsoepi co'ipi, johua'i ëjaë. Co'ini johua'i nese'ë ña huëopi.

²⁰Du'ru macarepa titapi, cinco mil të'ña isi cuañosiquëpi. Titani isipi, j ëjaëre, ñeje caquë: 'Ëjaë cinco mil më'ë yë'ëre isihuë. Isisiquëni yequë cinco mil ne çohuë, iye më'ë tse.'

²¹Caquëna, ëjaëpi çapi, ite: 'Ai de'oji, më'ë de'o jo'yaë'ë, de'oye yo'osiquëre cato yure ai jerepa jaiye isi nëosi'i cacajë'ë, yë'ë ja're çoni sihuaja'quë.'

²²Jeteyo'je daji'i, caya mil isisi jo'yaë. Jaëpi çapi, cui'ne: 'Ëjaë, më'ë yë'ëre caya mil isihuë. Jaje isisiquëni yequë caya mil se ne çohuë, iye më'ë tse.'

²³Ji ëjaëpi çapi, ite: 'Ai de'oji, më'ë de'o jo'yaë'ë, nuñerepa pa'i a'ë. A'ri mañare nuñerepa de'oye yo'osiquëni ai jerepa jaiye isisi'i, ñacai ja'ñe. Cacanari yë'ë ja're çoni sihuajë'ë.'

²⁴Jaë te'e mil isisiquëpi titani çapi, j ëjaëre: 'Ëjaë më'ëpi paire oima'quëpi më'ë tama'tona coa ti'acquë cui'ne më'ë ti jëa ma'ñere téaquëre asayë.

²⁵Jaje pa'ina, ca'raquë sani më'ë curiquë yejana yahuehuë. Iye më'ë curiquë dacaë'ë.'

²⁶Caquëna, ëjaëpi sehuopi, ite: 'Jo'yaë co'acquë cui'ne josaë. Yë'ëpi yë'ë ta ma'ñere téaquëpi cui'ne yë'ë jëama'tore téaquë pa'iye asaquë sëte.

²⁷Ja do'ire yë'ë curiquë bancona tëoyere paë'ni. Tëosiquë pa'ito co'ini itipi se nesi do'ire curiquë nera'huë, yë'ë tse.'

²⁸Ja maca çapi, iti maca pa'icohua'ire: 'Siojë'ë, curiquë të'ña. Sioni isijë'ë, diez mil të'ña paquëna.

²⁹Jaje pa'ina, jaiye paquëni ai jerepa se isiye pa'iji. Isina, jaiye tëtto saquëna, nëase'equë paye pa'iji. Jaje pa'iquëta'are peoquëni ai jerepa se siyepa pa'iji, j a'ri maña payequë.'

³⁰Jaje çani çapi, iquë co'a jo'yaëre: 'Tseani jëocojë'ë, nea hue'ña hue'sena, jaropi oi cui'ne cují qui'coja'quëre.'

Si'a Paire Ñaño, Jesupi

³¹ Pai Mamaquë pai ëjaërepa cuañequë huiñaohua'ipi të'ijaisiquëpi daisi maca i de'o ñu'i saihuëna ja'ruja'quë api, cuañequëre papi.

³² Ja maca si'a yeja pa'icohua'ipi tsi'sija'cohua'i a'ë, i ña hue'ñana. Ja paire huahueja'quë api, yëi ñamare cui'ne cabrare ñaquëpi huahueyeje pa'ye.

³³ I ëja te'tena yëi ñamare cui'ne ari te'tena cabrare huahuesipi, ti tsëcapëase'e.

³⁴ Ja maca pai ëjaëpi caja'quë api, i ëja te'te pa'icohua'ire: 'Daijë'ë, mësarü yë'ë ja'quë ñacaina, de'oye pa'isicohua'i. De'oye pa'ijë'ë, ma'tëmöre mësarure caquë yeja de'hua maca Diusu de'huacai pa'i sitore.

³⁵ Ao ëa ju'ina, mësarupi de'hue ohoüë. Oco ëa ju'ina, cui'ne ocuahüë. Mësarupi huë'e peoquëpi coa cu'iquë paë'ë. Pa'ina, pëa hue'ña isihuë.

³⁶ Caña peoquë pa'ina, mësarupi de'hue isihuë. Ju'iquë paë'ë. Pa'ina, yë'ëre do'i sani ñahuë. Tayo yo'ocohua'ire co hue'ñana co cuañosiquë paë'ë. Pa'ina, dani ñahuë, yë'ëre.

³⁷ Ja maca iti nuñerepa yo'osicohua'i etasicohua'ipi caja'cohua'i a'ë: '¿Ejaë, je yëhua më'ëre ao ëa ju'iquëre ñani aore'ni, panita'a je yëhua oco ëa ju'iquëre ñani oco ocuare'ni?'

³⁸ Panita'a ¿je yëhua huë'e peoquëpi coa cu'ina ñani pëa hue'ñana isire'ni? Panita'a ¿je yëhua caña peoquë pa'ina, ñani isire'ni, ju'iyë?'

³⁹ Panita'a ¿je yëhua ju'iquëre më'ëre ñare'ni? Panita'a ¿co hue'ñana cosiquëpi pa'ina, sani ñare'ni më'ëre?'

⁴⁰ Cajëna, pai ëjaëpi sehuoja'quë api, jaohua'ire: 'Nuñerepa cayë, mësarute. Si'aye mësarü jaohua'ire yë'ë yo'je tsini a'ricohua'ire teaye pa'iohua'ire ñajë de'oye yo'ose'e cato jare yë'ëni de'oye yo'ose'e pa'iji.'

⁴¹ Ja maca cui'ne Ejaëpi caja'quë api, ari te'te pa'icohua'ire: 'Saijë'ë, yë'ë quë'ro pa'ima'pë nejosi te'tere pa'icohua'i. Saijë'ë, huatire cui'ne i jo'yare caquë toa yeja de'hua sitona.

⁴² Ao ëa ju'ina, mësarü aoma'pë paë'ë, yë'ëre. Oco ëa ju'ina, ocoje cui'ne ocuaye pahüë.

⁴³ Huë'e peoquëpi coa cu'iquë paë'ë. Jaje pa'ina, mësarupi pëa hue'ña isiyë pahüë. Caña peoquë paë'ë. Pa'ina, mësarupi isima'pë paë'ë. Ju'iquë paë'ë. Pa'ina, mësarü dani ñañë pahüë. Cosiquë paë'ë. Pa'ina, sani ñama'pë paë'ë, mësarü.'

⁴⁴ Ja maca iohua'ipi caja'cohua'i a'ë, ite: '¿Ejaë, je yëhua më'ëre ao ëa ju'iquëre panita'a oco ëa ju'iquëre, panita'a coa cu'iquëre, panita'a caña peoquëre panita'a ju'iquëre, panita'a cosiquëre ñajëta'a cöcayë pare'ni?'

⁴⁵ Jaje cajëna, pai ëjaëpi sehuoja'quë api: 'Nuñerepa cayë, iohua'i teaye pa'i paire ñajëta'a cöcayë pajë cui'ne yë'ëreje ai jerepa ti necayë pahüë, mësarü.'

⁴⁶ Jaje casi maca iohua'i saija'cohua'i a'ë, ti nejo hue'ñana. Cui'ne nuiñë yo'osicohua'ipi ti pa'i hue'ñana saija'cohua'i a'ë."

26

Jesure Tseañe Cuasase'e

(Mr 14.1-2; Lc 22.1-2; Jn 11.45-53)

¹ Jaje Jesús si'aye iyere ca tëjini capi, i ye'yacohua'ire:

² "Mësarupi tsoe asayë, caya mu'seña pa'i maca Israel pai Egítopi etajë pa'ise'ere cuasajë tsi'sini yo'oye ti'a ja'ñë. Ja maca Pai Mamaquë tseña cuañosiquë pa'ija'quë api, que cuañoja'quëpi."

³ Ja mu'seña Maija'quë huë'e ñacacohua'i ëjaohua'i, cuañese'e ye'yacohua'i, cui'ne aiohua'i, tsi'sisicohua'ipi paë'ë, Caifás Maija'quë huë'e ñacacohua'i ëjaë jai huë'e hue'se daripëna.

⁴ Jarona Jesure coa cosojë tseani huani jeo ja'ñere ca ñahuë, iti yo'o ja'ñere.

⁵ Jaje pa'iquëta'are "fiesta pai tsi'si macata'a tseañe pañu'u, paipi co'aye sañope yo'oma'cohua'ini" cahuë.

Huëo Sëñepi Jesure Tsoacaise'e

(Mr 14.3-9; Jn 12.1-8)

⁶ Simón huë'ere Jesús paj'i, Betania daripëre ja'ju dahuë ju'iquë hue'yosiquë huë'ere.

⁷ Jarote pa'ina, nomioipi quëna huë jai do'i quëna huëna de'o së ma'ñapi tımësiconi cajico dacopi tsio dani, Jesús mesare ñu'ina, ja ma'ñapi i sjiopëna doo.

⁸ Jaje iyere yo'ocona, ñani i ye'yacohua'ipi pëijë ca huëohüë.

"¿Me ne ja'ñere coa nejoco'ni, jai do'ire?'

⁹ Iopi yecohua'ina isico jaiye curi neni peocohua'i mañani cöcaito de'o'ñie pa'ioni yo'oco."

¹⁰ Cajëna, Jesupi asani capi:

"¿Me yo'ojë josa cayë'ni, iote? Iye yë'ëre yo'ocayë de'oye a'ë.

¹¹ Coa si'anë mësarü co'amaña peocohua'ire paja'cohua'i a'ë, mësarü acohua'ire. Jaje pa'iquëta'are yë'ëre cato si'anë mësarü pama'pë pa'ija'cohua'i a'ë.

¹² Yé'è s̄jopëna huëo s̄e ma'ñapi doye cato yé'ère tasi maca huëo s̄e ja'ñere ne de'huacai yo'oco.

¹³ Jaje pa'ina, nuñerepa cayë, mësarute. Coa si'a hue'ña iye huaso coca quëanije ico yé'ère yo'ose'e quëaja'cohua'i a'ë. Jaje quëajëna, pajje ìote huañëyoma'pë cuasaja'cohua'i a'ë, ìo yo'oco pa'ise'e."

Judaspi Jesure Yehuoqe

(Mr 14.10-11; Lc 22.3-6)

¹⁴ Ja maca ì ye'yacohua'ipi aquëpi Judas Iscariote hue'equëpi Maija'quë huë'e ñacaicohua'i ëjaohua'i quë'rona sani capi:

¹⁵ "¿Je ja'ye saiñe yëye'ni, yé'ëpi Jesure tseacaito?"

Jaje caquëna, asani ìte saiñuë, treinta curiquë të'ña.

¹⁶ Jare ja macapi Judas Jesure paj peo maca ñani tseani jaohua'i jëñana ìsisi'i caquë co'epi.

Mai Ëjaë Ani Tëjise'e

(Mr 14.12-25; Lc 22.7-23; Jn 13.21-30; 1 Co 11.23-26)

¹⁷ Fiesta huëo mu'se o'saye co'mema'a ao ai mu'se ti'aëna, ì ye'yacohua'ipi Jesure tsio dani sei'ë: ¿Jerona neja'cohua'i a'ni na'iquëna, a'ñe, Egíptopi Israel paj etajë pa'ise'ere cuasajë ai ja'ñe?

"¿Jerona Egíptopi Israel paj etase'e cuasajë na'iquëna, ai ja'ñe neñe'ni?"

¹⁸ Cajëna, ìpi capi, ìohua'ire:

"Saij'ë, jai daripëna sani huë'e pa'iquëni ti'ani ìte caj'ë: 'Ye'yaquëpi caji: Yé'è yo'o maca tsoe ja'yere pa'iji. Jaje pa'ina, më'ë huë'ena yé'è ye'yacohua'ì ja're cõni Egíptopi Israel paj etajë pa'ise'ere cuasajë yo'oye nesi'i, caquë jëjo saopì."

¹⁹ Jaje caëna, ì ye'yacohua'ipi Jesús cuañese'eje yo'ohuë. Yo'ojë na'iquëna, ai ja'ñe ne de'huahuë.

²⁰ Ñami de'osi maca Jesús mesare ì doce ye'yacohua'ì ja're cõni paj'i.

²¹ Pa'ì ja yé'ta'a aore ai ñu'ì capi, cui'ne:

"Nuñerepa cayë mësarute, mësaru aquëpi yé'ère yehuoja'quë api."

²² Ja maca jaje caquëna, jaohua'ipi ai oi ëayerepa asa huesëhuë. Asani sa'ñe ìohua'ija'a se huëohuë, ñeje cajë:

"Ëjaë, ¿më ñato yé'ëpi yo'oja'quë a'ni?"

²³ Cajëna, jaohua'ire sehuopi, Jesupi:

"Yé'è ja're cõni te'e quëna de'huana aiquëpi ìti yé'ère de'oye yo'oyeje yo'oquë cosoquë tseja jeo cuañoja'quë.

²⁴ Jaje pa'ina, Paj Mamaquë cato toyase'e cayeje pa'ye yo'o saoye pa'iji. Jaje pa'iquëta'are teayerepa yo'oja'quë api, ìte yehuoquë. De'ora'pi, jaë ai de'oma'ë patu."

²⁵ Ja maca Judaspi, ìti cosoquë tseja jeo cuañoja'quëpi ìte capi:

"¿Ye'yaquë, më'ë ñato yé'ëpi yo'oja'quë a'ni?"

Caquëna, capi:

"Jaje pa'ijë'ë. Më'ë a'ë."

²⁶ Ja yé'ta'a aore aijë dujëna, Jesús ì jëñapi panpë ìni Maija'quëre de'oji caquë seji'i. Ja jeteyo'je ì ye'yacohua'ire ìsiquë capi:

"Aijë'ë. Iye cato yé'ë ca'ë."

²⁷ Ja jeteyo'je ucu duruhuë ì jëñapi ìni Maija'quëre de'oji caquë seni ìohua'ina se ìsiquë capi:

"Si'aohua'ì ucujë'ë, iye ucu duruhuëna.

²⁸ Iye cato yé'ë tsie a'ë. Huajëye ca nëõñere neñe a'ë. Cui'ne jai paj co'aye yo'ose'ere sai de'huayere caquë ìsiye a'ë.

²⁹ Jaje pa'iquëta'are cui'naëpi iye cuiya'ì o'sa cõno ucuye paja'quë a'ë, mësaru ja're cõni, yé'è ja'quë cuañe të'tena mësaru ja're huajë o'sa cõno ucuye ti'a macaja'a."

Pedro Jesure Ñama'quë A'ë, Caye

(Mr 14.26-31; Lc 22.31-34; Jn 13.36-38)

³⁰ Jëjë tëjisi jeteyo'je Olivos cõtihuëna saë'ë.

³¹ Ja maca Jesupi capi, jaohua'ire:

"Iye ñami si'aohua'ire mësarute yé'ère quëco pase'e ti peocohua'ire nëija'coa. Jaje pa'ina, toyase'e caji: 'Huani jëosi'ì, yëi ñamare ñacaiquëre. Huani jëosi maca yëi ñama huahuesicohua'ì pa'ija'cohua'ì a'ë."

³² Jaje pa'iquëta'are yé'ëpi ju'ìsiquëpi huëni du'ru Galileana saquëna, mësarupi jeteyo'je ti'aja'cohua'ì a'ë."

³³ Jaje ca maca Pedropi sehuopi:

"Jaje si'aohua'ire më'ère tuiye jëosicohua'ì pa'itoje yé'è cato pañë."

³⁴ Jaje caquëna, Jesupi capi, ite:
 “Nuñerepa cayë, më'ëre. Iye ñami ja yë'ta'a cura yë'ima'ëna, më'ë yë'ë ti ñama'quë a'ë caquë toasoñe coa caja'quë a'ë.”

³⁵ Pedropi capi, ite:

“Më'ë ja're cõni ju'iñe pa'ito ju'iñe, yë'ë. Coa caye pañë.”
 Caquëna, cui'ne si'aohua'i i ye'yacohua'i cahuë.

Jesús Getsemaní Quë'rona Señe
 (Mr 14.32-42; Lc 22.39-46)

³⁶ Ja maca Jesús i ye'yacohua'i ja're cõni tì'api, Getsemaní hue'yo hue'ñana. Tì'ani capi, jaohua'ire:

“Yë'ëse'e sani je macana seina, mësaruse'e iye macana ja'rujë'ë.”

³⁷ Jaje cani coa Pedrore cui'ne Zebedeo mamajëre cayaohua'ire sai sapi. Sani ai oi cui'ne ai co'a ju'i ai yo'o huëopi.

³⁸ Ja maca capi, jaohua'ire:

“Ai oiyë, yë'ë joyopi, juni huesëye pa'ina. Jaje pa'ina, mësaruse'e iye macana pëajë'ë, cui'ne yë'ë ja're cõni sëtasicohua'i pa'ijë'ë, mësaruje.”

³⁹ Jaje cani Jesús ai seña maca te'i se saji'i. Sani jaron tsiapi yejana simeni ùi seji'i, Maija'quëre, ñeje caquë:

“Yë'ë ja'quë maca, de'hue ne tì'añe pa'ito iye sëje da'care pare yë'ëre nejocajë'ë, pani yë'ë yëquë cayeje pa'ye yo'oye, coa më'ë yëyepi yo'ose'e pa'ijaquë.”

⁴⁰ Ja maca i ye'yacohua'i quë'ro co'iquë tì'api, tsoe çaisicohua'ipi uijëna. Ñani Pedrore capi:

“¿Quëco tì'añe pare, yë'ë ja're cõni te'e hora macaje?”

⁴¹ Sëtasicohua'i pa'ijë'ë. Cui'ne sejë'ë, co'aye mëñena, tãisicohua'i pa'iyë paja'cohua'i. Nuñerepa joyo cato yëji, neñe. Jaje pa'iquëta'are capëpi tutu peoji.”

⁴² Tijupë sani cõni seji'i, ñeje:

“Yë'ë ja'quë iye neñañe ai yo'oyere yeque necaiye peoto, coa më'ë yëyeje yo'ose'e pa'ija'quë.”

⁴³ Tijupë co'ipi. Co'iquë i ye'yacohua'i çaisicohua'ini tì'a copi. Iohua'i ñaco capi ai huëo ca'a do'ire sjo meina, cãë'ë.

⁴⁴ Ja maca ñani jeoni saji'i, cui'naëpi Maija'quëre seši'i caquë toasoñe acore. Ja'rë i case'eje pa'ye caquë seji'i.

⁴⁵ Ja maca saji'i. I ye'yacohua'i quë'rona sani capi, jaohua'ire:

“Yureta'a de'oji. Cajjë'ë, cui'ne huajëjë'ë. Tsoe tì'api, Pai Mamaquëre co'aye yo'ocohua'i jëñana isija'a maca.

⁴⁶ Huëijë'ë. Sañu'u. Tsoe daiji, yë'ëre yehuoja'quë.”

Jesure Tseañe

(Mr 14.43-50; Lc 22.47-53; Jn 18.2-11)

⁴⁷ Jesús ja yë'ta'a cocare capi, Judas títasi macaje. Jaë cato doce soisicohua'i aquë paji'i. Cui'ne i ja're cõni jai pai daë'ë, hua'ña cui'ne tara cõni cajicohua'ipi. Jaohua'i cato Maija'quë huë'e ñacaicohua'i jaohua'i jëjo daocohua'i cui'ne judío pai aiohua'i jëjo daocohua'i paë'ë.

⁴⁸ Judas iti yo'oquë yehuoja'quëpi quëaëña, jaohua'ire:

“Yë'ë ini sihuaja'quë a'ë. Jaëni tseajë'ë.”

⁴⁹ Jaje casiquëpi Jesuna tsiojani ite sihuayeje yo'oquë capi:

“¿Pa'iquë, ye'yaquë?”

⁵⁰ Caquëna, Jesupi sehuopi ite:

“¿Cajei, iquena daiquë'ni?”

Ja maca Jesure tsiojani tseani sahuë.

⁵¹ Ja maca jaje yo'ojëna, Jesús cajei hua'tiyo dutani çajorose'e tëto tëapi, Maija'quë huë'e ñacaicohua'i ëjaë jo'yaëre pani.

⁵² Jaje yo'oquëna, Jesupi capi:

“De'huajë'ë, më'ë hua'tiyo jo pa'i hue'ñana. Si'aohua'i hua'tiñoapi uihuacohua'i cato jare cui'ne hua'tiñoapi huaijëna, ju'ija'cohua'i a'ë.

⁵³ ¿Huesëquë më'ë yë'ëpi yë'ë ja'quëre sequëna, yurepi tsoe doce mil huññaohua'ire jëjo daouna, çocatira'se'e?”

⁵⁴ Jaje yo'oye pa'ito ¿me toyase'e caye tì'acquë'ni, jaje yo'o ja'ñe a'ë, ca nëose'e?”

⁵⁵ Ja maca Jesús paire capi:

“¿Mësarú yë'ëre tseañu'u cajë hua'ñapi cui'ne tarapi cõni tse'ejë date, co'amaña ñaëre tseañeje pa'ye? Si'a mu'seña mësarú ja're yë'ë pa'i Maija'quë huë'ëpi ñu'i ye'yaquëna, mësarú ti yë'ëre tseañu'u cama'pë pa'isicohua'i a'ë.

⁵⁶ Jaje pa'iquëta'are si'aye iye yo'oye pa'iji, tsoe acohua'i Maija'quëre quëacaicohua'i toyajë pa'ise'epi tijaquë cajë."

Ja maca si'ahua'i i ye'yacohua'i Jesure te'ire jeoni cati saë'ë.

Judío Pai Ca Tëjicohua'ipi Jesure Yo'oye

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Jesure tseasicohua'i sahuë, Caifás Maija'quë huë'e ñacaicohua'i ëjaë quë'rona. Cui'ne jarote cuañese'e ye'yacohua'i cui'ne aihua'i tsi'asisicohua'ipi paë'ë.

⁵⁸ Jaje pa'ijëna, Pedropi so'o maca se ñaquë jeteyo'je tuji'i, pai ëjaërepa huë'e daripë quë'rore paja'a. Sani jaro cacani ja huë'ere ñacaicohua'i ja're con ja'ruripi, merepa yo'oja'cohua'i a'ni ite tseasicohua'i cuasaquë.

⁵⁹ Maija'quë huë'e ñacaicohua'i ëjahua'ipi cui'ne aihua'ipi cui'ne si'a judío pai yo'oye ñani ca tëjicohua'ipi co'ehuë, Jesure sañope co'aye yo'oquë api cacohua'ini tija'ni Jesure huani jeoñu'u cajë.

⁶⁰ Jaje co'ejëta'a tija'ne pahuë, ite sañope ca ja'ñe. Jaje tija'ma'pë jai pai ite coa huëojë cosojë co'aye yo'oquë api, cahuë. Jaje yo'o maca cayaohua'i tëji huë'ñarepa sañope cacohua'i daë'ë.

⁶¹ Jahua'ipi dani cahuë: "Iquë cato yë'ëpi Maija'quë huë'e nejosiquëpi toaso mu'seña pa'i maca cui'naoni huëoja'quë a'ë, caquë api."

⁶² Ja maca Maija'quë huë'e ñacaicohua'i ëjaëpi huëni nëcani capi, Jesure:

"¿Ti te'le yë'opojë sañope sehuoye paquë, më'ë? ¿Më'ëre sañope jahua'i caye asaquë, më'ë?"

⁶³ Jaje catoje Jesús ti cama'ë paji'i. Ja maca Maija'quë huë'e ñacaicohua'i ëjaëpi capi, ite:

"Maija'quë huajëquërepa mamipi më'ëre care pajë'ë, cayë. Quëajë'ë, më'ëpi Maija'quë mamaquërepa Cristo pani."

⁶⁴ Jaje caquëna, Jesupi capi, ite:

"Jaje pa'ijë'ë. I a'ë, yë'ë, më'ë cayeye. Cui'ne mësarü ñaja'cohua'i a'ë, Pai Mamaquë Diusu tutu quë'irepa ëja te'tere ñu'ina, cui'ne ma'tëmopi sirija'a daina."

⁶⁵ Ja maca Maija'quë huë'e ñacaicohua'i ëjaëpi i ju'i care naë ye'sapi, ai coa care paji caquë iñoquë. Jaje yo'oquë capi:

"Iquë Maija'quëre ai cue'cuequë yo'oji, i yë'opo cayepi. ¿Jaje pa'ito iquere yeque cajë i yo'oquëna, ñasicohua'ini seni asañu'u cajë co'eye'ni? Mësarupi tsoe asahuë, i cue'cuequë caye.

⁶⁶ Jaje pa'ito ¿me caye'ni, mësarü?"

Caquëna, iohua'ipi cahuë:

"Jaje co'aye caquë api. Jaje pa'ina, ju'iñe pa'iji."

⁶⁷ Ja maca i tsiana copí tse'sejë cui'ne tarapi të'cahuë. Yecohua'ipi tsiana mosicapi të'cahuë.

⁶⁸ Jaje yo'ocohua'ipi cahuë, ite:

"¿Më'ë a'ë, Cristorepa se ta'ñe ca ñajë'ë, nepi më'ëre tëtore'ni?"

Pedro Cosose'e

(Mr 14.66-72; Lc 22.56-62; Jn 18.15-18, 25-27)

⁶⁹ Jaje yo'ojëna, Pedro cato huë'se yejare ja'rusiquëpi ñuji'i. Ñu'ina, paire necaico i quë'rona tsiojani cao, ite:

"Më'ëje Jesús Galilea aquë ja're con cu'i pa'isiquë aë."

⁷⁰ Jaje cacona, Pedropi si'ahua'i pa'i huë'ñana coa cosopi, ñeje caquë:

"Huesëyë, më'ë caye. ¿Iquere jaje caco'ni?"

⁷¹ Pedro eta sa'ro quë'rona huëni je'në saina, yecopi nomio ñani cao, iti maca pa'icohua'ire:

"Iquë Jesús Nazaret aquë ja're con cu'i pa'isiquë api."

⁷² Cacona, ja maca Pedropi tijaupë coso copí:

"Ñama'quëre pa'ë, jaëte. Quëare payë."

⁷³ A'ri maña tsoe pa'i maca iti maca pa'icohua'ipi Pedro quë'rona tsiojani cui'ne ite cahuë: "Nuñerepa më'ë i ye'yasicohua'i aquëre pa'ë. Jaje pa'ina, më'ë coca cayequë tiñe pa'iji, huesëye peoye."

⁷⁴ Cajëna, ipi capi:

"Ti ñama'quë a'ë, caye asa ma'ñe, mësarü."

Jaje itire yo'oquë caquëna, cura yëji'i.

⁷⁵ Yë'ina, ja maca Pedro cuasa ñajaji'i, Jesús ite case'e: "Ja yë'ta'a cura yë'ima'ëna, më'ë toasoñe yë'ëre ñama'quë a'ë cosoja'quë a'ë." Jare cuasaquë ja maca jaro pa'isiquëpi Pedro etani ai oji'i, co'a ju'i.

27

*Pilatona Jesure Isiye**(Mr 15.1; Lc 23.1-2; Jn 18.28-32)*

¹ Ñata tɔmesi maca Maija'quë huë'e ñacaicohua'i ëjaohua'ipi cui'ne judío pai aiohua'ipi te'e cuasaye nehuë, Jesure huani jea ja'ñere cajë.

² Sëasiquëni sani Poncio Pilatona ite yeja ëjaëna isihuë.

Judas Ju'ise'e

³ Judas Jesure yehuoquëpi ñaquëna, Jesupi huani jeo cuañoja'quë pa'ina, ñani ai oi pañete yo'ore'ni cuasaquë oi treinta curi tẽ'ña ite isise'ere cui'nare co'yopi, Maija'quë huë'e ñacaicohua'i ëjaohua'ina.

⁴ Co'yoquë capi, jaohua'ire:

“Co'aye yë'ë yo'ohuë, ti do'i peoquëni huani jeoja'quëre isiquë.”

Jaje caquëna, iohua'ipi sehuohuë, ite: “¿Iquere yëquë oiye'ni, ja yo'ose'e? Më'ëse'e yo'oquë cajë'ë.”

⁵ Ja maca Judas, curiquë Maija'quë huë'ena jeo ñato saoni sani queo deni juji'i.

⁶ Maija'quë huë'e ñacaicohua'i ëjaohua'ipi curiquë ña'ñe qese'ere tsi'soni careña:

“Iye curiquë Maija'quëre coa isijë aya mahuëna ayaye peoji, tsie do'i saise'e me ayaye'ni.”

⁷ Ja jeteyo'je jaohua'i te'e cui'ne si'a yë'quë maca cuasajë ca de'huahuë, “soto ne hue'ñana yejare huerofu'u, tjo'hua'ire taja'a yejare” cahuë.

⁸ Jaje pa'ina, ja yeja yureje “Tsie Yeja” hue'eji.

⁹ Jaje t'api, tsoe aquë Maija'quëre quëacaiquë Jeremias toyaquë pa'ise'e ñeje cayepi: “Treinta curiquë tẽ'ña imahuë, i do'ire Israel pai isise'ere.

¹⁰ Japi huerohuë, soto ne yejare, ëjaë yë'ëre cuañese'eje pa'ye.”

*Jesús Pilato Ña Hue'ñare Pa'ise'e**(Mr 15.2-5; Lc 23.3-5; Jn 18.33-38)*

¹¹ Jesús pai ëjaë quë'rona sasiquë paji'i. Pa'ina, ipi ite seji'i:

“¿Më'ë aë, judío pai ëjaërepa?”

Caquëna, Jesupi capi, ite:

“Jaje pa'ijë'ë. Më'ë case'eje pa'i a'ë.”

¹² Maija'quë huë'e ñacaicohua'i ëjaohua'ipi cui'ne aiohua'ipi sañope co'aye catoje Jesús ti a'ri mañaje sehuoma'ë paji'i.

¹³ Paquëna, ja maca Pilatopi capi, ite:

“¿Asama'quë më'ë, më'ëre sañope yo'ojë caye?”

¹⁴ Jaje catoje Jesús ti sehuoma'ë paji'i. Jaje pa'ina, ña jujani pai ëjaëpi ai ise'ere ñani ¿me neja'quë a'ni? cuasapi. Cui'ne huesëpi, yequë yo'oye peoquëna.

*Jesure Huaiye Pa'iji, Caye**(Mr 15.6-20; Lc 23.13-25; Jn 18.38-19.16)*

¹⁵ Jaje pa'iquëta'are si'anë fiesta pa'i maca pai ëjaëpi cosicohua'ire eto saokuë yo'oye paquë paji'i. Paipi jaëni etoye pa'iji cajëna, etoquë paji'i.

¹⁶ Paji'i, cosiquë Barrabás hue'equë si'aohua'i i co'aye yo'oye asaquë.

¹⁷ Jarote jai pai tsi'sisicohua'i pa'ijëna, Pilatopi seji'i, jaohua'ire:

“Neni yëye'ni, de'oye pa'ija'quëre jëjo saoye, Barrabás panita'a Jesucristo?”

¹⁸ De'hue asapi, paipi Jesuni ai yëjë yo'o do'ire pëijë co'aye yo'oma'quëni tsease'e. Jaje pa'ina, Pilato jaje capi.

¹⁹ Ja yë'ta'a Pilato pai co'aye yo'ose'ere asani ne de'hua hue'ñare ñu'ina, i pacopi jëjo dao, jo case'ere quëaja'quëre ñeje caco:

“Jaëre nuñerepa de'o paire cui'na coní yo'oma'ë pa'ijë'ë. Coa ñajë'ë. Jaëte yo'o do'ire huëo caní ñahuë, ai co'ayerepa.”

²⁰ Jaje pa'iquëta'are Maija'quë huë'e ñacaicohua'i ëjaohua'ipi cui'ne judío pai aiohua'ipi paire cuañehuë, Barrabásni etojë'ë cajë, cui'ne Jesuni huani jeoja'quëre cajë'ë, cahuë.

²¹ Pai ëjaëpi tujupë cui'ne seni coquë capi:

“¿Cayahua'i tseasicohua'i pa'icohua'ire jequëni yëye'ni, eto saoye?”

Caquëna, jaohua'ipi cahuë:

“Barrabásni etoye yëyë.”

²² Cajëna, Pilatopi seji'i, jaohua'ire:

“¿Cui'ne me neja'quë a'ni, Jesure Cristo hue'equëre?”

Caquëna, si'aohua'i sañope cahuë:

“¿Queja'quë api!”

²³ Ja maca Pilato capi, jaohua'ire:

“¿Jaje pa'ito iquere co'aye yo'o u'ni?”

Caquëna, t̃jupë cui'ne cui cõhuë:

“¡Queja'quë api!”

²⁴ Pilatopi j co'aye yo'ose'e asa t̃'ama'ëna, coa paipi jerepa josa yo'ojë sañope jase'e cajëna, ña jujani jëna tsoasi'i caquë oco daja'quëre jëjo saouna, daëna, tsoaquë capi:

“Yë'ëpi iquë de'o paire huani jëo ja'ñe cuañema'ë pa'iyë. Mësaruse'e yo'ojë'ë.”

²⁵ Jaje caquëna, si'a pai sehuohuë:

“Yëquëna cui'ne yëquë mamajëna ite huani jëo do'i tomejaquë.”

²⁶ Ja maca Pilatopi Barrabásni eto saopi, de'oye pa'ija'quëre. Etoquë Jesuni si'seni ja jeteyo'je quëni huani jëoja'quëre jëjo saopi.

²⁷ Ja jeteyo'je pai ëjaë soldado paipi Jesure sahuë, jai huë'ena. Si'a soldado pai tsi'sisicohua'irepa paë'ë, Jesús pa'i huë'ñana.

²⁸ Ja jeteyo'je j ju'i ca dutani maja'j ju'i care suñacaë'ë.

²⁹ Cui'ne s̃jopëna miu maro puacaë'ë. Cui'ne ëja t̃e'te jëtëna soquë tarapë isihuë. Ja maca j ña huë'ñana do're ja'runi cue'cuejë ñeje ite cahuë:

“¡Pa'ijë'ë, judío pai ëjaërepa!”

³⁰ Jaje cajë cui'ne copi tse'sejë cui'ne ite tarapëpi s̃jopëna t̃'cajë yo'ohuë.

³¹ Jaje ite cue'cue t̃jini maja'j ju'i ca dutani j ju'i care pare suñacani ja maca queja'quëre sahuë.

Ite Quese'e

(Mr 15.21-32; Lc 23.26-43; Jn 19.17-27)

³² Jaropi etani saijë Cirene aquëre t̃'ahuë, Simón hue'equëre. Jaëni Jesure queja'a sarahua sacaija'quëre cuañehuë.

³³ Jaje yo'ojë Gólgota hue'e huë'ñana t̃'ahuë. Jaje cani cayë, pai s̃jopë tara.

³⁴ Jarona Jesure cuiya'i o'sa cõnona s̃jeñe cõni cõ'mesicore õcuahuë. Jaje õcuajëna, Jesús ipi neñani ucuye coepi, iote.

³⁵ Ite quësi maca jeteyo'je soldado paipi Jesús ju'i care çnepi iote paja'cohua'i a'ni? cajë yo'ohuë, sa'ñe jõhua'ija'a. Jaje yo'ojëna, tsoe aquë Maija'quëre quëacaiquë toyase'e ñeje cayë t̃'api: “Yë'ë ju'i care pai ñape huahuehuë, jõhua'ija'a çnepi paja'cohua'i a'ni?” cajë yo'ohuë.

³⁶ Jaje yo'o t̃jini yecohua'ipi dani sama'cohua'ini cajë ja'runi ñahuë.

³⁷ Cui'ne j s̃jopë sa'ñihuëna ja do'ire ju'iji caco quëacore toyani s̃õhuë. Toyasico cato paji'i, ñeje: IQÜË API, JESÚS, JUDÍO PAI ËJAË.

³⁸ Cui'ne caya co'amaña yahue jmacohua'ire quësicohua'i paë'ë, j ja're cõni, yequëni j ëja t̃e'tena cui'ne yequëni j ari t̃e'tena.

³⁹ Cui'ne iti macasa'a da saicohua'ipi cue'cuejë tea ju'ijë s̃jopë api s̃'e'cuijë saë'ë, ite ñajë.

⁴⁰ Cui'ne cahuë:

“Më'ë a'ë, Maija'quë huë'e peo huë'ña nejoni cui'ne toasõ mu'seña pa'i maca cui'naoni huëoja'quë a'ë, caquë pa'isiquë. Jaje pa'i s̃ete yure co'ye huasojë'ë. Më'ëpi Maija'quë mamaquë pani cruzupi caje ñecajë'ë.”

⁴¹ Jaje cui'ne Maija'quë huë'e ñacacohua'i ëjaohua'ije cui'ne cuañese'e ye'yacohua'ije, fariseohua'ije cui'ne cue'cuhue, ite. Jaje cue'cuejë sa'ñe jõhua'ija'a cahuë:

⁴² “Yecohua'ita'are huasopi. Jaje pa'iquëta'a ija'a co'ye huasoyere paji. Jaje pa'ina, ipi Israel pai ëjaërepa pani yurepi cruzu dequëpi caje ñecaëna, sehuoye patira'pi, maire.

⁴³ Iquë cato Maija'quëna ire papi cuasaquë quëcoquë paji'i. Jaje pa'isiquëre s̃ete yure Maija'quëpi ite huasojaquë, ite oiquërepa pani. Ita' maire “yë'ë cato Diusu mamaquëre pa'ë' caquë pa'isiquë api.”

⁴⁴ Cui'ne co'amaña ñaohua'ije j ja're cõni quësicohua'ique tea ju'ijë sañope cahuë.

Jesús Ju'ise'e

(Mr 15.33-41; Lc 23.44-49; Jn 19.28-30)

⁴⁵ Ja maca yureta'a si'a yeja ñamije pa'ioyerepa de'o nëji'i, mu'se jopore papi na'i maca tres pa'i macaja'a.

⁴⁶ Cui'ne jare ja hora pa'i maca Jesús ai tutu cui'ni: “Eli, Eli, lama sabactani”. Ja cayë cato caji: Yë'ë Diusu, Yë'ë Diusu, çme nesi'quë yë'ëre jëoco huesou'ni?

⁴⁷ Yecohua'j it̃i maca pa'icohua'ipi asani cahuë:

“Tsoe aquë Maija'quëre quëacaiquë Elías pa'isiquëni soiji.”

⁴⁸ Jare it̃i macapi t̃'e' huë'huëpi, oco saësi p̃ë quë'r̃ejasi'i caquë. Quë'r̃ejani dani o'sa cuiya'i cõnore saë t̃jini soquë tarapëna huë s̃õni ucujaquë caquë ja'ye maca sapi.

⁴⁹ Jaje yo'õquëna, yecohua'ipi cahuë:

“Yo'oma'ë. Ñañu'u, Elíaspi dani ite huasoquë pa'ito.”

⁵⁰ T̃jupë Jesús tutu cui'ne cui cõpi. Ja maca juni huesëpi.

⁵¹ Jare it̃i macapi Maija'quë huë'e t̃a't̃epo t̃ehuosico cayaye ëm̃jë'epi huë'ehuëre pana yete saji'i. Yejañe ñu'cuequë cui'ne quëna yejañaje tsate saji'i.

⁵² Cui'ne ju'isicohua'ire tase'eje hui'ye sapi. Cui'ne Maija'quère asani ju'isicohua'ijë huëisicohua'i paë'ë.

⁵³ Tasi daripëapi huëisicohua'i paë'ë, Jesús huëisi jeteyo'je. Huëni de'o Jerusalén daripëna cacahuë. Cacajëna, jai pai ñahuë, jaohua'ire.

⁵⁴ Ja maca Capitán cui'ne i ja're coní Jesure ñacohua'ipi yeja ñu'cueye ñani cui'ne yeque jaiye yo'oyere ñajë ai ca'rajë cahuë: "Nuñerepa iquë Maija'quë mamaquërepa paji'i."

⁵⁵ Jarote jai pai nomiohua'ije paë'ë, so'opi de ñajë, Jesure Galileapi cõcaijë tuisicohua'i.

⁵⁶ Jaohua'i ja're coní paë'ë, María Magdalena, María Jacobo cui'ne José pëca ja'co cui'ne Zebedeo mamajë pëca ja'co coní paë'ë.

Jesure Tase'e

(Mr 15.42-47; Lc 23.50-56; Jn 19.38-42)

⁵⁷ Ñami de'o huëo maca jaiye co'amaña paquë José hue'equë Arimatea daripë aquëpi daji'i. Jaë cato Jesure tuiquë de'osiquë paji'i.

⁵⁸ Jaje pa'ipi jaëpi Pilato quë'rona sani Jesús capëre seji'i. Seina, ja maca Pilatopi cuañepi, isijë'ë caquë iti ñacaicohua'ire.

⁵⁹ Josépi i capë si'si peo capi peo hue'ña deapi.

⁶⁰ Yo'oni huajëcore pana i tsecona qapi, quëna yeja pëpëna coje nesicono. Ite tani jai quëna pëpi daripë se sioní saji'i.

⁶¹ Cui'ne jarote paë'ë, María Magdalena, cui'ne yequë María coní, daripë tiñare pare ja'rusicohua'ipi.

Jesús Tasito Ñacaicohua'i

⁶² Se ñatasi mu'se cato huajë mu'se de'hua tējisi maca paji'i. Pa'ina, Maija'quë huë'e ñacaicohua'i ëjaohua'ipi cui'ne fariseohua'i coní Pilato quë'rona saë'ë.

⁶³ Tj'ani cahuë: "Ëjaë, yëquë jaë cosou ja yë'ta'a huajëquë pa'inë ñeje caquë pa'ise'ere cuasayë, 'Toaso mu'seña pa'i maca ju'isiquëpi cui'naëpi huëija'quë a'ë case'ere.'

⁶⁴ Jaje pa'ina, jëjo saojë'ë, tasi daripë ñaja'cohua'ire toaso mu'seña pa'i macaja'a, i ye'yaquë pa'isicohua'ipi dani i capë ñani sani, ja maca paire 'Tsoe huëji'i, juni huesësiquë pa'isiquëpi' cama'cohua'ini. Jaje yo'ose'e cato ai jerepa du'ru cosose'e jerepa coa cosose'e pa'ima'coní tējijerepa cosoyepi."

⁶⁵ Cajëna, Pilatopi capi, jaohua'ire:

"Jaohua'i pa'iyë, iti ñacohua'i soldado pai. Jaje pa'ito sani de'oyerepa ñajë'ë."

⁶⁶ Jaje caëna, sani tasi daripëre de'oyerepa de'huani iti coje sjo quëna pë ëmëje'ena toyani sëohuë. Sëoni iti macana soldado paire ñaja'cohua'ire jëoni saë'ë.

28

Jesús Jui'siquëpi Huëise'e

(Mr 16.1-8; Lc 24.1-12; Jn 20.1-10)

¹ Huajë mu'se tëto sani du'ru macarepa semana mu'se ñata maca María Magdalena, cui'ne yeco María coní tasi daripë ña'ñu'u cajë saë'ë.

² Saijëna, cuasama'tore papi tutu yeja ñu'cueye paji'i, Ja cato Ëjaë huññaëpi ma'tëmopi tasi daripë quë'rona tjtani yo'opi, quëna pë coje siosiconi ne ttoni jo ëmëje'ena ja'rupi.

³ Mujüë ye'hueye miañe ña'ñeje pa'irepa paji'i. Cui'ne i ju'i capi po yëioje pa'iorepa paji'i.

⁴ Jare ñani soldado paipi quëquë huesëni tsasijë ju'ise'eje pa'iohua'i de'ohuë.

⁵ Ja maca ëjaë jo'yaëpi capi, nomiohua'ire:

"Ca'rama'pë pa'ijë'ë. Tsoe yë'ëpi asayë. Jesure quëni huani jëosiquëre mësarü co'eye.

⁶ Iño peoji. Tsoe huëji'i, i case'eje pa'ye. Dani ñajë'ë, ite o'a sitore.

⁷ Sani esa cajë'ë, i ye'yacohua'ire: 'I cato ju'isiquë pa'isiquëpi huëji'i. Yure jaje pa'ipi mësarü Galilea ja yë'ta'a t'j'ama'pëna du'ru saija'quë api. Jarona ite ñaja'cohua'i a'ë, mësarü. Iyese'e pa'iji, yë'ë mësarute casi'i cuasase'e."

⁸ Ja maca nomiohua'ipi esa tasi daripë quë'ropi ca'rajë cui'ne ai sihuacohua'ipi huë'huëjë saë'ë, huajë cocare i ye'yacohua'ipi pa'isicohua'ire quëa'ñu'u cajë.

⁹ Ja huë'huëjëna, Jesupi jaohua'ina ñaini pëpapi. Pëpaquëna, ja maca Jesure ire papi cajë i quëona su'cuajë de'oquëre pani cahuë.

¹⁰ Yo'ojëna, ipi capi, jaohua'ire:

"Ca'rama'pë pa'ijë'ë. Sani quëajë'ë, yë'ë yo'je tsire. Galileana sani yë'ëre ña'ñe pa'iji."

Soldado Pqi Quëase'e

¹¹ Ja yë'ta'a nomiohua'i saijëna, yecohua'ipi soldado pai iti ñasicohua'ipi pai pa'i hue'ñana sani si'aye johua'i yo'oquëna, ñase'ere quëahuë, Maija'quë huë'e ñacaicohua'i ëjaohua'ire.

¹² Ëjaohua'ipi sani aiohua'i ja're çoni cahuë, si'a yë'quë maca cuasaye pa'ijaquë cajë. Jaje cajë ja maca soldado paire jaiye curiquë isihuë.

¹³ Isijë cahuë, jaohua'ire:

“Mësarupi cajë'ë: ‘ñami yëquë çani huesësi maca Jesús ye'yaquë pa'isicohua'ipi dani i capë ñani sahuë.’

¹⁴ Jare pai ëjaëpi asa ti'ani, mësarute sañope yo'oye pa'ito yëquëpi ite ca de'huacañu'u. Cui'ne ai yo'oye pa'itojë çocaija'cohua'i a'ë, mësarute.”

¹⁵ Ja maca soldado paipi curiquë imani, sani jare johua'i yëhuojë case'eje pa'ye quëahuë. Jaje pa'ina, yure iye mu'señaje judío pai cui'ne quëajë pa'icohua'i a'ë.

Jesupi I Jëjo Daocohua'ire Cuañese'e

(Mr 16.14-18; Lc 24.36-49; Jn 20.19-23)

¹⁶ Jaje du'ru ca nëose'e sëte i ye'yacohua'i once pa'iohua'i Galileana saë'ë, Jesús quëa nëosi cutihuëna.

¹⁷ Jarona Jesure ñani ite do're ja'runi de'loquëre pa'ni cajë yo'ohuë, ja yë'ta'a yecohua'i jëa coejëta'a.

¹⁸ Ja maca Jesús jaohua'ire tsiojani capi:

“Yë'ëna si'aye tutu isise'e pa'iji, ma'tëmo cui'ne yeja cuañequërepa pa'ija'quëre.

¹⁹ Jaje pa'ina, saijë'ë, coa si'a yejaña pai pa'i huë'ñana. Sani yë'ëre ye'yecohua'ire necaijë'ë. Jaohua'ire Maija'quë mamipi, i mamaquë mamipi, cui'ne de'o joyo mamipi oco docaijë'ë.

²⁰ Jaje yo'ojë cui'ne ye'yajë'ë, yë'ë mësarute cuañese'ere si'aye sehuojajë cajë. Cui'ne cuasajë'ë, yë'ëpi mësaruru ja're si'a mu'seña pa'iji, yeja carajaisi macaja'a.” De'oji. Jaje pa'ijaquë.

SAN MARCOS

Juan Oco Doquë Ayere Quëaye

(Mt 3.1-12; Lc 3.1-9, 15-17; Jn 1.19-28)

¹ De'o coca ñeje huëopi. Ñeje yo'opi, Ëjaë Jesucristo Maija'quë mamaquë.

² Maija'quëre quëacaiquë Isaiaspi Maija'quë quëaquëna, toyapi, ñeje:

“Yë'ëre quëacaiquëre du'ru jëjo saosi'i,
saija'a ma'a ne de'huacaija'quëre.

³ Airopi ñ yë'ose'e jutaja'coa.

Ne de'huajë'ë,

Mai Ëjaë daija'a ma'a, nui ma'a hui'yocaijë'ë.”

⁴ Jaje pa'ina, Juan cuëne yejaja'a dai paire doquë daji'i. Jaje dai capi: Mësarü ja'rë cuasase'ere jëoni ponëto oco doye pa'iji, mësarü co'aye yo'ose'e sai de'huacaise'e pa'ija'core.

⁵ Judea quë'ro pai cui'ne Jerusalén daripë pai si'aohua'i ñ pa'i hue'ñana sani jöhua'i co'aye yo'ose'e oijë quëajëna, Juanpi Jordán tsiayana dopi.

⁶ Juan caña cato camello nañapi nese'e paji'i. Cui'ne ñ tëi cã cato cã'nipi nesico paji'i. ñ aña cato pu'su cui'ne mejaë paya paji'i.

⁷ Ñeje caquë paire quëaëña:

“Yë'ë jeteyo'je jerepa pa'ipi daiji. ñ jo'yaë në meni zapato joyecaiquëje pa'i yë'ë peoyë, ai teaye pa'i a'ë.”

⁸ Ocopi dohuë, mësarute. Jesuta'a Maija'quë joyore ñsija'quë api.”

Jesure Doye

(Mt 3.13-17; Lc 3.21-22)

⁹ Ja mu'seña Jesupi Nazaret daripëpi de daquëna. Nazaret daripë cato Galilea quë'ro paji'i. Daquëna, Juanpi Jordán ñana dopi, Jesure.

¹⁰ Do tējina, Jesús tsiayapi tumaquëna, ma'tëmo jaca sacona, ñaëña. Ñaquëna, Maija'quë joyo ire pana nëca mequëña, su'teje pa'ipi.

¹¹ Nëca meina, ma'tëmopi yë'ose'e jutaëña:

“Më'ë yë'ë mamaquë a'ë. Më'ëre ai yëyë. Ai sihuaquë pa'iyë, më'ëre.”

Jesure Neñañe

(Mt 4.1-11; Lc 4.1-13)

¹² Ja maca jë'nërepa Maija'quë joyopi saëña, Jesure, yequë hue'ñana, pai peo hue'ñana.

¹³ Saëna, airo acohua'i quë'rona cuarenta mu'seña pa'ina, mënapi co'aye yo'ojaquë caquë dani neñaëña. Mënapi jaje yo'o tëji maca huññaohua'ipi dani Jesure necateña.

Jesús Yo'o Huëoye, Galileana

(Mt 4.12-17; Lc 4.14-15)

¹⁴ Juanre tsoe tseani cosi maca Jesús jeteyo'je saji'i, Galileana, de'o cocare quëaquë Diosu te'te ayere.

¹⁵ Ñeje caquë quëapi:

“Tsoe tñ'api, Maija'quë cuañe te'te. Ja'yere pa'iji. Mësarü ja'rë cuasase'e jëoni yeque cuasayena ponëjë'ë. Huaso cocare asajë'ë.”

Hua'ire Yo'ecohua'ire Soiye

(Mt 4.18-22; Lc 5.1-11)

¹⁶ Jesupi Galilea jaira tëtëpaja'a saina, Simón ñ jo'jei Andrés cõni hua'i huäterë jëo dëojëna, ñaëña, iti hua'i yo'ecohua'i sëte.

¹⁷ Nani jaohua'ire capi:

“Yë'ë ja're daijë'ë. Yureta'a paire yo'ecohua'i pa'ija'cohua'ire nesi'i, yë'ëpi.”

¹⁸ Ca tējina, huäterë jëoni sateña, ñ ja're.

¹⁹ Satena, seña maca saina, Zebedeo mamajëpi Jacobopi ñ jo'jei Juanpi cõni yohuëre ñu'ijë huäterëre que'que do'sejëna, ñaëña.

²⁰ Nani jöhua'ire soña. Soña, jaohua'ije pëca ja'quëre jëoni Jesús ja're sateña, ñ saina cõcaicohua'i ja're cõni yohuëre pa'ina.

Co'a Joyore Hue'equë

(Lc 4.31-37)

²¹ Jëo saiscohua'ipi capernaum daripëna sa tñ'ani, du'ru huajë mu'se Judea pai tsi'si huë'ena cacarena, ye'yaëña, Jesupi.

22 Ye'yaquëna, me nesiquëpi de'oyerepa tã'ñerepa ye'yaquë'ni, jaë, cuañequëje pa'irepa ye'yaquë'ni. Maire ye'yacohua'i yo'oyeje yo'oye pajì, cuasareña.

23 Cui'ne pajì tsi'si huë'ere huati quë'i paquëña.

24 Pa'ipi caëña:

“¿Jesús Nazaret daripëpi daiquë me nesi'quë yëquëre yo'okuë'ni? ¿Yëquëre huasi'quë daiquë? Ti cuañequërepa de'okuëni ñahuë, më'ère.”

25 Caquëna, Jesupi huatire caëña:

“Cama'ë pa'ijë'ë. Jaëte jeoni etajë'ë.”

26 Caquëna, asani hue'hue dahuëje pa'ye ju'iquëte yo'oni cuini etaëña, huati.

27 Jaje yo'ouna, ñani si'aohua'i quëquë huesëni sa'ñe setëña:

“¿Ique a'ni, iye? ¿Iquerepa huajë ye'yaye a'ni, iye? ¿Huatiohua'ire eto sao tuture paque pajì. Jaje paquëni ñi cuañeñe sehujë etayë?”

28 Jaje Jesús yo'oyese'e esa Galilea yeja pa'icohua'i asa tã'areña.

Simón Pedro Huaore Jujuye

(Mt 8.14-15; Lc 4.38-39)

29 Ye'ya tējini pajì tsi'si huë'epi etani Simón cui'ne Andrés huë'ena cacaëña. Jacobo cui'ne Juan cōni cacareña, Jesús ja're.

30 Cacarena, Simón huaos suña dahuëre ju'io uico pacoña. Pa'iona, io ju'iñe quëareña, Jesure.

31 Quëarena, asani dani io jëtëna tseani naë huëouña. Naë huëouna, suña dahuë jeouña. Jeouna, huëni si'aohua'ire goña.

Jai Paire Ne Co'yaye, Jesús Yo'okuëna

(Mt 8.16-17; Lc 4.40-41)

32 Na'iquëna, ësë caje huesëquëna, ja daripë si'a ju'icohua'ire cui'ne huati quë'iohua'ire Jesús quë'rona dareña.

33 Si'a pajì ja daripë acohua'i tsi'sireña, eta sa'ro quë'rona.

34 Tsi'sirena, jai paire jujuquëna, co'yareña, si'aohua'i. Si'aye ju'iñe pa'itoje de'oye jujuña. Cui'ne huati quë'iohua'i pa'ijëna, eto saouña, huatiohua'ire. Huatiohua'ipi tsoe Jesure ñareña. Jesupi huatiohua'i cayete ësëquë, cama'pë pa'ijë'ë, cani eto saouña.

Jesús Yëhuoye, Galilea Quë'roro

(Lc 4.42-44)

35 Ja yo'o tējini pëani cāni nea huë'ñarepa huëni saquëña, pajì peo huë'ñana Maija'quëni casi'i caquë.

36 Ja caquëna, Simón cui'ne yecohua'i cōni tuteña.

37 Tunì tã'ani ñte careña:

“Si'aohua'i më'ëni co'eyë.”

38 Cajëna, Jesupi johua'ire caëña:

“Je darina sañu'u. Je darije cui'ne Maija'quë coca quëasi'quë daë'ë.”

39 Cani saquëña. Si'a huë'ña Galilea quë'roja'a sai si'a Judea tsi'si huë'ena cacani Maija'quë coca quëarojaquëña. Cui'ne huatiohua'ire eta saouña.

Jesús Jujucayë, Ja'ju Dahuë Ju'iquëre

(Mt 8.1-4; Lc 5.12-16)

40 Jesús pa'i huë'ñana te'i ju'iquëpi daquëña. Ja'ju dahuë ju'iñe hue'equëpi dani do're ja'rundi oi sequëña:

“Më'ëpi yëni ne co'yajë'ë, yë'ère.”

41 Ju'iquëte oi ñaquë jëtëpi se patoquë caëña:

“Yëyë. Më'ère jujusi'i.”

42 Cani patoquëna, ti ju'iñe peoquëre pare ne co'yaëña, ñte.

43 Ne co'yani Jesupi yëhuouña, yë'ë ne co'yase'e quëama'ë pa'ijë:

44 “Yecohua'ire quëama'ë pa'ijë'ë, coa Maija'quë huë'te ñacacohua'i ëjaëse'ere ñnojë'ë, Moisés cuañequë pa'ise'ere ñsiquë më'ë si'sire tsoa tosiquë pa'yere ñnoquë. Jaje yo'okuëna, yecohua'i ñajajë caëña. Cani jëjo saouña.”

45 Ti jujusiquëpi etani sani Jesús yo'ose'ere si'a huë'ña quëaëña. Quëaëna, Jesupi pajì daripëa tñarepa cacaye peouña. Peoquëna, hue'sere pajì peo huë'ñare paquëña. Pa'iquëta'are pajìpi ñ quë'rona si'a huë'ña acohua'ipi dateña.

2

Quë'quë Dahuë Ju'iquëre Jujuye

(Mt 9.1-8; Lc 5.17-26)

¹ Yequë huë'ñare panirojani tējini, t̃jupë Capernaum yejana co'i copí. Co'ina, huë'ere pa'iji asareña, yecohua'i.

² Asani esa tsi'sireña. Si'a huë'le t̃imë huesëoña, so'o sa'ro peoyerepa. Jaje tsi'sirena, i cato Maija'quë cocare quëaëña.

³ Quëaquëna, cajese'le ëmëohua'ipi ju'iquëre hue'ejë dareña. I ju'iñe cato quë'quë dahuë paji'i.

⁴ Dani jai pai pa'ijëna. Jesús pa'i huë'ñana caca t̃j'añe peoquëna, ña jujani huë'le ëmëje'aja coje neni ju'iquëre cai saihuëre ùina, Jesús nëca huë'ñana casareña.

⁵ Jujucaija'quë api cuasajë yo'oyere ñani Jesús ju'iquëre capi:

“Tsihua'ë, më'ë co'aye yo'ose'ere saï de'huacaise'le a'ë.”

⁶ Jaje caquëna, iti maca ñu'icohua'ipi cuañese'le ye'yacohua'i acohua'ipi asani cuasahuë.

⁷ ¿Me yo'oquë jaje caquë'ni, iquë? Coa Maija'quëni cue'cuequë caji. Iye jeja acohua'ipi pai co'aye yo'ose'ere saï de'huaye peoji. Coa Diususe'le yo'oye a'ë, ja cato.

⁸ Cuasajëna, Jesús i joyopi johua'i cuasase'le asani caëña:

“¿Me neñu'ju jaje cuasaye'ni, mësarú?”

⁹ Ique a'ni, ju'iquëre ai de'oye ca'ñe pa'ye: “Më'ë co'aye yo'ose'le saï de'huacaise'le a'ë.” Panita'a caye, “Huëni më'ë cai saihuë ñni saijë'ë.”

¹⁰ Jaje pa'ito mësarute ñno'i, yë'ë Pai Mamaquë iye jeja pa'i pai co'aye yo'ose'ere saï de'hua tutu paquë pa'iyere.”

Jaje cani ju'iquëre caëña:

¹¹ “Më'ëni cayë, huëijë'ë. Më caicore ñni hue'equë më huë'ena saijë'ë.”

¹² Jare caëna, ju'iquëpi i cai sëohuë ñni hue'equë saquëña. Saquëna, ñani Maija'quë ai de'oji cajë sihuareña, mai ña ma'ñere ñañë, cajë.

Jesupi Levíre Soiye

(Mt 9.9-13; Lc 5.27-32)

¹³ Jesupi sani çuña, jaira t̃ë'tëpana. Sani çuna, si'a pai i quë'rona tsi'sirena, ye'yaëña.

¹⁴ Ye'ya tējini jerepa saina, Levi, Alfeo mamaquëpi pa'i do'i saï huë'ere ñu'ina, Jesupi ñani caëña:

“Yë'ë ja're daijë'ë.”

Caëna, asani i ja're saquëña.

¹⁵ Jesupi Levi huë'ena sani ñu'i aina, jai pai pa'i do'i sëcohua'i cui'ne yecohua'i co'aye yo'ocohua'i cui'ne i ye'yacohua'i çoni te'le ñu'ijë ateña.

¹⁶ Jesupi jaje jaohua'i ja're çoni ñu'i aina, ñaquë ñani cuañese'le ye'yacohua'ipi cui'ne fariseohua'ipi i ye'yacohua'ire setëña:

“¿Me neni mësarute ye'yaquë pa'i do'i sëcohua'i ja're çoni cui'ne co'acohua'i ja're çoni ucucuë cui'ne aiquë'ni?”

¹⁷ Sejëna, Jesupi asani sehuouña, jaohua'ire:

“Huajëcohua'i cui'ne de'oye pa'icohua'i jujuquëre co'ema'cohua'i a'ë. Ju'icohua'ipi co'ecohua'i a'ë. Yë'ë cato de'ocohua'ini soisi'i caquë daiye pahué. Co'acohua'ini caquë daisiquë a'ë.”

Ai Ma'ñere Cajë Señe

(Mt 9.14-17; Lc 5.33-39)

¹⁸ Fariseo pai ye'yacohua'ipi cui'ne Juanre ye'yacohua'ipi aima'pë Maija'quëre sejëna, yecohua'ipi ñani Jesús quë'rona dani setëña:

“¿Me yo'ojë më ye'yacohua'i aima'pë seña pañe'ni, Juan ye'yacohua'i cui'ne fariseo pai ye'yacohua'ise'le aima'pë sejëna?”

¹⁹ Sejëna, Jesupi sehuouña:

“¿Hueja ao aija'cohua'ire soisicohua'i je'quë aima'cohua'ini iti hueja posëpi johua'i ja're çoni pa'ito? Ipi pa'ito aïñe pa'iji.

²⁰ Jaje pa'iquëta'are hueja posëje pa'ini yequë mu'se sio cuañoni ja macata'a aima'pë seja'cohua'i a'ë.

²¹ Ai ju'i care huajë capi jaoma'cohua'i a'ë. Jaje yo'osicohua'i pa'ito jojajëna, huajë capi quërësjio ai ju'i care jerepa jai coje neñe pa'iji.

²² Cui'ne huajë cuiya'i çonore ai ca'ni topëna ayama'cohua'i a'ë. Ayasicohua'i pa'ito huajë cuiya'i çonopi o'saquë qu'co joiye pa'iji. Ja maca yureta'a si'aye nejoñe pa'iji, çono cui'ne topëje çoni. Ja do'ire huajë cuiya'i çono ja're huajë ca'ni topëna ayaye pa'iji.”

Jesús Ye'yecohua'ipi Huajë Mu'se Yo'oye

(Mt 12.1-8; Lc 6.1-5)

²³ Te'le mu'se Jesús huajë mu'se pa'ina, trigo tsioja'a saina, i ye'yacohua'ipi sa t̃eto saijë t̃ehuë.

²⁴ Tëajëna, ñani fariseo paipi careña, Jesure:

“Ñajë'ë, jaohua'i yo'oyere huajë mu'se yo'oye peoji, huajëye pa'i mu'sere.”

²⁵ Cajëna, ipi jöhua'ire caëña:

“¿Maija'quë toyapë mësarü ñama'cohua'i a'ni? Toyase'e cato caji: Abiatar Maija'quë huë'ere ñacaicohua'i ëjaërepa pa'i maca, Davidpi cui'ne i cöcohua'ipi aiñe peoquëna, aï ëa ju'ijë.”

²⁶ David cui'ne i cöcohua'i cöni cacani açore Maija'quë ña hue'ñana tëose'ere aë'ë. Iye aço cato Maija'quë huë'e ñacaicohua'ise'e aï ja'ñe pa'iji. Yecohua'ire ësesese'e paji'i.”

²⁷ Cui'ne jaohua'ire Jesupi caëña:

“Paini caquë Maija'quë huajë mu'se nepi. Pani paipi huajë mu'se do'ire ai yo'ojajë caquë neñe.”

²⁸ Yë'ë Pai Mamaquë cato huajë mu'se ëjaëpi yo'oyë.”

3

Jëtë Sëyë Huesësiquë

(Mt 12.9-14; Lc 6.6-11)

¹ Pai tsi'si huë'ena Jesupi tïjupë cacapi. Cacaëna, jarote jëtë sëyë huesësiquë paji'i.

² Pa'ina, huajë mu'sere Jesupi jujuquëna, ñañu'u cuasajë cama'pë ñahuë, jujuquëna, sañope ite cañu'u cajë.

³ Ja maca Jesús jëtë sëyësiquëre ñani caëña:

“Huëni nëcani iye maca jopore pana dani nëcajë'ë.”

⁴ Jaje se cani yecohua'ire seji'i:

“¿Huajë mu'se iquë yo'oyepi de'oquë'ni? ¿De'oye, panita'a co'ayere yo'oye, paire huasoye, panita'a paire huani jeoñe?”

Jaje caquëna, ti sehuoye pareña.

⁵ Jaje Jesús seni jujani pëi jöhua'ire ñapi, i cayere asaye coejëna, ñani. Jaje oi ña jujani ju'iquëre capi:

“Më'ë jëtëre pi'najë'ë.”

Caquëna, pi'napi. Pi'naquëna, i jëtëpi tsoe de'oco paji'i.

⁶ Jare ñani fariseo pai etasicohua'ipi Jesure huani jeo ja'ñere ca de'huajë paë'ë, Herodes pai ja're cöni.

Jaira Të'tëpare Jai Pai Pa'iyë

⁷ Jesupi i ye'yacohua'i ja're cöni saji'i. Saina, jai pai tuteña, Galilea paipi.

⁸ Jaiye yo'oquëna, asa ti'ani Judea, Jerusalén, Idumea, Jordán je te'te quë'ro acohua'i, Tiro yeja acohua'i, cui'ne Sidón yeja acohua'i i quë'róna ñañu'u cajë dateña.

⁹ Jaje pa'ina, Jesupi i ye'yacohua'ire caëña. Yohuë ja'yena dajë'ë, paipi qui'ima'cohua'ini.

¹⁰ Iye cato capi jai paire jujuquëna, ñani ju'icohua'ipi ini patoni co'yañu'u cajë yo'ojëna.

¹¹ Cui'ne huatìohua'ipi ini ñani do're ja'rujë cuijë cahuë:

“Më'ë cato Maija'quë mamaquë a'ë.”

¹² Jaje cajëna, Jesús ai ësepi cama'pë caquë. Jaë api, quëaye coepi.

Jesupi Yë Sahuani Soiyë

(Mt 10.1-4; Lc 6.12-16)

¹³ Ja jeteyo'je ai cutìhuëna tumani jarona i yë sahua nëosicohua'ire soina, dateña.

¹⁴ Datena, soipi, si'a jëña cayañoa pa'iohua'ire tsi'soni sahua nëosicohua'ire yë'ë ja're pa'ijajë caquë jaohua'ire mësarute jëjo saosi'i yë'ë coca quë'aja'cohua'ire.

¹⁵ Cui'ne ju'icohua'ire juju tutu cui'ne huatìohua'ire eto sao tutu isiña.

¹⁶ Icohua'i a'ë, doce i soisicohua'i: Simón jare ini Pedrore hue'yopi.

¹⁷ Jacobo cui'ne i yo'jei Juan, Zebedeo mamajë paë'ë, cui'ne jaohua'ini hue'yopi Boanerges jaje canì cayë mujuë mamajë.

¹⁸ Andrés, Felipe, Bartolomé, Mateo, Tomás, Jacobo cato Alfeo mamaquë Tadeo, Simón paji'i. Jaë cato judío pai de'oye pa'iyere caquë yo'o tsëcapë aquë paji'i.

¹⁹ Cui'ne Judas Iscariote paji'i, Jesure cosoquë yehuoja'quëje.

Jesús Co'a Joyo Tuture Paquë Cayë

(Mt 12.22-32; Lc 11.14-23; 12.10)

²⁰ Jaje quëa tëjini i ye'yacohua'i ja're huë'ena cacaëña. Cacaëna, tïjupë paipi tsi'si dateña. Tsi'si huesëjëna, ai yo'oye pa'ina, ai yo'ojë aiñeque pareña.

²¹ Jaje pa'ina, i cajeohua'ipi asani Jesure quë'rëjañu'u cajë dateña, coa cuepei neni yo'oji, caye pa'ina.

²² Cuañese'e ye'yacohua'ipi Jerusalénpi daisicohua'ipi careña:

“Huati ëjaë Beelzebùre hue'equëpi yo'oji. Jaje pa'ina, jaë tutupi co'a joñoare eto saouquë yo'oji.”

²³ Jaje cajëna, ja maca Jesupi soiña, tñña asajajë caquë quëapi, pai yo'oyeje pa'ye ñeje caquë: “¿Huati ëjaë pani me jja'a co'ye eto saouquë'ni?”

²⁴ Paipi yeja ëjaëpi huasiquë pani, yecohua'ipi ìni sañope yo'ojëna, uihuaquë coa carajaiñe pa'iji.

²⁵ Cui'ne te'e huë'e acohua'ipi uihuajë huasichua'i pani coa sa'ñe yo'ojë carajaiñe pa'iji.

²⁶ Jaje huatipi jja'a sa'ñe uihuaquë pani quëcoye peoji. Jaje yo'oquë pani tsoe carajaisi'quë yo'oye pa'iji.

²⁷ Ai tutu quë'i huë'e pa'ito cacaye peoji, ì co'amaña sioñu'u cajë. Ini du'ru huenita'a ì co'amaña jioye pa'iji.

²⁸ Nuñerepa cayë, mësarute: si'aye pai co'aye yo'ose'e saì de'huacaiye pa'iji. Cui'ne Maija'quëre co'a coca cayeye saì de'huacaiye pa'iji.

²⁹ Jaje pa'iquëta'are Maija'quë joyore sañope co'a coca casiquëre cato saì de'huacaiye ti peosipi. Si'anë do'i pasipi.”

³⁰ Huatire hue'equë api casi do'ire, jaje Jesús quëaëña.

Jesús Pëca Ja'co Cui'ne I Yo'je Tsi

(Mt 12.46-50; Lc 8.19-21)

³¹ Jesús pëca ja'co cui'ne ì yo'je tsi çoni dani hue'sere pa'ijë Jesure quëacaija'quëre jëjo saoreña, daijaquë cajë.

³² Jare asani Jesús quë'ro jai pai ñu'lijë asacohua'ipi Jesure careña:

“Më'ë ja'co cui'ne më yo'je tsi më'ëni soiyë, hue'sepi.”

³³ Cajëna, sehuouña:

“¿Ne a'ni, yë'ë ja'co, cui'ne yë'ë yo'je tsi?”

³⁴ Jaje canì ì quë'ro ducohua'ire seña tëjjiani caëña:

“Ìñore pa'iyë, ja'coje pa'iohua'i cui'ne yë'ë yo'je tsije pa'iohua'i.

³⁵ Si'aye Maija'quë yëyete yo'ocohua'ipi yë'ë yo'jei cui'ne yë'ë yo'jeo cui'ne yë'ë ja'cohua'i pa'iyë.”

4

Taquë Yo'ose'eje Pa'ye Quëase'e

(Mt 13.1-9; Lc 8.4-8)

¹ Tjjupë Jesús jaira tëtëpapi ye'ya huëouna, jai pai ì quë'rona tsi'si dateña. Jai pairepa tsi'si daijëna, Jesús ña jujani ìti maca jaira huahua yona aya mëni ja'ruña, paìse'e mejahuëre pa'ijëna.

² Ja maca yureta'a jaiye ye'yaëña, pai yo'oyeje pa'ye ñeje caquë.

³ “Asajë'ë, iyere, taquë sani tase'ere.

⁴ Jaje sani taquëna, yequë çapi ma'ana tòmepi. Tòmëina, pi'api dani peo hue'ña ocue saopi.

⁵ Yequë çapi quëna yejana tomeo. Tòmeni esa mëapi, pëa yeja do'ire.

⁶ Jaje mëacota'are ëjëpi ëo hueçapi, tsita mema'coni.

⁷ Yequepi tòmepi, miu pisi quë'rona. Jaje pa'ina, miu pisipi te'e ai de'oni hue hueçapi. Jaje yo'oni quëima'o paco'ë, tase'e.

⁸ Yequë çapi de'o yejana tòmepi. Tòmeni mëani jaiye de'oye quëjji'i. Iti ça yequë ñëapi quëjji'i, treinta ça, yequepi sesenta ça cui'ne yequepi cien ça quëjji'i.”

⁹ Casi jeteyo'je caëña, jaohua'ire:

“Cajoro hue'ecohua'i pani, asajë'ë.”

Me Ne Ja'ñere Pai Ñañena Çoni Quëaë'ni

(Mt 13.10-17; Lc 8.9-10)

¹⁰ Quëa tëjisi jeteyo'je Jesús te'ì pëaëña. Pëaëna, ñani ì quëno maca ì ye'yacohua'i ja're çoni pa'icohua'ipi seña: ¿Iohua'i ñañena çoni ìque yo'oyere quëaë'ni, jaje?

¹¹ Cajëna, ìpi sehuouña. Sejëna, Jesupi caëña:

“Mësarute Maija'quëpi ta'ñe asaye isipi, yahuese'ere ma'tëmo tëtë ayere. Jaje pa'iquëta'are jaro tiro pa'icohua'ire cato iohua'ì ñaie ayepi çoni caquë quëaye pa'iji.

¹² Jaohua'ipi ñajëta'a ñaie pajajë caquë. Cui'ne asajëta'a ti jare çaji cuasama'cohua'ipi pa'ijajë caquë, cui'ne asani ponëma'pëna iohua'ì co'aye yo'ose'e saì de'huacaiye peojaquë caquë quëayë.”

Taquë Yo'oyeje Pa'ye Quëaye

(Mt 13.18-23; Lc 8.11-15)

¹³ Caëña, yequeje:

“¿Mésaru iye quëase'e asa tî'añe pañe? ¿Jaje pani me yeque cui'ne pa'ye quëato asa tî'aja'cohua'i a'ni?

¹⁴ Maija'quë coca quëaquë api, iti ca tañeje pa'i. Maija'quë coca'ë, iti ca.

¹⁵ Ma'ana iti tomeseleje pa'iohua'i pa'iyë, yecohua'i. Jaje pa'iohua'ipi Maija'quë coca asayë. Asarena, huatipi dani, peo hue'ña iohua'i asase'ere nejoñere quëaji.

¹⁶ Quëna yejana tase'eje pa'iohua'i a'ë, yecohua'i. Jaje pa'iohua'ipi ai yëjë asani sihuajë de'huayë, Maija'quë coca.

¹⁷ Jaje asasicohua'ita'a quëcoma'pë ai yo'oyepi pa'ina, panita'a de'o coca do'ire paipi sañope yo'ojëna, yo'o jujani jeoñere quëaji.

¹⁸ Yecohua'ipi miu pisi quë'rona tañena mëañeje pa'iohua'ipi de'o coca asayë.

¹⁹ Asasicohua'ita'a iye yeja co'amañare ai cuasajë jaiye co'amaña pa ëayepi cosoquëna, coa si'a co'amaña yë huesëni yo'ojë Maija'quë cocare nejoñe a'ë. Jaje yo'ocohua'i quëiñeje pa'ye de'oye pa'iyere ñno tî'añe peoji.

²⁰ Yecohua'ipi de'o coca asani ti de'huacohua'i pa'iyë. Jaohua'ipi jaiye quëiñeje pa'iohua'i pa'iyë, de'o yejaje pa'iohua'i. Yecohua'ipi treinta ca quëise'eje pa'iohua'i pa'iyë. Yecohua'ipi sesenta ca quëise'eje pa'iohua'i pa'iyë. Cui'ne yecohua'ipi cien ca quëise'eje pa'iohua'i pa'iyë.”

Toa Tsëo Pë Yo'oye Ayepi Ye'yaye

(Lc 8.16-18)

²¹ Caëna, cui'ne:

“¿Toa tsëo përe dani mahuë huë'ehuëna nëcocohua'i a'ni panita'a cai saihuë huë'ehuëna nëcocohua'i a'ni? Pani, toa tsëo pë cato si'a hue'ña miaja'coni tññare pana nëcoye pa'iji.

²² Yahuese'e pa'ise'epi si'aye tî'a ja'ñese'e a'ë cui'ne pai ñama'pë pa'ijajë cajë yo'ose'ere si'aohua'i, asase'e pa'ijajë'coa.

²³ Mésarupi cajoro hue'ecohua'i sête asa tî'ajë'ë.”

²⁴ Caëna, cui'ne:

“De'hua mësarua asase'ere yo'ojë'ë. Mésaru yecohua'ire cuëcueni isiyeje pa'ye mësaruteje Diusupi cuëcueni isija'quë api. Mésaruni jerepa isija'quë api, iti asacohua'ini.

²⁵ Jaje pa'ina, paquëni jerepa isiye pa'iji. Cui'ne peoquëni jerepa a'ri maña i payeque jioye pa'iji.”

Tase'e Mëañe Ayepi Quëaye

²⁶ Jesupi capi, cui'ne:

“Maija'quë cuañe te'te cato yejana iti çare tañena, jose'e mëañeje pa'ye a'ë.

²⁷ Jaje pa'ina, ta tējisi jeteyo'je sani iti tasiquë cajiji. Çani tējini na'iquëna, huëiji. Jaje cui'ne mu'seña cui'ne ñamije tēto saiji. Yo'ouquëna, tasi ca cato tsatani mëa huëoji. Jaje yo'ouquëna, iti tasiquë cato huesëquë pa'iji, io yo'oye.

²⁸ Yejase'e ai de'oye necaina, mëaji. Du'ru macarepa iti ñë macapi mëaji. Jeteyo'je iti tsa'ña neji. Jeteyo'je iti ca yureta'a neji, iti tsa'ñana timë ja'ñe.

²⁹ Iti ca ya'ji tējisi maca iti ca tēasi'i caquë etaquë api. Jaje yo'oyeje pa'ye a'ë, Maija'quë te'te aye.”

Mostaza Ca Ayepi Ye'yaye

(Mt 13.31-32; Lc 13.18-19)

³⁰ Yequeje caëña, Jesús:

“¿Iqueje pa'ye a'ni, Maija'quë te'te aye, panita'a iquena çoni caquë quëara'ye iohua'i asa ja'ñe?

³¹ Mostaza çare yejana tañeje pa'ye a'ë. Ja ca cato si'a soquë ca maña seña maca ai a'ri ca'ë.

³² Jaje pa'iquëta'are tascopi ai de'osico pani si'a soquë ñëa maña jerepa jaico ai de'ocoa. Jaje pa'ioipi jai soquë capëa pa'iona, pi'aje iona daijë pëa huajëje pa'icohua'i a'ë, ja'o huë'ehuëna.”

³³ Jaje Jesús ye'yapi, Maija'quë coca. Jaiye iohua'i ñañe ayepi caquë iohua'i a'jiñe asa tî'añeque quëapi.

³⁴ Iohua'i ñañe ayepi caquë si'anë quëaëña. Coa peoye quëaye paëña. Jaje pa'iquëta'are i ye'yacohua'ise'ere si'aye i quëase'ere jare cayë caquë nuñerepa quëaëña, te'ohua'ire.

Jesupi Tuture Cui'ne To'añere Cuañeñe

(Mt 8.23-27; Lc 8.22-25)

³⁵ Iti mu'se na'iquëna, ire ye'yecohua'ire caëña:

“Je tē'huina jeñu'u.”

³⁶ Caëna, ja maca Jesús yohuëre pa'ina, paire jeoni sateña, Jesús ja're. Saijëna, cui'ne yequë yohuëja'a çoni sateña.

- ³⁷ Saijëna, ai tutu huëouña. Jairapi ai to'acquë yohuëna ocopi tímëoña.
³⁸ Tímëquëna, Jesuta'a sëtípë quë'rore coa ui caquëña, i sïopë tëo pacona tëo paquë. Caina, jaohua'ïpi dani sëtoni careña:
 "Ye'yaquë, mai ne huesëyë."
³⁹ Cajëna, huëni tuture cuañëiña. Cui'ne jairare caëña.
 "Yo'oma'o pa'ijë'ë."
 Caquëna, tutupi jo'cua jëo nëquëña. Cui'ne jairajë tsiña de'huajë pa'io de'oña.
⁴⁰ Ja maca jaohua'ire caëña:
 "¿Me yo'ojë ca'raye'ni? ¿Maija'quëpi ñacajji, cuasa ma'ñe?"
⁴¹ Caquëna, ire ye'yecohua'ïpi ña quëquëni careña:
 "¿Iqueire papi, iquë ja jerepa tuture cui'ne jairate cuañëquë'ni, cui'ne sehuoco?"

5

Huati Quë'ire Gadara Aquëre Quëaye (Mt 8.28-34; Lc 8.26-39)

- ¹ Jaira je të'huina tï'areña, Gadara quë'rona.
² Yohuëpi Jesús ja'a tumaquëna, ju'isicohua'ire tã huë'ñapi te'i ëmë huati quë'ïpi sañope daquëña.
³ Huati quë'i cato, ju'icohua'ire tã huë'ñare pa'iquë paquëña, quëna meapi huëñu'u cajëta'a huëñe peoquëpi.
⁴ Jëña nëcañoa cõni jaiye huëtoje ïpi naë tëtë jëaëña. I jerepa tutu neñe peouña.
⁵ Ñami, mu'se ju'isicohua'ire tã huë'ñare ai cutihuëre pa'i cuiquë quëna pëapi co'ye hui yo'oquë paquëña.
⁶ So'opi Jesure ñani huë'huëni Jesús nëca macana tï'ani Jesús më'ëpi jerepa tutu paquë cani do're ja'ruña.
⁷⁻⁸ Do're ja'runa Jesupi caëña, huatire:
 "Iye ëmëre etajë'ë."
 Caquëna, ai tutu caquë sequëña:
 "Jesús, Diosu ti ëjaërepa mamaquë ai yo'oyete yë'ëre isima'ë pa'ijë'ë."
⁹ Seina, Jesupi jaëte caëña:
 "¿Ique mami a'ni?"
 Caquëna, sehuouña:
 "Yë'ë mami cato jai pai a'ë."
¹⁰ Cani Jesure ai sequëña:
 "Iye huatïohua'ire yequë huë'ñana jëjo saoma'ë, iñore pa'ijajë."
¹¹ Caquëna, ja'yere jai sесе dohuë cuti perepëre aijë pa'ijëna,
¹² Huatïohua'ïpi asani setëña:
 "Sese quë'rona jëjo saojë'ë. Yëquëre jaohua'ina cacañu'u."
¹³ Careña, de'oji saijë'ë caëna, etani sani sesena cacareña. Cacarena, si'a dos mil sесе huë'huëjë jai hua'que tët'tëpapi tømëjë jairana dutu juteña.
¹⁴ Jutena, sесere ñacaicohua'ïpi ñani huë'huëni pai daripëna si'aye quëareña, iti yo'ose'e. Quëarena, paipi asani dateña.
¹⁵ Jesús pa'i huë'ñana tï'ani ñajëna, huati quë'i pa'isiquëpi caña suñasiquëpi de'o cocare caquë ñuquëña. Ñu'ina, ite ñani si'aohua'i ca'rareña.
¹⁶ Ca'rajëna, sесе ñacaicohua'ïpi Jesús yo'ose'ere quëareña, huati quë'ire yo'ose'e cui'ne sesere yo'ose'e cõni.
¹⁷ Jaje quëajëna, asani Jesure saijë'ë, iño pa'ima'ë cajë, se huëoreña.
¹⁸ Carena, Jesupi yohuëna aya mëni sai huëoquëna, huati quë'i pa'isiquëpi ai sequëña, Jesure më'ë ja're cõni sani pasi'i caquë.
¹⁹ Caquëna, Jesupi pa'ni sehuouña:
 "Më'ë huë'ena saijë'ë. Sani më'ë cajeohua'ire quëajë'ë, më'ë ëjaëpi oi ñani necaise'ere."
²⁰ Caëna, saquëña. Sani si'a jëña daripëa quëa huëouña. Ire Jesús necaise'ere quëaquëna, asani ai de'oye yo'ose'e pa'iji, careña.

Ju'icopi Jairo Mamaco Jesús Ca'core Patoye (Mt 9.18-26; Lc 8.40-56)

- ²¹ Jesupi yohuëja'a cui'naëpi yequë tët'tena je'esi maca jai pai tsi'si dateña. Jaje yo'ojëna, jaira tët'tëpare pa'ina.
²² Ja maca pai tsi'si huë'ña cuañëquëpi Jesús pa'i huë'ñana Jairo huë'equëpi ite ñani do're ja'runi,
²³ caëña:
 "Yë'ë mamacopi juni huesëco. Sani më'ë jëtëpi pato co'yacaijë'ë."

²⁴ Seina, Jesupi i ja're çoni saquëña. Saina, jai pai cui'ne sateña. Jaje pa'ijë ite qui'i huesoreña.

²⁵ Jaje jai pai pa'i huë'ñare te'o nomio doce ometëca ju'ico pacoña. Si'anë tsie cajequëna, ai yo'oco pacoña.

²⁶ Iote si'a jujucuhua'i yo'o jujajëna, ai yo'oco pa'ico pacoña. Si'aye io paye juju do'ina sai saosico pacoña. Si'aye ja çñe paëña, iote. Coa ai jerepa ai yo'oco pacoña, co'yaye peoyerepa.

²⁷ Jaje pa'ioipi Jesús cayere cajëna, asani dani jeteyo'jeja'a i ju'i çana patoña.

²⁸ Coa i ju'i çana patoni co'yasico pa'ija'coa'ë, caco.

²⁹ Pato macarepa tsie cajeye jeouña. Ja maca asaña, tsoe io çapë co'yasico pa'ie.

³⁰ Jaje yo'osi maca Jesupi asaëña, i tutupi ju'icore jujuse'e. Jaje pa'ina, co'ye ponëni paire ñani caëña:

“¿Nepi yë'ë ju'i çana patore'ni?”

³¹ Caquëna, i ye'yacohua'ipi careña:

“Tsoe më'ëpi pai qui'iyerepa pa'ie ñaquëta'a, ¿nepi patore'ni sequë'ni?”

³² Jaje catoje Jesús cato si'a huë'ña ponëquë ñaëña, nepi patore'ni caquë.

³³ Ñaquëna, ti co'yasicopi asani ca'raco tsasico dani i nëca huë'ñana tñi io yo'ose'e nuñerepa quëaño.

³⁴ Quëacona, Jesús jaore caëña:

“Hua maca yë'ëre cuasase'epi ne co'yahuë. Señaco saijë'ë. Iye ju'iñe ti ne co'yahuë, më'ëre.”

³⁵ Ja caquëna, yecohua'ipi dateña, pai tsi'si huë'e cuañequë huë'epi. Dani Jairore careña:

“Më'ë mamaco tsoe ju'isico paco'ë. Ye'yaquëre jerepa josa cama'ë pa'ijë'ë.”

³⁶ Caquëna, Jesupi asasiquëta'a asa ma'ñeje pa'ipi tsi'si huë'e cuañequëre caëña:

“Ca'rama'pë pa'ijë'ë. Maija'quëpi necaiquë api cuasajë'ë.”

³⁷ Jesupi saina, Pedro çoni Jacobo çoni cui'ne Jacobo yo'jei Juan çoni sateña. Yecohua'i çoni saie ëseña.

³⁸ Tsi'si huë'e cuañequë huë'ena tñ'ani ai yo'oye ñaëña, paipi ai cuijë oijëna.

³⁹ Jaje oijëna, huë'e cacani jaohua'ire caëña:

“¿Me neni mësarü ai yo'ojë cajë cui'ne ai oiye'ni? I mamaco ju'ima'o paco'ë. Coa çaico.”

⁴⁰ Caquëna, jaohua'ipi ire soreña. Sojëna, Jesús si'aohua'ire hue'sena eto saouña. Coa pëca ja'quëpi cui'ne pëca ja'copi çoni ju'isico pa'i huë'ñana cacareña.

⁴¹ Cacani ju'isico jëtëna tseani iote caëña:

“Talita cumi.” Mai coca cato “tsihua'o huë'ijë'ë” caye a'ë.

⁴² Jaje ca macarepa doce ometëca pacopi tsihua'o huëni cucuña. Jaje cu'iona, ñani de'okuëre papi yo'oji cuasareña.

⁴³ Jaje jujusiquëta'a ai ëseña, yecohua'ire quëaye pajë'ë caquë. Tsihua'ore sani açore açojë'ë, caëña.

6

Jesús Pa'ie, Nazaret Daripëre

(Mt 13.53-58; Lc 4.16-30)

¹ Jaropi etani i quë'rona col'ña, ire ye'yecohua'i ja're çoni.

² Huajë mu'se tñ'asi maca pai tsi'si huë'ena ye'ya huëouña. Ye'yaquëna, i paipi ai de'oyerepa ye'yaquë'ni cuasareña. Jaje cuasajë careña:

“¿Jerona iquë jerepa si'aye ye'yai'ni? ¿Iquerepa ta'ñe ye'yaye a'ni, cui'ne nepi ite pai yo'o tñ'a ma'ñe yo'o ja'ñe isire'ni?”

³ Iquë cato mai ñaquë api, María mamaquë api, huë'ña de'huaquë api, Jacobo, José, Judas cui'ne Simón maja'yë api, cui'ne i yo'jeohua'ije mai ja're çoni pa'iyë, iñore.”

Jaje cajë i caye asaye coereña.

⁴ Jaje cajëna, Jesupi jaohua'ire caëña:

“Si'a huë'ña yecohua'i cato Maija'quëre quëacaiquëre yëcohua'i a'ë. Jaje pa'iquëta'are i yeja acohua'ipi cui'ne i cajeohua'ipi cui'ne i huë'e acohua'ipi coeyë.”

⁵ Jarona airepa pai yo'o tñ'a ma'ñe yo'oye paëña, paipi ite asaye coe do'ire. Jaje pa'ina, coa ju'icohua'i mañase'ere pato co'yaquë a'ri pai mañare jujuña.

⁶ Jaje pa'ina, nequë api cuasama'pëna, ñani me yo'ojë jaje pa'ie'ni cuasaëña. Ja jeteyo'je yeque huë'ñana sani cu'i ye'yarojaquëña.

Jesupi I Ye'yacohua'ire Jëjo Saoye

(Mt 10.5-15; Lc 9.1-6)

⁷ I ye'yacohua'ire doce pa'iohua'ire soini, huatire eto saoja'a tutu isini cayaohua'ise'ere jëjo saouña.

⁸ Jêjo saouquë cuañeña:

“Sama'pë pa'ijë'ë, ao tupë, curiquëje. Coa topë macase'e sajë'ë.

⁹ Cui'ne zapato cui'ne camisa sajë'ë, yeque suña ja'ñe sama'pë.”

¹⁰ Cui'ne caëña, jaohua'ire:

“Huë'ena cacasicohua'i pani iti macana pëajë'ë, ja daripë quëa tējini sai macaja'a.

¹¹ Cui'ne yequë hue'ñapi mësarute coecohua'i pa'ito, panita'a asaye coecohua'i pa'ito mësaru quëo ya'o tsa'cuse'ere ti'to tōni eta saijë'ë. Jaje yo'ojë iñoñe pa'iji, iohua'ire sañope yo'oye. Nuñerepa cayë, pai ñape yo'ose'e ña mu'se ti'aëna, jaohua'ire ai co'ayerepa sañe pa'iji, mësarute ësesicohua'ire. Sodoma cui'ne Gomorra yeja paire cato a'ri ja'ye sañe paji'i.”

¹² Jaje jêjo saosicohua'ipi huajëye pa'iyena ponëñe pa'iji cajë quëareña, paire.

¹³ Cui'ne huatiahua'ireje eto saoreña. Ju'icohua'ire hui'yapepi nejëna, co'yareña, jai pai.

Juan Oco Doquë Ju'iñe

(Mt 14.1-12; Lc 9.7-9)

¹⁴ Ja maca romano pai ëjaë Herodesje asaëña, si'a pai Jesús yo'oye asajëna. Jaje asani Herodespi caëña:

“Juan oco doquëpi huëji'i. Jaje pa'ina, tutu paquë yo'oji.”

¹⁵ Yecohua'ipi careña:

“Tsoe aquë Maija'quëre quëacaiquë Elíaspi.”

Cui'ne yecohua'ipi careña:

“Tsoe hue'ña Maija'quëre quëacaihua'i pa'ise'ejë pa'i api.”

¹⁶ Jare Herodespi asani caëña:

“Jaë cato Juanpi yë'ë cuañeina, sjoöpë têtō tēasiquë api. Jaëpi ju'isiquëpi huëni yo'oji.”

¹⁷ Herodes cato Juanre tseani quëna meapi huëni co'acohua'ire co hue'ñana co'aji'i, Herodías do'ire. Herodías cato yo'jei Felipe nêjo paco'ë. Jaje pa'ioni Herodespi yo'jei nêjore jioni i nêjore nepi.

¹⁸ Jaje yo'oquëna, Juanpi caëña, Herodesre:

“Më'ë yo'jei nêjoni jioni paye co'aji.”

¹⁹ Jaje caquëna, Herodíaspi Juanre ai coeco pacoña. Jaje pa'ina, huani jëosi'i cacota'a huani jëoñe ti'añe paña.

²⁰ Herodespi ite Juanre nuñerepa de'oquë api caquë ca'raëña. Jaje pa'ina, ipi huani jëoñe ësequëna, paña. I caye si'aye asama'quëta'a Herodes cato i caye yë asaquë paquëña.

²¹ Jaje pa'iquëta'are Herodías ti'aoña, io huani jëoñe oise'e. Herodespi ite coasi mu'se ti'aëna, pai ëjaohua'ire, soldado ëjaohua'ire, cui'ne Galilea ëjaohua'ire soini ao ai maca.

²² Herodías mamacopi cacani de'oyerepa pairacona, ñani ai sihuareña, si'ahua'i iti ñacohua'i. Jaje pa'ina, Herodes sihuaquë caëña, nomi tsjore:

“Më'ë yëyer sejë'ë. Isisi'i, më'ëre.”

²³ Cui'ne caëña, care payë. Coa caye pañë. Si'a co'amaña më'ë sese'e isiyë pa'iji. Yë'ë cuañeñe jopore paja'a isinije isiyë, caëña.

²⁴ Jaje caëna, asani sani pëca ja'core secoña:

“¿Iquere seja'coa'ni, ite?”

Cacona, iopi caña:

“Sejë'ë, Juan oco doquë sjoöpëre.”

²⁵ Jaje quëaona, asani pai ëjaë pa'i hue'ñana sani caña:

“Yurepi Juan oco doquë sjoöpëre quëna de'huana ayasiconi isijë'ë.”

²⁶ Jare pai ëjaëpi asani ai co'a juquëña. Jaje pa'iquëta'are tsoe ca huesosiquë sête pañë caye peoña, cui'ne i soisicohua'ije asasi do'ire.

²⁷ Ja do'ire jare iti macapi te'le soldadore jêjo saouña, Juan sjoöpë quërëjajaja'quëre.

²⁸ Caëna, soldadopï sani Juanre huani jëoni sjoöpë yëtō tēani quëna de'huana ayani dani isiña. Isina, Herodespi nomi tsjona isina, jaopi pëca ja'core isio.

²⁹ Ja yo'ose'ere asani Juanre ye'yecohua'ipi dani Juan capë maca sani ta jëoreña.

Cinco Mil Ëmëohua'ire Aoñe

(Mt 14.13-21; Lc 9.10-17; Jn 6.1-14)

³⁰ Ja jeteyo'je doce paire jêjo saosicohua'ipi co'ini tsi'sini Jesure quëareña, iohua'i yo'ose'ere, cui'ne iohua'i ye'yase'ere.

³¹ Quëajëna, Jesupi caëña, jaohua'ire:

“Daijë'ë. Sani pai peo hue'ñana pëa huajëñu'u.”

Ao aiñeque peoyerepa pai tsi'si ja'ñere asaquë capi.

³² Jaje caëna, saë'ë, yohuëja'a iohua'ise'e pai peo hue'ñana.

³³ Jaje saijëta'are jai pai ñareña, i saiyë. Jaje ñani Jesupi saiji cani huë'huëjë, i sai hue'ñana si'a daripëa pa'icohua'i sateña. Ja ti'ama'në du'ru ti'areña, paipi.

³⁴ Jaje yo'ojëna, Jesupi yohuëpi tumani pai mañare teaye oi ñaëña, yëi ñama ñacaiquëre peocohua'ije pa'iohua'i mañapi. Pa'ijë yo'ojëna, ñani jaiye iohua'ire ye'ya huëouña.

³⁵ Ai na'i huesëquëna, ñani i ye'yacohua'ipi ite careña:

“Tsoe na'iji, iño pai peo hue'ña'ë.”

³⁶ Jëjo saojë'ë, sani pai pa'i hue'ñana go maña hueroni aijajë. Iño cato peoyë, iohua'ire aone.”

³⁷ Cajëna, Jesupi sehuouña iohua'ire:

“Mësarupi aojë'ë.”

Caquëna, iohua'ipi careña:

“¿Jaje pa'ito yëquëpi sani veinte mil të'ña do'ire papi pan hueroni aone?”

³⁸ Cajëna, Jesupi caëna:

“¿Je so pan paye'ni, iño? Sani ñajë'ë.” Caquëna, careña:

“Pa'iji, cinco pan cui'ne caya tsiaya hua'i.”

³⁹ Cajëna, Jesupi cuañëña, paire. Jaje pa'ito si'aohua'i tayahuëna ja'rujë'ë, caëna.

⁴⁰ Caëna, cien paise'e cui'ne cincuenta pai de'o tsëcapëa ja'rureña.

⁴¹ Ja maca Jesupi cinco pan cui'ne caya tsiaya hua'ire ini ma'tëmona ñaquë de'o'ji caquë Maija'quëre pëpani, panre i ye'yacohua'ina isiña. Isiquëna, jaohua'ipi paire se isicateña.

⁴² Ja maca si'aohua'i ani sihuacohua'i pateña.

⁴³ Ani tējisi jeteyo'je ani jujase'ere tsi'soreña, doce do'rohuëa hua'ina cojë.

⁴⁴ Ja pan aısicohua'i cato cinco mil ëmëohua'i pateña.

Oco Da'ca Ëmëje'aja'a Cu'iyë

(Mt 14.22-27; Jn 6.16-21)

⁴⁵ Ja jeteyo'je Jesús i ye'yacohua'ire capi, du'ru saijë'ë, yohuëja'a Betsaidana. Yë'ëse'e paire saiyë caquë pëpa tējini sasi'i, caëna.

⁴⁶ Saiyë, caquë pëpa tējini ai cutihuëna Maija'quëre casi'i caquë saquëña.

⁴⁷ Ñami de'osi maca Jesús te'i yejare pa'ina, yohuë saısicohua'i cato jaira jopore pateña.

⁴⁸ Jaropi pa'i i ye'yacohua'i ai yo'ojë co'mejëna, ñaëña, tutupi sañope tutuquëna. Je'në ñata tóme maca Jesupi oco da'ca ëmëje'aja'a nëcaquë saquëña, i ye'yacohua'i quë'rona. Coa sa tëto sasi'quë saiyëje pa'ye saquëña.

⁴⁹ Oco da'ca ëmëje'aja'a nëcaquë saina, ñani huati pa'ima'co cuasajë quëquëni cuihuë.

⁵⁰ Si'aohua'i ñani quëquëni cuijëna, ipi capi, jaohua'ire:

“Ai yo'ojë cama'pë yë'ë a'ë. Ca'rama'pë pa'ijë'ë.”

⁵¹ Jaje cani iohua'i pa'i yohuëna aya mëina, tutupi jëouna, ja maca merepa jaje yo'oquë'ni cuasajë ñareña, i yo'ose'e.

⁵² A'ri maña pan pa'ise'ere jaiye neni paire aose'ere cuasaye pareña, iohua'i joyo jëa do'ire. Jaje pa'ina, ai cuasareña.

Genesaret Ju'icohua'ire Jujuyë

(Mt 14.34-36)

⁵³ Jëni tija'reña, Genesaret yejana. Jarona iohua'i yohuë sëa huahuoreña.

⁵⁴ Yohuëpi sa tumasi maca Jesu api cajë ñareña.

⁵⁵ Ñani ja maca si'a hue'ña cui'ijë ju'icohua'ire da huëoreña, cai saihuëre uijëna, Jesús quë'rona.

⁵⁶ A'ri dari mañana saina, pai daripëana saina, tsio huë'ñana saina, ju'icohua'ire i sai ma'añana oereña, jujucaijaquë cajë. Jesure ai setëña, më'ë ju'i cana patoni ju'icohua'i co'yajajë cajë. Si'aohua'i i ju'i ca patocohua'i co'yareña.

7

Paire Co'aye Neña

(Mt 15.1-20)

¹ Jesús quë'rona Fariseo pai cui'ne cuañese'e ye'yacohua'i tsio dateña, Jerusalémpi daisicohua'ipi.

² Jajë daisicohua'ipi ñajëna, Jesús ye'yacohua'ipi jëña tsoama'pë aë'ë. Jaje tsoama'cohua'ipi aijëna, ñani cue'cuehuë, si'si jëñapi aiñë cajë.

³ Jaohua'i cato ja yë'ta'a go aima'në jëña tsoajë'ë. Aipë case'ere yo'ocohua'i paë'ë.

⁴ Jaje pa'iohua'ipi go huero hue'ñapi co'ini ai jëña tsoacohua'i pateña. Cui'ne jaiye yeque yo'ocohua'i pateña, iohua'i aipë yo'oye, ucu duruhuëa tsoaye, quëna ne'ña tsoaye, caısi saihuë tsoaye, yo'ocohua'i pateña.

⁵ Jaje yo'ocohua'ipi fariseo pai cui'ne cuañese'e ye'yacohua'ipi setëña, Jesure ñeje:

“¿Me yo'ojë më'ë ye'yacohua'i jëña tsoajë'ë ja yë'ta'a aima'në case'e yo'oma'pë, si'si jëñapi aiñë'ni?”

⁶ Jaje cajëna, Jesupi capi, jaohua'ire:

“Nuñerepa jaje mësaru coa cacohua'i pa'ijëna, asaquë co'aji Maija'quëre quëcaiquë Isaiás ñeje caquë toyapi:

Icohua'i cato yë'ëre coa yë'opose'e oiyë cayë.

Jaje pa'iquëta'are iohua'i joñoapi yë'ëre oiyë pañë.

⁷ Iohua'i yë'ëre señë cajë yo'oye do'i peoye a'ë.

Coa paise'e cuañese'ere ye'yajë yo'o do'ire.

⁸ ¿Me yo'ojë mësaru Maija'quë cuañese'ere yo'oma'pë yequere coa pai cuañese'ere yo'oye'ni? ¿Ucu duruhuëare tsoaye, quëna ne'ña tsoayerer cui'ne jaiye jaje pa'ye yequeje yo'oye'ni?”

⁹ Caëña, Jesús yequeje:

“Mësaru aiohua'i case'ere yo'oñu'u cajë Maija'quë cuañese'ere tirona jeoni yo'oyë, mësaru.

¹⁰ Moisés cato capi: ‘Më'ë ja'core cui'ne më ja'quëre de'oye oi sañope cama'ë pa'ijë'ë. Pëca ja'core cui'ne pëca ja'quëre sañope co'aye caquëre cato huani jeoñë pa'iji.’

¹¹ Jaje case'e pa'iquëta'are mësaru caye pa'iji: ‘Ja'quëre cui'ne ja'core coçaiye pañë. Si'aye yë'ë paye Maija'quëna isihuë.’

¹² Jaje mësaru cani cayë, ja'core cui'ne ja'quëre coçaiye peoji, cajë.

¹³ Jaje mësaru yo'ojë Maija'quë cuañese'ere pare jeocoyë, pai case'ere yecohua'ina se ye'yajë. Jaje pa'ye yequeje jaiye yo'oyë, mësaru.”

¹⁴ Tijupë Jesús soini capi, paire:

“Asajë'ë, si'a pai. Coa tayo asama'pë de'huajë'ë.

¹⁵ Si'aye ëmëje'epi se cacaye cato paire co'aye ne ma'ñe a'ë. Sa'nahuë joyopi co'aye etaye a'ë, paire co'aye si'si neñe.

¹⁶ Cajoro pacohua'i sëte asajë'ë.”

¹⁷ Jaje casi jeteyo'je paire jeoni huë'ena Jesús cacasi maca i ye'yacohua'ipi ja case'ere quëajë'ë cajë seteña.

¹⁸ Sejëna, caëña:

“¿Jaje pa'ito mësaruje asa tija'ne pare? Mësarupi asahuë, si'aye ëmëje'epi cacase'e cato paire co'aye neñe peoji.

¹⁹ Ao cato joyona saiye paji. Coa ai ëtatu'una saise'epi jeteyo'je eta saiji.

²⁰ Cui'ne pai joyopi etaye a'ë, co'aye neñe.

²¹ Sa'nahuë joyore cayë jaropi etaji, si'aye co'aye cuasaye: yecohua'ini nomiohua'ire, ëmëre yo'oye, paire huani jeoñë,

²² co'amaña jmañë, yecohua'i co'amañare pa ëaye ñañë, si'aye co'ayere yëye, cosojë yo'oye co'ayena sëo meascohua'i pa'iyë, yecohua'i payere ëa ñajë pëiñë, yequëna co'a coca ca ma'ñere se quëaye, jerepa pa'i a'ë cuasaye, cui'ne yecohua'i pa'iyere cuasacaima'pë coa josa yo'orojaiñë.

²³ Si'aye iye joyo sa'nahuëpi etaji. Japi paire si'si neñe a'ë.”

Yequë Yeja Acopi Jesure Sehuoye

(Mt 15.21-28)

²⁴ Jaropi Jesús Tiro cui'ne Sidón yejana saji'i, huë'ena cacani paije huesëjajë yë'ëre caquë. Yo'oquëta'are catiye peopi.

²⁵ Ja do'ire tsoe Jesu api asaco, huati quë'io pëca ja'copi i quë'rona dani do're ja'runi seco'ë, huatire eto saocaijë'ë, yë'ë mamacore pa'icore.

²⁶ Jao cato Sirofenicia paio paco'ë, yequë yeja aco.

²⁷ Jaje cacona, Jesupi capi, iote:

“Mamajëpi du'ru aijajë, co'aji, mamajë aiñere sioni jo'ya yaina isiye.”

²⁸ Caquëna, iopi sehuoña:

“Jaje pa'ijë'ë, Ejaë. Jaje pa'iquëta'are jo'ya yaije aicohua'i a'ë, mamajë aijë ne to ne'ña mañaje.”

²⁹ Cacona, Jesupi caëña:

“De'oyerepa më'ë cayë, tsoe më'ë mamacore huati eta saji'i, señaço saijë'ë, de'oji.”

³⁰ Caëna, huë'e tija'ni ñacona, cai saihuë uicopi mamaco tsoe huatire peocopi de'oye pacoña.

Jesupi Asama'quëre Jujuye

³¹ Jesús Tiro yejapi etani Sidón yeja sa tëto sani cui'ne Decápolis daripëaje tëto sani Galilea jaira tija'ëña.

³² Jarote pa'ina, asama'quëpi cui'ne hua'hua coca caquëni dareña. Dani pato co'yacaijë'ë, cajë seteña.

³³ Sejëna, Jesupi pai peo te'tena sani moñopi cajorona saquëña. Sa'i copi i moñona tse'seni tsemeñoje papiña.

³⁴ Papiquë ma'tëmona ñaquë ai yë'eni caëña:

“¡Efata!” Jaje cani capi, Hui'yojè'è.

³⁵ Jà maca tsoe cajoro hui'yopi. Jà maca de'oye coca caquè paquèña.

³⁶ Jaje yo'oni capi, jaohua'ire, yecohua'ire quèama'pè. Jaje caèna, coa jerepa quèareña.

³⁷ Quèarena, de'oyerepa yo'oquè'ni cuasajè careña:

“Si'aye de'oye yo'oji. Yo'oquèna, asama'cohua'ije asacohua'i de'oyè, cama'cohua'ije cayè.”

8

Jesupi Cuatro Mil Paire Aõe

(Mt 15.32-39)

¹ Jare ja mu'se jai pai tsi'sireña, tsi'sisicohua'ipi aõe peoreña. Peojèna, Jesupi i ye'yacohua'ire soini caèna:

² “Teaye pai mañare ñañè, yè'è ja're tsoe tres mu'seña aõe peocohua'ipi pa'ijèna.

³ Jaje aima'cohua'ini jèjo saquè pa'ito jopo ma'ana dahuèra ju'ija'cohua'i pa'ini, yecohua'ipi so'opi daisicohua'ipi pa'iyè.”

⁴ Caquèna, i ye'yacohua'ipi careña:

“¿Me iño cato hueroni aõe'ni, paije peo hue'ña?”

⁵ Cajèna, Jesupi sequèña:

“¿Je so pan paye'ni, mèsaru?”

Seina, careña:

“Siete pan payè.”

⁶ Cajèna, asani paire cuañeña, tayahuèna ja'rujè'è caquè. Jà maca siete pan ini Maija'quère de'oji caquè pèpani. Jà jeteyo'je i ye'yacohua'ina huahueni isipi. Isina, jaohua'ipi paire se aohuè.

⁷ Tsiaya hua'ireje pahuè. Pajèna, Jesupi cui'ne jaohua'ireje yo'oni huahueni i ye'yacohua'ina isina, se aohuè.

⁸ Si'a pai ani sihuacohua'i paè'è, siete do'rohuèa nèapi, ani jujase'e.

⁹ Jà aisicohua'i cato cuatro mil paè'è. Jà maca Jesupi iohua'ire saiyè cani

¹⁰ saji'i, i ye'yacohua'i ja're conì yohuèja'a Dalmanuta yejana.

Pai Yo'o Tì'a Ma'ñere Yo'ojè'è Cajè Señere

(Mt 16.1-4; Lc 12.54-56)

¹¹ Fariseo paipi dani Jesure sañope careña. Ite neñañu'u cajè seteña, pai yo'o tì'a ma'ñere ma'tèmo ayere ne iñojè'è cajè.

¹² Sejèna, ai èja yè'eni caèna:

“¿Me neñu'ju iye pai jaje seña'ni pai yo'o tì'a ma'ñere yo'o iñojè'è cajè? Care payè, mèsarute iñojeje peoji, te'oreje.”

¹³ Jaje cani jeoni, cui'naèpi yohuèna aya mèni jaira je te'tena saquèña.

Fariseo Pai Co'ayere Neña

(Mt 16.5-12)

¹⁴ Pan huànyeni saè'è, ai ja'ñe peocohua'i, coa te'e panpè maca sahuè. Jaose'e yohuè paquèña.

¹⁵ Pa'ina, Jesupi iohua'ire cuañeña. De'hua ñajè'è, fariseo pai o'sa cui'ne Herodes pai o'sana co'me huesèye caquè.

¹⁶ Jaje caquèna, i ye'yacohua'ipi sa'ñe careña: pan peocohua'i datena caji.

¹⁷ Jaje cajèna, Jesupi asani caèna, jaohua'ire:

“¿Me yo'ojè pan peoyè, caye'ni? ¿Ja yè'ta'a huesèje jaje caye? ¿Ai jèa joyore hue'eye, mèsaru?”

¹⁸ ¿Cui'ne ti ñama'pè pa'iyè, cui'ne asama'pè pa'iyè, mèsaru cajoropi? ¿Yè'è ja'rè jaiye pan nese'e cuasaye pañe?

¹⁹ Mèsarupi ñasicohua'ita'a cinco panpi cinco mil paire aose'e: ¿aøjèna, cui'ne je ja'ye nèaè'ni?”

Caquèna, iohua'ipi sehuoreña:

“Doce do'rohuèa nèapi.”

²⁰ “¿Cui'ne cuatro mil paire siete pan pa'ise'epi aoto je ja'ye nèaè'ni?”

Caquèna, iohua'ipi careña:

“Siete do'rohuèa nèapi.”

²¹ Jaje cajèna, ipi caèna:

“¿Ja yè'ta'a jaje ñasicohua'ita'a cui'ne huesècohua'i pa'ijè jaje cuasaye'ni?”

Jesupi Ñama'quère Jujuye

²² Ja jeteyo'je Betsaidana t̄i'areña. T̄i'asi maca Jesús què'rona dareña, ñama'quëni jujucaij'è cajè.

²³ Jaje cajëna, asani ñama'quë jëtëna tseani cajiquë pai daripëpi hue'sena etouña. Copi ñaco çana neni ina patoquë, sequëña, ¡De'hue ña çuañoquë!

²⁴ Caquëna, ñama'quëpi caëña:

“Ñañë, paire. Ñaquëta'are soquë ñëaje pa'yepi cu'iji.”

²⁵ Jaje caquëna, Jesupi t̄ijupë ñaco çana patoquëna, yureta'a de'oyerepa ñaquë ponëni co'yasiquë paquëña.

²⁶ Ja maca Jesús huë'ena ite jëjo saokuë caëña:

“Pai daripë cacama'ë cui'ne yecohua'ireje quëama'ë pa'ij'è.”

Pedropi Jesús Ayere Caye

(Mt 16.13-20; Lc 9.18-21)

²⁷ Ja jeteyo'je Jesús cui'ne ¡ ye'yacohua'i çoni Cesarea cui'ne Filipino yeja pai a'ri darina sateña. Saijëna, ma'ana Jesupi sequëña, ¡ ye'yacohua'ire:

“¿Iqueipi yè'ëre caye'ni, pai?”

²⁸ Caquëna, ¡ohua'ipi careña:
“Yecohua'ipi mè'ëre cayë, Juan oco doquë api. Yecohua'ipi cayë, Elíaspi. Cui'ne yecohua'ipi Maija'quë jëjo daoquë api cayë.”

²⁹ Ja maca ¡pi sequëña, ¡ohua'ire: “¿Mësaruta'a ¡queipi caye'ni, yè'ëre?”

Caquëna, Pedropi caëña:

“Më'ë cato huasoquë Cristore pa'ë.”

³⁰ Jaje caëna, Jesupi caëña, ¡ohua'ire:

“Yecohua'ire quëama'pë pa'ij'è.”

Jesupi ¡Ju'ĩnere Quëaye

(Mt 16.21-28; Lc 9.22-27)

³¹ Ja maca ye'ya huëoni ye'yaquë caëña. Pai Mamaquë yè'ë ai yo'oye pa'iji. Aiohua'ipi yè'ëre coeja'cohua'i a'ë. Pai ëjaohua'ije coeja'cohua'i a'ë. Cui'ne çuañese'e ye'yacohua'ije yè'ëre coeja'cohua'i a'ë. Jaje coejë yè'ëre huani jëoja'cohua'i a'ë. Jaje huani jëosicohua'ita'are toaso mu'seña pa'i maca huëjja'quë a'ë.

³² Iye t̄iñarepa quëaëña. Quëaquëna, Pedro ite t̄irona sani caëña. Jaje yo'oto co'aji. Iye cama'ë pa'ij'è, ca huëoëña.

³³ Jaje caquëna, Jesús co'ye ponëni ¡ ye'yacohua'ire ñaëña. Ñani Pedrore tutu caëña:

“Huati ëjaë saij'è. Iño pa'ima'ë. Më'ë cato Diusu cuasayeje cuasama'quë a'ë. Coa pai cuasayere cuasaquë a'ë.”

³⁴ Ja maca Jesús ¡ ye'yacohua'ire cui'ne paire soini caëña:

“Yè'ëni tuñ'u cani co'ye de'oye pa'iyere huanëyeyè'ë. Jaje yo'oni mè'ëre queja'core hue'oni tuij'è, yè'ëre.

³⁵ Jaje pa'ina, ¡ pa'iyë jëasi'¡ caquë yo'okuëpi coa ne huesoja'quë api. Jaje pa'iquëta'are yè'ë do'ire cui'ne yè'ë coca do'ire ¡ pa'iyë nejosisquëpi pa'iyë t̄i'aja'quë api.

³⁶ ¿Jaje pa'ina, ¡quere çocaiquë'ni, paipi si'aye iye yeja co'amaña t̄i'asicohua'ipi ¡ohua'¡ joyore coa nejoto?

³⁷ Joyore nejosisquë pani yecore t̄i'añe peoji.

³⁸ Yè'ëni cui'ne yè'ë cocare huajëya'ye quëama'quëpi cajë paini ca'rajë pasicohua'ire, yè'ë Pai Mamaquëpi cui'ne huajëya'ye quëama'quëpi caquë coeja'quë a'ë, yè'ë ja'quë de'o tuture papi cui'ne ¡ huññaohua'¡ ja're dai maca.”

9

¹ Cui'ne Jesús ca'quëña:

“Nuñerepa cayë, mësarute. Mësaruta'¡ iye maca pa'icohua'¡ ¡ju'ima'pë pa'ija'cohua'¡ a'ë, ma'tëmo t̄e'te ñama'pë pani.”

Jesús T̄iñe Pa'¡ Ponëse'e

(Mt 17.1-13; Lc 9.28-36)

² Seis mu'seña t̄ëto saisi maca Jesupi Pedrore, Jacobore cui'ne Juanre sai saëña, ai cutihuëna. Jarona ¡ ju'¡ ca cui'ne ¡ tsia t̄iñe pa'¡ ponëña.

³ Miacorepa iye yeja çaña joja t̄i'añe peoji, jare coa sësë pë, poja'iyeyë poja'ico ponëña, ¡ ju'¡ ca ye'hue pa'iorepa.

⁴ Ja maca ñareña, Elíasre cui'ne Moisésre Jesús ja're nëcajë cocare cajëna.

⁵ Ja maca Pedropi Jesure caëña:

“Ye'yaquë, ¿de'oyerepa iño pa'iyë'ni, mai? Toaso a'ri huë'ña neñu'u. Më'ë huë'e, Moisés huë'e, cui'ne Elías huë'e neñu'u.”

⁶ Jaje Pedro cani ti cuasama'ë capi, tsoe quëquë huesë sitopi. Si'ahua'i i ye'yacohua'i cato quëquë huesësicohua'i pateña.

⁷ Ja maca ma'tëmopi sirio jöhua'i quë'rona nëca mequëna, asajëna, yë'ose'e pisiña:
"Iquë cato yë'ë mamaquë api. Ini ai sihuaquë pa'iyë. I cayere asajë'ë."

⁸ Ja jeteyo'je coa Jesuse'e te'i paquëña.

⁹ Ai cutihuepi cajequë Jesús i ye'yacohua'ire caëña, yecohua'ire mësarü ñase'e quëama'pë, yë'ë ju'isiquëpi huëisi maca quëajë'ë, caëña.

¹⁰ Jaje caëna, jöhua'ise'e yahue de'huase'ere pareña. Jaje pajë coa sa'ñe setëña, iquere caë'ni, ju'isiquëpi huëisi maca quëajë'ë caquë.

¹¹ Jaje pa'ina, Jesure setëña:

"¿Me yo'ojë cuñese'e ye'yacohua'i Elíaspi du'ru daiye pa'iji, caye'ni?"

¹² Cajëna, iipi sehuouña:

"Nuñerepa du'ru daija'quë api. Dani si'aye ne de'huaja'quë api. Cui'ne ¿me caquë'ni, toyase'e yë'ë Pai Mamaquë aye? Ai yo'oja'quë api. Cui'ne pajje ite coeja'cohua'i a'ë, caji.

¹³ Jaje pa'iquëta'are yë'ë cayë tsoe Elías daji'i. Ini pai jöhua'i yëyeje yo'ohuë, toyase'e cayeje pa'ye."

Huatire Jesús Etose'e

(Mt 17.14-21; Lc 9.37-43)

¹⁴ Jeteyo'je co'ireña, i ye'yacohua'i pa'i huë'ñana. Dani jai pai pa'ijëna, ñareña. Ñajëna, cui'ne i ye'yacohua'i ja're conï sañope cajë pateña, cuñese'e ye'yacohua'i'ipi.

¹⁵ Jaje cacohua'ipi Jesure ñani se jeoni huë'huëni pëpareña, de'oquëre pa'ni cuasajë.

¹⁶ Ja maca Jesupi jöhua'ire sequëña:

"¿Iquere sa'ñe yo'ojë care'ni, jöhua'i ja're?"

¹⁷ Seina, jöhua'i ja're pa'isiquëpi sehuouña:

"Ye'yaquë yë'ëpi dahuë, huati quë'ini, yë'ë mamaquëre cama'quëni më'ëni ña cuñosi'i caquë.

¹⁸ Huatipi ite de'oye pa'ina, ne taoquë yo'oji. Yo'oquëna, siri yë'opojä'a mëaquë cui'ne cuji qu'i'coquë yo'oji. Jaje yo'oquë tutu peoquë de'o huesëji. Më'ë ye'yacohua'ire eto saocaijë'ë, caquë seni jujahuë, ne tja'ñe peojëna."

¹⁹ Caquëna, Jesupi caëña:

"¿Maija'quëpi necaiquë api cuasama'cohua'i! ¿Mësarü ja're yë'ë tsoe aguëpi pa'iyë? ¿Je ja'ye tsoerepa mësarute quëcoquë coçai pa'ija'quë a'ni, jaje huesëto? Dajë'ë, tsihua'ëre." 2

²⁰ Caëna, darena, huatipi Jesure ñani, hue'hue dahuë nequëna, sa tani tearojani siri yë'opojä'a etoquë yo'ouña.

²¹ Jaje yo'oquëna, ñani Jesús caëña, pëca ja'quëre:

"¿Je ja'ye tsoe jaje yo'oquë pa'iquë'ni?"

Caquëna, pëca ja'quëpi caëña:

"Tsihua'ë pa'inë aguë api.

²² Yequere toana, tsiayana huani jeosi'i, caquë yo'oquë api, jaiye. Jaje pa'ina, më'ëpi yëquëre oi coçaijë'ë, de'hue."

²³ Caquëna, Jesupi caëña:

"Më'ëpi neñe pa'iji, cuasaquë pa'ito neñe pa'iji, si'aye."

²⁴ Caquëna, tsihua'ë pëca ja'quëpi cuiña:

"Neñe pa'iji, cuasayë. Coçaijë'ë, ai jerepa jaje cuasa ja'ñere."

²⁵ Ai jerepa jai pai tsi'si daijëna, ñani huatire caëña:

"Huati asama'quë cui'ne cama'quë, yë'ëpi më'ëre cayë, etajë'ë. Iquë tsihua'ëre jeoni sani cui'naëni cacaye pajë'ë."

²⁶ Caquëna, huatipi cuini yeque hue'hue dahuë se ne coña. Neni ju'ise'eje pa'ire jeoni saquëña. Jare ñani yecohua'i ju'isiquë pa'iji, careña.

²⁷ Jaje cajëna, Jesupi ite jëtëna tseani naë huëo nëcouña.

²⁸ Ja maca Jesús huë'ena cacaëna, i ye'yacohua'ipi setëña:

"¿Me yo'ojë yëquë huatire eto saoye pare'ni?"

²⁹ Cajëna, Jesupi caëña:

"Ñeje pa'i huatire cato coa aima'pë cui'ne Maija'quëre señepi eto saoye pa'iji."

Tijupë Jesús Capi, I Ju'ine Ayere

(Mt 17.22-23; Lc 9.43-45)

³⁰ Jaropi saijë Galileaja'a tëto sateña. Pajje huesëjëna, sasi'i cuasaëña, Jesús.

³¹ Ja mu'se cato Jesús i ye'yacohua'ini quëaquë cuquëña. Yë'ë Pai Mamaquë cato tseja cuañisiquë pa'ija'quë a'ë. Jöhua'ipi huani jeoja'cohua'i a'ë caëña. Cui'ne caëña, toaso mu'seña pa'i maca ju'isiquëpi huëija'quë a'ë.

³² Jaje quëaquëna, i ye'yacohua'i asa tja'ñe pareña. Pajëta'a seni asaye pareña, ca'rajë.

*Nepi Jerepa Do'i Pa'iquë**(Mt 18.1-5; Lc 9.46-48)*³³ Capernaum daripëna t̃i'ani huë'ere pa'i maca Jesupi sequëña:

“¿Iquere mësarü ma'a daini sa'ñe yo'ojë care'ni?”

³⁴ Caquëna, sehuoma'pë pateña. Nepi jerepa pa'i pa'ija'quë a'ni, cajë sa'ñe yo'ojë casicohua'ipi ma'a dai maca.³⁵ Pajëna, ja'runi ñu'i doce i ye'yacohua'ire caëña:

“Si'aohua'ire tëto saisiquë pasi'i, cani si'aye yecohua'ire necaiquë jo'yaë pa'iyë pa'iji.”

³⁶ Jaje ca tējini tsihua'ëre jopore pana nëconi, su'cuani caëña, jaohua'ire:³⁷ “Yë'ëjë pa'ire cuasajë tsihuaëre de'oye yo'ocaini yë'ëni yo'oye pa'iji. Yë'ëre de'oye yo'oque cato yë'ëse'ere de'oye yo'oye peoji, cui'ne yë'ëre jëjo daosiquërejë de'oye yo'ocaiye pa'iji.”*Maire Sañope Yo'oma'quë Pani Maire Coçaiquë Api**(Mt 10.42; Lc 9.49-50)*³⁸ Ja maca Juanpi caëña:

“Ye'yaquë, yëquë ñahuë, më'ë mamipi caquë huatire eto saoque're. Ñani yo'oma'ë cajë ësehuë, mai ja're cōni cu'ima'quëpi yo'oque'na.”

³⁹ Caquëna, Jesupi caëña:

“Ësema'pë pa'ijë'ë, yë'ë mamipi cajë pai yo'o t̃i'a ma'ñe yo'ocohua'ire. Jaohua'i cato yë'ëre sañope cama'cohua'i a'ë.

⁴⁰ Maire sañope yo'oma'quë cato mai te'tere pa'iji.⁴¹ Mësaruni yecohua'ipi yë'ë do'ipi cajë oco mañare ocuacohua'i pani de'huacaisi co'amaña paja'cohua'i a'ë, mësarü Cristo cohua'ini de'oye yo'osi do'ire.*Co'aye Yo'oyena Taiñe**(Mt 18.6-9; Lc 17.1-2)*⁴² Tayo yo'oyena ne taoquëre cato, quëna pëpi ñaje tęcana sëani jai tsiayana jëo dëo'ñe pa'i api, a'ricohua'ipi yë'ëre cuasacohua'ire co'a de'huaquëre.⁴³ Jaje pa'ina, cayë më'ë jëtëpi tayo yo'oyena saco pa'ito tëto tējajë'ë. Ai jerepa de'oji, pa'i hue'ñana peo tupëpi cacato toa yejana saiye peoye,⁴⁴ pecoje ju'ima'tona cui'ne toaje yayama'tona.⁴⁵ Më'ë nëcayopi tayo yo'oyena saco pa'ito tëto tējajë'ë. Ai jerepa de'oji, pa'i hue'ñana peo tupëpi cacato. Ai jerepa co'aji, caya nëcañoa hue'equëpi toa yejana saito.⁴⁶ Jaro pecoje ju'ima'tona cui'ne toaje yayama'tona.⁴⁷ Panita'a më'ë ñacoapi tayo yo'oyena saco pa'ito dutani jëocojë'ë. Ai jerepa de'oji, Diusu cuañe te'tena te'ë ñacoa hue'equëpi cacato. Ai jerepa co'aji, caya ñacoa hue'equëpi toa yejana saito.⁴⁸ Jaro pecoje ju'ima'tona cui'ne toaje yayama'tona.⁴⁹ Si'ahua'i toapi ne de'huasicohua'i pa'ija'cohua'i a'ë, cui'ne si'aye Maija'quë coa isiyë cato asipi, ne de'huase'e pasipi.⁵⁰ Asipi jo sënëre carajaisico pani co'aji, hua'i saraye. Jaje pa'ina, cayë: Mësarü sai ja'ñere ne huesoma'pë pa'ijë'ë, pai ja're sañope yo'oma'pë jo'cua de'oye pa'ijë'ë.”**10***Jesús Ye'yase'e Nomiore Jëocoye Ayere**(Mt 19.1-12; Lc 16.18)*¹ Ye'ya tējini Capernaum sani Jordán ña oca te'tena saquëña, Judea yejana. Jaronä jai pai tsi'sireña, i pa'i hue'ñana. Tsi'sirena, ye'yaëña, i ye'yaye sëte.² Fariseo paipi neñañu'u cajë setëña, ñeje:

“¿Nëjore jëoñe deoquë?”

³ Cajëna, ïpi sehuoña:

“¿Moisés me cuañe'ni, mësarute?”

⁴ Caquëna, careña:

“Moiséspi cuañëpi pai ëjaëpi nëjore jëoco toya ja'o necaquëna, jëocoye pa'iji.”

⁵ Cajëna, Jesupi caëña:

“Ja cato Moisés cuañëpi mësarü joyopi de'oye cuasama' do'ire.

⁶ Ja'a Maija'quë si'aye yeja pa'iyë de'hua maca ëmëre cui'ne nomiore de'huapi.⁷ Ja do'ire huejani pëca ja'quëre cui'ne pëca ja'core jëoni nëjona tsioni pa'iyë pa'iji.⁸ Ja maca caya hua'i pa'iyë pañë. Coa te'ijë pa'iohua'i pa'iyë.⁹ Ja do'ire nëjore jëoñe co'aji, Maija'quë de'oye ñacai tsiose'ere.”¹⁰ Huë'ëna co'isi maca i ye'yacohua'ipi Jesure cui'nare sëni çoreña, nuñerepa asañu'u cajë.

¹¹ Cajëna, Jesupi caëña:

“Nëjore jëoconi yecore huejaquë pani yeconì nomiore yo'oji, co'aye nëjore paquëta'a.

¹² Nomiopi ëjëre jëocoscìopi yequëre huejaco pani ëmëre yo'oco, ëjëre pacota'a, jaoje co'aye yo'oco.”

Jesús Tsìre De'oyerepa Cacaìye

(Mt 19.13-15; Lc 18.15-17)

¹³ Jesús quë'rona tsìre dareña, ìpi papicaija'quë cajë. Jaje yo'ojëna, ì ye'yacohua'ìpi tsìre dacohua'ìre dama'pë Jesús quë'ro cajë ëserëña.

¹⁴ Jaje ësejëna, Jesupi ñani pëi caëña, jaohua'ìre:

“Coa ñajë'ë, tsìre johua'ìse'e daijajë, ësema'pë. Ma'tëmo cato jaohua'ìje pa'ìohua'ì tsecoa.

¹⁵ Nuñerepa cayë, mësarute. Maija'quë cuañë te'te cacaye peoji, tsìje pa'ìohua'ì pa'ìye pani.”

¹⁶ Cani tsìre su'cuani sìopëna jëñapi patoquë de'oye pa'ìjë'ë, cacaquëña.

Posëpi Jaiye Co'amaña Paquëpi Jesure Case'e

(Mt 19.16-30; Lc 18.18-30)

¹⁷ Jaje yo'o tëjini Jesús saina, te'ì huë'huë tome dani do're ja'runi caëña:

“De'o ye'yaquë, çme neja'quë a'ni, ti pa'iyere tì'asi'ì canì?”

¹⁸ Caquëna, Jesupi caëña:

“ÇMe yo'oquë yë'ëre de'oquë caquë'ni? Peoji, de'oquë. Coa Maija'quëse'e de'oquë pa'ìji.

¹⁹ Maija'quë cuañëse'e më'ëpi asayë, paire huani jëoma'ë pa'ìjë'ë. Yequë paconi yo'oma'ë pa'ìjë'ë. Co'amaña ñama'ë pa'ìjë'ë. Cosoma'ë pa'ìjë'ë, yecohua'ìre. Më'ë ja'quëre cui'ne më'ë ja'core de'oye oi necaijë'ë, co'aye cama'ë.”

²⁰ Caquëna, Jesure ìpi caëña:

“Ye'yaquë, yë'ë cato tsìhua'ë pa'inëna, iye cuañëse'e asani si'a mu'seña de'oye sehuohuë.”

²¹ Caquëna, Jesupi ìte oi ñani caëña:

“Ja yë'ta'a te'o carapi. Sani si'aye më'ë co'amaña isìjë'ë. Isini ja' curire peocohua'ina coa isìjë'ë. Jaje yo'oni ma'tëmona jaiye paja'quë, isì tëjini daijë'ë, yë'ë ja're conì.”

²² Jaje caquëna, posëpi oi saquëña, jaiye co'amaña paquë sëte.

²³ Saquëna, Jesús ñani ìte ye'yacohua'ìre caëña:

“Jaiye co'amaña pacohua'ìre ma'tëmo ma'a cacaye ai jëaji.”

²⁴ Caquëna, ìte ye'yacohua'ìpi ai cuasareña. Cuasajëna, Jesupi ca coña:

“Huaa dohuë, curiquëpi si'aye tì'añë cuasacohua'ì ma'tëmo ma'a cacaye peoji.

²⁵ Tì'añë paji, camellore miu ñaca cojeja'a jua etojaiñë. Jaje pa'ina, jaiye co'amaña paquëre cato ai jerepa jëaji.”

²⁶ Jaje caquëna, asani ai cuasa co'me huesësicohua'ì pa'ìjë seteña:

“Jaje pa'to çnepi huaso cuañësicohua'ì pa'ìja'cohua'ì a'ni?”

²⁷ Sejëna, Jesupi jaohua'ìre ñani caëña:

“Pai cato ne tì'añë peoji. Jaje pa'iquëta'are Maija'quë cato ne tì'añë pa'ìji. Maija'quëre cato si'aye ne tì'añëse'e pa'ìji.”

²⁸ Caquëna, Pedropi caëña:

“Ëjaë, yëquë co'amaña si'aye jëoni më'ëre tuë'ë.”

²⁹ Cajëna, Jesupi caëña:

“Nuñerepa cayë, mësarute. Huë'ere, a'yëohua'ìre, yo'jeohua'ìre, ja'quëre, ja'core, nëjore, mamajëre, yejaña yë'ë do'ire cui'ne huaso coca do'ire jëosicohua'ì pani,

³⁰ iye yejana cien jerepa paja'cohua'ì, huë'e, a'yëohua'ìre, yo'jeohua'ìre, ja'core, mamajëre, yejaña paja'cohua'ì a'ë, cui'ne yecohua'ìpi josa yo'oye cui'ne ma'tëmona ti pa'iyere tì'aja'cohua'ì a'ë.

³¹ Jaje pa'iquëta'are yure jerepa pa'ìohua'ì pa'ìsicohua'ìpi jeteyo'jere, pa'ìja'cohua'ì a'ë, cui'ne yure jeteyo'jere pa'ìsicohua'ìpi jerepa pa'ìohua'ì pa'ìja'cohua'ì a'ë.”

Jesupi I Ju'ì Ja'ñere Quë'aye

(Mt 20.17-19; Lc 18.31-34)

³² Jesupi du'ru saina, ì ye'yacohua'ìpi jeteyo'je saë'ë, Jerusalëna tumaquëna. Saijëta'a merepa yo'oye pa'ìja'coa'ni cuasajë quëquë huesësicohua'ìpi saë'ë. Saijëna, ja' maca Jesupi johua'ìse'ere soini ìte yo'o ja'ñere,

³³ ñeje caëña:

“Ñañë, mai Jerusalëna saiye. Jaroni Pai Mamaquëre Maija'quë huë'e ñacaicohua'ì ëjaohua'ina cui'ne cuañëse'e ye'yacohua'ina tseani isìja'cohua'ì a'ë. Isìrena, jaohua'ìpi yequë paina se isìja'cohua'ì a'ë, huani jëoja'quëre.

³⁴ Isìrena, jaohua'ìpi yë'ëre cue'cuejë copi tse'seja'cohua'ì a'ë. Jeteyo'je yë'ëre huani jëoja'cohua'ì a'ë. Huani jëorena, toaso mu'seña tasiquëpi huajëquë huë'ija'quë a'ë, yë'ë.”

*Jacobo Cui'ne Juan Sese'e**(Mt 20.20-28)*

³⁵ Ja maca Zebedeo mamajepi Jacobo cui'ne Juan Jesús quëno macana dani seteña:
 “Ye'yaquë, yëquëre necaijê'ë.”

³⁶ Cajëna caëña:

“¿Iquere necaiye'ni?”

³⁷ Caquëna, jaohua'ipi careña:

“Më'ë cuañe t'e'te de'o hue'ñare pana ëjaërepa de'oni ja'ru maca yëquëre më'ë ëja t'e'tena te'ire cui'ne më'ë ari t'e'tena te'ire ñojê'ë.”

³⁸ Sejëna, Jesupi caëña:

“Mësaru huesëjê coa señë. ¿De'hue mësaru yë'ë sëje çono ucu t'i'añe panita'a de'hue mësaru yë'ë do cuañoñeje pa'ye pa'ito tëto sani t'i'añe? Yë'ë cato ai yo'oja'quë a'ë.”

³⁹ Caquëna, sehuoreña, ite:

“Yëquëje yo'o t'i'aja'cohua'i a'ë.”

Cajëna, Jesús jaohua'ire caëña:

“Jaje pa'ire paji. Yë'ë ai yo'ose'ëje mësaruje ai yo'oja'cohua'i a'ë. Cui'ne yë'ë do cuañoñeje pa'ye mësaruje do cuañoja'cohua'i a'ë.”

⁴⁰ Yë'ë ëja t'e'huina cui'ne yë'ë ari t'e'huina ñu'ñe isiyi peoji. Ja cato Maija'quëpi isi ja'ñe a'ë, i caquë ne de'huasicohua'ina.”

⁴¹ Jare asani diez, i ye'yacohua'ipi Juanre cui'ne Jacobore sañope pëti huëoreña.

⁴² Jaje sa'ñe pëijëna, Jesupi jaohua'ire soini caëña:

“Iye yeja cuañe ëjaohua'i cato si'aye ëjaohua'irepa de'ocohua'i a'ë. Cui'ne johua'i meñe acohua'ipi ëjaohua'ire pa'ë, cuasajë johua'ini ca'rajëna, pa'icohua'i a'ë.”

⁴³ Mësaru cato yeque yo'oye pa'iji. Pai ëjaë pasi'i, cani yecohua'ini necaiquë pa'iyë pa'iji.

⁴⁴ Cui'ne ai jerepa du'ru aquë pasi'i cani si'aohua'ire necaiquëpi jo'yaë pa'ijê'ë.

⁴⁵ Yë'ë Pai Mamaquë daima'ë paë'ë, paipi necaijajê caquë. Yë'ëpi paini necasi'i caquë daë'ë. Yë'ë ju'i do'ipi si'aohua'ire huasoyere caquë daë'ë.”

*Bartimeore Ñama'quëre Jujuse'e**(Mt 20.29-34; Lc 18.35-43)*

⁴⁶ Jericó daripëna t'i'asicohua'ipi iti daripëpi etareña, Jesús cui'ne i ye'yacohua'ipi cui'ne jai pai çoni. Jaro eta hue'ñare Bartimeo ñama'quëpi da saicohua'ini curiquë sei ñuquëña, Timeo mamaquëpi.

⁴⁷ Ñu'iquëpi Jesús Nazaret aquëpi daiji asani cui huëouña:

“¡Jesús David mamaquë, yë'ë macare çocaijê'ë! ¡Ai yo'oyë!”

⁴⁸ Caquëna, paipi pëijê ite careña:

“Cama'ë pa'ijê'ë.”

Cajëna, ai jerepa tutu ca çuñña:

“¡David mamaquë yë'ëre oi necaijê'ë! ¡Ai yo'oyë!”

⁴⁹ Caquëna, asani Jesupi caëña:

“Daijê'ë cajê'ë, ite.”

Caëna, ñama'quëre careña:

“Ai pequë maca huëni saiñê'ë, i quë'rona. Më'ëre soiji, ipi.”

⁵⁰ Carena, esa i ëmëje'e ju'icore se dutani Jesús quë'rona saquëña, tsoe nëiñe peoyerepa.

⁵¹ Jesús quë'rona saquëna, caëña, ite:

“¿Me necaiyete yëquë'ni, më'ë?”

Caquëna, ñama'quëpi caëña, ite:

“Ëjaë, yë'ë de'oye ñañere yëyë.”

⁵² Caquëna, Jesupi ite caëña:

“De'oji, de'hue jujuquë api cuasato jujucas'i, më'ëre.”

Ca macarepa sëtani ñaëña. Ñani Jesús ja're saquëña.

11*Jesús Jerusalén Cacase'e**(Mt 21.1-11; Lc 19.28-40; Jn 12.12-19)*

¹ Jerusalén ja'ye macana t'i'ani Olivos çutihüë je'ñerepa daripëa Betfagë cui'ne Betania daripëare pa'i Jesupi cayaohua'ire i ye'yacohua'ire jëjo saouña.

² Ñeje caquë:

“Je t'e'te a'ri daripëna sani t'i'a maca mësaru ñaja'cohua'i a'ë, burro posëre papi paireje hue'ema'quëni, sëasiquëni. Nëina, joyeni daijê'ë.”

³ ¿Yecohua'ipi me neñu'ju saye'ni? cacohua'i pa'ito cajë'ë: 'Ëjaëpi cusi'i caquëna, sayë. Cuni tējini jeo daija'cohua'i a'ë, cajë'ë."

⁴ Caëna, sani burrore t'i'areña, ma'are säasiquëpi hue'sere nëina, caca sa'ro yë'quë macare. Ñani ite joyereña.

⁵ Joye'ëna, iti maca pa'icohua'ipi careña:

"¿Me neja'quëni burrore saye'ni?"

⁶ Cajëna, Jesús case'eje careña. Cajëna, de'oji. Sajë'ë, careña.

⁷ Carena, Jesús quë'rona burrore dareña. Dani iohua'i cañapi burro jetena jajereña.

⁸ Mëni ja'runa jai pai iohua'i cañapi, i sai ma'ana jaje oereña. Yecohua'ipi jaiye ja'o tēteni da oereña, i sai ma'ana.

⁹ Du'ru saicohua'ipi cui'ne jeteyo'je saicohua'ipi sihuajë cuireña:

"De'oquërepa daiji, Maija'quë jëjo daoquë.

¹⁰ I cuãne maca jerepa de'oye pasio. Mai ñecuë David maca cuãne maca pa'ise'eje Maija'quë ai de'oji."

¹¹ Jerusalënna cacani Maija'quë huë'ena sani cacani si'a huë'e ñani na'i huesëquëna, Betania quë'rona i doce ye'yacohua'i ja're çoni saquëña.

Jesupi Higuera Soquë Yëre Pui Case'e

(Mt 21.18-19)

¹² Natasi mu'se Betaniapi saijëna, Jesure ai ëaëña.

¹³ Ai ëaquëna, so'opi señaquë, higuera soquë yëpi ja'o quëi ñëpi nëcaña. Nëcacona, iti ca pa'ima'quë caquë saquëña. Sani ñaquëna, coa ja'ose'e paquëña, iti quëima'a tēcahuë sëte.

¹⁴ Pa'ina, Jesús iti ñëre caëña:

"Yureta'a pai ocuye peosipi, më'ë quëise'e."

Jaje caquëna, i ye'yacohua'ipi asareña.

Jesupi Maija'quë Huë'ena Tsoa Tose'e

(Mt 21.12-17; Lc 19.45-48; Jn 2.13-22)

¹⁵ Ja jeteyo'je Jerusalën t'ani, Jesús Maija'quë huë'ena cacani co'amaña huerojë cui'ne co'amaña isicohua'ire eto saña. Curiquë cambia mesaña jë'je taño sauña. Cui'ne sutere isicohua'i ñu'i sai jë'je taño sauña.

¹⁶ Maija'quë huë'ena co'amañare saye ëseiña.

¹⁷ Ëseni ye'yaquë caëña:

"Toya pëpë caji: 'Yë'ë huë'e cato si'a pai Maija'quëre së huë'e hue'yoye pa'iji.' Jaje pa'iquëta'are mësarú cato co'amaña ñacohua'i tu'aro neni yo'oyë."

¹⁸ Jaje caquëna, asani Maija'quë huë'e ñacaicohua'i ëjahua'ipi cui'ne cuãnese'e ye'yacohua'ipi Jesure huani jëoñere careña: ¿Me huani jëoja'cohua'i a'ni? cajë. Yecohua'i cato airepa de'oye ye'yaquë'ni cuasareña. Ja do'ire ëjahua'ipi Jesure ca'rajë huani jëoñere careña.

¹⁹ Ñami de'oquëna, Jesús pai daripëpi t'rona saquëña.

Higuera Soquë Yë Cuënese'e

(Mt 21.20-22)

²⁰ Natasi mu'se nea hue'ña saijë ñajëna, higuera soquë yë tsoe sucua mañaque cuëne huesësicopi pa'iona, ñareña.

²¹ Ñani ja maca Pedro, Jesús case'ere cuasa ñajani caëña, ite:

"Ye'yaquë ñajë'ë, më'ë casi ñëre, tsoe cuëne huesëstico pa'ico."

²² Caquëna, Jesupi i ye'yacohua'ire caëña:

"Nequëre papi cuasajë'ë, Maija'quëre.

²³ Nuñerepa cayë, mësarute. Iye çutihuëre tsiayana jëjo saoye yëni Maija'quëre nequë api cuasani sëto neñe pa'iji.

²⁴ Nuñerepa cayë, Maija'quëre seni isija'quë api cuasato isiye pa'iji.

²⁵ Maija'quëre së maca yequere sañope yo'oye pacohua'i pa'ini sai de'huacaijë'ë, Maija'quë ma'tëmo aquëpi mësarú co'aye tayo yo'ose'e sai de'huacaija'quëre.

²⁶ Jaje pa'iquëta'are mësarupi sai de'huacaima'cohua'i pa'ito mësarú ja'quë ma'tëmo pa'iquëje mësarú tayose'e sai de'huacaiye pa'sipi."

Jesús Cuãñerepa Pa'iyë

(Mt 21.23-27; Lc 20.1-8)

²⁷ Ja maca Jerusalënna co'ireña. Co'ini Jesús Maija'quë huë'ëja'a cu'ina, Maija'quë huë'e ñacaicohua'i ëjahua'ipi cui'ne cuãnese'e ye'yacohua'ipi cui'ne aiohua'ipi Jesús quë'rona dani

²⁸ ite sëteña:

"¿Ique cuãñerepi iye më'ë yo'oquë'ni? ¿Nepi më'ëre cuãñequë ëjaëre carena, yo'oquë'ni?"

29 Cajëna, Jesupi caëña:
 “Yë'ëje mësarute sési'i te'ore. Mësarupi yë'ë señere sehuorena, yë'ëje quëasi'i, yë'ëre cuañequëre jëjo daoquëre.
 30 ¿Nepi Juan iti doquëre jëjo daore'ni, Maija'quë pañita'a pa'i? Mësarupi sehuojë'ë.”
 31 Jaje caëna, sa'ñe careña, ñeje:
 “Maipi Diosu jëjo daosiquë pa'iji cato ipi sehuosipi ‘¿Jaje pa'iquëta'are mësarupi me yo'ojë ite care paji cajë asaye pare'ni?”
 32 Cui'ne paipi cuañesiquë pa'iji cayeje pañu'u.”
 Si'a pa'i Juanre Maija'quë cocare quëaquë paji'i, cuasa do'ire ca'rajë.
 33 Jaje cani Jesure careña:
 “Huesëyë.”
 Cajëna, Jesupi caëña:
 “Cui'ne yë'ëje, yë'ë cuañe tutu quëaye pañë.”

12

Co'acohua'i Yo'oye Ayere Quëaye
 (Mt 21.33-46; Lc 20.9-19)

1 Jaja maca Jesús pa'i yo'oyeje pa'ye caquë quëaëña, ñeje:
 “Paji'i, te'i pa'i yeja paquë. Jaje pa'ipi tapi, cuiya'i. Tani tu'rihuë tëhuopi. Cui'ne cuiya'i suni de'huaja'toje nepi. Cui'ne cuiya'i tsio ëmë huë'epi tuijë si'a tsio ñaja'core nepi.
 Jaje si'aye ne tëjini co'amaña necaicohua'ini isi nëoni saji'i.
 2 Tëaye ti'asi maca i jo'yare jëjo daopi, co'amaña necaicohua'i quë'rona ite cajë necaise'le pa'iji, caquë.
 3 Jaje jëjo daosiquëta'are co'amaña necohua'ipi tseani si'seni isima'pë jëjo saohuë.
 4 Jaje yo'orena, iti tse aquëpi yequëre jëjo saopi. Jëjo saouna, jaëreje quëna pëapi jeahuë. Cui'ne siopeje a'si quë'ire tea ju'lijë yo'oni jëjo saohuë.
 5 Jaje yo'orujë iti tse aquë ja yë'ta'api yequëre jëjo sao copí. Jëjo saosiquëni jaëni coa huani jeohuë.
 6 Jëjo saoque pequë yureta'a i mamaquëre pani jëjo saopi, yë'ë mamaquëre cato yo'oye peoji caquë.
 7 Jaje caquë jëjo saosiquëta'are co'amaña necohua'ipi ñani 'iquëpi si'a co'amaña paja'quë api huani jeoni maipi iti tse acohua'i neñu'u,' cani huani jeohuë.
 8 Jaje yo'oni tseani huani jeoni i capë hue'sena jeocohuë.”
 9 Jaje quëa tëjini Jesús sequëña:
 “Me yo'oja'quë a'ni, iti yeja aquë?” Cani caëña, iti yeja aquë cato dani, huani jeaja'quë api, co'amaña necohua'ire. Huani jeoni yecohua'ina isija'quë api.
 10 ¿Ñama'cohua'i a'ni toya pëpë caye? Ñeje caji:
 Quëna pëa huë'e necohua'i yo'o jujani jeocosi quëna pëpi yure cato huë'ehuërepa ui quëna pë de'oye iti quëco pacorepa.
 11 Iye cato ëjaëpi jaje yo'opi. Jaje yo'ose'ere de'oyerepa yo'o u'ni cajë ñañë, mai.
 12 Casi maca Jesure tseañu'u cajë yo'oreña. Jesupi yo'ose'ëje pa'ye caquë johua'i yo'oyere caëna, asani pëijë yo'oreña. Jaje yo'ojëta'a tseañe pareña, pañi ca'rajë. Jaje pa'ina, yo'oma'pë pateña.

Jesure Sese'e Pa'i Do'i Saiñere
 (Mt 22.15-22; Lc 20.20-26)

13 Ja jeteyo'je Jesús quë'rona fariseo acohua'ire cui'ne Herodes acohua'ire jëjo daoreña, jaohua'ipi ite neñajajë cajë.
 14 Jaje daisicohua'ipi Jesure careña:
 “Ye'yaquë, yëquë asayë, më'ë nuñerepa caquëpi pa'iyë, pa'i cayere asama'quëpi nuñerepa Maija'quë cocare caquëpi paire si'aohua'ire si'a yë'quë maca caquëpi pa'iyë. Jaje pa'ina, ¿de'oquë pa'i do'ire romano pa'i ëjaëna sañe, pañita'a pañe?”
 15 Cajëna, Jesupi tsoe johua'i coa caye asani caëña:
 “Me neñu'ju yë'ëre cosojë neñañu'u cajë caye'ni? Dajë'ë, curiquë të'quire ñaja'core.”
 16 Darena, Jesús ñani sequëña:
 “¿Ne tsia'ni ico? ¿Cui'ne, ne mamire toyasicoa'ni?”
 Caquëna, sehuoreña:
 “Romano pa'i ëjaë mamipi toyasicoa.”
 17 Cajëna, Jesupi caëña:
 “I tseco pa'ito ina isijë'ë. Maija'quë tseco pa'ito Maija'quëna isijë'ë.”
 Jaje sehuouna, airepa de'oyerepa caë'ni, cuasareña.

Ju'isicohua'i Huëiye Pa'iquë Cajë Señe.

(Mt 22.23-33; Lc 20.27-40)

¹⁸ Jesure ñañu'u cajë dateña, saduceo pa'i acohua'ipi. Jaohua'i cato ju'isicohua'i huëiye peoji cacohua'i pateña. Jaohua'ipi careña, ñeje:

¹⁹ “Ye'yaquë, Moiséspi yëquëre toyani jeoca'aji'i, maja'yëpi huejani mamajëre peoquë ju'isiquë pa'ito yo'jeipi huejani mamajëre pacaiye pa'iji, maja'yë do'ire.

²⁰ Te'ipi siete mamajë emëohua'ire paëña. Paquëna, jaohua'i aquë maja'yëpi huejani mamajëre peoquë juji'i.

²¹ Juquëna, yo'jeipi hua'jeore huejapi. Jaëje mamajëre peoquë juji'i. Juquëna, yo'jeipi huejani cui'ne yo'opi.

²² Jare jajese'e si'a tsëcapë hua'jeore huejajë juju sahuë, si'aohua'i mamajëre peocohua'i. Ja jeteyo'je ioje juco'ë.

²³ ¿Jaje pa'ito ju'isicohua'i huëi maca ne nëjo pa'ija'coa'ni, te'oni siete pairepa huejasico?”

²⁴ Cajëna, Jesupi sehuouña:

“Mësaru coa tayo huesëjë cayë, Maija'quë tuturepa cui'ne Maija'quë toya pëpë ñama' do'ire.

²⁵ Ju'isicohua'ipi huëisicohua'i cato huejaye peoji. Mamajëre isiye peoji. Ma'tëmo huññahua'i je pa'iohua'i pa'ija'cohua'i a'ë.

²⁶ ¿Ju'isicohua'i huëiye ayere, toyase'e mësaru ñama'cohua'i a'ni, Moisés toyase'e jaropi caji, Maija'quë a'ri soquë yëpi toaje pa'io tsë'isicopi case'ere? 'Yë'ë cato Abraham Diusu a'ë, Isaac Diusu a'ë, cui'ne Jacobo Diusu a'ë.

²⁷ Diusu cato ju'isicohua'i Diusu peoji, huajëcohua'i Diusupi. Jaje pa'iquëta'are mësaru coa tayo huesëni yo'ojë cayë.”

Si'a Cuañese'e Jerepa Pa'ye

(Mt 22.34-40)

²⁸ Sa'ñe yo'ojë cajëna, Jesupi si'aye tayoma'ë sehooquëna, asasiquëpi cuañese'e ye'yaquëpi títani sequëña:

“¿Jeco a'ni, du'ru macarepa huëo maca cuañesico jerepa pa'io?”

²⁹ Caquëna, Jesupi caëña:

“Du'ru macarepa cuañese'e si'aye jerepa pa'io cato caji: Israel pa'i asajë'ë, mai Èjaë Diusure. Jaëse'e te'i pa'iji.

³⁰ Oijë'ë, Èjaë Diusure si'a më'ë yëyepi, si'a më'ë joyopi, si'a më'ë cuasayepi cui'ne si'a më'ë tutupi. Jaje caji, cuañese'e du'ru macarepa aye si'aye jerepa pa'ye.

³¹ Cayaye acoje jare cui'ne pa'io. Jaopi caji ñeje: ‘Oijë'ë, më'ë quëno maca pa'iquëre më'ëja'a co'ye oiyeje pa'ye. Yequë jerepa pa'ye peoji.”

³² Jaje sehuouna, cuañese'e ye'yaquëpi caëña:

“De'oyerepa cahuë, më'ë ye'yaquë. Peore paji, yequë Diusu. Te'i pa'iji, Diusu. Nuñerepa cahuë, më'ë.

³³ Jaje pa'ina, Maija'quëre si'a më yëye oiyeipi si'aye më asaye oiyeipi cui'ne si'a joyo oiyeipi cui'ne si'a tutu oiyeipi, cui'ne mai quëno maca pa'iquëre co'ye oiyeje pa'yepi, ja oiyeipi jerepa pa'ye a'ë, Maija'quëre isiye, cui'ne ëojë seña jerepa.”

³⁴ Si'aye nuñerepa caquëna, Jesupi ñani caëña:

“Më'ëre Maija'quë cuañe tëtë so'ore pa'iyë paji.”

Jaje caëna, asani yecohua'ije jte seña coñe pareña, si'aye asaquë api cajë.

Ne Mamaquë A'ni, Cristo

(Mt 22.41-46; Lc 20.41-44)

³⁵ Maija'quë huë'ena ye'yaquë Jesús caëña:

“¿Me yo'ojë cuañese'e ye'yacohua'i Cristo cato David mamaquë api cayë'ni?”

³⁶ David jare ipi capi. Maija'quë joyopi quëaquëna, ñeje capi:

Èjaëpi capi, yë'ë Èjaëre:

'Yë'ë ëja tëtëna ja'rujë'ë,

ye'ëpi më'ëre sañope yo'ocohua'ire më'ë quëo huë'ehuëna të'ya me macaja'a.'

³⁷ ¿Jaje pa'ito me Cristo David mamaquë pa'iquë'ni, Davidpi Cristore yë'ë ëjaë hue'yoto?”

Jaje caquëna, jai pa'i tsi'isicohua'ipi ai yëjë asareña.

Jesupi Sañope Case'e Cuañese'e Ye'yacohua'i

(Mt 23.1-36; Lc 11.37-54; 20.45-47)

³⁸ Jesupi caëña, j ye'ya maca:

“De'hua ñajë'ë, cuañese'e ye'yacohua'i yo'oye ye'yema'pë. Jaohua'i cato tsoa caña suñani cui'ne paipi de'oye pëpajajë cajë yo'ocohua'i a'ë.

³⁹ Jaohua'i cato de'o ñu'i saire pai tsi'si hue'ñana co'eni ja'rucohua'i a'ë, cui'ne de'o hue'ñana a'oje aicohua'i a'ë.

⁴⁰ Hua'jeohua'i hue'ña jiojë yo'ocohua'i a'ë. Paipi de'ocohua'ire pa'ë cajajë cajë tsoaye Maija'quère señë cajë yo'ocohua'i a'ë. Jaohua'i a'ë, iti jerepa si'se cuañoja'cohua'i, jaje yo'osi do'ire."

Peocopi Isise'e

(Lc 21.1-4)

⁴¹ Jesús Maija'quë huë'ere paquëña, Maija'quëna curi isi mahuë je'ñere pare. Jarote ñu'i ñaquëna, jaiye curi pacohua'i daijë iti mahuëna ayareña.

⁴² Ayajëna, ñaquë ñu'ina, hua'jeo maca curiquë peocopi dani caya cobre tē'ñare ayaña, jai do'i peoyere.

⁴³ Jaje ñani i ye'yacohua'ire soini caëña:

"Nuñerepa cayë, mësarute. Ja'o hua'jeo co'amaña peocopi si'ahua'i curi ayaye jerepa ayao do'i quë'yerepa.

⁴⁴ Yecohua'i cato johua'i huero jujase'ere isiyë. Jaje pa'iquëta'are ico cato peocopi si'a mañare isi sao."

13

Jesús Quëase'e Maija'quë Huë'ere Nejo Ja'ñere

(Mt 24.1-2; Lc 21.5-6)

¹ Maija'quë huë'epi Jesús eta maca i ye'yaquëpi caëña:

"iYe'yaquë, iye quëna pëare ñajë'ë, cui'ne jai huë'ñare!"

² Jaje caquëna, Jesupi sehuouña:

"¿Jai huë'ñare ñaquë caquë? Ja më'ë ñase'e yequë mu'se, peo ja'ñe a'ë. Quëna pëapi tuñajë nese'e si'aye nejo ja'ñe a'ë."

Ja Yë'ta'a Yeja Carajaima'ñë Ìño Ja'ñe

(Mt 24.3-28; Lc 17.22-24; 21.7-24)

³ Ja maca Maija'quë huë'e je'ñere pare Olivos cutihuë pa'icona sani Jesús ja'rusiquëpi ñu'ina, Pedro, Jacobo, Juan cui'ne Andrés çoni pai asama'tona seña:

⁴ "Je yëhua jaje yo'o ja'ñere më'ë caë'ni, yëquëre quëajë'ë. ¿Me pa'ija'coa'ni, iti yo'o ñño ja'ñe ja yo'oye ti'a maca?"

⁵ Cajëna, Jesupi sehuouña:

"De'huarepa ñajë pa'ijë'ë, mësarute coa cosojëna, sehuoye.

⁶ Jai pai yë'ë mamire cajë 'yë'ë a'ë, Cristo' caja'cohua'i a'ë. Jaje cajë coa cosojëna, sehuoja'cohua'i a'ë, jai pai.

⁷ Jaje pa'iquëta'are mësarupi huajo coca cui'ne uihuaye asacohua'i pani quëquëma'pë pa'ijë'ë. Ja cato jare jaje yo'oye pa'ina, yo'oji. Jaje yo'onije ja yë'ta'a carajaima peosipi.

⁸ Yequë pai tsëcapëpi yequë tsëcapëre se uihuaja'cohua'i a'ë. Cui'ne yequë yeja paipi se uihuaja'cohua'i a'ë. Si'a hue'ña yeja ñu'cuyee pa'ija'coa. Cui'ne aopi peoquëna, ai ëa ju'ija'cohua'i a'ë. Cui'ne ai yo'oyepi pasipi. Iye pasipi, du'ru macarepa ai yo'oye.

⁹ De'hua mësaruja'a co'ye de'oye ñajë'ë. Mësarute cato paipi tseani pai ëjaohua'ina isija'cohua'i a'ë. Jaohua'ipi cuañejëna, mësarute pai tsi'si hue'ñana si'sejë yo'oja'cohua'i a'ë. Jaje yo'ojëna, mësarupi yë'ë do'ire ññoja'cohua'i a'ë cuañecohua'i cui'ne si'a pai ëjaohua'i ña hue'ñana.

¹⁰ Ja yë'ta'a carajaima'në de'o cocare quëaye pa'iji, si'a hue'ña.

¹¹ Mësaruni ëjaohua'i quë'rona sasicohua'i pa'ito ¿me caja'cohua'i a'ni? cuasama'pë pa'ijë'ë. Cajë'ë, Maija'quë isi cocapi, ja maca cato. Jaje pa'ina, mësarupi caye paja'cohua'i a'ë, Maija'quë joyopi caja'quë api.

¹² Te'e tsëcapë acohua'ipi yo'jeire panita'a maja'yëre quëa yehuoja'cohua'i a'ë huani jeojë'ë, cajë. Pëca ja'quëohua'ipi mamajëre quëa yehuoja'cohua'i a'ë, cui'ne mamajëpi pëca ja'quëohua'ire sañope yo'ojë huani jeoja'cohua'i a'ë.

¹³ Si'a pai mësarute coeja'cohua'i a'ë, yë'ë do'ire. Jaje pa'iquëta'are yo'o jujama'quëpi huaso cuañoja'quë api nuñerepa yo'okuëpi.

¹⁴ Maija'quëre quëacaiquë Daniel toyaquë pa'ajji'i, si'si nequëpi cui'ne coa nejoquëpi si'si pa'ima'tore pa'ina, ñani Maija'quë toya ja'o ñaquëpi asa ti'añe pa'iji. Ja maca Judea pa'icohua'ipi ai cutihuëana catiye pa'iji.

¹⁵ Ja mu'se huë'e ëmëje'e toire pa'iquë pani cajeni cacani co'amañare sasi'i caquë yo'oma'ë.

¹⁶ Tsiore pa'iquë pani co'ini caña sasi'i caquë yo'oma'ë pa'ijë'ë.

¹⁷ Ja mu'seña nomiohua'i tsj ëtapëa pa'icohua'i cui'ne tsj mañare pacohua'i ai yo'oja'cohua'i a'ë, teaye.

¹⁸ Mësarú cato Maija'quëni sejë'ë, sësë mu'seña catiye peoja'core.

¹⁹ Si'aye ai yo'oye tëto saise'erepa pa'ija'coa. Ja mu'seña cato ai co'a mu'seña pasipi, yeja de'hua maca peopi. Cui'ne jeteyo'je peosipi, ja jerepa ai yo'oye.

²⁰ Ja mu'seña Èjaëpi ja yo'oye tëama'quë pa'ito te'ije jëaye peo'ñe pa'io. Jaje pa'iquëta'are i sahuasicohua'ini i paini caquë ja ai yo'oyere tëaquëna, yecohua'ije con i jëaja'cohua' i a'ë.

²¹ Mësarute yecohua'ipi iñore pa'iji, Cristo ñajë'ë, cacohua' i pa'ito asama'pë pa'ijë'ë, panita'a 'jetore pa'iji.' Catoje sehuoma'pë pa'ijë'ë, iohua' i caye.

²² Coa cacohua' i daija'cohua' i a'ë. Yë'ë a'ë, Cristo cacohua' i, cui'ne Maija'quë cocare quëacohua' i a'ë cacohua'ije daija'cohua' i a'ë. Jaohua'ipi pai yo'o t'ia ma'ñere yo'o iñoja'cohua' i a'ë, coa cosoñu'u cajë. Jaje yo'ojëna, Maija'quërepa sahuasicohua'ique jaohua'ire sehuoye ja' i maca yo'oja'cohua' i a'ë.

²³ Jaje pa'ina, mësarute du'ru quëa nëohuë de'oye ñajë pa'ijë'ë, caquë.

Pai Mamaquë Dani Coñe

(Mt 24.29-35, 42-44; Lc 21.25-36)

²⁴ Jaje ai yo'o mu'seña tëto saisi maca yureta'a, ësëpi yaya huesëja'quë api. Ñañëje miañe paja'quë api.

²⁵ Ma'ñocoje ma'tëmopi tomeja'cohua' i a'ë. Jaje yo'o maca ma'tëmo tuture paque tsasija'coa.

²⁶ Ja maca sirija'a tutu quë'ire papi cui'ne de'oquëre papi Pai Mamaquë daija'quë api.

²⁷ Ja jeteyo'je i huiñaohua'ire cuañesipi, i sahuasicohua'ire cajese'e tutu jupëapi i paire tsi'sojë'ë, caquë si'a hue'ña pa'icohua'ire.

²⁸ Higuera soquë yë yo'oye ayere ye'yejë'ë. Ja soquë yë cato huiña capëa pa' i maca jë'nërepa ja'o eta huëcoo. Eta maca ñani cacohua' i a'ë, utëcahuë t'iaji.

²⁹ Ja yo'oyeje pa'ye mësarupi ñajëna, yë'ë case'epi t'iaquë tëto saina, ñajë je'në ja'yere eta sa'rore pa'iji cayë.

³⁰ Nuñerepa cayë, ja yë'ta'a iye maca pa'icohua' i ju'ima'në tëto saija'coa, iye.

³¹ Ma'tëmo cui'ne yeja pani jujani carajai ja'ñe a'ë. Jaje pa'iquëta'are yë'ë coca cato yë'ë case'eje ti pa' i ja'ñe a'ë.

³² Iti mu'se cui'ne hora pai huesëyë. Huiñaohua'ije cui'ne Maija'quë mamaquëje huesëji. Si'aohua' i huesëyë. Coa ja'quëse'e asaji, iti mu'se.

³³ Jaje pa' i do'ire, mësarú cato si'anë sëtasicohua'ije pa'iohua'ipi ñajë sejë pa'ijë'ë, i dai hora huesëye sëte.

³⁴ Yë'ë dai maca cato te' i so'ona sai huëoni ja yë'ta'a huë'epi saima'në i jo'yare pai ñapere co'amaña yo'o ja'ñe isini cui'ne eta sa'ro ñacaiquëre cuañeni ñajë'ë cani saise'eje pa'iyë a'ë.

³⁵ Jaje pa'ina, mësarú cato sëtasicohua'ipi pa'ijë'ë, coa si'anëpi, iti huë'e aquë tütayere huesëye sëte. Na' i maca, ñami jopo, mu'se, cura yë' i maca, panita'a nea hue'ña daima'quëni cajë.

³⁶ Yo'ojëna, cuasama'topi caisicohua'ini tütama'quëni de'hua ñajë'ë.

³⁷ Iye mësarute caye cato si'a paire cayë: 'Sëtasicohua'ipi pa'ijë'ë, caquë.'

14

Jesure Tseñu'u, Cajë Yo'oye

(Mt 26.1-5; Lc 22.1-2; Jn 11.45-53)

¹ Israel pai Egíptopi etajë pa'ise'ere cuasajë yo'oye, cui'ne o'sa peo pan aiñe caya mu'seña cara maca, Maija'quë huë'e ñacai'cohua' i ëjaohua'ipi cui'ne cuañese'e ye'yacohua'ipi merepa Jesure coa cosojë tseñi huani jeora'ye cajë. Iti yo'o ja'ñere co'ehuë.

² Careña, cui'ne pai tsi'sini sihuajë yo'o maca huaiye pañu'u, co'aye paipi cuasa co'me huesëni sañope ai yo'ojë cama'cohua'ini, careña.

Huëo Sëñepi Jesure Tsoacaise'e

(Mt 26.6-13; Jn 12.1-8)

³ Jesús Betania daripëre paquëña, Simón ja'ju dahuë hue'equë pa'isiquë huë'ere, mesare ñuquëña, Jesús. Ñu'ina, te'o nomio jai do' i huëo së da'care quëna huëna tımësiconi dani Jesús sjo'pëna iti da'capi dooña. Nardo da'case'e nesicopi, yequeje co'mema'copi.

⁴ Iti maca ñu'icohua'ipi pëti huëoreña. Jaje pëti huëojë careña:

“¿Me yo'oco huëo së da'ca coa nejoco'ni?”

⁵ Iopi yecohua'ina se isico pani trecientos romano curiquë të'ña nera'o. Jaje yo'oni co'amaña peocohua'ire cõcatira'o.”

Jaje cajë iote coejë pëijë ñareña.

⁶ Jaje ñajëna, Jesupi caëña:

“Coa ñajë'ë, iose'e yo'oja'co. ¿Me yo'ojë josa caye'ni? Iye io yë'ëre necaise'e cato de'o co'amaña'ë.

⁷ Co'amaña peocohua'ire si'anë mësarü ñajë paja'cohua'i a'ë. Jaje pa'iquëta'are yë'ë cato mësarü ña hue'ñare si'anë pa'iye paja'quë a'ë.

⁸ Io cuasaye ja'i maña ico cato de'hue yë'ë sïopë huëo sëñe necaco'ë, du'runa yë'ëre ta ja'ñere caco.

⁹ Nuñerepa cayë, coa si'a hue'ña ico yo'ose'e quëaye pa'ija'coa, io yo'ose'e huñëyema'pë cuasa ja'ñere cajë, huaso coca quëa maca.”

Jesure Judas Isise'e

(Mt 26.14-16; Lc 22.3-6)

¹⁰ Judas Iscariote'pi sani Maija'quë huë'e ñacaicohua'i ëjaohua'i ja're cõni coca caëña, Jesure tseani jöhua'ina isi ja'ñere. Jaë cato doce ye'yacohua'i aquë paji'i.

¹¹ Jaje caquëna, asani ai sihuareña. Jaje sihuajë curiquë isireña. Isirena, Judaspi ¿Jesure merepa tseani isija'quë a'ni? caquë i yo'o ja'ñere co'eña.

Mai Ejaë Ani Tëjise'e

(Mt 26.17-29; Lc 22.7-23; Jn 13.21-30; 1 Co 11.23-26)

¹² Egíptopi Israel pai etajë pa'ise'ere cuasajë sihuajë pai tsi'sini, tsoe yo'ojë pa'ise'eje yo'o mu'se tja'ëña, o'sa co'me ma'a ao ai mu'se. Du'ru mu'serepa, cui'ne yëi ñamare huai mu'serepa tja'ëña. Jaje tja'ëña, Jesús ye'yacohua'ipi seteña:

“¿Egíptopi Israel pai etajë pa'ise'ere cuasajë, aïñe jerona sani ne de'huarena aïñe yëquë'ni?”

¹³ Cajëna, Jesupi cayaohua'ire i ye'yacohua'ire jëjo saokuë caëña:

“Jai pai daripëna sani oco yurupë saquëni tja'ani i ja're saijë'ë.

¹⁴ Sani ja're sa cacajë cajë'ë ite huë'e aquëre: ‘Ye'yaquëpi capi: ¿Jerore pa'ico'ni, tu'rihuë yë'ë ye'yacohua'i ja're na'iquëna aija'co, Egíptopi Israel pai etase'ere cuasajë? cajë'ë.’

¹⁵ Ipi mësarute iñoja'quë api, jai tu'rihuëpi tsoe ne de'huasiconi. Jarona yureta'a ñani ne de'huajë'ë, mai tse.”

¹⁶ I ye'yacohua'ipi sani tja'areña, jai daripë. Tja'ani jare Jesús quëase'eje si'aye tja'areña. Tja'ani na'iquëna, ai ja'ñe ne de'huareña, Egíptopi Israel pai etase'ere cuasajë yo'oyere.

¹⁷ Ñami de'osi maca Jesús i doce ye'yacohua'i ja're tja'ëña, iti hue'ña.

¹⁸ Tja'ani mesare ñu'i aiquëpi caëña, Jesús:

“Nuñerepa mësarute cayë. Mësarü aquëpi yë'ë ja're te'ona aiquëpi isi yehuoja'quë api.”

¹⁹ Jaje ca maca jöhua'ipi sa'ñe jöhua'ija'a seteña:

“¿Yë'ë pa'ija'quë a'ni?”

²⁰ Cajëna, Jesupi caëña:

“Doce aquëpi yo'oja'quë api, yë'ë ja're te'e quëna de'huana aiquëpi.

²¹ Jaje pa'itoje de'o'ji. Pai Mamaquë cato jare iti toyase'e pa'iyeje saiji. Jaje pa'iquëta'are jTeayerepa yo'oja'quë api, ite isi yehuoquëta'a! Ipi ai de'oye pasiquë pa'ito de'ora'pi, jaëte.”

²² Ja yë'ta'a aore aijëna, Jesupi panpë ini Maija'quëre de'o'ji caquë seni i ye'yacohua'ire aokuë caëña:

“Aijë'ë. Iye cato yë'ë capë a'ë.”

²³ Jetyo'je ucu duruhuë ini Maija'quëre de'o'ji, caquë seni, i ye'yacohua'ina isiña. Isina, si'ahua'ü ucureña, iote.

²⁴ Ucurena, caëña:

“Iye cato yë'ë tsie a'ë. Jai pai de'oye pa'i ja'ñere caquë huajëye Maija'quë paire cayere quëaye a'ë.

²⁵ Jaje pa'ina, mësarute nuñerepa cayë cui'naëpi iye, cuiya'i o'sa cõno ucuye paja'quë a'ë. Yequë mu'se Maija'quë cuañe te'tena cuiya'i o'sa ucuñu'u.”

Pedro Cosose'e

(Mt 26.30-35; Lc 22.31-34; Jn 13.36-38)

²⁶ Jëjë tëjini Olivos cõtina sateña.

²⁷ Jesupi caëña, jaohua'ire:

“Si'ahua'ü mësarü yë'ëre jecocaja'cohua'i a'ë, iye ñami. Jaje pa'ina, toyase'e caji: ‘Huani jecocaja'quë a'ë, yëi ñamare ñacaiquëre. Ja maca yëi ñamapi tiya huesëja'cohua'i a'ë.’

²⁸ Jaje pa'iquëta'are ju'isiquëpi huëisi maca yë'ëpi du'ru saija'quë a'ë, Galileana, mësarü ja yë'ta'a saima'pëna.”

²⁹ Jaje caquëna, Pedropi caëña:

“Jaje yecohua'i më'ëre jecocotoje yë'ë cato më'ëre jecocotoje pañë.”

³⁰ Caquëna, Jesupi caëña:

“Nuñerepa mē'ère cayē. Iye ñami ja yē'ta'a cura cayaye yē'ima'nē mē'ēpi toasoñe cosoja'quē a'ē, ite ñama'quē a'ē caquē.”

³¹ Jaje Jesús caquēna, ipi caēña:

“Yē'ē cato pañē, cosoye. Ju'ñe pa'itoje mē'ē ja're ju'ija'quē a'ē.”

Caquēna, yecohua'ije cui'ne careña.

Jesús Sese'e Getsemanína

(Mt 26.36-46; Lc 22.39-46)

³² Getsemaní hue'e hue'ñana t'i'ani Jesús caēña, i ye'yacohua'ire:

“Iñore dujē pa'ijē'ē, yē'ese'e Maija'quēre sani sesi'i.”

³³ Cani coa Pedrore, Jacobore, cui'ne Juanre saēña. Ja maca ai cuasaquē cui'ne ai yo'o huēouña.

³⁴ Jaje yo'oquē caēña, jaohua'ire:

“Ai oi ēaye nēiji, yē'ē joyore papi juni huesēye pa'ina. Iñona mēsaru cato pēani sētasicohua'ipi pa'ijē'ē, caima'pē.”

³⁵ Cani Jesús ise'e seña maca sani yejana do're ja'runi Maija'quēre de'hue neñe pa'ito, necaijē'ē, ai yo'oye pasi'i, iti yo'o maca t'i'aēna, caquē sequēña.

³⁶ Jaje sei caēña:

“Yē'ē ja'quē, mē'ère cato si'aye neñese'e pa'iji. Nejocaijē'ē, yē'ère ai yo'oye ne ja'ñere. Yē'ē yēye peoja'quē, coa mē'ē yēyepi yo'oye pa'ija'quē.”

³⁷ Jaje seni tējini i ye'yacohua'i quē'rona sani ñaquēna, caisicohua'ipi pateña. Pa'ijēna, Pedrore caēña:

“¿Simón caiquē, mē'ē? ¿Te'e hora macaje sētasiquēpi ña t'i'añe paē, mē'ē?”

³⁸ Sētasicohua'ipi pa'ijē Maija'quēre sejē'ē, co'ayena taiñe paja'cohua'i. Nuñerepa joyo cato yo'oye yēji. Jaje pa'iquēta'are mē'ē capēpi tutu peoji.”

³⁹ Jaje cani tujupē sani ja'rē case'eje pa'ye caquē sequēña.

⁴⁰ Jaro cui'naēpi co'iquē cui'ne caisicohua'ini t'i'api i, ye'yacohua'ire. Airepa huēo ca'quēna ñaco naimopi jameina caē'ē, quēcoñu'u cajēta'a. Jaje pa'ina, ite sañope sehua t'i'añe peohuē.

⁴¹ Toasoñe acore saisiquēpi titaquē caēña, jaohua'ire:

“Yureta'a cani huajējē'ē. Tsoe de'oji. Ja ja'ye caijē'ē. T'i'api Pai Mamaquēre co'aye yo'ocohua'i jēñana isi maca.

⁴² Huēijē'ē. Sañu'u. Yē'ère isi yehuoja'quēpi daiji.”

Jesure Tsease'e

(Mt 26.47-56; Lc 22.47-53; Jn 18.2-11)

⁴³ Ja yē'ta'a Jesús cocare i ye'yacohua'i ja're caquēna, Judaspi tsoe titaēña. Jaē cato doce acohua'i aquē paji'i. I ja're cōni jai pai hua'ti cajicohua'ipi cui'ne tara cajicohua'ipi dateña. Maija'quē huē'e ñacaicohua'i ējaohua'ipi, cuañese'e ye'yacohua'ipi cui'ne aiohua'ipi jējo daocohua'ipi cōni daisicohua'i pateña.

⁴⁴ Judas iti isi yehuoja'quēpi caēña, jaohua'ire:

“Yē'ēpi ñni t'i'ani sihuaja'quē a'ē. Sihuaquēna, ñani jaēni tseajē'ē. Tseani de'oye sēani sajē'ē.”

⁴⁵ Jaje casiquēpi t'i'ani Jesure tsiojani caēña:

“Ye'yaquē, Ye'yaquē.”

Jaje caquē tsu'supi.

⁴⁶ Tsu'suquēna, ja maca Jesure tome dani tseani sareña, sēasiquēni.

⁴⁷ Jaje yo'o maca iti maca pa'iquēpi hua'ti dutani Maija'quē huē'e ñacaicohua'i necaiquēni cajorose'e tēto tēaēña.

⁴⁸ Ja maca Jesuje caēña, ite tseja paire:

“¿Tarapi hua'ñapi cōni date, yē'ère tseañu'u cajē co'amaña yahue imaquēre yo'oyeje pa'ye?”

⁴⁹ Yē'ē si'a mu'seña Maija'quē huē'epi pa'i mēsarute ye'yaquēna, mēsarupi yē'ère tseañe pahuē. Jaje pa'iquēta'are iye cato toyase'epi t'i'aquēna, jaje yo'oye pa'iji.”

⁵⁰ Ja maca i ye'yacohua'ipi Jesuse'ere te'ire jeoni cati sateña.

Posēpi Catiye

⁵¹ Jaje pa'iquēta'are te'i tsj posē macapi jai capi deasiquēpi tuquēna, Jesure. Tuina, tsearena.

⁵² Tsearena, jai case'e jeoni peoyo catiña.

Jesure Ca Tējicohua'i Quē'rona Sase'e

(Mt 26.57-68; Lc 22.54-55, 63-71; Jn 18.12-14, 19-24)

⁵³ Jesure ja maca sareña, Maija'quē huē'e ñacaicohua'i ējaerepa quē'rona. Jaroni Maija'quē huē'e ñacaicohua'i ējaohua'i tsi'sireña, aiohua'i, cui'ne cuañese'e ye'yacohua'i cōni.

⁵⁴ Jaje sajena, Pedroje so'oma maca se ñaquë tuquëña, Maija'quë huë'e ñacaicohua'i ëjaërepa huë'e hue'se daripëre pana. Jarona soldado pai ja're conì pëani toare cui ñuquëña.

⁵⁵ Maija'quë huë'e ñacaicohua'i ëjaohua'i cui'ne pai yo'oye ca tëji ëjaohua'ire papi Jesure jaje yo'oquëre papi cayere co'ereña, asani huani jeoñere cajë. Jaje co'ejëta'a ti'añe pareña.

⁵⁶ Cui'ne jai pai coa huëojë ti yo'oma ñere sañope Jesure careña, cosojë. Cui'ne jiohua'ija'a sa'ñe yo'ojë careña, te'le cayepi pequëña.

⁵⁷ Yecohua'ipi co'arepa huëojë careña.

⁵⁸ Yëquëpi jì caye asasicohua'i a'ë, cajë yo'ojë careña:

“Ñeje caquë api, 'yë'ëpi Maija'quë huë'e nejoja'quë a'ë, pai de'huasi huë'e. Jaje yo'oni jeteyo'je tres mu'seña pa'i maca huajëcore neja'quë a'ë, paipi nema'core.' Jare asahuë.”

⁵⁹ Jaje canije nuñerepa te'leje pa'ye caye pareña.

⁶⁰ Ja maca Maija'quë huë'e ñacaicohua'i ëjaëpi jiohua'i ca jopoj'a huëni nëcayepi Jesure sequëña:

“¿Asaquë më'ë, më'ëre sañope caye? ¿Me yo'oquë sañope sehuoye paquë'ni?”

⁶¹ Caquëna, Jesupi ai jerepa ti sehuoye paëña, jì caye. Jaje paquëna, Maija'quë huë'e ñacaicohua'i ëjaëpi tujupë Jesure sequëña, ñeje:

“Më'ë Cristo, Maija'quë de'oquërepa mamaquë a'ë?”

⁶² Caquëna, ja maca Jesupi sehuouña:

“Jaje pa'ijë'ë. Yë'ë a'ë. Cui'ne mësarupi Pai Mamaquëre yë'ëre ñaja'cohua'i a'ë, Diusu tutu quë'irepa ëja te'tere ñu'ina. Cui'ne Ma'tëmopi sirija'a nëca meina, ñaja'cohua'i a'ë.”

⁶³ Jaje caquëna, asani Maija'quë huë'e ñacaicohua'i ëjaëpi jì ju'i care co'ye naë yeto saokuë caëña:

“¿Iquere cajë jerepa paire quëaja'cohua'ire co'eye'ni, tsoe tji'api?”

⁶⁴ Jare mësarupi asahuë, jì yë'opopi Maija'quëre cue'cuequë caye. Jaje pa'ito ¿me caye'ni, mësarup?”

Jaje caëna, yureta'a si'a pai careña:

“Huani jëoñe pa'iji.”

⁶⁵ Casi maca je'ne'repa yecohua'ipi copi tse'se huëoreña. Cui'ne yecohua'ipi tsiana cañapi tëto queoni të'cajë yo'ojë careña:

“¿Nepi të'care'ni? Se ca ñajë'ë.”

Cajëna, soldado pajje yo'oreña, ite.

Pedro Cosose'e

(Mt 26.69-75; Lc 22.56-62; Jn 18.15-18, 25-29)

⁶⁶ Pedro cato huë'ehuëre paquëña, hue'se daripëre. Jarote pa'ina, Maija'quë huë'e ñacaicohua'i ëjaëre necaicopi

⁶⁷ toare cui ñu'ina, ñani jte caoña:

“Ina, më'ëje Jesús Nazaret aquë ja're pa'isiquë a'ë.”

⁶⁸ Cacona, Pedropi caquë cosouña:

“Ñama'quë a'ë, ite. ¿Iquere jaje caco'ni? Huesëyë.”

Jaje canì eta sa'ro quë'rona etaëña. Eta maca curapi yëquëña.

⁶⁹ Maija'quë huë'e ñacaicohua'i ëjaëre necaicopi ñani cui'naopi ca huëo coña, iti maca pa'icohua'ina:

“Iquë cato Jesús ye'yacohua'i aquë api.”

⁷⁰ Jaje catoje ije cui'naëpi coso couña, ñama'quë a'ë caquë. A'ri maña tsoe maca pa'i maca Pedrorre iti maca pa'icohua'ipi careña:

“Më'ë Jesús ye'yacohua'i aquëre pa'ë. Më'ë cato Galilea aquë a'ë. Cui'ne më'ë coca cayeye Jesús ye'yacohua'i caye a'ë.”

⁷¹ Jaje caquëna, Pedropi yureta'a sañope co'aye caquë, cui'ne ñama'quë a'ë care payë caquë capi:

“¿Iquere mësarup yo'ojë caye'ni? Ñama'quë a'ë, jaëte.”

⁷² Caquëna, cui'naëpi cura yëni copi. Jaje cura yë'i maca yureta'a Pedro cuasa ñajaji'i, Jesús ite case'e. Jesús cato ca'aji'i: “Ja yë'ta'a cura cayeye yë'ima'ëna më'ëpi toasoñe ñama'quë a'ë caquë cosoj'a'quë a'ë.” Jaje jì case'eje tji'aëna, itire cuasa ñajani ota huëoni ai oji'i.

15

Jesupi Pilato Quë'rore Pa'iyë

(Mt 27.1-2, 11-14; Lc 23.1-5; Jn 18.28-38)

¹ Ñata tome maca Maija'quë huë'e ñacaicohua'i ëjaohua'ipi tsi'sireña, judío johua'i ja're, cui'ne cuañese'e ye'yacohua'i ja're, cui'ne pai yo'oye ñani ca tëjicohua'i ja're conì. Tsi'sini ca tëjini Jesure sëasiquëni Pilato quë'rona sareña.

²Ja maca Pilatopi ite ñani sequëña:

“¿Më'ë a'ë, judío pai ëjaërepa?”

Caquëña, Jesupi sehuouña:

“Jaje pa'ijë'ë, më'ë cayeje.”

³Maija'quë huë'e ñacaicohua'i ëjaohua'i cato jaiye sañope careña.

⁴Jaje cajëna, Pilatopi tjjupë seni çouña, Jesure:

“¿Me yo'oquë sehuoma'quë'ni? Ñaquë më'ë johua'i më'ëre sañope caye.”

⁵Jaje catoje Jesús cato ti sañope sehuoye paëña. Jaje paquëña, Pilato ai cuasaëña: ¿Me yo'oquë paquë'ni? caquë.

Jesure Huani Pa'iji Caye

(Mt 27.15-31; Lc 23.13-25; Jn 18.38-19.16)

⁶Pilato cato judío pai tsi'si mu'seña tì'aëna, tseasiquëre eto saquë yo'oquë paquëña, paipi yëjë sequëni.

⁷Jaro co sitore paquëña, Barrabás hue'equëpi yecohua'i paire huaisicohua'i ja're çoni.

⁸Paipi Pilatore dani seteña: Jare më'ë yo'oyeje pa'ye yo'ojë'ë, cajë.

⁹Jaje cajëna, Pilatopi sehuouña:

“¿Yëye judío pai ëjaëni eto saoye?”

¹⁰Ja cato caëña, coa i de'oye yo'oyere ëa ñajë pëijë Maija'quë huë'e ñacaicohua'i ëjaohua'ipi tseani yo'oyë cuasaquë.

¹¹Jaje pa'iquëta'are Maija'quë huë'e ñacaicohua'i ëjaohua'ipi paire ca ço'me huesojë cui'ne yëhuoreña, Barrabásni eto saoja'quëre sejë'ë, cajë.

¹²Ja maca Pilatopi paire sequëña:

“¿Me nejaquë caye'ni, mësarü judío pai ëjaë hue'yoquëre?”

¹³Caquëña, jaohua'ipi careña, cuijë:

“Queja'quë pa'ijaquë.”

¹⁴Cajëna, Pilatopi caëña:

“¿Iquere i co'aye yo'o u'ni?”

Jaje catoje johua'i jero sa'na ai cuireña:

“Queja'quë api.”

¹⁵Jaje asani Pilato Judea paini de'o cajei pasi'i caquë Barrabásni joye sauña. Jesuni si'seni queja'quëre jëjo saquë.

¹⁶Ja maca soldado paipi jai pai tsi'sini Jesure pai ëjaë huë'ere pana sareña.

¹⁷Sani nea maja'i çare suñani cui'ne miu maro puani sareña.

¹⁸Ja jeteyo'je cue'cuejë cuireña:

“¡Pa'ijë'ë. Yure judío pai ëjaërepa!”

¹⁹Jaje cajë sïopëna të'careña, tarapi. Copi tse'sejë, cui'ne do're ja'rujë ëjaëre pa'ë më'ë cajë yo'oreña.

²⁰Jaje ite cue'cue tëjini maja'i ju'i ça dutani i ju'i çare pare suñacateña. Ja jeteyo'je i ju'i ça dutareña, queja'quëre.

Jesure Huani Jeose'e

(Mt 27.32-44; Lc 23.26-43; Jn 19.17-27)

²¹Cirene aquëpi tsiopi daina, ñani Jesure queja'coni hue'ejë'ë, cajë soldado paipi cuañereña. Jaë cato Simón hue'equë paji'i, Alejandro cui'ne Rufo pëca ja'quë.

²²Ja maca Jesure Gólgotana sareña, pai sïopë tara hue'e hue'ñana pai coca cato.

²³Jarona Jesure quereña.

²⁴Queni soldado paipi Jesús ju'i çare nepi saja'cohua'i a'ni cajë neñareña, de'hue nesiquëpi saye pa'iji cajë.

²⁵Ja yo'o maca cato nea hue'ña nueve paji'i, ite quësi maca.

²⁶Toyasicore i sïo sa'nihuëna sëoreña, ja do'ire queñë cajë. Toyasicopi capi: JUDÍO PAI ÈJAËREPA.

²⁷I ja're çoni caya co'amaña yahue imacohua'ire quehuë. Te'ire ëja te'tena cui'ne yequëni ari te'tena nëconi quehuë.

²⁸Jaje yo'o maca toyase'e ñeje caye tì'api: “Co'acohua'i ja're çoni que cuañopi.”

²⁹Cui'ne coa da saicohua'ije ite ñajë cue'cuejë ñeje cajë sateña:

“¡Asajë'ë. Yure më'ëpi Maija'quë huë'e nejoní toaso mu'seña pa'i maca huajë huë'e nesi'i caquë maca!”

³⁰Yure co'ye huasoni da caje ñajë'ë, quësi sarahuapi.”

³¹Jaje cui'ne Maija'quë huë'e ñacaicohua'i ëjaohua'ije, cui'ne cuañese'e ye'yacohua'ije ite cue'cuejë careña:

“Yecohua'ita'are huasopi. Jaje pa'iquëta'are ija'a co'ye huaso tì'añe paji.”

³² Israel pai éjaépi Cristore papi caja'cohua'i a'è cruzupi caje nëcaquëna, ñanita'a careña. I ja're coní te'e quesicohua'ique íte pëteña.

Jesús Ju'ise'e

(Mt 27.45-56; Lc 23.44-49; Jn 19.28-30)

³³ Je'nërepa mu'se jopo t'ja maca si'a yeja ñamije pa'io ne huesëoña. Toaso hora jaje paquëña.

³⁴ Jare ja maca Jesús tuturepa cuiña ñeje:

“Eloi, Eloi ¿lama sabactani?” Jaje cani caye a'ë, ¡Yë'ë Diosu maca, yë'ë Diosu maca! ¿Me yo'oquë yë'ëre jeocou'ni, te'ire?

³⁵ Jaje cuiquëna, íti maca pa'icohua'ipi asani careña:

“Asajë'ë. Tsoe aquë Maija'quëre quëacaiquë Elíasni cuiji.”

³⁶ Jaje cajëna, íohua'i aquëpi huë'huëni o'sa conore yëi sëohuëna saquëni ucujaquë caquë sani nëoquë caëña:

“Coa ñajë'ë. Ñañu'u, Elíaspi íte cruzu dequëre casa nëcoquëna.”

³⁷ Ja maca Jesús ai tutu cuiñi jüni huesëña.

³⁸ I ju'i maca Maija'quë huë'ë joporepa tëhuocopi jopore paja'a cayayese'e meñe yete saquëña.

³⁹ Romano Capitánpi Jesús je'ñerepa nëcasiquëpi jaje Jesús cuiquë jüni huesëquëna, ñasiquëpi caëña:

“Nuñerepa iquë Maija'quë mamaquërepa paji'i.”

⁴⁰ Cui'ne nomiohua'i so'opi de ñajë nëcareña. Jaohua'i cato paë'ë, María Magdalena. Cui'ne yeco paco'ë, María, Jacobo posërepa, José cui'ne Salomé, pëca ja'co.

⁴¹ Iye nomiohua'i cato Jesure cõcaicohua'i pateña. I Galilea cu'i maca cui'ne jarote jai pai yecohua'ije pateña, Jesús ja're Jerusalenna saiscohua'ije.

Jesure Tase'e

(Mt 27.57-61; Lc 23.50-56; Jn 19.38-42)

⁴² Ñamina'a huajë mu'se pa'ija'coa cajë fiesta yo'o ja'ñe ne de'hua mu'se na'iquëna,

⁴³ José Arimatea aquëpi pai yo'oye ñani ca tējicohua'i éjaohua'irepa aquë paquëña. Jaë cato Maija'quë cuañe te'te yo'oyere utequë paquëña. Jaje pa'ipi Pilato quë'rona si'a tuturepa cacani ca'rama'ë Jesús capëre tasi'i caquë sequëña.

⁴⁴ Jaje seina, Pilatopi ai cuasaëña, í jüni huesëre pa'ë caquë. Jaje cuasa do'ire Capitánre soini í jüni huesë caquë seni asaquëna, ju'ire papi, caëña.

⁴⁵ Jaje caëna, asani Pilatopi Jesús capëre saye de'oji caëña, Josére.

⁴⁶ Caëna, Josépi sani Jesús capë casani jai do'i sabanare hueroni deani quëna yejana coje nesicona tani quëna pëpi sjouña.

⁴⁷ Tajëna, ñareña, María Magdalena cui'ne María José pëca ja'co coní.

16

Jesús Ju'isiquëpi Huëise'e

(Mt 28.1-10; Lc 24.1-12; Jn 20.1-10)

¹ Huajë mu'se tëto sai maca María Magdalena cui'ne Jacobo, Salomé pëca ja'copi María coní huëo së ma'ñare hueroni sateña, Jesús capëre huëo sëñepi neñu'u cajë.

² Semana huëo mu'serepa ai nea huë'ñarepa tsoe ësë pa'ina, sani t'j'areña, tasi daripë quë'ro.

³ Íohua'ija'a sa'ñe careña:

“¿Nepi jai quëna pë hui'yoja'cohua'i a'ni?”

⁴ Jaje cajë ñajëna, tasi daripëpi tsoe hui'yosico pacoña.

⁵ Pa'iona, ñani tasi daripëna cacareña: Cacajë ñajëna, éja te'tere poja'i ju'i çare posëpi ju'i ñuquëña. Jaëni ñani ai quëquëreña.

⁶ Quëquëjëna, ípi caëña:

“Quëquëma'pë pa'ijë'ë. Mësarü cato Jesús Nazaret aquëni co'eyë, quë sarahuana quesiquëni. Jaje pa'iquëta'are í cato tsoe huëji'i. Peoji, íño. Ñajë'ë. Íte oa sitore peoji.

⁷ Mësarupi sani í ye'yacohua'ire cui'ne Pedrorë quëajë'ë. Galileana du'ru saija'quë api. Jarona íte ñaja'cohua'i a'ë, í ja'rë mësarute quëase'eje.”

⁸ Ja maca nomiohua'ipi quëquë huesëni tsasijë etani tasi daripëpi sateña. Co'ini yecohua'ire quëaye pareña, quëquë huesësicohua'i pa'ijë.

María Magdalenapi Huëisiquëre Du'ru Ñase'e

(Jn 20.11-18)

⁹ Semana huëo mu'se huëisiquëpi du'ru macarepa María Magdalenana ñaiña. Jaõ cato siete huatíohua'ire eto sao cuañosico paco'ë.

¹⁰ Jaopi yureta'a ñani sani quëaofña, i ja're cu'ijë pa'isicohua'ire oijë co'a ju'ijë pa'icohua'ire.

¹¹ Jaohua'ipi quëacona, asani care paco cuasaye pareña, io case'e.

Ite Ye'yecohua'ipi Cayahua'i Ñase'e

(Lc 24.13-35)

¹² Ja jeteyo'je Jesús ñaiña, cayaohua'i tsiona ma'aja'a saicohua'ina.

¹³ Jaohua'ipi sani yecohua'ire quëareña. Quëajëna, jaohua'ijë coa cayë cuasajë asaye pareña.

I Once Soisicohua'ipi Ite Ñase'e

(Mt 28.16-20; Lc 24.36-49; Jn 20.19-23)

¹⁴ Ai tsoe maca yureta'a once i ye'yacohua'ina ñaiña, mesare ñu'ijëna. Ñaini jaohua'ire yëhuo nu'ñeiña, ju'isiquëpi huëisiquëre ñani quëacohua'ire asacaiye pasi do'ire, iohua'i jëa joña hue'e do'ire.

¹⁵ Yëhuoquë caëña:

“Si'a hue'ña sani cu'ijë iye huaso cocare quëajë'ë, si'a paire.

¹⁶ Quëajëna, asani quëare payë caquë asaquëni oco dosiquëpi huasosiquë pasipi. Jaje quëajëna, coa cayë caquë asama'quë cato nejosiquë api.

¹⁷ Iye tuture paja'cohua'i a'ë yë'ëre asacohua'i cato: Yë'ë mamipi cajë huatire eto saoja'cohua'i a'ë. Huajë cocapi caja'cohua'i a'ë.

¹⁸ Añare tseaja'cohua'i a'ë. Tsimare ucusicohua'i paniye ai yo'oye paja'cohua'i a'ë. Cui'ne yequeje, ju'icohua'ire patojëna, co'yaja'cohua'i a'ë, ju'icohua'ipi.”

Jesupi Ma'tëmo Saise'e

(Lc 24.50-53)

¹⁹ Jaje ca tējini Ejaë Jesús ma'tëmona sa cuañopi. Jaroni Diusu ëja te'te ñu'i saihuëna ja'ruña.

²⁰ Ja maca jaohua'ipi si'a hue'ña cu'ijë quëareña, huaso cocare. Jare Ejaëpi cōcai cui'ne i'pi pai yo'o tja ma'ñere yo'o iñoquëna, quëareña, huaso coca. I cocare pa'ë caquë yo'oquëna, ja yo'oyepi iñojë huaso cocare quëareña. Ca tējihuë.

SAN LUCAS

Asajajë Caquë Toyaye

¹⁻² Iti du'ru huëose'e ñasichua'ipi de'o coca quëajëna, asajë jai pai toyahuë, mai quë'ro yo'ose'e're.

³ Jaje pa'ina, yë'ëje asare paquë ite yo'ose'e'je pa'ye du'ru huëose'e're papi toyayë, më'ëna, Teofilo, yë'ë cajei.

⁴ Më'ëpi më'ëre ye'yase'e're tñharepa asa tñ'aja'quë caquë.

Huiñaë Quëase'e Juan Coase'e're

⁵ Herodes Judea pai ëjaë pa'i maca, te'i Maija'quë huë'e ñacaiquë Zacarías hue'equë paji'i, Abías tsëcapë aquëpi. I paco Elisabet hue'ecopi, Maija'quë huë'e ñacaiquë Aarón tsëcapë aco paco'ë.

⁶ Cayahua'i de'oye nuñerepa pa'icohua'i paë'ë, Maija'quë ña hue'ña pa'iohua'ipi i cuañese'e cui'ne i case'e're de'oye sehuocohua'i paë'ë. Jaje pa'icohua'ini yecohua'ije co'aye pa'iyë caye ti peocohua'irepa paë'ë.

⁷ Jaje pa'iquëta'are mamajëre peocohua'i paë'ë. Elisabetpi mamajëre pama'co paco'ë, carao. Cui'ne jaje pa'iohua'ipi si'a jupë aiohua'i maña paë'ë.

⁸ Te'e mu'se Zacarías ja're Maija'quë huë'e ñacaiquë pa'icohua'ipi yequë yo'o tējina jare jajese'e si'a iohua'i tsëcapë yo'oye paji'i, Maija'quë pa'i hue'ñana.

⁹ Jaje pa'iohua'ija'a nepi ma'ñare ëojë yo'oye pa'iquë'ni cajë neñajëna, Zacaríasna tompëpi, iti yo'oye. Tomeina, Maija'quë huë'ëna cacapi.

¹⁰ Cacani huëo sēñere ëoquëna, hue'seja'a jai pai Maija'quëre sejë paë'ë.

¹¹ Ja maca Ejaë jo'yaëpi huiñaëpi Zacarías huëo sēñe ëo sai huë ëja te'tena ñai necapi.

¹² Nëcaquëna, Zacaríaspi ñani me neja'quë a'ni caquë quëquë huesëquëna.

¹³ Ejaë jo'yaëpi capi, ite:

“Zacarías ca'rama'ë pa'ijë'ë. Maija'quëpi më'ë seña asapi. Jaje pa'ina, më'ë paco Elisabetpi tsihua'ëre pasio. Pacona, më'ëpi i mami hue'yojë'ë, Juanre.

¹⁴ Më'ë ite sihuaja'quë a'ë, cui'ne yecohua'ije jai pai ite coasi maca sihuaja'cohua'i a'ë.

¹⁵ Më'ë mamaquë cato de'oyerepa yo'oquë pa'ija'quë api, Maija'quë jo'yaëpi. Jaje pa'ipi ja yë'ta'a ite coama'në Maija'quë joyopi ini pa'ija'quë api. Pa'ina, cuepe ëaye neñe cono ucuma'quë pasipi.

¹⁶ Jaëpi jai pai Israel paire cui'naohua'ipi iohua'i mai Ejaë Diosuna co'ye asa coñe necasipi.

¹⁷ Maija'quë ñacaina, iquë Juan de'oye yo'oquë pa'ija'quë api, mai Ejaë pai deojajë. Jaje pa'ipi, tsoe hue'ña Maija'quë jëjo daoquë Elías yo'oquë pa'isi tuture hue'equë pasipi. Jaëpi pëca ja'quëohua'i ja're mamajë de'oye pa'iyë necasipi. Jaje sehuoma'cohua'ire ponaja'quë api, Ejaëre de'oye asaja'cohua'ire, mai Ejaë pai deojajë.”

¹⁸ Zacaríaspi Maija'quë huiñaë seji'i, ñeje:

“¿Yë'ëje ai maca pa'ina, cui'ne yë'ë pacoje aio maca pa'ito me yë'ë nuñere pa'ë caquë asaye'ni?”

¹⁹ Caquëna, Maija'quë huiñaë ite sehuouña:

“Yë'ë Gabriel a'ë, Maija'quëre necai pa'iquë. Jaje pa'ina, yë'ëre ipi jëjo daouna, iye huajë coca quëasi'i, më'ëre caquë daë'ë.

²⁰ Jaje pa'iquëta'are yure më'ë yë'ë nuñerepa quëayere asama'ë pa'isi do'ire cama'quë de'oní cama'ë pa'ija'quë a'ë, më'ë mamaquëre coa macaja'a iye case'e tñ'a ja'ñe a'ë, iti mu'se tñ'aëna.”

²¹ Jaje yo'oquë Maija'quë huë'e ëo hue'ñana cacasiquëpi tsoe nëina, yecohua'i hue'se pa'icohua'i iquere yo'oquë Zacarías etama'quëpi nëi pa'ini cajë utehuë.

²² Utejëna, jaropi Zacarías etani jaohua'ire cama'ë paji'i. Jaje cama'ëna, ñani caní ñañeje pa'ye Maija'quëre se hue'ñana cacani ñapi, cuasahuë. Jaje pa'ipi coa jëtë a'uñese'epi capi, cama'quë ponëse'e sète.

²³ Zacarías Maija'quë huë'e coçai mu'seña carajaisi maca, saji'i, i huë'ëna.

²⁴ Ja jeteyo'je i paco Elisabet tsj ëtapë de'o. De'oní cinco ñañëohua'ire io huë'ëpi yequë hue'ña saima'o ai cuasaco paco'ë, ñeje:

²⁵ Ejaëpi yure yë'ëre jaje ñacai yo'opi, paipi tsj pama'coa cajë cue'cuema'pë pa'ijajë caquë.

Huiñaë Quëase'e Jesús Coase'e

²⁶ Seis ñañëohua'i pa'i maca Maija'quëpi i huiñaë Gabrielre Galilea yejana Nazaret hue'e daripëna jëjo saopi.

27 Nomi tsjo María hue'ecopi ëmëohua'ire yo'oma'core do'i ñaja'quëni caquë. Jao cato José hue'equëna, huejaja'coa. Ca nëosicopi paco'ë, ëjaë David tsëcapë aquëna.

28 Maija'quë jëjo daoquëpi jo pa'i hue'ñana cacani capi:

“Pëpayë, më'ëre. Sihuajë'ë. Mai Ëjaëpi më'ë ja're pa'iji. Diusupi si'a nomiohua'i sihuaye jerepa isipi, më'ëre.”

29 Jaje caquëna, iopi Maija'quë jëjo daoquëre ñani quëquëo j cocare asaco cui'ne ja maca co'ye seço'ë: “¿Me yo'oquë jaje pëpaquë'ni?”

30 Jaje cacona, Maija'quë huiñaëpi capi, iote:

“María ca'rama'o pa'ijë'ë, Maija'quë më'ëre sihuaquë api.

31 Yurepi pai quë'io de'oni më'ë tsihua'ëre paja'coa'ë. Paco j mami hue'yojë'ë, Jesure.

32 Jaë cato jerepa pa'i pa'ija'quë api, jaje pa'ipi Maija'quërepa mamaquë paipi hue'yoquëni. Jaje pa'ina, Maija'quëpi pai ëjaë David ñu'i saihuëre isija'quë api, pai ëjaëre de'huani.

33 Israel paire ti cuañequërepa pa'ija'quëpi, j cuañeñe cato carajaiñe peoja'coa.”

34 Ja maca Mariapi Maija'quë huiñaëre seço'ë:

“¿Me iye jaje yo'o ja'ñe a'ni, yë'ë ëmëohua'i ja're cõni pa'ima'core?”

35 Cacona, Maija'quë huiñaëpi sehuouña:

“Maija'quë joyopi më'ëna necaina, cui'ne Maija'quërepa tutupi më'ëna sirio tsiocaiyeje tsiio daija'coa. Ja do'ire më'ë mamaquëre Maija'quë mamaquë hue'yoja'cohua'i a'ë.

36 Jaje cui'ne më'ë cajeo tsëcapë aco Elisabetje tsihua'ëre paja'coa, aio macata'a. Tsj pama'coa pai cajë pa'isicota'a seis ñañëohua'ire pai quë'io pa'ico, yure.

37 Maija'quëre cato neñese'e pa'iji. Peoji, j ja'rujaiñe.”

38 Ja maca Mariapi cao:

“Yë'ë cato Ëjaë jo'yao maca'ë. Maija'quëpi më'ë case'eye yo'oja'quë yë'ëre sihuayë.”
Jaje Maija'quë huiñaë iyese'e quëani saji'i.

Mariapi Do'i Saiye Elisabet Quërona

39 Ja mu'seña María esa saco'ë, Judea cuti quë'rore pai daripë pa'i hue'ñana.

40 Sani Zacarías cui'ne Elisabet pa'i huë'ena cacani pëpao.

41 Pëpacona, Elisabetpi jo pëpaye asa maca tsihua'ë ëtapë pa'iquëpi ti'topi Maija'quë joyopi ioni pa'ina, paco'ë, Elisabetpi.

42 Jaje pa'ioipi tutu cao:

“Maija'quëpi më'ëre yequë nomiohua'ire sihuaye necaiye jerepa de'oye necaji'i. Cui'ne më'ë mamaquë ai de'oquërepa pa'ija'quë api.

43 ¿Ique o'ni, yë'ë jaje yë'ë Ëjaë pëca ja'copi do'i dani ña ja'ñe?”

44 Më'ë yë'ëre pëpacona, asa maca tsihua'ë yë'ë ëtapëpi sihuaquë teapi.

45 Ai sihuayë, më'ë case'ere care paji caco asa do'ire.”

46 Ja maca María cao:

Yë'ë ai sihuayë, Maija'quëre.

47 Cui'ne yë'ë joyopi sihuayë, Maija'quë yë'ëre huasoquëna.

48 Maija'quëpi j jo'yao ai cuasaye peocore de'oye cuasapi.

Yureta'a jaje yo'oquëna, si'a paipi ai sihuaco si'anë cajä'cohua'i a'ë.

49 Maija'quë ai jerepa tutu quë'ipi yë'ëna de'oye necaë'ë.

Yë'ë Ëjaë j mami cato ai de'oyerepa.

50 Si'anë oiquë api, iite ca'racohua'ire.

51 Tutu quë'i co'amaña yo'oquë nepi, j jëñapi.

Jerepa pa'iohua'i a'ë cuasa joñoa hue'ecohua'ini meñe quëconi huahue huesopi.

52 Ñajë'ë, j yo'ose'ere: Ëjaohua'i pa'isicohua'ini meñe peocohua'ire nequë

Cui'ne iti jerepa pa'iohua'i a'ë cuasama'cohua'ini ñese mëose'ere.

53 Ao ëa ju'icohua'i pa'isicohua'ini de'oye ao timëpi.

Cui'ne jaiye co'amaña pasicohua'ini coa peo jëña ne saopi.

54 De'hue cõcaji'i, Israel paire.

I jo'yare huänëyema'ë oji'i.

55 Abrahamre ca nëose'ere de'oyerepa yo'opi, mai aiohua'ire.

Cui'ne jaje Abraham tsëcapë Israel paire de'oye yo'oja'quë api, si'anë jajese'e.

56 Ca tëjimi pëpao, Elisabet huë'ena, toaso ñañëohua'ire. Pëasicopi pani tëjimi jeteyo'je jo huë'ena co'io.

Juan Ti Doquë Coase

57 Ja jeteyo'je Elisabet tsihua'ëre cõa mu'seña ti'aëna, mamaquëre pao.

58 Jo cajeohua'i cui'ne do'icohua'i ja'ye pa'icohua'i sani pëpahuë, iote, Maija'quë de'oye yo'ose'ere asani sihuajë.

⁵⁹ Ocho mu'seña pa'i maca sahuë, cui ri ca'nihuë tēañu'u cajë Israel pa'i deojajë cajë, cui'ne pēca ja'quë Zacarías mamire sēoñu'u cajë yo'ohuë.

⁶⁰ Jaje cajēna, pēca ja'copi cao:

“Pani, i cato Juan hue'eye pa'iji.”

⁶¹ Jaje cacona, iote cahuë:

“¿Me yo'oquë jaje hue'equë'ni, mē'ë pairepa ja mamire hue'ecohua'i peoyë. Jaje pa'i mami hue'ecohua'i peoto?”

⁶² Ja maca tsihua'ë pēca ja'quëre moñopi iñojë sei'ë:

“¿Ique mamire hue'yoye yëquë'ni?”

⁶³ Sejēna, pēca ja'quëpi soquë totore dajë'ë caquēna, isirena, iona toyapi: “I mami cato Juanpi.” Jaje toyaēna, si'a hua'i ai cuasajë ñahuë.

⁶⁴ Ja macapi Zacaríasje cui'naēpi coca caquë de'oni Maija'quëre sihuaquë ca huëopi.

⁶⁵ Jaje iye yo'ose'ere ñani i quēno maca pa'icohua'i ai cuasahuë. Cui'ne iye yo'ose'ere si'a Judea ai cuti pa'icohua'ire quëajēna, asahuë.

⁶⁶ Si'ahua'i iti quëaye asacohua'i itire cuasahuëni asa'ñe nēina, sēnirojaë'ë:

“¿Me yo'oquërepa ai de'ojaj'quë a'ni, jaë tsihua'ë?”

Maipi ñahuë, Maija'quëre papi ite ñacaise'e.

Zacarías Jujuse'e

⁶⁷ Zacarías Maija'quë jayo tjemësiquëpi Maija'quë isi yë'opi capi:

⁶⁸ Sihuañu'u, mai Ejaëre Israel pa'i Diusure.

Jaë cato maina dani huasopi.

⁶⁹ Maina Maija'quëpi isipi tutu quë'ire, paire huasoquëre.

Jaë cato i jo'yaë David tsëcapë aquëpi.

⁷⁰ Maija'quëpi ñeje ca nēoa'ji'i, i case'ere quëacaicohua'i tsoe huë'ña acohua'i ja're:

⁷¹ Maire huasosi'i, si'ahua'i maire coejë sañope yo'ojēna, pa'icohua'ire.

⁷² Mai aipëre teaye ñaquë

I ca nēose'e huañēñema'ë de'oye necaji'i.

⁷³⁻⁷⁵ Yë'ēna isisicohua'ipi nuñe pa'icohua'ipi ca'rama'pë

Yë'ere necaicohua'i ti pa'ija'cohua'i a'ë caquë

Mësarute sañope yo'oyere huasosi'i ca nēopi, mai ai ñecuë Abrahamre.

⁷⁶ Maija'quërepa quëacaiquë hue'yoja'cohua'i a'ë, paipi,

Më'ëpi mai Ejaë saija'a ma'are nui ma'arepa sani ne de'huaja'quëni.

⁷⁷ I paire de'hue iohua'i co'aye yo'o do'ire sa'i de'huacaiye pa'iji, quëaja'quë a'ë, mē'ëpi.

Ja do'ipi huasosicohua'i pa'ija'cohua'i a'ë.

⁷⁸ Maija'quë oi cui'ne teaye ña do'ipi,

Ësë ñata maca mëi miañeje pa'ye maire huasoquë ma'tëmopi daija'quë api, maire miaja'quë.

⁷⁹ Huesëcohua'ire juni tējicohua'ire miacai

Cui'ne de'oye i maire huasoye asajajë caquë pa'iyere ye'yaja'quë api.

⁸⁰ Juan ai de'opi. Cui'ne i joyoje ai de'opi. Ai de'oquëpi pa'i peo huë'ña cuñe yejare paji'i, Israel paire quëa huëo macaja'a.

2

Jesús Coase'e

(Mt 1.18-25)

¹ Ja mu'seña pa'i ejaë César Augustopi si'a yeja pa'icohua'ire cuëcuyey pa'iji caquë cuañepi.

² Iye du'ru macarepa paire cuëcuyey cato yo'ohuë, Cirenio Siria cuañequë pa'i maca.

³ Jaje pa'ina, si'ahua'i saiye paji'i, pa'i ñape iohua'i daripëre pana jaron a cuëcuyey cuañoja'cohua'ipi.

⁴ José cato David tsëcapë aquë paji'i. Ja do'ire Galilea yeja daripë Nazaretpi sani Judea yeja daripë Belénna saji'i, Davidre coa sitona.

⁵ Toya cuañoja'quëpi Belénna saji'i, María i huejaja'coa ca nēosicopi coañe t'i'a huesësicopi ja're.

⁶ Jaje sani Belénre pa'ijēna, María coañe t'i'aēna,

⁷ jaron a pao, io du'ru mamaquëre. Pani caña catipëpi tunani huequë ai de'huana oao, pa'i pëa huë'ña peo do'ire.

Huññaëpi Yëi Ñamare Ñacohua'ire Quëaye

⁸ Belén quëno macare yëi ñamare ñacohua'ipi ñamique tsiore iohua'ini ñajë pa'ë.

⁹ Pa'ijēna, cuasama'tore papi Ejaë huññaë ñai nēcaquēna, Maija'quë miañepi iohua'ire mia huësoquēna, ai quëquë huesëhuë.

¹⁰ Jaje ña quëquëjēna, Maija'quë huññaëpi capi:

“Ca'rama'pë pa'ijë'ë, mësarute huajë coca quëasi'quë daiyë, mësaruru si'ahua'i asani ai sihua ja'ñere.

¹¹ Yure David daripëna tsitu'ure coaco, mësarute huasoja'quëpi. Jaë cato Cristo Ejaëre papi.

¹² Mësaruru ñani i api cuaca ja'ñere caña çatipëpi tunani huequë ai de'huana oasiquëpi uina ti'aja'cohua'i a'ë.”

¹³ Te'i Maija'quë jo'yaë huiñaë ñai macapi yecohua'i ma'tëmo acohua'ije ñaihuë. Ñeje cajë Maija'quëre sihuajë:

¹⁴ Sihuajë de'oyerepa cañu'u, Maija'quëre ma'tëmo aquëre,

De'oye pa'iyere pa'ijë'ë, i'pi sihuaquëna pa'icohua'ipi.

¹⁵ Maija'quë jëjo daosicohua'i ma'tëmona col'isi maca yëi ñamare ñacohua'ipi iohua'ija'a sa'ñe ca huëohuë.

“Jaje pa'ito esa Belënna sani ñañu'u, ëjaë maire quëase'ere.”

¹⁶ Sani ti'ahuë, Mariare, Josëre cui'ne tsihua'ëpi huequë gocona oasiquëpi uina.

¹⁷ Jaje ite ñani Maija'quë jo'yaë iohua'ire quëase'ere quëareña.

¹⁸ Quëajëna, asacohua'ipi ai cuasareña.

¹⁹ Jaje yecohua'i yo'ojëta'are María cato io joyona de'hua, si'aye iye, ti yo'ose'ere cuasaco.

²⁰ Yëi ñamare ñacohua'i si'aye iohua'ire case'eje paye pa'ina, ñani Maija'quëna sihuajë jëjëjë co'ihuë.

Maija'quëna Jesure Isiye

²¹ Ocho mu'seña pa'i maca tsihua'ë ca'ni maña tëajë cui'ne i mamije hue'yohuë, Jesús, huiñaë Mariare ja peoco pa'i maca quëase'ere.

²² Tsitu'ure pasi jeteyo'je si'sire tosa to mu'seña ti'aëna, Jerusalén daripëna saijë tsitu'ure je sahuë, Maija'quëna isihu'u cajë, Moisés cuañese'epi jaje caye sëte.

²³ Jaje yo'ohuë, ëjaë cuañese'epi ñeje toyase'e pa'i do'ire: “Si'a ëmë tsi du'ru coacohua'i Maija'quëna isisicohua'i pa'ija'cohua'i a'ë.”

²⁴ Ejaë cuañënepi caji: “Caya pi'are panita'a caya su'tere isijë'ë.” Ja yo'oyere cajë saë'ë.

²⁵ Ja mu'seña Jerusalén pa'iquëpi Simeón hue'equëpi pajli'. Nuiñerepa pa'iquëpi Maija'quëre sei pa'iquëpi, Israel paire huasoyere utequë pajli'. Jaje pa'ina, Maija'quë joyopi Simeón ja're pa'i

²⁶ quëapi, më'ë ju'iñe paja'quë a'ë, ëjaë jëjo daoquë Cristore ñama'ë pani.

²⁷ Maija'quë joyopi quëaquëna, Maija'quëre se huë'ena sani pa'ina, Jesús pëca ja'quëohua'i tsihua'ëre cuañese'e cayeje neñu'u cajë Maija'quëre se huë'ena dahuë.

²⁸ Dajëna, Simeónpi tsihua'ëre coani Maija'quëna sihuaquë capi:

²⁹ Ejaë, yë'ë yureta'a sihuaquë ju'iñe pa'iji.

Më'ë ca neose'ere ñasiquëpi.

³⁰ Yë'ë ñaco capi huasoquëre ñahuë,

³¹ Si'a pai ña hue'ñana më'ë necaisiquëre.

³² Jaë api, Israel peocohua'ire miacaija'quë

Cui'ne i do'ire yecohua'ipi Israel pai ai de'ocohua'i a'ë, caji'cohua'i a'ë.

³³ Simeón tsihua'ëre ñaquë cayerë ai cuasareña, pëca ja'quëohua'i.

³⁴ Ja maca Simeón Maija'quëpi de'oye ñacaija'quë icohua'ire caquë Maija'quëre seji'i. Seni tējini Mariare capi, Jesús pëca ja'core:

“Asajë'ë. Iquë tsihua'ë jai paire Israel paire ne tañojaquë api. Cui'ne jai paire Israel paire Maija'quëre tuiye huëoquë yo'oja'quë api. Jaje pa'ina, jai pai ite sañope caji'cohua'i a'ë.

³⁵ Cui'ne, iquë do'ire jai pai pai ñape iohua'i joñoa cuasaye ñahe pa'ija'coa. Jaje pa'iquëta'are më'ëreta'a si'aye iye yo'oyete cuasani hua'tipi më joyoja'a tota etojaiñeje pa'ye pa'ija'coa, oi do'ire.”

³⁶ Cui'ne jarote te'o nomio yequë mu'se pa'i ja'ñere asaco quëaco. Ana hue'eco, Fanuel mamaco paco'ë. Aser tsëcapë aco, aio maca paco'ë. Nomi tsjopi huejani siete ometëca ëjëre pani hua'jesicopi paco'ë.

³⁷ Yure cato hua'jeopi ochenta y cuatro ometëca paco'ë. Maija'quëre se huë'epi etama'copi ñamifa cui'ne mu'seña Maija'quëre sihuaco go aima'o seo paco'ë.

³⁸ Jao Anapi iti jaje yo'ojë ca maca dani Maija'quëre du'ru se de'oji caco pëpa toni Jerusalén paire huaso ja'ñere utecohua'ini quëaco, tsihua'ë Jesús yo'o ja'ñe ayere.

Nazaretna Co'iyë

³⁹ Ja maca si'aye ëjaë cuañese'e yo'o tējini co'ihuë, Galileana iohua'ipa'i daripë Nazaretna.

⁴⁰ Tsihua'ë i ai de'oyeje ai tutu quë'i cui'ne ai ta'ñe pa'i de'opi, Maija'quëpi ite de'oyerepa ñacaina.

Jesús Maija'quë Huë'ere Pa'iyë

⁴¹ I pëca ja'quëohua'i coa si'a ometëcaña Jerusalénna saë'ë, Israel pai Egíptopi etasi mu'sere cuasajë tsi'siyena.

⁴² Jesús doce ometëca tì'ani pa'i maca si'ahua'i Jerusalénna ja fiesta yo'oyena tsi'siñu'u cajë saë'ë, noni jaje yo'ojë pa'icohua'i sète.

⁴³ Ja fiesta carajaquëna, co'i maca tshua'ë Jesús Jerusalénna pëapi, pëca ja'co cui'ne José huesëjëna.

⁴⁴ Te'e mu'serepa ma'aja'a Jesuje daiji jai pai conì cuasajë saë'ë. Saijëta'a do'ijë quë'ro cui'ne ìohua'i ñacohua'i quë'ro co'ejëna, peopi.

⁴⁵ Peoquëna, ñani ja maca yureta'a co'ihuë, Jerusalénna co'eñu'u cajë.

⁴⁶ Toaso mu'seña pa'i maca tì'ahuë, Maija'quë huë'ere pa'ina, cuañese'e ye'yacohua'i ja're conì ja'rusiquëpi ñu'i ìohua'i cayere asaquë cui'ne ìohua'ireje sañope sei yo'oquëna.

⁴⁷ Si'a pa'icohua'i Jesús si'aye ta'ñe asaquëpi sañope de'oyerepa sehuoyere asajë quëquëhuë. Merepa ai asaquë'ni, jaë cajë ai cuasareña.

⁴⁸ Pëca ja'quëohua'ipi ìte tì'ajë ai cuasajëna, pëca ja'copi cao:

“Tshua'ë, më'ëni më ja'quë cui'ne yë'ë co'a ju'ijë co'erojainë. ¿Me nesi'quë jaje yëquëre, huesë ëaye yo'ou'ni?”

⁴⁹ Jaje cacona, Jesupi ìote capi:

“¿Me yo'ojë yë'ëre co'eye'ni? Huesëma'pë yë'ë cato ja'quë co'amañare yo'oja'quë a'ë.”

⁵⁰ Jaje caquëna, ìohua'ipi cuasaquë cayere asa tì'ama'pë paë'ë.

⁵¹ Ja maca ìohua'i ja're conì co'ipi, Nazaretna. Si'anë de'oye sehuoquë pajì'i, pëca ja'quëohua'ire. Pëca ja'copi iyere si'aye ìo joyona de'huaio.

⁵² Jaje yo'oquë Jesús ai de'opi, ì capë cui'ne ì cuasayeje. Maija'quëpi cui'ne paipi conì ì de'oye pa'iyere ñajë de'oquë api cuasahuë, tayoye peoquëna.

3

Juan Tì Doquëpi Yëhuoye

(Mt 3.1-12; Mr 1.1-8; Jn 1.19-28)

¹ Tiberio César pai ëjaë pajì'i. Ipi quince ometëca cuañequë pa'i maca Poncio Pilatopi pajì'i, Judea cuañequë ëjaë. Herodespi Galilea cuañequë pajì'i. I yo'jei Felipepi Iturea cui'ne Tranconite cuañequë pajì'i. Cui'ne Lisaniapi Abilinia cuañequë pajì'i.

² Maija'quë huë'e ñacaicohua'i ëjaohua'i cato Anás cui'ne Caifás paë'ë. Jaohua'i pa'i mu'seña Maija'quëpi Zacarías mamaquë Juanna capi, cuene yejare pa'ina.

³ Juan cato Jordán tsiaya quë'roja'a sai si'a hue'ña pai pa'icohua'ire capi: Ja'në co'aye cuasase'ere jeoni ponëne pa'iji. Ponëni oco dosicohua'ini Maija'quëpi mësaruru co'aye yo'ose'ere sai de'huaja'quë api. Jaje yëhuopi.

⁴ Tsoe ja'rë Maija'quë cayë quëacaiquë Isaiaspi toyaquë pa'ise'eje cui'ne japi tì'api, ì toyase'e caji:

Cuene yejapi pai cui'neje asa cuañoji,

Ne de'huajë'ë, mai Èjaë ma'are.

Nuñerepa ma'a necajjë'ë, ì cu'i hue'ña.

⁵ Yo'cohuë pa'ise'ere ne tì'më ja'ñe a'ë.

Jai cutì cui'ne a'ri cutì pa'ise'ere nui yejarepa ne ja'ñe a'ë.

Nui ma'aña peose'ere nui ma'aña de'huaye a'ë.

Dea pëa quë'i ma'aña pa'ise'ere nui yeja ne ja'ñe a'ë.

⁶ Ja maca Maija'quë paire huasoye si'a pai ñaja'cohua'i a'ë.

⁷ Ìte oco do cuañoñu'u cajë paipi ì quë'rona daicohua'ire Juanpi capi:

“Aña tsëcapë acohua'ì! ¿Nepi mësarute quëare'ni, Maija'quë pëi nejoquëna, jëa ja'ñere?”

⁸ Ponësicohua'i pani, ponësicohua'i yo'oyere yo'ojë'ë. Jaje yo'ojëna, ñani dosi'i. Abraham tsëcapë a'ë cama'pë pa'ijë'ë. Ja cayë tì'a ma'ñe a'ë. Maija'quëpi yëni iye quëna pëaje Abraham tsëcapëre neñe pa'iji.

⁹ Tsu'upito tsoe ne de'huasicoa, soquë ñëa cueja'core. Si'a soquë ñëa de'oye quëi ma'ñe cato cüeni toana ëocoa. Maija'quë tsu'upojë pa'i.”

¹⁰ Ja maca paipi ìte seteña:

“¿Jaje pa'ito ìquere neja'cohua'i a'ni?”

¹¹ Sejëna, Juanpi sehuopi:

“Caya ju'ì caña paquë pani te'ore ìsiye pa'iji, ti peoquëna. Añe paquë pani peoquë ja're conì añe pa'iji, te'e.”

¹² Pa'ì do'ì curiquë secohua'ijë oco do cuañoñu'u cajë daisicohua'ipi pa'ijë Juanre sei'ë:

“¿Ye'yaquë, ìquere yëquë neja'cohua'i a'ni?”

¹³ Sejëna, Juanpi capi:

“Cuañese'e cayë pa'ina, jerepa curiquë sëm'a'pë pa'ijë'ë.”

14 Soldado pa'icohua'ipi ite seteña:

“Cui'ne yëquë, ¿iquere neja'cohua'i a'ni?”

Cajëna, sehuopi:

“Tutu yo'ojë sioma'pë pa'ijë'ë, yecohua'i payere. Coa coso do'ire tsioma'pë. Cui'ne mësarute sañiere t'i'api cuasajë pa'ijë'ë, sihuani.”

15 Juanni Cristo pa'ima'quë cuasajë pai utehuë. I a'ë caquëna, asañu'u cajë.

16 Cuasajëna, Juanpi capi:

“Ocopi doyë, mësarute. Ja yë'ta'a yë'ë jeteyo'je daija'quë api, yë'ë jerepa de'okuëpi. I jo'yaë i zapato joyecaiquë yë'ëre tëto saisiquë api. Yë'ë jerepa teaye pa'i a'ë. Jaë cato doja'quë api, Maija'quë joyopi cui'ne toapi.

17 Tsoe pala cajiji, trigo jëoquë iti case'e de'huaquë ja'ose'e huaheja'core. Iti care pase'e i de'hua hue'ñana de'huaquë ja'ose'e toa ti yayama'cona ëoja'quë api.”

18 Ñeje caquë paire de'o coca yëhuoquë cui'ne jaiye yequeje Juan quëapi.

19 Cui'ne Herodes pai ëjaëpi yo'jei Felipe nëjo Herodiasni jioni paquëña. Jaje yo'o ma'ñe a'ë caquë cui'ne i yeque co'aye yo'ose'ena con yëhuopi, Juan.

20 Jaje quëaquëta'are Herodespi i caye asama'ë. Ja yë'ta'api yeque co'aye yo'o coquë Juanre co'a paire co hue'ñana copi.

Jesure Doye

(Mt 3.13-17; Mr 1.9-11)

21 Ja yë'ta'a co cuañoma'quëpi Juan oco doquë pa'ina, Jesuje do cuañosiquë paji'i, cui'ne ïpi Maija'quëre se maca ma'tëmopi jaca saiona.

22 Maija'quë joyopi su'teje pa'ipi ina nëca meni pajje ñajëna, ja maca yë'ose'e ma'tëmopi jutapi, ñeje:

“Më'ë a'ë, yë'ë mamaquërepa. Më'ëni ai sihuaquë pa'iyë.”

Jesús Ñecuëohua'i

(Mt 1.1-17)

23 Jesús treinta ometëca paquëpi Maija'quë co'amañarepa ne huëopi. Pai caye cato José mamaquë paji'i.

24 José paji'i, Elí mamaquë. Elí paji'i, Matat mamaquë. Matat paji'i, Leví mamaquë. Leví paji'i, Melqui mamaquë. Melqui paji'i, Jana mamaquë. Jana paji'i, José mamaquë.

25 José paji'i, Matatías mamaquë. Matatías paji'i, Amós mamaquë. Amós paji'i, Nahúm mamaquë. Nahúm paji'i, Esli mamaquë. Esli paji'i, Nagai mamaquë.

26 Nagai paji'i, Maat mamaquë. Maat paji'i, Matatías mamaquë. Matatías paji'i, Semei mamaquë. Semei paji'i, José mamaquë. José paji'i, Judá mamaquë.

27 Judá paji'i, Joana mamaquë. Joana paji'i, Resa mamaquë. Resa paji'i, Zorababel mamaquë. Zorababel paji'i, Salatiel mamaquë. Salatiel paji'i, Neri mamaquë.

28 Neri paji'i, Malqui mamaquë. Melqui paji'i, Adi mamaquë. Adi paji'i, Cosam mamaquë. Cosam paji'i, Elmodam mamaquë. Elmodam paji'i, Er mamaquë.

29 Er paji'i, Josué mamaquë. Josué paji'i, Elizer mamaquë. Elizer paji'i, Jorim mamaquë. Jorim paji'i, Matat mamaquë.

30 Matat paji'i, Leví mamaquë. Leví paji'i, Simeón mamaquë. Simeón paji'i, Judá mamaquë. Judá paji'i, José mamaquë. José paji'i, Jonán mamaquë. Jonán paji'i, Eliaquim mamaquë.

31 Eliaquim paji'i, Melea mamaquë. Melea paji'i, Mainán mamaquë. Mainán paji'i, Matata mamaquë. Matata paji'i, Natán mamaquë.

32 Natán paji'i, David mamaquë. David paji'i, Isaí mamaquë. Isaí paji'i, Obed mamaquë. Obed paji'i, Booz mamaquë. Booz paji'i, Salmón mamaquë. Salmón paji'i, Naasón mamaquë.

33 Naasón paji'i, Aminabab mamaquë. Aminabab paji'i, Aram mamaquë. Aram paji'i, Esrom mamaquë. Esrom paji'i, Fares mamaquë. Fares paji'i, Judá mamaquë.

34 Judá paji'i, Jacob mamaquë. Jacob paji'i, Isaac mamaquë. Isaac paji'i, Abraham mamaquë. Abraham paji'i, Taré mamaquë. Taré paji'i, Nacor mamaquë.

35 Nacor paji'i, Serug mamaquë. Serug paji'i, Ragau mamaquë. Ragau paji'i, Peleg mamaquë. Peleg paji'i, Heber mamaquë. Heber paji'i, Sala mamaquë.

36 Sala paji'i, Cainán mamaquë. Cainán paji'i, Arfaxad mamaquë. Arfaxad paji'i, Sem mamaquë. Sem paji'i, Noé mamaquë. Noé paji'i, Lamec mamaquë.

37 Lamec paji'i, Matusalén mamaquë. Matusalén paji'i, Enoc mamaquë. Enoc paji'i, Jared mamaquë. Jared paji'i, Mahalaleel mamaquë. Mahalaleel paji'i, Cainán mamaquë.

38 Cainán paji'i, Enós mamaquë. Enós paji'i, Set mamaquë. Set paji'i, Adán mamaquë, cui'ne Adán paji'i, Diosu mamaquë.

4

*Jesure Neñañe**(Mt 4.1-11; Mr 1.12-13)*

¹ Maija'quë joyo ìni pa'ina, Jordán tsiayapi co'iquëna, Maija'quë joyopi sapi, cuëne huesësi yejana.

² Jarote cuarenta mu'seña ão ti ãima'ë pa'ina, jeteyo'je ão ëaye nëi maca

³ huatipi ìte neñasi'i, caquë capi:

“Maija'quë mamaquë sête iye quëna përe cuãñejë'ë, pan pë de'ojaco.”

⁴ Caquëna, Jesupi ìte capi:

“Toyase'e caji, Coa ãose'e ãi pa'iye peoji, pai. Peoquëna, ai jerepa si'aye Maija'quë ca cocare de'oye sheuocaiye pa'iye pa'iji.”

⁵ Ja jeteyo'je huatipi sapi, ai cutihuëna. Sani iye yeja pa'iyyere te'epi esa ìñopi si'aye, paire cui'ne jote pa'iyeje.

⁶ Ìñoni huatipi ìte capi:

“Yë'ëpi më'ëre si'a iye tutu, cui'ne iye jai yejaña de'o co'amaña isisi'i. Yë'ëna isise'e a'ë, si'aye iye. Jaje pa'ina, yë'ë yëyeje isiyë pa'iji, yë'ë isiyë yëquëna.

⁷ Më'ëpi do're ja'runi yë'ëni sequë pa'ito më'ë tse pasipi.”

⁸ Jesupi ìte sheuopi:

“Yë'ë quëno maca pa'ima'ë pa'ijë'ë, Satanás. Saijë'ë. Toyase'e caji: Sejë'ë, më Èjaë Diusuni cui'ne ise'ere necaijë'ë.”

⁹ Ja jeteyo'je huatipi Jerusalén daripëna sani Maija'quë huë'e jetena mëani capi:

“Maija'quë mamaquërepa pani tito sa tomejë'ë, iye macapi yejana.

¹⁰ Toyase'e caji:

Maija'quëpi i huññaohua'ire cuãñeina, më'ëre ñacaija'cohua'ire.

¹¹ Më'ëpi tomequëna, ìohua'i jëñapi tseaja'cohua'i a'ë,

Quëna pëana më nêcañoa a'si nema'quëni cajë.”

¹² Caquëna, Jesupi ìte sheuopi:

“Yequeje toyase'e caji: Më'ë Èjaë Diusure neñama'ë pa'ijë'ë.”

¹³ Caquëna, huati Jesure si'aye neñani yo'o jujani, tsoe maca jëoni saji'i.

*Jesupi Galileana Yo'o Huëoye**(Mt 4.12-17; Mr 1.14-15)*

¹⁴ Jëo saquëna, Jesupi Galileana co'ipi, Maija'quë joyo tutu tımësiquëpi. Jaje pa'ina, pai ì pa'iyyere quëajëna, ja yejaña pa'icohua'i asahuë.

¹⁵ Pai dari ñape tsi'si huë'ña pa'iyyena ye'yaquë pa'ina, si'ahua'i ìte de'oquëre papi cajë sihuahuë.

*Jesús Nazaretre Pa'iye**(Mt 13.53-58; Mr 6.1-6)*

¹⁶ Ja maca Jesús Nazaretna saji'i, ì ai de'osi daripëna. Huajë mu'se tı'aëna, pai tsi'si huë'ëna cacani ja'rupi. Jaje ì si'anë yo'oye sête. Ja'rusipi Maija'quë coca pëpë ñasi'i caquë huëni nêcapi.

¹⁷ Nêcaquëna, Isaiás Maija'quëre quëacaiquë toyaquë pa'ise'ere isieña. Iti maca aquëpi isiquëna, hui'yoquë tı'api, ñeje toyase'e pa'i huë'ñare:

¹⁸ Mai Èjaë joyopi yë'ëni pa'iji.

Jaje pa'ina, yë'ëna de'o cocare isipi, caraja'icohua'ina quëa ja'ñere.

Cui'ne ai oicohua'ire yëhuo huasoja'quë a'ë.

Tseã cuãñosicohua'ì pa'icohua'ire quëa huasoja'quë a'ë.

Cui'ne ñama'cohua'ini ñacohua'ire neja'quë a'ë.

Co'aye yo'ojëna, ai yo'ojë pa'icohua'ini de'o pa'iye isija'quë a'ë.

¹⁹ Mai Èjaë oi necai têcahuëre paipi asaja'cohua'i a'ë caquë yë'ëre jëjo daopi.

²⁰ Jaje Jesús ña tējini tēoni pai tsi'si huë'e cõcaiquëna, isini ja'rupi. Ja maca si'ahua'i ai ñahuë, ise'ere, pai tsi'si huë'ere tsi'sicohua'i.

²¹ Najëna, ìohua'ire je'nërepa ca huëopi:

“Yure iye mu'se tı'api, iye toyase'e caye mësarü asa maca.”

²² Si'ahua'i Jesús de'oquë api cajë ì case'ere merepa de'oye caëna, cajë ai cuasajë sa'ñe cahüë:

“¿Iquë coa José mamaquë api, pa'ima'quë?”

²³ Jesupi capi, jaohua'ire:

“Jujuquë sête co'ye jujujë'ë, caja'cohua'i a'ë. Casicohua'ipi yequeje caja'cohua'i a'ë. Capernaum yejana yo'ose'eje yure ñno më'ë yejare pana yo'ojë'ë, yëquë asase'eje.”

²⁴ Ja maca ai seña maca ca saoquë cui'ne capi:

“Nuñerepa cayë. I ai de'o sito pa'icohua'i caye Maija'quëre quëacaiquëre te'lje de'oyerepa sihua cuañosiquë peopi.

²⁵ Maija'quëre quëacaiquë Elías pa'i mu'señare Israel pai hua'jeohua'i jai pai paë'ë. Ja mu'seña tres ometëca jerepa ocoma'ëna, si'a yeja pa'icohua'i go ëa ju'ijë ai yo'ohuë.

²⁶ Jaje ai yo'ojëta'are Maija'quëpi Elíasre Israel pai hua'jeohua'ire jëjo saoye papi. Paquë Sareptare hua'jeo pa'ico quë'rona jëjo saopi, Sidón yejana.

²⁷ Cui'ne Maija'quëre quëacaiquë Eliseo pa'i mu'señaje jai pai Israel pai ja'ju dahuë ju'icohua'i paë'ë. Pa'ijëta'are te'irejé jujucaiyë papi. Paquë Siria yeja aquë Naamánni jujucaji'i.”

²⁸ Jaje caquëna, asani tsi'sisicohua'ipi ai pëti huëohuë.

²⁹ Ja maca huëni nëcani Jesure tseani pai daripë peo huë'ña hue'sena etoni sahuë, cuti sa'nihuëre pana. Jaropi jëjo toñu'u cajë. Iti cutihuëre pai pa'i daripë paji'i.

³⁰ Jaje jëjo toñu'u cajë sasicohua'ita'are Jesús iohua'i jopoja'a etani saji'i.

Co'a Huati Joyo Hue'equë

(Mr 1.21-28)

³¹ Ja maca Jesús saji'i, Capernaumna Galilea yeja daripëna. Jarona sani huajë mu'seña paire ye'ya huëopi.

³² Iohua'ire ye'yayere asajë ai ñahuë. ¿Merepa jaje cuañequë quëayeje pa'yerepa quëaquë'ni? cuasajë.

³³ Jaró tsi'si hue'ñare paji'i, te'i ëmë huati joyo hue'equë. Jaëpi cuiipi.

³⁴ “Yëquëre yo'oma'ë. ¿Me nesi'quë yëquëre yo'oquë'ni, Jesús Nazaret aquë? ¿Nejosi'quë daiquë? Më'ëre yë'ë ñañë. Më'ë cato Maija'quë mamaquë, de'oquëre pa'ë.”

³⁵ Ja maca Jesús co'a joyore capi:

“Cama'ë. Jaëte jëoni saijë'ë.”

Jaje ca maca co'a joyopi pai ña huë'ñana co'aye neñe peoyerepa yejana ne taoni eta saji'i.

³⁶ Si'aohua'i ña quëquëni sa'ñe iohua'ija'a cahuë:

“¿Ique yë'o a'ni, ja jerepa pa'ye iye? Cuañequëna, huatiohua'ije ite sehujë etayë.”

³⁷ Jaje yo'oquëna, paipi Jesús yo'oye ayere ja yeja si'a huë'ña quëarojateña.

Jesupi Simón Pedro Huaore Jujuyë

(Mt 8.14-15; Mr 1.29-31)

³⁸ Ja maca Jesús tsi'si huë'epi etani Simón huë'ëna cacapi. Jarote paco'ë, Simón huao suña dahuë ai ju'icopi. Jaje pa'iona, Jesure jujucajë'ë, cajë sei'ë.

³⁹ Ja maca Jesús suña dahuë ju'iconi ñaquë suña dahuëre pi'ra saouna, suña dahuë peocopi huëni aore neni go.

Jesús Jai Paire Jujucaiyë

(Mt 8.16-17; Mr 1.32-34)

⁴⁰ Èsë cara mesi maca jai paire ju'icohua'ire dahuë, coa si'a ju'i dahuë quë'iohua'ire Jesuna. Dajëna, ju'icohua'ire j jëtëpi pai ñapere patoquëna, co'yahuë, si'aohua'i.

⁴¹ Ju'icohua'ire pa'isicohua'ipi huatiohua'i etajë Maija'quë mamaquëre papi cuijëna. Jesupi ja cayere ësepi, tsoe iohua'ipi Maija'quë jëjo daoquë Cristo api asa do'ire.

Jesús Yëhuoyë, Galilea Quë'rore

(Mr 1.35-39)

⁴² Jesús nea huë'ñarepa pai peo huë'ñana saquëna, saima'quëni cajë co'ejë tji'ahuë.

⁴³ Tji'asi maca Jesupi capi, jaohua'ire:

“Quëaye pa'iji, de'o coca Maija'quë pa'i te'te ayere yequë pai daripëaje. Jare caquë jëjo daosiquë a'ë.”

⁴⁴ Jaje Jesús cu'i quëarojaji'i, Galilea tsi'si huë'ñana.

5

Tsiaya Hua'ire Yo'eye

(Mt 4.18-22; Mr 1.16-20)

¹ Jesús Genesaret Jaira tëtëpare pa'i quëaquëna, jai pai qui'yerepa Maija'quë coca asañu'u cajë dateña.

² Daijëna, Jesupi caya yohuë, peo huëapi huahuaquëna, ñapi. Iti yohuë acohua'ipi yo'e nëare tsoa toñu'u cajë tumareña.

³ Nani ja maca Jesús yohuëna aya mëji'i. I aya mëisi yohuë Simón tse paco'ë. Ja maca capi, a'ri maña so'ona jëjo sao huahuojë'ë, yohuë. Huahuojëna, ja'runi ñu'i Jesús paire ye'ya huëopi.

⁴ Ye'ya tējini Simónre capi:

“Hua'i pa'i huë'ñana yohuëja'a sani mësarü yo'e nëapi hua'ire neñu'u.”

⁵ Simónpi sehuopi:

“Ye'yaquë, si'a ñami te'e hua'ireje neñe peoyerepa ai yo'ohuë, nema'pë. Jaje pasicohua'ita'a më'ëpi cuañeñe sête hua'i yo'erë jeo dëosi'i.”

⁶ Cani jeo dëosi maca hua'ipi airepa tímërena, hua'i yo'erëpi tòi huëo.

⁷ Ja maca yequë yohuëre cajeohua'i pa'icohua'ire jëñapi soihuë. Soina, dani si'ahua'i caya yohuëa ea tete macarepa aya tímëhuë.

⁸ Ja maca Simón Pedro iyere ñani do're ja'runi Jesure capi:

“Saij'ë, Èjaë, yë'ë quëno maca pa'ima'ë. Yë'ë co'aye yo'oquë a'ë.”

⁹ Coa quëquë huesëni jaje caquëna, j ja're conì pa'icohua'ijë hua'ire nese'ere cuasajë ai quëquëhuë.

¹⁰ Cui'ne, Zebedeo mamajë Jacobo cui'ne Juan, Simón cajeohua'ijë quëquë huesësicohua'i paë'ë. Jaje quëquëjëta'are Jesús capi, Simónre:

“Ca'rama'ë pa'ijë'ë. Më'ë yurepi paire yo'ecaiquë pa'ija'quë a'ë.”

¹¹ Ja maca yohuëare tëtëpana sani jëoni Jesús ja're saë'ë.

Jesús Jujucaiye, Ja'ju Dahuë Ju'iquëre

(Mt 8.1-4; Mr 1.40-45)

¹² Jesús pai daripëre pa'ina, te'i pai ja'ju dahuë ju'iquëpi tütani Jesure ñani j tsiapi yejare pana semeni seji'i. Ñeje caquë:

“Ejaë, më'ëpi yë'ëre jujuye yëni jujujë'ë. Yë'ë ju'i dahuë.”

¹³ Ja maca Jesús j jëtëpi patoquë capi:

“Yë'ë jujucaiyë.”

Caquëna, jare iti macapi ja'ju dahuë peoquë de'opi.

¹⁴ Ja maca Jesús ite capi:

“Quëama'ë pa'ijë'ë, paire. Coa Maija'quë huë'e ñacaicohua'ise'ere sani jñojë'ë. Iñoni më'ë co'ayerë tosa toquë yo'o do'ire jsijë'ë, Moisés cuañequë pa'ise'ere. Jaje yo'oquëna, si'a hua'i më'ë ju'iquë pa'isiquëpi de'oquë ponëni yo'oye ñajacohua'i a'ë.”

¹⁵ Jaje pa'iquëta'are Jesús yo'oyepi jero sa'ana jai saji'i. Jaje pa'ina, jai pai j caye asañu' u cajë daijëna, ju'icohua'ijë daë'ë, juju cuañoñu' u cajë.

¹⁶ Jaje yo'ojëna, Jesús pai peo hue'ñana sai Maija'quëre seji'i.

Quë'quë Dahuë Ju'iquëre Jujuye

(Mt 9.1-8; Mr 2.1-12)

¹⁷ Jesupi ye'yaquëna, jarote ja'rusicohua'ipi ñuë'ë. Fariseo acohua'i cui'ne cuañese'e ye'yacohua'i conì, Galilea yejare si'a hue'ña pa'icohua'ipi daisicohua'i paë'ë. Pa'ijëna, yecohua'ipi Judeapi cui'ne Jerusalëni daisicohua'ijë paë'ë. Pa'ijëna, Jesupi paji'i, Maija'quë tutu ju'icohua'ire jujucaiye.

¹⁸ Paquëna, yo'oye peoquëpi ju'iquëni cai saihuëna oasiquëni cuajjë Jesús pa'i hue'ña coareña, ñajaquë cajë.

¹⁹ Dajëta'are caca hue'ñapi jai pai tímëtico pa'i do'ire cacaye pajë ña jujani huë'e jeteja'a mëni peo coje tëteni ju'iquëre pai jopoja'a meñe casahuë, Jesús ña hue'ña cai saihuëna oasiquëni.

²⁰ Ja maca Jesús iohua'ipi ite jujuquë api cuasayerë ñani ju'iquëre capi:

“Më'ë co'aye yo'ose'ere saì de'huacaiyë.”

²¹ Jaje caquëna, asani cuañese'e ye'yacohua'i cui'ne fariseohua'i cuasa huëoreña: “Paipi yequë co'aye yo'ose'ere sai de'huacaiye peoji. Jare Maija'quëse'e saì de'huacaiye pa'iji. ¿Iquëni, iquë ja jerepa Maija'quëre cue'cuequë caquë?”

²² Jesupi jaje cuasajëna, ñani capi:

“¿Me yo'ojë jaje cuasaye'ni?”

²³ Co'aye yo'ose'ere saì de'huaye cui'ne iquëre jujucaiye pai cato yo'o t'i'a ma'ñe a'ë. A'jiñe yo'oye peoji.

²⁴ Jaje pa'ito de'oji. Iñosi'i, mësarute. Yë'ë Pai Mamaquëpi te'ipi iye yeja cuañequëre papi co'aye yo'ose'ere saì de'huacaiquë pa'iyë.”

Jaje se cani ju'iquëre capi:

“Më'ëni cayë, huëjë'ë. Më uicore ini më'ë huë'ena saijë'ë.”

²⁵ Caquëna, ja macarepa iti ju'iquë pa'isiquëpi jaohua'i ñajëna, huëni nëceni j uicore se de'huani Maija'quëre sihuaquë caquë saji'i, j huë'ena.

²⁶ Saina, si'ahua'i ña quëquëni Maija'quëre sihuajë careña.

“Yurena ñahuë, pajje yo'o ma'ñere yo'oye.”

Jesús Levíre Soiye

(Mt 9.9-13; Mr 2.13-17)

²⁷ Iye yo'osi jeteyo'je Jesús etaquë Leví hue'equëre ñapi, pa'i do'i saï hue'ñare ñu'i curire seina, ñani capi:

“Tuijê'ë, yê'ëni.”

²⁸ Ja maca Leví i yo'oye si'aye se jeoni Jesús ja're çoni saji'i.

²⁹ Ja jeteyo'je Leví jai fiesta nepi, i huë'ena, Jesuni sihuaquë. Jarote cui'ne jai paï pa'i do'i secohua'i cui'ne yecohua'i çoni ai saihuëna ja'rusicohua'ipi paë'ë.

³⁰ Pa'ijëna, ñani fariseohua'i cui'ne cuañese'e ye'yacohua'i Jesure ye'yecohua'ipi de'oye yo'oma'cohua'i a'ë, cuasajë sañope ca huëojë careña:

“¿Me yo'ojë mësarü pa'i do'i secohua'i ja're cui'ne co'aye yo'ocohua'i ja're çoni aijë cui'ne ucuye'ni?”

³¹ Cajëna, asani Jesupi sehuopi:

“De'oye pa'icohua'i cui'ne huajëcohua'i jujuquëre co'eye pañë. Jaje pa'ina, ju'icohua'ipi co'ecohua'i a'ë, jujuquëre.

³² Ja do'ire de'ocohua'ini soisi'i caquë, daisiquë peoyë. Co'acohua'ini soisi'i caquë daisiquë a'ë, jaohua'ipi ja'rë yo'ose'e jeoni ponëjajë caquë.”

Jesure Señe, Aima'pë Señere

(Mt 9.14-17; Mr 2.18-22)

³³ Caquëna, johua'ipi Jesure seteña:

“Juanre ye'yecohua'i yo'oye sête aima'pë Maija'quëre ai sejë yo'oyë, cui'ne fariseo ye'yecohua'ije. ¿Me yo'ojë më'ë ye'yacohua'ise'e si'anë aijë cui'ne ucujë pa'iyë'ni?”

³⁴ Cajëna, Jesupi sehuopi:

“¿Hueja aó aija'cohua'ire soisicohua'ire aima'pë pa'ijë'ë cacohua'i a'ni, mësarü, huejaquëpi iti macare çoni pa'ito?

³⁵ Jaje pa'iquëta'are yequë mu'se huejaquëre yê'ëre sioye pa'iji. Ja maca huejaquëpi peoëna, aó aima'pë pa'ija'cohua'i a'ë.”

³⁶ Cui'ne quëa jñopi, johua'i ñañena çoni ñeje:

“Yecohua'ije huajë ju'i çare tãani ai ju'i çare sëoma'cohua'i a'ë. Jaje yo'ocohua'i pani coa huajë ju'i çare nejoñë. Cui'ne huajë çã çatipëpi ai ju'i çana sëosicohua'i pa'ito te'ojë pa'io ña cuañoñe paji.

³⁷ Jare cui'ne pa'iji. Cuiya'i çono doye peoji, ai çã'nihuë de'huasiconã. Jaje ai çã'nihuëna huajë cuiya'i çono doto yete saiye pa'iji. Jaje yete saina, si'aye nejoñe pa'iji, cuiya'i çono cui'ne çã'nihuë de'huasi topëje nejoñe pa'iji.

³⁸ Jaje pa'ina, huajë cuiya'i çono doye pa'iji, jare cui'ne huajë çã'ni topëna. Jaje huajëyese'e pa'i de'oye quëcoja'coa.

³⁹ Jaje pa'ina, o'sasi çono ucucohua'ije huajë çono ucuye pañë, o'sasi çono ai de'oye a'ë, cajë.”

6

Jesure Ye'yecohua'ipi Huajë Mu'se Yo'oye

(Mt 12.1-8; Mr 2.23-28)

¹ Te'e huajë mu'se Jesús ta' sitoja'a saina, ire ye'yecohua'ipi trigo tsa'ña tējajë saë'ë. Yo'oni jeteyo'je jëñapi iti çase'e po'tejë aë'ë.

² Jaje yo'ojëna, fariseo acohua'ipi ñani seï'ë:

“¿Moisés cuañese'e çaji huajë mu'se yo'oye peoji. Jaje pa'iquëta'are me neñu'ju yo'oye'ni?”

³ Cajëna, Jesupi sehuopi:

“¿Ñama'cohua'ini David cui'ne i cajeohua'i çoni aó ëa ju'ijë yo'ose'e?

⁴ Maija'quë huë'e ñacaicohua'ise'e Maija'quëna isise'ere aó aifñere aó ëa ju'i Maija'quë huë'ena cacani aore imani ai cui'ne i ja're pa'icohua'ireje aopi.”

⁵ Cui'ne capi, jaohua'ire:

“Paï Mamaquëre papi tutu payë, huajë mu'se pa'itoje cuañeñe.”

Jëtë Cuenesicore Paquëre Jujuye

(Mt 12.9-14; Mr 3.1-6)

⁶ Yëquë huajë mu'se Jesús paï tsi'si huë'ena cacani, ye'ya huëoquëna, jarote paji'i, te'i ëmë ëja tê'hui jëtëre cuenesicore hue'equë.

⁷ Pa'ina, cuañese'e ye'yacohua'i cui'ne fariseohua'i çoni cuasahuë. Jesupi huajë mu'sere jujuquëna, ñani ite sañope cañu'u cajë utejë ñahuë.

⁸ Jaje cuasaye ñaquetã'a cuenesi jëtë hue'equëre capi:

“Huëjê'ë. Huëni ja maca jopore pare nëcãjê'ë.”

Caquëna, huëni nëcãpi.

⁹ Ja maca Jesús yecohua'ire capi:

“Sesi'i, mēsarate te'ore. ¿Iquepi de'oquē'ni, huajē mu'se yo'oye, de'oye panita'a co'aye? ¿Paire huasoye panita'a paire coa nejoñe?”

¹⁰ Ja maca si'ahua'ire seña tē'ijani Jesús capi, ju'iquēre:

“Mē jētēre mēajē'ē.”

Caquēna, i case'eje yo'opi. Yo'oquēna, i jētē cuenesico pa'isico de'oco paco'ē.

¹¹ Jaje yo'oquēna, ñani yecohua'i ai pēti ēaye ñajē ca huēohuē, sa'ñe iquepi Jesure sañope ne'ñe pa'ioni cajē.

Jesús Doce Ye'yecohua'ire Soiye

(Mt 10.1-4; Mr 3.13-19)

¹² Ja mu'seña Jesús Maija'quēre sesi'i caquē saji'i, ai cutihuē. Jaropi si'a ñami Maija'quēre seji'i.

¹³ Nata tomesi maca i ye'yacohua'ire soini doce pa'iohua'i i ja're pa'icohua'ire hue'yopi, jējo daocohua'ire.

¹⁴ Jahua'li cato paē'ē: Simón, jare jaēni se hue'yo cosiquē paji'i, Pedro. Cui'ne i yo'jei, Andrés paji'i. Jacobo, Juan, Felipe, Bartolomé,

¹⁵ Mateo, Tomás, cui'ne Alfeo mamaquē Jacobo paji'i. Simón Cananista tsēcapē aquē paji'i.

¹⁶ Judas Jacobo yo'jei paji'i. Cui'ne yequē Judas Iscariote Jesure yehuoja'quēje.

Jesús Jai Paire Ye'yaye

(Mt 4.23-25)

¹⁷ Jesús ai cutihuēpi i ye'yacohua'li ja're cōni cajequēpi perepē yejana pēapi. Jarote jai pai paē'ē. Si'a huē'ña acohua'li, yecohua'ipi Judea cui'ne Jerusalén cui'ne jai tsiaya tē'tēpa Tiro cui'ne Sidón quē'ro acohua'li daisicohua'li paē'ē. Jesús cayere asañu'cajē cui'ne iohua'li ju'i dahuēre jujucaijaquē cajē daisicohua'ipi.

¹⁸ Huati yo'oquēna, ai yo'ojē pa'icohua'ipi juju cuañosicohua'li de'ohuē.

¹⁹ Si'a pai Jesure patosicohua'ipi i tutupi si'ahua'li co'yasicohua'li paē'ē. Jujusicohua'ire ñani pato do'ire si'ahua'li yēhuē, patoye.

Nuñerepa Case'e Pai Ayere

(Mt 5.1-12)

²⁰ Ja maca Jesús i ye'yacohua'ire ñani capi:

“Sihua'cohua'li pa'ijē'ē, mēsaru teaye pa'iohua'li, Maija'quē te'tena de'oye cacani paja'cohua'li a'ē.

²¹ Sihua'cohua'li pa'ijē'ē, mēsaru aō aī ēa ju'icohua'ipi jeteyo'je si'aye ti'aja'cohua'ipi. Sihua'cohua'li pa'ijē'ē, oicohua'li pa'isicohua'ipi jeteyo'je soja'cohua'ipi.

²² Pai Mamaquēre tui do'ire paipi mēsarate pēijē coejē iohua'li quē'rrore etojē cue'cueye pa'iji. Jaje yo'oto sihuajē'ē, yē'ēre tui do'ire.

²³ Jaje yo'ojēna, ai sihuajē'ē, ma'tēmona mēsarate caquē de'huacaisi co'amañare jerepa paja'cohua'ipi. Mēsarate co'aye yo'oyeje pa'ye yo'oq'ahuē'ē, Maija'quē tsoe huē'ña quē'acaicohua'ire.

²⁴ Jaje pa'iquēta'are jaiye yure co'amaña pajē sihua tosicohua'ireta'a, sihuaye peoja'coa.

²⁵ Teayerepa mēsareta'a yure aō ani tīmēni sihuajē pa'isicohua'ire jeteyo'je aō ēa ju'liñe pasipi. Teayerepa mēsaru yure so huajējē pa'isicohua'ireta'a jeteyo'je oiye pasipi.

²⁶ Teayerepa mēsaru pa'iyeni si'a pai de'o paire pa'ē cajēna, pa'icohua'li maña. Tsoe acohua'ije jaje cui'ne de'ocohua'li a'ē ca'ahuē'ē, Maija'quē jējo daocohua'ije pa'icohua'ita'a coa cosocohua'ini.

Mēsarate Sañope Yo'ocohua'ire Oiyē

(Mt 5.38-48; 7.12)

²⁷ Jaje pa'iquēta'are mēsaru yē'ēre asacohua'ire cayē: Oijē'ē, mēsarate sañope cacohua'ire. De'oye yo'ocaijē'ē, mēsarate coecohua'ire.

²⁸ De'oye pa'li ja'ñere cacaijē'ē, mēsaruni sañope ai yo'o ja'ñere de cacohua'ini. Sēcacaijē'ē, mēsarate tea ju'icohua'ireje.

²⁹ Yecohua'ipi tsiana te'e te'te tētoru yequē te'te tsiaje nēcacaijē'ē. Cui'ne yecohua'ipi mē sēsēquēna ju'iconi jioni sato huē'ehuē ju'icoreje se isi saojē'ē.

³⁰ Sēcocohua'li pa'ito jsijē'ē. Yequē mē tseconi jiosicohua'li pa'ito, coa ñajē'ē, cui'naoni seña pajē'ē.

³¹ Yecohua'ipi mēsaruni de'oye yo'ojajē cuasayeje pa'ye yecohua'ini se de'oye yo'ojē'ē, mēsarupi.

³² ¿Jaje pa'iquēta'are mēsarupi mēsarate oicohua'ise'ere oicohua'li pani, iquere de'oye yo'oye'ni? Co'ahua'ije cui'ne sa'ñe oiye yo'ocohua'li pani.

³³ ¿Jaje pa'ina, mésarupi mésarute de'oye yo'ocohua'ise'ere de'oye yo'oni iquere de'oye yo'oye'ni? Co'acohua'ije cui'ne yo'oyere yo'oni.

³⁴ ¿Jaje mésarupi de'oye co'yocohua'ise'ere co'yoja'cohua'i a'è cuasajè isicohua'i pani iquere de'oye yo'oye'ni? Co'acohua'ije co'yoja'cohua'i a'è cuasajè yo'oyere yo'oni.

³⁵ Jaje pa'iquèta'are mésaru cato oíye pa'iji, mésarute sañope yo'ocohua'ire. Jaohua'ire de'oye yo'ojè isíye pa'iji, co'yoja'cohua'i a'è cuasaye peoyerepa. Jaje yo'osicohua'ini ma'tèmo jaiye de'o co'amaña isíye pa'iji. Cui'ne mésaru pa'ija'cohua'i a'è, Maija'què Èjaèrepa mamajè, cui'ne ije oiquè api, co'acohua'ire cui'ne i isiyere de'oji cama'cohua'ireje.

³⁶ Jaje cui'ne mésarujè oijè'è, yecohua'ire, Maija'què oíyeye.

Paí Yo'oyere Ña De'hua Caye

(Mt 7.1-5)

³⁷ Jaje pa'ina, co'acohua'i a'è cama'pè pa'ijè'è, yecohua'ire. Jaje pajèna, Maija'quèje mésarute co'acohua'i a'è caye paja'què api. Yecohua'ire nejoñe pajè'è. Jaje pajèna, Maija'quèje mésarute nejoñe pasipi. Yecohua'i tayo yo'oyere saí de'huacaijèna, Maija'quèje mésaru tayo yo'oye saí de'huacaija'què api.

³⁸ Yecohua'ire isicohua'i pa'ijèna, Maija'quèje mésarute isisipi. Isija'què api, i topèna de'oye cuasa ti'acore pani. Dèso quiosiconi, ña'co quiosiconi, tímèsicore pani, mésaru yecohua'ire isíyeye pa'ye Maija'quèje isija'què api, mésarute."

³⁹ Jesupi ñeje yo'oyeye pa'ye a'è capi:

"Ñama'quèpi yequè ñama'quèni sai saquè pa'ito cojena tómeja'cohua'i a'è, si'a jupè.

⁴⁰ Ye'yecohua'ipi jòhua'ire ye'yaquère tètò saiscohua'i peoyè. Ye'ye tējinita'a ti'añe pa'iji, jòhua'ire ye'yaquèje pa'iohua'i.

⁴¹ ¿Me jaje pa'ito, mè'è yo'jei ñacoare ne'cua pa'icore se ñaquè casi'ni? ¿Mè'è ñacoare soquè tiro ja'iore papi ju'icore du'ru ñama'è pa'ini?

⁴² Mè'è ñacoare pare soquè tiropi ju'iona ti ñama'è pa'iquèpi me mè'è yo'jeire casi'ni: 'Huaú, mè'è ñacoare ne'cua ju'icore dutasi'i, nèocajjè'è.' De'ouquère pa'è coa caquè yo'ouquè maca. Mè'èpi du'ru macarepa mè'è ñacoare soquè tiro ju'iconi duta jeojè'è. Jeteyo'je de'oye ñaquèpi mè'è yo'jeire ne'cua ju'icore dutacaiye pa'iji.

Mè'è Yo'oyere Ñajè Asaja'cohua'i A'è, Mè'ère

(Mt 7.17-20; 12.34-35)

⁴³ De'o soquè yèpi co'a ca quèiñe peoji. Jaje cui'ne co'a soquè yèje de'o ca quèiñe peoji.

⁴⁴ Jaje pa'ina, soquè ñèa ñape ñañe pa'iji, i'ti quèiñena. Miu soquè yè pani quèiñe paji, còsa care. Jaje cui'ne miu pisi pani quèiñe paji, cuiya'i care.

⁴⁵ Jaje pa'ina, de'o paí pani caji, de'oyere, i joyo de'oyepi pa'iyere. Cui'ne co'acquè pani co'ayere caji, i joyo co'ayepi pa'iyere. Yè'opopi caji, joyo pa'iyepi etaquèna.

Caya Huè'ña Ne Huè'ña

(Mt 7.24-27)

⁴⁶ ¿Me yo'ojè mésaru yè'ère Èjaè, Èjaè cajèta'a yè'è cayeje ne ma'ñe'ni?

⁴⁷ Quèasi'i, yè'èna dani asacohua'ipi cui'ne yè'è cayeje yo'ocohua'i pa'iyere. Iyeye pa'ye pa'iji.

⁴⁸ Jaohua'i cato èmè cùthiùena nèconi huè'e nesiquèje pa'i pa'iji. Tsiayapi co'jenije ti'ama'èna taiñe paja'què api. De'o yejana nesi do'ire.

⁴⁹ Jaje pa'iquèta'are asaquèta'a yè'è case'eye yo'oma'quèpi mejahuèna nèconi huè'e nesiquèje pa'i pa'iji. Tsiaya co'jeni ai tutu tsá'ina taiñe pa'iji."

7

Jesupi Romano Jo'yaère Jujuye

(Mt 8.5-13)

¹ Jesús coca ca tējini saji'i, Capernaum yejana.

² Jarote romano soldado paí capitán i jo'yaè i oiquère papi juni huesè tējiquère paquèpi paji'i.

³ Jaje pa'ina, capitánpi Jesure asani jèjo saopi, judío aiohua'i acohua'ini, dani i jo'yaère jujucaija'quère seni daja'cohua'ire caquè.

⁴ Jaohua'i Jesure tsiojani ai se huèohué, ñeje cajè:

"Iye capitán de'ouquè api, mè'èpi ite còcati'ñe pa'i a'è.

⁵ Cui'ne judío paire oiquè api. Jaje yo'ouquèpi pai tsi'si huè'e saicaina, mai secore nehuè."

⁶ Jaje cajèna, Jesús asani jòhua'i ja're cóni saji'i. Saijè i huè'e ti'añe ja'i macare pa'ijèna, capitánpi jèjo daopi i cajeohua'ire Jesure ñeje quèaja'cohua'ire:

"Èjaè, ai yo'oma'è pa'ijè'è. Jaje pa'ina, cayè yè'è co'acquè huè'ena daima'è pa'ijè'è.

7-8 Yè'è òjaohua'i cuañeñere yo'oquè pa'iquèpi yè'è soldado paire meñe cuañequèna, sehuocohua'ire payè. Jaje paquèpi yè'èpi cayè, jaohua'i aquèni: 'Saij'è'è, caèna, saji. Cui'ne yequèni 'daij'è'è' caru, daiji. Cui'ne yè'è jo'yaèni: 'jare nej'è'è' cuañeru neji. Jaje mè'èpi co'yaj'è'è cuañeru, yè'è jo'yaèpi co'yasipi asayè, yè'è. Jaje pa'ina, daima'è cuañej'è'è, yè'è jo'yaè co'yajaquè."

⁹ Jaje case'ere asani Jesús ai sihuapi, ta'ñe caquère papi pa'iquè'ni caquè. Jaje cuasani ìte tuicohua'ire capi:

"Ti ñama'è pa'è'è, Israel paipi jaje yè'ère necaija'què api cuasacohua'ire iquè yo'ose'eje care paye."

¹⁰ Ja maca j jèjo daosicohua'i huè'ena co'ini capitán jo'yaè tsoe co'yasiquèni tì'ahuè.

Posè Ju'isiquère Huèoye

¹¹ Iye yo'osi jeteyo'je Jesús saji'i, Naín hue'e daripèna. Saina, cui'ne j ye'yacohua'i cui'ne jai pai còni saè'è.

¹² Pai daripè eta sa'rona ja'ye tì'asi maca ju'isiquèni tañu'u cajè sacohua'ire ñapi. Jai pai còni saè'è, ìti daripè acohua'ije. Pèca ja'què juquèna, hua'jeopi te'ire nècoquèpi ju'isiquè paji'i.

¹³ Jaje saijèna, Èjaèpi jaote teaye ñani oi capi:

"Oima'o."

¹⁴ Ja maca Jesús tsiojani mahuèna patopi. Patoquèna, ìti sacohua'i nècaj'è'è. Ja maca Jesús ju'isiquèni capi:

"Posè, yè'èpi cayè mè'ère, huèij'è'è."

¹⁵ Caquèna, ìti ju'isiquèpi huèni ja'runi coca ca huèopi. Pèca ja'cona huèoni jsipi, Jesús.

¹⁶ Ja maca iyere ñani si'ahua'i quèquèni Maija'quère de'oquère pa'ni sihuajè ca huèohuè ñeje:

"Mai aquèpi Maija'què quècaiquè pa'iji, jerepa pa'ipi."

Cui'ne cahuè:

"Maija'quèpi j paire còcasi'i caquè daji'i."

¹⁷ Jaje Jesús yo'ose'ere Judea pa'icohua'i cui'ne Judea yeja niamoa pa'icohua'ije asahuè.

Juan Ti Doquè Jèjo Saocohua'i Jesuna

(Mt 11.2-19)

¹⁸⁻¹⁹ Juanpi si'aye iye yo'ose'ere asapi, ìte ye'yecohua'ipi quèajèna. Jaje asani daija'què api ca nèosiquè ¿Cristorepa pa'ima'què, panita'a ja yè'ta'a yequère uteye pa'iquè? cuasaquè j ye'yacohua'ire cayahua'ire soini Jesús què'rona jèjo saopi, seni asaja'cohua'ire.

²⁰ Jèjo saosicohua'ipi Jesús què'rona tì'ani cahuè:

"¿Cristo ìti daija'què api ca nèosiquè pa'ima'què mè'è? Panita'a ja yè'ta'a ¿yequère uteye pa'iquè? caquè Juan oco doquèpi yèquère jèjo daopi."

²¹ Sa tì'ajèna, Jesupi jai paire ju'icohua'ire cui'ne ai yo'ocohua'ire huati què'iohua'ire eto saoguè, cui'ne ñama'cohua'ire jujuquè yo'opi.

²² Yo'oquèni sejèna, Jesupi sehuopi, jaohua'ire:

"Sani Juanre caj'è'è: Mésaru ñajè cui'ne asase'ere quèaj'è'è, ñama'cohua'ipi pa'isicohua'ipi ñañere, cu'ima'cohua'ipi pa'isicohua'ipi cu'iyere, ja'ju dahuè hue'ecohua'ipi peocohua'ipi tòmèñere, asama'cohua'ipi asayere, ju'isicohua'ipi huèiyere, cui'ne teaye ai yo'ocohua'ini huaso coca quèayerè.

²³ Coa asani yè'ère ìre papi caquè jèa coeye paquèpi sihuaquè de'oye pasipi."

²⁴ Juan jèjo daosicohua'ipi co'isi maca Jesupi paire ca huèopi, Juan ayere ñeje:

"¿Iquere sani ñare'ni, cuene yeja saisicohua'í? ¿Tutupi catèna ju'aquèna, huahuèyere ñare? Pani.

²⁵ Jaje pa'ina, ¿iquere sani ñare'ni? ¿Èja de'oni jai do'í cañare ju'iquèni ñare? Pani. Jaje pa'ina, mésarupi ñacohua'í a'è, pai èjaohua'í huè'ña pa'icohua'ipi jai do'í cañare ju'ijè pa'icohua'ire.

²⁶ Tìjupè cayè, jaje pa'ito: ¿Iqueini sani ñare'ni, Maija'què jèjo daoquè? Jaje pa'ij'è'è. Nuñerepa cayè, Maija'què quècaiquè jerepa pa'í api.

²⁷ Toyase'e cato caji:

Jèjo saosi'í, yè'ère quècaiquère mè'è sai hue'ñana

Mè'ère ma'a ne de'huacaija'quère.

²⁸ Jaje pa'ina, cayè, mésarute. Pai pa'í hue'ñana iquè Juan oco doquèje pa'í ti peopi, Maija'què quècaiquè jerepa pa'í. Jaje pa'iquèta'are ai a'riqué macapi Maija'què pa'í te'te jerepa pa'í pa'ija'què api."

²⁹ Jaje caquèna, asani si'aohua'í Juanre oco do cuañosicohua'í co'a pai cui'ne pa'í do'í curi secohua'í Maija'què de'oyerepa yo'ose'ere sihuajè nuñerepa pa'í api, Maija'què.

³⁰ Jaje pa'iquëta'are Juan oco do cuañoma'cohua'ipi fariseo paipi cui'ne cuañese'e ye'yacohua'ipi Maija'quë johua'ire caquë yo'oyere asacaiye coereña, co'aye a'ë cajë.

³¹ Ejaëpi yequeje capi:

“¿Iquena conì iye'në paire ja yo'oyeje pa'iohua'i a'ë caquë quëara'ye? ¿Ique yo'oyeje pa'iohua'i ña cuañoñe'ni?”

³² De'oji, jaje pa'ito tsipi jai pai pa'i hue'ñana ca'a yo'oñu'u cajë ja'rusicohua'ipi caje tsini pi'cohue're jucacaitoje bailaye pahuë. Cui'ne oiyeje pa'iohua'ita'a jëjëñere jëjëcaitoje oire paye pahuë. Yure pa'icohua'i cui'neje pa'iyë.

³³ Juan oco doquëpi ai aima'quëpi cui'ne o'sa ucuma'quëpi pa'ina, mësarupi ìte huati quë'i api cayë.

³⁴ Ja jeteyo'je Pai Mamaquë daji'i, ao aiquëpi cui'ne o'sa ucuquëpi. Jaje pa'ina, mësarupi jaiye aiquë api cui'ne jaiye o'sa ucuquë api, co'aye yo'ocohua'i cajeipi cui'ne pa'i do'ire curi secohua'i cajeipi cayë.

³⁵ Jaje pa'iquëta'are Maija'quë mamajëpi ì iñoñere cayahua'i yo'oye de'oji, asayë.”

Fariseohua'i Aquë Simón Huë'ere Pa'iyë

³⁶ Fariseo aquëpi Jesure soipi, ì huë'ena sani ao aijë'ë caquë. Soina, Jesús sani ao ai saihuëna ja'rupi.

³⁷ Ja'runi ñu'ina, ìti daripë, te'o nomio co'aye pa'isicopi asani ì pa'i hue'ña daco'ë, ai huëo së ma'ña da'care quëna huëna daco.

³⁸ Dani'opi Jesús quëno macana do're ja'runi oio io oi copì ì quëo tsoani jeteyo'je io nañapi tëno cuenani tsu'suco sihuaco huëo së ma'ñapi ì quëoje doco.

³⁹ Jaje yo'ocona, fariseo Jesure soisiquëpi ñani cuasapi: “Iquë Maija'quë coca quëacaiquërepa pani ìte co'a nomioipi papico yo'oye asara'pi, co'a nomioipi yo'oco caquë.”

⁴⁰ Cuasaquëna, Jesupi fariseore capi:

“Simón, më'ëre yeque maña caye payë.”

Caquëna, fariseopi sehuopi:

“Cajë'ë, ye'yaquë.”

⁴¹ Jesupi capi:

“Curiquë prestaquëni caya ëmëohua'i curire co'yoye pahuë. Quinientos denario te'ipi do'i papi, yequëpi cincuenta denario do'i papi.

⁴² Jaje do'i pacohua'ipi sai ti'añe pajëna, ñani curiquë prestasiquëpi jaohua'ire oi ìpi sai de'huapi. Jaje pa'ito yure quëajë'ë. ¿Nepi jaohua'iaquë ai jerepa oiye'ni, ìte?”

⁴³ Caquëna, Simónpi sehuopi:

“Ìti ai jaiye do'i pasiquëpi ìte sai de'huacaisiquëre ai oji'i, cuasayë.”

Jaje caquëna, Jesupi sehuopi:

“Nuñerepa cayë, më'ë.”

⁴⁴ Ja maca Jesús nomiore ñani capi, Simónre:

“¿Näquë io yo'oye? Më'ë huë'ena yë'ë caca maca më'ëpi oco dacaima'ë paë'ë, yë'ë nëcañoa tsoa ja'ñere. Jaje pa'iquëta'are icopi io oisi copì tsoacaco'ë, nëcañoare cui'ne nañapi tëno cuenao.

⁴⁵ Më'ëpi sihuaquë pëpama'ë. Jaje pa'iquëta'are io cato caca macapi sihuao de'oyerepa pëpao, ja yë'ta'a yo'oco.

⁴⁶ Më'ëpi yë'ëre sjo'pë hui'yape pë'nama'ë paë'ë. Jaje pa'iquëta'are io cato yë'ëre huëo së ma'ñapi nëcañoana doo.

⁴⁷ Jaje pa'ina, më'ëre cayë, io ai oio yo'oyepi io jaiye co'aye yo'ose'ere sai de'hua cuañosico pa'io, iñoco. Jaje pa'iquëta'are a'ri mañare sai de'hua cuañoquëpi a'ri maña oiye're iñoji.”

⁴⁸ Jaje se canì capi, ìote:

“Më'ë co'aye yo'oco pa'ise'e sai de'huacaë'ë.”

⁴⁹ Jaje caquëna, soisicohua'i ñu'icohua'ipi sa'ñe johua'ija'a ca huëohuë:

“¿Iquei'ni, iquë jaje co'aye yo'ose'ere sai de'huacaiquë?”

⁵⁰ Jaje cajëta'are Jesupi capi, ìote:

“Maija'quëpi huasoja'quë api cuasani yo'o do'ire huasosico pa'iyë, më'ë. Sëñaco de'oye saijë'ë.”

8

Jesure Cõcaicohua'i Nomiohua'ipi

¹ Ja jeteyo'je Jesús jai daripëana cui'ne a'ri daripëana si'a hue'ña cu'i quëarojai, cui'ne Maija'quë cuañe te'tena cacani de'oye pa'iyere quëapi. Ìte cohüë, doce j ye'yacohua'ipi.

² Cui'ne nomiohua'ipi huati quë'iohua'i pa'isicohua'i cui'ne ìpi ju'ì dahuëje jujucaisicohua'ipi ìte conì cuahuë. Jaohua'ì ja're conì María Magdalena hue'ecoje saco'ë, ìti siete huatiöhua'ire eto cuañosicopi.

³ Cui'ne Herodes yëyere ise'e cuasaquë huë'e de'oye necaiquë Chuza i nëjo Juana cui'ne Susana, cui'ne jai pai yequë nomiohua'ije iohua'i co'amañapi coçaë'ë, ite.

*Taquëpi Pa'iyë
(Mt 13.1-9; Mr 4.1-9)*

⁴ Pai daripëa ñape etani daë'ë, Jesure ñañu'u cajë. Jaje jai pai datena, ñani quëapi, iohua'i ñañe ayena. Caquë iñoquë ñeje capi:

⁵ “Taquëpi tasi'i caquë tsiona sani iti care jeaquëna, ma'ana tompëpi. Tomeina, cu'icohua'ipi tsacu huesohuë, cui'ne yequë care pj'api ocue huesohuë.

⁶ Yequë capi tompëpi, quëna yejana. Tomeni ai de'okuëta'a ocopi peoquëna, cuëne juji'i.

⁷ Yequë capi tompëpi miu pisi quë'rona. Tomeni ai de'okuëna, pisiye te'e ai de'oni hueapi.

⁸ Cui'ne yequë capi tompëpi de'oye yejana. Tomeni ai de'oni cien ca jaiye iti ñëa ñape quëji'i.”
Jaje iyere Jesús ca tëjiquë ai tutu capi:

“Mësarupi cajoro quë'iohua'i pani asajë'ë.”

*Me Ne Ja'ñere Pai Ñañena Coni Quëa'ëni
(Mt 13.10-17; Mr 4.10-12)*

⁹ Ja maca i ye'yacohua'ipi sei'ë: ¿Iquere ja më'ë jaje quëa'ëni, iohua'i ñañena coní?

¹⁰ Cajëna, ñipi jaohua'ire sehuopi:

“Maija'quë i te'te ayere pajë asa ti'a ma'ñere iñoquëna, de'hue asayë, mësarü. Jaje pa'iquëta'are yecohua'ini cayë iye yo'oyeje pa'ye a'ë caquë iohua'i ñañe ayepi iti ñajëta'a ña ma'ñe pa'iohua'i pa'iyere caquë. Cui'ne itire asajë coa noni asa huesojë ti asa ti'añe pajajë caquë.

*Taquë Quëase'e Ayere
(Mt 13.18-23; Mr 4.13-20)*

¹¹ Iye a'ë. Iye quëase'e caye: Iti ca cato Maija'quë cocajë pa'ye.

¹² Ma'a cato quëaji, Maija'quë coca asacohua'ini. Jaje asacohua'ini huatipi dani iohua'i joñana de'huase'ere peo hue'ña jioni asama'cohua'ire neni ne huesoyere quëaji.

¹³ Quëna yejana iti ca tompëse'e cato Maija'quë cocare du'ru macarepa sihuajë asacohua'ipi pa'ijëna, jeteyo'je ai yo'oyepi ti'asi maca yo'o jujani jecohua'ini quëaji.

¹⁴ Miu pisi quë'rona iti ca tompëse'e cato quëaji. Asajëta'a ja yë'ta'a iohua'i ai cuasayere yo'ojë pa'icohua'ini jaje yo'ojë co'amaña jaiye payena cuasajë cui'ne yeja sihuayere yëjë co'a ju'ijëna, pisi meapi hue hueañeje pa'ye yo'okuëna, iti ca quëima'pë pa'iyere.

¹⁵ Cui'ne yequë ca de'oye yejana tompëse'e cato quëaji, de'oye joyopi jaje yo'oñu'u cajë asacohua'ini cui'ne yëhuose'ere asani cui'ne yo'ocohua'ipi cui'ne yo'o jujama'cohua'ipi nuñerepa itire pa'ijë iti ca quëicohua'ije pa'icohua'i pa'iyere.

*Miacaiye Ayere Quëaye
(Mr 4.21-25)*

¹⁶ Toa tsëoma'cohua'i a'ë, tsëoni jeteyo'je yequë co'amañapi sioja'coni panita'a cai sai huë huë'ehuëna nëcoja'coni. Jaje yo'oye pajë coa ai jerepa ëmëje'na nëcojë yecohua'i cacajëna, miacaija'core.

¹⁷ Yahuese'epi ti yahue huesose'e pani huesoye peoji. Cui'ne pai asa ma'ñepi ti asama'pëna, pa'iyepi peoji. Si'aye asa ja'ñe a'ë, tiñarepa.

¹⁸ Jaje pa'ito de'oye asajë'ë. Jaje pa'ina, paquëna ai jerepa se jsi coñe pa'iji. Jaje pa'iquëta'a peoquëni ai jerepa se sio coñe pa'iji, i payë, cuasase'e mañaque si'aye.”

*Jesús Pëca Ja'co Cui'ne I Yo'jeohua'i
(Mt 12.46-50; Mr 3.31-35)*

¹⁹ Ja maca Jesús pëca ja'co cui'ne i yo'je tsj coní tñahuë, i pa'i hue'ñana. Tñasacohua'ita'a jai pai pa'i do'ire i pa'i hue'ña ti'añe pahuë.

²⁰ Jaje pa'ina, yecohua'ipi Jesure quëahuë:

“Më ja'co cui'ne më'ë yo'je tsj coní hue'sere pa'iyë, më'ëni ñañu'u cajë dani.”

²¹ Cajëna, ñipi capi:

“Maija'quë coca asani cui'ne iti cayeje yo'ocohua'ipi yë'ë ja'co cui'ne yë'ë yo'je tsj pa'iyë.”

*Jesupi Tuture Cui'ne To'añere Cuqñeñe
(Mt 8.23-27; Mr 4.35-41)*

²² Te'e mu'se Jesús jai yohuëna i ye'yacohua'i ja're coní tumëni capi:

“Jaira je te'tena jëñu'u.”

²³ Caëna, ja je'ejëna, Jesús caji'i. Caïna, ai tutu dapi. Jairare pa'ijëna, tutu dani co'poyepi yohuëna oco timë huëopi, ea du'iyepi ja'i macarepa.

²⁴ Na quëquëni cajquëre sëtoni cahuë:

“Ye'yaquë, Ye'yaquë, ea du'iyë, mai.”

Cajëna, Jesús huëni nëcani tuture cui'ne co'poyere yo'oma'o capi. Ca macarepa tsjña de'huajë pa'iorepa de'opi, ti co'poma'co.

²⁵ Co'poma'co de'ona, j ye'yacohua'ire capi:

“¿Je ja'ye tsoe Maija'quëpi necaija'quë api cuasaye jëore?”

Jaje caquëna, jaohua'i cato quëquë huesësicohua'ipi ai ñahuë. Ñajë johua'ija'a sa'ñe cahuë: “¿Iqueire pani, iquë, tutu cui'ne oco asani sehuoaiquërepa?”

Huatiohua'i Pa'ise'e Gadara Yeja Aquëre
(Mt 8.28-34; Mr 5.1-20)

²⁶ Ai yo'osi jeteyo'jere papi Gadara yejana ti'ahuë, Galilea je'ñerepa pa'icona.

²⁷ Ti'ajëna, Jesús tumaquëna, te'i ëmë iti daripë aquëpi tsio daji'i. Ai tsoe iquë huatire hue'equëpi, ju'i cañaje ju'ima'quëpi cui'ne huë'ëje pa'ima'quë paji'i. Jaje pa'ipi coa pai ju'isicohua'ire ta hue'ñare pare iquë paji'i.

²⁸ Jaje pa'ipi Jesure ñani tani do're ja'runi ai cui'pi:

“¿Me yo'oquë Jesús yë'ëre josa yo'osi'quë daiquë'ni, Maija'quërepa mamaquëpi? Señë, më'ëre. Yë'ëre josa yo'oma'ë pa'ijë'ë.”

²⁹ Iye cato Jesupi huatire etani saijë'ë, cuañequëna, ja do'ire jaje capi. Iquë cato huatipi ite jo'ya nesiquëre papi ai tsoe. Jaje pa'ina, paipi ite quëna meapi sëahuë, saima'ë pa'ija'quë cajë. Jaje yo'ojëta'are huatipi tutu isiquëna, ne tëtë saouë saiquëpi pai peo yejana huatipi saquëna.

³⁰ Jesupi capi, ite:

“¿Ique mami a'ni, më'ë?”

Seina, ipi sehuopi:

“Yë'ë Legión hue'equë a'ë.”

Jaje cani capi, huatiohua'ipi ina jai pai cacani pa'i do'ire.

³¹ Jaje pa'ijë huatiohua'ipi Jesure sei'ë. Jëjo saoma'ë pa'ijë'ë, nejo hue'ñare pana cajë.

³² Coa sese quë'rona jëjo saojë'ë, yëquëre cahuë, ai cutihuëre jai pai sese nëijë aicohua'ina. Cajëna, Jesupi de'oji, sehuouna.

³³ Paite pa'isicohua'ipi etani sesena cacahuë. Cacajëna, sese jai hua'que tëtëpapi tomejë jairana dutu jujuhuë.

³⁴ Ja maca iti sesere ñacaicohua'ipi ña quëquëjë huë'huëni pai darina cui'ne yequë hue'ñana iti yo'ose'ere quëahuë.

³⁵ Quëarena, paipi ñañu'u cajë saë'ë. Saijë Jesús pa'i hue'ñana ti'ajë ñajëna, huati quë'i pa'isiquëpi j quëno macare ju'i ca suñasiquëpi dahuëre pa'ipi yo'oma'quëpi ñuji'i. Ñu'ina, ñani ai ca'rahuë.

³⁶ Ja maca iti ñasicohua'ipi daripëpi daisicohua'ire quëahuë, huati quë'i pa'isiquëni Jesupi jujuse'ere, nuiñere cuasaquëre.

³⁷ Jare asani Gadara yeja paipi si'ahua'i ini ai ca'ra do'ire sei'ë. Saijë'ë. Ino pa'ima'ë pa'ijë'ë cajë. Jaje cajëna, asani Jesupi jai yohuëna aya mëni saji'i.

³⁸ Saina, iti huatire eto sao cuañosiquëpi sajë'ë yë'ëreje caquë seji'i. Seina, Jesupi ite pëajë'ë, cani capi:

³⁹ “Co'ijë'ë, më'ë huë'ena. Co'ini si'aye më'ëre Maija'quë ne de'huase'ere quëajë'ë.”

Jaje caëna, sani si'a daripë cu'i quëapi, Jesús ite ne de'huase'ere.

Jairo Mamaco Cui'ne Jesús Cañare Patoco
(Mt 9.18-26; Mr 5.21-43)

⁴⁰ Jaje Jesús jaira je te'tepi co'ina, si'ahua'i ite utejë pa'isicohua'ipi sihuajë pëpahuë.

⁴¹ Pëpa maca Jairo hue'equëpi pai tsi'si huë'ere ñacaicohua'i ëajëpi titapi. Titani Jesús quëo yë'quë maca do're ja'runi yë'ë huë'ena daijë'ë, caquë seji'i.

⁴² Te'o macare mamacore paquëni, doce ometëca pacopi, juni huesë tējicono. Sequëna, jujucaija'quë Jesupi jarona saji'i. Saina, jai pai con'i qui'yerepa saë'ë.

⁴³ Saquëna, saru dahuë ju'icopi ai yo'oco paco'ë, tsiejë tēcama'ona doce ometëca. Jaje pa'ioipi jujucohua'ini juju cuañosi' caco si'aye jo curi saio sao. Jaje yo'otoje jujuye peopi.

⁴⁴ Jaje ai yo'ocopi Jesure tsiojani tuni j ju'i çana patocona, jare iti macapi tsie tēcapi.

⁴⁵ Jaje patocona, Jesupi seji'i:

“¿Nepi yë'ëre patore'ni?”

Caquëna, si'ahua'i cahuë:

“Pahuë, patoye.”

Cajëna, Pedro cui'ne j cajeohua'i con'i cahuë:

“Ye'yaquë, jai pai si'a te'ñapi jë'jajëna, ñaquëta'a sequë'ni, çnepi yë'ëre patore'ni?”

⁴⁶ Cajëna, Jesupi capi:

“Asayë, yë'ë tutupi yë'ëre patosicore jujuse'ere.”

⁴⁷ Jā maca tsoe co'yasico pa'io yahue yo'ose'e peoquëna, tsoe asapi caco ca'raco tsa'sico dani do're ja'runi Jesús quëo yë'quë macapi quëao, si'ahua'i ñajëna, io cuasani yo'ose'ere cui'ne io pato macapi esa co'yase'ere.

⁴⁸ Quëa maca Jesupi capi:

“Huau, më'ëpi jujuja'quë api cuasani yo'osi do'ipi jujusico pa'iyë, më'ë. Señaco de'oye saijë'ë.”

⁴⁹ Jā yë'ta'a Jesús cocare caquëna, Jairo huë'ëpi dani titaquë Jairore capi:

“Më'ë mamaco tsoe juco'ë. Ye'yaquëre ai jerepa josa yo'oma'ë.”

⁵⁰ Caquëna, Jesupi asani capi, Jairore:

“Quëquëma'ë pa'ijë'ë. Yë'ëpi jujuja'quë api caquë utejë'ë. Jaje cuasaquë utequëna, më'ë mamaco co'yasico pasio.”

⁵¹ Huë'ëna tija'si maca te'ireje coñe papi, i caca huë'ña. Coa Pedro, Jacobo, Juan cui'ne tsihua'o pëca ja'quë cui'ne pëca ja'co jaohua'ise'e cacahuë, i ja're coní.

⁵² Si'ahua'i oë'ë, co'a juë'ë, joni cuasajë. Jaje oijëna, Jesupi capi, jaohua'ire:

“Oima'pë pa'ijë'ë. Tsihua'o ju'ima'o paco'ë. Coa caico.”

⁵³ Caquëna, tsoe ju'isiconi caji cajë i cayere cue'cuejë sohuë.

⁵⁴ Jā maca Jesupi ju'isico jëtëna tseani capi:

“Tsihua'o huëijë'ë.”

⁵⁵ Jaje caquëna, iti macapi pa'i huëo cui'naopi, nëcaco. Nëcacona, jā maca Jesús aore aojë'ë cuañëpi.

⁵⁶ Pëca ja'quëohua'ipi ai cuasahuë, iti yo'ose'ere. Jā maca Jesupi cuañëpi, iye yo'ose'e yecohua'ire ti quëama'pë pa'ijë'ë, caquë.

9

Jesús Jëjo Saoye I Ye'yacohua'ire

(Mt 10.5-15; Mr 6.7-13)

¹ Jesupi i doce ye'yacohua'ire tsi'soni isipi, i tuture cuañecohua'i pa'ijajë coa si'aye tija'ne pa'i co'a joñoare eto saojë cui'ne ju'icohua'ire jujujë yo'o ja'ñere.

² Maija'quë cuañe te'tena cacani pa'iyere quëaja'cohua'ini cui'ne si'a ju'iñere jujucaija'cohua'ini jëjo saopi.

³ Jaje jëjo saokuë capi:

“Tupë, turupë aó, curiquë sama'pë pa'ijë'ë. Ma'a sajë te'e ju'i ca sajë'ë, cayaye sama'pë, peojë saijë'ë.”

⁴ Te'e daripë yo'oye pa'ina, te'e huë'ëna pëajë'ë, mësarute sihuacohua'i pa'ito.

⁵ Yeque mësaruni coecohua'i pa'ito etani saijë ya'o si'si pa'iyere ti'to tojë'ë. Jaje yo'ojë japi iñoñe pa'iji, iohua'ire sañope Maija'quë yo'o ja'ñere.”

⁶ Jaje caëna, etani sateña, si'a huë'ña pai pa'i huë'ñana, huaso cocare quëajë cui'ne ju'icohua'ini jujujë.

Juan Ti Doquëre Huaiye

(Mt 14.1-12; Mr 6.14-29)

⁷⁻⁸ Jaje Jesús yo'loquëna, yecohua'ipi Juan huëisiquëpi huëni yo'o'iji, cajëna, cui'ne yecohua'ipi Maija'quë jëjo daoquë Elíaspi ñaipí cahuë. Cajëna, yecohua'ipi ai tsoe Maija'quë jëjo daoquë pa'isiquëpi huëni yo'o'iji, cahuë. Jaje cajëna, Galilea ëjaë Herodespi asaquë cui'na ja'yese'e cuasa huesëpi.

⁹ Jaje pa'iquëta'a Herodespi capi:

“Yë'ëpi Juan siopëre yëto téajë'ë caquë cuañehuë. Jaje pa'ito ¿iqueipi jaiye co'amaña yo'loquërepa pa'ina, cajëna, asaye'ni?”

Jaje pa'ina, Jerodespi ite ñasi'i caquë yo'opi.

Cinco Mil Ëmëohua'ire Aonë

(Mt 14.13-21; Mr 6.30-44; Jn 6.1-14)

¹⁰ I jëjo saosicohua'ipi co'ini Jesure quëahuë, iohua'i yo'orojaise'ere. Quëa tëjjëna, ja jeteyo'je sai sapi, jaohua'ire, pai peo huë'ñana, Betsaida daripë quë'rona.

¹¹ Jaje saicohua'ita'are paipi asani tuë'ë. Tuijëna, Jesús sihuaquë pëpani Maija'quë te'te ayere quëani cui'ne ju'icohua'ire jujupi.

¹² Neato de'o huëoquëna, i doce ye'yacohua'ipi tsio dani Jesure cahuë:

“Ja'ye huë'ña pa'i huë'ña iño ti peoji. Paire quëajë'ë, saijajë, sani huajëjajë, cui'ne pai daripëna sani aó hueroni aijajë.”

¹³ Jaje cajëna, Jesupi capi:

“Mësarupi aojë'ë, jaohua'ire.”

Caquëna, iohua'ipi sehuohuë:

“Coa cinco pan pëa cui'ne caya tsiaya hua'ire pare payë. Jaje pa'ina, si'ahua'ire aõñe cani sani hueroyese'e pa'iji.”

¹⁴ Cinco mil emëohua'i paë'ë. Jaje pa'ijëta'are Jesupi i ye'yacohua'ire capi:

“Cincuenta paise'ere te'e macana ño'e saojë'ë. Jare ja soçohua'ise'ere si'ahua'ire huahuejë'ë.”

¹⁵ I case'eje yo'ojëna, si'ahua'i ja'ru sahuë.

¹⁶ Ja maca Jesús cinco pan cui'ne caya tsiaya hua'ire imani ma'tëmona ñaquë de'oji iye më'ë isise'e payë caquë Maija'quëre pëpapi. Pëpani jë'yeni i ye'yacohua'ina isipi, paire aõjë'ë caquë. Ja maca jaohua'ipi paire aõhuë.

¹⁷ Si'ahua'i johua'i yëse'ere t'asichua'i paë'ë. Ani tëjisi jeteyo'je iti nëase'ere doce do'rohuëa aya timëhuë.

Pedropi Jesús Ayere Caye
(Mt 16.13-19; Mr 8.27-29)

¹⁸ Yequë mu'se Jesús te'ipi Maija'quëre seji'i, pai peo huë'ñana. Seina, i ye'yacohua'i datena, seji'i, jaohua'ire:

“¿Iqueipi caye'ni, pai yë'ëre?”

¹⁹ Caquëna, johua'ipi sehuohuë:

“Yecohua'ipi cayë, më'ëre Juan oco doquë api. Yecohua'ipi Elíaspi cayë. Yecohua'ipi më'ëre cayë, ai tsoe Maija'quë jëjo daoquë pa'isiquëpi huëji'i.”

²⁰ Jaje cajëna, seji'i, johua'ini:

“¿Cui'ne mësaruta'a yë'ëre iqueipi caye'ni?”

Caquëna, Pedropi capi:

“Më'ë cato Cristo, maire huasoquë, Maija'quë tsequëre pa'ë.”

Jesupi Capi, Ju'ija'quë A'ë
(Mt 16.20-28; Mr 8.30-9.1)

²¹ Jaje asajëna, Jesupi jaohua'ire ai cuañepi: Quëama'pë pa'ijë'ë, yecohua'ire caquë,

²² cani capi, jaohua'ire:

“Pai Mamaquë ai yo'oja'quë api, aiohua'i, Maija'quë huë'e ñacaicohua'i ëjaohua'ije, cuañese'e ye'yacohua'ije yë'ëre coejë huani jëoja'cohua'i a'ë. Jaje yo'osiquëta'a toaso mu'seña pa'i maca huëija'quë api.”

²³ Ja jeteyo'je si'ahua'ire capi:

“Paipi yë'ëre tuiye yëni jëõñe pa'iji, johua'i yë'ë tse a'ë cuasase'ere, yë'ëse'e cuasase'ere. Jeoni yë'ëre tuiye pa'iji, si'a mu'seña ai yo'oye pa'itoje.”

²⁴ Jaje pa'ina, i pa'iyere de'oye pasi'i cuasaquë pani, coa ne huesoye pa'iji. Jaje pa'ina, yë'ë do'ire i pa'iyere ne huesosiquëpi jãëpi huasosiquë pasipi.

²⁵ ¿Te'ipi yo'oni si'aye iye yeja co'amañare hueroni paquëpi ja yë'ta'a i joyo ise'e ne huesëquëna, pa'ito de'oquë?

²⁶ Jaje pa'ina, yë'ë mamire cui'ne yë'ë cocare asaquëta'a paini ca'raquë yë'ë yo'oye ayere quëama'ë pa'isiquëre cui'ne iteje yë'ë Pai Mamaquëpi ëjãë de'oni, ja'quë pa'iyepi cui'ne huññaohua'i çoni dai maca ca'raja'quë a'ë, ja'quëna quëayera.

²⁷ Jaje nuñerepa cayë. Iye maca pa'icohua'ipi Maija'quë te'te ayere ñama'pë paja'cohua'i a'ë. Maija'quë te'te ayepi daina, ñajëna, jeteyo'je ju'iñe pa'iji.”

Jesús Tiñe Pa'i Ponëse'e
(Mt 17.1-8; Mr 9.2-8)

²⁸ Iye case'e pa'i maca ocho mu'se jeteyo'je Jesupi sajili, ai cutihuëna Maija'quëre seji'i caquë. Saina, çoni saë'ë, Pedro, Jacobo cui'ne Juan.

²⁹ Ja maca sani Jesupi Maija'quëre ja sei tiñe pa'i tsiarepa ponëpi, cui'ne i ju'i caje ai miacore papi ña ti'õe peocorepa ponëpi.

³⁰ Ponë maca Jesupe pa'iohua'ipi ñaini caya hua'i so'oja'a miañerepa nëcãjë Jesús ja're cocare cahuë. Jaohua'i cato Moisés cui'ne Elías paë'ë.

³¹ Jesús Jerusalëna sani ai yo'oquë ju'i ja'ñere cahuë.

³² Ja maca ai huëo ca'añe Pedroro cui'ne i cajeohua'ire nëise'epi peo huë'ñarepa tõmeina, sëtasicohua'ipi ñahuë, Jesús irepa pa'iyere, cui'ne cayahua'i i ja're nëcãjëna.

³³ Ja maca Jesús quëno maca pa'isicohua'i jëo saijëna, Pedropi capi:

“Ye'yaquë, iño pëato de'oji. Toaso huë'ña ne'ñe pa'io; më'ë huë'e, Moisés huë'e, cui'ne Elías huë'e.”

Jaje caquëta'a Pedro coa huesë capi, cuasama'ë.

³⁴ Jaje ja yë'ta'a caquëna, siriopi nëca meni sjo huesopi. Sjo huesoquëna, ai quëquëhuë, sirio sa'nahuëre pa'ijë.

³⁵ Jaje pa'ijëna, siriopi yë'ose'e caye asahuë:

“Iquë yë'ë mamaquë yë'ë oiquëre papi ì cayere asajë'ë.”

³⁶ Jaje casi jeteyo'je ñajëna, te'i Jesuse'e paji'i. Pa'ina, ñani jaohua'i ti cama'cohua'i jo'cua paë'ë. Cui'ne yecohua'ireje ñohua'i ñase'e ti quëama'pë paë'ë.

Jesupi Huatire Eto Saoye
(Mt 17.14-21; Mr 9.14-29)

³⁷ Se ñatasi mu'se ai cutihuëpi cajëjëna, jai pai Jesure sañope tì'ahuë.

³⁸ Ja maca pai jopo aquëpi te'i tutu capi:

“Ye'yaquë, ñacajë'ë, care payë yë'ë mamaquë te'i macapi.

³⁹ Huatire hue'equëna, jaëpi josa yo'oquëna, cui'ne cuiquë yo'o'ji, cui'ne hue'hue nequëna, yë'opoja'a siri etoquë yo'o'ji, co'aye yo'oquë ti jeoñe coeji, ìte.

⁴⁰ Tsoe më'ë ye'yacohua'ire seji'ë, huatire eto saojë'ë caquë. Jaje caëna, coa yo'o' jujahuë.”

⁴¹ Caquëna, Jesupi asani ì ye'yacohua'ire capi:

“Maija'quë necaiquë api cuasama'cohua'ipi tñere cuasacohua'i. ¿Je yëhuarepa tsoe mësarü ja're çoni pa'i yo'oquëna, ñani Maija'quëpi nequë api cuasaja'cohua'i a'ni, mësarü? Jaje cani dajë'ë, më'ë mamaquëre ñhona.”

⁴² Jaje caëna, tsihua'ëpi ì quë'rona ja'ye tsiojaina, huatipi yeque hue'hue ne çoquëna, taji'i, yejana. Jaje yo'oquëna, Jesupi huatire yo'oma'ë cani eto saoni tsihua'ëre jujuni pëca ja'quëna ñsipi.

⁴³ Ja maca si'a pai ai cuasahuë, Maija'quë jaiye yo'oyere ñani.

Tijupë Jesús Capi, I Ju'iñe Ayere
(Mt 17.22-23; Mr 9.30-32)

Cui'ne si'ahua'i Jesús yo'ose'ere ñani ai cuasajëna, Jesupi ì ye'yacohua'ire capi:

⁴⁴ “De'oye asajë'ë, iyere. Huanëyema'pë pa'ijë'ë. Yë'ëre Pai Mamaquëre pai jëñana ñsiye pa'iji. Jaje pa'ina, ñohua'i yëyeje yo'ojä'cohua'i a'ë, yë'ëre.”

⁴⁵ Jaje caquëna, ì ye'yacohua'iti asa tja'ñe pahüë, ì caye. Jare jaje asaye pajajë ìpi cuasaye sëte. Jaje pa'ina, ñohua'iti ca'racohua'ipi seni asaye pahüë, ì case'ere.

Nepi Jerepa Do'i Pa'iquë
(Mt 18.1-5; Mr 9.33-37)

⁴⁶ Ja maca ì ye'yacohua'iti sa'ñe cahuë, ñohua'ija'a nepi airepa pa'iohua'iti pa'iohua'iti a'ni, cajë.

⁴⁷ Jaje cuasajëna, Jesupi ñohua'iti cuasaye asani ja maca tsihua'ëre ì quë'rona dani nëcopi.

⁴⁸ Dani jaohua'ire capi:

“Iquë tsihua'ëre yë'ë mamipi cuasajë ñacaini yë'ëni ñacaiyë. Cui'ne yë'ëre ñacaicohua'iti pani yë'ëre jëjo daosiquëreje cui'ne ñacaiyë. Jaje pa'ina, ìti mësarü aquëpi yecohua'ire ai jerepa ñacaiquë pani ai jerepa pa'iti pa'ija'quë api.”

Sañope Yo'oma'quë Caye Ayere
(Mr 9.38-40)

⁴⁹ Caquëna, Juan capi, ìte:

“Ye'yaquë, yëquë te'ì ëmë më'ë mamipi caquë huatire eto saquëre yo'oma'ë pa'ijë'ë cajë ësehuë, yëquë ja're çoni cu'ima' do'ire.”

⁵⁰ Caquëna, Jesupi capi:

“¿Me neñu'ju ëserë'ni? Maire sañope cama'quë pani mai yo'oye yo'o' çoçohua'iti a'ë.”

Que Joyo Pa'iquë

⁵¹ Jesús ma'tëmo mëiñe tja'ñe ja'ì maca pa'ina, Jerusalëna sai huëoni saji'ì, ì cuasa nëose'ere yo'osi'ì caquë.

⁵² Saija'quëpi jëjo saopi, ì du'ru sani ì pëajato co'ejä'cohua'ire, Samaria pai quë'rona.

⁵³ Jaje pa'iquëta'are Jerusalëna saiyë nëina, Samaria pai coehuë, pëa huë'ña ñsiye.

⁵⁴ Ja maca jaje ësejëna, asani ì ye'yacohua'iti Juan cui'ne Jacobo cahuë:

“Ëjaë, yëquë më'ë jaohua'ire toapi cuañerëna, ma'tëmopu tomeni peo huë'ñarepa ëo hue-soye. Tsoe Maija'quë jëjo daoquë Elías yo'oquë pa'ise'ëje yo'oñu'ü.”

⁵⁵ Jaje cajëna, Jesús ñani jaohua'iti case'ere coequë sañope capi:

“¿Ique joyore hue'eye'ni, mësarü?

⁵⁶ Yë'ë Pai Mamaquë cato daima'ë paji'ì, pai joñoare nejosi'ì caquë. Coa ai jerepa paini huasosi'ì caquë daë'ë.”

Jaje cani jëoni yequë pai pa'ì huë'ñana saë'ë.

Jesús Pe'teye Yëcohua'iti Ayere Quëaye
(Mt 8.19-22)

⁵⁷ Ma'aja'a jaohua'iti saijëna, te'ì ëmë Jesure capi:

“Ëjaë, më'ë ja're çoni saiyë yëyë. Coa si'a huë'ña më'ë saitoje.”

⁵⁸ Jesupi sehuopi:

“Airo jo'ya mañaje coña pacohua'i a'ë cui'ne pi'a mañaje tsiaro pacohua'i a'ë. Pai Mamaquë cato ti peoquë api, i sïopë tëo paquë ui mañaque.”

⁵⁹ Jesupi yequëre capi:

“Yë'ëre tuijë'ë.”

Jaje caquëna, ipi capi:

“Ëjaë, utejë'ë. Yë'ëta'a du'ru ja'quëre tajasi'i.”

⁶⁰ Jesupi sehuopi:

“Yë'ëre cuasama'cohua'i ju'isicohua'ije pa'iohua'i pa'iyë. Jaohua'ipi cui'neje ju'isicohua'ini tajajë. Më'ë cato daijë'ë, Maija'quë pa'iyere yecohua'ire quëaja'quëpi.”

⁶¹ Ja maca yequëpi capi:

“Ëjaë, tuiye yë'ë. Utejë'ë. Du'ru macarepa yë'ëta'a huë'e pa'icohua'ire pëpa tëjsi'i.”

⁶² Jesupi ite capi:

“Yë'ë co'amañare ne huëosiquëpi, jaiye yeque yo'oyere cuasaquë yo'oquë pani yë'ë co'amaña ne t'ãñe peoji.”

10

Jesupi Setentare Jëjo Saoye

¹ Jaje iye yo'osi jeteyo'je setenta pa'iohua'ini i saija'a daripëana du'ru jëjo saopi, cayao-hua'ise'ere, ipi ñaquë sahuasicohua'ini.

² Jëjo saokuë capi, jaohua'ire:

“Nuñerepa cayë. Tëa ja'ñe cato jaiye a'ë. Jaje pa'iquëta'are iti necohua'ipi a'ri maña pa'iyë. Jaje pa'ina, sejë'ë, iti tse aquëni jai paire jëjo saojaquë neja'cohua'ire.

³ Ñajë saijë'ë. Mësarute jëjo saoyë, yëi ñamaje pa'iohua'ini yaije pa'iohua'ijopona.

⁴ Sama'pë pa'ijë'ë, curi topëje, çai topëje, cui'ne curiquëje, cui'ne zapatoje, cui'ne ma'aja'a saijë pai pa'icohua'i pa'ito coa sa pëpajë saijë'ë, tsoe nëcãjani caye peoye.

⁵ Huë'ena cacacohua'i pani du'ru macarepa ñeje cajë'ë: 'Iye huë'e pa'icohua'ire de'oye pa'iyepi pa'ijë'ë.’

⁶ Jaje pëpajëna, jaohua'ipi de'oye pa'iyere oicohua'i pa'ito mësaruru pëpase'epi iohua'ini pa'ija'coa. De'oye pa'iyere oima'cohua'i pa'ito ja pëpase'epi mësaruna co'i cosipi.

⁷ Du'ru pëpasi huë'ena cacani pëani iohua'i aonere aijë cui'ne ucujë pa'ijë'ë. Co'amaña necohua'ire sëte iohua'ipi saijëne pa'ye çocaiyepi pa'ijë'ë. Jaje pa'ina, huë'ña ñape cu'ima'pë pa'ijë'ë.

⁸ Pai daripëna t'ãarena, jaro aquëpi i huë'ena pëpasiquëpi aore aoto aijë'ë.

⁹ Jarore ju'icohua'i pa'ito jujucãijë'ë. Cui'ne quëajë'ë, Maija'quë cuãñe t'e'tena mësarupi ponëñe ja'yere pa'iji cajë.

¹⁰ Jaje pa'iquëta'are yequë huë'ña daripë pa'icohua'ipi mësarute coeto iti daripë ma'añana etani cajë'ë:

¹¹ Mësaruru daripë ya'opi yëquë quëona së'ase'ere t'ito toñë, mësaruru asaye yëma'pë pa'i do'ire iñojë'. De'hua cuasajë'ë, iyere, Maija'quë pa'i t'e'tena ja'yere pa'iji, mësarute.

¹² Mësarute cayë, pai ñape yo'ose'e ne de'hua mu'se t'ãasi maca jaohua'i co'aye yo'ose'e saijëne pasipi. Sodoma daripë acohua'ire yo'ose'e jerepa co'ayepi.

Sehuoma'cohua'i

(Mt 11.20-24)

¹³ Teayerepa më'ë Corazín daripë maca cui'ne Betsaida daripë. Jaiye pai yo'osi t'ãa ma'ñere yo'otoje coa ñahuë, më'ë. Jaro yo'ose'eje pa'ye Tirona cui'ne Sidón daripëna yo'oquëna, ñasicohua'i pani tsoe otira'huë. Iohua'i co'ayere cuasajë ai ju'i çare suñani huatapi jorëje ai oiyere iñora'huë.

¹⁴ Jaje pa'iquëta'are pai ñape yo'ose'e mu'se t'ãasi maca mësarupi ai jerepa co'aye yo'osi do'ire sai cuãñoñe pa'iji. Tiro cui'ne Sidón daripëa pa'icohua'i seña maca.

¹⁵ Cui'ne mësaruru Capernaum daripë pa'icohua'i yëquëpi ai jerepa tëto saisciohua'i a'ë ma'tëmo quë'rore pana cuasayë, mësaruru. Pani mësaruru cato coa ai jerepa huë'ehuëre pana caje huesëja'cohua'i a'ë, toa yejana.

¹⁶ Mësaruru cayere asacohua'i pani yë'ëni asaja'cohua'i a'ë, cui'ne mësaruni coecohua'i pani yë'ëni coeja'cohua'i a'ë, cui'ne yë'ëni coecohua'i pani yë'ëre jëjo daosiquëni coeyë.”

Setenta Jëjo Saosicohua'ipi Co'iyë

¹⁷ Jaohua'i setenta pa'iohua'i ai sihuayë. Co'ini cahuë:

“Ëjaë, huatiohua'ique yëquë më'ë mamire cajëna, asajë ca'rajë etahuë.”

¹⁸ Jesupi capi, jaohua'ire:

“Jaje pa'ijë'ë. Yë'ëje ñahuë, huati ëjaëpi ma'tëmopi mujuë ye'hueyeje pa'yerepa tomequëna.

¹⁹ Yë'ëpi mësarute tutu isihuë, añare, punire tsa'cujëna, ti a'si neñe peo ja'ñere. Cui'ne maire sañope yo'oquë tutu jerepa isihuë, quëcoja'cohua'ire caquë.

²⁰ Jaje pa'iquëta'are sihuama'pë pa'ijë'ë, huatiohua'i mësarute sehuoyere. Coa ai jerepa mësaruru mami ma'tëmure toyase'e pa'yere sihuajë'ë.”

Jesús Sihuaye

(Mt 11.25-27; 13.16-17)

²¹ Ja maca Jesús Maija'quë joyopi i ja're pa'iyë sëte ai sihuacuë capi:

“Sihuayë, Ja'quë më'ëre ma'tëmo cui'ne yeja Ëjaëre. Më'ëpi iyere ñohuë, tsije pa'iohua'ina më'ëpi ta'ñe cuasajë pa'icohua'ire cui'ne ai asacohua'ire yahuese'ere. Jaje t'ï'api, më'ë yëyeje.”

²² Yë'ë ja'quëpi si'a co'amaña yë'ëna isipi. Maija'quë mamaquë api cajë pai ñañe pañë. Coa ja'quëse'e asaji, i mamaquëre. Ja'quëreje pai ñañe pañë. Coa mamaquëse'e asaji, ïte. Jaje asaquë i mamaquëpi i yëcohua'ina ññocohua'ise'e asayë, i pa'iyë.

²³ Ja maca i ye'yacohua'ise'ere capi:

“Mësaruru ñañeje ñacohua'ipi sihuacohua'i a'ë.

²⁴ Jaje pa'ina, cayë, mësarute. Jai pai Maija'quë yo'o ja'ñere quëacaicohua'i cui'ne pai ëjaohua'i mësaruru ñañeje pa'ye ñañe yëhuë. Jaje yëjëta'a ñama'pë paë'ë. Cui'ne asaye yëhuë, mësaruru asayeje pa'yere. Jaje yëjëta'a asaye pahüë.”

De'oquërepa Samaria Aquëpi

²⁵ Ja maca cuañese'e ye'yaquëpi huëni Jesús quë'rona i ja're coca caquë, neñasi' i cuasaquë sani seji'i:

“¿Ye'yaquë, me neja'quë a'ni, ti pa'iyë t'ï'añe cani?”

²⁶ Jesupi sehuopi:

“¿Iti cuañese'ere ñato me pa'iquë'ni, më'ëpi asato?”

²⁷ Caquëna, cuañese'e ye'yaquëpi sehuopi:

“Oijë'ë, më'ë Ëjaë Diusure si'a më'ë yëyepi, si'a më'ë joyo, si'a më'ë tutu, cui'ne si'a më'ë cuasaye. Cui'ne oijë'ë, më'ë quëno maca aquëre më'ëja'a co'ye oiyeje pa'ye.”

²⁸ Caquëna, ja maca Jesupi capi:

“Ite de'oyerepa sehuohuë, më'ë. Jaje më'ë yo'oquë pani, ti pa'iyë t'ï'aja'quë a'ë.”

²⁹ Jaje caquëna, cuañese'e ye'yaquëpi de'oye yo'oquë a'ë caquë Jesure ññosi' i caquë sañope seji'i:

“¿Jaje pa'ito ne a'ni, yë'ë quëno maca pa'iquë?”

³⁰ Caquëna, Jesupi sehuopi ïte:

“Te'i pai Jerusalëni ma'aja'a Jericóna meji'i. Meina, co'amaña ñacohua'ipi tseani si'aye i paye cui'ne i ju'i cajë jiohuë. Ai të'carena, ju'ise'ëje pa'i uina, jeoni saë'ë.

³¹ Cui'na ma'aja'a judío Maija'quë huë'ere ñacaiquë saiquëpi ma'are uina, ñani coa ñaqué sa saji'i.

³² Cui'ne ïti ma'aja'a levita sai coa ñani saji'i.

³³ Jaje sai sitore Samaria pai coecohua'iquëpi cui'ne ma'aja'a sai teaye ñani.

³⁴ Ja maca tsiojani a'sire hui'yape ocopi cui'ne o'sayepi tsoani cañapi huëni jupupi. Jeteyo'je i caballona tëoni sapi, saicohua'ipi pëa huë'ena.

³⁵ Se ñatasi mu'ne Samaria aquëpi sai huëoni caya curiquë të'ña isipi, ïti huë'ë aquëre. Isiquë capi: ‘De'hua ñacaijë'ë, iquëre. Më'ëpi ai jerepa i do'ire necaisiquë pa'itoje yë'ëpi saisi' i cui'naëpi co'i co'i maca.’

³⁶ De'oji. Jaje pa'ito: ¿Toasocohua'iquë jequë paquë'ni, ñahua' i huani òani saisiquë quëno maca aquë ïte oisiquë, më'ëpi cuasato?”

³⁷ Caquëna, cuañese'e ye'yaquëpi capi:

“Ite ñani oi necaisiquë api cuasayë.”

Caquëna, ja maca Jesupi capi, ïte:

“Më'ëje cui'ne sani yo'oquë pa'ijë'ë.”

Jesupi Marta Cui'ne María Huë'ere Pa'iyë

³⁸ Jesús ma'aja'a saiquëpi t'ï'api, a'ri daripëna. Jarote cui'ne paco'ë, Marta hue'ecopi. Jaopi io huë'ena pëpao, ïte, cui'ne i ye'yacohua'ijë.

³⁹ Cui'ne paco'ë, Marta yo'jeo María hue'ecoje. Jaopi Jesús quëo yë'quë macana ja'runi ñu'io asao, i cayere.

⁴⁰ Asacona, Martapi jaiye huë'ë co'amaña neñe pa'ina, ñani ai cuasa huesëco Jesús quë'rona tsio dani cao:

“¿Ëjaë, yë'ëse'e necona, yë'ë yo'jeo coa ñu'ico ñaquë, më'ë? Jaje pa'ina, cayë iote cajë'ë, yë'ëre sani cocaija'co.”

⁴¹ Jaje cacona, Jesupi sehuopi:

“Marta, Marta më'ë jaiye neñere co'a ju'io, cui'ne ai cuasaco.

⁴² Jaje pa'iquëta'are te'o pa'iji nuñerepa cocaiye. Jare María tì'ao, yecohua'ije jioye ti peoyere.”

11

Jesupi Ye'yapi, Maija'quëre Señe

(Mt 6.9-15; 7.7-11)

¹ Tjjupë Jesús Maija'quëre seni tējisi maca i ye'yacohua'i aquëpi capi, ite. Ëjaë, ye'yajë'ë, Maija'quëre seña, Juan i ye'yacohua'ire ye'yaquë pa'ise'eje.

² Caquëna, Jesupi sehuopi:

“Secohua'i pani ñeje cajë'ë:

Yëquë Ja'quë ma'tëmo pa'iquë,

Më'ë mami de'oyere pa'ë.

Më'ë cuañeña daijaquë yëquëna,

Më'ë yëyepi yo'oye pa'ija'quë, iye yejaje, ma'tëmo yo'oyeje pa'ye.

³ Iye mu'se aì ja'ñere isijë'ë, caraye peoye.

⁴ Yecohua'ipi yëquëni do'i pajëna, sai de'huacaiyeje pa'ye më'ëpi yëquë do'ire sai de'huacajë'ë.

Neñaña pa'ito më'ëpi co'ayere nejocajë'ë.”

⁵ Jesupi capi, jaohua'ire:

“Mësaru aquëpi te'ire i cajaire paquëni jaëpi ñami jopo i huë'ena dani caji, ite: ‘Cajei, toaso aò isijë'ë, co'yoja'quë a'ë.’

⁶ Yë'ë cajepi yure titaëna, aõñepi peoquëna, cayë, caji.

⁷ Caquëna, tu'rihuepi de sehuoquë casipi: ‘Josa da cayë. Eta sa'ro siosicoa. Jere më'ëre isisi'quë coa huëiye'ni, tsj ja're uini.’

⁸ Jaje casiquëta'a cajei pa'isi do'ire huëni isiye papi, coa josa jerepa sema'quëni caquë huëni isipi, si'aye ite carase'ere.

⁹ Jaje pa'ina, yë'ëpi cayë, mësarute: Sejë'ë. Maija'quëpi isija'quë api. Co'ejë tì'aja'cohua'i a'ë. Eta sa'rona të'cajëna, hui'yosipi.

¹⁰ Jaje pa'ina, sequëpi isi cuañeña pa'iji. Cui'ne co'equëpi tì'añe pa'iji. Cui'ne eta sa'rona të'caquëni hui'yocaiye pa'iji.

¹¹ Mamaquëpi panre seña, quëna përe isi'ñe pa'i a'ë mësaru aquë je'quë mamaquëre çpanita'a hua'ire seña, añani aõ'ñe pa'i a'ë?

¹² ¿Panita'a tsiapëre seña, punini aõ'ñe pa'i a'ë? Pani.

¹³ Ñajë'ë. Mësaru co'acohua'ita'a mamajëre oijë de'oyere isicohua'i a'ë. Jaje pa'ie sëte mësaru Ja'quë ai jerepa oiquë sëte i de'o joyore pañu'u cajë secohua'ire isija'quë api.”

Jesupi Huati Tutupi Yo'oji, Coa Caye

(Mt 12.22-30; Mr 3.20-27)

¹⁴ Yequë mu'seña huatipi coca cama'quëre nesiquëni Jesupi huatire eto sauna, coca capi, cama'quë pa'isiquëpi caquëna, ñajë jai pai ai cuasahuë, merepa yo'o u'ni iye cajë.

¹⁵ Yecohua'ipi cahuë:

“Huatiohua'í ëjaë Beelzebú tutupi yo'oji, iquë, huatire eto saquëna, ñajë.”

¹⁶ Yecohua'ipi pai yo'o tì'a ma'ñe ma'tëmo ayere yo'o iñojë'ë cajë sei'ë.

¹⁷ Ja secohua'i cuasayera asaquëpi jaohua'ire capi:

“Te'le yeje ëjaohua'ipi jopoj'a huasichohua'i pani sa'ñe uihuani co'ye johua'í yejare nejoñë. Cui'ne te'le caje tsëcapë pa'isicohua'ipi hua saiscohua'í pani sañope yo'ojë johua'íja'a peo hue'ña ne huesëyë.

¹⁸ Satanáspi i tsëcapëni sañope yo'oquë pani ¿me si'ahohua'í cuañe tì'añe pa'iquëni? Iye cayë, mësarupi yë'ëni Beelzebú tutupi huatire eto saoji cajëna.

¹⁹ Jaje yë'ëpi Beelzebú tutupi yo'oquë pa'ito, çnepi mësarute tuicohua'ire tutu isiye'ni, huatiohua'ire eto sao ja'ñe? Jaje pa'ina, johua'ini mësarupi seni asajë'ë, quëajajë.

²⁰ Jaje pa'iquëta'are yë'ë cato Maija'quë tuture papi huatire eto saquë yo'oyë. Jaje pa'ina, yë'ë yo'oye cato Maija'quë cuañe te'tepi tsoe titapi caquë iñoñe a'ë.

²¹ Ai tutu quë'ipi cui'ñasiquë i co'amañare de'oye ñaquë pa'ito, yecohua'ije jioye peoji.

²² Jaje pa'iquëta'are yequë ai jerepa tutu quë'ipi cacani ite quëco saoye pa'iji. Ja maca si'aye i quëcoquë uihua ja'ñere pase'e jioni i tsë de'huaye pa'iji, i pase'ere.

²³ Jaje pa'ina, yë'ë yo'oyere de'oji cacaima'quë cato yë'ëre sañope yo'oquë api, cui'ne yë'ë ja're te'le tsi'soma'quë pani, coa ne tiya saquë api.

Co'a Joyopi Cui'naona Co'iyē
(Mt 12.43-45)

²⁴ Huatipi pāini pa'isiquēpi eta saisiquē pani coa cuēne yejañare cu'iji, pēa huēñare co'equē. Jaje co'equē tī'ama'ē co'isi'i yē'ē etani daisi huē'ena cuasaji.

²⁵ Cani co'iquē ñaquēna, de'oyerepa yuani ne de'huase'eye pa'ipi pa'iji.

²⁶ Pa'ina, ñani sani siete huatíohua'i i jerepa co'acohua'i ja're cōni cacani cui'naēna, pēasi maca yureta'a ja'nē pa'ise'e seña maca co'acquē pa'ija'quē api."

Nuñerepa Sihuaeye

²⁷ Jesús ja yē'ta'a itire caquēna, pai jopopi nomioipi cuio:

"Mē'ēre cōani ai de'huasico ai sihuaco pa'ico."

²⁸ Jaje caciona, ipi capi:

"Ai jerepa sihuacohua'i pa'iyē, Maija'quē caye asacohua'ipi cui'ne sehuocohua'ipi."

Co'acohua'ipi Señe, Pai Yo'o Tī'a Ma'ñere
(Mt 12.38-42; Mr 8.12)

²⁹ Paipi Jesús quēno macana tsi'sini saijēna, ipi coca ca huēopi:

"Iye'nē pai co'acohua'i a'ē. Jaje pa'iohua'ipi señe, pai yo'o tī'a ma'ñere yo'o iñojē'ē cajē. Jare setoje Maija'quē yo'o ja'ñere quēcaciquē Jonás yo'oquē pa'ise'eye pa'ye de'oye yo'o iñoñe pa'iji. Mésaru yēyere iñoñe peosipi.

³⁰ Jonás Nínive daripē paire Maija'quē case'ere iñocaiquē paji'i. Cui'neje pa'isiquēpi yure Pai Mamaquēpi yure pa'icohua'ire iñoja'quēpi pa'iji.

³¹⁻³² Nínive daripē pa'icohua'ipi pai ñape yo'ose'e ña mu'se huēni iye'nē paire sañope caja'cohua'i a'ē. Jonáspi Maija'quē cocare quēaquēna, asani ja'rē pa'ise'e jeoni ponēsi do'ipi. Iñore yure Jonásre tēto saisiquēpi pa'iji. Pai ñape yo'ose'e ña mu'se pa'i maca iye paire íohua'i yo'ose'eye pa'ye sai maca tī'aēna, huē'ehuē te'te pai éjaopi huēni nejoñe pa'iji caja'coa. Jo so'o yejapi Salomón ta'ñe yo'oye asasi'i caco daisi do'ire. Iñore Salomón jerepa pa'ipi pa'iji, yure.

Maire Miacaiye

(Mt 5.15; 6.22-23)

³³ Toa tsēoni yahueye peoji, panita'a mahuē sa'nahuēna ayaye peoji. Jaje yo'oye pajē coa ai jerepa émēje'ena nēcōyē, daicohua'ire miacaija'coni.

³⁴ Capēre ñaco cā miacaiye pa'iji. Jaje pa'ina, mē'ē ñaco capi de'oyere ñañe pa'ito mē capēje de'oye miacaisico pa'iji. Jaje pa'iquēta'are mē'ē ñaco capi co'ato si'a mē'ē capēje ai yo'oyere pa'iji.

³⁵ De'hua ñajē'ē, mē'ē miañe pa'iyere, neañena ponēma'coni caquē.

³⁶ Jaje pa'ina, mē'ē capēpi miañe jopore pa'ito si'aye tīñarepa ñañe pa'iji, neañe peoto. Toa tsēocopi miacaina, ñañeje pa'ye."

Fariseohua'ire Cui'ne Cuāñese'e Ye'yacohua'ire Sañope Caye

(Mt 23.1-36; Mr 12.38-40; Lc 20.45-47)

³⁷ Jesús coca ca tēji maca, fariseopi Jesure huēopi, i huē'ena aō sani aijjē'ē caquē. Huēouna, sani ja'rupi aō ai saihuēna.

³⁸ Ja'runa, fariseopi jēña tsoajē'ē aima'nē cuāñese'ere yo'oma'aji'i, ñaquē cuasapi.

³⁹ Jaje cuasaquēna, Éjaēpi capi, ite:

"Mésaru fariseo pai cato coa émēje'e ucu duruhuēase'e cui'ne quēna ne'ñase'e tsoacohua'i a'ē. Jaje yo'ocohua'ita'a sa'nahuē cato si'sio. Yecohua'i payere yēcohua'ipi cui'ne co'ayepi tīmésicohua'i a'ē. Mésaru cui'ne pa'iyē.

⁴⁰ Huesēohua'i, ña ma'ñe émēje'e nesiquēpi sa'nahuē ayeje Maija'quēpi nese'e a'ē.

⁴¹ Jaje pa'ina, peocohua'ina isijjē'ē, mésaru sa'nahuē payere. Jaje yo'oto si'aye tsoa tōse'e pa'ija'coa.

⁴² Teayerepa mésaru fariseo pai maña. Mésarupi diez topēa neni te'ore Maija'quēna isiyē, añena huēo señe neñe añere, cui'ne tase'e cōni. Jaje de'oye yo'ojēta'a nuñerepa de'oye yo'oyere cui'ne Maija'quē oiyeye pa'ye yo'oyere peocohua'ipi pa'iyē. Jaje pa'ina, iyere yo'oye pa'iji, mésaru tsoe de'oye yo'oyena cōni.

⁴³ Teayerepa mésaru fariseo, pai maña! Pai tsi'si huē'ñare de'o saire ñu'lijēna, ñajē paipi jerepa pa'iohua'i a'ē cajajē cuasacohua'i a'ē, cui'ne co'amaña huero huē'ñare nēcajēna, jai pai iti maca ñacohua'ipi jerepa pa'iohua'i a'ē cajē de'oye pēpajajē cajē, mésarujē teaye yo'ocohua'i a'ē.

⁴⁴ Cuāñese'e ye'yacohua'i cui'ne fariseo pai cōni teayerepa coa cacohua'i a'ni, tasi daripēje pa'iohua'ini, pai ñama'pē tsa'cujē si'si neñeje yo'oyē."

⁴⁵ Jaje caquēna, cuāñese'e ye'yaquēpi ñeje caquē sañope sehuopi:

"Ye'yaquē, jaje mē'ē cani yēquēreje tea ju'i cayē."

⁴⁶ Jaje caquëna, Jesupi sehuopi:

“Teayerepa mësaruje cuañese'e ye'yacohua'ijë yo'oyë. Yecohua'ise'ere dëquë co'amañare hue'ocaiyë. Jaje yo'ojëta'a mësarupi te'e moño macajë se coçaiye coecohua'i a'ë.

⁴⁷ Maija'quë yo'o ja'ñere quëacaicohua'ire jare mësaru aiohua'ipi huani jëoni tasi daripëare mësaru teayerepa ne de'huacohua'i a'ë.

⁴⁸ Jaje yo'ojë mësaru aipë yo'ose'ere de'oji cuasajë yo'oye ñaño pa'iji, mësarupi iohua'i huani tasi daripëare ne de'huajëna.

⁴⁹ Jaje pa'ina, Maija'quë i ta'ñe asayepi capi: 'Jëjo saolja'quë a'ë yequë mu'se yo'o ja'ñere ca nëocohua'ire cui'ne sahuani yë'ë coca quëacohua'ire nesicohua'irejë jaohua'ini huani jeaja'cohua'i a'ë, yecohua'ini coa josa yo'ojë.'

⁵⁰ Jaje pa'ina, yeja de'huasi macapi ite quëacaicohua'ire huaisi do'ire yure pa'i pãini Maija'quëpi seja'quë api.

⁵¹ Abelre huaisi macapi cui'ne Sacariare huaisi macaja'a acohua'i do'ire yëi ñamare ëo hue'ñana cui'ne Maija'quëre se huë'ena joporepa. Jaje pa'ina, nuñerepa cayë quëapi, yure pa'i pãina seja'quë api, tsie do'ire.

⁵² Teayerepa mësaru cuañese'e ye'yacohua'i nuñerepa cocare yahueyë. Jaje yo'ojë coejë yecohua'i asañu'u cajë yëcuhua'irejë ësejë sañope yo'oyë, mësarupi."

⁵³ Ñeje Jesús caquëna, nani cuañese'e ye'yacohua'i cui'ne fariseohua'i ai pëtitei'ë. Jaje pa'ijë jaiye se huëohuë.

⁵⁴ Sejëna, tayo sehuouna, ñani tseañu'u, co'aquë api cajajë cuasajë.

12

Coa Cayere Sañope Yëhuoye

¹ Jai pã mil jerepa te'e macana tsi'sini airepa tımëni sa'ñe ju'ajë yo'ohuë. Yo'ojëna, Jesupi i ye'yacohua'ini du'ru macarepa ca huëopi, ñeje:

“De'hua ñajë'ë, fariseohua'i porere. Jaje cani capi fariseohua'i coa cajë yo'oyere ye'yema'pë pa'ijë'ë caquë.

² Jaje pa'ina, asama'pëna yo'ose'ere t'i'a ja'ñe a'ë cui'ne yahue yo'ose'ere, asa ja'ñe a'ë.

³ Jaje pa'ina, mësaru nea hue'ña yo'ose'ere mu'sepi asaja'cohua'i a'ë, cui'ne yahurepa tu'rihuëna sioni case'ere huë'e sa'nihuëpi nëcajë cui ja'ñe a'ë, pã asa hue'ñana.

Neni Mai Ca'raye Pa'iquë'ni

(Mt 10.28-31)

⁴ Jaje pa'ina, cayë, mësarute. Capë huaicohua'ire ca'rama'pë pa'ijë'ë. Jaohua'i cato jerepa yo'oye peoyë.

⁵ Jaje pa'ina, quëasi'i. Ca'rajë'ë, huani jëosi jeteyo'je toa yejana jëjo saojquëni. Jaje pa'ina, ca'rajë'ë, Maija'quëni.

⁶ Mësarupi asayë, cinco pã'ani caya të'ña isicohua'i a'ë cajë. Jaje a'ri do'iohua'ita'are Maija'quë huañeyema'ë ñacajji.

⁷ Jaje pa'ina, mësaru nañaque cuëcuese'e a'ë, ca'rama'pë mësarupi. Jaje pa'ina, pã'a jerepa do'icohua'i a'ë.

Jesure Cacaiye Pa'iji

(Mt 10.19-20, 32-33; 12.32)

⁸ Si'aohua'i mësarupi yë'ëni ca'rama'pë yë'ë cajeipi cacohua'ire cato, yë'ë Pãi Mamaquëje Maija'quë huññaohua'ina yë'ë cajeipi quëaja'quë a'ë cayë.

⁹ Jaje cui'ne yë'ëni ca'rajë cajei peoyë, pã asa hue'ñana casicohua'ire yë'ëje cui'ne Maija'quë huññaohua'i ña hue'ñana yë'ë cajei peoji, caja'quë a'ë.

¹⁰ Jaje pa'ina, yecohua'ipi Pãi Mamaquëre co'aye casicohua'i pani sa'i de'hua cuañoñe pa'iji. Jaje pa'iquëta'are yecohua'ipi Maija'quë joyore co'aye casicohua'i pani sa'i de'hua cuañoñe ti peoji.

¹¹ Mësarute tseani pã tsi'si huë'ñana, panita'a pã yo'oye ñacohua'i quë'rona co'aye yo'ocohua'i a'ë cajë sacohua'i pa'ito du'ru cuasama'pë pa'ijë'ë, me sehuoja'cohua'i a'ni cajë.

¹² Iti cayë t'i'asi maca Maija'quë joyopi quëaquëna, mësaru caja'cohua'i a'ë."

Jaiyere Payepi Huajëya'ye Neñe

¹³ Pã jopopi Jesure capi, ñeje:

“Ye'yaquë, se quëajë'ë, yë'ë a'yëre yë'ëreje co'amaña huacajjaquë ja'quë pase'e.”

¹⁴ Caquëna, Jesupi capi, ite:

“¿Ina, nepi yë'ëre pã yo'oye ñaquëre cui'ne co'amaña huahuequëre cuañere'ni?”

¹⁵ Yequeje capi, Jesús:

“Si'aye co'amaña ëayere de'hua ñajë'ë. Jaje pa'ina, pai pa'iyee cato jaiye co'amaña payepi coçaina, pa'iyee peoji.”

¹⁶ Jaje caquë pai pa'iyere tiñarepa quëasi'i caquë capi:

“Pa'iji, te'i ëmë jaiye co'amaña paquë. Pa'ina, i tasi co'amañapi jaiye tëa ja'ñepi quëji'i.

¹⁷ Ja maca ñani jaiye co'amaña paquëpi çme neja'quë a'ni, iti de'hua hue'ñaje? ¿Jeronona de'huaja'quë a'ni, quëise'e? caquë cuasa huëopi.

¹⁸ Ja maca cuasapi, peo hue'ña ja'rë de'hua hue'ña pa'ise'e nejoni yeque jerepa jai hue'ña nesi'i. Neni jaronona de'huasi'i si'aye yë'ë tëase'e cui'ne si'aye yë'ë tsoe paye çoni.

¹⁹ Ja jeteyo'je de'huani yë'ëja' casil'i: 'Jaiye co'amaña de'huase'e payë, tsoe ometëca pa'i ja'ñere pëa huajëquë sihuaquë ucuquë ai pasi'i' cuasapi.

²⁰ Jaje cuasaquëna, Maija'quëpi ite capi: 'Huesë maca, iye ñami më'ë ju'ija'quë a'ë. Jaje pa'ina, më'ë de'huase'e çne tse pa'i ja'ñe a'ni?’

²¹ Ja maca ponëni si'ahua'ire capi. Jaje yo'oye pa'iji. Jaiye co'amaña paquëpi co'ye de'oye pa'iyese'e cuasaquë, Maija'quëre cuasama'quë cato.”

Maija'quë I Mamajëre Ñacaiye

(Mt 6.25-34)

²² Jeteyo'je Jesús i ye'yacohua'ire capi:

“Jaje pa'ina, mësarute co'a ju'ima'pë pa'ijë'ë, jere aija'cohua'i a'ni cuasajë. Cui'ne co'a ju'ima'pë pa'ijë'ë, jere caña ju'ija'cohua'i a'ni cuasajë.

²³ Ao aiñe jerepa do'iyee a'ë, pai pa'iyee. Cui'ne caña ju'iyee jerepa do'iyee a'ë, mai capë.

²⁴ Ñajë'ë, jaohua'i pë'përiini, co'amaña tãma'cohua'ita'a cui'ne tëama'cohua'ita'a cui'ne iti ça de'hua huë'e peocohua'ita'a cui'ne pëa hue'ña peocohua'ita'a de'hue Maija'quëpi coçaina, pa'icohua'ini. Jaje pa'ina, mësarupä'ia seña maca do'icohua'i a'ë, päirepa sëte.

²⁵ Jaje pa'ito çnepi mësarupä'ia ai co'a ju'i do'ire metro joporeja'a tsoacohua'i ai de'oja'cohua'i a'ni?

²⁶ Jaje pa'ina, ai cuasa do'ire a'ri maña pa'ise'ere jaiye se mëoñu'u ai jerepa cuasaye'ni. Jaje pa'ito çme neñu'ju airepa yequë co'amañare co'a ju'iñe'ni?

²⁷ Ñajë'ë, cui'ne jorore coa mëani pa'iyere co'amaña ne ma'ñeta'a cui'ne yëije oya ma'ñeta'a ai de'o joro pa'iyere. Jaje pa'ina, cayë, pai ëjaë Salomón maca i de'o hue'ñiare pa'inijee de'o jo'ya jorojë pa'irepa ju'iyee päpi.

²⁸ Jaje Maija'quë toya mañata'a de'oyee suñacaise'ere päji, coa yuresee'ere pani ñamina'a tsoe ju'ise'e pa'ina, toana ëo ja'ñeta'a. Jaje pa'ito mësarute ai jerepa caña suñacaiye pa'iji, Maija'quë necaima'quë api, cuasacohua'i.

²⁹ Jaje pa'ina, co'a ju'ijë cui'ne co'ejë cui'ima'pë pa'ijë'ë, jere aija'cohua'i a'ni cui'ne jere ucuja'cohua'i a'ni cuasajë.

³⁰ Iye yeja pai jaje ai cuasajë pa'iyë, si'aye iyere. Jaje pa'iquëta'a mësarupä'ia tsoe mësarupä'ia quëre payë, si'aye mësarute jopo caraye asaquëni.

³¹ Jaje pa'ina, mësarupä'ia Maija'quë cuañe te'tere ai oijë yo'oto Maija'quëpi de'hue jopo caraye isiquëna, co'amaña päjë'ë.

Ma'tëmo Co'amaña

(Mt 6.19-21)

³² Ca'rama'pë pa'ijë'ë, yë'ere asacohua'i mësarupä'ia a'ri päi maña'ë. Jaje pa'iquëta'are mësarupä'ia quëpi i cuañe te'tere isiyee yëji.

³³ Mësarupä'ia paye pa'ito isijë'ë, curiquëpi cui'ne co'amaña carasicohua'ina do'i peoye coa isijë'ë. Jaje yo'ojë ai huano topëa de'o ma'ñere ti'ajë'ë. Ma'tëmo co'amaña carajai ma'ñere, cui'ne ñaëje cacama'tore pu'juje pu'juma'tore päja'cohua'i.

³⁴ Mësarupä'ia co'amaña pa hue'ñiare, cui'ne jarote mësarupä'ia joñaaje pasipi.

Ne De'huasicohua'ipi Pa'ijë'ë

³⁵ Ne de'huasicohua'ipi ñare päjë pa'ijë'ë.

³⁶ Fiesta ña tëjini ëjaë co'ija'quëpi cayë, i jo'ya utejë pa'iyee pa'iohua'i pa'ijë'ë. Titi'ni eta sa'riona të'ca maca esa hui'yocaiyeje yo'oja'cohua'ipi.

³⁷ Sihua'cohua'i a'ë, iohua'i ëjaëpi utejë pa'ijëna, titaëna ñani. Nuñerepa cayë, iohua'i ëjaëpi sihuaquë ço ai sai huëna soini açore çoja'quë api.

³⁸ Ñami joporepa panita'a ñata ñami titaquëta'a, sëtasicohua'ini titaquë pa'ito sihua'cohua'i a'ë, ite necaicohua'i mañapi.

³⁹ De'hua asajë'ë, co'amaña ñaquë dai ja'ñere asasiquëpi utequë pa'ito i huë'e co'amaña imani saye peoji.

⁴⁰ Mësarupä'ia huesë maca Päi Mamaquë daija'quë api. Jaje pa'ina, de'hua ñajë utejë pa'ijë'ë.”

Nuñerepa De'o Jo'yaë Cui'ne Co'a Jo'yaë

(Mt 24.45-51)

41 Ja maca Pedropi capi:

“¿Ëjaë, iye ye'yase'e yëquëse'ere caquë ye'yaë? ¿Panita'a si'aohua'ire caquë ye'yase'e a'ni?”

42 Caquëna, Ëjaëpi sehuopi:

“¿Jaje pa'ito ne a'ni, ta'ñe asaquëpi cui'ne nuñe yo'oquëpi i ëjaë ñacajë'ë huë'e pa'iye case're de'oye sehuoquë, cui'ne i ëjaë jo'yareje ao de'oye acoquë yo'oquë?”

43 I ëjaë titaquë ñaquëna, i case'eje yo'oquë, cato de'oye pa'ija'quë api.

44 Nuñerepa cayë, mësarute. Co'amaña paquëpi si'aye i co'amaña de'oye ñacaisiquëna, si'aye i co'amañare ñacajë'ë caquë isija'quë api.

45 Jaje isiquëni i jo'yaëpi ëjaë ja yë'ta'a tsoe nëija'quë api caquë i ëjaë jo'yani co'aye si'sequë yo'oquë cui'ne nomiohua'i iti huë'e pa'icohua'ire, co'aye yo'oquë cui'ne ao fiesta nequë ai huëoni cui'ne cõno ucuquë cuepe huëoni.

46 Yo'o maca i ëjaë co'ija'quë api, i jo'yaë huanëyeni utema'ë huesëquë yo'o maca ja maca sehuoma'cohua'ire nejoñepi nejoja'quë api, i yo'osi do'ire ai si'seni.

47 I ëjaë yëye i jo'yaë asaquëta'a de'oye yo'oma'quëpi cui'ne i caye sehuoma'ë yo'oquë cato jaiye tē'ca cuañõñe pa'iji.

48 Jaje pa'iquëta'are i ëjaë yëye huesëquëpi, coa yo'oni a'ri maña tē'ca cuañõñe pa'iji. Jaje pa'ina, ai cuasaye isisiquëni ai seña pa'iji, cui'ne iti de'hue nequëni nequë api cuasani ai jerepa cuañõñe pa'iji.

*Jesús Do'ire Paipi Hua Saiye
(Mt 10.34-36)*

49 Iye yejana yë'ë toa tsëosi'i caquë daë'ë. Tsoe co'arepa toa ne'su mëñeje yo'oquëna, ñara'ye, merepa tsoe ne saose'e pa'ina, ñara'ye.

50 Ja saoma' do'ire yure cato oco doyeje pa'ye ai yo'oyepi yë'ëre yo'oquëna, tējiyerepa ai yo'oquë tēto saija'quë a'ë caquë oiyë.

51 ¿De'oye pa'i ja'ñere dapi, cuasaye mësarü? Pani. Coa ai jerepa huahueyere dahuë.

52 Jaje pa'ina, yurepi seña maca mu'seña cato cinco te'e tsëcapëre pa'icohua'ipi huani toasocohua'i sañope yo'oja'cohua'i a'ë, cayahua'ini cui'ne cayahua'ipi toasocohua'ini sañope yo'oja'cohua'i a'ë.

53 Cui'ne pëca ja'quëpi mamaquëre sañope yo'oye pa'iji. Mamaquëpi pëca ja'quëre sañope yo'oye pa'iji. Cui'ne pëca ja'copi mamaconí sañope yo'oye pasipi. Cui'ne mamacopi pëca ja'core sañope yo'oye pasipi, huaopi io mamaquë nëjore sañope yo'oye pasipi. Cui'ne mamaquë nëjopi huaore sañope yo'oye pasipi.”

*Mai Yure Pa'iyë Cuasaye
(Mt 16.1-4; Mr 8.11-13)*

54 Jesupi capi, paire:

“Ësë caje hue'ñapi nea siri mëina, ñani cacohua'i a'ë ocoja'coa. Carena, cui'ne ocoji.

55 Jaje cui'ne huë'ehuë te'tepi tutuquëna, ñani cayë ai ësë uja'coa. Jaje carena, cui'ne ësëquë uji.

56 Coa cacohua'i, mësarü ta'ñe cacohua'i a'ë ma'tëmo cui'ne yeja yo'oyena, ñani. Jaje yo'ocohua'ita'a ¿me yo'ojë mësarü pa'i tēcahuë ayere yure jaje yo'o macare pa'iyë cajë asa ma'ñe'ni, ta'ñe?”

*Esa Ne De'huaye
(Mt 5.25-26)*

57 ¿Me yo'ojë mësaruse'e tayo yo'oye ñani?”

58 Jaje pa'ina, yequëpi më'ëre do'i paquëpi cani saquë pa'ito më'ëre do'i paquë api caquë saquëni du'ru ne de'huajë'ë, ja yë'ta'a pai yo'ose'e ñaquë quë'rona ti'ama'në. Jaje ne de'huaëna, pai yo'oye ñaquë quë'ro sama'ë pa'ija'quëre. Jaje më'ëpi yo'oma'ë pa'ito pai yo'oye ñaquëpi co'acohua'ire cocohua'ina isina, jaohua'ipi yureta'a co'acohua'ire co hue'ñana coja'cohua'i a'ë, më'ëre.

59 Jarona cosiquë pani etaye peoji, më'ëpi si'aye më'ë do'i saima'ë pani.”

13

Huajë Pa'iyena Põñañe Pa'iji

1 Jare ja mu'seña Pilatopi Galilea acohua'ire huani jeani, cui'ne johua'i ëojë señu'u cajë huaisicohua'i tsiena pai tsiepi co'meni yo'ose'ere, yecohua'ipi quëahuë, Jesure.

2 Quëajëna, capi:

“¿Mësarupi cuasani huani jeosicohua'ipi Galilea paire seña maca co'acohua'i paë'ë, cuasaye?”

³ Pani. Jaje pa'ina, cayë, mësaru. Ja'rë yo'oyere jeoni ponëma'cohua'i pani si'a pai mësarujë jaje yo'o cuañoja'cohua'i a'ë.

⁴ Mësarupi cuasani Jerusalén pa'icohua'ire seña maca co'acohua'ini, diez y ocho paire Siloé tupëpi quëo huëa'co'ë, cuasaye.

⁵ Pani. Nuñerepa cayë. Jaje pa'ina, mësarupi huajëye pa'iyë ponëma'cohua'i pani jare cui'ne yo'o cuañoja'cohua'i a'ë."

Higuera Në Ayere Quëaye

⁶ Ja maca Jesús pai yo'oyeje pa'ye neni quëaquë capi:

"I yejana tasi në paquëpi quëima'o paco caquë sani ñaquëna, quëima'co paji'i.

⁷ Pa'ina, ñani ja maca yeja ñaquëre capi: 'ina, toaso ometëca daiyë, iti ca quëise'e ñasi'i caquë. Daiquëta'a t'ama'ë pa'iyë, quëisico pa'iona. Jaje pa'ito cueni jeojë'ë. Me nesi'co coa yejare quë'ëne nëcaco'ni.'

⁸ Caquëna, iti yeja ñacaiquëpi sehuopi: 'Ejaë iye ometëcahuëse'e pa'ija'co, a'ji yeja neni yequë co'amañapi o ñasi'i, quëija'core.

⁹ Jaje neruta'a quë'ti'ne pa'io iti ca. Jaje nerujë quëima'ona, ña jujani ja macata'a cueni jeojë'ë, capi."

Jesupi Nomiore Jujupi, Huajë Mu'se Pa'ina

¹⁰ Huajë mu'se pai tsi'si hue'ñana ye'yaquëna,

¹¹ jarote paco'ë, te'o nomio diez y ocho ometëca ju'ico, huatipi ne quë'casicopi ti nuiñe nëcaye peocopi.

¹² Pa'iona, ñani Jesupi soini capi:

"Nomio më'ë ju'i dahuë tsoe jeopi. De'oye pa'ijë'ë."

¹³ Caquë ja maca i jëñapi'iona pato maca jare iti macapi nuñerepa nëcaco ponëni, Maija'quë de'oquë api, sihuaco ca huëo.

¹⁴ Jaje Jesús huajë mu'se jujuna, ñani pai tsi'si huë'e ñacaiquë ëjaëpi iyere ñani pëi, paire capi:

"Seis mu'seña pa'iji, co'amaña ne mu'seña. Ja mu'seña jaje pa'ito dani juju cuañojë'ë, pani huajë mu'se juju cuañoñe."

¹⁵ Caquëna, ja maca Ejaëpi sehuopi:

"iCoo cacohua'i pai! ¿Joyema'cohua'ini mësaru acohua'i je'quë, huajë mu'se pa'ina, mësaru duruhuequëpi panita'a burropi oco ucujaj'quëre?"

¹⁶ ¿Ico nomio cato Abraham tsëcapë aconi Satanáspi diez y ocho ometëca huëse'jeje pa'iona, joyeje co'aquë huajë mu'se pa'i do'ire?"

¹⁷ Jaje Jesús caëna, ite sañope cacohua'ipi huajëya'yerepa maire caë'ni cuasahuë. Jaje cuasajëta'are si'a pai sihuahuë, Jesús pai yo'o t'i'a ma'ñere de'oye yo'oquëna, ñani.

Mostaza Ca Ayere Ye'yaye

(Mt 13.31-32; Mr 4.30-32)

¹⁸ Ja maca capi:

"¿Iqueje pa'ye a'ni, Maija'quë te'te aye? ¿Iquena cui'ne pa'ye neni iñora'ye?"

¹⁹ Jaje cani capi, a'ri mostaza çare taquëpi yejana taëna, ai de'oni jai soquë yë de'ona pi'api iti në capëana tsianoa nejë payeje pa'ye a'ë."

Pan Ne Pore Ayere Ye'yase'e

(Mt 13.33)

²⁰ Jaje cani yequeje capi, Jesús:

"¿Iquepi coní cui'ne pa'yeje ne iñora'ye, Maija'quë te'te aye yo'oye?"

²¹ Cani capi: Pan necopi harinare toaso jai j'i'so neni cui'ne o'sa mëiñere a'ri maña jona co'meni jona si'a sëpë juju mëicoa. Ja juju mëiñeje pa'ye yo'oye a'ë, Maija'quë te'te ayeje."

A'ri Jato Sa'ro

(Mt 7.13-14, 21-23)

²² Jerusalënna sai, pai daripëa cui'ne a'ri daripë pa'icohua'ire ye'yaquë sa tëto saji'i.

²³ Jaro pa'iquëpi seji'i, ite:

"Ejaë, ¿a'ri pai maña pa'iyë, huaso cuañocohua'i?"

Caquëna, ipi sehuopi:

²⁴ "A'ri jato sa'roja'a cacasi'i cani si'a më cuasayepi yo'ojë'ë. Jaje pa'ina, cayë mësarute pai cacayere yëja'cohua'i a'ë. Jaje yëjëta'a caca t'ama'pë pa'ija'cohua'i a'ë.

²⁵ Ja maca iti huë'e aquëpi huëni jato sa'ro s'iosi maca, mësaru hue'se pa'isicohua'ipi caja'cohua'i a'ë jato sa'róna të'cajë 'Ejaë, hui'yojë'ë'. Jaje cajëna, ipi casipi 'ñama'quë a'ë, mësarute. Jero acohua'i a'ni.'

²⁶ Caquëna, mësarupi ca huëoja'cohua'i a'ë: 'Më'ë ja're conì aijë cui'ne ucujë yo'osicohua'i a'ë cui'ne jare më'ëpi pa'i hue'ñana dani ye'yasiquë a'ë.'

²⁷ Cajëna, sehuoja'quë api: 'Tsoe cahuë ñama'quë a'ë, mësarute. Jero acohua'i a'ni. Saijë'ë, co'ayese'le yo'ocohua'i.'

²⁸ Jaje casi maca Maija'quë te'tere Abraham, Isaac, Jacobo, cui'ne Maija'quë yo'o ja'ñere quëajë pa'isicohua'i pa'ijëna, ñani mësarupi hue'sena jeococohua'i pa'ijë cuji qu'i'cojë oija'cohua'i a'ë.

²⁹ Ja maca daija'cohua'i a'ë ëmëje'le te'te cui'ne huë'ehuë te'te, ësë mëi hue'ña cui'ne sa'nihuë paipi Maija'quë quë'rona tsi'sini a'o aija'cohua'ipi.

³⁰ Ja maca yure teaye pa'iohua'i pa'isicohua'i jerepa pa'iohua'i pa'ija'cohua'i a'ë cui'ne yure jerepa pa'iohua'i pa'isicohua'ipi teaye pa'iohua'i pa'ija'cohua'i a'ë."

*Jerusalén Paire Jesús Ñaquë Oiyë
(Mt 23.37-39)*

³¹ Jare ja mu'se da'ë, fariseo pa'i dani ñte cahuë:

"Saijë'ë, Herodes më'ëre huani jeosi'i caji."

³² Cajëna, ñpi sehuopi:

"Sani cajë'ë, jaëte co'aquë ta'ñe asama'quëre: 'Yure, cui'ne ñamina'a huatiahua'ire eto saocuë yo'oni cui'ne ju'icohua'ire juju tējini ñamina'a jerepa mu'se saosi'i.'

³³ Jaje pa'iquëta'are ja ye'ta'a yo'oja'quë a'ë yure, ñamina'a cui'ne se ñatasi mu'seje. Co'aji, Maija'quëre quëacaiquëpi Jerusalén peo hue'ñana ju'ito.

³⁴ ¡Jerusalén Maija'quë yo'o ja'ñe quëacaicohua'ire huani jëo daripë! Cui'ne Maija'quë më'ëni caquë jëjo daocohua'ire quëna pëapi jëa daripë. Jaiye mësarute oi cura mamajëre oio capëa huë'ehuëna coyeje yo'osi'i caquë yo'ocuëna, coehuë.

³⁵ Mësarute Maija'quëpi jeocoja'quë api. Cui'ne ye'ëre ña coñe peoja'cohua'i a'ë, 'mësarupi de'ocuëre pa'ni Ejaë mamirepa hue'equë daiquë' ca maca t'i'añe pato."

14

Jesupi Coto Dahuë Ju'iquëre Jujucaiye

¹ Huajë mu'se t'i'aëna, Jesús saji'i, fariseo ëjaë huë'ëna, a'o as'i' caquë. Saquëna, fariseo-hua'ipi huajë mu'se j' yo'ocuëna, ñañu'u cuasajë cui'ñani ñahuë.

² Ñajëna, j' ñaquë ñu'i hue'ñare te'i coto dahuë ju'iquëpi paj'i'i.

³ Pa'ina, Jesús seji'i, cuañese'le ye'yacohua'ire cui'ne fariseo paire:

"Jujuyë de'ocuë huajë mu'se pa'ito ju'iquëre, mësarupi asato, panita'a jujuyë pañe?"

⁴ Jaje caquëna, coa ai jerepa cama'pë pa'ë'ë. Pa'ijëna, ñpi ju'iquëre jujuni capi, saijë'ë.

⁵ Jaje se jujuni fariseohua'ire capi:

"¿Nepi mësaru acohua'i burropi panita'a huequëpi cojena tomesiquëre etoma'cohua'i a'ni, huajë mu'se pa'i do'ire?"

⁶ Caquëna, ti sehuoye pahüë.

Huejajëna, Soisiquë Yo'oye

⁷ Soisicohua'ipi de'o ñu'i saina co'ejë a'o ai saihuëna ja'rujëna, ñani Jesupi jaohua'ire ñeje yëhuopi, ñohua'i asa ja'ñere:

⁸ "Më'ëni yecohua'ipi huejajëna, ñaja'quëre soisiquë pani de'o ñu'i saihuëna tëtto sani ja'ruma'ë pa'ijë'ë. Ja'runi ñu'ina, më'ë jerepa pa'ini dani mësarute soisiquëpi cama'quëni: 'Më'ë ñu'i saihuëre iquëna isijë'ë.'

⁹ Caquëna, më'ëpi pa'i ñajëna, huajëya'ye huëni ai jeteyo'jerepa ñu'i saihuëna sani ja'ruma'quëpi jaje yo'osi'ni.

¹⁰ Jaje yo'oma'ë, huëosicohua'i pa'ito, jeteyo'je ñu'i saihuëna ja'rujë'ë. Jaje ja'rusiquëpi ñu'ina, më'ëre huëosiquëpi dani cajuquë: 'Yë'ë cajei, iño de'o hue'ñana dani ja'rujë'ë.' Jaje cato më'ëje sihuaquë j' ja're conì a'o ai saihuëna ja'rusicohua'i ñajëna, de'o ñu'i saihuëna ja'ruja'quë a'ë.

¹¹ Jaje pa'ina, ye'ë a'ë jerepa pa'i caquë ija'a yo'osiquëpi coa ai jerepa co'aquë maca ponëñe pa'iji. Cui'ne ñti co'aquë teaye pa'i pa'isiquëpi jerepa pa'i ponëñe pa'iji."

¹² Capi, ñte soisiquëreje:

"Aore aocuë pani, panita'a na'iquëna, aore aocuë pani, soima'ë pa'ijë'ë, më'ë cajeohua'ire, cui'ne yo'je tsire cui'ne më'ë do'ijëre cui'ne më'ë quëno maca jaiye co'amaña pacohua'ire. Më'ëpi jaje soisiquë pa'ito ñohua'ijë më'ëreje soija'cohua'i a'ë, aija'quëre. Ja maca saise'ëje pa'ye pasipi.

¹³ Jaje pa'i do'ire më'ëpi aore paquë pani soijë'ë, co'amaña peocohua'ini, co'a de'osicohua'i mañani, cu'ima'cohua'ini, cui'ne ñama'cohua'ini.

14 Co'ye isiye ti paja'cohua'ini coçaijê'ë. Jaje pa'icohua'ita'are, nuñe yo'ocohua'i ju'isicohua'ipi huëi maca më'ëje huëni saï cuañoja'quë a'ë, Maija'quëni."

Aojajë Caquë Jai Paire Soiye
(Mt 22.1-10)

15 Jaje iyere caquëna, asani ao ai saihuë ñu'icohua'i aquëpi capi, Jesure:

"De'hue Maija'quë te'tere pa'i ao aïja'quëpi sihuaquë pa'iji."

16 Caquëna, Jesupi capi, ite:

"Jai pai tsi'sirena, aosi'i caquë jai paire huëopi.

17 Huëosiquëpi ao ai macarepa tï'aëna, i jo'yaëre capi: 'Quërëjajê'ë, huëosicohua'ire si'aye ne saohuë' capi.

18 Jaje casiquëta'are si'aohua'i paja'quë pa'ini ca huëohuë. Du'ru macarepa aquëpi capi: 'Ja'arepa yejare huerohuë. Jaote sani ñañeque pa'iji. Care payë, yë'ëre oi cuasama'ë.'

19 Yequëpi capi: 'Diez duruhuequëre huerohuë, yeja a'jiñe necohua'ire jaohua'ire neñañeque pa'iji. Yë'ëre ai cuasama'ë, pa'ijê'ë.'

20 Yequëpi capi: 'Ja'arepa huejahuë. Jaje pa'ina, saiye pañë.'

21 Ja maca i jo'yaë co'ini i asase'ere si'aye quëapi. Quëaquëna, Èjaëpi asani pëi i jo'yaëre capi: 'Esa sani jaje pa'ito co'amaña peocohua'ini, cu'ima'cohua'ini cui'ne ñama'cohua'ini, si'aye ai yo'ojë pa'icohua'ini tï'ani dajë'ë, jai daripë cu'i ma'ña pa'icohua'ini.'

22 Ai tsoe pa'i maca dani i jo'yaëpi capi: Èjaë më'ë cuañese'ejë yo'ohuë. Jaje pa'iquëta'are ja yë'ta'a peo sa'noa pa'iji, timëñe peoye.

23 Jaje caquëna, ëjaëpi i jo'yaëre capi: 'Sani iye daripëpi sai ma'aña pa'icohua'ini cuañejê'ë, dani yë'ë huë'e timëjajê.'

24 Care payë, yë'ë du'ru huëosicohua'i aquë te'ijë aïñe peoji, yë'ë ao macarepa."

Jesús Tui Do'ire

25 Jai pai Jesure tuijëna, ipi co'ye ponëni johua'ire capi:

26 "Yë'ëre tuiye yëni ai yë'ëni oiye pa'iji, ja'quëre, ja'core, nëjore, mamajëre, yo'jeire, yo'jeore cui'ne co'ye pa'iyë oiye jerepa. Jaje yë'ëni oima'quë pani yë'ëre ye'yequë pa'iyë peoji.

27 Cui'ne yë'ë do'ire i pa'iyë ai yo'oye pa'itojë jare tusi'i cuasama'ë, coa tusi'i caquë yo'oque' pani yë'ëre ye'yequë peoji.

28 Cui'ne mësarü acohua'ipi jai huë'e neñu'u cajë huëocohua'i pani du'ru ja'rüni dujë cuasacohua'i a'ni çje ja'yepi curiquë neja'cohua'i a'ni cajë?

29 Jaje de'oye cuasama'pë, coa ja'a huëo macase'le neni, cui'ne jeteyo'je ne saoye pãto, si'aohua'i iti ñasicohua'ipi cue'cue huëoja'cohua'i pa'ini, yo'o jujayere ñani.

30 Ja maca cue'cujë caja'cohua'i a'ë: 'Nesi'i caquë huëosiquëta'a ne sao tï'ama'ë pa'iji.'

31 Jaje pa'ina, cui'ne pai ëjaë yequë yeja ëjaë ja're uihuasi'i cani, ne tï'añe pa'iquë caquë ja'rüni cuasani, i soldado paire cuecue ñaquëna, diez mil pai pa'iyë. Pa'ijëna, ite huajo daquëpi paji veinte mil soldado paire.

32 Paquëna, neña jujani, ja yë'ta'a yequë ëjaë so'ore pa'ina, uihuaye pañu'u ca de'huaja'cohua'ire jëjo saoja'quë api.

33 Jaje cui'ne mësarü acohua'ipi si'aye ja'rë pa'ise'ere jëoñe coecohua'i pani, yë'ë yo'oye ye'yecohua'i peoyë.

Asije Pa'i Ayere

(Mt 5.13; Mr 9.50)

34 Asi de'oye a'ë, saïja'iñe pani. Jaje pa'iquëta'are saï ja'ñere carajaisico pani çme cui'naopi saï ja'ñe de'o coçoni?

35 Cui'ne me coçaiçoni pu'cani nea ya'o neina, tañu'u cajë nesi tsu'supëje, co'a de'ose'le pani. Jaje pa'ina, coa jëocoye pa'iji, yeja ne de'huaye coçai ma'ñe pa'ito. Cajoro quë'iohua'i sête cuasajë asajê'ë."

15

Yëi Ñama Ne Huesëscore Ayere Ye'yaye

(Mt 18.10-14)

1 Pa'i do'ire curiquë secohua'i cui'ne co'aye yo'ocohua'i si'aohua'i Jesure asañu'u cajë tsio daë'ë, i quë'rona.

2 Jaje yo'ojëna, ñani fariseohua'i cui'ne cuañese'e ye'yacohua'i çoni cue'cujë ñeje cahuë:

"Iye ëmë co'aye yo'ocohua'ini yëquë tsioni aiji."

3 Jaje cajëna, Jesupi pai yo'oyejë pa'ye neni quëapi, iye:

4 "Çnepi mësarü acohua'i aquëpi cien yëi ñamare paquëni te'i jaohua'i aquëpi ne huesëna ne huesëjaquë noventa y nueve pa'ijajë cani co'ema'quë a'ni, tï'ama'ë pani?"

⁵ De'hue co'equë t̃i'ani sihuaquë t̃ata tupëna c̃qa seoni.

⁶ I huë'ena t̃i'ani i cajeohua'ire cui'ne i ja'ye pa'icohua'ire soi huë, yë'ë ja're c̃oni sihuajë'ë, ne huesëscore t̃i'a do'ire.

⁷ Jaje pa'ina, co'aye yo'ouquëpi ja'rë pa'ise'ere jeoni ponëto huiñaohua'ipi ai sihuayë, noventa y nueve de'oye pa'icohua'ire sihuase'e jerepa.

Curi Tëqui Ne Huesëscore Ayere Ye'yaye

⁸ Cui'ne zico nomioipi diez t̃ë'ña pasiconi te'o ne huesëni toa tsëoni si'a huë'e ñare paco yuaco co'ema'coa, t̃i'aja'coa'ë caco?

⁹ Jaje de'hue co'eco t̃i'ani jo cajeohua' i ja're c̃oni cui'ne jo quëno maca huë'e acohua' i ja're c̃oni sihuaco casio: 'Yë'ë ja're c̃oni sihuajë'ë, curi t̃ë'qui ne huesëscore t̃i'ahuë.'

¹⁰ Jaje pa'ina, cayë, cui'ne Maija'quë huiñaohua' i sihuaye pa'iji, te'i co'aye yo'ouquëpi i pa'ise'e jeoni ponëto."

Posë Huesëquëpi Yo'oye

¹¹ Jesupi capi, yequeje:

"Caya mamajë ëmëohua'ire paquë paj'i.

¹² Pa'ina, yo'jeipi capi pëca ja'quëre: 'Ja'quë isijë'ë, yë'ëre isija'a co'amaña ca nëose'ere.' Caquëna, pëca ja'quëpi co'amañare huahuecaji'i, pai ñape johua' i pa ja'ñe.

¹³ Isisi jeteyo'je a'ri maña pa'iquëpi yo'jeipi i yejare isipi, yecohua'ina. Ja do'ipi curiquë neni saji'i, ai so'o yejana. Jaroni sani si'a curiquë co'ayere yo'ouquë nejo saopi.

¹⁴ Jaje si'aye curiquë neja saosi maca jaiye a'o peopi, ja yeja. Ja maca ipi a'o ëa ju'i huëopi.

¹⁵ Ja maca curi peoquë co'epi, co'amaña neñe ja yeja aquë co'amañare. Jaëpi ite cuañëpi i jo'ya sesere ñacaijë'ë caquë.

¹⁶ Ja maca ai a'o ëaye t̃i'aëna, sese aiñere ati'ñerepa nëji'i. Ite yecohua'ijë a'o a'oñe pahüë.

¹⁷ A'o ëa ju'i cuasa huëopi, 'ja'quë huë'e co'amaña necaicohua' i co'arepa a'o a'ni huajëjë. Pa'ijëna, iñore yë'ë teaye a'o ëa ju' i pa'iyë.'

¹⁸ Jaje pa'ito ja'quë pa' i huë'ñana co'ini ite casio: 'Ja'quë, më'ëre cui'ne Maija'quëre co'aye yo'ohüë.

¹⁹ Më'ë mamaquëre caye peoji, yë'ëre. Më'ëre necaicohua'ire yo'oyepi cui'ne cuañëjë'ë.'

²⁰ Ja maca jaje cuasani co'ipi, ma'aja'a pëca ja'quë huë'ena.

Ja yë'ta'a so'ore pa'ina, pëca ja'quë ñani ite teayerëpa yo'oroja'quë'ni cuasani ite ñani, ja maca huë'huë tomejani su'cuaquë cui'ne tsu'suquë sihuapi.

²¹ Ja maca mamaquëpi ite capi: 'Yë'ë ja'quë co'aye yo'ohüë, Maija'quëre cui'ne më'ëreje. Jaje pa'ina, më'ë mamaquëre caye peoji, yë'ëre.'

²² Jaje caquëna, pëca ja'quëpi capi, i jo'yare: 'Esao maña de'o cañare etoni suñacaijë'ë. Cui'ne i moñona aniño suñacaijë'ë, zapatoje suñacaijë'ë, i quëo.

²³ Cui'ne duruhuequë tsj jujusiquëni dani huani jeojë'ë, añu'u jai pai tsi'sini sihuajë.

²⁴ Iquë yë'ë mamaquë ju'isiquëje pa' i pa'isiquëpi cui'naëpi pa'iji. Ne huesësiquëpi t̃i'asiquë pa'iji.' Jaje can sihuaquëna, jaiye a'o ne huëohüë.

²⁵ Jaje yo'ojëna, i mamaquë du'ru aquëpi daji'i, co'amaña ne huë'ña pa'iquëpi. Huë'e ja'ye t̃i'acquë, asapi musica yo'oye cui'ne pairaye.

²⁶ Asani posëohua' i aquëre soini seji'i. Iquere jaje yo'oye'ni jaro, caquëna.

²⁷ Tsj posëpi ite capi: 'Më'ë yo'jeipi daji'i. Jaje daquëna, më'ë ja'quëpi huequë tsjini huaijë'ë jujusiquëni cuañëpi, i huajëquëpi cui'ne de'oye t̃itasi do' i caquë.'

²⁸ Jaje quëaquëna, maja'yëpi pëi cue'yoni huë'e cacaye coequëna, pëca ja'quë etani ite huë'ena cacani ñajë'ë caquë ai seji'i.

²⁹ Seina, ipi pëca ja'quëre capi: 'Tsoe më'ëpi asayë, më'ëre yë'ë necai pa'iyë, ti josa coeye peoyerepa. Jaje pa'iquëta'are te'e ñamareje yë'ë cajeohua' i ja're c̃oni fiesta neja'quëre isiyë pahüë, më'ë.

³⁰ Jaje pa'iquëta'are yure iquë më'ë mamaquë më'ë curiquë co'a nomiohua'ini yo'ouquë neja saosiquëpi t̃itaëna, sihuaquë duruhuequë tsj jujusiquëre huani jeoni yo'oyë ñañë.'

³¹ Caquëna, pëca ja'quëpi ite capi: 'Yë'ë mamaquë më'ë cato si'anë yë'ë ja're c̃oni pa'iyë. Jaje pa'ina, si'aye yë'ë paye më'ë co'amaña'ë.

³² Jaje pa'ina, yure nuñerepa fiesta neñe pa'iji, sihuajë. Më'ë yo'jei ju'isiquëje pa' i pa'isiquëpi cui'naëpi pa' i do'ire. Ne huesësiquë pa'isiquëni yure t̃i'asi do'ire.' Jaje yo'oyë."

16

I Co'amaña Ñacaiquë Neñe Ayere

¹ Jesupi capi, i ye'yacohua'ire:

"Pa'iji, te'e ëmë co'amaña paquëpi ñacaiquëre paquë. Jaje pa'ini sani quëahuë, co'amaña paquëna. Më'ë co'amaña ñacaiquëpi co'aye yo'ouquë saoji, asahuë cajë.

² Quëarena, asani ëjaëpi ìte soini capi: ‘¿Iquere më'ë yo'oquëna, yë'ëre quëaye'ni? Dajë'ë, më'ë co'amaña nesele toyase'ere ñasi'i, më'ë yë'ëre necaiquë pa'iyë peoji.’

³ Ja maca co'amaña ñacaiquëpi ai cuaca huëopi: ‘¿Me neja'quë a'ni, yure yë'ë ëjaëpi co'amaña neñe peoyerepa eto huesoru? Tutujë peoyë, yeja neni tañeje. Cui'ne huajëya'ji yecohua'ini peoyë ìsijë'ë caquë sënirrojaiñeje ca'rayë' cuasapi.

⁴ Cuasani capi: Tsoe cuasahuë. Jaje yo'osi'i, yë'ë co'amaña neñe peoquë pa'ina, ìohua'i huë'ena pëpaja'cohua'ire.

⁵ Cani ja maca soipi te'ohua'ise'ere, ì ëjaë do'i pacohua'ire, du'ru aquëni seji'i: ‘¿Je ja'ye yë'ë ëjaëre do'i paquë a'ni?’

⁶ Caquëna, sehuopi ìpi: ‘Cien jai quëna huëa hui'yape ìsiye pa'iji,’ caquë co'amaña ñacaiquëpi capi, ìte: ‘Icoa, më'ë ja'në saija'a do'i caquë toyasico, jaote nejoni esa yecore toyajë'ë, coa cincuentase'e.’

⁷ Ja jeteyo'je seji'i, yequëre: ‘¿Cui'ne më'ë je ja'ye do'i paquë'ni?’ Caquëna, ìpi capi: ‘Cien trigo topëa ìsiye pa'iji,’ caquëna, capi: ‘Icoa, më'ë ja'rë saija'a do'i toyasico yecona esa toyajë'ë, coa ochenta topëase'e.’

⁸ Ja maca ñapi, ì ëjaë jaë co'acquë ì co'amaña ñacaiquëpi tsoe si'aye ne de'huasiquëpi paji'i. Jaje pa'ina, iye yeja acohua'i ta'ñe asani yo'ocohua'i a'ë, sehuosicohua'i yo'oyë jerepa yo'ocohua'i a'ë.

⁹ Jaje pa'ina, cayë, mësarute. Iye yeja co'amaña ìsijë yecohua'ini cajeohua'ire nejë'ë. Jaje yo'ojë saosicohua'ipi ti'ajëna, ti pa'i huë'ñapi sihuaquë daijë'ë caquë Maija'quëpi pëpaja'quëre.

¹⁰ De'oyerepa a'ri maña pa'ina, ñacaiquëpi cui'ne jaiye pa'itojë de'oyerepa ñacaiye pa'iji. Jaje a'ri mañare de'oyë ñacaima'pë pani, jaiyere pajë de'oyë ñacaiye peoji.

¹¹ Jaje pa'ina, mësarupi coa yeja co'amañare de'oyë ñacaima'pë co'aye yo'ocohua'i pa'ito, çnepi mësarute de'hue necohua'i a'ë cuasaja'cohua'i a'ni, de'o co'amañare pare yo'oyë pa'ito?

¹² De'oyë yecohua'i tsere ñama'pë yo'oto, çnepi ìsija'cohua'i a'ni, mësaruru pa ja'ñe?

¹³ Jaje pa'ina, ëjaohua'ire necaiquë pani caya ëjaohua'ire necaiye peoji. Jaje yo'oquë pani yequëni coequë cui'ne yequëni oiye pa'iji. Panita'a yeque, yequëni de'oyë sehuocai yequëni sañope caye pa'iji. Jaje pa'ina, te'ipi Maija'quëre cui'ne curiquëre necaiye peoji.”

¹⁴ Fariseo pa'i curiquë ai yëcohua'i sëte ì cayere asani Jesús coa caji cajë cue'cuehuë.

¹⁵ Ja maca Jesupi capi, jaohua'ire:

“Mësaruru a'ë, pa'i ña huë'ñase'e de'ocohua'i a'ë cajë yo'ocohua'i. Maija'quë cato ñaji, mësaruru joñoare, jaje yo'ojëta'are. Jaje pa'ina, pa'i jaiye de'oyë yo'oyë cajë pa'iyere Maija'quëpi coequë api.

Moisés Cuñese'e Cui'ne Maija'quë Cuñe Te'te

¹⁶ Juan pa'i macaja'a Moisés cuñese'e cui'ne Maija'quë yequë mu'se yo'o ja'ñere ca nëocohua'i ye'yajëna, asahuë. Ja maca yure quëa huëohuë, de'o cocare Maija'quë cuñe te'tena cacayere. Jaje quëajëna, asajë cacañu'u cajë si'aohua'i tutu yo'oyë.

¹⁷ Ma'tëmo cui'ne yeja carajaiñe pa'iji. Jaje pa'iquëta'are Maija'quë coca cato carajaiñe peoyerepa. Ti'asipi, io cayeje.

Nëjore Jeocoye Ayere

(Mt 19.1-12; Mr 10.1-12)

¹⁸ Jaje pa'ina, ëmë huejasiquëpi nëjore jëoni cui'ne yecona se huejani, de'oyë yo'oyë paji. Cui'ne ëmëre jeocosiconi yequëpi huejani cui'ne co'aye yo'oji.

Ai Jaiyere Paquë Cui'ne Lázaro

¹⁹ Paji'i, te'i ëmë jaiye paquë si'anë de'o caña cui'ne jai do'ire ju'iquë cui'ne si'a mu'seña fiesta nequë de'oyerepa yo'oquë pa'iquë.

²⁰ Jaje pa'iquë pa'ina, cui'ne Lázaro ca'mi quë'ipi teaye yo'oquë pa'iquëje paji'i. Jaje pa'ipi jaiye co'amaña paquë huë'e eta sa'rore ñuji'i.

²¹ Jaje iquë teaye pa'i macapi ao ëa ju'i ao ai saihuë tomeñere ati'ñerepa nëina, ñapi. Cui'ne ì a'sire jo'yaque daijë ne'nejëna, ñuji'i.

²² Jaje pa'iquëpi teaye pa'i maca juji'i. Juquëna, huñiaohua'ipi sahuë, ma'tëmona Abraham ja're conì pa'ija'quëre. Jaje cui'ne jaiye paquëje juji'i. Juquëna, tahuë.

²³ Jaiye co'amaña paquëpi juni saji'i, ju'isicohua'i ai yo'o hue'ñana. Jarore papi ñapi, Abrahamre cui'ne Lázarore.

²⁴ Ja maca ñani cui'ni: ‘Ja'quë Abraham, yë'ëre oi ñajë'ë. Ai yo'oyë. Jëjo saojë'ë, Lázarore ocure ì moño sa'nihuëna neni dani sësëye yë'ë tsemeñona ne huasojaquë. Ai yo'oyë, yë'ë toase'epi pa'ina.’

²⁵ Jaje caquëna, Abrahampi capi ite: 'Tsihua'ë cuasajë'ë më'ë de'oye pa'ise'ere ja yë'ta'a më'ë huajëquë pa'inë, cui'ne iquë Lázaropi ai co'aye paji'i, jaro pa'i maca. Jaje pa'isiquëpi yure ipi de'oye pa'iji, ñhore. Cui'ne më'ëpi ai yo'oyë.

²⁶ Cui'ne jaje si'aye iye më'ë yo'ose'e pa'itojê pa'iji, cui'ne jai hua'que têtêpaje, yëquë têtô saiyë peoyerepa cui'ne më'ëje ñhona têtô daiye peoye. Jaje pa'ina, ñho pa'icohua'i jaro têtô saiyë peoji, cui'ne jaro acohua'ijê ñho daiye peoji.'

²⁷ Ja maca jaiye paquë pa'isiquëpi capi: 'Jaje pa'ito ja'quë Abraham më'ëre señë, Lázarore jêjo saojë'ë, yë'ë ja'quë huë'ena.

²⁸ Jarote cinco yo'je tsire payë. Sani quëacajj'ë, ñho yë'ë ai yo'o huë'ñana daima'pë caquë.'

²⁹ Jaje caquëna, Abrahampi capi, ite: 'Jaohua'i cato payë, Moisés cuañese'e cui'ne yecohua'i Maija'quëre quëacaicohua'i toyase'ere, jare ñani sehuojajë.'

³⁰ Jaje caquëna, jaiye paquë pa'isiquëpi sehuopi: 'Jaje pa'itojê ja'quë Abraham sehuoye pañë. Ju'isicohua'i aquëpi sani quëatota'a ja'në pa'ise'e jeoni pönëja'cohua'i pa'ini.'

³¹ Jaje caquëna, Abrahampi capi, ite: 'Moisés cui'ne Maija'quëre quëacaicohua'i case'ere sehuoye coeni, me ju'isiquëpi huëtujê sehuoye'ni.'

17

Co'ayena Yo'oyena Tajiñe

(Mt 18.6-7, 21-22; Mr 9.42)

¹ Jesupi capi, I ye'yacohua'ire:

"Pai co'aye neñe carajaiñe peoja'coa. Jaje pa'iquëta'are co'ayere pa'iquëpi yecohua'ire se ye'yaquëna, co'aye ne do'ire teayererepa pa'ija'quë api.

² Jaje pa'ina, tsire co'aye ye'yama'në, jaje pa'ire ñaje tęcana quëna pëpi sėani jairana jęo dęoto ai jerepa de'o'ñe pa'io.

³ De'hua ñajë'ë. Më'ë yo'jeipi më'ëre co'aye yo'osiquë pa'ito yo'oma'ë quëajë'ë cui'ne ja'rë yo'ose'ere jeoni pönëna i yo'ose'ere sai de'huacajj'ë.

⁴ Cui'ne më'ëni te'e mu'sere siete pa'ye co'aye yo'osiquë pani, cui'ne siete pa'ye dai caye pa'iji: 'Tijupë co'aye yo'oye pasi'i.' Jaje caquëna, i co'aye yo'ose'ere sai de'huacaiye pa'iji."

Nuñerepa Neñe Pa'iji Cuasayepi Tutu Quë'i

⁵ Ite ye'yecohua'ipi cahuë, Ejaëre: Isijë'ë yëquëre ai nuñerepa neñe pa'iji cuasayere.

⁶ Cajëna, Ejaëpi sehuopi jaohua'ire:

"Mėsarupi neñe pa'iji cuasayere a'ri maña mostaza çaje pa'ye pacohua'i pani cayë, iye soquëre iye macapi etani jaira jopore pare sa nęcajë'ë. Ca maca asani satj'ñe pa'io.

Necaiquëpi Yo'oye Pa'iji

⁷ Mėsarupi co'amaña necaiquëre pacohua'ini tsio co'amaña ne tėjini panita'a huequëre ña tėjini co'iquëna, çacohua'i a'nì, 'da sani ja'rujë'ë, ai aija'quë?'

⁸ Jaje cama'pë coa ai jerepa cayë: 'Aore cua'cojë'ë, neato ai ja'ñere, yë'ë ao ai huëosi maca de'oye ao ja'ñere cui'ñajë'ë, yë'ë ani tėjisi jeteyo'je më'ëje ai cui'ne uçuja'quë.'

⁹ Jaje cuañese'ere yo'ocquëna, necaire pahuë de'o'ji çajë pępaye peoji jo'yaëpi cuañese'ere necaito. ¿Me de'o'ji caye'ni, jo'yaëpi cuañese'ere neto?

¹⁰ Jaje cui'ne pa'iji, mėsaruję. Jaje pa'ina, Maija'quë cuañese'ere si'aye nesicohua'i pani: 'Co'a jo'ya maña'ë, më'ë nejë'ë casi mañase'e nehuë,' caye pa'iji."

Diez Ja'ju Dahuë Ju'icohua'ire Ne Co'yaye

¹¹ Jesús ja yë'ta'a Jerusalenna sai Samaria cui'ne Galilea yejaña tętô saji'i.

¹² Saiquëpi a'ri daripëna tj'acquëna, diez emëohua'i ja'ju dahuë ju'icohua'ipi sañope tj'ahuë. Tj'ajëta'a so'ona nęcajani,

¹³ cuihuë:

"Jesús, Ye'yaquë, yëquë mañare oijë'ë!"

¹⁴ Ja maca Jesupi ñani jaohua'ire capi:

"Sani Maija'quë huë'e ñacaicohua'i ejaohua'ina ñhojajj'ë."

Jaje caëna, ja saijë johua'i ju'i dahuë peocohua'i tome huesëhuë.

¹⁵ Ja maca te'i jaohua'i aquëpi ju'i dahuë peo huë'ña tomesiquë pa'i ña jujani Maija'quëni tutu yë'opi caquë sihuaquë co'ipi.

¹⁶ Co'ini do're ja'rupi Jesús ña huë'ñana cui'ne i tsiami yejare pana në meni Maija'quëre de'o'ji caquë sihuapi. Iquë emë iti sihuasiquë Samaria yeja aquë paji'i.

¹⁷ Ja maca Jesupi capi, ite:

"¿Mėsaru diez pa'iohua'i pa'ima'pë pate, iti ju'icohua'i? ¿Yecohua'i nueve jerore pa'iyeni?"

¹⁸ ¿Iquë yequë yeja aquëse'e Maija'quëre sihuasi'iquë co'isiquë pa'iquë?"

¹⁹ Jaje cani ite capi:

"Huëni saijë'ë. Jujaquë api, më'ë cuasani yo'o do'ipi co'yasiquë sęte."

Maija'quë Cuañe Të'te Pa'i Tì'añe
(Mt 24.23-28, 36-41)

²⁰ Fariseo paipi Jesure sei'è: ¿Je yëhua Maija'quë të'te ayepi tì'aja'coa'ni? Jaje sejëna, ìpi sehuopi:

“Maija'quë cuañe të'te ayere tì'ñarepa ñañe peoji, co'amaña ñañeje pa'ye.

²¹ ‘Iñore tsoe pa'iji' pãnita'a 'jetore pa'iji' caye peoji. Jaje pa'ina, tsoe Maija'quë cuañe të'te ayere mësarü joponi pa'iji, yure.”

²² Jaje pa'ina, ire ye'yecohua'ire capi:

“Tì'aja'coa, co'a mu'seña Pai Mamaquë yo'oquëna, ña ëa mu'seña. Jaje ña ëaquëta'are ñañe paja'cohua'i a'ë.

²³ Jaje ña ëaquëna, pa'ijëna, caja'cohua'i a'ë: ‘Iñore pa'iji' pãnita'a 'jetore pa'iji'. Jaje catoje saima'pë, cui'ne tuima'pë pa'ijë'ë.

²⁴ Ma'tëmopi mujuë ye'hueyeje pa'ye pasipi. Pai Mamaquë tita mu'se cato asa tayoye peoja'coa.

²⁵ Jaje pa'iquëta'are du'ru macarepa ai ai yo'oye pa'iji. Yure pa'iji, yure pa'i paipi yë'ëre coejëna.

²⁶ Noë pa'i mu'seña yo'ojë pa'ise'ejë pa'ye cui'ne pa'ija'coa, Pai Mamaquë daija'a mu'señaje.

²⁷ Ja mu'seña je'quë ao aijë cui'ne uçujë, huejajë cui'ne mamajëre huejojë yo'ohuë. Jaje yo'ojëna, Noë jai yohuëna cacapi. Cacasi maca, jai col'je tì'aëna, jãohua'i si'aohua'i col'je jujuhuë.

²⁸ Jaje cui'ne Lot pa'i mu'señaje yo'ohuë: Ao aijë cui'ne cõno uçujë huerojë cui'ne yecohua'ina se isijë, co'amaña tajë cui'ne huë'ña nejë pa'ë'ë.

²⁹ Jaje yo'ojë pa'ijëna, Lot Sodomapi etani saji'i. Saisi maca ma'tëmopi oco tõmeñeje pa'ye toapi tõmequë si'aohua'ire huani jeapi, Sodoma paire.

³⁰ Jaje cui'ne pa'ye pasipi, Pai Mamaquë ñajaja'a mu'señaje.

³¹ Ja co'a mu'seña tì'aëna, huë'ë hue'sere pa'ijëna, co'amañapi huë'ë sa'nahuëre pa'ito jjañu'u cajë yo'oma'pë pa'ijë'ë. Cui'ne yecohua'ipi tsiore pa'icohua'i pani co'ima'pë pa'ijë'ë, huë'ëna.

³² De'hua cuasajë'ë, Lot nëjo yo'ose'ere.

³³ Jaje pa'ina, co'ye i pa'yere ai cuasaquë cato si'aye ne huesëye pa'iji.

³⁴ Jaje pa'ina, cayë. Ja ñami cai saihuëna cayahua'i çacohua'i pa'ito te'ire saquë yequëni jeo saiye pa'ija'coa.

³⁵ Cui'ne caya nomiohua'i te'le toacohua'ini te'ore saquë cui'ne yeconi jeo saiye pa'ija'coa.

³⁶ Jaje cui'ne caya ëmëohua'i tsiore pa'ijëna, te'ire saquëna, cui'ne te'i jeo saisiquë pa'ija'quë api.”

³⁷ Jaje caquëna, iyere asani seteña:

“¿Jerona iye yo'o ja'ñe a'ni, Èjaë?”

Cajëna, ìpi capi:

“Ju'isiquë qi huë'ña pë'përi tsi'siyeje pa'ye tsi'sija'cohua'i a'ë.”

18

Hua'jeopi Cui'ne Yo'oyere Ca Të'jiquë

¹ Si'anë Maija'quëre sejë pa'iyë pa'iji, yo'o jujaye peoye caquë Jesús pai yo'oye ayena tì'ña caquë ñeje, ye'yapi.

² Ye'yaquë capi:

“Pa'iji, pai daripë pai yo'oye ñaquë, Maija'quëre ca'rama'quëpi, cui'ne yecohua'ireje oima'quëpi.

³ Cui'ne jare ja daripëre paco'ë, hua'jeo. Jaopi pai yo'oye ñaquëna, iote sañope yo'oquëni quëaona ca de'huacaijaquë caco si'anëpi sacco'ë.

⁴ Jaje saio yo'ocona, pai yo'oye ñaquëpi coepi. Coesiquëta'a jeteyo'je cuasapi: ‘Maija'quëre ca'rama'quëje cui'ne paireje oima'quëpi.

⁵ Çocasí'i hua'jeore, josa si'anë daio yë'ë yequere cuasaquëna, cama'o pa'ija'core,' cuasapi.”

⁶ Jaje capi, iquë pai yo'oye ñaquë co'aquë. Jaje pa'ito Jesús capi:

⁷ “¿Maija'quëre mu'señapi cui'ne ñamiñapi secohua'ire i jo'ya nesicohua'ire çocaiye paja'quë aë? ¿Tsoe utejë'ë, caquë aë?”

⁸ Pani. Jaje pa'ina, cayë, ti tsoe nëñe peoye çocaija'quë api, Maija'quë. Jaje pa'iquëta'are çyë'ë iye yejana dai maca, de'hue yë'ëre necaiquë api cuasacohua'i pa'ijëna, tì'aja'quë a'ni?”

Fariseo Cui'ne Pa'i Do'ire Sequë Ayere Quëaye

⁹ Paj yo'oyeje pa'ye neni Jesús quëapi, de'ocohua'i a'ë cuasajë yecohua'ire co'acohua'i a'ë cajë coecohua'ire.

¹⁰ Quëa huëoquë capi:

“Caya ëmëohua'i Maija'quëre së huë'ena sa'ë, señu'u cajë. Te'i jaohua'i aquëpi fariseo pa'iji, cui'ne yequëpi pa'i do'i curiquë sequë paji'i, paj ëjaëre necaiquë.

¹¹ Pa'ina, fariseopi coa nëcaquë seji'i, ñeje: 'Ina, ja'quë më'ëre sihuayë, yë'ëre cato jaohua'i co'amaña ñacohua'i, cui'ne co'acohua'i cui'ne nomiohua'ire coa yo'ocohua'ije pa'i peoyë. Cui'ne jaë pa'i do'i sequëje pa'i ti peoyë.

¹² Cui'ne te'le semanare cayaye ayo aïma'quëpi sei cui'ne yë'ë yo'oquë curiquë neñeje Maija'quë huë'ena diez pa'ye neni te'ore isiquë a'ë, de'hue.'

¹³ Jaje seina, pa'i do'ire sequëpi so'o macana pëani ñaco ça mañaje ma'tëmona se mëani ñama'ë coa ai jerepa coti saihuëna të'caquë ñeje caquë seji'i: 'Ina, yë'ë Ja'quë yë'ëre oijë'ë, yë'ë maca ai co'aquë a'ë.'

¹⁴ Jaje pa'ina, cayë, mësarute. Iquë pa'i do'ire curiquë sequë cato Maija'quëna i co'aquë pa'ye quëa tñi Maija'quë ja're pa'i sihuaquë co'ipi. Jaje co'iquëta'are fariseo cato ti sihuama'ë paji'i. Jaje pa'ina, co'ye yë'ë jerepa pa'i a'ë cuasacohua'ire cato coa ai jerepa meñe neñe pa'iji. Jaje pa'iquëta'are yë'ë teaye pa'i a'ë cuasacuëni ai jerepa pa'ire neñe pa'iji.”

Jesús Tsire De'oyerepa Cacaiye
(Mt 19.13-15; Mr 10.13-16)

¹⁵ Jesús quë'rona tsire dahuë, papijaquë cajë. Jaje yo'ojëna, i ye'yacohua'ipi ñani iti tsire dacohua'ire yo'oma'pë pa'ijë'ë ca huëohuë.

¹⁶ Jaje cajëna, Jesús jaohua'ire soini capi:

“Coa ñajë'ë, ësema'pë tsire, iohua'ise'e daijajë yë'ë quë'rona. Maija'quë quë'ro jaohua'ije pa'iohua'ise'e cacaye pa'iji.

¹⁷ Jaje pa'ina, nuñerepa cayë, mësarute. Tsi de'oji cajë yëyeje pa'ye yo'oma'cohua'i pani ti cacaye peoji, Maija'quë cuañe hue'ña.”

Posëpi Jaiye Co'amaña Paquëpi Jesure Case'e
(Mt 19.16-30; Mr 10.17-31)

¹⁸ Paj ëjaohua'i aquëpi seji'i, Jesure:

“De'o ye'yaquë, çme yo'oni ti pani huesëye t'ajajë'ë a'ni?”

¹⁹ Jesupi ite capi:

“Çme yo'oquë yë'ëre de'oquë caquë'ni? Peoji, te'ijë de'oquë. Coa te'i Maija'quëse'e de'oquë pa'iji.

²⁰ Asaquë a'ë, Maija'quë cuañese'e: 'Nomiore yo'oma'ë nëjore peoni, paire huani jeoma'ë, co'amaña ñama'ë, coa cosoma'ë, cui'ne ëjaohua'ire ñajë oijë'ë, më ja'quëre cui'ne më ja'core.' Jare më'ëpi asañe.”

²¹ Jaje caquëna, iti sesiquëpi capi, ite:

“Si'anë iye tsihua'ë pa'inëpi de'oye sehuaquë a'ë.”

²² Jaje caquëna, Jesupi asani ite capi:

“Ja yë'ta'a te'o carapi, më'ëre. Si'aye më'ë payere isijë'ë, peocohua'ini. Jaje më'ë yo'onita'a Ma'tëmore co'amaña paye pa'iji. Ja jeteyo'je dani tuijë'ë, yë'ëre.”

²³ Jaje caquëna, iyere asani ai oi, jaiye co'amaña paquë sëte.

²⁴ Jaje oina, ñani Jesús capi:

“Airepa jëaye pa'iji, jaiye co'amaña pacohua'ipi Maija'quë cuañe te'tena cacaye.

²⁵ Camellore miu ñaca cojeja'a etojaiñe ti peoji. Ja jëaye seña maca jëaji, co'amaña pacohua'ipi Maija'quë te'tena cacaye.”

²⁶ Jaje caquëna, iti asasicohua'ipi cahuë:

“Jaje pa'ito çnepi huasosicohua'i pa'ija'cohua'i a'ni?”

²⁷ Cajëna, Jesupi capi, jaohua'ire:

“Jaje pa'ina, paj ne t'ijë'ë peoyere, Maija'quëse'e ne t'ijë'ë pa'iji.”

²⁸ Caquëna, Pedropi capi:

“Ëjaë, yëquë pase'e si'aye jeohuë, më'ëni tuñu'u cajë.”

²⁹ Caquëna ipi sehuopi:

“Nuñerepa cayë. Pa'ipi Maija'quë te'te do'ire i huë'e, ja'quëohua'ire, a'yëohua'ire, nëjore, mamajëre jeosiquë pani,

³⁰ yequë yejana pa'iyë huëo maca ti pa'iyere t'ijë'ë pa'iji.”

Jesús Iju'i Ja'ñere Quëaye
(Mt 20.17-19; Mr 10.32-34)

³¹ Jesús paj peo hue'ñana i ye'yacohua'ire soini, capi:

“Yure sañu'u, Jerusalenna. Jarona si'aye t̃i'aja'coa, Pai Mamaquère yo'o ja'ñere Maija'quère quèacaicohua'i toyajè pa'ise'e.

³² Jarona yè'ère isija'cohua'i a'è, judío pai peocohua'ina. Isirena, cue'cuejè yo'oja'cohua'i a'è yè'ère co'aye cajè, cui'ne copi tse'seja'cohua'i a'è.

³³ Tè'ca tējini huani jeoja'cohua'i a'è. Jaje yo'osicohua'ita'are toaso mu'seña pa'i maca huèija'què a'è.”

³⁴ Jaje caquèna, jaohua'i coa huesè asahuè, iquere caquè'ni cuasajè. Ipi t̃iña asaye èsequèna.

Jesús Ñama'quère Fujuse'e
(Mt 20.29-34; Mr 10.46-52)

³⁵ Jesupi Jericó daripè quèno macare pa'ina, te'i ñama'quèpi ma'a yè'què macare ñu'i curiquè da saicohua'ire seji'i.

³⁶ Sequèpi jai pai saijè cajèna, asani seji'i, iquere jaje yo'ojè cayè'ni caquè.

³⁷ Seina, ite quèahuè. Jaroja'a Jesús Nazaret aquèpi ðaina, yo'ojè cayè.

³⁸ Cajèna, ja maca asani cui'pi:

“Jesús, David mamaquè yè'ère oijè'è. Ai yo'oyè.”

³⁹ Jaje cuiquèna, yecohua'ipi du'ru saicohua'ipi ite cahuè, cuima'è pa'ijjè'è. Ja cajèta'are ipi ai jerepa ja yè'ta'api cui'pi:

“David mamaquè yè'ère oijè'è. ¡Ai yo'oyè!”

⁴⁰ Caquèna, asani Jesús nēcajanì, quèrèjanì dajjè'è caquè jèjo saopi, te'ire. Dasi maca ite seji'i:

⁴¹ “¿Me nejaquè cuasaquè'ni, mè'è yè'ère?”

Caquèna, ñama'quèpi sehuopi:

“Èjaè, ñaco çare de'huacajjè'è. Ñasi'i, yè'è.”

⁴² Caquèna, Jesupi capi, ite:

“¡Ñaquè pa'ijjè'è! Mè'è nequè api cuasaquè ca do'ipi.”

⁴³ Jaje ca macapi, tsoe ñaquè paji'i, ñama'què pa'isiquèpi. Ja maca Jesure tujj'i, Maija'quère sihuaquè. Cui'ne si'aye iye yo'oye ñasicohua'ijje Maija'quère ai sihuaquè.

19

Jesús Cui'ne Zaqueo

¹ Ja maca Jericó daripèna Jesús cacani tètò saina,

² cui'ne jarote jaiye co'amaña paquè Zaqueo hue'equèje paji'i, curiquè pa'i do'i secohua'i èjaèpi.

³ Jaè cato Jesure ñañe yèquè paji'i. Jaje yèquèta'a me ñaquè'ni pai ja'i maña pa'ijjèna, Zaqueo nèhuiquè paji'i.

⁴ Jaje pa'ipi du'ru huè'huèni soquè yèna mèji'i, Jesús ja'ye tètò saija'tona ñani.

⁵ Ja maca Jesús jaroja'a saiquèpi ñani Zaqueore capi:

“Esa cajèjè'è, yure mè'è huè'ena sani pèaja'quèpi saiyè.”

⁶ Ja maca Zaqueo esa cajeni sihuaquè Jesure j huè'ena sai sapi.

⁷ Ja maca iyere yecohua'i ñani si'ahua'i de'oye yo'oma'aji'i cahuè, Jesupi co'aye yo'oquè huè'ena pèasi'i caquè, saquèna.

⁸ Ja maca Zaqueopi huèni nēcani capi, Èjaère:

“Ina Èjaè, yè'è paye jopore paja'a isisi'i co'amaña peocohua'ire, cui'ne yè'è coa cosoquè jerepa nesè'e pa'ito co'yosi'i cuatro pa'ye jerepa yè'è se jiosiquère.”

⁹ Jaje caquèna, Jesupi capi, ite:

“Iye mu'se t̃itapi iye huè'è huasoye cui'ne iye èmè cato Abraham tsècapè aquè api.

¹⁰ Jaje pa'ina, Pai Mamaquè daji'i, ne huesèsicohua'ire co'equè huasosi'i caquè.”

Curiquè Yo'ose'e Ayere Quèaye

¹¹ Ja yè'ta'a Jesús cayere pai asajè cuasahuè, yure Maija'què cuañe t̃e'te t̃i'aja'coa cajè. Jaje cuasahuè, Jesupi Jerusalén ja'yere pa'i do'ire ñajè. Jaje cuasajèna, ipi pai yo'oyeje pa'ye caquè quèa huèopi.

¹² Ja maca capi:

“Paji'i, te'e pai de'o tsècapè aquè. Jaèpi so'o vejana saji'i, pai èjaère nesi maca, pai èjaè de'oni cui'naèpi co'i çosi'i caquè.

¹³ Ja yè'ta'a saima'nè, diez pa'iohua'ire j jo'ya acohua'ini soini, pai ñapere isipi jai do'i curiquè t̃è'ñare te'e t̃è'ñase'e isiquè capi: ‘Iye curiquèpi se hueroni yeque jaiye nejè'è, yè'è co'i macaja'a.’

¹⁴ Jaje casiquèta'are j yeja pa'i paipi ite coejè, j saisi jeteyo'je jèjo saohuè, quèaja'cohua'ipi: ‘Coeyè, mè'ère yèquè èjaè de'oye' cajè.

¹⁵ Jaje casicohua'ita'are pai ëjaë de'osiquëpi col'ipi, i yejana. Títani cuañe saopi, i curiquë isisicohua'ire quërëjajë'ë caquë. Asasi'i, je ja'ye pai ñape ja curiquëpi nere'ni caquë.

¹⁶ Soina, du'ru macarepa títacuëpi capi: 'Ëjaë, më'ë curiquëpi diez pa'ye jerepa se ne cohuë.'

¹⁷ Pai ëjaëpi sehuopi: 'Ai de'oji, më'ë de'jo'yaë'ë. Më'ë a'ri mañare de'oye ñacaisi do'ire, më'ëre diez daripëa cuañequëre neñë.'

¹⁸ Yequëpi dani capi: 'Ëjaë, më'ë curiquëpi cinco pa'ye jerepa nehuë.'

¹⁹ Cui'ne iquëreje sehuopi: 'Më'ë cato cinco daripëa cuañequë pa'ijë'ë.'

²⁰ Ja maca yequëpi dani capi: 'Ëjaë, iye pa'iji, më'ë curiquë pañuelo ca'tipëna deani de'huase'le.

²¹ Më'ëpi paire oima'ë yo'oquë më'ë isi ma'ñere tsi'soni, cui'ne më'ë tã ma'ñere coa tëaquë, yo'oquëni ca'raquë pahüë.'

²² Caquëna, pai ëjaëpi capi: 'Co'a jo'yaë, jare më'ë case'epi iñoji, më'ë co'aquë pa'iye. Jaje yë'ë paire oima'ë yo'oquëpi yë'ë ne ma'ñere tsi'soquë cui'ne yë'ë tã ma'ñere coa tëaquë yo'oye asaquë sëte.

²³ ¿Me yo'oquë curiquë isirena, itipi ne do'ire co'ye sai hue'ñana tëoma'ë paquë'ni, yë'ë dani iti mañaque neja'quëta'are huë'ë títasi maca?'

²⁴ Jaje cani iti maca pa'icohua'ire capi: 'Jiojë'ë, curi të'quire. Jioni isijë'ë, diez të'ña paquëna.'

²⁵ Caquëna, jahua'ipi cahuë, ite: '¿Ëjaë, tsoe diez të'ña paquëre me ai jerepa isiyeni?'

²⁶ Cajëna, pai ëjaëpi sehuopi: 'Nuñerepa cayë, paquëni ai jerepa se isiyeni pa'iji. Jaje pa'ina, cui'ne peoquëni coa ai jerepa se jio coñe pa'iji, si'aye i payeje peo hue'ñarepa.

²⁷ Cui'ne yecohua'i yë'ëre ëjaë de'oye coesicohua'ire quërëjani iñoña dani yë'ëque ñaquëna, huani jeajë'ë, capi."

Jesupi Jerusalén Cacase'e

(Mt 21.1-11; Mr 11.1-11; Jn 12.12-19)

²⁸ Jaje iye se ca tējini Jesús Jerusaléna saji'i.

²⁹ Tsoe Betfagé cui'ne Betania daripëa cui'ne Olivos hue'yosi cutihuëa tija'ne ja'i maca pa'i i ye'yacohua'ire cayaohua'ire jëjo saopi.

³⁰ Ñeje caquë:

"Ja maca ja'ye daripëna saijë'ë. Tija' maca jarote pa'ija'quë api, burro sëasiquëpi, pa'ije ja yë'ta'a tuima'quëpi. Tija'ni joyeni dajë'ë.

³¹ Joyëjëna, yecohua'ipi me neja'quëni saye'ni secohua'i pa'ito, cajë'ë, Ëjaëpi yo'oye pa'iji."

³² Ja maca i ye'yacohua'ipi sani Jesús case'eje tija'huë.

³³ Tija'ni burroni joyëjëna iti tse acohua'ipi se'i'ë:

"¿Me neñu'ju joyeyeni?'"

³⁴ Cajëna, iohua'ipi sehuohuë:

"Ëjaëpi yo'oye pa'iji, caëna, yo'oyë."

³⁵ Jaje quëani joyeni Jesús quë'rona sahuë. Sani cañapi burro jetena jajeni Jesure mëo ñohuë.

³⁶ Ja maca ñu'i saji'i. Saina, pai cañare i saija'a ma'ana jajehuë.

³⁷ Olivos cutihuë perepë cajeye ja'i macare pa'ina, si'ahua'i ite asani tuicohua'ipi Maija'quëre sihuajë cui huëohuë, pai yo'o tija' ma'ñere yo'oquëna, ñasicohua'ipi.

³⁸ Ñeje cajë:

"De'oquëre papi pai Ëjaë daiji, Maija'quë jëjo daoquëre papi, de'oye pa'iyere papi cōni. Jaje pa'ito sihuañu'u, ite ma'tëmo acohua'ije sihuajëna."

³⁹ Ja maca fariseohua'i pai jopore cōni pa'icohua'ipi cahuë, ite:

"Ye'yaquë, më'ëre tuicohua'ire cama'pë cajë'ë."

⁴⁰ Jaje cajëna, Jesupi sehuopi:

"Nuñerepa cayë. Icohua'ipi cuiye jecohua'i pa'ito quëna pëapi cuija'coa."

⁴¹ Ja maca Jesús Jerusalén quëno maca tija'quë iti daripëre ñani oji'i.

⁴² Ñeje caquë:

"Iye mu'se më'ë de'hue asato yë'ë isiyeni de'ora'pi. Më'ë de'oye pa'iyeni tija'ra'huë, isiyere! Jaje pa'iquëta'are yure cato yahuese'le pa'iji. Jaje pa'ina, më'ë ña tija'ne peoji.

⁴³ Co'a mu'se tija'aja'coa, më'ëre. Më'ëre sañope yo'ocohua'ipi quëna tējuopaje pa'iore tēja'ajacohua'i a'ë. Jaje yo'oni coa si'a tēja'api etaye peojajë cajë yo'ocohua'i a'ë.

⁴⁴ Jaje yo'ojë yejana si'aye quëna pëa ne tão oaja'cohua'i a'ë, huani jeaja'cohua'i a'ë, më'ë mamajëre, huesë pa'isi do'ire Maija'quë më'ëre do'i daisi maca."

Jesupi Maija'quë Huë'ere Tsoa Tose'e

(Mt 21.12-17; Mr 11.15-19; Jn 2.13-22)

⁴⁵ Ja maca Jesús Maija'quère huë'ena cacani iti huë'ena co'amaña isijë cui'ne huerojë yo'ocohua'ire peo hue'ñarepa eto saopi, hue'sena.

⁴⁶ Yo'oque caji, jaohua'ire:

“Toyase'e caji, ñeje: ‘Yë'ë huë'e cato Maija'quère se huë'e a'ë.' Jaje pa'iota'are mësaru cato, co'amaña ñahua'i tu'aro neni yo'oyë.”

⁴⁷ Si'a mu'seña Jesús ye'yapi, Maija'quère se huë'ena. Jaje ye'yaquëna, Maija'quë huë'e ñacaicohua'i ëjahua'i cui'ne cuañese'e ye'yacohua'i cui'ne pai daripë ëjahua'ijë me neni huani jeoja'cohua'i a'ni cuasajë co'ehuë, iti yo'o ja'ñere.

⁴⁸ Jaje co'ejëta'a t'ama'pë pa'ë'e, ite ne ja'ñere. Si'a pai ise'ere asajë cui'ne sehuojë yo'ojëna, ñajë.

20

*Jesús Cuañëñerepa Pa'iyë
(Mt 21.23-27; Mr 11.27-33)*

¹ Te'e mu'se Jesús Maija'quère se huë'ere paire ye'yaquë cui'ne huaso cocare quëaquë pa'ina, t'itahuë, Maija'quë huë'e ñacaicohua'i ëjahua'i, cuañese'e ye'yacohua'i cui'ne aiohual' cõni.

² Jaohua'ipi t'itani cahuë:

“¿Quëajë'ë, ique tutupi cuañëquërepa pa'i yo'oque'ni, iye? ¿Iqueipi iye cuañë tutu isina, yo'oque'ni?”

³ Cajëna, ja maca Jesupi jaohua'ire caji:

“Yë'ëre cui'ne sesi'i, mësarute. Sehuojë'ë, yë'ë cato:

⁴ ¿Nepi cuañere'ni, Juan oco doquë pa'i ja'ñe? ¿Maija'quë panita'a pai?”

⁵ Caquëna, sehuoye pajë coa sa'ñe johua'ija'a cahuë, ñeje:

“¿Me caji'cohua'i a'ni? Maipi Maija'quëpi jëjo daopi cacohua'i pa'ito ipi sehuoja'quë pa'ini: ‘¿Jaje pa'ita'are me yo'ojë sehuoye pare'ni?”

⁶ Cui'ne maipi paipi cuañesiquë pajil'i catoje, si'a pai huëni maire quëna pëapi jeajë huani jeaja'cohua'i pa'ini, si'aohua'i Juanre Maija'quë coca quëaquërepa pajil'i cuasajë cahuë.”

⁷ Jaje cuasani cahuë: “Huesyë. Ne sa'api Juanre oco doquë pa'i ja'ñe cuañehuë.”

⁸ Cajëna, Jesupe caji, jaohua'ire:

“Yë'ëje mësaru sese'e quëaye pañë.”

*Co'acohua'i Yo'oye Ayere Quëaye
(Mt 21.33-44; Mr 12.1-11)*

⁹ Ja jeteyo'je Jesús paire coca ca huëopi. Pai yo'oyeje pa'ye neni quëapi, ñeje:

“Pajil'i, te'i tsio paquëpi cuiya'i tani i co'amaña necaicohua'ina isi nëoni sani huesëquë.

¹⁰ Tëaye t'iasi maca saisiqëpi i jo'yaëre jëjo daopi, co'amaña necaicohua'ire seni tëani dajë'ë, yë'ëre nëocaise'ere caquë. Jaje cani jëjo daosiquëni jaohua'ipi coa tarapi të'cani jëjo saohuë, peoquëre.

¹¹ Ja maca iti tse aquëpi yequë jo'yaëre jëjo dao copi. Cui'ne jaëteje tarapi të'cani jëjo saohuë, ti isima'pë.

¹² Iti tse aquëpi t'ijupë yequë jo'yaëre jëjo daoruje co'amaña necaicohua'ipi ñani jaëteje të'cani hue'sena quë're eto saohuë, pëijë.

¹³ Ja maca ña jujani iti yeja tse aquë caji: ‘¿Me neñe jaje pa'ito? cani i oi mamaquëre pani jëjo saopi. Jaëni ñanita'a ca'rajë de'oye sehuoja'cohua'i a'ë.’

¹⁴ Jëjo saouna, ipi t'iaquëna, tsio ñacaicohua'ipi ñani sa'ñe cahuë: ‘Iquëpi iye tsio tse aquë de'oja'quë api, huani jeoñu'u. Jaje yo'oni ti ñese maipi iti tse acohua'i de'oñu'u cahuë.’

¹⁵ Jaje cani tsio peo hue'ñana etoni ite huani jeohuë.”

Jaje quëani Jesupi seji'i:

“¿Jaje yo'osi do'i me yo'oja'quë a'ni, iti tsio aquë jaohua'ire?”

¹⁶ Cani caji, ipi:

“Dani co'amaña necohua'ire huani jeani yecohua'ina isija'quë api, i yeja.”

Jaje caquëna, iyere asani cahuë:

“¡Jaje yo'oto Maija'quëje coeni!”

¹⁷ Jaje cajëna, Jesús johua'ire ñani caji:

“Jaje mësaru cuasato, ¿iquere caquë'ni, toya pëpë, pa'iyë ñañu'u? Ñeje caji: Huë'e necaicohua'i ne jujani nejosi quëna pëpi

Jaopi yure quëna pë jorepa pa'iji.

¹⁸ Jao quëna pë ëmëje'na paipi tomecohua'i pani, tome jë'yeye pa'iji. Cui'ne quëna pëpi pai ëmëje'na tomeco pani peo sëpëarepa neñe pa'iji.”

*Pa'i Do'ire Sqiñe Ayere Ye'yese'e**(Mt 21.45-46; 22.15-22; Mr 12.12-17)*

¹⁹ Maija'quë huë'e ñacaicohua'i ëjaohua'i cui'ne cuañese'e ye'yacohua'i Jesure iti macapi tseani coñu'u maini caquë jaje quëaji. Cuasajëta'a paini ca'rajë yo'oye pahuë.

²⁰ Ja maca yahue de'lo pairepa cayeje cajë coa cosoja'cohua'ire jëjo saohuë. Jaohua'ipi sejëna, ipi taya caëna, ja do'ire pai ëjaëna tseani isiñu'u cajë.

²¹ Ite seni ñañu'u cajë saiscohua'ipi cahuë:

“Ye'yaquë, më'ë paire nuñerepa caquë ye'yaquëpi cui'ne paireje si'ahua'ire si'a yë'quë maca caquëpi coa ai jerepa nuñere pare Maija'quë cocare ye'yaquëna, asayë, yëquë.

²² Jaje pa'ina, señë. Quëajë'ë: ¿De'oquë pa'i do'ire pai ëjaë Césarna saiñe, panita'a co'aquë?”

²³ Cajë sejëna, tsoe Jesús asapi, iohua'i co'aye cuasajë señe. Jaje ñani capi:

“¿Me yo'ojë yë'ëre jaje neñañu'u cajë yo'oye'ni?”

²⁴ Iñojë'ë, curiquë të'quire. ¿Ne tsiare hue'eco'ni? ¿Cui'ne ne mamire toyase'ëje hue'eco'ni?” Caquëna, iohua'ipi sehuohuë:

“Romano pai ëjaë mamire toyasicoa.”

²⁵ Cajëna, ja maca ipi capi:

“Jaje pa'ito isijë'ë, romano pai ëjaëna j tseco pa'ito. Cui'ne Maija'quë tse pa'ito Maija'quëna isijë'ë.”

²⁶ Jaje pai ña hue'ñana si'aye iohua'i cosojë neñu'u cajë yo'ose'ere sehuoquëna, ñani ai ta'ñe asaji cuasajë ca'rajë jerepa cama'pë paë'ë.

*Ju'isicohua'i Huëiye Pa'iquë Cajë Señe**(Mt 22.23-33; Mr 12.18-27)*

²⁷ Jeteyo'je Saduceohua'ipi Jesure sani ñahuë. Jaohua'i Saduceohua'i cato ju'isicohua'i huëiye peoji cacohua'i paë'ë. Jaje pa'iohua'ipi cahuë, Jesure:

²⁸ “Ye'yaquë, Moisés toyani yëquëre jecajji'i, ñeje: Te'i ëmëpi mamajëre pama'ë nëjore jëoni ju'isiquë pa'ito j yo'jëipi hua'jeore huejani mamajëre pacaiye pa'iji, maja'yë do'ire, toyapi careña.

²⁹ Jaje pa'ina, te'e tsëcapëre siete ëmëohua'ipi ñeje yo'ohuë: Maja'yëpi huejapi. Huejani mamajëre peoquë juji'i.

³⁰ Juquëna, jeteyo'je aquëpi hua'jeore huejani cui'ne jaëje juji'i, mamajëre peoquë.

³¹ Ja maca toasoñe aquëpi huejapi iote jaëje cui'ne yo'opi. Jare jajese'e siete pa'iohua'i huejajë mamajëre peocohua'i juju sahuë.

³² Ai jeteyo'jerepa nomio juco'ë.

³³ Jaje pa'ito ju'isicohua'i huëi maca ¿nepi jaote nëjore paja'cohua'i a'ni, si'ahua'i siete pa'iohua'i huejasicores?”

³⁴ Cajëna, ja maca Jesupi sehuopi, jaohua'ire:

“Iye yeja cato ëmëohua'i cui'ne nomiohua'i huejajë. Cui'ne nomiohua'ire huejojë yo'oyë.

³⁵ Jaje pa'iquëta'are sehuosicohua'ipi ju'isicohua'ipi huëisicohua'ipi ma'tëmo tji'ani huejaye peoji, cui'ne mamajëre pajë huejoye peoji.

³⁶ Jaro cato huññaohua'ijë pa'iohua'i pa'ija'cohua'i a'ë ju'isicohua'ipi huëisi do'ire Maija'quë mamajërepa pa'ija'cohua'i a'ë, ju'ima'cohua'i.

³⁷ Jaje pa'ina, soquë yëpi tsë'isi maca, Moisés ñaquë pa'ise'ere toyase'e acopi caji, ñeje: ‘Ëjaëpi ca'aji'i. Yë'ë cato Abraham, Isaac, Jacobo, Diusu a'ë. Ja do'ire asayë, ju'isicohua'ipi huajëcohua'i huëiye.’

³⁸ Jaje pa'ina, Maija'quë ju'isicohua'i Diusu peoji, coa ai jerepa huajëcohua'i Diusupi. Jaje pa'ina, ite cato si'ahua'i huajëcohua'ise'e pa'iyë. Peoji, ju'isiquë ipi ñato.”

³⁹ Ja maca cuañese'e ye'yacohua'i acohua'ipi cahuë:

“Ye'yaquë, de'oyerepa cahuë, më'ë.”

⁴⁰ Jaje cani ai jerepa jaiye señe pahuë, ca'rajë.

*Ne Mamaquë A'ni, Cristo**(Mt 22.41-46; Mr 12.35-37)*

⁴¹ Jesupi capi, jaohua'ire:

“¿Me yo'ojë Cristore David tsëcapë api caye'ni?”

⁴² Jaje ipi David ñeje casiquëta'are Salmos toya pëpëna:

Ëjaëpi capi, yë'ë Ëjaëre:

Ja'rujë'ë, yë'ë ëja te'tena.

⁴³ Më'ëre sañope yo'ocohua'ire yë'ëpi më'ë quëo të'ya me macajä'a.

⁴⁴ ¿Jaje pa'ito me yo'oquë Cristo David tsëcapë aquë pa'iquë'ni, tsoe jare ipi Davidpi Yë'ë Ëjaë cato?”

Ju'isicohua'i Huëiyey Ayere Señe
(Mt 23.1-36; Mr 12.38-40; Lc 11.37-54)

⁴⁵ Si'a pai asahuë, Jesús i ye'yacohua'ire jaje cajëna:

⁴⁶ "Cuañese'e ye'yacohua'i cato tsoa caña suñani cui'ne de'oyerepa jai pai pa'i hue'ñapi pëpajëna, cu'iyere yëcohua'i a'ë, cui'ne pai tsi'si huë'ñaje ai de'o ñu'i saina co'ejë ja'ruyere yëcohua'i a'ë, jerepa pa'iohua'i a'ë cajë. Jaje yo'oye mësaruta'a de'hua ñajë'ë. Cui'neje yo'oma'pë pañu'u cajë.

⁴⁷ Cui'ne hua'jeohua'ireje johua'i huë'ña jiojë yo'ocohua'i a'ë, cui'ne paipi de'ocohua'i a'ë cajajë cajë, tsoerepa secohua'i a'ë. Jaje pa'ina, jaohua'i a'ë, iti co'ayerepa sai cuañoja'cohua'i."

21

Peocopi Maija'quëre Isiye
(Mr 12.41-44)

¹ Jesús ñapi, jaiye pacohua'ipi Maija'quëre se huë'ena cacajë, mahuëana curiquë ayajë Maija'quëre isijëna.

² Cui'ne ñapi, te'o hua'jeo macapi caya a'ri të'ña mahuëna ayacona.

³ Ñani Jesupi capi:

"Nuñerepa cayë, mësarute. Ico hua'jeo ti peocopi si'ahua'i isiye jerepa isio.

⁴ Jaje pa'ina, jaohua'i si'ahua'i isihuë, johua'i huero jujajëna, nëañere. Jaje pa'iquëta'are jao ti peocopi isio, si'aye io paco pa'i mañere."

Maija'quë Huë'e Nejosico Pa'i Ja'ñe
(Mt 24.1-2; Mr 13.1-2)

⁵ Yecohua'ipi cocare cahuë, Maija'quëre se huë'e ayere, cui'ne io de'o quëna pëapi nesico pa'iyere cui'ne Maija'quëre coa isisi co'amañapi nesico pa'iyere. Jaje cajëna, Jesupi capi:

⁶ "Yequë mu'se mësarufiase'e peo huë'ña nejo ja'ñe t'asipi, yequë quëna pë ëmëje'e tuiyeje peoyerepa."

Ja Yë'ta'a Yeja Carajaima'ñë Iño ja'ñe
(Mt 24.3-28; Mr 13.3-23)

⁷ Jaje caquëna, se'l'ë, ite:

"¿Ye'yaquë, je yëhua jaje më'ë case'eje yo'oja'coa'ni? ¿Me yo'o iñoñe pa'ija'coa'ni, iye yo'oye t'añe ja'i maca pa'ito cahuë?"

⁸ Cajëna, Jesupi capi:

"De'hua ñajë'ë, mësarute cosojë. Jaje pa'ina, cayë. Jai pai yë'ë mamire cajë yo'oja'cohua'i pa'ija'cohua'i a'ë, 'yë'ë a'ë, Cristo, cui'ne 'yure a'ë. Tsoe t'lap'i' caja'cohua'i a'ë. Jaje catoje, sehuoma'pë pa'ijë'ë.

⁹ Yequë yejapi cui'ne yequë yejana uihuaye pa'ina, cui'ne sa'ñe iti yeja acohua'ija'a uihuaye pa'ina, asani, quëquëma'pë pa'ijë'ë. Jaje iyepi du'ru tëto saiye pa'ija'coa. Jaje pa'iquëta'are ja yë'ta'a carajaimerepa t'añe paja'coa."

¹⁰ Ai jerepa yequeje ñeje capi:

"Te'e jai yejapi cui'ne jai yejana se uihuaye pasipi. Cui'ne yequë paipi yequë pai ja're uihuaja'cohua'i a'ë.

¹¹ Pasipi, yeja ñu'cuyeje, ao ëa ju'iñe. Cui'ne coa si'a huë'ña ju'i dahuë pasipi. Cui'ne ma'témopi huajëya'ye yo'oye pa'ina, ñaja'cohua'i a'ë. Cui'ne jaiye ti ña ma'ñere ñaja'cohua'i a'ë.

¹² Ja yë'ta'a iye si'aye yo'oma'në, mësarute tseajë cui'ne josa yo'oja'cohua'i a'ë. Jaje yo'ojë co'acohua'i a'ë cajë saja'cohua'i a'ë, pai tsi'si huë'ñana. Paire co huë'ñana coja'cohua'i a'ë. Jaje yo'ojë pai ëjaohua'i quë'rona, cui'ne cuañecohua'i quë'rona saja'cohua'i a'ë, yë'ë mami do'ire.

¹³ Jaje yo'ojëna, mësarufiase'e cocare quëacaija'cohua'i a'ë.

¹⁴ Jaje pa'ina, tsearena, ca ja'ñere ne de'huañu'u cajë ai cuasama'pë pa'ijë'ë.

¹⁵ Jaje pa'ina, yë'ëpi ta'ñe coca cayë isiquëna, mësarute sa'ñope yo'ocohua'ire sa'ñope de'hue sehuoye peoyerepa cui'ne quëcoye peoyerepa caja'cohua'i a'ë, mësarufiase'e.

¹⁶ Jaje pa'iquëta'are mësarufiase'e quëcohua'ipi, yo'je tsipi, do'ijëpi cui'ne cajeohua'ipi, tseani yecohua'ina isija'cohua'i a'ë, cui'ne yecohua'ini huani jeaja'cohua'i a'ë.

¹⁷ Cui'ne si'a pai mësarute coeja'cohua'i a'ë, yë'ë do'ire.

¹⁸ Jaje yo'ojëta'are mësarufiase'e siope naña me macaje te'ojë ne huesëye pasipi.

¹⁹ Yo'o jujama'pë nuñerepa pa'isicohua'i pani, ti pa'iyere pana t'ija'cohua'i a'ë.

²⁰ Jerusalén daripëre soldado paipi tëhuo t'ijaisico pa'iona, ñani ja maca cuasajë'ë, yure maca nejosico pa'ija'coa cajë.

²¹Ja maca Judea pa'icohua'ipi catiye pa'iji, jai cutihuëna. Jerusalén daripë pa'icohua'ipi etani saiye pa'iji, yequë hue'ñana. Cui'ne tsio pa'icohua'ipi co'iyë peoji, cui'na daripëna.

²²Ja mu'seña cato iohua'i yo'osi do'ire sai mu'seña pasipi. Jaje yo'o mu'seña si'aye toyase'e t'i'asipi.

²³Co'ayerëpa ja mu'seña tsi ëta pëa maña cui'ne tsi tu'ña pacohua'i maña ai yo'oja'cohua'i a'ë, Maija'quë pëi ai yo'oye nesi maca.

²⁴Jaje pa'ina, huajore huaijë yecohua'i huahuoja'cohua'i a'ë, yecohua'ini coa tsesëjë coa si'a hue'ñana saja'cohua'i a'ë. Cui'ne judío pai peocohua'ipi Jerusalén daripë tsa'cu huesoja'cohua'i a'ë, Maija'quë ña nëosi tëcahuë, carajai macaja'a.

Pai Mamaquë Dani Coñe

(Mt 24.29-35, 42-44; Mr 13.24-37)

²⁵Ja maca ësë yo'oye, cui'ne ñañë yo'oye cui'ne ma'ñocohua'i yo'oyere ñajë iye yeja pa'icohua'ipi cuasa co'me huesësicohua'i pa'ija'cohua'i a'ë, jai tsaiyapi co'poco ai pisisquëna, asajë quëquësicohua'i pa'ijë.

²⁶Pai coa quëquë huesëjë ju'ise'eje pa'iohua'i dahuëra etajajëna, yo'oja'cohua'i a'ë, iye yeja carajai yo'o maca, ma'tëmo tuture paque tsasija'coa.

²⁷Ja maca ñajaj'cohua'i a'ë, Pai Mamaquë sirija'a tutu quë'ire papi cui'ne j de'oye pa'iyepi daina.

²⁸Jaje pa'ina, iyepi si'aye yo'o huëoquëna, ñani sihuajë'ë, cui'ne sjopegë maña mëani ñajë'ë, tsoe de'oye pa'iyë mësarute isija'quëpi daija'quë api cajë."

²⁹Ja maca quëapi, pai ñajëna, soquë yë yo'oyeje pa'ye ñani quëaquë capi:

"Higuera soquë yë yo'oyeje pa'ye yo'oja'coa. Tsoe mësarupi ta'ñe asacohua'i a'ë, jo yo'oye.

³⁰Jaje pa'ina, ja'opi mëa huëoquëna, ñani ometëcahuë t'i'añe ja'yere pa'iji, cacohua'i a'ë.

³¹Jaje cui'ne yë'ë case'epi t'i'acquë yo'o huëoquëna, ñani tsoe t'i'aji. Ja'yere pa'iji, Maija'quë cuañe te'te.

³²Nuñerepa cayë. Si'aye iye jaje yo'o saojaj'coa. Ja yë'ta'a yure iye yo'o huëo ñasicohua'i pa'icohua'i juju sama'në.

³³Jaje pa'ina, ma'tëmo, yeja pani tējini carajajia'coa, yë'ë cocata'a ti pani huesëja'coa.

³⁴De'hua ñare pajë pa'ijë'ë, më joñoare jëa joyo neñere, co'aye yëyere, cõno cuepeyere cui'ne iye yeja pa'ijë de'oye pañu'u cayere, ja mu'se t'i'acquëna, cuasama'pë yo'oyepi.

³⁵Trampana sjoñeje yo'oja'coa, ja mu'se si'a hue'ña yeja pa'icohua'ire.

³⁶Ne de'huasicohua'ipi pa'ijë'ë, Maija'quëre si'anë sejë, iye tëto saitojë jëasicohua'i pa'icohua'ipi Pai Mamaquë daina, de'oyepi iñoja'cohua'i."

³⁷Ja mu'seña cato Jesús ye'yapi, Maija'quëre së huë'e Jerusalén pa'icona. Cui'ne ñamire Olivos hue'yosi cutihuëna sani pëapi.

³⁸Jaje pa'ina, si'a nea hue'ña paipi daë'ë, Maija'quëre së huë'ena j quëaquëna, asañu'u cajë.

22

Jesure Tseñe Cuasayere

(Mt 26.1-5, 14-16; Mr 14.1-2, 10-11; Jn 11.45-53)

¹Jujuma' ao aïñe t'i'añe ja'i maca pa'iji, ja cato. Egípto pai mamajëse'ere huai Israel pai mamajëre huaiye pase'ere co'ye cuasajë sihuajë yo'oye pa'iji.

²Ja mu'seña Maija'quë huë'e ñacaicohua'i ëjaohua'i cui'ne cuañese'e ye'yacohua'ipi, Jesure me neni huani jeoja'cohua'i a'ni cuasajë co'ehuë, ite asa pañi ca'rajë.

³Ja maca huati ëjaëpi Judas cui'ne yequë mami Iscariote hue'equëna cacapi, doce Jesús soisicohua'i aquëna.

⁴Cacaquëna, jaëpi saji'i, Maija'quë huë'e ñacaicohua'i ëjaohua'i quë'rona cui'ne Maija'quëre së huë'e ñacaicohua'i quë'rona sani jaohua'i ja're cõni Jesure ñeje yo'oni tseani mësarujëñana is'iñe pa'i api capi.

⁵Jaje caquëna, asani jaohua'i ai sihuajë curiquë sañu'u ca nëohuë, ite.

⁶Cajëna, ipi sehuoni ite tseja ja'ñere me pai peo maca ite tseani isija'quë a'ni cuasaquë j yo'o ja'ñe co'epi.

Na'i Maca Jesús Aise'e

(Mt 26.17-29; Mr 14.12-25; Jn 13.21-30; 1 Co 11.23-26)

⁷Jujuma' ao aijë cui'ne yëi ñamare huani Maija'quëre isijë së mu'se t'i'api.

⁸Ti'aëna, Jesupi Pedrore cui'ne Juanre jëjo saouquë capi:

"Sani ne de'huajë'ë, na'iquëna ai ja'ñere Israel pai fiestare cuasajë."

⁹Jaohua'ipi ite se'i'ë:

"¿Jerona ne de'huaye'ni?"

¹⁰Cajëna, Jesupi sehuopi:

“Mésaru jai daripëna caca maca tì'aja'cohua'i a'è, te'i ìmëpi yurupëna oco saquëni. Tì'ani j huë'ere pana tuij'è. Ipi cacacuëna, ñani te'e cacaj'è.”

¹¹ Cacani ja maca iti huë'e aquëre sej'è: ‘¿Jerore pa'ico'ni, yë'è ye'yacohua'i ja're conì na'iquëna, Israel pai fiestare cuasajë aija'a tu'rihuë? Capi ye'yaquëpi,' caj'è.”

¹² Jaje cajëna, ipi ñinosipi, ìmëje'e tu'rihuëpi, jai hue'ñapi tsoe si'aye pa'iconi. Ñani jaronana ne de'huaj'è.”

¹³ Jaje caëna, jaohua'ipi sani jare Jesús case'eje tì'ahuë. Tì'ani Israel pai fiesta yo'oyere cuasajë ne de'huaj'è.

¹⁴ Ao aife tì'asi maca Jesús cui'ne j ye'yacohua'i conì ja'ruhuë, ao ai saihuëna.

¹⁵ Ja maca Jesupi capi, jaohua'ire:

“Mésaru ja're conì iye fiesta na'iquëna, aife yëhuë. Ja yë'ta'a yë'è ai yo'oye tì'ama'në.

¹⁶ Jaje pa'ina, cayë, mësarute. Tijupë cui'naëpi mësaru ja're conì iye fiesta yo'o coñe paja'quë a'è, iye yejana. Iye yo'oye Maija'quë te'tena ne sao maca ja maca ani cosi'i.”

¹⁷ Ja maca jaje cani ucu duruhuë ini Maija'quëre de'oji, se pëpani capi:

“Iyere ini huahuej'è.”

¹⁸ Care payë, mësarute. Tijupë cui'naëpi cuiya'i cono ucuma'ë pa'ija'quë a'è, Maija'quë cuañe te'tena yo'oye tì'añe pato.”

¹⁹ Ja jetye'o'je panpë ini Maija'quëre de'oji se pëpani ipi hua'quequë jaohua'ina isipi. Isini capi:

“Iye yë'è ca'è. Iye yo'oyeje pa'yere yo'oj'è'è, yë'ère cuasajë.”

²⁰ Jaje cui'ne ucu duruhuëje ani tējini ini capi:

“Iye ucu duruhuë cato huajëye yo'o ja'ñere ca nëoñe a'è, yë'è tsiepi mësaru de'oye pa'i ja'ñere caquë nejoja'a do'ipi.

²¹ Jaje pa'ina, yë'ère cosoquë tseani yecohua'ina isija'quë ñore pa'iji, yë'è ja're te'e ao ai saihuëna tēose'epi.

²² Jaje yo'oye pa'iji, Pai Mamaquë cato jare ìte quëa nēosi ma'aja'a saiji. Jaje pa'iquëta'are iteaye pa'i pa'iji, iti yehuoja'quë!”

²³ Ja maca jaje caëna, iohua'ija'a sa'ñe sei'è, “¿nëpi mai aquë yehuoja'quë a'ni?” cajë.

Nepi Jerepa Pa'iquë Api Sa'ñe Caye

²⁴ Ja maca sa'ñe cajë, “¿nëpi ai jerepa pa'i pa'ija'quë a'ni?” cahuë.

²⁵ Cajëna, Jesupi sehuopi:

“Yejaña ëjaohua'ipi iti necaicohua'ire cajë cuañecohua'i a'è, cui'ne iti yeja de'oye pa'i ja'ñere cajë necaicohua'ipi, cajeohua'ire hue'yocohua'i a'è, iohua'i ëjaëre.

²⁶ Jaje pa'iquëta'are mësaru cato jaje yo'ocohua'i pa'iyë peoji. Coa ai jerepa ñeje yo'oye pa'iji. Iti ai jerepa pa'ipi mësaru aquë cato tsj posëje pa'i pa'iyë pa'iji, cui'ne iti cuañequëpi coa necaiquëje pa'i pa'iyë pa'iji.

²⁷ Jaje pa'ito, ¿ne a'ni, ai jerepa pa'i, ao ai saihuëna ja'runi ñu'i aiquë, panita'a iti aore sa aocuë? Jaje pa'ina, mësarupi ñato ao ai saihuë ñu'iquë api jerepa pa'iji, cayë. Jaje pa'iquëta'are yë'è cato mësarute necaiquë pa'iyë.

²⁸ Mësaru a'è, yë'ère ai yo'oye pa'ina, si'anë yë'è ja're conì pa'isicohua'ipi.

²⁹ Jaje pa'ina, mësarute yë'èpi cuañecohua'i pa'i ja'ñere, ja'quë yë'ère isise'eje isiyë.

³⁰ Yë'è ja're conì ao ai saihuëna, yë'è cuañe hue'ñana aijajë cui'ne ucuja'cohua'ini cui'ne cuañecohua'i ñu'i saire pana ja'rujajë doce Israel pai tsëcapë acohua'i yo'ose'ere ña de'huaja'cohua'ini pa'ija'cohua'i a'è, mësaru.”

Pedro Jesure Ñama'quë A'ë, Caye

(Mt 26.31-35; Mr 14.27-31; Jn 13.36-38)

³¹ Èjaëpi yequeje capi:

“Simón, Simón Satanáspi më'ère trigo ñu'cueyeje pa'ye yo'osi'i caquë seji'i. De'hua ñaj'è.”

³² Jaje pa'iquëta'are yë'èpi më'èni caquë Maija'quëre secaca'è, më'è cuasayepi de'oye pa'ijaquë caquë. Më'èpi ja yo'oye tēto sani yë'èna ponësi maca. Coçaij'è, më'è yo'je tsjre nuñerepa pa'ija'cohua'ini.”

³³ Jaje caquëna, Simónpi capi:

“Èjaë, yë'è cato më'è ja're conì co hue'ña cotoje co cuañosi'i cuasayë, cui'ne ju'iñe pa'itoje te'e ju'iñere yëyë.”

³⁴ Caquëna, Jesupi capi, ìte:

“Pedro, care payë. Më'ère iye ñata tome maca ja yë'ta'a cura yë'ima'ëna, toasoñe pa'ye cosoja'quë a'è, më'è ñama'quë a'è ìte, yë'è caquë.”

Tì'a Tējiji, Jesús Ai Yo'oye

³⁵ Jesupi seji'i, jaohua'ire:

“Mësarute topëa peocohua'ire cui'ne curiquë peocohua'ire, cui'ne zapatoje peocohua'ire jëjo saosi maca ¿mësarute co'amaña jopo caraë?”

Jaje seina, ïohua'ipi cahuë:

“Pani.”

³⁶ Cajëna, capi, jaohua'ire:

“Jaje yo'ose'e pa'iquëta'are yure cato tñne yeque yo'oye pa'iji. Jaje pa'ina, topë paquë pani saye pa'iji. Cui'ne curiquë ayacore paquë pani saye pa'iji. Cui'ne hua'ti peoquë pani dëi ju'li care isiquë curi neni hueroye pa'iji, hua'tije.

³⁷ Yë'ëna tsoe toyajë pa'ise'ere t'iañe pa'iji. Ja toyase'epi caji: ‘Co'acohua'i ja're cõni cuëcuhë.’ Jaje pa'ina, si'aye toyase'e nuñerepa t'iañe pa'iji, yë'ëna.”

³⁸ Jaje caquëna, jaohua'ipi cahuë:

“Ëjaë, ñnore caya hua'ña pa'iji.”

Jaje cajëna, ïpi sehuopi:

“Tsoe t'ia'pi.”

Jesús Getsemaní Quë'rona Señe

(Mt 26.36-46; Mr 14.32-42)

³⁹ Ja maca saji'i, etani Olivos cõtihuëna noni ï sai huë'ñana. Saina, ï ye'yacohua'ijë cõni tuë'ë, ïte.

⁴⁰ Iti huë'ña t'iani, jaohua'ire capi:

“Sejë'ë, huati neña maca taiñe paja'cohua'i.”

⁴¹ Cani ja jeteyo'je Jesús jaohua'ire jëoni saji'i, quëna pë jëoñe ja'i macana. Jaron a do're ja'runi seji'i, Maija'quëre.

⁴² Ñeje caquë:

“Ja'quë, më'ëpi iye sëje cõno da'ca nejocaiye pa'ito nejocaijë'ë, ai yo'o ja'ñere. Ja yë'ta'a yë'ë cuasase'ëje yo'oma'ë pa'ijë'ë. Coa ai jerepa më'ë cuasase'ere yo'osi'i.”

⁴³ Jaje pa'ina, Maija'quë huññaëpi ma'tëmopi ñaipi, ïte tutu isisi'i caquë.

⁴⁴ Jaje ai oi yo'oquë ai jerepa tutu Maija'quëre seji'i cui'ne ï ai ësë cajeyeye pa'ye tsiepi yejana cajepi.

⁴⁵ Jaje Maija'quëre seni tējini huëni saji'i, ï ye'yacohua'iquë'rona. T'iaquë ñaquëna, oiyepi quëco huesouna çaisicohua'ipi paë'ë.

⁴⁶ Pa'ijëna, ja maca capi, jaohua'ire:

“¿Me yo'ojë çaisicohua'ipi uñe'ni? Huëijë'ë. Huëni sejë'ë, huatipi neñaquëna, taima'pë pa'ija'cohua'ipi.”

Jesure Tseñe

(Mt 26.47-56; Mr 14.43-50; Jn 18.2-11)

⁴⁷ Jesupi ja yë'ta'a cocare caëna, jai pai t'iasi macajë Judas hue'equë doce ï soisicohua'iquëpi du'ru daji'i. Daina, yecohua'ijë jeteyo'je daë'ë. Jaëpi t'iani Jesure tsu'susi'i caquë tsio daji'i.

⁴⁸ Tsio dai maca Jesús ïte capi:

“Judas, ¿coa tsu'suquë sihuayeje pa'yepi yo'oquë yehuosi'i caquë yo'oquë Pai Ma-maquëre, më'ë?”

⁴⁹ Ja maca Jesús ja're cõni pa'icohua'ipi ñani seji'ë:

“Ëjaë, ¿hua'ñapi jaohua'ire huaiye de'oquë?”

⁵⁰ Jaje së maca ïohua'iquëpi tsoe Maija'quë huë'e ñacaicohua'ijë jaë jo'yaëni ëja te'te cajorona tëtöpi, peo te'terepa.

⁵¹ Jaje yo'oquëna, Jesupi capi:

“Jëojë'ë, tsoe de'o'ji.”

Ja maca Jesús Maija'quë huë'e ñacaicohua'ijë jaë jo'yaë cajorore cui'naoni ïni tuacaji'i.

⁵² Ja jeteyo'je Maija'quë huë'e ñacaicohua'ijë jaohua'ire cui'ne Maija'quë huë'e ñacai soldado pai ëjaohua'ire cui'ne aïohua'ire Jesupi capi, ïte tseani sañu'u cajë daisicohua'ire:

“¿Co'amaña ñaëre yo'oyeje pa'ye mësarü tarapi, huq'ñapi cõni date? yë'ëre tseañu'u cajë.

⁵³ Yë'ë mësarü ja're cõni si'a mu'seña Maija'quëre së huë'e pa'ina, mësarupi yë'ëre pu'pema'pë pa'isicohua'ita'a jaje yo'o macapi t'iaëna, mësarü yo'ojë neañepi quëco huesosi maca.”

Pedro Cosose'e

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Ja maca Jesure tseani coñu'u cajë sahuë, Maija'quë huë'e ñacaicohua'ijë jaë huë'ena. Sajëna, cui'ne Pedroje tuj'i, so'o maca se ñaquë.

⁵⁵ Jaro hue'se daripë tēhuo sitopi toa suahuë. Suani ja'ru tē'ijaë'ë, ioja'a. Cui'ne Pedroje ïohua'ijë ja're cõni ja'rupi.

⁵⁶ Ja maca te'lo huë'e necaicopi toa yë'quë macare ja'rusiquëpi toa mia huë'ñare ñu'ina, jse'ere ai ñani cao:

“Iquë Jesús ja're coní pa'isiquë api.”

⁵⁷ Jaje cacona, Pedropi cosoquë capi:

“Ñama'quë a'ë, ite.”

⁵⁸ A'ri maña tsoe pa'i maca yequëpi sani cui'ne capi:

“Më'ëje Jesús ye'yacohua'i aquë a'ë.”

Jaje caquëna, Pedropi capi:

“Pani. Yë'ë yequë a'ë.”

⁵⁹ Te'e hora tëto sai maca yequë cui'ne títani capi:

“Nuñerepa më'ë j ja're coní pa'isiquë a'ë. Cui'ne jaje pa'ipi Galilea aquë a'ë, më'ë. Asayë, më'ë cocana.”

⁶⁰ Caquëna, Pedropi capi:

“Huesëyë, yë'ë më'ë caye. ¿Iquere caquë'ni, jaje pa'ye?”

Ja yë'ta'a itire Pedro caquëna, cura yë'ji'i.

⁶¹ Yë'ina, ja maca Ejaëpi co'ye ponëni ñapi, Pedrore. Ja maca Pedro Ejaë case'ere cuasa ñajaji'i: “Ja yë'ta'a cura yë'ima'ëna, toasoñe pa'ye cosoja'quë a'ë, më'ë case'ere.”

⁶² Ja maca Pedro hue'sena etani ai oji'i, j tayose'ere co'a ju'i.

Jesure Cue'cueye

(Mt 26.67-68; Mr 14.65)

⁶³ Jesure tseani pacohua'ipi cue'cueyë cui'ne ite tara pëapi të'cahuë.

⁶⁴ Ite ñaco ca cañapi sëani tsiana mosicapi të'cajë cahuë:

“¿Se ca ñajë'ë. Nepi të'care'ni?”

⁶⁵ Cui'ne jaiye yequë cocajë cahuë, ite tea ju'ijë.

Judio Pai Ca Tëjicohua'ipi Jesure Yo'oye

(Mt 26.59-66; Mr 14.55-64; Jn 18.19-24)

⁶⁶ Mu'se pa'i maca Judío johua'i Maija'quë huë'e ñacacohua'i ëjaohua'i, cui'ne cuañese'e ye'yacohua'i tsi'sini Jesure sahuë. Jerepa ëjaohua'ipi ca tëjicohua'irepa quë'rona, seni asañu'u cajë, sani cahuë:

⁶⁷ “Quëajë'ë. ¿Më'ë aë, Cristorepa?”

Cajëna, ïpi sehuopi, jaohua'ire:

“Yë'ë j a'ë catoje mësarú coa caji cuasaye pa'iji.

⁶⁸ Cui'ne yë'ëpi mësaruni seque pa'ito yë'ë señere sehúo t'iañe peoji, cui'ne joye saoyeje paja'cohua'i a'ë.

⁶⁹ Jaje pa'isicohua'ita'are yureta'a Pai Mamaquë Maija'quërepa ëja te'tere ja'rusiquëpi ñu'ija'quë api, Ejaërepa pa'ija'quëpi.”

⁷⁰ Jaje caquëna, ja maca si'ahua'i ite se'i'ë:

“¿Jaje pa'ito më'ë aë, Maija'quë mamaquë?”

Sejëna, Jesupi sehuopi:

“Jaje pa'ijë'ë. Yë'ë a'ë, mësarú cayeje.”

⁷¹ Caquëna, ja maca johua'ipi cahuë:

“¿Iquere cajë ai jerepa j caquëna, asasicohua'ire co'eye'ni? Tsoe maipi asahuë, j yë'ore pare cahuë.”

23

Pilatona Jesure Isiye

(Mt 27.1-2, 11-14; Mr 15.1-5; Jn 18.28-38)

¹ Ja maca jaje caní si'ahua'i huëni Jesure sahuë, Pilato quë'rona.

² Jarona co'aquëre papi ca huëohuë, ñeje cajë:

“Iquë co'aye yo'oye t'lahuë, yëquë paini co'a de'huaquë cui'ne pai do'i saïma'pë pa'ijë'ë, romano pai ëjaëre caquë. Cui'ne, jare ïpi yë'ë Cristo, pai ëjaëre pa'ë caquë api.”

³ Jaje caquëna, Pilatopi seji'i, ite:

“¿Më'ë a'ë, judío pai ëjaë?”

Caquëna, Jesupi sehuopi:

“Jaje pa'ijë'ë, më'ë case'eje.”

⁴ Caquëna, ja maca Pilato capi, jaohua'ire Maija'quë huë'e ñacacohua'i ëjaohua'ire, cui'ne paire:

“Iquë co'aye yo'oye t'lama'ë pa'iyë.”

⁵ Caquëna, johua'ipi ai tutu cahuë:

“I ye'yapi si'a Judea paire co'a de'huaquë sañope ëjaohua'ire, yo'ocohua'ire nequë api. Jaje pa'ipi yure iñona cui'ne yo'oji, Galileapi huëosiquëpi.”

Herodesna Jesure Isiye

⁶ Pilatopi jare asani, jaje pa'ito iquë Galilea aquë a'ë capi.

⁷ Jaje pa'ina, mësarupi jaro aquë api carena, Herodes quë'rona jëjo saosi'i, Galilea daripë cuañequëna, capi. Ja mu'seña cato jãëje Jerusalénre paji'i.

⁸ Sarena, Herodespi ñani ai sihuaquë ai tsoe coa ña ëa ju'i pa'iquëpi i yo'oyese'e cajëna, asaquë paji'i. Jaje pa'ipi pai yo'o t'ia ma'ñere yo'oquëna, ñasi'i caquë pa'iquë paji'i.

⁹ Jaje pa'ipi jaiye seji'i. Seguëta'are Jesús te'oreje sehuoma'ë paji'i.

¹⁰ Cui'ne jarote Maija'quë hu'ë ñacaicohua'i ëjaohua'ipi cui'ne cuañese'e ye'yacohua'ipi jaohua'ipi jte ai sañope cacohua'i paë'ë.

¹¹ Ja maca Herodes cui'ne i soldado pai tea ju'ijë co'aye yo'ohuë. Coa ini cue'cueñu'u cajë suñahuë, de'o cañare pai ëjaohua'i ju'i care. Ja jeteyo'je cui'naëni Pilato quë'rona jëjo saopi.

¹² Ja mu'se Pilato cui'ne Herodes cajeohua'i de'ohuë, ja'rë pëicohua'i pa'isicohua'ipi.

Jesure Huaiye Pa'iji, Caye

(Mt 27.15-26; Mr 15.6-15; Jn 18.39-19.16)

¹³ Ja maca Pilato Maija'quë hu'ë ñacaicohua'i ëjaohua'ire cui'ne pai ëjaohua'ire tsi'soni,

¹⁴ capi:

“Mësarupi dahuë, iquëre yë'ë quë'rona co'aye paire yo'oji cajë. Jaje pa'iquëta'are yë'ëpi seni asasi'i caquë mësarupi ñajëna, yo'ohuë. Jaje pa'ina, tsoe mësarupi ñahuë, do'p peoquë pa'ina. Jaje pa'ito ique do'ire jte co'aye caye'ni.

¹⁵ Jaje pa'ina, Herodesje ti co'aye yo'oma'quë pa'ina, ña jujani jëjo daopi. Jaje pa'ina, iquëre huani jeofne peoji.

¹⁶ Jaje pa'ina, coa si'seni jeteyo'je joye saoja'quë a'ë, pa'ija'quëre.”

¹⁷ Jaje fiesta mu'seña cosicohua'ire te'ire eto saoque paji'i, paire de'oye yo'osi'i caquë.

¹⁸ Jaje caquëna, si'ahua'i cui huëohuë:

“¡Jaëte huani jeofne pa'iji! ¡Barrabásni eto saojë'ë!”

¹⁹ Iquë Barrabás cato paire huaisiquëni cosiquë paji'i. Cui'ne ja daripë pai iohua'i ëjaohua'ire uihuaye huëoquëpi.

²⁰ Pilato cato Jesuni etoye yëpi. Jaje pa'ina, tijupë ca cöpi.

²¹ Caquëna, ai jerepa tutu cuihuë:

“¡Queja'quë api, queja'quë api!”

²² Toasoñe aye Pilato capi, jaohua'ire:

“¿Quere co'aye yo'o u'ni, i? Yë'ë i co'aye yo'ose'e t'ijama'ë pa'iyë. Jaje pa'ire ¿me coa huaiye'ni? Jaje pa'ina, coa ai si'seni jëjo saosi'i, pa'ija'quëre.”

²³ Jaje caquëna, ai jerepa tutu cuihuë, queja'quë api cajë. Jaje ai cui do'ipi Maija'quë huë'e ñacaicohua'i ëjaohua'i case'e ja yo'oye t'ijahuë.

²⁴ Ja maca Pilato iohua'i yëjë cayeje yo'ose'e pa'ijaquë cuasapi.

²⁵ Cuasani jaje iohua'i casiquëni eto saopi, paire huaiquë co'aquëni. Ja maca Jesuni iohua'i yëyeje huaija'quëre isipi.

Ite Quëse'e

(Mt 27.32-44; Mr 15.21-32; Jn 19.17-27)

²⁶ Ja maca Jesure queja'quëre sajëna, Cirene aquëpi Simón hue'equëpi sañope daina, t'iani tseani cuañehuë, Jesure queja'core cruza hue'equë saja'quëre cajë Jesupi du'ru saina.

²⁷ Jaje saina, jai pai tuë'ë. Cui'ne nomiohua'ije jai pai oijë cuijë saë'ë, ini co'a ju'ijë.

²⁸ Jaje oijëna, Jesús ñani capi, jaohua'ire:

“Jerusalén nomiohua'i oima'pë pa'ijë'ë, yë'ëre. Coa ai jerepa mësaruja'a cui'ne mësarumamajëni oijë'ë.

²⁹ Yequë mu'se ñeje caye t'ijaja'coa: ‘Nomiohua'i mamajëre peocohua'i, tsj pama'pë pa'isicohua'i, cui'ne ojeje tsoesama'pë pa'isicohua'i jerepa sihua'icohua'i a'ë.’

³⁰ Cajëna, paipi ca huëoja'cohua'i a'ë, ai cutire: ‘Yëquëna quëñojë'ë’ cui'ne a'ri cutihuëare caja'cohua'i a'ë, ‘Yahuejë'ë, yëquëre.’

³¹ Huajë soquë yëje pa'ini yë'ëre jaiye yo'oni me mësarute paja'cohua'i a'ni cuëni si soquë yëje pa'iohua'ire.”

³² Jesús ja're con huaija'cohua'ire caya paire sahuë, co'amaña yahue ñacohua'ire.

³³ Ja maca Pai Siopë hue'yosi hue'ñana t'iani Jesure quehuë. Cui'ne caya co'a paire con, yequëni i ëja te'tena cui'ne yequëni i ari te'tena nëcohuë.

³⁴ Ja maca ite quejëna, Jesupi capi:

“Ja'quë oijë'ë, jaohua'ire iohua'i yo'oye huesëjë yo'ocohua'ire.”

Soldado paipi Jesús ju'i care dutani sa'ñe iohual'ija'a nepi, iote paja'cohua'i a'ni cajë yo'ohuë.

³⁵ Jaje yo'ojëna, paipi ai ñahuë. Cui'ne pai ëjaohua'ique cue'cuejê cahüë:

“Yecohua'ire huasopi. Yureta'a co'ye huasoyere paji, nuñerepa Cristo Maija'quë tsequërepa pani co'ye huasoye pa'ini.”

³⁶ Cui'ne soldado pajie cue'cuejê ite o'sa cuiya'i conore ocuasi'i cajë yo'ohuë.

³⁷ Jaje yo'ojë ite cahüë:

“Judío pai ëjaë pani më'ëja'a co'ye huasojë'ë.”

³⁸ Cui'ne i sïopë ëmëje'ere toyasico paco'ë, griego, latín cui'ne hebreo cocapi ñeje: IQÜË JUDÍO PAI ËJAËPI.

³⁹ Co'aye yo'ocohua'i aquëre que deosiquëpi iti maca dequëpi tea ju'i co'aye capi, ñeje:

“Më'ëpi Cristorepa pani më'ëja'a co'ye huasoni jeteyo'je yëquëre huasojë'ë.”

⁴⁰ Jaje caquëna, yequëpi i cajeire capi cama'ë:

“¿Maija'quëre ca'rama'quë, më'ëje cui'ne ju'ija'quë me casi'ni?”

⁴¹ Mai cato nuñerepa co'aye yo'ocohua'ipi yo'o cuañoji, jare mai co'aye yo'osi do'ire saijë. Jaje pa'iquëta'are iquë ti co'aye yo'oma'quëpi yo'o cuañoji, ñaquë më'ë.”

⁴² Cani ja maca capi:

“Jesús huañeyema'ë pa'ijë'ë, yë'ëre më'ë cuañe huëo maca.”

⁴³ Caquëna, Jesupi capi, ite:

“Nuñerepa cayë, më'ëre. Yurepi yë'ë ja're cono pa'ija'quë a'ë, de'o hue'ñare.”

Jesús Ju'ise'e

(Mt 27.45-56; Mr 15.33-41; Jn 19.28-30)

⁴⁴ Mu'se joporepa pa'i maca si'a yeja ñamije pa'iorepa de'opi, tres pa'i macaja'a na'iquëna.

⁴⁵ Esëje miañe pani cui'ne ta'tëpo capi Maija'quëre se huë'e Maija'quë pa'i sito tëhuosicoje jopore paja'a tsata saji'i, ëmëje'epi meñe huë'ehuëre pana.

⁴⁶ Ja maca Jesupi cui'pi:

“Ja'quë, Ja'quë yë'ë joyo më'ëna isi nëoñë.”

Jaje cani juni huesëpi.

⁴⁷ Ja maca capitán, romanopi iye yo'ose'ere ñani Maija'quëre sihuaquë capi:

“Nuñerepa iquë ti co'aye yo'oma'quë paji'i.”

⁴⁸ Si'ahua'i ja maca pa'isicohua'ipi ite yo'ose'ere ñani quëquë huesëjë coti saiñuëana të'cajë saë'ë.

⁴⁹ Jaje saijëta'are si'ahua'i Jesús ñacohua'ipi cui'ne nomiohua'i Galileapi tuisicohua'ipi so'ona pëani ñahuë, iye yo'oye.

Jesure Tase'e

(Mt 27.57-61; Mr 15.42-47; Jn 19.38-42)

⁵⁰ Paji'i, te'i nuñerepa yo'oquëpi i mami José hue'equëpi, Judea yejare Arimatea daripëre pa'iquë. Jäë cato judío pai ëjaohua'i aquë paji'i.

⁵¹ Iquë José cato Maija'quë te'te aye yo'oye ñasi'i cuasaquë utequë paji'i. Jaje pa'ipi yequë ëjaohua'i Jesure huai ja'ñere cajëna, te'e cui'ne cuasaye papi.

⁵² Jaje pa'ina, ëjaëpi Pilatore sani seji'i, Jesús capë ta ja'ñere caquë.

⁵³ Cruzu dequëre casani jai cañapi ca'neni quëna yejana coje nesicona oapi, ja yë'ta'a paire tama'a cojena.

⁵⁴ Huajë mu'se pa'ija'coni ne de'hua mu'se paji'i. Ja mu'se cato toe huëoye ja'i maca pa'iji.

⁵⁵ Galileapi Jesure nomiohua'i tuisicohua'ipi sani tasi daripë ñahuë, me qare'ni, i capë cajë.

⁵⁶ Ñani ja maca huë'ena co'ini huëo së ma'ña ne de'huahuë. Ne de'huani huajë mu'se huajëhuë, iti cuañese'e pa'iyeye.

24

Jesús Ju'isiquëpi Huëise'e

(Mt 28.1-10; Mr 16.1-8; Jn 20.1-10)

¹ Du'ru macarepa co'amaña ne mu'se pa'i maca cui'naohua'ipi saë'ë, tasi daripë quë'rona nea hue'ñarepa huëo sëñe ne de'huase'ere sajë. Cui'ne yecohua'i nomiohua'i cono saë'ë.

² Ja maca ti'ajë ñajëna, quëna pë daripë sïosicopi tïrore pa'iona, ti'ahuë.

³ Ti'ani cacajë Èjaë Jesús capëre ti'ama'pë.

⁴ Peoquëna, ai quëquëhuë, me nei'ni cajë. Jaje quëquëjë ñajëna, jarote caya ëmëohua'i mia ju'i caña ju'icohua'ipi iohua'i ja're cono nëcahuë.

⁵ Jaje ña quëquëni yejare pana në me huesëjëna, ñajë jaohua'ipi, cahüë:

“¿Iquere co'eye'ni, ju'isicohua'i quë'ro? Tsoe huajëquëpi pa'iji.

⁶ Ìñore pa'ima'è pa'iji. Tsoe huèji'i. Cuasajè'è. Ja yè'ta'a Galilea pa'ima'ca i ca'ñere,
⁷ ñeje: 'Pai Mamaquè co'aye yo'ocohua'i jèñana isisiquè pa'ija'què api. Pa'ina, jaohua'ipi queja'cohua'i a'è, soquè sarahuana. Jaje yo'osiquèta'a toaso mu'seña pa'i maca huajèquè huèja'què api.' Tsoe jare quèapi".

⁸ Jaje caèna, ja maca Jesús ca'ñe cuasa ñajaè'è.

⁹ Ja jeteyo'je daripè ñasicohua'ipi co'ini si'aye iohua'i ñase'ere quèahuè, once soisicohua'ire cui'ne si'ahua'i iti maca cõni pa'icohua'ireje.

¹⁰ Iye coca i soisicohua'ire sani quèasicohua'i cato paè'è: María Magdalena, Juana, María, Jacobo pèca ja'co, cui'ne yequè nomiohua'i cõni.

¹¹ Jaje quèajèna, i soisicohua'ipi jaohua'i quèaye asani sehuoma'pè paè'è, coa cuepejè cayeje pa'ye nèina.

¹² Jaje nuñerepa cayè cuasama'quèta'a Pedropi etani huè'huèquè saji'i, tasi daripè ñasi'i caquè. Sa tì'ani ñaquèna, ite ca'nesi caña tìrona ne saose'epi paji'i. Pa'ina, ñani ai cuasaquè saji'i, huè'ena.

Emaúsna Sai Ma'ana Yo'oye

(Mr 16.12-13)

¹³ Jare ja mu'se caya èmèohua'i Emaús daripèna saè'è, Jerusalèni once kilómetro sai hue'ñana.

¹⁴ Saijè Jesús ayere cajè saè'è.

¹⁵ Jaje cajè saijèna, jare ipi Jesús jaohua'ire tsiojaji'i. Tsiojani iohua'i ja're cõni saji'i.

¹⁶ Saina, a'ri maña carapi, iohua'i ña tì'are paye ite.

¹⁷ Ja maca sai Jesupi jaohua'ire seji'i:

“¿Iquere sa'ñe cajè saiyè'ni, ma'aja'a saini? ¿Me yo'ojè oicohua'i pa'iyè'ni?”

¹⁸ Caquèna, jaohua'i aquè Cleofas hue'equèpi sehuopi, ite:

“Si'a yeja Jerusalén daripè iye mu'se yo'ose'e asayè. ¿Jaje pa'iquèta'are cui'ne mè'èse'e iti hue'ña pa'inije asama'è pani sequè?”

¹⁹ Caquèna, ja maca ipi capi, ite:

“¿Me yo'ore'ni?”

Caquèna, iohua'ipi cahuè:

“Jesús Nazaret aquèpi, Maija'quère quèacaiquèpi, si'aye tutu què'ipi cui'ne i cayeje Maija'què ña hue'ñana, nuñerepa caquèpi si'a pai ña hue'ñana caquère pare yo'ose'ere cayè.

²⁰ Jaje pa'ini, quèni huani jeohuè, Maija'què huè'e ñacaicohua'i èjaohua'i maire cuañecohua'i cui'ne si'a èjaohua'i huani jeoñe pa'iji cajèna.

²¹ Yèquè cato jaèpi Israel paire huasoja'què api cajè utecohua'i paè'è. Yure jaje pa'ijèna, si'aye iye co'aye yo'ohuè, coa toaso mu'seña ite yo'ose'e tètosaaji, yure.

²² Jaje yo'ose'e pa'itoje ai jerepa ai cuasaye pa'iji. Yèquè ja're cõni nomiohua'i pa'icohua'ipi nea hue'ñarepa sani ña quèquèhuè, tasi daripè.

²³ Jesús capè peoco pa'ina, jaje ñani jaohua'ipi dani yèquère quèahuè. Huèo cani ñañeje pa'ye huññahua'ire ñajèna, jaohua'ipi Jesús huajèquèpi pa'iji cahuè cajè.

²⁴ Ja jeteyo'je yèquè cajeohua'ije tasi daripère sani ñajèna, jare jaje nomiohua'i case'eje pa'ye pa'ina, tì'ani ñahuè. Jesureta'a ñama'pè paè'è.”

²⁵ Jaje quèaquèna, ja maca Jesupi capi, jaohua'ire:

“Asa tì'ama'cohua'ire pa'ni, mèsaru. Je yèhua asani sehuoja'cohua'i a'ni Maija'quère quèacaicohua'i cajè pa'ise'e.

²⁶ ¿Mèsarupi cuasato Cristo ai yo'oye paja'què paquè si'aye iye ja yè'ta'a i de'o hue'ñarepa saima'è pani?”

²⁷ Jaje se cani ja maca quèa huèopi, si'aye ite yo'o ja'ñere cajè toyase'ere. Moisés toyaquè pa'ise'epi huèoni cui'ne yecohua'i Maija'què quèaquèna, toyasicohua'i toyajè pa'ise'e cõni quèapi.

²⁸ Iohua'i cajè saisi daripèna tì'ani, Jesús ja yè'ta'a i sai hue'ña sasi'i caquè yo'oyeje yo'opi.

²⁹ Jaje yo'oquèna, jaohua'ipi soihuè:

“Yèquè ja're cõni pèajè'è na'iji, coa ñami de'o tējiji.” Asani ja maca Jesús iohua'i ja're cõni cacani pèapi.

³⁰ Pèasiquèpi go ai saihuèna iohua'i ja're cõni ja'rusi maca ipi panpè ñni Maija'quère se pèpani jèyoni jè'yequè jaohua'ire aopi.

³¹ Jaje i yo'o maca ña tìtahuè, ire papi cuasajè. Jaje cuasa maca tsoe peo hue'ña huesèpi.

³² Ja maca iohua'ija'a sa'ñe cahuè:

“Maipi asahuè, mai joñoa ai sihua èaye nëiñe, ma'aja'a dai toyase'ere ipi quèaquèna.”

³³ Jaje ñani ti uteye peoyerepa ma'aja'a dai huèoni daè'è, cui'naohua'ipi Jerusalèna. Tìtajèna, jarote paè'è, once Jesús soicohua'i tsi'sisicohua'ipi iohua'i cajeohua'i ja're cõni.

³⁴ Pa'ijèna, tìtani asajèna, jaohua'ije cahuè:

“Nuñerepa Jesús huëjji'i. Cui'ne jse'ere iñopi, Simónre.”

³⁵ Cajëna, ja maca ïohua'ijë quëahuë, ma'aja'a saijëna, yo'ose'ere. Cui'ne Jesupi panre jë'yequëna, ñani ite ña tütase'ere.

Jesupi Ñañë, Ire Ye'yecohua'ina
(Mt 28.16-20; Mr 16.14-18; Jn 20.19-23)

³⁶ Ja yë'ta'a iti yo'ose'ere cajëna, Jesús ïohua'i jopore pana ñai nëcapi. Ja maca pëpapi, ñeje caquë:

“De'oye pa'ija'cohua'i a'ë, mësarü.”

³⁷ Caquëna, jaohua'ipi ai quëquë huesëhuë, i pa'isi joyore ñañë cuasajë.

³⁸ Jaje cuasajëna, Jesupi jaohua'ire capi:

“¿Me yo'ojë quëquë huesësicohua'i pa'iyeni? ¿Me yo'ojë mësarü joñoa jëa coeyequë hue'eyeni?”

³⁹ Ñajë'ë, yë'ë jëñare cui'ne yë'ë quëore. Jare yë'ë i a'ë, mësarü ñasiquërepa. Patoni cui'ne ñajë'ë. Joyo cato capë cui'ne tara peocoa. Mësarupi yë'ëre ñajëta'a capë tara hue'equë pa'iyë. Yë'ë a'ë, me joyo pa'iyeni.”

⁴⁰ Jaje cani jaohua'ire iñopi, jëña cui'ne quëo ite quëse'ere.

⁴¹ Jaje yo'oquëna, ja yë'ta'a ire papi cuasaye pahuë, ai sihua do'ire, cui'ne quëquë do'ire. Jaje pa'ina, Jesupi jaohua'ire capi:

“¿Ai maña paye, iño?”

⁴² Caquëna, ini isihuë, tsiaya hua'i tsaro sëyosiconi.

⁴³ Isijëna, ini ïohua'ique ñajëna, aji'i.

⁴⁴ Ja jeteyo'je capi, jaohua'ire:

“Ja yo'ose'e cato yë'ë mësarü ja're ja yë'ta'a conï pa'i case'ere yo'ohuë. Si'aye Moisés cuañese'e cui'ne Maija'quëre quëacaicohua'i toyase'e, cui'ne Salmos toyase'e si'aye tï'añë paji'i. Me paquë'ni, nuñerepa case'e. Jaje pa'ina, yo'ohuë.”

⁴⁵ Ja cato quëapi, toyase'e cayere nuñerepa asa tï'ajajë caquë.

⁴⁶ Jaje pa'ina, quëaquë jaohua'ire capi:

“Ñeje toyase'e pa'iji. Cristo ai yo'oquë juni huesëye pa'iji. Jaje ju'isiquëta'a toaso mu'seña pa'i maca cui'naëpi huëija'quë api.

⁴⁷ Jaje pa'ina, Cristo mamire cajë quëaye pa'iji. Si'a hue'ña pa'icohua'ire Jerusalén paire quëa huëoye pa'iji. Huëosicohua'ipi ñeje cajë: Ja'në cuasase'e jeoni ponëjë'ë. Jaje yo'ojëna, mësarü co'aye yo'ose'ere sai de'huacaiye pa'ija'coa.

⁴⁸ Jaje pa'ina, mësarü a'ë, yure iye ñasicohua'irepa.

⁴⁹ Ìna, yë'ëpi, ja'quë ca nëose'e jëjo daoja'quë a'ë, mësaruna. Jaje pa'ina, saima'pë iño Jerusalén daripëre pa'ijë'ë, ma'tëmo jëjo dao tuture utejë'ë, mësarü suña ja'ñere.”

Ma'tëmona Sa Cuañoñë
(Mr 16.19-20)

⁵⁰ Jesupi sai sapi, jai daripë Betaniare pana. Jaronä jëña mëani Maija'quëre sëcacaji'i, jaohua'ire.

⁵¹ De'oye pa'ijë'ë, cani jaohua'ire jeoni ma'tëmona sa cuañoñi.

⁵² Ja jeteyo'je Maija'quëre seni tëjini co'ihuë, Jerusalënna ai sihuajë.

⁵³ Cui'ne si'anë Maija'quëre së huë're pa'ijë Maija'quëre de'oquë api cajë sihuajë paë'ë. De'oji. Ca tëjihüë.

SAN JUAN

De'o Cocapi Paj De'ose'e

¹Ja yê'ta'a yequê co'amaña pa'ima'nê iti coca tsoe paji'i. Iti coca cato Maija'quê ja're paji'i. Iti coca cato Diusupi.

²Du'ru huêo macana Maija'quê ja're çoni paji'i, iti cocapi.

³Ipi Maija'quê ja're çoni co'amaña de'huapi. Peoji, i de'hua ma'ñe, si'aye i de'huase'e a'ê.

⁴Ini paji'i, ti pani huesêye. Ti pani huesêyepi paire miacaiye pa'iji.

⁵Iye miañepi nea hue'ñare pana miacaji'i. Miacaina, neañepi ne yayo tì'añe papi.

⁶Pa'iji, Maija'quê jêjo daoquê Juan hue'equê.

⁷Jaê cato iti miañe ñasiquêpi quêacaiquê paji'i, i cayere care paji cuasani si'a pai asajjê caquê.

⁸Juan cato miañe peopi. Jaê cato coa miañe ñasiquêpi quêacaiquê paji'i.

⁹Nuñerepa si'a paire miacaiyepi iye yejana tìtapi.

¹⁰Ipi Diusu ja're pa'i iye yeja de'huasiquêta'are iye yeja pa'icohua'ipi ire papi cajê asaye pahuê.

¹¹I paire pana daji'i. Daisiquêta'are i paipi ite de'oye sihuajê yo'oye pahuê.

¹²Jaje jai pai pajêta'are de'hue te'ohua'ise'e sihuajê ite nuñerepa Cristo huasoquê api cuasajê asahuê. Jaje ite cuasacohua'ini nuñerepa Maija'quê mamajêrepa pa'iye nepi.

¹³Pai mamajêre pa'iohua'i peoyê. Diusu mamajê cato, Diusupi necaina, i mamajê de'osicohua'i a'ê. Pai ai de'oyepi ai de'oma'cohua'i a'ê. Panita'a coa yêjê yo'oyepi ai de'ose'eje pa'iohua'i peoyê.

¹⁴Cristopi pai de'oni mai ja're çoni paji'i, paire oiquêre papi, cui'ne nuñerepa pa'ipi. Jaje pa'ini i de'oquê pa'yerepa ñahuê, yêquêpi, Maija'quê Mamaquêrepa te'i macapi, ai de'oquêrepa pa'ina.

¹⁵Jaje pa'ina, Juan Cristo do'ire ca'aji'i, ñeje:

“Iquê api, yê'ê mësarute quêasiquê. Jaêni yê'ê quêahuê. Yê'ê jeteyo'je daiji, jerepa pa'i. Yê'ê peo'nê pa'isiquê ca'aji'i.”

¹⁶De'oye pa'iye tì'ahuê, i do'ipi.

¹⁷Cuañese'e cato Moisésja'a Maija'quêpi isise'e a'ê. Cui'neje paire oiye, cui'ne nuñerepa yo'oye cato Jesucristoja'a isise'e a'ê.

¹⁸Te'ijê Diusure ñasiquê peoji. Coa i mamaquê i ja're çoni pa'iquêse'e. Jaêse'e ñapi. Maire quêa ñnopi, i pa'iye aye.

Jesucristo Ayere Juan Cacaie'e

(Mt 3.11-12; Mr 1.7-8; Lc 3.15-17)

¹⁹Jerusalén pa'i judío êjahua'ipi Maija'quê huê'e ñacaicohua'ire cui'ne levitasre jêjo saoreña, Juanre iquei'ni mê'ê cajê seni asaja'cohua'ire.

²⁰Jaje jêjo saorena, sani sejêna, Juanpi tñharepa quêaêña:

“Yê'ê cato Cristo Maija'quê paire huasoquê peoyê.”

²¹Jaje caquêna, seni coreña:

“¿Jaje pa'ito iquei'ni, mê'ê, tsoe huê'ña Maija'quê quêacaiquê pa'isiquê?”

Cajêna, Juanpi caêña:

“Pani.”

Yeque seni coreña:

“Jaje pa'ito ¿Maija'quêre quêacaiquê daija'quê api ca nëosiquê aê, mê'ê?”

Jaje catojê sehuouña:

“Pani.”

²²Ja maca careña:

“¿Iquei'ni, jaje pa'ito? ¿Me yêquêre jêjo daosicohua'ire sani quêaja'cohua'i a'ni? Mê'ê ayere quêajê'ê, yêquêre.”

²³Cajêna, Juanpi caêña:

“Yê'ê cato yê'ose'e cuene yejapi cuiquê a'ê: ‘Nui ma'arepa hui'yoyê'ê, Êjaê daija'a ma'a.’ Maija'quêre quêacaiquê Isaías caquê pa'ise'eje caquê a'ê, yê'ê.”

²⁴Juanre sani casicohua'i cato fariseo paipi jêjo saosicohua'i paê'ê.

²⁵Jaohua'ipi setêna, ite:

“Cristo peoni, cui'ne Elíasje peoni, cui'ne Maija'quê jêjo daosi'i casiquêje peoni, ¿Me yo'ouquê cui'ne oco doquê'ni?”

²⁶Cajêna, Juanpi caêña:

“Yê'ê cato oco doquê aê. Jaje pa'iquêta'are mësaru ja're çoni pa'iji, mësaru ña tì'ama'quêje.”

²⁷ Jaë cato yë'ë jeteyo'je daija'quë api, yë'ëre tëto saisiquëpi. Yë'ë cato do'i peoyë, ì zapato joyecaiyeque.”

²⁸ Iye cato Betábara hue'e hue'ñana yo'ose'e a'ë, Jordán tsiaya ësë mëi te'tena Juan oco do hue'ñana.

Maija'quë Yëi Ñamapi, Jesús

²⁹ Se ñatasi mu'se Jesupi Juan quë'rona tsio daina, ñaquë caëña, Juan:

“Ñajë'ë. Iquë api, Maija'quë Yëi ñama iye yeja pa'icohua'i tayo yo'oye nejocaiquë.

³⁰ Yë'ë jaëni cahuë: ‘Yë'ë jeteyo'je daiji, yë'ëre tëto saisiquë. Jaë cato yë'ë peo maca pa'isiquë api.’

³¹ Yë'ëje huesëhuë. Iquei'ni cuasahuë. Jaje pa'iquëta'are ocopi dohuë, Israel paipi ñajajë caquë.”

³² Caëña, Juan yequeje:

“Yë'ëpi ñahuë, Maija'quë de'o joyopi ma'tëmopi su'teje pa'ipi ña cajeni péaquëna.

³³ Yë'ë cato ja yë'ta'a huesëhuë, iquei'ni cuasaquë. Jaje pa'iquëta'are yë'ëre oco dojë'ë caquë cuañesiquëpi capi: ‘Më'ëpi oco doquë ñaquëna, de'o joyopi cajeni ña péasiquëpi. Jaë api, paire Maija'quë de'o joyopi doquë.’

³⁴ Jaje pa'ina, yë'ë iti ñasiquëpi quëacaiquë pa'iyë, Maija'quë Mamaquëre papi caquë.”

Jesús I Ye'yacohua'ire Du'ru Macarepa Nese'e

³⁵ Se ñatasi mu'se Juan cui'ne ì ye'yacohua'i con paë'ë, ja'rë pa'isi macare.

³⁶ Pa'ijëna, Jesús da saina, ñaquë Juan capi:

“Ñajë'ë. Jaë api, Maija'quë Yëi ñama.”

³⁷ Jaje Juan caquëna, asani ì ye'yacohua'ipi cayaohua'i Jesure tuteña.

³⁸ Jaje tuijëna, Jesupi asani co'ye ñani caëña, jaohua'ire:

“¿Iquere co'eye'ni?”

Caquëna, johua'ipi careña:

“Ye'yaquë, ¿Më'ë Jerona pa'iquë'ni?”

³⁹ Cajëna, Jesupi capi:

“Dani ñajë'ë, yë'ë pa'i hue'ña.”

Caëna, ì pa'i hue'ñana sani ñani ì ja're pëani paë'ë, cuatro pa'i maca t'iasicohua'ipi iti mu'se na'i macaja'a.

⁴⁰ Juan caquëna, asani tuisicohua'ia aquë cato, te'i Andrés paji'i, Simón Pedro yo'jei.

⁴¹ Ja yë'ta'a yeque yo'oma'në du'ru macarepa cato Andrés, maja'yë Simónni sani co'epi. T'iani capi, ìte:

“T'iahuë, yëquë, Mesías maire huasoquë.”

⁴² Jaje quëani Andrés sai saëña, Simónre Jesús quë'rona. Saquëna, ñani Jesupi caëña:

“Më'ë cato Jonás mamaquë Simón'ë. Jaje pa'iquëta'are Cefas hue'equë pa'ijë'ë. Jaje cani Pedro caye a'ë. (Mai coca cani quëna pé caye pa'iji.)”

Jesús Soise'e Felipe Cui'ne Natanaelre

⁴³ Se ñatasi mu'se Jesús Galilea yeja quë'rona sasi'i caquë yo'oquë, Felipepe t'ia'api. T'iani capi:

“Tuijë'ë, yë'ëre.”

⁴⁴ Iquë Felipe cato Betsaida daripë aquë paji'i, Andrés cui'ne Pedro pa'i hue'ña aquë.

⁴⁵ Ñani ja maca Felipe Natanaelre co'ese'e caquë sani t'iani ìte capi:

“Ai tsoe Maija'quëre quëacaicohua'ia cui'ne Moisés toyaquë pa'isiquëni ñahuë, yëquë. Jaë cato Jesupi José mamaquë Nazaret daripëpi aquë api.”

⁴⁶ Caquëna, Natanaelpi capi:

“¿Nazaret daripëpi de'o pai eta t'ia'ne pa'iquë?”

Caquëna, Felipepi capi:

“Dani ñajë'ë, ñi.”

⁴⁷ Natanaelpi Jesús quë'rona tsiojaina, Jesús capi:

“Nuñerepa Israelita macapi daiji, iquë cosoye peoquëpi.”

⁴⁸ Jaje caquëna, Natanaelpi sequëña:

“¿Me yë'ëre ñaquë'ni?”

Caquëna, Jesupi capi:

“Ja yë'ta'a Felipe më'ëre soima'në ñahuë, Higuera soquë yë huë'ehuëre më'ë nëca maca.”

⁴⁹ Ja maca Natanaelpi capi:

“Ye'yaquë, më'ë cato Diusu mamaquë a'ë. Judío pai ëjaëre pa'ë, më'ë.”

⁵⁰ Caquëna, Jesupi sehuopi:

“¿Coa Higuera soquë yë huë'ehuëre pa'i maca ñahuë case'ere nuñerepa Ejaëpi caji caquë asaquë, më'ë yë'ëre? Ai jerepa pa'yere, më'ë ñaja'quë a'ë, jeteyo'je.”

⁵¹ Yequeje Jesupi capi, ite:

“Nuñerepa cayë. Ma'tëmo hui'yosicopi pa'iona, Diusu huiñaohua'ipi mëisicohua'ipi cajesi-cohua'ipi Pai Mamaquëni cajë yo'ojëna, ñaja'cohua'i a'ë.”

2

Caná Daripëna Huejase'e

¹ Toaso mu'seña sa tëto sai maca Caná daripëre hueja fiesta paquëña, Galilea yejare. Jarote Jesús pëca ja'coje pacoña.

² Jesús cui'ne j ye'yacohua'i çoni hueja fiestana soi cuãñoisicohua'ipi pa'ijë sateña.

³ Cuiya'i o'sa carajaisi maca, Jesús pëca ja'copi cao:

“Cuiya'i o'sa yure peoji.”

⁴ Cacona, Jesupi sehuopi:

“¿Nomio me yo'oco jaje yë'ëre caco'ni? Yë'ë yo'o maca ja yë'ta'a t'ü'añe paji.”

⁵ Jaje catoje jopi cao, paire necaicohua'ire:

“I cayeje yo'ojë'ë.”

⁶ Jarote seis quëna yurupëa paji'i, judío pai si'si cuya tojë yo'o yurupëa. Te'e yurupë cato veinte panita'a veinticinco galones doye paji'i.

⁷ Jesupi paire necaicohua'ire capi:

“Iye yurupëana ocure do'e t'ümëjë'ë.”

Caëna, do'e t'ümëreña.

⁸ Do'e t'ümërena, Jesupi capi:

“Yure cato a'ri maña doni fiesta yo'oye ñacaiquëna sacaijë'ë.”

Caëna, jaje yo'oreña.

⁹ Sarena, fiesta yo'oye ñacaiquëpi, ocopi cuiya'i çono de'ose'ere neñapi, huesëquë. Iti ñajë ocopi yurupëana dosicohua'ise'e ja'ë cuasahuë. Jaje neñani fiesta yo'oye ñacaiquëpi huejaquëre soini capi:

¹⁰ “Si'a pai du'ru macarepa cato de'o cuiya'i çonore pare ucucua. Ai ucusi macarepa jeteyo'je a'ri maña de'o cuiya'i çono ocucua. Jaje pa'iquëta'are më'ë cato ai de'o cuiya'i çonore pare de'huahuë.”

¹¹ Jesús Caná daripë Galilea yejana pai yo'o t'ü'a ma'ñere yo'ose'e cato du'ru macarepa yo'o iñose'e paji'i, j de'oquërepa pa'iyere. Jaje yo'ouna, ite ye'yecohua'ire papi cuasahuë.

¹² Iye yo'o tējisi jeteyo'je Capernaum daripëna saji'i, pëca ja'co, yo'je tsj, cui'ne j ye'yacohua'i çoni saijëna. Sani jaron paë'ë, a'ri maña mu'seña.

Jesupi Maija'quë Huë'ere Tsoa Toše'e

(Mt 21.12-13; Mr 11.15-18; Lc 19.45-46)

¹³ Israel pai Egiptopi etajë pa'ise'ere cuasajë judío pai yo'o mu'seña t'ü'a tējiquëna, Jesupi Jerusalënna saji'i.

¹⁴ Sani t'ü'api, Maija'quë huë'ere curiquë neñu'u cajë duruhuequëre isicohua'i, cui'ne yëi ñamare isicohua'i, cui'ne su'tere isicohua'i cui'ne curiquë cambiacohua'i ja'rusicohua'ipi ñu'ijëna, ñani.

¹⁵ Jesupi johua'ire si'seja'core neni yureta'a si'a paire co'amaña isicohua'ire yëi ñamare cui'ne huequëre çoni te'epi curiquë cambiajë ñu'icohua'ini eto saoni johua'i curi topëa jëa ña'ñe saocai, cui'ne mesa saihuëaje jë'je taño saocaji'i.

¹⁶ Su'tere isicohua'ini capi:

“¡Eto saojë'ë, iño pama'pë! ¡Yë'ë Ja'quë huë'ere co'amaña huero huë'e neni yo'oma'pë!”

¹⁷ Ja maca j ye'yacohua'ipi toyase'e cayere cuasa ñajateña, ñeje cayere: “Si'aye yë'ë pa'iyë më'ë huë'ere cuasani ñacai yo'oyë.”

¹⁸ Ja maca judío paipi Jesure sei'ë:

“¿Iquëpi më'ë iñoja'quë a'ni, më'ë cuãñequë pa'iyë iye yo'ouquë?”

¹⁹ Cajëna, Jesupi sehuopi:

“Nejojë'ë, iye huë'ere. Jaje yo'ojëna, yë'ëpi coa toaso mu'señapi nesi'i, cui'naoni.”

²⁰ Caquëna, judío paipi careña:

“Cuarenta y seis ometëcarepa nescicore ¿me më'ëpi coa toaso mu'señapi huë'e nesi'ni?”

²¹ Jaje Jesús cani j capëre capi, huë'ere pare caye papi.

²² Jaje pa'ina, Jesús ju'isiquëpi huëisi maca j ye'yacohua'ipi cuasa ñajateña, j iye case'ere. Cui'ne ja maca toyase'e case'eje nuñerepa care pa'ë cajë asahuë.

Si'ahua'ire Jesús Ñaquë Api

²³ Jesús Jerusalënre pa'i pai yo'o t'ü'a ma'ñere yo'ouquëna, ñani jai pai ite ire papi cajë asahuë, Israel pai Egiptopi etase'ere cuasajë yo'o fiesta pa'i maca yo'ouquëna.

²⁴ Jaje pa'iquëta'are Jesús cato pai cuasayere ñani pai nuñerepa cayë cuasaye papi, si'aye pai cuasaye ñaquë sête.

²⁵ Paipi ìte dani jaje yo'oquë api iquë cajë quëa tì'añe peopi, tsoe ìse'e asapi, pai joyo cuasajë pa'iyë.

3

Jesús Cui'ne Nicodemo

¹ Paji'i, te'i fariseo Nicodemo hue'equë. Jaë cato ëjaërepa paji'i, judío pai aquë.

² Jaje pa'ipi Nicodemo ñani Jesure ñasi'ì caquë, sani capi, ìte:

“Ye'yaquë, asayë, mè'ère Diusupi ye'yaja'quëre jëjo daosiquëpi pa'ì, pai yo'o tì'a ma'ñiere yo'oquë tutu ìñoquë cui'ne si'aye yo'oquëna. Paise'e pa'ini jaje yo'o tì'añe peoji, Diusupi conì yo'oye pato.”

³ Caquëna, Jesupi capi, ìte:

“Nuñerepa mè'ère cayë, pëca ja'coja'a t'ya daise'ejë pa'ye tìjupë t'ya dani cuañoma'quë pani Maija'quë cuañe t'ete ña'ne peoji.”

⁴ Caquëna, Nicodemopi seji'ì, ìte:

“¿Me jaje aipi pëca ja'cona caca conì t'ya dani cuaño'ne pa'iquë'ni? ¿Me jaje yo'oye pa'iquë'ni?”

⁵ Caquëna, Jesupi sehuopi:

“Nuñerepa mè'ère cayë. Cui'naëpi pëca ja'co t'ya daise'ejë pa'ye ocopi cui'ne joyopi t'ya dani cuañoma'quë cato Maija'quë cuañe t'ete cacaye peoji.

⁶ Pëca ja'quëohua'ì paipi parena, t'ya daisicohua'ì cato jare pai pa'iyë. Joyopi t'ya daisicohua'ì cato jare joyo acohua'ì pa'iyë.

⁷ Ai cuasama'ë pa'ijë'ë. Yë'ëpi ñeje cato: ‘Si'a pai huajëye ai de'oye pa'iji.’

⁸ Tutu cato si'a hue'ña daicoa, jo pìsiyese'e asajëna. Jaje pa'iquëta'are huesëyë, jo dai hue'ña cui'ne jo sai hue'ñaje. Si'a joyopi t'ya daisicohua'ì cato, tutujë pa'iohua'ì pa'iyë.”

⁹ Jaje caquëna, Nicodemopi seji'ì:

“¿Me jaje yo'oye pa'iquë'ni?”

¹⁰ Seina, Jesupi sehuopi:

“¿Mè'ë judío paire ye'yaquëre pata'a huesëquë'ni, iye?”

¹¹ Nuñerepa mè'ère cayë, yëquë asayere, cui'ne ìti ñase'ere quëayë. Jaje pa'iquëta'are mësarupi nuñerepa cayë cajë asaye pañë.

¹² Iye yeja ayere quëaquëna, asama'pë pani ai jerepa asaye peoji, yë'ëpi ma'tëmo ayere quëato.

¹³ Pai mañaje ma'tëmo mëni ñama'cohua'ì a'ë. Coa ìti hue'ñapi Pai Mamaquë daisiquëse'e asaji, ma'tëmo aquëse'e.

¹⁴ Moisés añare cuene yejana neni soquë tarapëna t'ëoni huëo nëcoquë pa'ise'ejë cui'ne Pai Mamaquëje huëo nëco cuañoja'quë api.

¹⁵ Si'ahua'ì ìte secohua'ìpi ne huesëma'pë ti pani huesëyere pajajë caquë.

Maija'quë Paire Oise'e

¹⁶ Si'a paire oi do'ire Maija'quëpi ì mamaquë te'ì macani ìsipi, si'a pai ìte, nuñerepa ìre papi, cajë cuasacohua'ìpi ne huesëma'pë, ti pani huesëjajë caquë.

¹⁷ Diusu mamaquëre jëjo daoma'ë paji'ì, paire nejaja'quëni. Jëjo daopi, huasoja'quëni.

¹⁸ Diusu mamaquëre nuñerepa ì api caquë cuasaquëpi nejosiquë peoji. Jaje pa'iquëta'are ìre papi caquë cuasama'quëpi nejosiquë pa'iji, Diusu mamaquëre asama' do'ire.

¹⁹ Ìre papi cajë cuasama'cohua'ì cato nejosicohua'ì a'ë, miañepi iye yejana daisiquëta'a nea hue'ñare miañe jerepa yëhuë, ìohua'ì yo'oyepi co'a do'ire.

²⁰ Si'a pai co'ayere yo'ocohua'ìpi miañere coecohua'ì a'ë, ìohua'ì yo'oyepi tìñarepa ña cuañoma'quëni cajë.

²¹ Jaje pa'iquëta'are de'oyerepa yo'ojë pa'icohua'ìpi tsio daiyë, miañena. Ìohua'ì yo'oye cato Diusupi yëni còcaina, yo'oye a'ë cajë ìñoñu'u cajë.”

Jesús Ayere Juan Ca Cose'e

²² Ja jeteyo'je Jesús ì ye'yacohua'ì ja're conì Judea yejana saji'ì. Jarote tsoe maca ìohua'ì ja're pa'ì oco doquë yo'opi.

²³ Juanje ja mu'seña cato Enón quë'rore oco doquë paji'ì, Salim ja'ye macare, jarote ocoje ai pa'ì do'ire. Si'a pai ì quë'ro daisicohua'ì oco do cuañosicohua'ì pa'ë'ë.

²⁴ Iye cato ja yë'ta'a Juanre tseani coma'në yo'ose'e a'ë.

²⁵ Ja maca Juan ye'yacohua'ì acohua'ìpi judío pai ja're sañope yo'ojë careña, si'si tsoa toñe ayere cajë.

²⁶ Jaohua'ìpi Juanre sani careña:

“Ye'yaquë, asajë'ë, më'ë ja're çoni Jordán tsiaya oco doquë pa'isiquëpi, më'ë yëquëre quëasiquëpi. Yure cato ocore doquëna, jai pa'i ise'ena saiye.”

²⁷ Cajëna, Juanpi capi, jaohua'ire:

“Maija'quëpi isima'quë pa'ito yecohua'ije jaje yo'o tutu paye peoji.

²⁸ Tiñarepa yë'ë quëahuë, mësarute. Cristo peoyë caquë, cui'ne quëahuë yë'ë cato ite ne de'huacaiquë du'ru jëjo daosiquë a'ë.

²⁹ Se ñajë'ë, cui'ne hueja fiesta je'quë huejaja'core paquë api, iti huejaquërepa. Huejaquë cajei cato cocare asaquë, sihuaquë ñu'iquë api. Jaje yë'ëje yure asaquë sihuayë, i ayere cajëna.

³⁰ Jaë cato jero sa'ana jerepa pa'i pa'ija'quë api, yë'ë cato coa jero sa'na do'i peoquë de'oja'quë aë.”

Ma'tëmo Aquëpi Daiye

³¹ Ëmëje'pi daiquë cato si'a paire tëto saisiquë api. Iye yeja aquë cato jare iye yeja aquë api. Jaje pa'ina, yeja cocare caji. Jaje pa'iquëta'are ma'tëmo daiquë api, si'a pa'i jerepa pa'i.

³² Jaje pa'ina, ñase'ere cui'ne asase'ere quëaji. Quëaquëta'are pa'ipi nuñerepa caji cajë asaye pañë, i cayere.

³³ Nuñerepa caji caquë cuasasiquë pani, Maija'quë nuñerepa caquë api cacaji.

³⁴ Jaje pa'ina, Maija'quë jëjo daosiquë cato Maija'quë cocare caji, Maija'quë ëseye peoyerepa i de'o joyore isiquëna.

³⁵ Pëca ja'quë oiji, i mamaquëre. Jaje pa'ina, si'aye i jëñase'ena jëopi, yo'ojaquë caquë.

³⁶ Pa'i Mamaquëre ire papi caquë cuasaquëpi ti pani huesëja'quë api. Jaje pa'iquëta'are asama'ë coequë cato ja pa'iyë peoji. Peoquëpi coa ai jerepa Maija'quë pëi sañëna sa' cuañëja'quë api, co'ayerepa.

4

Samaria Païore Jesús Case'e

¹ Jesupi Juan seña maca ite tuicohua'ire paquëpi cui'ne jai paire oco doquë yo'oji asareña, fariseo pa'i.

² Nuñerepa Jesupi oco doye papi. Coa i ye'yacohua'ipi oco dohuë.

³ Jaje Jesús asani Judea yejapi etapi, Galileana sasi'i caquë.

⁴ Co'i maca Samaria yejaja'a tëto saiye paji'i.

⁵ Pa'ina, daiquëpi Samaria yeja daripë Sicar tütapi, Jacobo mamaquë Josëre yeja isiquë pa'isico quë'rona.

⁶ Jarote Jacobo oco coje paji'i. Ma'aja'a dai jë'josiquë sëte Jesús oco coje yë'quë macana ja'rupi. Mu'se joporepa paji'i, ja maca cato.

⁷⁻⁸ Ye'yacohua'ipi pa'i daripëna aiñe hueroñu'u cajë sa'ë. Satena, ja maca te'i ñu'ina, Samaria nomiopi oco easi'i caco daco'ë. Dacona, Jesupi capi:

“Ocore isijë'ë, yë'ëre.”

⁹ Jaje caquëna, Samaria nomiopi sehuoo:

“¿Më'ë judío pa'ita'a, me yo'oquë yë'ë Samaria nomioni oco hueroquë'ni?”

(Judío pa'i cato Samaria paire tsioma'cohua'i a'ë.)

¹⁰ Ja maca Jesús sehuopi:

“Diusu më'ëre isiye asaco pani, cui'ne më'ëre oco sequëreje jaë api asaco pani, më'ëpi yë'ëre setira'huë. Seona, yë'ëpi pa'i ocore pare isira'huë, më'ëre.”

¹¹ Caquëna, iopi cao:

“Ëjaë, ¿jepi më'ë oco eani isisi'ni, yë'ëre? Iti eayeje peoquë, cui'ne oco coje cato huäicoa. ¿Jero ayere pa'i ocoje yë'ëre isisi'ni?”

¹² Iye oco coje cato yëquë ai Jacob necaisicoa. Jaje icona ije cui'ne i mamajëje cui'ne nëicohua'ije ucujë pa'ahuë'ë. ¿Më'ëpi cuasani i jerepa pa'i a'ë cuasaquë?”

¹³ Cacona, Jesupi sehuopi:

“Si'ahua'i iye oco ucucohua'i cato si'anë oco ëaquëna, pa'iyë.”

¹⁴ Jaje pa'iquëta'are yë'ë isi oco ucusiquë cato cui'naëpi oco huëoye peosipi. Yë'ë oco cato sa'nahuëre papi oco coje tsajëne pa'ye etaquëna pasipi, ti pani huesëye isiyepi.”

¹⁵ Ja maca cao iopi:

“Ëjaë, jaje pa'ito ja ocore isijë'ë, yë'ëre, cui'naopi oco ëaye peoye, cui'ne iye oco coje ea daiye paja'core.”

¹⁶ Cacona, Jesupi capi:

“Më'ë ëjëre soijani ja maca daijë'ë, iñona.”

¹⁷ Caquëna, iopi cao:

“Ëjëre peocoa'ë.”

Cacona, Jesupi sehuopi:

“Ējère peocoa'è cani peore paco cayë, më'ë.

¹⁸Ja'në cato më'ë cinco emëohua'ire pahuë. Yure më'ë paquë cato më'ë ëjë peoji. Peocoa'è cani më'ë care pahuë.”

¹⁹Jare asani jopi caco:

“Ejaë, më'ë cato Maija'quëre quëacaiquë a'ë asayë, më'ëre.

²⁰Yëquë aiohua'i Samaritano pai iye cutihuëna Maija'quëre sejë pa'ahuë'ë. Jaje pa'iquëta'are mësarú judío pai cato huesëjë coa señë. Yëquë judío pai cato asajë señë. Huaso coca cato judío pai tsëcapë aye a'ë.

²¹Cacona, Jesupi sehuopi:

“Care paji cuasajë'ë, nomio. Maija'quëre coa si'a hue'ña pa'ijë señe t'j'api. Ja maca cato ai cutihuëna panita'a Jerusalénna sani señe peosipi.

²²Mësarú Samaria pai cato huesëjë coa señë. Yëquë judío pai cato asajë señë. Huaso coca cato judío pai tsëcapë aye a'ë.

²³Tsoe jti macarepa t'j'api. Yure a'ë, Maija'quëre secohua'irepa joyore papi nuñerepa cuasajë yo'o maca. Jaje yo'oyere ai yëji, ja'quë.

²⁴Diusu cato joyo api. Jaje pa'ina, ite secohua'ijë joyo ayere papi yo'oye pa'iji, nuñerepa yo'oyepi.”

²⁵Caquëna, Nomiopi cao:

“Yë'ë cato asayë, Mesías, maire huasoquë Cristopi dani jaëpi si'aye quëaja'quë api.”

²⁶Cacona, Jesupi capi:

“Yë'ë a'ë, jpi më'ë ja're coca caji.”

²⁷Jesús jaje cocare caquëna, i ye'yacohua'ipi t'j'areña. Nomio ja're Jesús coca caquëna, quëquë ñareña. Jaje ñajëta'a seni asañu'u iquere yë caë'ni, panita'a ique cocare nomio ja're caë'ni cajë señe pahuë.

²⁸Ja maca jo yurupë jti macana ñoni pai daripëna sani cao:

²⁹“Dani ñajë'ë, yë'ë yo'ose'ere si'aye casiquëni. ¿Cristo pa'ima'quë?”

³⁰Ja maca asani, paipi Jesús quë'rona saë'ë.

³¹Ja yë'ta'a pai daima'pëna i ye'yacohua'ipi Jesure cahuë:

“Ye'yaquë, ao aijë'ë.”

³²Cajëna, jpi capi:

“Mësarú ña ma'ñere yë'ë cato payë, yë'ë ai ja'ñe.”

³³Jaje caëna, ja maca i ye'yacohua'ipi sa'ñe johua'ija'a setëña:

“¿Paipi dacatena, ani cama'quë?”

³⁴Cajëna, Jesupi capi:

“Yë'ë ao cato yë'ëre jëjo daosiquë yëyeje yo'oye a'ë. Cui'ne i co'amaña ne saocaiye a'ë.

³⁵Mësarupi cacohua'i a'ë: ‘Ja yë'ta'a cuatro ñañëohua'i carapi, tëaye.’ Jaje cacohua'ita'are yë'ëpi cayë: Ñani cuasajë'ë, tase'ere tsoe querepi, tëa ja'ñe.

³⁶Tëaquëje sai cuañoñe pa'iji, jti ca tëase'e cato ti pani huesëye a'ë, jti taquë cui'ne jti tëaquë si'a yë'quë maca sihuaye pa'iji caquë.

³⁷Nuñerepa caji. Pai case'e je'quë ñeje: ‘Jti taquë cato yequë api cui'ne jti tëaquë cato yequë api.’

³⁸Yë'ëpi mësarute jëjo saohuë, tëajë'ë caquë, mësarú ai yo'ojë tã ma'ñere. Jaje pa'ito yecohua'ipi nerena, mësarú cato coa tëacohua'i a'ë.”

³⁹Jai pai Samaria acohua'i Jesure ire papi cajë cuasahuë, nomio case'ere cuasajë. Jao cato cao, “Yë'ë yo'ose'ere si'aye capi.”

⁴⁰Jare Samaria pai asani Jesure sei'ë, pëajë'ë cajë. Cajëna, asani caya mu'seña pëapi.

⁴¹Ai jerepa ire papi cuasajë asahuë, jpi i ayere quëaquëna.

⁴²Ja maca Nomiore cahuë. Yureta'a ire papi cuasayë, yëquë. Më'ë case'e asasicohua'ipi, cui'ne yure yëquëje asa çoni i caquëna, ja do'ire asayë. Nuñerepa Cristo api, iye yeja huasoquë cajë.

Pai Ējaë Jo'yaë Mamaquëre Jesús Jujuse'e

⁴³Caya mu'seña Samaria pëasiquëpi Galilea yejana saji'i.

⁴⁴Jare jpi Jesús ca'aji'i, Maija'quëre quëacaiquëre i quë'ro acohua'i cato coecohua'i a'ë.

⁴⁵Galilea t'j'asi maca de'oye ite pëpahuë. Jaohua'i cato, Jesús Jerusalénre pa'i de'oye yo'ocquëna, ñasicohua'ipi pëpahuë. Egítopi Israel pai etajë pa'ise'ere cuasajë yo'ojë te'e sani ñasicohua'ipi.

⁴⁶Ja maca Jesús Caná daripëna co'ipi, Galilea yejana, i ocore cuiya'i o'sa çono ne sitona. Jarote paji'i, pai ëjaërepa yo'oye ayere çocaiquëpi. Jaëpi mamaquëre Capernaum yejare ju'iquëre paquëpi.

47 Jaje paquëpi pai ëjaëre pare cöcaiquëpi Jesús, Judea yejapi Galileana daji'i asani, sani Jesure ñapi. Ñaquë seji'i, yë'ë huë'ena sani yë'ë mamaquë juni huesë tëjiquëre jujucaijë'ë, caquë.

48 Ja maca Jesupi capi:

“Mësarü nuñere pa'ë cuasajë asaye pañë, pai yo'o t'i'a ma'ñere yo'o ññoñe pato.”

49 Jaje caquëta'are pai ëjaëre pare cöcaiquëpi capi:

“Ëjaë, esa daijë'ë, yë'ë mamaquë ja ju'ima'në.”

50 Caquëna, Jesupi ja maca capi:

“Co'ijë'ë, më'ë huë'ena. Më'ë mamaquë huajëquëpi pa'iji.”

Caquëna, care paji cuasaquë asani saji'i, i huë'ena.

51 I huë'ena je'nërepa t'i'acquëna, ñani i jo'yapi ite ñañu'u cajë etani ite cahuë:

“Më'ë mamaquë huajëquë pa'iji.”

52 Jaje cajëna, ñipi seji'i:

“¿Ique hora pa'i maca huajëquërepa paquë'ni?”

Caquëna, ñohua'ipi cahuë:

“Ñamina'a mëñerepa sa të'yo maca, una pa'i maca ja maca suña dahuë tëto saji'i.”

53 Jaje cajëna, tsihua'ë pëca ja'quëpi asani cuasa ñajaquëña, jare ja hora pa'i maca Jesús, “më'ë mamaquë huajëquëpi pa'iji” case'ere. Jaje ñani i cui'ne si'a huë'ë pa'icohua'i Jesure nuñerepa i api cajë asareña.

54 Iye yo'ose'e cato cayaye aco paco'ë, pai yo'o t'i'a ma'ñere Jesús yo'ose'e, Judeapi, Galilea co'isi maca.

5

Betsaida Aquëre Jesús Jujuse'e Cu'ima'quëni

1 Ja yo'osi jeteyo'je judío paipi fiestare yo'ohuë. Yo'ojëna, Jesuje co'i copi, Jerusaléna.

2 Ja daripëre yëi ñama hue'yosi eta sa'ro paji'i. Pa'ina, jao yë'quë macare ocore tëhuosi dea pëpi Betesda mami hue'eco paco'ë. Hebreo pai coca cato jaopi cinco huajëjë ñu'i pepëa quë'io paco'ë.

3 Jarote jai pai ju'icohua'i pëasicohua'ipi uë'ë, peo yejare. Si'a ju'i dahuë ju'icohua'i paë'ë: ñama'cohua'i, do'pëcohua'i, cui'ne quë'quësicohua'i. Jaohua'ipi utejë paë'ë, oco da'capi, tu'ejaco cajë.

4 Jarona te'e mañase'e huññaëpi cajeni ocore tu'equëna, ñani du'ru du'isiquëpi ja jeteyo'je co'yaye pa'iji, coa si'a ju'i dahuë hue'equëjë.

5 Jarote paji'i, treinta y ocho ometëca ju'iquë.

6 Jaje pa'ipi, uina, ñani Jesús ite tsoe jaje ai yo'oquë pa'yere asaquë seji'i, ite:

“¿Co'yaye yëquë, më'ë?”

7 Caquëna, ju'iquëpi sehuopi:

“Ëjaë, yë'ëre oco da'cana jëjo dëoni ma oaquëpi peoji. Jaje pa'ina, oco tu'e maca tsoe yequëpi du'iji, ja'a yë'ë dusi'i caquë yo'oquëna.”

8 Caquëna, Jesús capi:

“Huëni më'ë caico macare ñni sai huëojë'ë.”

9 Jaje ca maca tsoe co'yasiquë paji'i. Pa'i i caicore ñni sai huëopi. Jaje pa'iquëta'are ja mu'seña cato huajë mu'se paji'i.

10 Jaje pa'i do'ire judío paipi cahuë, iti juju cuañosiquëre:

“Iye mu'se cato huajë mu'se a'ë. Më'ë caicore hue'eye peoji.”

11 Cajëna, ñipi sehuopi:

“Yë'ëre jujusiquë cato ‘më'ë ui caicore ñni saijë'ë, capi.’”

12 Caquëna, ja maca setëña:

“¿Jequëpi më'ëre ‘më'ë ui caicore ñni saijë'ë’ caë'ni?”

13 Cajëna, huesëña iti jujusiquëre Jesús cato jai pai jopoja'a sani huesëña, ña cuaññoñe peoye.

14 Jaje yo'osiquëpi jeteyo'je Maija'quë huë'ena t'i'ani ite caëña:

“Ina, yure më'ë huajëquë pa'iye sëte, cui'naëpi tayo co'ayere yo'oma'ë. Yo'oquëna, jerepa më'ëre co'aye ne cöco.”

15 Jaje caëna, ja maca sani judío paire quëapi, Jesús paji'i, yë'ëre jujusiquë caquë.

16 Ja do'ire judío pai Jesure huani jëoñu'u cajë cui'ne josa yo'ohuë, huajë mu'sere yo'osi do'ire.

17 Jaje pa'iquëta'are Jesupi capi:

“Yë'ë ja'quë si'anë co'amaña nequë api, cui'ne yë'ëjë co'amaña yo'oyë.”

¹⁸ Jaje casi do'ire jerepa judío paí huani jeoñu'u cajë yo'ohuë. Huajë mu'sere sehuoma'ë yo'osi do'ise'e pa'iyë papi. Jerepa ipi Diusuje pa'i a'ë caquë cui'ne Diusu api, yë'ë ja'quë ca do'ire yo'ohuë.

Maija'quë Mamaquëpi Si'a Tuturepa Paye

¹⁹ Ja maca Jesús capi, jaohua'ire:
 “Nuñerepa mësarute cayë. Diusu mamaquë cato ise'e cuasayepi yo'oye peoji. Pëca ja'quë yo'okuëna, ñase'ere yo'okuë api. Si'aye pëca ja'quë yo'oyere mamaquëje yo'okuë api.

²⁰ Jaje pa'ina, mamaquëre oiji. Pëca ja'quëpi ja do'ire i yo'oye iñoji. Cui'ne iye yo'ose'e jerepa pa'yere iñoja'quë api. Jaje yo'okuëna, mësaru merepa yo'okuë'ni cuasaja'cohua'i a'ë, ña quëquëjë.

²¹ Pëca ja'quë ju'isicohua'ire cui'naohua'ini huajëcohua'ire huëoni pa'iyë isiyeje pa'ye, cui'ne i mamaquëje isiji, pa'iyë, i isiye yëquëna.

²² Ja'quë cato paí yo'oyere ña de'huama'aji'i. Paquë mamaquëna isipi, paí yo'ojëna, ñaquë ne de'huaja'a tutu.

²³ Ja do'ire mamaquëre de'oquëre papi caja'cohua'i a'ë, pëca ja'quëre cayepi. Pëca ja'quë jëjo daosiquëni de'oquëre papi caye pañi pëca ja'quëreje de'oquëre papi caye peoji.

²⁴ Nuñerepa cayë, mësarute. Yë'ë caye de'hue asacani, cui'ne yë'ëre jëjo daosiquëre ire papi caquë cuasasiquëpi ti pani huesëye paji. Nejoñe peoji, ite. Juní huesëyepi ti pa'iyena tëto saisiquë api.

²⁵ Nuñerepa, cayë, mësarute. Títaji, hora. Yure iti maca'ë, ju'isicohua'ipi Diusu mamaquë yë'ore asaja'a maca. I caye asani sehuocaicohua'ipi pa'ija'cohua'i a'ë.

²⁶ Ja'quë cato pa'iyë paji. Jaje paquëpi mamaquëre pa'iyë isipi.

²⁷ Jaje cui'ne paí yo'oye ne de'huaja'a tutuje isipi, Paí Mamaquëre.

²⁸ Iyere asani ai cuasama'pë pa'ijë'ë. Quëare payë. Ju'isicohua'i tásicohua'ipi si'aohua'i i yë'o asaja'a maca tija'co.

²⁹ Asani tasi daripëapi etaja'cohua'i a'ë, si'aohua'i. De'oyerepa yo'osicohua'ipi ti pa'iyena huëija'cohua'i a'ë. Jaje pa'iquëta'are co'ayere yo'ojë pa'isicohua'i cato coa nejoja'cohua'ipi huëija'cohua'i a'ë.

Jesús Cuañequërepa Pa'iyë Quëaye

³⁰ Ja'quëre ja seni asama'ë yë'ëse'e cuasayepi nejoñe peoyë. Yë'ë cato yë'ëre cuañese'ejë caquë a'ë, tayo yo'ocohua'ire. Yë'ë yo'oye cato nuñerepa yo'oye a'ë. Yë'ë yëyeje yo'oye coeyë. Ja'quë yë'ëre jëjo daosiquë yëyepi yo'okuë a'ë.

³¹ Jaje pa'ina, yë'ëpi co'ye yë'ëja'a de'oye yo'oyë caquë pa'ito yë'ë caye care paji cacaiquë peora'pi.

³² Jaje pa'iquëta'are pa'iji, yë'ë yo'oye ñaquëpi yë'ëre de'oye cacaiquë. Jaje pa'ina, yë'ëre i cacaiye cato nuñerepa do'i pa'iji.

³³ Mësarupi Juanre seni asaja'cohua'ire jëjo saoreña. Sejëna, Juanpi nuñerepa sehuopi, jaje pa'ire paquëna.

³⁴ Iye cato cayë mësarupi huaso cuañosicohua'i pa'ijajë caquë yë'ë cato paipi de'oye cacaiyere co'ema'ë pa'iyë.

³⁵ Juan cato toa tsëo pë miañeje miacaiquë paji'i. Jaje pa'ina, mësarupi i miañere sihuacaicohua'i pa'ë'ë, coa nëhui tëcahuë.

³⁶ Juan yë'ëre cacaise'e jerepa de'oye yë'ëja'a co'ye quëaye payë. Yë'ë yo'oye cato ja'quë yë'ëre yo'ojë'ë caquë cuañe nëose'e a'ë. Jaje pa'ina, japi quëaji, yë'ë nuñerepa ja'quë jëjo daosiquë pa'iyë.

³⁷ Ja'quë yë'ëre jëjo daosiquë cato, quëaji, yë'ë nuñerepa de'oye yo'okuë pa'iyere, mësaru i yë'o asama'cohua'i pa'itoje cui'ne ite ñama'cohua'i pa'itoje.

³⁸ I coca itire pa'ë cajë cuasama' do'ire i coca mësarute cacaye paji, pëca ja'quë jëjo daosiquëre coe do'ire.

³⁹ Mësaru cato Maija'quë coca tayoye peoye ye'yeyë, ti pani huesëyere itire ñajë tija'añu'u cajë. Jaje pa'iquëta'a ja toyase'e cato yë'ë ayere caji.

⁴⁰ Jaje yëjëta'a yë'ëna daiye coeyë, ja pa'iyë paja'cohua'ita'a.

⁴¹ Yë'ë cato co'ema'ë pa'iyë, paipi de'oquëre papi cajë yo'oyere.

⁴² Asayë, mësaru nuñerepa Maija'quëre oima'cohua'i pa'iyë.

⁴³ Yë'ë cato ja'quë pa'i huë'ñapi daisiquë a'ë. Jaje pa'iquëta'are mësarupi asaye coeyë. Coa pa'ise'e huëoni co'ye ire pa'ë caquëni cuasacohua'i a'ë, mësaru de'oji cajë.

⁴⁴ ¿Me mësaru asaja'cohua'i a'ni, pa'ija'a sa'ñe de'oquëre papi cajë yo'ocohua'ipi? ¿Me yo'ojë Diusupi mësarute de'oquëre papi cayere co'e ma'ñe'ni?

⁴⁵ Cuasama'pë pa'ijë'ë. Yë'ëpi yë'ë ja'quë ña huë'ñana mësarute do'i quë'iohua'i a'ë, caja'quë api cajë. Mësarute sañope caquë cato Moisésipi mësaru necaiquë api cajë utejë pa'iquë.

⁴⁶ Jaje pa'ina, mēsarupi Moisés case'e care paji cajë asacaicohua'i pani yë'ëreje asacatira'huë, Moisés cato yë'ë ayere toya do'ire.

⁴⁷ Jaje pa'ina, mēsaru Moisés toyase'ere asacaima'cohua'i pani, ¿Me yë'ë caye asacaiye'ni, care paji cajë?"

6

Cinco Mil Ëmëohua'ire Aoñe

(Mt 14.13-21; Mr 6.30-44; Lc 9.10-17)

¹ Ja jeteyo'je Jesús Galilea jairana je te'tena saji'i. Jare iti jairapi Tiberias yequë mami hue'eco paji'i.

² Jaje saina, jai pai tuë'ë, pai yo'o tija ma'ñere yo'oquë, ju'icohua'ire jujuquëna, ñasicohua'ipi.

³ Ja maca Jesús i ye'yecohua'i ja're ai cutihuëna mëni ja'rupi.

⁴ Egíptopi Israel pai etajë pa'ise'ere cuasajë judío pai yo'o maca tija'ne ja'i maca paji'i.

⁵ Pa'ina, ja maca Jesús jai pai ite tuijëna, ñani Felipe capi:

“¿Jerona aqo hueroja'cohua'i a'ni, jai pai ai ja'ñe?"

⁶ Ja cato capi, Felipe neñasi'i caquë, Jesús cato tsoe i ne ja'ñe pa'ina.

⁷ Jaje caquëna, Felipepi sehuopi:

“Docientos romano quëriqui të'ñapi pan hueroto tija'ne paji, te'e panpë te'ireje.”

⁸ Ja maca Andréspi Jesús ye'yaquëpi Simón Pedro yo'jeipi capi:

⁹ “Iñore te'e tsihua'ë cinco pan cui'ne caya tsiaya hua'ire paquë pa'iji. ¿Ja maña pato me jai paire tija'quë'ni?"

¹⁰ Ja maca Jesupi capi:

“Si'a paire cajë'ë, ja'rujajë.”

Ai taya paquëna, taya ëmëje'ena jai pai ja'rureña. Ëmëohua'ise'e cinco mil pai paë'ë.

¹¹ Ja maca Jesús cinco pan ini Diusure de'oji caquë pëpani ja jeteyo'je i ye'yacohua'ina isipi. Isina, i ye'yacohua'ipi paire se aohuë. Jare cui'ne tsiaya hua'ireje yo'opi. Si'aye iohua'i yëye necaji'i.

¹² Tsoe ani huajësicohua'i pa'ijëna, Jesupi capi, i ye'yacohua'ire:

“Ani jujase'e tsi'sojë'ë, coa nejoñe peoja'quë.”

¹³ Caëna, tsi'sohuë, ani jujase'e. Tsi'sojë doce do'rohuëa timëhuë, cinco pan pa'ise'epi jaiye nese'ere.

¹⁴ Ja maca Jesús yo'ose'ere ñani, paipi cahuë:

“Iquë nuñerepa Maija'quëre quëacaiquë api, iye yejana daija'quë api ca neosiquë.”

¹⁵ Jaje pa'iquëta'are Jesús asapi, iohua'i yëyepi coetoje ëjaëre pare neñu'u cuasaye. Jaje pa'ina, jaohua'ire jeoni ai cutihuëna saji'i, te'i.

Jesús Ëmëjeja'a Cu'ise'e

(Mt 14.22-27; Mr 6.45-52)

¹⁶ Ñami de'osi maca Jesús ye'yacohua'ipi jairana cajehuë.

¹⁷ Cajeni yohuëna aya mëni Capernaum yejana je'e huëohuë. Ja maca cato tsoe ai neapi, cui'ne Jesuje ja co'ima'ë paji'i.

¹⁸ Ja maca ai tutuquë cui'ne ai to'a huëopi.

¹⁹ Cinco kilómetros panita'a seis kilómetros pa'i macare pa'ijë ñahuë, Jesupi yohuë quë'rona daina, oco da'ca ëmëje'aja'a. Jaje ñani ai ca'rahuë.

²⁰ Jaje ca'rajëna, ipi capi, jaohua'ire:

“Yë'ë a'ë. Ca'rama'pë pa'ijë'ë!”

²¹ Ja maca sihuajë yohuëna daijë'ë cajë yo'oye iñohuë. Cui'ne ja maca aya mëquëna, i ja're coní esarepa iohua'i cajë saisi yejana tija'ahuë.

Paipi Jesure Co'eye

²² Se ñatasi mu'se jaira je te'tena pëasicohua'ipi cuasa tija'ahuë. Te'e yohuë pa'isicoja'a i ye'yacohua'ipi saë'ë. Saijëna, Jesuse'e iohua'i ja're saie papi cajë.

²³ Jaje cuasajë pa'ijëna, Tiberias daripëpi jaiye yohuëa daji'i, iohua'ire pan Ëjaëpi neni aqo sito quëno macana.

²⁴ Jaje Jesús cui'ne i ye'yacohua'ipi peojëna, ñani yohuëana aya mëni Capernaum yejana saë'ë, Jesure co'eñu'u cajë.

Jesu Api Pa'yere Isi Pan

²⁵ Jaira je te'tena tija'ani Jesure setëña:

“¿Ye'yaquë je yëhua tijaë'ni, iño?"

²⁶ Cajëna, Jesupi capi:

“Nuñerepa mésarute cayë. Mésaru cato yë'ère co'eyë, coa panre òimëñerepa ãni ñani. Co'ema'pë pa'iyë, pai yo'o t'i'a ma'ñere ñasi do'ire asa t'i'añe.

²⁷ Coa carajai ãore cajë ai yo'oma'pë pa'ijë'ë. Ai jerepa ti pani huesë ãore pare cajë yo'ojë'ë, quëcoyere pare. Iyere Maija'quë mamaquë cato isija'quë api, mésarute. Ja'quë Diusupi yë'ëna ja tuture isipi.”

²⁸ Jaje caquëna, johua'ipi se'i'ë:

“¿Me yo'ojá'cohua'i a'ni, yëquë Diusu yëyere necañu'u cani?”

²⁹ Cajëna, Jesupi sehuopi:

“Diusu yëye cato j jëjo daosiquëni care paji cajë cuasacaiye a'ë.”

³⁰ Jaje caquëna, johua'ipi se'i'ë:

“¿Iquere më'ë yo'o ññoja'quë a'ni, pai yo'o t'i'a ma'ñe yëquëre më'ère care paji cuasajë asaja'cohua'ire?”

³¹ Tsoe acohua'i a'ahuë'ë, manare cuëne yeja pa'i maca. Jare toyase'e cato: ‘Diusupi ma'tëmo panre ãopi,’ caji.”

³² Cajëna, Jesupi sehuopi:

“Nuñerepa cayë, mésarute. Moisésipi ma'tëmo panre ãoñe papi, yë'ë ja'quë api, nuñerepa ma'tëmo panrepa ãoquë.

³³ Diusu isi panrepa cato, ma'tëmopi paire ti pani huesëye isiquë daisiquë api.”

³⁴ Ja maca johua'ipi cahué:

“Ja panse'e yëquëre isijë'ë, Èjaë.”

³⁵ Cajëna, Jesupi capi:

“Yë'ë a'ë, pan pa'iyë isiquë. Yë'ëna daisiquë cato ai ëaye peosipi. Cui'ne yë'ère ire papi caquë cuasasiquë cato oco ëaye peosipi.

³⁶ Yë'ë mésarute case'ejë pa'ye yë'ère mésarupi ñajëta'a ire papi cajë cuasaye pañë.

³⁷ Ja'quë yë'ëna, isicohua'i cato si'ahua'i yë'ëna daiyë. Yë'ëna daisicohua'ire cato eto saoye paja'quë a'ë.

³⁸ Yë'ë cato ma'tëmopi yë'ë yëyeje yo'osi'i caquë daiyë pahuë. Yë'ère jëjo daosiquë yëyere yo'osi'i caquë daisiquë a'ë.

³⁹ Yë'ë ja'quë yë'ère jëjo daosiquë cato j yë'ère isicohua'ini te'ire ne huesocaiye peoye de'oye yë'ëpi ñacaiyere yëji. Cui'ne yë'ëpi tëji mu'serepa ju'isicohua'ini huëocaiyere yëji.

⁴⁰ Yë'ë ja'quë cato si'ahua'i Maija'quë mamaquëre ñani ire papi cajë cuasasicohua'ipi ti pani huesëyere yëji. Yë'ëna, yë'ëpi tëji mu'serepa ju'isicohua'ini huëosi'i.”

⁴¹ Ja maca “yë'ë a'ë, ma'tëmopi cajesi pan” casi do'ire judío paipi ite cue'cue huëohué.

⁴² Cue'cuejë cahué:

“¿Iquë Jesús pa'ima'quë José mamaquë maipi j pëca ja'quëre cui'ne pëca ja'core ñacohua'i pa'i ma'ñe? ¿Jaje pa'ita'a me yo'oque ma'tëmopi daisiquë a'ë, caquë'ni?”

⁴³ Jaje cajëna, Jesupi capi:

“Cue'cueyere jeojë'ë.

⁴⁴ Yë'ëna te'ohua'i dani t'i'añe peoji, yë'ère jëjo daosiquëpi ja'quëpi ite dama'quë pa'ito. Jaëni yë'ëpi tëji mu'serepa huëoja'quë a'ë.

⁴⁵ Maija'quëre quëacaicohua'i toyajë pa'ise'epi caji ñeje: ‘Diusupi ye'yaja'quë api, si'a paire.’ Jaje pa'ina, si'ahua'i ja'quëre asacohua'ipi cui'ne ite ye'yecohua'ipi daiyë, yë'ëna.

⁴⁶ Ja'quëre pajie ñama'cohua'i a'ë. Diusu quë'ropi daisiquëse'e ite ñaquë api.

⁴⁷ Nuñerepa cayë. Yë'ère care paji caquë cuasaquëpi ju'ima'ë ti pa'iyë paji.

⁴⁸ Yë'ë a'ë, pan pa'iyë isiquë.

⁴⁹ Mésaru aipë Maija'quë ãoñere a'ahuë'ë, pan cuëne yeja cu'i maca. Jaje aísicohua'ita'a peo hue'ña juju sa'ahuë'ë.

⁵⁰ Jaje pa'iquëta'are yë'ë cato ma'tëmo cajesiquë panre cayë. Jare paipi aísicohua'i pani ti ju'íñe peoji.

⁵¹ Yë'ë a'ë, ja pan ma'tëmopi huajëquë cajesiquë. Ja panre paipi aísicohua'i pani ti pani huesëye pa'iji. Yë'ë isija'a pan cato, yë'ë capë a'ë. Iye yeja pa'icohua'i pa'iyere caquë isija'quë a'ë.”

⁵² Ja maca jare asani judío paipi sa'ñe coca cahué, ñeje cajë:

“¿Me iquë maire j capë aosi'quë caquë'ni?”

⁵³ Cajëna, Jesupi capi:

“Nuñerepa cayë, mésarute. Mésarupi Pai Mamaquë capëre aima'cohua'i pani cui'ne j tsiere ucuma'cohua'i pani ti pani huesëye peocohua'i pa'iyë.

⁵⁴ Yë'ë capë aísiquëpi cui'ne yë'ë tsie ucusiquëpi ti pa'iyë paji. Jaje pa'ini yë'ëpi tëji mu'serepa ju'isiquëni huëoja'quë a'ë.

⁵⁵ Jaje pa'ina, yë'ë capë cato nuñerepa ãore pa'ë, cui'ne yë'ë tsie cato nuñerepa ucuyere pa'ë.

⁵⁶ Yé'è capé aísiquépi cui'ne yé'è tsie ucusiquépi yé'è ja're coní tsoni pa'iji. Pa'ina, yé'èpi j ja're coní pa'iyé.

⁵⁷ Yé'ère jéjo daosiqué ja'qué cato pa'iyé paji, yé'è ini pacacaiyè. Jaje cui'ne, yé'ère aiquéje yé'è do'ire pasipi.

⁵⁸ Ma'témopi cajesí pan ayere cayé. Iye cato ai tsoe Maija'qué Israel paire aose'eje pa'ye peoji. Ja pan aísicohua'i sí'a paí juju sa'ahué'è. Jaje pa'iquéta'are iye pan aísiqué cato ti paní hueséye pa'iji."

⁵⁹ Iye cato Jesús ye'yapi, Capernaum daripé paí tsi'si hué'ena.

Pa'i Cocarepa

⁶⁰ Iye ye'yayeré asaní Jesure jai paí tuicohua'i acohua'ipi cahué:

"Iye j caye jaje pa'lijé'è cajé asa tí'añe peoji. Ai jerepa jéjái. Jaje pa'ito nepi, asa tí'añe pa'iqué'ni?"

⁶¹ Ja maca Jesús asapi, iohua'i sañope caye. Jaje pa'ina, seji'i, jahua'ire:

⁶² ¿Yé'è case'epi mésarute sañope caqué?

⁶³ ¿Me yo'o'ñe pa'iohua'i a'ni, Paí Mamaquépi j ja'né pa'í sitona mëina, ñani?

⁶³ Joyopi pa'iyé isiji, capé cato coçaima'coa. Yé'è mésarute case'e cato nuñerepa joyo aye a'é, ti pa'iyé isiye a'é.

⁶⁴ Jaje pa'iquéta'are mésarú acohua'i yecohua'i ja yé'ta'a nuñere pa'é cajé asa tí'tama'cohua'ipi pa'iyé."

Jesús cato asapi, du'ru huéo macana iti cuasama'cohua'ire, cui'ne ite coso yehuoja'quère.

⁶⁵ Jaje pa'ina, capi:

"Mésarute cahué. Ja'quépi yé'èna dacaima'qué pa'ito yé'è què'ro te'ije dani tí'añe peoji."

⁶⁶ Jaje casi macapi jai paí Jesús ja're cu'icohua'i jeoni j ja're coní cu'iyé pahué.

⁶⁷ Ja maca Jesupi seji'i, j doce ye'yacohua'ire:

"¿Mésarujé jeoni saiye yéye?"

⁶⁸ Caquéna, Simón Pedropi sehuopi:

"¿Éjaé, neina yéqué saija'cohua'i a'ni? Mè'è coca cato ti paní huesé coca'è.

⁶⁹ Yéqué cato mé'ère care paji cajé cuasahué. Cui'ne asayé, mé'è cato Cristo api, Maija'qué huajéquèrepa Mamaquère papi."

⁷⁰ Caquéna, Jesupi sehuopi:

"Yé'èpi mésarú doce pa'iohua'ire soihué. Jaje pa'iquéta'are mésarú aqué te'i huati api."

⁷¹ Jaje caní Jesús Judas Iscarioteni capi, Simón mamaquéni, doce soisicohua'i aquéni, Judaspi ite coso yehuoja'quéni capi.

7

Jesús Yo'je Tsj Asacaiye Pahué.

¹ Iye casi jeteyo'je Jesús Galilea yejare cunirojaji'i, Judea yeja pa'iyé coepi, judío paipi ini huani jeoñu'u cajé yo'o do'ire.

² Jaje pa'iquéta'are judío paí Egítopi etani a'ri hué'ña nejé pa'isi mu'sere cuasajé yo'o mu'seña tí'a huéopi.

³ Tí'a huéoquéna, Jesús yo'je tsipi cahué, ite:

"Íño péama'è yure Judeana saijé'è, mé'ère tuicohua'ije mé'è yo'oye ñaja'cohua'ire.

⁴ Jaje pa'ina, sí'a paí ñajajé caní yahue yo'ocoje ñani, mé'è yo'oyeje paí yo'o tí'a ma'ñere yo'ocohua'i. Paí yo'o tí'a ma'ñe yo'oqué sète sí'a paí ñajéna, yo'o iñojé'è."

⁵ I yo'je tsj cato a'ri mañaje care paji cuasajé asama'cohua'ipi cahué.

⁶ Ja maca Jesupi capi:

"Ja yé'ta'a yé'è yo'o maca tí'añe papi. Mésarute cato coa sí'aé yo'oye de'oji.

⁷ Mésarute cato iye yeja acohua'i coeye peoji. Jaje pa'iquéta'are yé'ère cato coeyé. Yé'èpi tíñarepa iohua'i yo'oye co'aye a'é caqué iño do'ire.

⁸ Saijé'è, mésaruse'le fiestana. Yé'è cato saiye pañé. Ja yé'ta'a yé'è sai maca tí'añe paí."

⁹ Jaje ca téjini Galileana péapi.

Jesupi A'ri Hué'ña Fiestare Pa'ise'e

¹⁰ Paí tíñarepa ñañe peoye yahue Jesuje saji'i, fiestana, j yo'je tsj saisi jeteyo'je.

¹¹ Fiesta pa'í maca judío paipi co'ejé cahué:

"¿Jerore pare pa'iqué'ni, jaé?"

¹² Jai paí tsi'si sitopi Jesús ayere cahué. Yecohua'ipi cahué: "De'o paí api." Cajéna, yecohua'ipi cahué: "Co'aque api. Coa paire cosoquéna, asaqué api."

¹³ Jaje pa'iquéta'are tíñarepa caye pahué, judío paini ca'ra do'ire yahue carojáé'è.

¹⁴ Fiesta joporepa pa'í maca Jesupi Maija'qué hué'ena cacani ye'ya huéopi.

¹⁵ Ye'yaquéna, judío paipi ai ñajé cuasajé cahué:

“¿Merepa iquë jaiye ta'ñe ye'yaquë'ni, toya ja'o ye'yema'quëta'a?”

¹⁶ Cajëna, Jesupi sehuopi:

“Yë'ë ye'yaye cato yë'ë tse peoji. Ja cato yë'ëre jëjo daosiquë tse a'ë.

¹⁷ Mësaruru aquëpi Maija'quë yëyere yo'oquë pani yë'ë ye'yaye Diusu ye'yaye a'ë caquë asaja'quë api. Panita'a coa ise'e cuasayere ye'yaji caquë asaja'quë api.

¹⁸ Ise'e cuasayepi caquë cato paipi de'oquë api cajajë caquë caquë api. Jaje pa'iquëta'are ite jëjo daosiquëni paipi de'oquë api cacajajë caquë yo'oquëpi nuñerepa caji. Jaje pa'ina, ti cosoma'quëpi caji.

¹⁹ Mësarute Moiséspi cuañese'e isipi. Isiquëta'are mësarupi sehuocaiye pañë, ja cuañese'e. ¿Me yo'ojë yë'ëre huani jeoñe yëye'ni?”

²⁰ Caquëna, paipi sehuohuë:

“Huati joyore hue'lequë, më'ë. Jaje cayë, më'ë, ¿nepi më'ëre huani jeoñe yëye'ni?”

²¹ Cajëna, Jesupi sehuopi:

“Huajë mu'se pa'ina, te'ore yo'ose'ere ñani mësaruru ai cuasayë.

²² Mësaruru aipë tsoe du'uru yo'oyere Moisés cato cuañepi cuiri ca'ni tëaye paji'i caquë. Ipi huëoye paipi, ja cato. Jaje pa'ina, mësaruru huajë mu'se pa'itoje cuiri ca'ni tëacohua'i a'ë, tsire.

²³ Najë'ë. Yure, mësaruru Moisés cuañese'e yo'o tija'ñu'u cajë huajë mu'se pa'itoje tsire cuiri ca'ni tëacohua'ita'a, ¿me yo'ojë mësaruru yë'ëre pëñe'ni, ju'iquë macare huajë mu'se pa'ina, jujucasi do'ire cajë?”

²⁴ Co'aye yo'oyeje pa'ye ña cuañone co'aji cama'pë pa'ijë'ë. Co'aye yo'oji cacohua'i pani nuñerepa co'ayerë ñani cajë'ë.”

Jesús I Dai Sitore Quëaye

²⁵ Ja maca Jersalén pa'icohua'i acohua'ipi sa'ñe se huëoreña:

“¿Jajë pa'ini, pa huani jeoñu'u cajë co'ejëna, mai ñasicohua'ita'a?”

²⁶ Yure ipi si'aohua'i ñajëna, caquëta'are te'ije ite sañope caye paji. ¿Ejaohua'ipi johua'ita'a nuñerepa Cristore paipi caji cajë cuasa do'ire sañope caye pañë?”

²⁷ Jaje pa'iquëta'are mai cato asayë, i huëo sito.”

²⁸ Iyere Jesús asani, Maija'quë huë'e ye'yaquëpi ai tutu, capi, ñeje:

“Jaje pa'ito mësaruru asayë, yë'ë dai sito cui'ne yë'ëreje ñacohua'i a'ë. Yë'ë cato nuñerepa pa'ipi jëjo daosiquë a'ë, mësaruru ñama'quëpi.

²⁹ Yë'ë cato ite ñaquë a'ë, i quë'ropi daisiquë sëte. Ipi yë'ëre jëjo daopi.”

³⁰ Ja maca ite tseañu'u cajë yo'ojëta'a te'ije ite tome dani tseañe pahuë, ja yë'ta'a ite tseña maca tija'ñe pasi do'ire.

³¹ Jai paipi Jesure ire paipi cuasajë asahuë. Jaje pa'ina, cahuë:

“Cristopi daisiquë pani, iquë yo'ose'e seña maca paipi yo'o tija' ma'ñere yo'oye iñoñe peoji, cuasayë.”

Jesure Tseajë'ë Cajë Fariseo Paipi Soldado Paipi Jëjo Saose'e

³² Fariseo paipi asahuë, Jesús ayere paipi cajëna. Jaje asani jaohua'i cui'ne Maija'quë huë'e ñacacohua'i ejaohua'i coní co'aye yo'ocohua'ire tsesecohua'ire jëjo daohuë, tseani Jesure sajjajë cajë.

³³ Ja maca Jesupi capi, ite tseña dasicohua'ire:

“Yures'e mësaruru ja're coní a'ri maña pasi'i. Ja jeteyo'je yë'ëre jëjo daosiquë quë'rona co'isi'i.

³⁴ Mësaruru yë'ëre co'ejëta'a tija'ñe paja'cohua'i a'ë, yë'ë sai sito sani tija'ñe peo do'ire.”

³⁵ Ja maca judío paipi johua'ija'a sa'ñe seteña, ñeje cajë:

“¿Jeroni sani huesësi'quë caquë'ni, iquë, mai tija'ñe peo hue'ñarepa? ¿Judío paipi griego paina co'me huesëni pa'icohua'ina sani griego paini ye'yaja'quëpi caquë?”

³⁶ ¿Me caquë yë'ëre co'ejëta'a tija'ñe paja'cohua'i a'ë, co'ejëta'a tija'ñe paja'cohua'i a'ë, yë'ë pa'i hue'ña sani tija'ñe peo do'ire caë'ni, maire?”

Pa'iyë Isi Ocorepa

³⁷ Fiesta tëji mu'serepa cato ai ëja mu'serepa pa'iji. Pa'i maca Jesupi huëni nëceni ai tutu capi, ñeje:

“Oco ëa ju'iquë pani daijë'ë, yë'ëna. Dani ucujë'ë.

³⁸ Toya pëpë cayeje yë'ëre sehuoquëre cato joyopi pa'i ocorepa etaquëna, pasipi, tsiayaje pa'i.”

³⁹ Jaje cani Jesús capi, ite ire paipi cajë cuasacohua'ipi Maija'quë de'o joyore tija'ja'cohua'i a'ë caquë. Ja maca cato ja yë'ta'a Maija'quë de'o joyo daiye paipi, Jesupi ja yë'ta'a ma'tëmona co'ima'ëna.

Te'e Cuasayë Pa'icohua'i

⁴⁰ Paipi jopo pa'icohua'ipi jaje cayere asani careña:

“Iquë cato nuñerepa Maija'quëre quëacaiquë api. Iti daija'quë api casiquë api.”

⁴¹ Cajëna, yecohua'ipi careña:

“Iquë cato Cristo apl.”

Jaje cajëta'are yecohua'ipi cahuë:

“¿Me Cristo pa'iquë'ni, Galilea yeja aquë?”

⁴² Toyase'e cato caji, Cristo cato pai ëjaërepa David tsëcapë aquë pa'ija'quë api. Belén daripë aquë pa'ija'quë api. David pa'isi daripë aquë pasipi.”

⁴³ Jaje pa'ina, Jesús do'ire yo'ojë cajë paipi huahue sahuë, yequë tsëca de'ojë.

⁴⁴ Yecohua'ipi tseani sañu'u cajëta'a tseñe pahüë.

Pai Ëjaohua'i Jesure Sehuocaiye Pase'e

⁴⁵ Jesure tsëseohua'ipi co'ihuë, Maija'quë huë'e ñacaicohua'i quë'rona, cui'ne fariseo pai cui'ne Maija'quë huë'e ñacaicohua'i ëjaohua'i quë'rona. Co'irena, jaohua'ipi se'ië:

“¿Me yo'ojë tseani daye pare'ni?”

⁴⁶ Cajëna, paire tsësecohua'ipi sehuojë cahuë:

“¿Ai de'oyererepa yecohua'ije jaë cayeje cacohua'i ti peoyë!”

⁴⁷ Ja maca fariseo paipi cahuë:

“¿Mësarujë i cosoyere sehuore?”

⁴⁸ Yëquë ëjaohua'ije i caye asaye pahüë. Cui'ne fariseo ëjaohua'ije ite asacaiye pahüë.

⁴⁹ Jaje pa'iquëta'are cuañese'e caye asama'cohua'ipi co'acohua'ipi sehuocaiyë, ne huesëja'cohua'ipi.”

⁵⁰ Nicodemo fariseo aquëpi ñami sani Jesure ñasiquëpi capi, jaohua'ire:

⁵¹ “Mai cuañese'eje pa'ye yo'oni, jaëte huani jeoñe peoji, ja yë'ta'a i yo'ose'ere asama'pë pani.”

⁵² Jaje caquëna, ja maca sehuoreña:

“¿Më'ëje Galilea aquë aë? De'hua toyase'ere ye'yejë'ë, Jare më'ë ye'yenita'a Galileapi, Maija'quëre quëacaiquë te'ije daiye pase'e, asaye pa'iji.”

⁵³ Ja maca pai ñape jöhua'i huë'ñase'ena sani sahuë.

8

Ëmë Yo'oco Ayere Quë'aye

¹ Jesupi Olivos cutihuëna saji'i.

² Ñatasi mu'se nea huë'ña Maija'quë huë'ena co'ipi. Si'a pai i quë'rona tsio daë'ë. Datena, ja'runi ñu'i ye'ya huëopi.

³ Ja maca cuañese'e ye'yacohua'ipi cui'ne fariseo paipi ëmëre yo'ocona, ti'asiconi dahuë. Dani iti maca pa'icohua'i jopona nëconi.

⁴ Jesure cahuë:

“Ye'yaquë, iye nomiore yëquë dahuë, ëmëre yo'ocona, ti'asiconi.

⁵ Moisés cuañese'epi maire cuañëji ñeje yo'o nomiohua'ire quëna pëapi jea jo'a huëajë'ë, caquë. ¿Jaje pa'ito më'ë me caquë'ni?”

⁶ Iye cato cahuë, neñañu'u cajë. Ca tayouna, sañope cayere cajë cahuë. Ja maca Jesús meñe në meni moñopi yejana toyapi.

⁷ Jaje yo'oquëna, jaohua'i cato ja yë'ta'a sejë nëcahuë. Ja maca yureta'a nuñerepa nëcaquë capi, jaohua'ire:

“Mësarujë aquëpi ti tayo co'aye yo'oma'quëpi quëna pë ini jona jeo huëojaquë.”

⁸ Jaje cani cui'naëpi në me coni yejana toyapi.

⁹ Jare asani, ai cuasajë te'o hua'ise'e etajë saë'ë. Aiohua'ipi eta huëoni si'a pai etahuë. Si'a pai sani saisi maca Jesuse'e pëapi, nomio ja're cono.

¹⁰ Ja maca Jesús nuñe nëceni pajie peojëna, ñani nomiose'e pa'iona, capi:

“¿Nomio jerore pa'iyen'i, më'ëre sañope casicohua'i? ¿Te'ije më'ëre nejoñe päë?”

¹¹ Caquëna, jopi cao:

“Pahuë, sañope yo'oye, Ëjaë.”

Cacona, ja maca Jesupi capi:

“Yë'ëje më'ëre sañope caye pañë. Yurepi sani cui'naopi co'aye yo'o coñe pajë'ë.”

Jesu Api, Paire Miacaiye

¹² Tijupë Jesús paire caquë capi:

“Yë'ë a'ë, iye yeja miacaiquë. Yë'ëre pe'tequë cato miañere pasipi, pa'iyë isiyere. Jaje pa'i nea huë'ñare cui'ye pasipi.”

¹³ Caquëna, ja maca fariseo paipi cahuë:

“Më'ëja'a co'ye de'oque a'ë caquë quëayë, më'ë. Jaje quëaye cato co'aji.”

¹⁴ Cajëna, Jesupi capi:

“Yè'è què'aye cato do'i què'ye a'è, yè'èpi yè'èja'a co'ye caquè quèatoje. Yè'è cato asayè, yè'è dai sito cui'ne yè'è saija'to. Jaje pa'iquèta'are mèsaru cato huesèyè, yè'è dai sito cui'ne yè'è saija'to.

¹⁵ Mèsaru cato iye yeja pa'i co'aji cayepi cacohua'i a'è. Yè'è cato te'ireje co'aji, cama'què a'è.

¹⁶ Jaje pa'iquèta'are yè'èpi co'aji cani yè'èse'e caye pañè. Yè'è ja'què yè'ère jèjo daosiquèpi yè'è ja're còni caquèna, cayè. Yè'è caye cato nuñere pa'è.

¹⁷ Mèsaru cuañese'e cato caji cayahua'i cui'ne te'ejè pa'ye cato asaye pa'iji, care payè cajè.

¹⁸ Jaje pa'iyè sète yè'èja'a co'ye quèacaiquè pa'iyè. Yè'è ja'què yè'ère jèjo daosiquèje yè'ère quèacaiquè api.”

¹⁹ Caquèna, ja maca seteña:

“¿Jerore pa'iquè'ni, mè'è ja'què?”

Cajèna, Jesupi sehuopi:

“Mèsaru yè'ère ña tì'añe pañè. Pajè cui'ne ja'quèreje ña tì'añe pañè. Yè'ère ña tì'acohua'i pani, ja'quèreje ña tì'añe patira'pi.”

²⁰ Iye cato Jesús capi, ja yè'ta'a Maija'què huè'ere pa'i ye'ya maca. Maija'quèna curi ìsi mahuèa què'ropi nècaquè case'e a'è. Jaje catoje ìte tseañe pahuè, ja yè'ta'a ìte tseña maca tì'añe pase'e sète.

Yè'è Sai Hue'ña Mèsaru Sani Tì'añe Peoji, Case'e

²¹ Cui'naèpi Jesús ca còpi:

“Yè'è saiyè. Saquèna, mèsaru co'èja'cohua'i a'è. Jaje co'ejèta'a jare mèsaru tayo co'aye yo'oyena ju'ija'cohua'i a'è. Jaje pa'ina, yè'è sai hue'ña, mèsaru saiyè paja'cohua'i a'è.”

²² Ja maca judío paipi cahuè:

“¿Co'ye huani jusi'què caquè. Jaje yo'ouna, ì què'ro tì'añe paja'cohua'i a'ni?”

²³ Cajèna, ja maca Jesupi capi, jaohua'ire:

“Mèsaru cato ño huè'ehuè acohua'i a'è. Yè'è cato jeto èmè aquè a'è. Mèsaru cato iye yeja acohua'i a'è. Yè'è cato iye yeja aquè peoyè.”

²⁴ Jaje pa'ina, cahuè, mèsaru tayo co'aye yo'oyena ju'ija'cohua'i a'è, yè'èni ìre papi cajè cuasama'cohua'i pani. Jaje mèsaru tayoyena ju'ija'cohua'i a'è.”

²⁵ Ja maca seteña:

“¿Iquè'ni, mè'è?”

Cajèna, Jesupi sehuopi:

“Tsoe mèsarute ja'a huèo maca cahuè.

²⁶ Jaiye mèsaru tayoyere caye pa'iquèta'are pañè. Yè'ère jèjo daosiquèpi nuñerepa caji, ti tayoye peoyerepa. Jaje pa'ina, yè'è iye yeja paire caye cato ì caquèna, asase'ere cayè.”

²⁷ Jaje caquèna, jaohua'ipi, Maija'què ayere caji cajè asaye pahuè.

²⁸ Jaje pa'i do'ire capi:

“Mèsarupi yè'ère èmèje'na huèo nècosi maca Pai Mamaquère ìre papi cajè ñaja'cohua'i a'è. Ja maca yureta'a coa ìsi yo'oye papi cajè ñaja'cohua'i a'è. Jaje pa'ina, yè'è cato ja'què ye'yase'ere cayè, mèsarute.

²⁹ Yè'ère jèjo daosiquè cato yè'è ja're còni pa'iji, yè'è ja'què yè'ère te'ire jèoñe papi. Jaje pa'ina, yè'è cato si'anè ì yèyere yo'oyè.”

³⁰ Jaje Jesús iyere caèna, jai pai ìte ìre papi cajè cuasare pahuè.

Maija'què Mamajèrepa Cui'ne Tayo Yo'oyepi Jo'yaohua'ire Paye

³¹ Ja maca Jesús capi, judío paipi ìte ìre papi cajè cuasasicohua'ire:

“Mèsarupi yè'è nuñerepa case'ere tayo saima'pè pa'ini, ja macata'a nuñerepa yè'ère ye'yecohua'i pa'iyè.

³² Jaje pa'ijè nuñerepa pa'iyere ñaja'cohua'i a'è. Ñajèna, nuñerepa pa'iyepi mèsarute jo'yaohua'i peocohua'ire neñe pa'iji, joye huasoyeje pa'ye.”

³³ Jaje caquèna, jaohua'ipi sehuohuè:

“Yèquè cato Abraham tsècapè acohua'i a'è, cui'ne ti yecohua'i jo'ya pa'ima'cohua'i a'è. ¿Me yo'oquè mè'è, jo'ya tseasicohua'i peojè de'oye pa'ija'cohua'i a'è, caquè'ni?”

³⁴ Cajèna, Jesupi capi:

“Si'aohua'i tayo co'aye yo'ocohua'i cato tayo co'aye yo'oyepi jo'yaohua'ire paquèna, pa'iyè.

³⁵ Si'anè ìti tsècapè ja're pa'iquè api. Mamaquè cato jaje pa'iquèta'are jo'yaè cato coa còni pa'iquè api, ìti tsècapè aquè peoquèpi, ti pa'iyè peopi.

³⁶ Jaje pa'ina, mèsaru ì Mamaquère papi jo'yaohua'i pa'iyere nejocaquèna, ja maca yureta'a nuñerepa jo'yaohua'i peoye pa'ija'cohua'i a'è.

³⁷ Tsoe asayè, mèsaru Abraham tsècapè acohua'i pa'iyè. Jaje pa'iohua'ita'a yè'ère huani jèoñe yèyè, yè'è cayere asaye coe do'ire.

³⁸ Yè'è ja'què ñhose'ere cayè, mësarute. Caquëna, mësarupi mësaru ja'què case'ere yo'oyè."

³⁹ Caquëna, ñohua'ipi cahuè, ìte:

"Abraham cato yèquè ja'què api."

Cajëna, Jesupi capi:

"Mësarupi nuñerepa Abraham mamajè pani ì yo'ose'eje cui'ne yo'ora'huè.

⁴⁰ Tsoe mësarute nuñerepa Diusu ye'yase'ere cahuè. Jaje pa'iquëta'are yè'ère huani jëoñe yèyè, mësaru. ¡Abraham jaje yo'oye ti papi!

⁴¹ Mësaru cato mësaru ja'què yo'oyepi yo'oyè."

Caquëna, ja maca ñohua'ipi cahuè:

"Yèquè cato coa huero mamajè peoyè. Te'ire ja'quère payè. Jaè cato Diusupi."

⁴² Cajëna, ja maca Jesupi capi:

"Nuñerepa mësaru Ja'quëpi Diusu pa'ito mësaru yè'ère otira'huè. Yè'è cato Diusu què'ropi daisiquè a'è. Daisiquëpi ñhore pa'iyè. Yè'èse'e daisiquè peoyè. Diusupi jëjo daosiquè a'è.

⁴³ ¿Me yo'ojè mësaru, yè'è cayè asa t'í'añe pañe'ni? Mësarupi asaye coe do'ire pañe.

⁴⁴ Mësaru ja'què cato huati api. Mësaru ì tsecohua'i a'è. Jaje pa'ina, ì yèyere yo'oye yèyè. Huati cato huani jëoquè api. Jare jaje pa'i api, tsoeje, ti nuñerepa yo'oma'què api, cui'ne ti nuñerepa cama'què api. Coa cosoyere cani, jaje ì ayere caji, coa cosou sète, coa cosoye pëca ja'què sète.

⁴⁵ Jaje pa'ina, yè'è nuñere pare caquëni, mësaru asacaiye coeyè.

⁴⁶ ¿Nepi mësaru acohua'i, yè'ère mè'è tayoyè cajè ñhoja'cohua'i a'ni? Nuñerepa yè'è caquère, ¿me yo'ojè mësaru care paji cajè asacaiye pañe'ni?

⁴⁷ Diusu t'è'te aqëpi, Maija'què coca asaye pa'iji. Jaje pa'iquëta'are mësaru cato Diusu acohua'i peoyè. Jaje pa'ina, asaye coeyè, yè'è cayè."

Cristo Cato Abraham Jerepa Tsoe Aquè Api

⁴⁸ Ja maca judío paipi cahuè:

"Nuñere pajè mè'ère jaje caquë'ni, Samaritanopi cui'ne co'a joyore hue'equè api cayè, yèquè."

⁴⁹ Cajëna, Jesupi sehuopi:

"Co'a joyore ti peoquè a'è. Yè'è cato ja'quëni de'oquère papi cacaiyè. Ja do'ire mësaru cato yè'ère co'aquè api, cayè.

⁵⁰ Yè'ère de'oye cacaijè'è caquè oima'è pa'iyè. Yè'ère de'oye cacaiquè pa'iji. Jaè api, ìti yo'ose'e pa'iyeye caquèrepa.

⁵¹ Nuñerepa cayè, yè'è cayè asani yè'è cayeje yo'oquè cato ti ju'í'ne paja'què api."

⁵² Ja maca judío paipi sehuohuè:

"Yureta'a asare pahuè, mè'è nuñerepa co'a joyore hue'equèrepa pa'iyè. Abraham cui'ne Maija'quère quèacaicohua'i tsoe acohua'í'je j'uni huesè'a'huè'è. Jaje pa'iquëta'are mè'èpi cayè 'yè'è cayè asani, yè'è cayeje yo'oquè cato ti ju'í'ne paja'què api."

⁵³ Yèquè ja'què cato Abraham. ¿Mè'èpi seña maca pa'i a'è cuasaquè, mè'è? Abraham cui'ne Maija'quère quèacaicohua'i juju sa'ahuè'è. ¿Iquei a'è cuasaquè mè'è caquë'ni, jaje?"

⁵⁴ Cajëna, Jesupi sehuopi:

"Yè'èja'a co'ye de'oye yo'oyè caquè pa'ito yè'è de'oye yo'oyè cayè ti co'aiye paji. Jaje pa'iquëta'are mësaru yèquè ja'què api caquëpi yè'ère de'oye yo'o'ji cacaiji yè'è ja'quëpi.

⁵⁵ Jaje pa'iquëta'are mësaru ña t'í'ama'pè pa'iyè. Yè'èta'a ìte ñaquè a'è. Jaje ñaquëta'a yè'èpi ñama'què a'è caquè pani coa cosourepa pa'iyè pa'iji mësaruje pa'i. Jaje pa'iquëta'are yè'è cato nuñerepa ñaquè a'è. Jaje pa'ina, ì cayè sehuocai yo'oyè.

⁵⁶ Abraham mësaru aipi sihua'ajl'i, yè'è mu'señare ñaja'què a'è caquè. Ñani sihua huajèa'jil'i."

⁵⁷ Ja maca judío pai Jesure cahuè:

"Ti cincuenta ometècajè peoquëpi ¿Abrahamre ña'ahuè'è cayè, mè'è?"

⁵⁸ Cajëna, Jesupi capi:

"Nuñerepa mësarute cayè. Yè'è cato Abraham pa'ima'nè ai jerepa tsoe aquè a'è."

⁵⁹ Caëna, ja maca quëna pëapi ñmani jëañu'u Jesuna cajè yo'ohuè. Yo'ojëna, catipi. Catini Maija'què huè'epi ñohua'í' jopoja'a sa etani saji'í.

9

Tsì'nëna Ñama'quëni Jesús Jujuse'e

¹ Pai pa'í hue'ñaja'a sai Jesús ñapi, tsì'nëna ñaco ca porei ai de'osiquère.

² Jaje pa'ina, ñani ì ye'yacohua'ipi se'í'è, Jesure:

"¿Me yo'oquè ñaco ca porei ai de'ou'ni, jaè? Pëca ja'quëhua'í tayo do'ire co'aye ai de'ou, panita'a ¿ì do'í a'ni?"

³ Cajëna, Jesupi capi:

“I tayo do'ijje peoji. Cui'ne pëca ja'quëohua'ijje tayo do'ijje peoji. Iquë cato ite juju maca Maija'quë yo'oye paire iñoja'quëpi ai deosiquë api.

⁴Ja yë'ta'a mu'se pa'inë yë'ère jëjo daosiquë co'amaña yo'oye pa'iji. Ñami de'lo huëoji. Ñami cato co'amaña neñe peoji.

⁵Yë'ë ja yë'ta'a iye yejare pa'ini yë'ë a'ë, miacaiquë iye yeja pa'icohua'ire.”

⁶Iye se ca tējini Jesús yejana copi neni ya'ore a'ji sēpë neni ñama'quë ñaco çana ya'opi nepi.

⁷Ja maca capi:

“Siloé oco dea pëna sani tsoa toj'ë. Siloé cani cayë, jëjo daosiquë.”

Jaje caëna, ñama'quëpi sani tsoa tōni tsoe ñaquëpi daji'i, i quë'ro.

⁸Ja maca ja'në ñama'quë pa'ina, ñasicohua'ipi cui'ne i quëno maca pa'icohua'ipi cahuë:

“¿Iquë mai ñajëna, curi sei ñu'isiquë pa'ima'quë aë?”

⁹Cajëna, yecohua'ipi cahuë:

“Jaje pa'ijë'ë. I api.”

Yecohua'ipi cahuë:

“Jare ijje pa'ita'a yequë api.”

Jaje cajëna, ipi capi:

“Yë'ë i a'ë.”

¹⁰Ca maca ite seteña:

“¿Me më'ë yure neni ñaquë pa'iquë'ni?”

¹¹Cajëna, ipi sehuopi:

“Jaë Jesús hue'equëpi yë'ère ya'opi a'jiñe neni ñaco çana je'napi. Jaje yo'oni capi: ‘Siloé oco dea pëna sani tsoajë'ë.’ Caëna, sani tsoa to maca tsoe ñaquë paë'ë.”

¹²Jaje caquëna, ite sei'ë:

“¿Jerore pa'iquë'ni?”

Cajëna, ipi capi:

“Huesëyë.”

Fariseo Paipi Ñaco Porei Pa'isiquëni Seni Asase'e

¹³Ja maca fariseo pai quë'rona ñaco ça porei pa'isiquëre sahuë.

¹⁴Jesús ya'opi neni ñaco ça porei jujusi mu'se cato huajë mu'se paji'i.

¹⁵Jaje pa'isi do'ire, fariseo paipi asani ñama'quë pa'isiquëre seni çahuë. Me më'ë yure neni ñaquë'ni cajë. Cajëna, ipi capi:

“Ya'opi a'jiñe neni yë'ère ñaco çana je'naëna, sani tsoa tōni yure ñaquë pa'iyë.”

¹⁶Ja maca fariseo acohua'i cahuë:

“Iye yo'osiquë cato Diusu te'te peoquëpi jaje yo'opi, huajë mu'se a'ë caye peoye.”

Jaje, cajëna, yecohua'ipi cahuë:

“¿Me co'aquë pani ñeje, pai yo'o t'i'a ma'ñere de'oye yo'oquë'ni, i?”

Jaje yo'ojë cajë yequë tsëcapëa huayeque paji'i, sa'ñe ca do'ire.

¹⁷Tijupë seni çahuë, ja'rë ñama'quë pa'isiquëre ñeje cajë:

“¿Më'ë iqueipi caquë'ni, më'ère ñañe necaisiquëre?”

Cajëna, ipi sehuopi:

“Yë'ë cato cayë, Maija'quëre quëacaiquë api.”

¹⁸Jaje caquëta'are judío paipi nuñerepa ñama'quë pa'isiquëpi ñaji cajë asaye pa'ahuë. Coa caji cajë, i pëca ja'quëohua'ireje soihuë, ja do'ire.

¹⁹Soini sei'ë:

“¿Mësarü mamaquë aë, iquë ñaco ça porei ai de'osiquë? ¿Yure jaje pa'ita'a me yo'oquë ñaquë'ni?”

²⁰Cajëna, i pëca ja'quëohua'ipi sehuohuë:

“Yëquë mamaquë api. Cui'ne ite ça macana ñama'quë. Ai de'osiquë api asayë, yëquëpi ja cato.

²¹Jaje pa'iquëta'are yure cato huesëyë, me yo'oquë ñaquë ponë'ni cajë ite ñañe necaisiquëreje huesëyë. Ini seni asajë'ë. Tsoe ai api, ipi quëajaquë ja do'ire ñaquë pa'iyë, caquë.”

²²Ñama'quë pëca ja'quëohua'i cato coa judío paini ca'rajë jaje cahuë. Si'ahua'ire Jesure Cristo api cacohua'ire pai tsi'si hue'ñapi eto saoye pa'iji cajë cui'ñase'ere asajë.

²³Ja do'ire i pëca ja'quëohua'ipi cahuë: “Ini seni asajë'ë. Tsoe ai api.”

²⁴Ja maca judío pai ñama'quë pa'isiquëre soi coreña. Daquëna, cahuë:

“Nuñerepa quëajë'ë, Diusu ña hue'ñare pana. Yëquë asayë, më'ère jujusiquëre tayo yo'oquë api cajë.”

²⁵Cajëna, ipi sehuopi:

“Yë'ë cato huesëyë, tayo yo'oquë api caye cui'ne paquëre papi cayeje. Yë'ë ta'ñe asaye cato iyese'le pa'iji, ja'rë ñama'quë pa'isiquëpi yure ñaquë pa'iyë.”

²⁶ Tìjupë seteña:

“¿Me më'ëre nei'ni? ¿Më'ëre me yo'oni ñaquëre nei'ni?”

²⁷ Cajëna, sehuopi:

“Tsoe quëahuë, mësarute. Quëatoje asa yëma'pë pa'iyë. Yë'ë caye: ¿Iquere cajë cui'nare ca coj'ë cajë seña'ni? ¿Ini tuñu'u cajë yëjë seña?”

²⁸ Caquëna, ja maca ìte ai tea juni tējini capi:

“Më'ëpi ìni tuina nëji, yëquë cato Moisésre tuicohua'i a'ë cahuë.

²⁹ Yëquë asayë, Moisésre Diusupi case'e. Ja'ëre cato huesëyë, ì pa'i hue'ñaje.”

³⁰ Cajëna, ìpi capi:

“¿Merepa yo'ojë mësarute huesëyë'ni, ai ye'yesticohua'ita'a, ì dai sito, yë'ëre ñaco ca jujucaisiquëre!

³¹ Maipi asayë, tayo yo'ocohua'ire Diusu asacaiye paji. Ìte sihuacohua'ire cui'ne ì yëye yo'ocohua'ise'ere asacaiquë api, Diusu.

³² Tsoeje ti asama'cohua'i a'ë, tsihua'ë pa'inë ñama'quë ai de'osiquëni ñaquëre necaise'e.

³³ Iquëpi Diusu quë'ropi daima'quë pani ti jaje yo'oyeje para'pi.”

³⁴ Caquëna, ja maca johua'ipi cahuë:

“¿Tayo yo'oye tìmësiquëpi ai de'osiquë api, më'ë yëquëre ye'yasi'i caquë?”

Jaje cani ìte pai tsi'si hue'ñapi eto saohuë.

Joyo Ñañere Ñama'cohua'i Pa'iyë

³⁵ Jesús tsoe asapi, ñama'quë pa'isiquëpi ñaquë pa'ina, judío paipi eto saose'e. Jesupi ìte tì'ani capi:

“¿Diusu mamaquëre më'ë ìre papi cuasaquë pa'iquë?”

³⁶ Caquëna, ìpi capi:

“Èjaë, quëajë'ë, yë'ëre. Jequë a'ni, yë'ëje ìte jaë api caquë cuasaquë pa'ija'quëre.”

³⁷ Caquëna, Jesupi sehuopi:

“Tsoe më'ë ñahuë. Yë'ë ì a'ë. Ì ja're më'ë coca cayë.”

³⁸ Ja maca Jesús yë'quë macana do're ja'runi capi:

“Ìre papi caquë cuasayë, Èjaë, më'ëre.”

³⁹ Ja jeteyo'je capi, Jesús:

“Yë'ë cato iye yejana da'ë, nuñerepa yo'oyepi pa'ijaquë caquë. Ñama'cohua'i pa'isicohua'ipi ñajajë caquë, cui'ne ñacohua'i pa'isicohua'ipi joyopi ñama'cohua'i pa'ijajë caquë.”

⁴⁰ Ja maca fariseo paipi ì ja're conì pa'isicohua'ipi iyere asani se'ì'ë:

“¿Yëquëje më'ë ñato ñaco ca peocohua'i a'ni?”

⁴¹ Cajëna, Jesupi sehuopi:

“Mësarupi ñama'cohua'i pani mësarute tayo yo'o do'ire jai do'i peocohua'i patira'huë. Jaje pa'iquëta'are mësarupi ñacohua'i a'ë caye sète do'i quë'iohua'i pa'iyë.

10

Yëi Ñama Tu'rihuë Ayere Ye'yaye

¹ Nuñerepa mësarute cayë, yëi ñama eta sa'roja'a tu'rihuëna cacama'quë pani, ñaëpi cui'ne co'aquëpi eta sa'ro peo hue'ñaja'a cacaquë cato.

² Jaje pa'iquëta'are yëi ñama eta sa'roja'a cacaquë cato yëi ñamare ñacaiquë api.

³ Eta sa'ro hui'yocaiquëje de'oye hui'yocaiji, cacaquë caquë. Cui'ne yëi ñamaje asayë, ì yë'o. Iohua'i mamire caquë soiji, yëi ñamare. Cui'ne tu'rihuë nëicohua'ini hue'sena etoji.

⁴ Etoni sai saji, ìpi du'ru sai. Yëi ñamaje asayë, ì yë'o. Jaje asajë tuiyë, ìte.

⁵ Jaje tuicohua'ita'a yequëpi soiquë pa'ito asani coa catiyë, ñama'quëre sète yequë yë'o caquëna, asajë.”

⁶ Ñeje yo'oyë, pai caquë ñnoquëta'are paipi asa tì'añe pahuë, Jesús caye.

Jesús De'o Ñacaiquë

⁷ Ja maca Jesús tìjupë ca copì:

“Nuñerepa mësarute cayë. Yë'ë a'ë, eta sa'ro yëi ñama caca sa'ro.

⁸ Ja yë'ta'a yë'ë daima'në daisicohua'i cato ñaohua'i a'ë cui'ne co'acohua'i a'ë. Jaje pa'iquëta'are yëi ñamapi asaye pahuë, ìohua'i cayere.

⁹ Yë'ë a'ë, eta sa'ro. Yë'ëja'a cacasiquë cato huaso cuañosiquë pa'ija'quë api. Jaje pa'i etasiquëpi cui'ne cacasiquëpi ì yëyeje yo'oquë pa'ija'quë api, cui'ne de'o aore tì'aja'quë api.

¹⁰ Ñaë cato coa yahue ìmañe caquë cacaquë api, huani jëosi'i caquë, cui'ne nejosì'i caquë. Yë'ë cato yëi ñamapi pa'iyere pajajë caquë daisiquë a'ë, ti pa'iyere jaiye pajajë caquë.

¹¹ Yé'è cato de'oye yéi ñamare ñacaiquë a'è. De'oye ñacaiquëpi yéi ñamapi pa'ijajë ise'e caquë ÿ pa'yere isiquë api.

¹² Coa saï do'ire necaiquë cato lobopi daina, ñani yéi ñamare ñacaiye jeoni catiquë api, yéi ñamare ñacaima'quë sète, cui'ne yéi ñamaje tïohua'ire sète jaje yo'oji. Yo'ouna, ja maca lobopi dani tseani yo'oquë tiya huesoquë api cui'na hue'ña.

¹³ Catiquë cato saï do'ire yo'oquë api. Jaje pa'ina, oi ëayeje ti peoji, ÿte yéi ñamare.

¹⁴⁻¹⁵ Yé'è a'è, de'oyerepa yéi ñamare ñacaiquë yé'ère ja'quë ñaquë pa'yeye, yé'ëje ÿte ja'quë ñaquë pa'yé. Jaje cui'ne yé'è yéi ñamareje ñaquë payé. Ñaquëna, ÿohua'ijë yé'ère ñañë. Yé'ëpi yé'è pa'yere yéi ñama do'ire isiyé.

¹⁶ Payé, cui'ne yequë yéi ñamareje. Yequë tu'rihuë acohua'ire jaohua'ireje ÿñoña daye pa'iji, yé'ère. Jaohua'ijë yé'è caye sehuocaija'cohua'i a'è. Ja maca cui'ne te'e tsëcapë pa'ijja'cohua'i a'è, cui'ne te'i yéi ñamare ñacaiquë pa'ijja'quë api.

¹⁷ Ja'quë yé'ère yéji, yé'è pa'yere isisiquëpi cui'naëpi yé'è pa'yie pa coja'quëpi yo'oquëna.

¹⁸ Yé'è pa'yie jioquë peoji. Yé'è yëyepi isiyé, yé'è pa'yie. Yé'è jaje neñe pa'iji cui'ne cui'nare pa coñeje de'oji. Iye a'è, yé'è Ja'quë yé'ère cuañese'e."

¹⁹ Iyere judío paï asani cui'naohua'ipi hua cohue, tï tsëcapëa.

²⁰ Jai paï ÿohua'i acohua'ipi cahuë:

"¿Me neñu'ju ÿ caye asani sehuocaiye'ni, care paji cajë co'a joyore hue'equëpi cui'ne coa cuepequë caquë?"

²¹ Cajëna, yecohua'ipi cahuë:

"Co'a joyore hue'equëpi jaje ca tï'añe peoji. ¿Co'a joyopi ñama'quë ñaquë necaiye pa'iquë? Cui'ne ti peoji."

Judío Païpi Co'aquë Api Caye Jesure

²² Ja mu'seña cato oco tëcahuë paji'i. Pa'ina, Jerusalén cato Maija'quë huë'e ne ja'ñire cuasajë sihuajë jai paï tsi'sini yo'o maca tï'api.

²³ Jesüs cato Maija'quë huë'e sa'ñahuëre cunirojaji'i, Salomón hue'yosi hue'ña.

²⁴ Ja maca judío païpi Jesure tsi'sini cahuë:

"¿Yëquëre më'è je yëhua nuñerepa quëaja'quëpi huesë ëaye caquë pa'iquë'ni? Më'ëpi nuñerepa Cristo pani quëare pajë'è, te'e nuñerepa."

²⁵ Cajëna, Jesupi capi:

"Tsoe mësarute cahuë. Caquëta'are mësarupi care paji cajë asaye pahue. Yé'è ja'quë cuañesi tutupi yo'oyé. Ja yo'oyepi tïñarepa ÿñoji, mësarute.

²⁶ Jaje pa'iquëta'are mësarupi nuñere pa'è cajë asaye pañë, yé'è yéi ñama acohua'i pa'ima' do'ire. Tsoe cahuë, ja'rë.

²⁷ Yé'è yéi ñamapi asayé, yé'è yé'ona. Asajëna, yé'ëpi ÿohua'ire ñañë. Ñaquëna, ÿohua'ijë yé'ère pe'teyé.

²⁸ Yé'ëpi ti ju'ima'pë pa'yie isiquë a'è. Isina, ti ne huesëma'pë pa'ijja'cohua'i a'è, cui'ne yé'è jëñare pa'icohua'ire yecohua'i mañaje jioye ti peoji.

²⁹ Yé'è ja'quëpi yé'ëna isipi, ÿohua'ire. Isisiquë cato si'aye jerepa pa'i api. ÿte cato yecohua'ijë ti jio tï'añe peoji, ÿ jëtëre pacohua'ire.

³⁰ Yé'è cui'ne ja'quë çoni te'ijë pa'iohua'i pa'yé."

³¹ Ja maca judío paï cui'naohua'ipi quëna pëapi ÿmani jeañu'u cajë yo'ohue.

³² Yo'ojëna, Jesupi capi:

"Mësaruru asajëna, jaiye de'oyere necaë'è, yé'è ja'quë tuture papi. ¿Iye nesi do'i aye mësarupi asato jeco a'ni, yé'è co'aye yo'osico, jaje quëna pëapi jeañu'u ca ja'ñe?"

³³ Caquëna, judío païpi sehuohue:

"Më'è de'oye yo'osi do'ire më'ère quëna pëapi jeoñe paja'cohua'i a'è. Më'ëpi yé'è a'è, Diusu casi do'ire quëna pëapi jeaja'cohua'i a'è, më'ère. Më'è cato coa pa'ita'a, yé'è Diusuru pa'è caquë yo'oyé."

³⁴ Ja maca Jesupi capi:

"Mësaruru cuañeñepi toyase'e caji Diusu mësarute case'ere ñeje: 'Mësaruru a'è, diusuohua'i.'

³⁵ Toyase'e caye cato nuñerepa caye a'è. Jaje pa'ina, care paji cajë asayé, mai. Diusupi hue'yopi, ÿ coca asasicohua'ire diusu a'è, mësaruru.

³⁶ ¿Diusupi yé'ère huani iye yejana jëjo daosisiquëpi Diusu mamaquë a'è caye me neni co'acquë'ni?"

³⁷ Ja'quë yo'oyere yé'ëpi yo'oma'ëna, ÿre papi caye pajë'è.

³⁸ Jaje pa'iquëta'are yé'ëpi yo'oquëna, ÿre papi yo'oji cajë asama'cohua'ita'a yé'è yo'o ÿñoñere ñajë Maija'quë yo'oye a'è cajë asajë'è. Ja maca yureta'a asa tï'añe pa'iji, Maija'quëpi yé'è ja're pa'iji, cui'ne yé'ëpi ÿ ja're pa'iji."

³⁹ Tïjupë tseani preso saye yëhuë. Jaje pa'iquëta'are Jesupi de'hue jëapi.

⁴⁰ Ja maca Jesús Jordán tsiaya ësë mèi te'tena co'ipi. Co'ini jarona pëapi, Juan oco doquë pa'i sitona.

⁴¹ Jarote pa'ina, jai pai i quë'rona sani ñajë cahuë:
"Nuñerepa Juan, pai yo'o tì'a ma'ñere yo'oma'quëta'a care paquë case'e paji'i, iquë yo'o ja'ñe ayere."

⁴² Jarona jai pai ire papi cajë cuasahuë, ìte.

11

Lázaró Juni Huesëse'e

¹ Te'i emë ju'iquë Lázaró hue'equë paji'i. Jaë cato Betania aquë paji'i. María cui'ne io yo'jeo Marta pa'i daripë aquë paji'i.

² María cato ju'iquë Lázaró yo'jeo paco'ë. Jao cato Èjaërepa nëcañoana huëo së da'capi jañuni io nañapi ténocaoio yo'osico paco'ë.

³ Jaje pa'ina, jaohua'ipi Èjaë më'ë cajeipi ju'iji caquë sani quëacajj'ë cajë Jesús quë'ro jëjo saohuë, te'ire.

⁴ Jëjo saorena, Jesús jare asani capi:

"Iye ju'i dahuë cato ti juni huesëyena saye pa ja'ñe a'ë. Diusu i de'loquë pa'iyere ñño ja'ñe a'ë. Cui'ne Maija'quë mamaquë de'loquë pa'iyere ñño ja'ñe a'ë."

⁵ Jesús cato Marta cui'ne io maja'yo Mariare cui'ne Lázarore ai oi'quëta'a.

⁶ Caya mu'seña se pëa copi, i pa'i hue'ñana, Lázaró ju'iji cajë quëasicohua'ita'are.

⁷ Ja jeteyo'je capi, Jesús i ye'yacohua'ire:

"Sani coñu'u, Judeana."

⁸ Caquëna, i ye'yacohua'ipi ìte cahuë, ja maca:

"¿Ye'yaquë, më'ëre judío pai quëna pëapi jëañu'u ca sitona co'ija'quë aë?"

⁹ Cajëna, Jesupi capi:

"¿Te'e mu'se doce hora pa'icoa, miañe? Jaje pa'ina, paipi mu'se cu'ini ti ju'aye peoji, iye yeja miacaiyeja'a cu'ini."

¹⁰ Jaje pa'iquëta'are paipi ñami cu'ini ju'aye pa'iji, miañe peo do'ire.

¹¹ Ja jeteyo'je Jesupi capi:

"Mai cajei Lázaró caji'i. Caisiquëta'are sani ne sëtöja'quë a'ë."

¹² Caquëna, ja maca i ye'yacohua'ipi cahuë, ìte:

"¿Èjaë, jaje caji'i cani co'yaja'quë api caye a'ni?"

¹³ Jesús cato jaje cani juji'i caquë capi. Jaje caquëna, i ye'yacohua'ipi cuasani coa huëore caina caji cuasahuë.

¹⁴ Ja maca Jesupi yureta'a tññarepa capi:

"Lázaró tsoe juji'i."

¹⁵ Sihua'yë, de'oye jarote pa'ima'ëna juji'i. Jajepi ai de'o'ji. Mësaró ñani mësaró ire papi cajë yë'ëre cuasaja'cohua'ire. Sani ñañu'u."

¹⁶ Ja maca Tomás Gemelo hue'equëpi i ja're ye'yecohua'ire capi:

"Jëñajë'ë, maije i ja're coní sañu'u, te'e i ju'ina ju'ija'cohua'í."

Ju'isicohua'ipi Huëiye Cui'ne Pa'iyë A'ë, Jesús

¹⁷ Tsoe Lázarote cuatro mu'seña tase'e pa'ina, Jesús tì'api.

¹⁸ Betania cato Jerusalén ja'yere paji'i, coa caya kilómetropi cui'ne yequë jopo kilómetro cösi macare.

¹⁹ Jai pai judío pai acohua'ipi Marta cui'ne Mariare do'i ñajë cui'ne ñohua'í maja'yëpi juquëna, oicohua'ini yëhuo huasoñu'u cajë daisicohua'ipi paë'ë.

²⁰ Ja maca Martapi Jesús daiji asani etani ìte pëpasi'í caco sacco'ë. María cato huë'e sa'nahuëre paco'ë.

²¹ Ja maca Martapi Jesure cao:

"Èjaë, më'ë ññore pa'iquë pa'ito yë'ë a'yë ju'íñe para'pi.

²² Jaje pa'iquëta'are yë'ë cato asayë, Maija'quëpi më'ë señere jsija'quë api."

²³ Cacona, Jesupi capi:

"Më'ë a'yë cui'naëpi pani coja'quë api."

²⁴ Caquëna, Martapi cao:

"Jaje pa'ijë'ë. Cui'naëpi pani coja'quë api, juni huesësicohua'í huëi maca tëji mu'serepa."

²⁵ Cacona, Jesupi capi:

"Yë'ë a'ë, juni huesësicohua'í huëiye cui'ne pa'iyë. Yë'ëre ire papi caquë cuasaquë cato ju'isiquëje jare pa'ija'quë api.

²⁶ Cui'ne ja yë'ta'a huajëquë pa'í yë'ëre ire papi caquë cuasaquë cato ti ju'íñe paja'quë api. ¿Iye yë'ë caye jaje pa'ire paji caco cuasaco, më'ë?"

27 Caquëna, iopi cao:

“Jaje pa'ijë'ë, cuasayë, yë'ë. Cui'ne Ëjaë, më'ë cato Cristore papi asayë, yë'ë. Diusu mamaquëpi iye yejana daija'quë ca nëosiquëpi daisiquë a'ë, më'ë.”

Lázaro Te Sitona Jesús Oise'e

28 Jaje se ca tējini Marta io maja'yo María quë'rona sani cao, yahue:

“Ye'yaquë ñnore pa'i më'ëre daijaco caquë soiiji.”

29 Cacona, ïti se asayeja'a Jesús quë'rona esa sacco'ë, ïte ñasi'i caco.

30 Ja yë'ta'a Jesús pai daripërepa cacaye papi. Ja maca cato, Marta ïte t'ï'asi macare paji'i.

31 Mariapi co'arepa huëni saiona, ñani judío paipi María huë'ere pa'ijë oima'o cajë yëhuocohua'ipi tasi daripëna sani osi'i caco saico cuasajë tuë'ë.

32 Ja maca María Jesús quë'rona sani do're ja'runi cao:

“Ëjaë, ñnore më'ë pa'iquë pa'ito a'yë juni huesëye para'pi.”

33 María ja're conï judío pai daisicohua'ipi oijëna, Jesupi jaohua'ire oi ëayerëpa ñapi. Ñani i joyopi ca ëayerëpa nëina,

34 Jaohua'ire seji'i:

“¿Jerona ïte tare'ni?”

Caquë seina, iohua'ipi cahuë:

“Ëjaë, dani ñajë'ë. Ñona tãhuë.”

35 Ja maca Jesús oji'i.

36 Oina, ñani judío paipi cahuë, ja maca:

“I ai oiquërepa paji'i. Ñajë'ë, i oiyere.”

37 Yecohua'ipi cahuë:

“Ñama'quëre ñaquëre nesiquë api, iquë. ¿Jaje pa'ita'a cui'ne me yo'oquë Lázaro jujucapi paë'ni?”

Lázaro Huëise'e

38 Cui'naëni co'arepa esa necati'ñerepa nëina, tasi daripë quë'rona tsio daji'i. Coje nesico paji'i. Pa'ioni jai quëna pëpi siosico paji'i.

39 Pa'iona, Jesupi capi:

“Quëna përe hui'yo jeojë'ë.”

Caquëna, Marta ju'isiquë yo'jeopi cao:

“Ëjaë, tsoe co'a sëji cuasayë. Tsoe cuatro mu'seña pa'iji.”

40 Cacona, Jesupi capi:

“Më'ëje pa'ioni cahuë care paji cuasani më'ë ñaja'coa'ë, Maija'quë de'oyerepa yo'oquëna case'e.”

41 Caëna, ja maca quëna pë hui'yo jeorena, Jesús ma'tëmo mëñe ñaquë capi:

“De'oji, Ja'quë. Yë'ë caye më'ëpi asacaë'ë.”

42 Yë'ë cato asayë, më'ë si'anë yë'ë caye asaquë pa'iyë. Jaje pa'iquëta'are iye maca pa'icohua'i asa ja'ñere caquë cayë, më'ëpi yë'ëre jëjo daosiquë api cajë asare pajajë caquë.”

43 Jaje se ca tējini, ai tutu cui'pi:

“¿Lázaro etajë'ë!”

44 Caquëna, ju'isiquë pa'isiquëpi jëña, nëcañoa huesiquëpi, cui'ne tsiaje cañapi huesiquëpi etapi. Etaquëna, ja maca Jesupi capi:

“Joyecaijë'ë, saijaquë.”

Jesure Tseañu'u Cajë Yo'ose'e

(Mt 26.1-5; Mr 14.1-2; Lc 22.1-2)

45 Jaje iyere yo'ouna, Jesure jai pai judío pai ïre papi cajë cuasahuë, María ja're conï daisicohua'ipi, ïti Jesús yo'oquëna, ñasicohua'ipi.

46 Jaohua'i acohua'ipi fariseo pai quë'rona sani ñajë quëahuë, Jesús yo'ose'ere.

47 Ja maca fariseo paipi cui'ne Maija'quë huë'e ñacaicohua'i ëjaohua'ipi ca tēji ëjaohua'i quë'rona ts'i'sini cahuë:

“¿Me neja'cohua'i a'ni, jaëte? I cato jaiye pai yo'o t'ï'a ma'ñe yo'o ññoji, paire.”

48 Jaje pa'ina, maipi coa ñacohua'i pa'ito si'a paipi ise'ena asa huesëja'cohua'i pa'ini. Jaje yo'ojëna, yureta'a romano paipi dani Maija'quëre se huë'e cui'ne mai yeja ne huesoja'cohua'i pa'ini.”

49 Cajëna, Caifás hue'equëpi Maija'quë huë'e ñacaicohua'i ëjaëpi ja ometëcahuë pa'iquëpi capi, jaohua'ire:

“Mësarü huesëjë cayë.”

50 Cui'ne ti asama'pë, te'i jucacati'ñe pa'i api, si'a pai do'ire ai jerepa si'a pai ju'ïñe peoye, iye daripë pa'icohua'ire.”

⁵¹ Caifás cato ise'e ta'ñe jaje caye papi. Coa Maija'quë joyopi isiquëna, capi, ja ometëcahuë Maija'quë huë'e ñacaicohua'i ëjaë sête, Jesupi judío pai do'ire jucacaiye pa'iji, pa'i ja'ñere ca nëoquë.

⁵² Coa judío païse'ere caquë jucacaiye pani cui'ne si'a hue'ña coa tiya huesësicohua'ire Diusu mamajëre.

⁵³ Jare ja mu'sepi yureta'a judío pai ëjaohua'i Jesure huani jeoñe ca nëohuë.

⁵⁴ Jaje pa'ina, Jesús yureta'a si'a judío pai ñajëna, cui'ye papi. Paquë Judeapi etani Efraín daripëna saji'i, cuëne yeja ja'ye maca pa'i daripëna. Jaroni sani i ye'yacohua'i ja're pëapi.

⁵⁵ A'ri maña carapi, Egíptopi Israel pai etajë pa'ise'ere cuasajë tsi'sini yo'o mu'seña. Jaje pa'ina, jai pai pa'i daripëa pa'icohua'i saë'ë, Jerusalëna si'sire tosa toñere cajë.

⁵⁶ Jesure co'ejë cuë'ë. Jaje pa'ina, Maija'quë huë'ere pa'ijë sei'ë, yecohua'ire:

“¿Mësaru me cuasaye'ni? Daija'quë api fiestana, panita'a paja'quë api cuasaye cajë.”

⁵⁷ Fariseo pai cui'ne Maija'quë huë'e ñacaicohua'i ëjaohua'ipi cuãne nëohuë. Jesús pa'i hue'ñare asasicohua'i pani quëajë'ë, sani tseaja'quëre cajë.

12

Huëo Sëñepi Jesure Tsoacaise'e

(Mt 26.6-13; Mr 14.3-9)

¹ Seis mu'seña Egíptopi Israel pai etajë pa'ise'ere cuasajë yo'oye caraquëna, Jesupi Betaniana saji'i. Lázaro pa'i hue'ñana ju'isiquëni Jesupi ne co'yasiquë paji'i, jaë cato.

² Jaroni Jesure ao cua'coni aohuë. Martapi ao huahuëco paco'ë. Lázaropi Jesús ja're coní mesare ñu'i aji'i.

³ Ja maca Mariapi huëo së ma'ña da'care dani Jesús quëona ja'ñeni jo nañapi tëno cuënao. Jaje yo'ocona, si'a huë'e huëo sëñena tímëo. Ja cato jai do'i ma'ña paji'i.

⁴ Ja maca Judas Iscariotepi Simón mamaquëpi Jesús ye'yaquëpi, Jesure coso yehuoja'quëpi capi:

⁵ “¿Me yo'oco iye huëo së ma'ña coa yecohua'ina se jsico trecientos romano curiquë të'ña nema'o paco'ni, neni curi peocohua'ire cõcaija'cota'a?”

⁶ Judas jaje cani curiquë peocohua'ini ai oi do'ire cama'ë paji'i. Co'amaña yahue imaquëpi capi. Jaje ipi curi aya topë paquë sête, yahue imaquë paji'i, ñona yecohua'ipi aya curire.

⁷ Ja maca Jesupi ite capi:

“Coa ñajë'ë. Yë'ëre ta mu'se huëo së ja'ñere ne de'huaco yo'oco.

⁸ Curi peocohua'ire si'anë mësaru ñajë paja'cohua'i a'ë. Jaje pa'iquëta'are yë'ëre cato si'anë paye peosipi.”

Lázarore Sañope Case'e

⁹ Jesús Betaniare pa'iji asani jai pai judío pai saë'ë, jaroni. Jesuse'ere ñañu'u cajë saiye pahuë. Lázarore ñañu'u, Jesús ju'isiquëni huëosiquëre cajë saë'ë.

¹⁰ Cui'neje Maija'quë huë'e ñacaicohua'i ëjaohua'ipi Lázaroreje huani jeoñe pa'iji cahuë.

¹¹ Judío paipi Lázaro do'ire Jesupi ire papi cajë cuasa do'ire, cui'ne ñohua'ire jeoco do'ire jaje cahuë.

Jerusalëna Jesupi Cacase'e

(Mt 21.1-11; Mr 11.1-11; Lc 19.28-40)

¹² Jai pai Jerusalëna saë'ë, Egíptopi Israel pai etajë pa'ise'ere cuasajë yo'o mu'se ti'aëna. Se ñatasi mu'se Jesús daija'quë api, iye daripëna asani.

¹³ Ja maca Jesús daina, sihuajë ja'o tëteni cuijë saë'ë. Jesure pëpañu'u cajë cuihuë:

“¡De'oquëre pa'ni, Diusu! ¡De'oquëre pa'ni, Ejaë mamirepa hue'equëpi daiquë! ¡De'oquëre pa'ni, Israel pai Ejaë!”

¹⁴ Burrore ti'ani Jesús tui saji'i, toyase'e cayeje pa'ye japi caji ñeje:

¹⁵ Ca'rama'o pa'ijë'ë.

Israel pai daripë

Më'ë Ejaërepa daiji, burroni ñu'i.

¹⁶ Iye case'e i ye'yacohua'i asa ti'añe pahuë, du'ru macarepa cato. Jesús de'oquërepa de'osi maca ja maca yureta'a asahuë, si'aye Jesús ayere toyase'e paji'i cajë cui'ne jaje tëto saji'i, mai ña hue'ñana cuasajë.

¹⁷ Jesús ja're pa'ijë Lázarore juquëna, tsiquëni huëoquë soiquëna, asasicohua'ipi yecohua'ire se quëahuë, ñohua'i ñase'ere.

¹⁸ Jaje pa'ina, Jesure sañope ti'ani pëpañu'u cajë saë'ë, pai yo'o ti'a ma'ñere yo'oquëna, asasi do'ire cajë.

¹⁹ Ja maca fariseo paipi cahuë, ñohua'ija'a sa'ñe:

“Ñañe mësaru si'a pa'i ise'ere tuiye, yure cato ne tija'ne peoji.”

Griego Paipi Jesure Co'ese'e

²⁰ Fiesta pa'i maca Maija'quëre señu'u cajë Jerusalénna saiscohua'i ja're cõni griego païje paë'ë.

²¹ Pa'icohua'ipi jaohua'ipi Filipena tsio dani Betsaida Galilea aquëna sejë cahuë:

“Ëjaë, yëquë Jesure ñañe yëyë.”

²² Jajë cajëna, asani Felipepi sani Andrésni capi. Cani yureta'a cayaohua'i Jesure sani cahuë.

²³ Cajëna, Jesupi ja maca capi:

“Tsoe tija'api, Maija'quë mamaquë de'ouquërepa de'ojai maca.

²⁴ Mësarute cayë, trigo capi yejana tomenia'co pani jare te'e ca maca pa'io carajaicoa. Jajë pa'iquëta'are iti capi yejana tomeni junita'a jaiye quëicoa, iti ñëpi mëani.

²⁵ I pa'iyere ai oiquë cato ca ne huesoja'quë api. Jajë pa'iquëta'a iye yeja pa'iyere coequë cato ne de'huaquë pa'iji, ti pani huesë ja'ñere.

²⁶ Paipi yë'ëre necaiye yëni tuijë'ë, yë'ëre. Yë'ëre necaiquë cato, yë'ë pa'i hue'ñiare cõni pa'ija'quë api. Paipi yë'ëre necaiquë pa'ito yë'ë ja'quëpi ite de'ouquëre pa'ni caquë ñacajaja'quë api.

Jesupi Quëaji, I Ju'i Ja'ñere

²⁷ Yure cato yë'ë ai oiyë. Ja do'ire ja'quëre ñeje ca tija'ne pa'iquë? ‘Ja'quë huasojë'ë, yë'ëre yure tëto sai ja'ñere?’ Jajë ca tija'ne peoji. Yë'ë cato jare caquë daisiquë a'ë.

²⁸ Ja'quë më'ë mamire jerepa de'o mami nejë'ë.”

Ja maca asapi, ma'tëmopi yë'ose'e pisiqëna:

“Tsoe de'ouquëre pare nehuë. Jajë pa'iquëta'are tujupë de'ouquëre pare ne cõsi'i.”

²⁹ Iti maca necajë asiscohua'ipi cahuë, mujuëpi pisiiji. Cajëna, yecohua'ipi cahuë:

“Huññaëpi ñni cocare capi.”

³⁰ Ja maca Jesupi capi:

“Yë'ëni caquë iye yë'o pisiye papi. Mësaru asa ja'ñere caquë iye yë'o pisiipi.

³¹ Yure a'ë, iye yeja io yo'ose'e ña de'hua cuañõ ja maca, cui'ne yurepi iye yeja cuañequëje i tutu nejo cuañõsiquë pa'ija'quë api.

³² Yë'ëpi cruzuna mëa deo cuañõsi maca si'ahua'ire tsi'so saosi'i yë'ëse'ena paire.”

³³ Ja quëayena pa'i asahuë, cruzuna ju'ija'quë a'ë caquë quëaye.

³⁴ Paipi asani sañope sehuohuë:

“Yëquë cato yequë toyapë ñacohua'i a'ë, Cristo ti ju'iñe peoji cayere. ¿Me yo'ouquë më'ë Pa'i Mamaquë cruzuna ju'ija'quë a'ë caquë'ni? ¿Iquë'ni, Pa'i Mamaquë?”

³⁵ Ja maca Jesupi capi:

“Ja yë'ta'a mësaru ja're miañe pa'iji. Ja yë'ta'a miañe pa'i maca miañeja'a cu'ijë'ë, neañepi tsio daiona, merepa yo'oco'ni cajë ai cuasaye pa'cohua'i. Nea hue'ñaja'a cu'iquë cato i sai hue'ña huesëquë coa saiji.

³⁶ Miañe jüre pare pa'iyë cajë asajë'ë, ja yë'ta'a mësaru ja're cõni miacai pa'i macapi. Jajë pa'ijë yureta'a mia hue'ña pa'icohua'irepa ponëja'cohua'ipi.”

Jajë ca tējini Jesús sani catipi, iohua'ire.

Judío Pa'i Jesure Sehuoye Pase'e

³⁷ Jajë Jesús pa'i yo'o tija' ma'ñere yo'o iñõsiquëta'are jre papi cajë cuasaye pahuë.

³⁸ Maija'quëre quëacaiquë Isaías ñeje toyaquë pa'ise'epi tija' ñepi pa'ina, pahuë asaye. Toyase'e cato caji:

Ëjaë ¿nepi yëquë quëase'e care payë cajë asare'ni?

¿Neni Diusu iño u'ni, i tutu?

³⁹ Jajë pa'ina, asa tija'ne pahuë. Yequeje Maija'quëre quëacaiquë Isaías toyapi, ñeje:

⁴⁰ Diusupi ñama'cohua'ire cui'na jëa joyo quë'iohua'ire nepi,

Ñaco capi ña ma'ñe caquë, Cui'ne joyopi asa ma'ñe caquë,

Cui'ne Maija'quëna ponëni juju cuañõma'cohua'ini caquë.

⁴¹ Iye cato Isaías capi, Jesús de'ouquërepa pa'iyë ñasiqëpi. Jajë pa'ina, i ayere capi.

⁴² Jajë pa'iquëta'are jai pa'i judío pa'i Jesure jre papi cajë cuasahuë. Yecohua'i ëjaohua'ire paque cuasahuë, Jesure. Jajë pa'iquëta'are jai pa'i cuasajëna, quëaye pahuë, fariseo pa'ini ca'ra do'ire, pa'i tsi'si hue'ñapi eto sao ma'ñe cajë.

⁴³ Fariseo pa'i cato paipi iohua'ini de'ocohua'ire pa'ni cacaiyere yëcohua'i paë'ë. Maija'quëpi de'oji cayere coecohua'i paë'ë.

Jesús Casi Yë'opi Pa'i Yo'ose'e Ca De'huaye Pa'iji

⁴⁴ Jesús ai tutu capi:

“Yë'ëre ìre papi caquë cuasaquë cato yë'ëse'ere asaye peoji. Yë'ë ja'quë yë'ëre jëjo daosiquëreje asaji.

⁴⁵ Yë'ëre ñaquëpi yë'ëre jëjo daosiquëreje ñaji.

⁴⁶ Yë'ëre ìre papi cajë cuasasicohua'ipi nea hue'ñare pa'ima'pë pa'ijajë caquë mu'se miañeja pa'ipi yë'ë iye yejana da'ë.

⁴⁷ Jaje pa'iquëta'are yë'ë caye asaquëta'a yë'ë cayeje yo'oma'quëre yë'ëpi nejoñe paja'quë a'ë. Yë'ë cato iye yejana daisiquë a'ë, iye yeja pa'icohua'ire huasosi'i caquë.

⁴⁸ Yë'ëre coequëpi cui'ne yë'ë caye asani cui'ne yo'oma'quë cato, tsoe paji, ìte nejo ja'ñe. Yë'ë case'epi tëji mu'serepa paire nejo ja'ñe a'ë.

⁴⁹ Yë'ë cuasayepi huëoquë cama'ë pa'iyë. Yë'ë ja'quë yë'ëre jëjo daosiquë cuañese'ere caquë ye'yayë, ì case'eje pa'ye caquë asayë, yë'ë.

⁵⁰ Ja'quë cuañese'e cato ti pani huesë cocare pa'ë caquë asayë, yë'ë. Jaje pa'ina, yë'ë caye cato ja'quë cuañese'eje pa'ye a'ë.”

13

I Ye'yacohua'i Quëore Jesupi Tsoa Tose'e

¹ Ja yë'ta'a Egíptopi Israel pajë etajë pa'ise'ere cuasajë yo'o mu'se tì'ama'ë te'e mu'se carapi. Jesupi tsoe asapi, je'nërepa iye yeja pani tëjini pëca ja'quë quë'rona co'iyë tì'ase'e. Si'anë Jesús cato ai oiquë paji'i, ì tsecohua'ire iye yeja pa'icohua'ire. Jaje pa'ina, yure cato ì ai oiyere pare ñoquë yo'opi.

²⁻⁴ Huati cato Simón mamaquëna Judas Iscariote joyona tsoe co'aye cuasaye nepi. Jaje pa'ina, Jesure coso yehuosì'i cuasayere papi, ì joyo. Jesús cato Diusu quë'ropi daisiquë a'ë asaquëpi, cui'ne co'ija'quë a'ë Diusu quë'rona asaquëpi paji'i. Cui'ne ja'quëpi yë'ëre ëjaërepa pa'ì ja'ñe tutu ìsipi asaquë paji'i. Jaje pa'ina, Jesús ì ye'yacohua'ì ao aijëna, conì ñu'ì aiquëpi, huëni ì ëmëje'e ju'icore dutani, ì ju'ruhuëna toayapi sëapi.

⁵ Ja maca quëna de'huana oco doni ì ye'yacohua'ire quëo tsoa huëopi. Tsoaquë ì toaya ju'ruhuëna sëasicopi tëno cuënacaji'i.

⁶ Simón Pedro quëore tsoasi'i caquë yo'oquëna, ipi capi:

“¿Ëjaë, më'ëpi yë'ë quëore tsoacasi'i caquë yo'oquë?”

⁷ Caquëna, Jesupi sehuopi:

“Yure më'ë huesëyë, yë'ë caquë yo'oye. Pasiquëta'a jeteyo'je më'ë asa tì'aja'quë a'ë.”

⁸ Jaje caquëta'are Pedropi capi:

“Yë'ë quëo më'ëpi tsoacaiye peoji.”

Caquëna, Jesupi capi:

“Yë'ëpi më'ëni tsoa tçaima'quë pa'ito më'ë yë'ë te'te aquë peoja'quë a'ë.”

⁹ Caquëna, Simón Pedropi capi:

“Jaje pa'ito Ëjaë, coa quëose'e tsoama'ë pa'ijë'ë. Yë'ëre jëñajë cui'ne sïopëje tsoacajjë'ë.”

¹⁰ Caquëna, Jesupi capi:

“Ja'a cuyasiquë cato coa nëcañoase'e tsoaquë api, si'aë de'oquë pa'iyë sëte. Mësarù cato sisi peocohua'ì a'ë. Jaje pa'iquëta'are si'ahua'ì de'ocohua'ise'e pa'iyë pañë.”

¹¹ Si'aohua'ì si'ìsi peocohua'ise'e pa'iyë pañë capi, ìte coso yehuoja'quëque pa'ina, asaquë.

¹² Quëo ja'o tsoa tëjini ì ëmëje'e ju'icore suñani cui'naëpi mesana ja'rùni capi:

“¿Mësarù yë'ë caquë yo'ose'e asa tì'añe?”

¹³ Mësarù yë'ë Ëjaëpi cui'ne ye'yaquë api, canì nuñerepa cayë, jaëre panì.

¹⁴ Yë'ë Ëjaëpi cui'ne ye'yaquëpi mësarù quëo tsoasiquëre sëte mësarujë yecohua'ì quëo ja'oñare tsoacaiye pa'iji.

¹⁵ Iye cato mësaruni yo'o ñoquë yo'ohuë. Jaje yo'ojë'ë, caquë yë'ë yo'ose'eje.

¹⁶ Nuñerepa mësarute cayë. Ì jo'yaëpi ì ëjaëre tëto saisiquë peoji, cui'ne jëjo dao cuañoquëje ìte jëjo daoquëre tëto saisiquë peoji.

¹⁷ Asa tì'ani yë'ë case'eje pa'ye yo'ocohua'ì panì sihuacohua'ì pa'ija'cohua'ì a'ë.

¹⁸ Mësarute si'aohua'ire pare cama'ë pa'iyë, coa yë'ë sahua nëosiquëse'ere cayë. Toyase'e cayepi tì'añe pa'iji. Japi caji: ‘Yë'ë ja're conì aiquëpi yë'ëre sañope yo'oquë ponëpi.’

¹⁹ Iye cato mësarute cayë ìtipi tëto saina, ñani mësarupi nuñerepa ìre papi capi cajë yë'ëre asa ja'ñere caquë.

²⁰ Nuñerepa cayë, mësarute. Yë'ë jëjo daoquëre sihuaquë de'oye yo'oquëpi yë'ëreje sihuaquë de'oye yo'osipi. Yë'ëre sihuaquë de'oye yo'oquëpi, yë'ëre jëjo daoquëreje sihuaquë de'oye yo'osipi.”

Judas Yo'oquë Yehuo Ja'ñere Jesús Quëase'e

(Mt 26.20-25; Mr 14.17-21; Lc 22.21-23)

²¹ Ja casi jeteyo'je Jesús ì joyopi ca'ñerepa nëina, capi, si'aye tìñarepa:

“Nuñerepa cayë. Mësarü aquëpi yë'ëre yo'oquë yehuoja'quë api.”

²² Ja maca i ye'yacohua'ipi sa'ñe iohua'ija'a ña huëohuë, nepi yo'oja'cohua'ini cajë huesëjë.

²³ I ye'yacohua'i aquëpi Jesü i yëquëpi i yë'quë macare ñu'i ajji'i, na'iquëna, aïñere.

²⁴ Aina, Simón Pedropi coa moñopi më'ëpi sëni asajë'ë, nepi yo'oja'cohua'ini caquë'ni caquë yo'opi.

²⁵ Yo'oquëna, ñani Jesuna tsio jani seji'i:

“¿Ejaë, jequë a'ni, iti yo'oja'quë?”

²⁶ Caquëna, ipi sehuopi:

“Panpë yë'ëpi sa'suni aocuë cato i pa'ija'quë api.”

Jaje cani panpë ini sa'suni Judas Iscariotena aopi, Simón mamaquëna.

²⁷ Jare panpë i maca tsoe huatije Judas joyona cacapi. Ja maca Jesús capi ite:

“Më'ë yo'o ja'ñe pa'ito esa yo'ojë'ë.”

²⁸ Jaje catoje iti maca mesa ñu'icohua'i asa tja'ñe pahuë, i caye.

²⁹ Judaspi curiquë de'hua turupë paquëre sëte yecohua'i cato cuasahuë, sani aore huerojajjé'ë fiesta yo'o ja'ñere caquë caji cuasahuë. Panita'a curiquë peocohua'ina sani isijé'ë caquë Jesús caji cuasahuë.

³⁰ Panpë isisi jeteyo'je Judas etani saji'i. Ja maca cato tsoe ñami pajji'i.

Huajëye Cuañese'e

³¹ Judas etani saisi maca Jesupi capi:

“Yure iñoñe pa'iji, Pai Mamaquë de'loquërepa pa'iyë. Cui'ne Diusu de'loquërepa pa'iyëje iñoja'quë api, ipi.

³² Maija'quë de'loquërepa pa'iyere Pai Mamaquëpi iñoquë pa'ito, Maija'quëje mamaquë de'loquërepa pa'iyere iñosipi. Esa iñoja'quë api.

³³ Tsï dohuë, mësarü ja're cöni tsoe pa'iyë paja'quë a'ë. Mësarü yë'ëre co'ēja'cohua'i a'ë. Jaje pa'ina, jare judío paire case'ëje mësarute cayë. Mësarü yë'ë sai sito sani tja'ñe peoji.

³⁴ Mësarute huajëye cuañëñere isiyë, paire oicohua'i pa'iyere yë'ë mësarute oiyëje. Cui'ne mësarupi yecohua'ire se oijë pa'ijë'ë, caquë.

³⁵ Yecohua'ire mësarupi oicohua'i pa'ito paipi mësarute yë'ë ye'yacohua'ire pa'ë cajë ñaja'cohua'i a'ë.”

Pedro Coa Cosoquë Ca Ja'ñere Jesupi Quëapi

(Mt 26.31-35; Mr 14.27-31; Lc 22.31-34)

³⁶ Simón Pedropi Jesure capi:

“Ejaë, ¿më'ë jerona sai caquë'ni?”

Caquëna, Jesupi sehuopi:

“Yë'ë sai huë'ña më'ë tuni tja'ñe peoji, yure cato. Jeteyo'je më'ë cato tuija'quë a'ë, yë'ëre.”

³⁷ Ja maca Pedropi capi:

“Ejaë, ¿me yo'oquë yë'ë yure tuni tja'ñe peoquë'ni? Yë'ë cato tsoe cui'ñasiquëpi pa'iyë, më'ë do'ire yë'ëpi saicasi'i caquë.”

³⁸ Caquëna, Jesupi sehuopi:

“¿Nuñerepa yë'ë do'ire më'ëpi saicare pasi'i caquë cui'ñasiquëpi pa'i caquë? Nuñerepa cayë. Më'ëre ja yë'ta'a cura yë'ima'në më'ëpi toasoñe cosoja'quë a'ë, yë'ëre ñama'quë a'ë caquë.”

14

Jesu Api, Maija'quë Quëro Tja' Ma'a

¹ Ai co'a ju'ima'pë pa'ijë'ë. Diusuni necaiquë api cuasajë pa'ijë'ë. Cui'ne yë'ëreje necaiquë api cuasajë'ë.

² Ja'quë ma'tëmo huë'e cato jaiye pa'iji, pa'i huë'ña. Jaje pa'ima'co pa'ito, yë'ëpi mësarute tsoe quëara'huë. Jaje pa'iyë sëte yure cato saiyë, mësarü pa'ija'to ne de'huacasi'i caquë.

³ Saisiquëpi pa'i huë'ña ne de'hua tējini ja maca co'i coja'quë a'ë, mësarute sasi'i caquë. Saëna, mësaruje yë'ë pa'i huë'ñare pa'ijajë caquë.

⁴ Mësarü cato asayë, yë'ë sai huë'ña, cui'ne iti ma'aje asayë.

⁵ Caquëna, Tomásipi capi:

“Ejaë, yëquë huesëyë, më'ë sai huë'ña. ¿Me më'ë saija'a ma'aje asayë'ni?”

⁶ Caquëna, Jesupi capi:

“Yë'ë a'ë, ma'a cui'ne yë'ë a'ë, nuñerepa cui'ne yë'ë a'ë, pa'iyë. Yë'ëja'a tja'ñe pa'iji, ja'quëre. Peoji, yequëre tja'ñe.

⁷ Mësarupi yë'ëre ña tja'cohua'i pani ja'quëreje ña tja'ara'huë. Jaje pa'iquëta'are yure ite mësarü ña tja'añë, tsoe ite si'anë ñajë pa'icohua'i sëte.”

⁸Ja maca Felipepi capi:

“Ejaë, yëquëre iñojë'ë, më'ë ja'quëre. Coa ja mañase'e yëyë.”

⁹Caquëna, Jesupi sehuopi:

“Felipe mësarua ja're conï yë'ë tsoe pa'iyë. ¿Jaje pa'iquëta'are më'ë cato yë'ëre ti ñama'quë a'ë? Yë'ëni ñajë ja'quëreje ña'ne pa'iji. Jaje pa'ito ¿Me yo'oquë më'ë ja'quëre iñojë'ë caquë sequë'ni?

¹⁰¿Më'ë huesëquë yë'ëpi ja'quë ja're tsioni pa'iyë, pa'ina, ja'quëpi yë'ë ja're conï pa'iyë? ¿Cui'ne më'ë asama'ë pa'iquë ja pa'iyë? Yë'ë caye cato yë'ëse'e cuasayëpi caye pañë. Yë'ë ja'quë yë'ëre pa'iquëpi i co'amaña yo'oji.

¹¹Pëca ja'quë ja're conï pa'ire paji cajë cuasajë'ë. Cui'ne ja'quëpi yë'ë ja're conï pa'iji cajë cuasajë'ë. Panita'a jare asa tï'a'ne panije yë'ë yo'oyena ñajë de'hue cuasajë'ë, care paji cajë.

¹²Nuñerepa mësarute cayë. Yë'ëre ire papi caquë cuasaquëpi, yë'ë yo'o co'amañaje, yo'oja'quë api. Yë'ëpi yë'ë ja'quë quë'rona saquëna, ja do'ire ai seña maca de'o co'amañaje yo'oja'quë api.

¹³Mësarupi yë'ë mamina cajë seto yë'ëpi yo'oja'quë a'ë. Mamaquëpi pëca ja'quë de'oquërepa pa'iyere iñoja'quë caquë.

¹⁴Yë'ë mamina cajë sejëna, yë'ëpi yo'oja'quë a'ë, si'aye mësarua yëjë seña pa'ito.

De'o Joyore Jëjo Daoja'quë A'ë, Jesús Case'e

¹⁵Mësarupi yë'ëre oicohua'i pani yë'ë cuañese'ere sehuocaijë'ë.

¹⁶Mësarua ja're si'anë pa'ija'quëre yëquëre jëjo daojë'ë caquë ja'quëre sesi'i, mësarute cocai cui'ne quëcoye necaija'quëre.

¹⁷Jaë cato nuñerepa ca joyo pa'ija'quë api. Iye yeja pai jaëte pa tï'a'ne peoji, ite ñama'cohua'i cui'ne ite asama'cohua'i. Jaje pa'iquëta'are mësarua cato asayë, ite. Cui'ne ipi mësarua ja're pa'iji. Pa'isiquëpi ti mësarua ja're pani huesëja'quë api.

¹⁸Mësarute te'ohua'ire jëo sani huesoye paja'quë a'ë. Cui'naëpi pani coja'quë a'ë, mësarua ja're conï.

¹⁹Ëa maca cato pai yë'ëre ña'ne paja'cohua'i a'ë. Jaje pa'iquëta'are mësarua cato yë'ëre ñaja'cohua'i a'ë, yë'ë huajëquë pa'ina, mësarujë huajëcohua'i pa'ija'cohua'i sëte.

²⁰Ja mu'se mësarua yureta'a nuñerepa asaja'cohua'i a'ë, yë'ëpi ja'quë ja're conï pa'iyë. Pa'ina, mësarupi yë'ë ja're conï pa'iyë asaja'cohua'i a'ë. Cui'ne yë'ëpi mësarua ja're conï pa'iyë asaja'cohua'i a'ë.

²¹Ta'ne asaquëpi cui'ne yë'ë cuañese'ere sehuoquë yo'oquëpi, yë'ëre oiye iñoji. Jaje pa'ina, yë'ë ja'quëpi iteje oija'quë api. Oina, yë'ëje ite oija'quë a'ë. Jaje oi yë'ëpi ina tsio dani yë'ëse'e iñoja'quë a'ë.”

²²Judas Iscariote peoquëpi, yëquë Judaspi capi:

“Ejaë, ¿me yo'oquë yëquëna iñoja'quë a'ni, më'ëse'ere. Me pa'ina, iye yeja paina më'ë pa'iyë iñoama'ë pa'ija'quë a'ni?”

²³Caquëna, Jesupi sehuopi:

“Yë'ëre oiquëpi yë'ë cuañese'ere sehuoquë cui'ne yo'oji. Jaje yo'oquëni yë'ë ja'quëpi ite oija'quë api. Yë'ë ja'quëpi cui'ne yë'ëpi conï dani i ja're pa'ija'cohua'i a'ë.

²⁴Yë'ëre oima'quëpi yë'ë case'eje yo'oye paji. Iye coca mësarua yë'ë tse peoji. Yë'ëre jëjo daosiquë ja'quë tse a'ë.

²⁵Mësarua ja're ja yë'ta'a yë'ë pa'i maca si'aye cayë.

²⁶Jaje pa'iquëta'are de'o joyopi ja'quë yë'ë mami do'ire jëjo daoja'quë api. Jaëpi mësarute cocai cui'ne oicohua'i pa'ijëna, yëhuoja'quë api, si'aye yë'yaquë. Cui'ne si'aye yë'ë case'ere cuasa ñajaiñe necaija'quë api.

²⁷De'oye pa'iyere mësarute isicani saiye. Yë'ë de'oye pa'iyere isiyë, mësarute. Iye yeja pai de'oye pa'iyë a'ë cajë isiyëje pa'yere isima'ë pa'iyë. Ca'rama'pë pa'ijë'ë, cui'ne co'a ju'ima'pë pa'ijë'ë.

²⁸Yë'ë ja'quë yë'ë jerepa pa'i quë'rona saiye caquëna, mësarua asani ai sihuara'huë, yë'ëre oicohua'irepa pani. Mësarua tsoe asahuë, saisiquëpi cui'naëpi dani mësarua ja're pasi'i caquëna.

²⁹Iye cato cayë, jaje tï'a ja'ñe pa'ina, itipi tëto saina, ñani care papi cajë yë'ëre cuasajajë caquë.

³⁰Ai jaiye mësarua ja're caye pañë. Yure cato tsoe daiji, iye yeja cuañequëpi. Yë'ëre meñe cuañëne peoquëta'a yo'oji.

³¹Jaje tëto saiye pa'iji, ja'quëre yë'ë oiye paipi ñajajë caquë, cui'ne i cuañëne yo'oji cajë ñajajë caquë. Huëijë'ë. Sañu'u, tïrona.

- 1 Cuiya'i ñeje pa'i a'ë, yë'ë. Yë'ë ja'quë api, iti ñacaiquëje pa'i api.
- 2 Yë'ë capëa ipi të'ca tête jeaquëpi quëima' capëa. Jaje yo'oquë quëi capëare pase'e nëoquë api, ai quëija'quë caquë.
- 3 Mësaruru cato tsoe de'oye jëo nëcosicohua'i a'ë, yë'ë iye coca quëa do'ipi.
- 4 Yë'ëna tsiosicohua'irepa si'anë pa'ijë'ë, mësaruru cato, yë'ë mësaruru tsiose'ëje pa'ye. Iti capëse'e pani quëni tija'ne peoji, iti ñere pana tsiosicopi pa'iyë pani. Jaje cui'ne mësaruru yë'ë ja're tsiosicohua'ipi pa'ima'pë pani quëni tija'ne peoyë.
- 5 Yë'ë cato iti ñere pa'ë. Mësaruru cato iti capëa'ë. Yë'ë ja're tsioni pa'ina, cui'ne yë'ëpi i ja're tsioni pa'iquëpi jaiye iti ca quëine pa'iji. Pa'ina, mësaruse'e yo'o tija'ne ti peoyë, yë'ë peoquëna.
- 6 Yë'ë ja're cõni pa'ima'quë cato nejo cuãñoquë api. Nejo cuãñoi toa sua ja'ne soquë capëa cuñeñeje pa'yere tsi'soni ëoja'quë api.
- 7 Mësaruru yë'ë ja're tsiosicohua'ipi pa'ijë cui'ne yë'ë ye'yase'ëje huãnyema'cohua'ipi, mësaruru yëyere secohua'ipa'ito, si'aye mësaruru seña isija'quë a'ë.
- 8 Mësaruru jaiye de'o co'amaña quëineje pa'ye yo'ojëna, yë'ë ja'quëpi paini sihua cuãñoji. Jaje de'oye yo'ocaijë yureta'a mësaruru yë'ë ye'yacohua'irepa pa'iyë tija'ne.
- 9 Yë'ë mësarute oiye, yë'ëre ja'quë oiyeje pa'ye. Jaje pa'ina, yë'ë oiyeje pa'ijë'ë.
- 10 Yë'ë cuãnese'ere sehuocaijë cui'ne yo'oni yë'ë oiyeje pa'iyë. Ja'quë cuãnese'ere yë'ë sehuocai yo'oquëpi yë'ë ja'quë oiyeje pa'iyë, cui'neje.
- 11 Jare quëahuë, mësarute. Yë'ë ja're te'e sihuajë cui'ne sihuayepi tımësicohua'ipa'ijajë caquë.
- 12 Yë'ë cuãneña cato iye a'ë: Oijë'ë, yecohua'ire, yë'ë mësarute oise'ëje pa'ye.
- 13 Cajeohua'ire oi do'ire te'i jucacaiye a'ë, ai oiye. Yequë peoji, ja jerepa pa'ye paire oiye.
- 14 Mësaruru yë'ë cajeohua'ia'ë, yë'ë cuãnese'ere yo'oni.
- 15 Mësarute jo'yaohua'ire caye pañë. Te'e nuñerepa cajeohua'ire cayë, mësaruru yë'ë ñnosi do'ire, yë'ë ja'quë yë'ëre case'ere si'aye huesëma'pë asa do'ire. Jo'yaë cato huesëquë api, i ëjaë caquë yo'oye.
- 16 Mësaruru yë'ëre sahuani soima'pë paë'ë. Yë'ëpi mësarute sahuani soihuë. Soini cui'ne cuãnehuë, sani jaiye quëijë'ë caquë, ja quëinepi ti pa'ija'quë caquë. Jaje jaiye quëicohua'ipi yë'ë do'ipi seña, ja'quëpi mësaruru sese'ere si'aye isija'quë api.
- 17 Iye a'ë, mësarute yë'ë cuãneña: Sa'ne oijë pa'ijë'ë.

Iye Yeja Paipi Jesure Coejë Cui'ne Jesús Tsecohua'ire Coeyë

- 18 Iye yeja paipi mësarute coecohua'ipa'ito, yë'ëre du'ru coese'ere cuasajë oima'pë.
- 19 Mësaruru iye yeja acohua'ipa'ito mësarute otira'huë, iohua'ia' cajeohua'ire oiye. Jaje pa'iquëta'are yë'ëpi mësarute iye yeja acohua'ini sahuani soisi do'ire mësarute coeyë, iye yeja paipi, iye yeja acohua'ipa'ito do'ire.
- 20 Yë'ë mësarute case'ere cuasajë'ë. 'Necaiquë cato i ëjaëre tëtõ saisiquë peoji.' Jaje pa'iyë sëtë yë'ëre pani sañope yo'osicohua'ia' me mësarute sañope yo'oye pañëni cui'ne yo'oja'cohua'ia'ë. Cui'ne yë'ë ye'yayere sehuocaisicohua'ia' panita'a mësaruru ye'yaye sehuoja'cohua'ia'ë.
- 21 Si'aye jaje yo'oja'cohua'ia'ë, yë'ë do'ire cui'ne yë'ëre jëjo daosisiquëre huesë do'ire.
- 22 Yë'ë dani cama'quë pa'ito jaohua'ia' do'ia' peocohua'ia' patira'huë. Jaje pa'iquëta'are yure cato johua'ia' tayo yo'o do'ire ca de'hua tija'ne peoyë.
- 23 Yë'ëre coequë cato ja'quëreje coeji.
- 24 Johua'iquë ñajëna, pa'i yo'o tija' ma'ñere yë'ë yo'oma'quë pa'ito sañope yo'o ja'ne peocohua'ia' patira'huë. Jaje pa'iquëta'are yure cato yë'ë yo'oquëna, ñahuë. Jaje ñasicohua'ita'a yë'ëre cui'ne ja'quëre coeyë. Ja' do'ire do'ia' quë'iohua'ia' pa'iyë.
- 25 Iye cato yo'oyë, iohua'ina cuãneña toyase'epi tija'quë caquë nëina. Toyase'epi caji: 'Do'ijë peoquëni yë'ëre coeyë.'
- 26 Jaje pa'iquëta'are Maija'quë quë'ropi paire cõcaiquëre cui'ne nuñerepa yo'ojoyere yë'ë jëjo daoquëpi, ja'ëpi yë'ë ayere cacaija'quë api.
- 27 Mësaruru yë'ë ayere cacaija'cohua'ia'ë, yë'ë ja're cõni ai tsoe pa'isicohua'ia' sëtë.

16

- 1 Yë'ëre cuasayere ne hue'soma'pë mësaruru taiña pajajë caquë iye mësarute cahuë.
- 2 Pa'i tsi'si huë'ñapi mësarute eto saoja'cohua'ia'ë. Jaje yo'ojë mësarute huani jëaja'cohua'ia'ë. Jaje yo'ojë Diosuni de'oye necaiyë cuasaja'cohua'ia'ë, huaicohua'ipi.
- 3 Iye cato yo'oja'cohua'ia'ë, ti ja'quëre cui'ne yë'ëreje asama'cohua'ipi.
- 4 Iye cato mësarute cayë, iti tija'asi maca yë'ë case'ere cuasa ñajajajë caquë. Mësaruru ja're pa'ia' do'ire jaje caye pahüë, ja'a huëo maca.

⁵ Jaje pa'iquëta'are yure cato saiye, yë'ëre jëjo daosiquë ja're pasi'i caquë. Mësarü aquëje ti te'ijje yë'ëre seni asaye paji, jeronä më'ë saiquë'ni caquë.

⁶ Coa ai jerepa oicohua'i de'lo huesëhuë, iyere caëna.

⁷ Nuñerepa mësarute cayë. Yë'ëpi saquëna, jerepa de'oye pati'ñe pa'iohua'i a'ë, mësarü. Yë'ëpi saima'quë pa'ito, mësarute coçai cui'ne sihua'ëaye joyona necaiquë daiye peoji. Yë'ëpi saisiquë pani jëjo daoye pa'iji, ite.

⁸ Ipi daisi maca quëaja'quë api, co'ayere pai yo'oyë, caquë. Nuñerepa yo'oye pa'iji, quëasipi, cui'ne tayo yo'osicohua'ijje sai de'huaye pa'iji quëasipi.

⁹ Yë'ëre ire papi cajë cuasama' do'ire, tayo yo'ocohua'i pa'iyë.

¹⁰ Nuñerepa de'lo ma'are iñoja'quë api, yë'ëpi ja'quë quë'rona saisi do'ire, ja maca mësarü yë'ëre ña'ñe peoji.

¹¹ Iye yeja cuañequëpi i tayo yo'lo do'ire nejo cuañosiquë pa'i do'ire paipi asa ti'aja'cohua'i a'ë, Diusupi johua'i tayo yo'lo do'ire sai de'hua cuañe'ne pa'iji, ca ja'ñere ipi quëaquëna.

¹² Ja yë'ta'la jaiye mësarute caye payë. Jaje pa'iquëta'are yure cato mësarü asa ti'añere peoyë.

¹³ Nuñerepa ca joyopi dani mësarute ye'yaja'quë api, si'aye nuñere pare. Coa ise'e cuasayere cama'ë pasipi. Si'aye asase'ere casipi. Cui'ne mësarute quëasipi, yequë mu'se tëto sai ja'ñere.

¹⁴ Yë'ëre de'loquëre papi caja'quë api, yë'ë tse ayere paquëpi mësarute quëa iñoja'quë api.

¹⁵ Si'aye ja'quë paye yë'ë tse a'ë. Jaje pa'ina, cahuë. Yë'ë tserre de'lo joyo cato paja'quë api. Jaje paquëpi yë'ë tserre mësarute se iñoja'quë api.

Sihuayere Tîmë Cuañe

¹⁶ Èa maca cato, yë'ëre ña'ñe paja'cohua'i a'ë, mësarü. Pa'isicohua'ita'a ai tsoe maca pani ñaja'cohua'i a'ë, yë'ëre. Ja'quë quë'rona saiye, yë'ë."

¹⁷ Ja maca i ye'yacohua'i acohua'ipi sa'ñe se'i'ë, ñeje cajë:

"¿Me caquë jaje caquë'ni? Èa maca cato yë'ëre ña'ñe paja'cohua'i a'ë, cui'ne yequëje caji ai tsoe maca pani ña coja'cohua'i a'ë, yë'ëre. Ja'quë quë'rona saisi do'ire jaje pasipi caji.

¹⁸ ¿Iquere caquë jaje èa maca caquë'ni? Jaje cato me asa ti'añe'ni huesëyë, i caye."

¹⁹ Jaje yo'ojë cajëna, Jesús cato asapi, johua'i seni asa'ñu'u cajë yo'oye. Jaje pa'ina, capi:

"Mësarute cahuë, èa maca cato yë'ëre ña'ñe paja'cohua'i a'ë, ai tsoe maca pani yë'ëre ña coja'cohua'i a'ë. ¿Ja case'ere mësarü sa'ñe se'jë yo'ojë caye?"

²⁰ Nuñerepa mësarute cayë. Mësarü airepa oija'cohua'i a'ë, cui'ne co'la ju'ijë pa'ija'cohua'i a'ë. Jaje pa'ijëta'are iye yeja pai cato sihuaja'cohua'i a'ë. Jaje oijë pa'isicohua'ita'are mësarü oise'epi yequë mu'se sihuayere pönëja'coa.

²¹ Nomiopi tsj coa huëosico pani ai yo'ocoa, tsjitu'ure pa maca ti'aëna, a'si ju'io. Jaje yo'osicota'a tsihua'ë macare të'ya dani a'sise'e huañeyecoa, huajë tsjitu'upi iye yejare pa'ina, sihuaco.

²² Jaje cui'ne mësarüje ai yo'oja'cohua'i a'ë, yure cato. Jaje pa'iquëta'are yë'ëpi col'ini mësarute ña coja'quë a'ë. Ja maca mësarü sihua huajëja'cohua'i a'ë. Ja mësarü sihuayere yecohua'ijje jioye ti peoji.

²³ Ja mu'se cato yë'ëre seni asaye ti peosipi. Nuñerepa mësarute cayë. Ja'quëpi mësarute isija'quë api, si'aye mësarü se'ñe yë'ë mamipi cajë se'jëna.

²⁴ Iye macaja'a mësarü yë'ë mamipi cajë se'ñe pahué, yureta'a se'jë'ë. Se'jëna, isija'quë api. Isiquëna, sihuaja'cohua'i a'ë.

Iye Yejare Ñese Quëcoye

²⁵ Mësarute cahuë. Iye coca pai yo'oye ayena conï cuëcucë ñaquë jaje casiquëta'are yequë mu'se ti'aja'coa, pai yo'oye ayena conï cuëcuema'ë caye, nuñerepa caja'quë a'ë, ja'quë ayere tiña asayerepa.

²⁶ Ja mu'se cato mësarü yë'ë mamipi cajë seja'cohua'i a'ë.

²⁷ Tsoe ja'quëpi mësarute oi paji, mësarupi yë'ëre oi do'ire cui'ne mësarupi yë'ëre Diusu quë'ropi daisiquë api, cajë asa do'ire.

²⁸ Ja'quë quë'rore papi etani iye yejana daisiquë a'ë. Jaje pa'iquëta'are yure cato iye yejapi jëoni ja'quë quë'rona co'ija'quë a'ë."

²⁹ Ja maca i ye'yacohua'ipi cahuë:

"Yureta'a më'ë tiñarepa cayë, yequena conï cuëcucueye peoye.

³⁰ Yureta'a më'ëre ñajë cui'ne asayë, si'aye ta'ñe asaquëre papi. Jaje pa'ini yecohua'ijje më'ëre seni asa'ñu'u cajë yo'oye peoji. Jaje pa'ina, më'ëre Diusu quë'ropi daisiquë api cajë asayë, yëquë."

³¹ Cajëna, Jesupi capi:

"¿Jaje pa'ito yureta'a asa ti'are paye?"

³² Tsoe t'ł'aji, iti yo'o maca. Yure iti macare pa'iyë, mësarü yë'ëre te'ire jeoni pai ñape hua saija'cohua'i a'ë. Ja maca te'i pëaja'quë a'ë. Jaje pëasiquëta'a te'i pa'iyë paja'quë a'ë. Yë'ë ja'quëpi yë'ë ja're conï pa'ija'quë api.

³³ Iye cato cayë, mësarute yë'ë ja're conï pa'ijë ai yo'oye peoye de'oye pa'ijë'ë caquë. Iye yeja cato mësarü ai yo'oye pa'iji. Jaje pa'iquëta'are quëcocoqua'i pa'ijë'ë. Yë'ë je'quë iye yejare ñese quëcoquë paë'ë."

17

Jesús I Ye'yacohua'ire Secacaise'e

¹ Jaje ca tējini Jesús ma'tëmona ñaquë capi:

"Ja'quë tsoe t'ł'api, iti yo'o maca. Më'ë mamaquëre de'oquëre papi iñocajj'ë, më'ë mamaquëpi më'ëreje de'oquëre papi caquë iñoja'quëre.

² Më'ëpi më'ë mamaquëre iye yeja paire cuñequëre nehuë, më'ë isicohua'ire ti pani huesëye isijaquë caquë.

³ Më'ëre te'i api Diosu asajë cui'ne më'ë jëjo daosiquëre Jesucristore asaye a'ë, ti pani huesëye.

⁴ Iye yejare pa'i më'ëre de'oquëre papi caquë iñoquë më'ë cuñese'ere ne saohuë.

⁵ Iye yeja peo'në yë'ë më'ë ja're pa'i de'oyere pare pase'eje pa'ye yure yë'ëre isi coj'ë, ja'quë.

⁶ Iye yeja acohua'ini më'ë yë'ëre sahuani isisicohua'ire yë'ëpi më'ë pa'iyere iñohuë. Më'ë tsecohua'ini paë'ë. Jaje pa'iohua'ini yë'ëna më'ëpi isina, iohua'ipi më'ë cocare de'oye sehuojë yo'ohuë.

⁷ Yure cato jaohua'i asayë, më'ë tse a'ë cajë më'ë yë'ëre isise'ere.

⁸ Jaje pa'ina, de'oye sehuojë asahuë, më'ë yë'ëre isisi coca. Asa t'ł'are pahuë, më'ë quë'ropi daisiquë api cajë, cui'ne më'ëpi jëjo daosiquë api cajë asahuë.

⁹ Jaohua'i do'ire caquë më'ëre señë: Coa iye yeja acohua'ini caquë seña pañë. Më'ë yë'ëre isisicohua'ini caquë seña, më'ë tsecohua'ini.

¹⁰ Yë'ë paye më'ë tse a'ë, cui'ne më'ë payepi yë'ë tse a'ë. Jaje pa'ina, yë'ë de'oyere jaohua'ipi iñoñë.

¹¹ Yë'ë iye yejare pa'iyë paja'quë a'ë. Paquëta'are jaohua'ita'a iye yejare pa'ija'cohua'i a'ë. Yë'ë cato saiye, më'ë ja're pa'ija'quëpi. Ja'quë de'oquërepa jaohua'i mañare ñacajj'ë, më'ë tutupi më'ë yë'ëre isisicohua'ire, më'ë cui'ne yë'ë conï pa'iyeye pa'ye te'ije pa'iohua'i pa'ija'cohua'ire.

¹² Yë'ë iye yeja pa'i maca më'ë tutupi de'oye ñacaë'ë, iohua'ire, më'ë yë'ëre isisicohua'ire. Ñacaina, te'ije ne huesëye papi, noni ne huesësiquëse'e ne huesëpi toyase'epi t'ł'aguëna.

¹³ Yure cato më'ë pa'i hue'ñana saiye. Jaje pa'iquëta'are yë'ë ja'yë'ta'a iye yejare pa'i do'ire cayë, iye coca, jaohua'ije yë'ë sihuayeje pa'ye sihuajajë caquë.

¹⁴ Më'ë cocare jaohua'ina isihuë. Isina, iye yeja acohua'ipi iohua'ire coeyë, iye yeja acohua'i peo do'ire. Yë'ëje iye yeja aquë peoyë.

¹⁵ Iye yejapi jaohua'ire etoni sajë'ë caquë seña pañë. Yë'ë cato seña, më'ëpi ñacaina, huatipi josa yo'oye pajaquë caquë.

¹⁶ Jaohua'i cato iye yeja acohua'i peoyë. Yë'ëje iye yeja aquë peoyë.

¹⁷ Më'ë tsecohua'irepa pa'ija'cohua'ire de'ocohua'ire pare nejë'ë, më'ë cocapi. Më'ë coca cato nuñere pa'ë.

¹⁸ Më'ë yë'ëre iye yejana jëjo daose'eje pa'ye cui'ne yë'ëje jaohua'ire iye yejana jëjo saoyë.

¹⁹ Jaje pa'ina, jaohua'ini caquë yë'ëpi më'ëna isiyë, jaohua'ije nuñerepa coca do'ipi më'ëna isisicohua'i pa'ijë më'ë yëyere yo'ojajë caquë.

²⁰ Jaohua'ise'ere caquë secacaiye pañë, cui'ne iohua'i quëajëna, jeteyo'je asani itire pa'ë cajë cuasaja'cohua'ireje caquë secacaiyë.

²¹ Si'aohua'i jaohua'ije te'ije pa'iohua'i pa'ijajë caquë seña, te'ije pa'iohua'i maina tsioni pa'ijaquë caquë. Ja'quë, yë'ë cui'ne më'ë conï tsioni te'ije pa'iohua'i pa'iyeye pa'ye pa'ijajë jaohua'ije. Jaje tsiosicohua'ipi te'ije pa'iohua'i pa'ijëna, iye yeja acohua'ipi ñajë më'ëpi yë'ëre jëjo daopi cajë sehuoja'cohua'ire.

²² Jaohua'ire isihuë, de'oyere pare më'ë yë'ëre isise'ere, te'ije pa'iohua'i pa'ijajë caquë, më'ë cui'ne yë'ë te'ije pa'iohua'i pa'iyeye cui'ne pa'ijajë caquë.

²³ Yë'ëpi iohua'i ja're conï pasi'i. Pa'ina, më'ëpi yë'ë ja're conï pa'ijë'ë. Pa'ina, iohua'ipi te'ije pa'iohua'irepa pa'ija'cohua'ire. Jaje pa'ijëna, iye yeja paipi, më'ëpi yë'ëre jëjo daopi cajë asaja'cohua'i a'ë, më'ëpi jaohua'ire yë'ëre oiyeje pa'ye oina ñajë.

²⁴ Ja'quë më'ëpi yë'ëre isihuë. Jaje pa'ina, më'ëre seña, jaohua'ije yë'ë pa'i hue'ñare pa'ijajë caquë, pa'ijë më'ë yë'ëre de'oyerepa isise'ere ñajajë. Yë'ëre më'ë cato ai oiquë a'ë, ja'yë'ta'a yeja de'huama'nëpi.

²⁵ Yé'è ja'què nuñerepa yo'oquë, më'ère iye yeja pai asa tì'añe pañë. Jaje pa'iquëta'are yé'è cato më'ère asayë icohua'ije më'è jëjo daosiquë api cajë asayë, yé'ère.

²⁶ Yé'èpi ñohuë, më'è paliye jaohua'ire. Ja yé'ta'api ñoquë pasi'i, ai jerepa tñña. Jaje ñoquëna, më'è yé'ère oiyepi ñohua'ini pa'ijaquë pa'ina, yé'èpi ñohua'ija're cõni pasi'i."

18

Jesure Tseani Sase'e

(Mt 26.47-56; Mr 14.43-50; Lc 22.47-53)

¹ Iye ca tējini jeteyo'je Jesús saji'i, i ye'yacohua'i ja're cõni Cedrón a'ri tsiaya je te'tena. Jarote a'ri tsio paji'i. Jarona Jesús i ye'yacohua'i ja're cõni cacapi.

² Judasje, coso yehuoja'quëje jaro ñaquë paji'i. Jarona Jesús si'anë i ye'yacohua'i ja're tsi'si hue'ña paji'i.

³ Pa'ina, Judas iti ñaquë sète iti hue'ñana sa tì'api, soldado pai ja're, cui'ne Maija'quë hu'è ñacaicohua'i ëjahua'i jëjo daocohua'i ja're, cui'ne fariseo pai jëjo daocohua'i ja're. Maija'quë hu'è ñacaicohua'i ëjahua'i jëjo daocohua'i cato Maija'quë hu'è ñacai soldado pai pa'è. Si'ahua'i huajo cui'ñasicohua'ire papi da'è, toa tsëopëana cui'ne soquë pena tsëosicohua'ipi.

⁴ Jesupi ñohua'i yo'o ja'ñe asaquë du'ru sani ñohua'ire seji'i:

"¿Neni co'eye'ni?"

⁵ Caquëna, ñohua'ipi cahuë:

"Jesús Nazaret aquëni co'eyë."

Cajëna, Jesupi sehunoquë capi:

"Yé'è j a'è."

Judasje ñohua'i ja're cõni paji'i.

⁶ Jaje caquëna, asani co'ye jëa saoni yejana tata omehuë.

⁷ Ja maca Jesús tñjupë seji'i, ñohua'ire cahuë:

"¿Neni co'eye'ni?"

Caquëna, ñohua'ipi cahuë:

"Jesús Nazaret aquëni co'eyë."

⁸ Cajëna, Jesús capi, ñohua'ire:

"Tsoe mësarupi asahuë. Yé'è j a'è. Yé'èni co'eye sète jaohua'ire josa yo'oma'pë pa'ijë'è, ñohua'ise'e saijajë."

⁹ Jaje Jesús case'e tì'api, i case'e cato caji:

"Më'è yé'ère ñisicohua'ire ne huesoye pahuë, te'ireje."

¹⁰ Ja maca Simón Pedropi i hua'ti dutani ëja t'è'hui cajorose'e t'eto huatopi. I t'etosiquë cato Maija'quë hu'è ñacaicohua'i ëja'ère necaiquë paji'i. I mami cato Malco hue'equë paji'i.

¹¹ Jaje yo'oquëna, Jesupi Pedrore capi:

"Hua'tire jo ju'i hue'ñana jua nëojë'è. Iye jare jaje ai yo'oye pa'iji, yé'è ja'quëpi isito."

Maija'quë Hu'è ñacaicohua'i Éja'èrepá Qu'ërona Éja'è Jesure Sase'e

(Mt 26.57-58; Mr 14.53-54; Lc 22.54)

¹² Ja maca soldado pai cui'ne ñohua'i ëja'è cõni, cui'ne judío pai soldado cõni Jesure tseani huehuë.

¹³ Ja jeteyo'je Anás hu'è'ena sahuë. Anás mamacorepa do'ire Caifás cato Anás huau paji'i. Ja'èpi ja t'ècahuë cato Maija'quë hu'è ñacaicohua'i ëja'è paji'i.

¹⁴ Jare iquë Caifáspi ca nëopi, judío pa'ire te'i mai aquëpi jucacaiye pa'iji, si'a judío pai do'ire.

Pedropi Jesure Ñama'quë A'è Case'e

(Mt 26.69-70; Mr 14.66-68; Lc 22.55-57)

¹⁵ Simón Pedro cui'ne yequë i ye'yequë cõni tu'è, Jesure. Jesús ye'yaquë cato Maija'quë hu'è ñacaicohua'i ëja'è ñaquë paji'i. Jaje pa'i do'ire cacapi, Jesús ja're cõni, ëja'è hu'è hue'se daripëna.

¹⁶ Jaje pa'iquëta'are Pedrose'e hue'se eta sa'rona pëapi. Jaje pëaëna, Maija'quë hu'è ñacaicohua'i ëja'è ñaquëpi Jesús ye'yaquëpi etani eta sa'ro ñacore coca caní Pedrore copi, sa'nahuëna.

¹⁷ Ja maca eta sa'ro ñacopi Pedrore seco'è:

"¿Më'è i ye'yacohua'i aquë pa'ima'quë?"

Seona, Pedropi capi:

"Paj'è, yequë a'è."

¹⁸ Ai sësëye sète, jo'yaohua'i cui'ne policia pai cõni jeca dani suani toa nehuë. Neni jarote ñu'ijë sësëquëna, cuijé pa'è. Pedroje jarote paji'i, sësëquëna, cuiquë.

Maija'quë Huë'e Ñacaicohua'i Ējaëpi Jesure Sese'e

(Mt 26.59-66; Mr 14.55-64; Lc 22.66-71)

19 Maija'quë huë'e ñacaicohua'i Ējaëpi Jesure se huëopi, jecohua'i a'ni, më'ë ye'yacohua'i caquë, cui'ne iquere më'ë ye'yaquë paquë'ni caquë seji'i.

20 Seina, Jesupi capi:

“Si'a pai asajëna, yë'ë cato casiquë a'ë. Si'anë pai tsi'si sitona ye'yaquë pa'isiquë a'ë. Cui'ne Maija'quë huë'ena ye'yaquë pa'isiquë a'ë, judío pai tsi'si huë'ñana. Yë'ë cato yo'osiquë a'ë, yahue yo'oma'ë pa'isiquë a'ë.”

21 ¿Me yo'oquë yë'ëre seni asaquë'ni? Seni asajë'ë, yë'ë caquëna, asasicohua'ini, jaohua'ipi quëajajë yë'ë case'e. Jaohua'ipi asayë, yë'ë case'e si'aye.”

22 Jaje Jesús ca maca Maija'quë huë'e ñacai policia'ipi ito maca nëcaquëpi tsiana tëttoquë capi:

“¿Jaje io Maija'quë huë'e ñacaicohua'i Ējaëre sañope sehuocoa?”

23 Caquëna, Jesupi capi:

“Quëajë'ë. ¿Iquere yë'ë co'aye care'ni? ¿Yë'ë case'epi de'oye pa'ito me yo'oquë të'caquë'ni, yë'ëre?”

24 Ja maca Anáspi Maija'quë huë'e ñacaicohua'i Ējaë Caifás quë'rona sëasiquëni jëjo saopi.

Pedropi Jesure Ñama'quë A'ë, Ca Cose'e

(Mt 26.71-75; Mr 14.69-72; Lc 22.58-62)

25 Pedro jaje yo'o maca cato toare cui nëcapi. Nëcaquëna, ite cahüë:

“¿Më'ëje i ye'yacohua'i aquë pa'ima'quë?”

Cajëna, Pedropi cosoquë capi:

“Pajë'ë. Ñama'quë a'ë, ite.”

26 Ja maca Maija'quë huë'e ñacaicohua'i Ējaëre necaicohua'i aquëpi seji'i, Pedro cajoro tëtto tëasiquë, do'iquëpi ñeje caquë:

“¿Më'ëje pa'ini yë'ë ñasiquëta'a jeto tsio?”

27 Caquëna, Pedropi tujupë cosopi. Coso macarepa curajë yëji'i.

Pilato Ña Huë'ñare Jesús Pa'ise'e

(Mt 27.1-2, 11-14; Mr 15.1-5; Lc 23.1-5)

28 Ja maca Caifás huë'epi Jesure Pilato huë'ena sahuë. Ja maca cato ñata tome huesë maca pajji'i. Judío cato cacama'pë pa'ë huë'e, si'si neñere coejë, johua'ipi jaronca cacasicohua'i pani Egíptopi Israel pai etajë pa'ise'ere cuasajë aiñere para'huë.

29 Jaje pa'ina, Pilatopi etani johua'ire capi:

“¿Ique do'ire iquëre sañope caye'ni?”

30 Caquëna, johua'ipi sehuohuë. Do'i quë'i peoto yëquë më'ë quë'rona daye para'huë.

31 Ja maca Pilatopi capi:

“Sajë'ë, iquëre. Sani mësarü cuañese'e pa'iyëje do'i quë'i pa'ito yo'ojë'ë.”

Caquëna, judío paipi cahüë:

“Jaje pa'iquëta'are yëquë judío pai cato paire huani jëoñe cuañeñe ti peoyë.”

32 Jaje yo'ojëna, Jesús i ju'i ja'ñe ca nëose'e t'i'api.

33 Pilato cui'naëpi i huë'ena cacani Jesure soini seji'i:

“¿Më'ë judío pai Ējaëre päë?”

34 Caquëna, Jesupi capi:

“¿Më'ëse'e cuasaquë caquë, panita'a yecohua'ipi carena, caquë?”

35 Caquëna, Pilatopi sehuopi:

“¿Judíoje ñani yë'ë cato? Më'ë paipi cui'ne Maija'quë huë'e ñacaicohua'i Ējaohua'ipi yë'ëna dani isihuë, më'ëre ja do'ire cayë. ¿Iquere yo'o u'ni?”

36 Caquëna, Jesupi sehuopi:

“Iye yeja yë'ë cuañe huë'ña peoji. Iye yeja yë'ë quë'ro pa'ito, yë'ë te'te pa'icohua'ipi uihuara'huë, yë'ëpi judío paini tseja cuañoñe pajajë cajë. Yë'ë cuañe huë'ña peoji, iño.”

37 Ja maca Pilatopi capi:

“Jaje pa'ito judío pai Ējaë, më'ë.”

Caquëna, Jesupi capi:

“Pai Ējaë'ë, më'ë cayëje. Peosiquëpi pai de'oni yë'ë cato iye yejana daisiquë a'ë, nuñerepa cocare casi'i caquë. Nuñerepa cocare sehuocacohua'ipi yë'ë cayë asacaiyë.”

Jesure Huani Jëoñe

(Mt 27.15-31; Mr 15.6-20; Lc 23.13-25)

38 Caquëna, Pilatopi capi:

“¿Ique a'ni, nuñerepa?”

Jaje seni tējini, Pilato tujupë pai ja're coca casi'i caquë, etani capi:

“I co'aye yo'ose'e yë'ë t'i'ama'ë pa'iyë, iquëre.”

³⁹ Mésaru cato Egiptopi Israel pai etajë pa'ise'ere cuasajë yo'o mu'seña tseasicohua'ire te'ire etocohua'i a'ë. ¿Jaje pa'iyë sête mésaruni eni etoye yëye'ni? ¿Judío pai ëjaëni etoye?"

⁴⁰ Jaje ca maca si'a pai cui çoreña:

“¡Jaëre cato etoye peoji! Barrabásni eto saojë'ë.”

Iquë Barrabás cato co'amaña yahue ïmaquë paji'i.

19

¹ Jaje cajëna, asani Pilatopi Jesure si'sejë'ë caëna, si'sehuë.

² Soldado pai Jesure miupi maro tēosicopi sïopëna puahüë. Cui'ne nea maja'i ju'i çare Jesure suñacaë'ë.

³ Ja jeteyo'je ï quë'rona tsiojaijë cahuë:

“¡Judío pai ëjaëre pa'ë, më'ë!”

Jaje cajë tsiana tē'cahuë.

⁴ Tjjupë Pilato eta çoni capi:

“Asajë'ë. Iquë co'aye yo'ose'e tï'ama'ë pa'iyë. Cui'naëni mésaruni quë'rona da çonë, do'i peoquë api cajë ñajajë caquë.”

⁵ Jesupi miu maro pu'i cui'ne nea maja'i ju'i ca ju'i etaquëna, ja maca Pilatopi capi:

“¡Ñajë'ë. Iñore pa'iji, iquë!”

⁶ Maija'quë huë'e ñacaicohua'i ëjaohua'i cui'ne policia pai ñani cuihuë:

“¡Queñe pa'iji. Queñe pa'iji!”

Jaje cuijëna, Pilatopi capi:

“Sani quejë'ë, mésaruni. Yë'ë cato tï'añe pa'huë, ï co'aye yo'ose'e.”

⁷ Caquëna, judío paipi sehuohuë:

“Yëquë cuañese'e payë. Jaje pa'ina, yëquë cuañese'eje ju'iñe pa'iji, Diusu mamaquë a'ë casi do'ire.”

⁸ Jare Pilato asani ai jerepa ca'rapì.

⁹ Ja maca cui'naëpi huë'ena cacani seji'i, Jesure:

“¿Jero aquë a'ni, më'ë caquë?”

Seina, Jesús ti sehuoma'ë paji'i, te'o macareje.

¹⁰ Ja maca Pilato capi:

“¿Yë'ëre sehuocaiye paquë? ¿Huesëquë cui'ne yë'ëpi më'ëre queja'a tutu cui'ne më'ëre eto sao tutuje paye?”

¹¹ Caquëna, Jesupi capi:

“Diusupi më'ëre ja tutu isima'quë pa'ito më'ë yë'ëre yo'o tï'añe ti peora'pi. Jaje pa'ina, yë'ëre tseani më'ëna isisiquëpi më'ë jerepa jai do'i paji, tayo do'ire.”

¹² Jare ja macapi Pilato cato Jesure eto sao huasosi'i caquë co'epi. Co'equëta'are judío paipi jerepa cuihuë, ñeje:

“Jaëni eto saokuë pani César cajei peoja'quë a'ë, më'ë. ¡Pai ëjaëre pa'ë caquë yo'oquë cato César te sañope yo'oquë api!”

¹³ Ja maca Pilato iyere asani Jesure hue'sena etoni pai yo'ose'e ne de'huaquë ña de'hua hue'ñana ja'rupi, hebreo pai coca cato Gabata hue'yo hue'ñana. Jaje cani cayë, “Quënapì nesico”.

¹⁴ Ja yë'ta'a Egiptopi Israel pai etajë pa'ise'ere cuasajë yo'o mu'se tï'añe pa maca mu'se joporepa pa'ina, yo'ohuë, te'e mu'se caraquëna. Ja maca judío paire Pilatopi capi:

“¡Iquë mésaruni ëjaërepa pajë'ë!”

¹⁵ Jaje caquëna, iohua'ipi cahuë:

“¡Ju'ijaquë, ju'ijaquë! ¡Queñe pa'iji!”

Cajëna, Pilatopi capi:

“¿Yë'ëpi mésaruni ëjaëre queja'quë a'ni, jaje ca ja'ñe?”

Caquëna, Maija'quë huë'e ñacaicohua'i ëjaohua'ipi cahuë, ïte:

“Yequë ëjaëre pare peoyë. Coa César se'e yëquë ëjaë pa'iji.”

¹⁶ Jaje ca tējini Pilatopi Jesure iohua'ina isipi quejajë caquë. Isina, iohua'ipi sahuë.

Jesure Queñe

(Mt 27.32-44; Mr 15.21-32; Lc 23.26-43)

¹⁷ Jesús jaropi etani ïte queja'a sarahua çoni saji'i, pai sïopë tara hue'e hue'ñana hebreo pai coca cato Gólgota hue'yo hue'ñana.

¹⁸ Jarona ïte quehuë. Yecohua'ire cayaohua'ire ï ja're çoni quehuë. Jesuni jopore pana nëcojë yecohua'ini ï ëja tē'tena cui'ne ï ari tē'tena nëcohuë.

¹⁹ Pilatopi cuañepi cruzu ëmëje'ena: JESÚS NAZARET AQUË JUDÍO PAI ËJAËPI toyasicore deojë'ë caquë.

²⁰ Jaje toyasicore jai pai judío pai ñahuë, Jesure que sitopi pai daripë ja'yere pa'i do'ire. Toyasico cato paji'i, hebreo coca, griego coca, cui'ne latin coca.

²¹ Jaje pa'ina, Maija'quë huë'e ñacaicohua'i ëjaohua'i judío paipi cahuë, Pilatore:
"Toyama'ë pa'ijë'e 'Judío pai ëjaëpi' caquë coa toyajë'e, ñeje, 'Judío pai ëjaë'e caquë api.' Jare toyajë'e."

²² Cajëna, Pilatopi sehuopi:

"Yë'ë toya huesosico cato jaje pa'iji. Yeque ponañe peoji."

²³ Ite quësi jeteyo'je soldado paipi Jesús ju'i care ñni cajese'e pa'i caña huahuehuë, pai ñape cui'na ja'yese'e. Cui'ne camisaje i'ë, itena te'opi tsoa ca pa'iyë sëte,

²⁴ sa'ñe johua'i cahuë:

"Nanë ye'saye pañu'u, coa iti de'hue nesiquëpi iote paja'quëre."

Jaje cajë yo'o maca tsoe t'i'api, toyase'e ñeje cayepi:

"Yë'ë ju'i care pai ñape huahuehuë. Nepi paja'cohua'i a'ni, cajë." Jaje soldado pai yo'ohuë, iti case'eje pa'ye.

²⁵ Cruz yë'quë macare Jesús pëca ja'co cui'ne jo maja'yo, cui'ne Cleofas nëjo María, cui'ne yequë María Magdalena paë'ë.

²⁶ Pa'ijëna, pëca ja'core Jesús ñani, cui'ne i ai oi ye'yaquë pa'isiquëpi jo yë'quë macare nëcaquëna, ñani capi:

"Nomio jaë api, më'ë mamaquë."

²⁷ Ja jeteyo'je i ye'yaquëre capi:

"Jao, më'ë ja'co."

Jare iti casi macapi i ye'yaquëpi i huë'ena sai sapi, iote.

Jesús Ju'ise'e

(Mt 27.45-56; Mr 15.33-41; Lc 23.44-49)

²⁸ Ja jeteyo'je Jesús tsoe si'aye ne saose'e sëte toyase'e cayepi t'i'ajaquë caquë capi:

"Oco ëaji."

²⁹ Jarote o'sa çono tımësicopi ñuco'ë. Ñu'iona, ja maca ca'cona saëni soquë tarapëna huëni i yë'opona uçujaquë cajë yo'ojëna.

³⁰ Jesupi o'sa cuiya'i çonore uçuipi. Uçuni capi:

"Si'aye t'i'api, yureta'a."

Jaje canı meñe sïopë ne meni, jıni huesëpi.

Jesús Coripa Quë'rona Soldadopi Totase'e

³¹ Ja yë'ta'a Egiptopi Israel pai etajë pa'ise'ere cuasajë yo'o mu'se t'i'ama'ë paji'i. Ja mu'se cato huajë mu'se paji'i. Jaje pa'i do'ire co'aye cruzure ju'isicohua'ipi dete ma'ñe cajë Pilatore sei'ë, quësicohua'ire quëñase'e t'ë'ca jë'yeni tiona saajajë cajë.

³² Ja maca soldado paipi sani du'ru aquëre pani quëña t'ë'ca jë'yehuë, cui'ne yequëreje t'ë'ca jë'yehuë, Jesús ja're quësicohua'ire.

³³ Jaje yo'oni Jesús quë'rona sa tsiojaijë ñajëna, tsoe ju'isiquë paji'i. Pa'ina, ña jujani quëña t'ë'ca jë'yeye pahüë.

³⁴ Jaje pa'iquëta'are soldadopi uiyopi totapi. Coripana totaquëna, tsie cui'ne oco etapi.

³⁵ Iye quëaquë cato iti ñasiquëpi quëaji cui'ne nuñerepa caji. Nuñerepa quëaji iti asasiquëpi, mësarureje care paji cajë asajajë caquë.

³⁶ Iye cato yo'ohuë, ñeje toyase'epi t'i'ajaquë cajë, itipi caji: "I quëña t'ë'ca jë'yeye paja'cohua'i a'ë."

³⁷ Yequë hue'ña toyase'epi caji: "Iohua'i a'si nesiquëni ñaja'cohua'i a'ë."

Jesure Tase'e

(Mt 27.57-61; Mr 15.42-47; Lc 23.50-56)

³⁸ Ja jeteyo'je José, Arimatea aquëpi Pilatore sani Jesús capë tasi'i caquë seji'i. José cato judío paini ca'raquë Jesure yahuerepa tuiquë paji'i. Jaje pa'ipi seji'i, Pilatore Jesús capë sani tasi'i caquë. Caquëna, Pilatopi de'oji sajë'ë. Caëna, sani Jesús capë ñni sapi.

³⁹ Cui'ne Nicodemoje saji'i, treinta kilos mirra cui'ne aloes co'mese'ere saquë. Jaë cato Jesure ñami sani coca casiquë paji'i.

⁴⁰ Jaje José cui'ne Nicodemo çoni saiscohua'ipi Jesús capëre ñni johua'i sase'e huëo sëñepi cañana neni tunahuë, ju'isiquëre. Taja'quëre judío pai yo'oyepi yo'ohuë, jaje yo'ocohua'i sëte.

⁴¹ Jesure que sito ja'yere tsio paji'i. Pa'ina, ja tsiore paji'i, huajë quë'isi coje paire tama'coje.

⁴² Pa'ina, ja cojena Jesure tahüë, ja'ye maca pa'icona. Ja maca cato judío pai huajë mu'se tsoe t'i'a huëopi.

20

Jesús Ju'isiquëpi Huëiye

(Mt 28.1-10; Mr 16.1-8; Lc 24.1-12)

¹ Du'ru co'amaña ne mu'se ñata maca ja neaquëna, María Magdalenapi sacco'e, tasi daripëna. Saio ñacona, daripë sjosicopi jai quëna pë hui'yosico paji'i.

² Ja maca Simón Pedro quë'rona cui'ne Jesús ai oiquërepa pa'isiquë quë'rona huë'huëni cao:

“Ëjaë capë tsoe sahuë, daripë pa'isicore. Huesëyë, jero sa'na nehuë.”

³ Jaje cacona, Pedro cui'ne yequë j ye'yaquë con daripë quë'rona ñañu'u cajë saë'ë.

⁴ Cayahua'i te'e co'arepa huë'huëjë saë'ë. Te'i ai jerepa huë'huësiquëpi du'ru t'i'api, tasi daripëna. Pedropi jeteyo'je t'i'api.

⁵ Du'ru t'i'ani në meni ñaquëna, coa ite huëni oasi cañase'e paji'i. Cacani ñañeta'a papi.

⁶ Paquëna, Simón Pedropi jeteyo'je daisiquëpi daripëna cacapi. Jaëje cui'ne ñapi, ite huëni oasi cañase'e pa'ina.

⁷ Cui'ne yequeje ñapi, Jesús sjo'pë tunasi capi t'irona jose'ere tunani yequë caña uima'tona oasicipi pa'iona.

⁸ Ja maca cui'ne du'ru daripëna t'i'asiquëje cacani iti yo'ose'e ñaquë nuñerepa asapi, iti yo'ose'e.

⁹ Jesucristo ju'isiquëpi huëi ja'ñere case'ere ja yë'ta'a toyase'e caye asa t'i'ama'cohua'i sëte.

¹⁰ Ja'je ña tējini j ye'yacohua'i co'ihuë, huë'ena.

Jesupi María Magdalenana Ñaise'e

(Mr 16.9-11)

¹¹ Jaje pa'iquëta'are María cato hue'sena pëa nëcani oi nëcao, daripë yë'quë macapi. Ja oio se në meni ñao daripë sa'nahuëna.

¹² Ñacopi ñao, cayahua'i poja'i ju'i caña suñasicohua'ipi, Jesús capë pa'i sitore pa'ijëna, te'i quëo pa'i sitore pa'ina, yequëpi sjo'pë pa'i sitore ñu'ina.

¹³ Ja maca huññacohua'ipi iote se'i'ë:

“¿Nomio, iquere oico'ni?”

Cajëna, iopi sehuo:

“Yë'ë Ëjaëni sahuë. Ja do'ire oiyë. Huesëyë, jero sa'na sani nehuë.”

¹⁴ Jaje se ca toco, se ponëco Jesure ñao, iti macare nëcaquëna. Ñacota'a Jesupi cuasaye pao.

¹⁵ Ja maca Jesupi iote se'ji'i:

“¿Nomio, iquere oico'ni? ¿Neni co'eco'ni?”

Caquëna, iti maca tsio ñaquë api cuasaco cao:

“Ëjaë, më'ëpi sasiquë pani quëajë'ë, më'ë ne sito. Quëaëna, yë'ëpi ite sasi'i.”

¹⁶ Ja maca Jesupi capi, iote:

“¡María!”

Caquëna, iopi ponëni cao, hebreo cocapi:

“¡Raboni!” Jaje caye cato cao, ye'yaquë.

¹⁷ Ja maca Jesupi capi:

“Tseama'o, ñu'ijë'ë. Ja yë'ta'a ja'quë quë'ro saima'quë a'ë. Jaje pa'iquëta'are sani quëajë'ë, yë'ë yo'je tsire. Pëca ja'quë quë'rona cui'ne mai Diosu quë'rona saiye.”

¹⁸ Caquëna, ja maca María Magdalenapi sani j ye'yaquë pa'isicohua'ire quëao. Ëjaëni ñahuë, caco. Ipi jaje quëajë'ë, caëna, cayë, cao.

Jesupi I Ye'yacohua'ina Ñaise'e

(Mt 28.16-20; Mr 16.14-18; Lc 24.36-49)

¹⁹ Jare ja mu'se du'ru co'amaña ne mu'se ñami pa'i maca j ye'yacohua'ipi tu'rihuëna judío pa'ini ca'rajë cacani eta sa'ro sjosicohua'ipi paë'ë. Pa'ijëna, Jesupi iohua'i jopona ñaiquë pëpaquë capi:

“De'oye pa'ijë'ë.”

²⁰ Ja se ca tējini j jëña cui'ne j coripa iñopi. Ja maca Ëjaëre papi cuasajë sihuahuë.

²¹ Ja maca cui'naëpi Jesús ca copi:

“De'oye pa'ijë'ë, mësar. Ja'quë yë'ëre jëjo daose'eje cui'ne yë'ëje mësaruteje jëjo saoyë.”

²² Jaje cani sëcopi iohua'ina, sëcoquë capi:

“De'o joyore pare pajë'ë.”

²³ Mësarupi sa'i de'huacacohua'ini iohua'i tayo yo'ose'e sa'i de'huacaiye pa'iji. Mësar sa'i de'huacaima'cohua'ini iohua'i tayo yo'ose'e sa'i de'huacaiye peoji.”

Tomásipi Jesús Huëisiquëre Ñase'e

²⁴ Tomás Jesús doce soisicohua'i aquëpi cui'ne yequë mami Gemelo hue'equëpi Jesús ñai maca peopi. Peoquëna, yecohua'ise'e paë'ë.

²⁵ Peoquëna, ñasicohua'ipi Jesús ye'yacohua'ipi quëahuë, Ëjaëni yëquë ñahuë cajë. Cajëna, Tomás capi:

“Yë'ëpi i jëtë quëna ñaca cojena cui'ne i coripa ui cojena yë'ë jëtëpi sani ñama'ë pani ire papi caye paja'quë a'ë.”

²⁶ Ocho mu'seña tëtö saisi maca i ye'yacohua'ipi huë'ëna tsi'sicohua'ipi paë'ë. Pa'ijëna, jarote Tomásje çoni paji'i, yure cato. Ja maca Jesús ñai, eta sa'noa sïose'epi pa'iquëta'are. Ja maca pëpaquë capi:

“De'oye pa'ijë'ë.”

²⁷ Ja maca capi, Tomásre:

“Më'ë jëtëpi ñhona sa'ijë'ë. Sa'i ñajë'ë, yë'ë jëñare. Më'ë jëtëre dajë'ë. Dani yë'ë coripa ui cojena sa'ijë'ë, tsoerepa jëa coema'ë pa'ija'quë nuñere pa'ë caquë asaja'quë.”

²⁸ Ja maca Tomáspi sehuopi:

“Yë'ë i Ëjaë cui'ne yë'ë Diusu!”

²⁹ Caquëna, Jesupi capi:

“Tomás yureta'a asare payë, më'ë yë'ëre ñasi do'ire. Sihuyë, yë'ëre ñama'cohua'ipi coa quëayena asani nuñere pa'ë cajë cuasacohua'ire.”

Me Neja'copi Iye Toya Pëpë Pa'ico'ni

³⁰ Jesús jaiye yo'opi i ye'yacohua'ï ñajëna, pai yo'o tï'a ma'ñere ja yo'ose'e toya pëpëna si'aye toyase'e peoji.

³¹ Jaje pa'iquëta'are iye cato mësarupi Jesure ire papi Cristo huasoquë api, cajë cui'ne Diusu mamaquëre papi cajë asani ti pa'iyere tï'ajajë cajë toyase'e a'ë.

21

Jesupi Siete I Ye'yacohua'ina Ñaise'e

¹ Ja jeteyo'je Jesús tijupë i ye'yacohua'ina ñai, Tiberias jaira tët'tëpana. Ñaini ñeje yo'opi:

² Simón Pedropi cui'ne Tomás Gemelo hue'equë cui'ne Natanael Caná yeja Galilea aquë cui'ne Zebedeo mamajë cui'ne cayaohua'ï Jesús ye'yacohua'ï çoni paë'ë.

³ Pa'ijëna, Pedropi capi:

“Hua'ire sani nesi'i.”

Caquëna, yecohua'ijë cahuë:

“Yëquëje më'ë ja're sañu'u.”

Cani saë'ë, te'e i ja're çoni yohuëna aya mëni. Ja ñami hua'ire neñe pahuë.

⁴ Ñata tïme maca Jesús tsiaya tët'tëpare nëcapi, i ye'yacohua'ipi huesëhuë, iquei'ni cajë.

⁵ Ja maca capi, Jesupi:

“¿Tsidohuë, hua'ï neñe pare?”

Caquëna, johua'ipi cahuë:

“Pahuë, neñe.”

⁶ Ja maca Jesús capi:

“Yohuë ëja të'tena hua'ï yo'ecore jëo dëojë'ë. Ja maca mësarü neja'cohua'ï a'ë.”

Caëna, i case'eje jëo dëohuë. Jëo dëorena, hua'ipi tïmëni dëquëcona, naë tï'añe pahuë.

⁷ Ja maca Jesús ai yëquëpi Pedrorre capi:

“¡Mai Ëjaëre papi!”

Jaje ca macarepa asayepi Simón Pedropi i ëmëje ju'icore se suñani sa duji'ï, tsiayana.

⁸ Yecohua'ï cato yohuëja'a tsio daë'ë, mejahuëna, hua'ï yo'erë naëjë. Coa cien metro paji'ï, tët'tëpa tï'añe.

⁹ Yejana tütani tïmajë tï'ahuë, tsoe toa suasicopi pa'ina. Cui'ne hua'ï, pan paji'ï, toa ëmëje'na tuñase'epi.

¹⁰ Ja maca Jesupi capi:

“Dajë'ë, hua'ire mësarü nesicohua'ini.”

¹¹ Simón Pedropi yohuëna aya mëni hua'ï yo'ecore çütihuëre pana naë mapi, mejahuëna hua'ï tïmësoni. Ciento cincuenta y tres hua'ire nehuë. Jaje pa'iquëta'are hua'ï yo'erë tïey paç.

¹² Ja maca Jesupi capi:

“Dani hua'ï aijë'ë.”

Te'ijë ite iquei'ni, më'ë caquë seña papi. Si'aohua'ï Ëjaëre papi cajë asahuë.

¹³ Ja jeteyo'je Jesupi panpë ini hua'iquequë açopi si'aohua'ire, cui'ne hua'ireje hua'iquequë açopi.

¹⁴ Iye cato toasoñe aco paji'ï, johua'ï ite ñase'e ju'isiquëpi huëisiquëre.

Simón Pedroro Jesús Case'e

¹⁵ Ao ani tējisi jeteyo'je Jesupi seji'i, Pedroro ñeje:

“Simón Jonás mamaquē, ¿iye jerepa mē'ē yē'ēre oiquē?”

Caquēna, Pedropi sehuopi:

“Jaje pa'ijē'ē, Ējaē. Mē'ēpi tsoe asayē, yē'ē mē'ēre oiye.”

Caquēna, Jesupi capi:

“Jaje pa'ito yē'ē yēi ñamare de'oye ñacajjē'ē.”

¹⁶ Tijupē seni copī, cayaye acore:

“Simón Jonás mamaquē, ¿yē'ēre oiquē?”

Caquēna, Pedropi sehuopi:

“Jaje pa'iji, Ējaē. Mē'ēpi tsoe asayē, yē'ē mē'ēre oiye.”

Caquēna, Jesupi capi:

“Jaje pa'ito yē'ē yēi ñamare ñacajjē'ē.”

¹⁷ Toasoñe acore seji'i:

“Simón Jonás Mamaquē, ¿yē'ēre mē'ē yēquē?” Ja maca Pedro oi tsia nepi, toasoñe acore yēquē mē'ē yē'ēre oiquē caquēna. Ja maca sehuopi Pedro:

“Ējaē, mē'ēpi si'aye asayē, yē'ē mē'ēre oiye.”

Ja maca Jesupi capi:

“Yē'ē yēi ñamare de'oye ñacajjē'ē.”

¹⁸ Nuñerepa mē'ēre cayē, ai pōsērepa pa'i maca, mē'ēse'e caña suñani mē'ē yē huē'ñana sai pa'isiquē a'ē. Jaje pa'iquēta'are ai huānou de'osi maca coa jētēre nēocaina, yequēpi suñacajja'quē api. Ja maca mē'ē saiye yēma'tona saja'quē api.”

¹⁹ Jaje Jesús canī capi: Pedro ju'iñepi Maija'quē de'oquērepa pa'ie iñocai ja'ñere quēaquē. Ja jeteyo'je capi:

“Tuijē'ē, yē'ēre.”

Jesús Oiquērepa

²⁰ Co'iquē Pedro ñaquēna, i ai oiquēre papi Jesure tuji'i, Jesure tseama'nē ao ai maca ja'ye ñu'i, “Ējaē, ¿nepi coso yehuoja'cohua'i a'ni?” caquē sesiquēpi.

²¹ Pedropi ñani Jesure seji'i:

“¿Ējaē, iquēreta'a me yo'oye pa'ija'coa'ni?”

²² Caquēna, Jesupi capi:

“Yē'ē co'i macaja'a huajjēquē iquē pa'ijaquē caquē pa'ito ¿iquepi mē'ēre co'aquē'ni? Mē'ē cato yē'ēni tuijē'ē.”

²³ Ja maca iye case'ere Jesús oiquērepa sehuosicohua'i jupēpi asahuē. Asani cuasahuē, iquē cato ju'iñe paja'quē api. Jaje Jesús cato ju'iñe paja'quē api caye papi. I cato capi: “¿Yē'ē co'i macaja'a huajjēquē pa'ijaquē caquē pa'ito iquepi mē'ēre co'aquē'ni?”

²⁴ Iye coca toyaquē cato i oiquēpi toyayē, nuñerepa cocare quēaquē. Jaje pa'ina, nuñerepa cocare caji cajē asayē.

²⁵ Jesús yo'ose'e jaiye pa'iji, pa'iquēta'are toyaye pañē. I yo'ose'e ñape toyañu'u cajē yo'ocohua'i pani toya saoye peoji, si'a yeja maca toya pēpi tūmē huesotoje. Ja yē'ta'api toyaye pati'ne pa'io. Ca tējihue. Jaje pa'ijaquē.

LOS HECHOS

Maija'quë I Joyore Isisi'i Ca Nêose'e

¹ Yê'ë cajei Teofilo, yê'ë du'ru macarepa toya pëpëna si'aye Jesuja'a macarepa yo'o huëoquë yo'ose'e cui'ne i ye'yase'e, cui'ne j ma'tëmona sai macaja'a yo'ose'e si'aye toyahuë.

² Ja yê'ta'a ma'tëmo saima'në j jëjo saocohua'ire jo'ya sahuani de'o joyo cöcaiyepi iohua'i yo'o ja'ñe quëaëña.

³ Cui'ne ju'isiquëpi huajëquërepa pa'iji cajë ñajajë caquë ja'në pa'ise'eje pa'irepa pani iñoquë curenata mu'seña ñaiquë Diusu cuañe te'tere quëaëña, jaohua'ire.

⁴ Ja yê'ta'a Jesús j jëjo saocohua'i ja're pa'i caëña:

“Jerusaléni saima'pë utejê'ë, ja'quë mësarute isisi'i ca nêose'ere yê'ë quëase'ere.

⁵ Juan cato ocopi dopi. Jaje pa'iquëta'are a'ri maña se ñata sao mu'seña mësaruru cato de'o joyore pani do cuañoja'cohua'i pa'ija'cohua'i a'ë, oco doyeje pa'ye.”

⁶ Jesús quë'rona tsi'sijani Jesure se'i'ë ñeje:

“Ëjaë, çmë'ë yurepi Israel pai ëjaëre necaija'quë a'ë, yëquëre de'oye cuañeja'quëre?”

Cajëna, Jesupi sehuaëña:

⁷ “Ja cato pai asaye peoye a'ë. Coa ja'quëse'e neñe pa'iji. Jaje pa'ina, mësaruru iti neja'a mu'se cui'ne ti yo'oja'a tëcahuëje asaye peoji.

⁸ Jaje pa'iquëta'are de'o joyopi mësaruna dani pa'i maca tutu isi cuañoni Jerusalén, Judea yeja, Samaria yeja, coa si'a yeja pa'icohua'ire quëacaija'cohua'i a'ë, yê'ë yo'ose'e ayere.”

⁹ Ja se ca tējini ñajë necajëna, Jesús ma'tëmona sa cuañoëña. Sa cuañoquëna, siriopi ite peo hue'ñarepa tsio dani hueso.

¹⁰ Ja yê'ta'a Jesús ma'tëmona mëñere ñajë necajëna, peo hue'ña pa'isicohua'ipi caya ëmëohua'i poja'i ju'i caña ju'icohua'ipi ñaini caëña, iohua'ire:

¹¹ “Galilea pai çme yo'ojë ma'tëmone ñajë necayëni? Iquë Jesús mësaruru ja're pa'isiquëpi yure ma'tëmo sa cuañosiquë cui'naëpi co'ija'quë api, mësaruru ñajëna, saise'eje pa'ye.”

Judas Pa'isi Sa'rona Matiaspi Tsojaise'e

¹² Ja maca Jesús jëjo saocohua'i Olivos ai cutihuëpi te'e kilómetro sani Jerusalëna co'ireña, jaohua'i cato saë'ë, huajë mu'se ja ja'ye cu'ye pa'iji, cuañese'e ja'ye.

¹³ Ja maca pai daripëna t'i'ani iohua'i huero pëani pa'i huë'e ëmëje'e tu'rihuëna mëni pëareña. Iti pëasicohua'i cato pa'iyë: Pedro, Juan, Jacobo, Andrés, Felipe, Tomás, Bartolomé, Mateo, Alfeo mamaquë Jacobo, Simón yequë mami hue'yosiquë Zelote, cui'ne Jacobo mamaquë Judas.

¹⁴ Si'aohua'i jaohua'i Jesús yo'je tsj ja're, cui'ne Jesús pëca ja'co María ja're coní, cui'ne yequë nomiohua'i ja're coní te'e cuasayepi si'anë Maija'quëre señu'u cajë tsi'sijë paë'ë.

¹⁵ Ciento veinte sehuasicohua'i pa'icohua'ipi ja mu'seña te'e macana tsi'sirena, Pedropi jopore pana huëni nëcani caëña, ñeje:

¹⁶ “Maija'quë do'ijë, Jesure tseacohua'ire sai saquë Judas yo'o ja'ñere Maija'quë joyopi Davidre du'ru quëaëña. Quëaquëna, toyapi. Ja toyase'e, Maija'quë joyo case'e t'i'añe paji'i.

¹⁷ Judas cato mai aquë paji'i. Cui'ne mai neñe ayere co nequë paji'i.

¹⁸ Jaje pa'iquëta'a, co'aye yo'o do'ire saisi curiquëpi yejare huerohuë. Jaje pa'iquëta'are Judas cato sjopëja'a meñe tōmeni étatu'u joquëna, si'aye éta mea etaëna, juquëña.

¹⁹ Ja yo'ose'ere Jerusalén pa'icohua'ipi asani iti tsiore hue'yohuë, tsie tsio. Iohua'i cocarepa cato Acéldama hue'yoreña.

²⁰ Jaje pa'ina, Salmos toya pëpë caji:

I pa'isi huë'e jecosi huë'e pa'ija'coa,

Pëa cōma'a huë'e.

Cui'ne caji, yequeje:

I yo'ora'ase'ere yequëpi yo'oye pa'iji.

²¹ De'oji. Maiipi iye macare payë, Jesús mai ja're pa'i macapi, mai ja're si'anë pa'icohua'ire Jesure Juan oco do macapi cui'ne j ma'tëmo mëi macana mai ja're pa'icohua'ire.

²² Jaje pa'ina, de'oji, jaohua'i aquëni te'ire maire tsoja'quëre neñe. Nerena, jaëpi mai ja're coní te'e Jesús ju'isiquëpi huë'iji, quëaja'quëre.”

²³ Casi maca co'ejë cayaohua'ire t'i'areña, José Barsabás cui'ne Matias. Josépi yequë mami Justo hue'equë paji'i.

²⁴⁻²⁵ T'i'ani Maija'quëre ñeje se'i'ë:

“Ja'quë, më'ëpi pai cuasaye ta'ñe asaquë a'ë. Yëquëre iñojê'ë, çjequë a'ni, më'ë jo'ya nesiquërepa më'ë jëjo saocuërepa Judas co'aye yo'oque ne huesësiquë nera'ase'e neja'quë?”

²⁶ Seni tējini neñañu'u cajë yo'ojëna, Matiasna Jesús jëjo saocuë pa'iyë tòmepi. Tòmëina, jare iti macapi, Jesús once jëjo saocohua'i ja're cõni pa'iquë põnëpi.

2

Maija'quë Joyo Daise'e

¹ Judío pai fiesta Pentecostés mu'se tji'asi maca si'aohua'i sehuosicohua'i te'e macana tsi'sini paë'ë.

² Pa'ijëna, cuasama'tore papi jai tutu jupë písico jutayeje pa'yerepa ma'tëmopi písico jutaëña. Jutani iti písiyepi si'a huë'e tímëëña, iohua'i pa'i huë'ña.

³ Ja maca pai ñapere toa corohuëaje pa'yepi iohua'i sjopëana ñai necareña.

⁴ Ja maca yureta'a si'aohua'i de'o joyopi tímësicohua'i pateña. Pa'ijë joyo necaina, yequë pai cocapi careña.

⁵ Ja mu'seña Judío pai si'a huë'ña pa'icohua'ipi Jerusalénna tsi'sicohua'ipi pateña, de'oye yo'o paipi.

⁶ Pa'icohua'ipi tutu písiyeye pa'yere asani tsi'sireña, iti pisi huë'ñana. Tsi'sini asareña, iohua'i cocapi, sehuosicohua'ipi cajëna. Asajë çmërepa jaje caye'ni? cuasahuë.

⁷ Jaje cuasajë asa quëquëjë ai co'a ju'ijë sa'ñe cahuë:

⁸ "ÇSi'aohua'i icohua'i Galilea paita'a pai ñape cocapi caye'ni?"

⁹ "Me neni pai ñape cocare papi cajëna, asaye'ni?"

⁹ Iye maca pa'iyë, Partia pai, Elam pai, Media pai, Mesopotamia pai, Judea pai, Capadocia pai, Ponto pai, cui'ne Asia yeja pai, pa'iyë.

¹⁰ Pa'iyë cui'ne Frigia pai, Panfilia pai, Egípto pai, cui'ne Cirene quë'ro Libia paije pa'iyë. Pa'iyë, cui'ne romano paije, coa dani pa'icohua'ijë judío pairepa cui'ne judío pai yo'oye coa se ye'yesicohua'ijë pa'iyë.

¹¹ Pa'iyë, cui'ne Creta pai cui'ne Arabia paije si'aohua'i pa'icohua'ipi asahuë, Maija'quë de'oyerepa yo'oyere pai ñape cocapi cajëna."

¹² Si'aohua'i quëquë huesësicohua'i paë'ë, jerepa yeque cuasaye peoyerepa. Jaje pa'ijë sa'ñe seji'ë:

¹³ "ÇIquere pare quëaquë'ni, iye yo'oyere?"

¹³ Cajëna, yecohua'ipi cue'cuejë careña:

¹³ "Jaohua'i cato da huesoquëna, yo'ojë cayë."

Pedro Caye Jaohua'ire

¹⁴ Cajëna, ja maca Jesús jëjo saocohua'i aquë Pedropi yecohua'i i cajeohua'i once pa'iohua'i ja're cõni huëni nëcani tutu capi, ñeje:

"Judío pai cui'ne si'aohua'i Jerusalén pa'icohua'i asajë'ë. Iye mësarujë yë'ë caquëna, de'oye asajë'ë.

¹⁵ Icohua'i daquëna yo'ojë cama'pë pa'iyë, mësarü cuasayeje pa'ye, yurena nueve pa'ito me cuepeye'ni.

¹⁶ Iye cato coa ai jerepa Maija'quë caye quëacaiquë Joel caquë pa'ise'epi tji'aquë yo'oquëna cayë. I case'e cato caji:

¹⁷ Tëji mu'señarepa yë'ë joyore paina isija'quë a'ë caji, Maija'quë.

Isina, mësarü mamajë ëmëohua'i cui'ne nomiohua'i yë'ë ayere caja'cohua'i a'ë, Posëohua'ipi caima'pëta'a cãni ñañeje pa'ye ñajëna, quëasi'i.

Cui'ne aiohua'i huëo huë'ñaja'a ñajëna, quëasi'i.

¹⁸ Ja mu'seña yë'ë jo'yaohua'i ëmëohua'ina cui'ne nomiohua'ina yë'ë joyore isisi'i.

Isiquëna, yë'ë ayere quëacohua'i pa'ija'cohua'i a'ë.

¹⁹ Cui'ne ma'tëmopi pai ti ña ma'ñere iñoñe pa'ija'coa,

Cui'ne yejare iñoñi'i, tsiepi, toapi, cui'ne toa picopi,

²⁰ Èsë miama'quë de'oja'quë api,

Cui'ne ñañeje tsieje pa'i de'oja'quë api,

Iye cato mai Èjärepa ja daima'në pa'i ja'ñe a'ë.

I dai mu'serepa cato ëja mu'serepa cui'ne de'o mu'serepa pasipi.

²¹ Ja mu'seña si'aohua'i yë'ëre secohua'i tji'aja'cohua'i a'ë, huaso cuãñosicohua'i pa'iyë.

Toyapi, Joel.

²² Israel pai asajë'ë, yë'ë caquëna. Mësarupi tsoe asayë, Jesús Nazaret aquë pai paji'i. Pa'ina, Maija'quëpi mësarü ña huë'ñana irepa pa'iyë iñoñi. Iñoquë Jesuja'a Maija'quëpi pai yo'o tji'a ma'ñere cui'ne jaiye de'oyere pare yo'o iñoñi.

²³ Jaje pa'ita'are Maija'quë tsoe jaje yo'osi'i cuasa nëose'eje pa'ye, mësaruna ite tseani queni huani jëohuë, co'acohua'i jëñaja'a.

²⁴ Jaje huani jëosicohua'ita'are Maija'quëpi ju'iñe huëse'ere peo huë'ña nejoni huajëquëre huëopi, je i pa'ima'quëni ju'iñepi meñe quëco paco'ni.

²⁵ Pai ějaěrepa David Jesus ayere caquě capi, neje:

Ējaěpi yě'ě tinare pare pa'ina, ise'ere si'aně nahuě.

Ipi yě'ě ěja te'tere pa'ito, yě'ěre si'aye co'aye pa'inije ne taone peoji.

²⁶ Jaje pa'ina, ai sihuayě, yě'ě joyopi, sihuaquě yě'ě yě'opopi jějěně.

Mě'ěpi nacaina, quěcoquě pěa huajěja'quě a'ě.

²⁷ Jare mě'ěpi yě'ěre tai daripěna jeoma'ě pa'ijaquě a'ě.

Cui'ne yě'ě mě'ě de'o jo'yaě capě ja'ju tiya huesěyeje paja'coa, mě'ěpi ěsequěna.

²⁸ Mě'ěpi yě'ěre inohuě, pa'i ma'are pare,

Cui'ne mě'ě ja're coně pa'i ai sihuaja'quě a'ě, yě'ě.

Jaje capi, David, Jesus ca ja'ne.

²⁹ Israel pai asajě'ě, David mai necuě tsoe juquěna, tajě pa'ahuě'ě. Yureje ite tajě pa'isicoje hui'yoma'copi pa'ico.

³⁰ Israel pai ějaěrepa David cato Maija'quěre quěěacaiquě paji'i. Jaje pa'ipi asapi, Maija'quě care paquěpi ca něose'ere i tsěcapě aquěni Maija'quěpi Israel pai ějaěre pare necai ja'nere, i mene najeini.

³¹ Jaje pa'ina, David naquě cayeje pa'yere capi, Cristo huěi ja'nere. Io case'e cato caji: 'tai daripěre ui huesěye paja'quě api,' cui'ne 'i capěje ja'ju tiya huesěye paja'coa,' capi.

³² Jaje pa'iyě sěte Maija'quěpi Jesure jare David casiquěni huěopi, huajěquěre. Ja yo'ose'e yěquěpi nasicohua'i a'ě.

³³ Jaje pa'ina, Maija'quěpi Jesure i ěja te'te n'ija'quěre nepi, jerepa pa'ire pare. Jaje neina, pěca ja'quěni de'o joyore pare isi cuanopi i ca něosiquěre isi cuanani ipi yure pai nape huahuěcaji'i, huahuěcayere jare yure měsaruru naje cui'ne asahuě capi.

³⁴ Jaje pa'ina, Davidpi ma'těmo měine papi. Jaje pa'iyě sěte capi:

Ējaěpi yě'ě Ējaěre capi:

'Ja'rujě'ě, yě'ě ěja te'tena,

³⁵ Yě'ěpi mě'ěre sanope yo'ocohua'ire mě'ě quěo huě'ehuěna jějo qa sao macaja'a.'

³⁶ Jaje pa'ina, Jesus měsaruru queně huani jeocosisiquěre Diusupi Ējaěre pare Cristo huasosiquěre nepi. Iyere cato Israel pai asaye pa'iji."

³⁷ Jaje Pedro caquěna, asani joyore papi ai co'a ju'ijě oijě Pedroro cui'ne i cajeohua'ire once pa'iohua'ireje sei'ě, neje cajě:

"yěquě yure me neja'cohua'i a'ni, Maija'quě do'ijě?"

³⁸ Sejěna, Pedro capi:

"Měsaruru tayo yo'ose'ere saěi t cuanone caně cui'ne de'o joyore isija'quě caně měsaruru ja'ně cuasase'ere jěoni Maija'quěna poněne pa'iji. Jaje yo'oni pai nape Jesuni cuasajě oco do cuanone pa'iji.

³⁹ Maija'quě i joyo isisi'i ca něose'ere měsaruru. Měsaruru mamajě cui'ne so'o pa'icohua'i cui'ne si'aohua'i Maija'quě yě soija'cohua'i tse a'ě."

⁴⁰ Yequeje cui'ne capi, Pedro:

"Huasosicohua'i pa'ijě'ě, ai co'acohua'i jopo pa'icohua'ipi." Jaje caquě yěhuopi.

⁴¹ I jaje caquě yěhuoye asasicohua'ise'e oco do cuanani tres mil Jesure sehuocohua'i paě'ě, ja maca.

⁴² Pa'ijě si'aohua'i Jesus jějo daocohua'i ye'yayere de'oye sehuocaijě nunerepa paě'ě. Pa'ijě sa'ne de'oye yo'ojě, Maija'quěre sejě cui'ne ao yětoni aijě paě'ě, Jesus yo'ose'ere cuasajě.

Du'ru Macarepa Sehuosicohua'i Pa'ise'e.

⁴³ Jesus ye'yaquě pa'isicohua'ipi jaiye pai yo'o t'a ma'nere yo'ojěna, naje ai cuasarena, merepa jaje yo'oye'ni cajě.

⁴⁴ Itire pa'ě cuasajě asasicohua'ipi te'e cuasajě tsiosicohua'ipi pa'ijě co'amanaje te'e pahuě.

⁴⁵ Si'aye johua'i co'amana isijě curi mana huerojě yecohua'i co'amana caracohua'ina isihuě, iohua'ire caraye.

⁴⁶ Jaje yo'ojě pa'icohua'ipi si'a mu'sena Maija'quěre sejě paě'ě, Maija'quěre se huě'ena. Jaje yo'ojě cui'ne johua'i huě'nana Jesure cuasajě aore yětoni aijě te'e huě'na tsi'sini aore huahuěejě aijě sihuajě paě'ě.

⁴⁷ Pa'ijě Maija'quě de'ocquěre pa'ni cajě paě'ě. Si'aohua'i yecohua'ijě de'o paire pa'ě cajě nahuě. Cajě najena, Ējaěpi jero sa'na jai paire ite sehuocohua'ire nepi. Nequěna, jai pai sehuocohua'i huaso cuanasicohua'i paě'ě, mu'se nape.

3

Cu'ima'quěre Jujucaise'e

¹ Te'e mu'se na'iquëna, Pedropi cui'ne Juanpi çoni Maija'quëre se hora a las tres pa'i maca Maija'quëre se huë'ena saë'ë.

² Satena, jãrote cu'ima'quëpi De'oco hue'yosi eta sa'ro yë'quë macare da ñosiquëpi ñu'i Pedrore cui'ne Juanre caca huëojëna, curiquë seji'i. Jaë cato tsj'nëna cu'ima'quë paji'i, da cacacohua'ire curiquë sejaquë cajë dasiquëpi. Jaje pa'ipi si'a mu'seña paipi ìte sañojëna, curi hueruquë ñu'iquë paji'i, eta sa'ro yë'quë macare ñu'i.

³ Jaje curi ñu'i seji ñu'iquëpi Pedrore cui'ne Juanre ñani curiquë seji'i, tsoe caca tÿjiye ja'i macare pa'ijëna.

⁴ Seina, Pedropi ìte ñani capi:

“Ñajë'ë, yëquëni.”

⁵ Caquëna, curiquëre isisi'quë cama'quë cuasaquë ise'ere ñaquëna,

⁶ Pedropi capi, ìte:

“Yë'ë curiquë peoyë. Jaje pa'iquëta'are yë'ë payere isisi'i. Jesús Nazaret aquë mamipi cayë huëni cu'ijë'ë.”

⁷ Caquë Pedropi ëja te'te jëtëna tseani naë huëo nëcoquëna, te'ere papi jë'a huëni nëcapi. Huëni nëcaquëna, ì nëcañoa cui'ne ì jëo peto ca jëaye carapi.

⁸ Caraëna, de'oye nëcaquë cuji'i. Ja maca yureta'a johua'i ja're tsioni te'e Maija'quëre se huë'ena cacani Maija'quëre de'oquëre pa'ni caquë sihuaquë sa'caquë yo'opi.

⁹ Cacani cu'i Maija'quë de'oquëre pa'ni caquë sihuaquë yo'oquëna, si'aohua'i ìte ñahuë.

¹⁰ Ñajë quëquë huesëhuë, ìte yo'ose'ere cuasajë. Noni Maija'quëre se huë'e eta sa'ropi De'oco hue'e hue'ñapi curi seji ñu'ina, ñacohua'i sëte quëquëhuë, ì cu'iyë ñani.

Pedro Yëhuoye

¹¹ Iti co'yasiquëpi Pedrore cui'ne Juanre tseani ñuni saoma'ë yo'opi. Yo'oquëna, ña quëquëjë si'aohua'i Pórtico de Salomón ca hue'ñana huë'huëjë saë'ë, johua'i pa'i hue'ñana ña'nu'u cajë.

¹² Jai pa'i tsi'sijëna, ñani Pedro capi:

“¿Me yo'ojë Israel pai ai cuasayë'ni? Iquëre yëquë tutupi panita'a Maija'quëre yëquë ai oi do'ipi ne co'yarena, cu'iyeye ñajë mësaru yëquëse'ere ai ñaë'ë.”

¹³ Iquë ju'iquëre cato, mai aiohua'i, Abraham Diusupi Isaac cui'ne Jacobo Diusupi ne co'yapi. ì necaiquë Jesuni jerepa pa'ire ñnoquë. Mësaru pa'i ëjaëna tseani isirena, Pilato de'oquë api cuasani joyesi'i caquëna, mësaru ësehuë. Jaje pa'ina, mësaru ësesiquë pa'iyere ñnoquë yo'opi.

¹⁴ Iquë de'oye nuiñe yo'oquëni joyeye ësejë paire huaiquëni joyejë'ë, cahuë, mësaru.

¹⁵ Jaje yo'oni pa'iyë ìsi Èjaëni mësaru huani jeohuë. Jaje yo'osicohua'ita'are Maija'quëpi huajëquëre huëopi, ìte. Ja yo'ose'e yëquëpi ñasicohua'i a'ë.

¹⁶ Iquë mësaru noni ñaquëre, Jesure necaiquëre pare asa do'ipi tutu isipi. Isina, ñañë, mësaru. Jesure necaiquëre pare asa do'ipi iquëre ju'iñe ti peoquëre pare ne co'yapi, mësarupi ñañë, si'aohua'i ìti yo'ose'e.

¹⁷ Asayë, yureta'a mësaru Jesure huai maca yo'ose'e. Mësaru cui'ne mësaru ëjaohua'i cato jare cajë yo'oyë, cuasama'pë coa noni huesë huani jeohuë.

¹⁸ Jaje yo'ojëna, Maija'quë cato ìte quëacohua'i ja're Cristo ju'iñe pa'iji tsoe hue'ña case'ere yo'o' tji'api.

¹⁹ Jaje pa'ina, mësarupi Maija'quëna daijë'ë. Dani ja'në yo'ose'e jeojë'ë, mësaru co'aye yo'ose'ere tÿno jeocaija'quëre. Jaje yo'ojëna, ñani Maija'quëpi de'oye pa'iyë ìsi'ñe pa'i api.

²⁰ Tsoe hue'ña mësarute isisi'i, Cristore cuasa nëosiquëni Jesuni jëjo daoquë mësaruna.

²¹ Jaje pa'iquëta'are yure cato ìte quëacaicohua'i tsoe hue'ña pa'isicohua'i ja'në ca'ñeje pa'ye si'a co'amana ne de'hua macaja'a Cristo ma'tëmöre pa'ija'quë api.

²² Jaje pa'ina, mai aiohua'ire Moisés quëapi, ñeje: “Èjaë Diusupi yë'ëje pa'ire ìte quëacaija'quëre neja'quë api, mësaru aquëni. Si'aye ì cayë de'oye sehuocaijë'ë.”

²³ Si'aohua'i ì cayë sehuocaima'cohua'i cato, pa'i pa'i daripëpi tÿrona nejasicohua'i pa'ija'cohua'i a'ë.

²⁴ Si'aohua'i Maija'quëre quëacaicohua'i Samuel pa'inëpi de ñata dao mu'seña cato iye mu'seña pa'i ja'ñere cahuë.

²⁵ Jaje pa'ina, mësaru a'ë, ìte quëacaicohua'i mamajë Maija'quë isisi'i ca nëose'ere pacohua'i, Abrahamre ca nëose'ere pacohua'i. ì case'e cato caji: “Më'ë tsëcapë acohua'ija'a iye yeja pa'icohua'i si'aohua'i de'oye pa'iyë ìsi cuañoja'cohua'i a'ë.”

²⁶ Jaje pa'ina, mësarupi co'aye pa'iyere jëoni pönëjëna, de'oye pa'iyë isisi'i caquë Maija'quëpi ì mamaquëre ju'isiquëni huëoni mësaruna du'ru jëjo daopi.”

4

Pedrore Cui'ne Juanre Coye

¹ Pedro cui'ne Juan ja yé'ta'a paire cajëna, Israel pai ëjaohua'ipi cui'ne Maija'quëre se huë'e ñacai soldado pai ëjaëpi cui'ne saduceo pai çoni da títahuë.

² Títani jaohua'ipi pëijë asahuë, ju'isicohua'i huëiye pa'iji, Jesús huëise'epi ñhopi cajëna, Pedropi cui'ne Juan çoni.

³ Asani tseahuë. Tseani na'i huesëye sëte paire co huë'ñana cohuë, se ñatasi mu'se ñañu'u cajë.

⁴ Jaje yo'ojëta'are iti quëaye asasicohua'i jai pai sehuohuë. Ja maca sehuosicohua'ire ëmëohua'ise'ere cuçcueto cinco mil pai paë'ë.

⁵ Ñatasi mu'se Jerusalëna tsi'sihuë, Israel pai ëjaohua'i, aiohua'i cui'ne cuañese'le ye'yacohua'i çoni.

⁶ Jarote Maija'quë huë'e ñacai ëjaërepa Anásje paji'i. Pa'ina, cui'ne yecohua'ijë paë'ë, Caifás, Juan, Alejandro çoni. Pa'ijëna, cui'ne si'aohua'i Maija'quë huë'e ñacai ëjaërepa sêcapë tsi'sisicohua'ipi paë'ë.

⁷ Pa'ijë cuañehuë, Pedrore cui'ne Juanre dajë'ë. Carena, darena, iohua'i jopona nëconi ñeje cajë sei'ë:

“¿Ique tutupi panita'a iquei mamipi mësarü cajë iye ñeje yo'oye'ni?”

⁸ Sejëna, Pedro de'o joyopi i ja're pa'iye sëte iohua'ire sehuoquë capi:

“Mai ëjaohua'i cui'ne mai aiohua'i asajë'ë.

⁹ Ju'iquëre jujuse'ere me neni ne co'yare'ni cajë seni asañu'u cajë seña sëte quëasi'i.

¹⁰ De'oji. Jaje pa'ito, si'aohua'i mësarü asa hue'ñana quëañu'u, si'aohua'i Israel pai asajajë cajë. Iquë iye maca si'aohua'i mai ñajëna, pa'iquë cato Jesucristo Nazaret aiquë mami do'ire co'yapi, mësarü quëni huani jeorena, Maija'quëpi huajëquë huëosiquë do'ire.

¹¹ Iquë Jesús mësarü huë'e necohua'ipi do'i peoquëre ñasi quëna pë api. Jaje pa'isiquëta'a yure cato iti quëco pa quëna përepa de'opi.

¹² Jaje pa'ina, Peoji, yequë paire huasoquë. Maija'quë maire huasoja'quëre yequëre necaiye papi.”

¹³ Ca'raye peoyerepa Pedropi cui'ne Juanpi çoni cajëna, ñajë ëjaohua'ipi cuasahuë, icohua'i ai ye'yema'cohua'i a'ë cui'ne pai pa'iyeje ye'yema'cohua'i a'ë. Jaje pa'iohua'ipi cui'ne Jesús ye'yaquë pa'isicohua'i a'ë. Jaje cuasajë ñajë quëquë asahuë, iohua'i cayere.

¹⁴ Jerepa, cui'ne iohua'i ja're çoni iti co'yasiquëje pa'ina, ñajë ti sañope cayejë pahuë.

¹⁵ Pajë ja maca tsi'si sitopi Pedrore cui'ne Juanre etajë'ë carena, etahuë. Etarena, johua'ise'e sa'ne coca cahuë.

¹⁶ Ñeje cahuë:

“Si'aohua'i Jerusalën pa'icohua'i asayë, iye pai yo'o t'a ma'ñere yo'ose'e. Jaje asajëna, maipi jaje yo'oye pahuë ca t'añe peoji. ¿Jaje pa'ito yure me neja'cohua'i a'ni, icohua'ire?”

¹⁷ Jaje pa'ito iyere yo'oñu'u. Iye yo'osi coca jerepa jai saiye paja'core huajo yëni quëcoñu'u iohua'ini iye macapi jerepa paire quëaye paja'cohua'ire, Jesús ayere.”

¹⁸ Cani yureta'a iohua'ire soini cuañehuë, Jesús aye paire cama'pë pa'ijë'ë, cui'ne i ayeje paire ye'yama'pë pa'ijë'ë cajë.

¹⁹ Cuañejëna, Pedropi cui'ne Juanpi sañope sehuojë cahuë:

“Mësarupi cuasani ñajë'ë, ¿iquepi de'oquë'ni, mësarü cayere sehuoye, panita'a Maija'quë cayere?”

²⁰ Yëquë ñase'ere cui'ne asase'ere quëaye pa'iji.”

²¹ Pai cato ne co'yasiquëni ñani Maija'quë ai de'oji cajë sihuahuë. Jaje sihuajëna, ëjaohua'ipi Pedrore cui'ne Juanre si'señu'u cuasajëta'a paini ca'rajë si'sema'pë coa huajo yëni eto saohuë.

²² Pai ne t'a ma'ñere papi co'yasiquë cato cuarenta ometëca jerepa paquë paji'i.

Ca'rama'cohua'i Cui'ne Necaija'quë Api Asacohua'i Pa'iyere Seña.

²³ Eto saorena, Pedro cui'ne Juan sehuosicohua'i quë'rona sani Israel ëjaohua'i cui'ne aiohua'i case'ere si'aye quëahuë.

²⁴ Quëajëna, asani si'aohua'i te'e cajë Maija'quëre sei'ë, ñeje:

“Ejaë ma'tëmo cui'ne yeja, jai tsiaya, si'aye iote pa'iye de'huasiquë,

²⁵ më'ëpi de'o joyoja'a cahuë, më'ë jo'yaë David yë'opoj'a ñeje:

¿Me yo'ojë pai josa yo'ojë caye'ni?

¿Me yo'ojë pai ti cuasama'pë coa huëojë jaje neñu'u ca nëoñe'ni?

²⁶ Pai ëjaohua'ipi cui'ne ëjaohua'ipi çoni,

Maija'quëre cui'ne maire huasoquëre sañope yo'oñu'u cajë te'e cuasajë yo'oyë.

²⁷ Iye daripëna Herodes cui'ne Pilato cui'ne yequë pai cui'ne Israel pai tsi'sini Jesure sañope yo'ohuë, më'ë sahuani jisiquëre.

²⁸ Jaje yo'ojë yo'o t'í'acaë'ë, më'ë jaje yo'osi'i cuasa nëoquë pa'ise'ere.

²⁹ Yure Èjaë, yëquë më'ë jo'yare iohua'i huajo yëyere ñani isijë'ë, më'ë coca, ca'rama'pë quëa ja'ñere.

³⁰ Jesús më'ë mamaquë cocare quëajëna, më'ë tutupi ju'icohua'ire jujuye, yequë mu'seña pa'i ja'ñe ññoñe cui'ne pai yo'o t'í'a ma'ñere yo'ojë'ë, Jesús do'ipi."

³¹ Jaje seni tējisi maca iohua'i se sitopi ñu'cueo. Ñu'cuecona, si'aohua'i de'o joyo tīmēsicohua'i paë'ë. Pa'ijë Maija'quë coca quëahuë t'ñarepa, ca'rama'pë.

Si'a Co'amaña Si'aohua'i Te'ona Pase'e

³² Jai pai sehuosicohua'i pa'icohua'ipi te'le cuasajë cui'ne nëina, paë'ë. Pa'ijë co'amañaje si'aohua'i te'ena pahuë. Te'ijë yë'ëse'e te'i pasi'i caquë yo'oquëje peopi.

³³ Peojëna, Jesús jëjo saocohua'ipi si'a tuturepa quëahuë, Jesús ju'isiquëpi huëise'ere. Quëajëna, Maija'quëpi ñacaina, si'aohua'i de'oye paë'ë.

³⁴ Pa'ijëna, te'ijë iohua'i aquë co'amaña caraquëna, ai yo'oquë peopi si'aohua'i pahuë. Ja payere cajë yejaña panita'a huë'ña pacohua'ipi isijë curi neni,

³⁵ Jesús jëjo saocohua'ina dani curi isihuë. Jāohua'ipi si'aohua'ire iti pai ñapere caraye ja'ye huahuejajë cajë isihuë.

³⁶ Jaje yo'opi, levita José hue'equëni, Chipre saodohuë aquëni Jesús jëjo saocohua'ipi Bernabëre hue'yosiquëpi. Bernabë cani cayë "Yëhuo huasoquë mamaquë".

³⁷ Jaëpi i yejare isiquë curi neni Jesús jëjo daocohua'ina curi dani isipi, iohua'ipi ñajë huahuejajë caquë.

5

Ananías Cui'ne Safira Co'aye Yo'ose'e

¹ Jaje pa'iquëta'are yequëpi Ananías hue'equëpi i paco Safira ja're yejare isihuë. Isini curi neni,

² si'aye isiyë pañu'u te'le cuasahuë. Cuasani iohua'i pa ja'ñe de'huahuë. De'huani yequere Jesús jëjo saocohua'ina isipi, iohua'ipi ñajë huahuejajë caquë.

³ Isiquëna, Pedropi capi:

"¿Ananías ique do'ire huati ëjaë më'ë joyona cacaë'ni yeja do'i saisi curire më'ëpi yequere de'huani yequere isiquë si'aye isiyë caquë de'o joyore cosojaquë caquë?"

⁴ ¿Yejajë më'ë yeja pa'ima'ona, jaje yo'ou? ¿Curijë më'ë curiquë pa'ima'ëna, jaje yo'ou? ¿Merepa më'ë jaje yo'osi'i cuasaë'ni? Paini më'ë cosoma'ë paë'ë. Maija'quëni më'ë cosohuë."

⁵ Caquëna, Ananías asani juni taji'i. Si'aohua'i i juni taise'e asasicohua'i quëquë huesëhuë.

⁶ Ja maca yureta'a posëohua'ipi dani i capë cañapi tunani sani tãhuë.

⁷ Tres horas tëto sai maca Ananías nëjo cacao, io ëjère yo'ose'e asama'copi.

⁸ Cacacona, Pedropi jote seji'i:

"¿Mësaru case'e ja'ye yeja do'i isire?"

Caquëna, cao:

"Jaje pa'ijë'ë, jare ja ja'ye isihuë."

⁹ Cacona, Pedropi capi:

"¿Me neni mësaru te'le jaje yo'oñu'u cuasani ëjaërepa joyore neñañu'u cajë yo'oye'ni? Jecohua'i daiyë, më'ë ëjère tāsicohua'i cui'ne yure më'ëni saja'cohua'i a'ë."

¹⁰ Ca macarepa Safira huajërepa juni tãco'ë, Pedro quëo yë'quë macana. Juni tāsicopi uiona, posëohua'ipi cacani t'ani sani tãhuë, io ëjère tāsico yë'quë macana.

¹¹ Ja maca si'aohua'i sehuosicohua'i cui'ne si'aohua'i iti yo'ose'e, asasicohua'i quëquë huesëhuë.

Iñoñe Cui'ne Pai Yo'o T'í'a Ma'ñere Yo'ose'e

¹² Pai pa'i hue'ñana Jesús jëjo saocohua'ipi jaiye de'oye yo'ohuë, pai yo'o t'í'a ma'ñere cui'ne iñoñere. Yo'ojëna, si'aohua'i Salomón nequë pa'isi tu'rihuë pa'icona, tsi'sijë yo'ohuë.

¹³ Te'ijë yecohua'i aquë tsiosi'i caquë yo'oye papi, iohua'ire. Jaje pa'iquëta'are pai cato de'ocohua'i a'ë, cuasajë.

¹⁴ Yo'ojëna, ëmëohua'i cui'ne nomiohua'i Èjaëre sehuoni jai pai paë'ë.

¹⁵ Cui'ne ju'icohua'ireje cai saina cui'ne ju'icohua'ire sayena oeni ma'añana eto oëhuë, Pedropi da saina, i pai to'oupi jāohua'i acohua'ina ju'aquëna, co'yajajë cuasajë.

¹⁶ Cui'ne Jerusalén yërhue pai dari pa'icohua'ipi jai pai Jerusalénna daë'ë, ju'icohua'ire cui'ne huati quë'iohua'ire dajë. Dajëna, si'aohua'i juju caññoñuë.

Pedrore Cui'ne Juanre Huani Jeoñu'u Cajë Yo'oye

¹⁷ Maija'quë huë'ë ñacaicohua'i ëjaë ja're saduceo pai pa'icohua'ipi si'aohua'i cōni iohua'i yo'oyere ñajë oicohua'i paë'ë, cui'ne yo'o t'í'añe peo do'ire.

¹⁸ Ñani pëijë Jesús jëjo saocohua'ire tseani co'aye yo'ocohua'ire co hue'ñana cohuë.

¹⁹ Cosicohua'ini Maija'quë huiñaëpi ñami paire co huë'e eta sa'ro hui'yoni etopi, ñeje caquë:

²⁰ “Sani paire quëajë'ë, mësarü iye huajëye pa'iyere Maija'quëre së huë'epi nëcäjë.”

²¹ Caëna, asasicohua'ipi ñatani i case'eje pa'ye Maija'quë huë'ena nea huë'ñarepa caca'ni paire ye'ya huëohuë. Jaje ye'yajëna, Maija'quë huë'e ñacaicohua'i ëjaë cui'ne i ja're cöni pa'isicohua'ipi ëjaohua'ire pase'e coca cayena soihuë, si'aohua'ire Israel pai aiohua'ire coca cañu'u cajë. Ja maca tsi'sini Jesús jëjo saocohua'ire co huë'ña ñu'icohua'ire quë'ëjajia'cohua'ire jëjo saohuë.

²² Jëjo saojëna, soldadopi co huë'ena sani coa ña jujahuë, tsoe peojëna. Jaje ña jujani co'ini ñeje cajë quëahuë:

²³ “Paire co tu'rihuë cato de'oyerepa sjosico paji'i. Pa'ina, cui'ne soldado pajje eta sa'noare nëcäjë de'oyerepa ñahuë. Jaje pa'ioni hui'yojë ñajëna, ti pai peoco paji'i, sa'nahuë.”

²⁴ Cajëna, jare asani Maija'quë huë'e ñacaicohua'i ëjaërepa, Maija'quëre së huë'e ñacai soldado pai ëjaë cui'ne aiohua'i cöni cahuë: “Jërore pana ja yo'ose'e nëajai ja'ñe a'ni?”

²⁵ Jaje yo'ojë ca macarepa te'i titani capi:

“Mësarü cosicohua'ipi Maija'quëre së huë'ere nëcäjë paini ye'yayë.”

²⁶ Caquëna, asani soldado pai ëjaëpi i soldado pai ja're saji'i, tseasi'i caquë. Tseasicohua'ita' co'aye yo'oye pahuë, paipi pëti huëoni quëna pëapi jëama'cohua'ini cuasajë ca'rajë.

²⁷ Titani jöhua'ire tseani sahuë, ca tëji ëjaohua'i quë'rona. Sarena, Maija'quë huë'e ñacaicohua'i ëjaëre papi capi, jöhua'ire:

²⁸ “Tsoe mësarute cahuë yëquë, jaë Jesús aye ti paire ye'yama'pë pa'ijë'ë cajë. ¿Casicohua'ini mësarü cato me yo'ore'ni? Mësarü cato si'a Jerusalén jaë aye ye'yayepi timë huesoyë. Cui'ne jase'e yo'oye pani yëquëreje jaëre huani jëosi do'i quë'iohua'ire cañu'u cajë yo'oyë.”

²⁹ Caquëna, Pedropi cui'ne i cajeohua'i Jesús jëjo saocohua'ipi sehuojë cahuë, ñeje:

“Yëquë cato Maija'quë cayere sehuocaiye pa'iji, pani pai cayere.

³⁰ Mësarü cruzuna deoni huani jëosiquëre mai aiohua'i Diusupi huajëquëre huëopi, Jesure.

³¹ Maija'quëpi huëoni i ëja te'tena ñopi, ite. Paire de'oye saquëre neni cui'ne huasoquëre nepi, ite, Israel paipi Maija'quëna co'ini jöhua'i co'aye yo'ose'e saicaja'quë caquë.

³² Iye yo'ose'e yëquë ñasicohua'ipi quëaye cui'ne Maija'quë ite sehuocohua'ire isi joyo de'o joyoje ñasiquëpi quëaji.”

³³ Jaje cayere asani Israel pai ëjaohua'ipi pëtiteni huani jëoñu'u cajë yo'ohuë.

³⁴ Jaje yo'ojë ca ëjaohua'i jopore te'i fariseo Gamaliel hue'equë paji'i, si'a pai de'oye cajëna pa'iquërepa, cui'ne cuañese'e ye'yaquërepa. Jaëpi huëni nëcäni cuañepi: “Jesús jëjo saocohua'ire hue'sena eto saojë'ë, ëa maca cacaja'cohua'ire,” capi.

³⁵ Caëna, etosi jeteyo'je ije pa'i ëjaohua'ire capi:

“Israel pai mësarü jöhua'ire yo'o ja'ñe de'hua ñani yo'ojë'ë.

³⁶ Cuasajë'ë, cui'ne Teudas yo'ose'ere. Ai tsoe maca, jaë je'quë ëjaëre pa'ë caquë yo'opi. Yo'okuëna, cuatrocientos pairepa ite pe'tehuë. Pe'tejëna, iti saquëni huani jëorena, ite pe'tecohua'i peo huë'ña tiya huesëhuë. Ja maca carajaji'i, ja yo'ose'e si'aye.

³⁷ Ja jeteyo'je paire cuëce mu'seña pa'i maca Judas Galilea aquëpi cui'ne ëjaë'ë caquë yo'opi. Yo'okuëna, ite pai pe'te huëohuë. Pe'te huëorena, ini huani jëorena, ite pe'tecohua'i peo huë'ña tiya huesëhuë.

³⁸ Jaje pa'ina, mësarute yëhuoquë cayë. Jöhua'ire yo'oye jëoni ñuni saojë'ë, jöhua'ise'e pa'ijajë. Jaje pa'ina, iyepi pai tse pani coa carajai ja'ñe a'ë.

³⁹ Jaje pa'iquëta'are iyepi Maija'quë tse pa'ito mësarü ne ti'añe paja'cohua'i a'ë. Jaje pa'ito ñare pajë yo'ojë'ë. Yo'ojë Maija'quëni sañope yo'oyë, mësarupi.”

⁴⁰ Caëna, asani i case'e sehuocae'ë. Ja maca yureta'a Jesús jëjo saocohua'ire soini si'seni, Jesús coca ti quëaye pajë'ë, cani yureta'a ñuni saohuë.

⁴¹ Ñuni saojëna, Jesús jëjo saocohua'ipi etajë Maija'quëpi jaje yëna Jesús mami do'ire ai yo'oyë cuasajë sihuahuë, pai ëjaohua'i quë'ropi etajë.

⁴² Etasicohua'ipi si'a mu'seña Jesús de'o cocare quëajë ye'yahuë, Maija'quëre së huë'ena cui'ne huë'ñana.

6

Siete Paire Ao Huahuëcuhua'ire Nese'e

¹ Ja mu'seña sehuocohua'ipi jai pai sehuojë jojo saiye sëte, griego pai coca cacohua'ipi sañope ca huëohuë, hebreo pai coca cacohua'ini griego pai hua'jeohua'ini si'a mu'seña huahueyere de'oye huahuëcama'pë pa'iyë cajë.

² Jaje cajëna, asani doce pa'iohua'i Jesús soisicohua'ipi si'aohua'ire sehuosicohua'ire tsi'soni cahuë:

“Co'aji, yèquëpi huahueye ñañere cajë, Maija'quë coca quëayerë jeoto.

³ Jaje pa'i do'ire sehuosicohua'i mësarupi mësaru acohua'ini siete pa'iohua'ire co'ejë'ë, mësaru ai de'lo paire ñacohua'ini, ta'ñe asacohua'ini cui'ne de'lo joyo tímësicohua'ini. Tj'arena, jaohua'ina iye co'amaña yo'o ja'ñe isiñu'u, yèquë.

⁴ Isini yèquë cato Maija'quëre sejë cui'ne i coca quëajë pañu'u.”

⁵ Carena, si'aohua'i jaje yo'oñu'u cuasani sahuajë tj'ahuë, Estebanre, Maija'quëre asaquëre pare, de'lo joyore tímësiquëre, Felipere, Prócorore, Nicanorre, Timónre, Parmenasre, Nicolásre, Nicolás cato ja'në Israel pai yo'oye sehua aquë paji'i, Antioquia aquë.

⁶ Tj'ani Jesús jëjo saocohua'i quë'rona sahuë, johua'ire. Sarena, jaohua'ipi johua'i siopëana patojë Maija'quëre seacaë'ë.

⁷ Maija'quë coca jero sa'na jai saco'ë. Jai saiona, sehuojë jai pai paë'ë, sehuocohua'ije Jerusalén pa'icohua'ipi. Jaje jai pai sehuojëna, cui'ne Maija'quë huë'e ñacaicohua'i ëjaohua'ije sehuohuë, te'ohua'ise'e.

Estebanre Tseñe

⁸ Maija'quë isi tutu de'oyere pare paquë'ni Esteban pai yo'o tj'a ma'ñere yo'o iñopi, pai daripë pa'icohua'ire.

⁹ Jaje yo'oquëna, ñani Jo'yaohua'i pa'isicohua'ipi eta huajësicohua'i hue'yo huë'e pa'icohua'ipi cui'ne Cirene acohua'ipi, Alejandría acohua'ipi, cui'ne Cilicia acohua'ipi, cui'ne Asia yeja acohua'ipi Estebanre sañope ca huëohuë.

¹⁰ Ca huëosicohua'ita'a ca tj'añe pahuë, de'lo joyo isiyepi ta'ñerepa caquëna, si'aye.

¹¹ Ja maca yureta'a Moisésre cui'ne Maija'quëre sañope caquëna, asahuë, caji'cohua'ire curipí saihuë.

¹² Sairena, jaohua'ipi si'a iti daripë paire ne huëohuë, jai co'a coca. Jaje ne huëorena, aiohua'i cui'ne cuañese'e ye'yacohua'i Estebanre huajo huëohuë. Huajo huëoni tseñi ca tëji ëjaohua'i quë'rona sahuë.

¹³ Jaje yo'ojë cui'ne coa cosoja'cohua'ireje nesicohua'ipi ñeje cahuë:

“Maija'quëre se huë'ere iquë ai sañope caquë api cui'ne cuañese'ejë sañope caquë api.

¹⁴ Cui'ne Jesús Nazaret aquëpi Maija'quëre se huë'e nejoja'quë api. Nejoquë cui'ne Moisés maire jeocaise'ere tñe ponaja'quë api, caquë api, iquë.”

¹⁵ Si'aohua'i iti maca ñu'icohua'ipi cui'ne ëjaohua'ipi cõni Esteban tsiare ñahuë, huññä tsiaje pa'ioire pare hue'equëna.

7

Esteban Paire Sehuoye

¹ Maija'quë huë'e ñacaicohua'i ëjaëre papi Estebanre seji'i.

“¿Më'ëre jaje yo'oquëre pani jaohua'i caye caquë?”

² Seina, Esteban sehuoquë capi:

“A'yëohua'i, cui'ne ja'quëohua'i, asajë'ë, yë'ë caquëna. Maija'quë de'loquëpi mai ai Abrahamna ñai iñopi, Mesopotamiare pa'ina, Harán yejana ja saima'në.

³ Iñoquë capi: ‘Më'ë yeja cui'ne më'ë cajeohua'ire jëoconi saijë'ë, yë'ë iñoja'a yejana.’

⁴ Caëna, Abraham Caldea yejapi etani Harán yejana sani paji'i. Pa'ina, péca ja'quë juni huesëpi. Juquëna, jeteyo'je Maija'quëpi Abrahamre iye yejana dapi, yure mësaru pa'i hue'ñana.

⁵ Jaje pa'iquëta'are iti yejana co'amaña necani isiyë papi. Quëo tsa'cuja'toje isiyë papi. Jaje pa'iquëta'are isija'quë a'ë ca nëopi, i ju'isi jeteyo'je i tsëcapë tseco pa'ija'core. Ja mu'seña cato Abraham mamajëre peoquë pa'inije jaje capi.

⁶ Yequeje cui'ne Maija'quëpi capi, ite: ‘Më'ë tsëcapë acohua'ipi yequë pai yejare huero pa'ija'cohua'i a'ë. Pa'ijëna, jo'yaohua'ire pajë co'aye yo'oja'cohua'i a'ë, cuatrocientos ometëcarepa.’

⁷ Yequeje capi, Maija'quë: ‘Yë'ëpi mësarute jo'yaohua'ire neni pasicohua'ire saija'quë a'ë. Ja jeteyo'je mësaru eta huajëni yë'ëre iye macapi necaijë pa'ija'cohua'i a'ë.’

⁸ Ca nëose'ere yo'ojajë caquë Abrahamre Diosupi cuañëpi, cuiri ca'nire tëajë'ë, caquë. Jaje pa'ina, Abraham i mamaquë Isaacre ocho mu'seña coasiquë pa'ina, cuiri ca'nihuë maca tëapi. Jaje cui'ne yo'opi, Isaacje i mamaquë Jacobre. Iquë Jacobpi si'aohua'ire i mamajëre jaje yo'opi, Israel pai doce tsëcapëna péca ja'quëohua'i pa'ija'cohua'ireje.

⁹ Mai aipë Jacobo mamajëpi yo'jei Josére péca ja'quëpi ai oina cui'ne oni cuañoñe peojë isi jeohuë, Egípton sajjë cajë. Jaje pa'iquëta'are Diosupi José ja're cõni paji'i.

¹⁰ Pa'i si'aye i ai yo'oye huasopi. Cõcai cui'ne ta'ñe yo'oye isipi. Isiquë cui'ne Egípto ëjaëre papi de'oye ite ñacai ja'ñeje necaji'i. Necaina, Josére Egípto pai ëjaëre hue'yopi. Cui'ne i Faraónrepa pa'i huë'e ñacaiquëre pare hue'yopi.

11 Ja maca si'a Egípto yeja Canaán yeja ao éa ju'iñe paji'i, ai yo'o mu'seña. Pa'ina, mai aipêje aïñe ti peocohua'i pa'ê.

12 Pa'ijëna, Jacobpi Egíptore ao pa'iji, asani i mamajëre mai aipëre jëjo saopi. Iye saise'e cato du'ru macarepa saise'e a'ê.

13 Tijupë cayaye acore satena, Josépi i maja'yë jupëre yê'ê mësarü yo'jei'ê caquë quëapi. Jaje quëaquëna, asani Faraónpi ja tsëcapë aquë api caquë Josére ñapi.

14 Ja jeteyo'je Josépi pëca ja'quë Jacobre cui'ne i tsëcapë setena y cinco pai pa'icohua'ire Egíptona daijê'ê, caquë cuañepi.

15 Jaje cuañëina, Jacob Egíptona sani paji'i. Pa'iquëpi juji'i. Jaje cui'ne i mamajëre jujuhuë, mai aipêje.

16 Ja maca tarase'e Siquemna sani cojena oa huesohuë. Abraham curipi Hamor mamajëre hueroquë pa'isi yejana oareña.

17 Maija'quë Abrahamre ca nëose'e t'jañe ja'i maca pa'ina, Israel pai jai pai jojo sateña, Egípto yeja. Jaje yo'oni jai pai pateña.

18 Jaje pa'i maca Josére ñama'quëpi yequepi Egípto pai ëjaë cuañe huëouña.

19 Cuañe huëoni iye ëjaëpi mai paire care payeje pa'ye caquë, co'aye yo'oquë tsire ja'a coasicohua'ire jeocojê'ê ju'ija'cohua'ire caquë cuañepi, pëca ja'quëohua'ire.

20 Ja mu'seña Moisés coa. Coaëna, Maija'quë sihuaquë ñapi, ite. Jaëni pëca ja'quëohua'ipi toaso ñañëohua'ire huë'ena ñajë pahuë.

21 Pa jujani jeocoye pa'ijëna, Faraón mamacopi ite ini mamaquëre pare ai de'huayeje pa'ye ai de'huao.

22 Jaje pa'ina, Moisés cato Egípto pai ta'ñe yo'oyere ye'yesiquë paji'i. Jaje pa'ipi tutu caquëpi cui'ne yo'oyeje i case'eje yo'oquë paji'i.

23 Cuarenta ometëcaña papi i paire Israel paire ñasi'i cuasapi.

24 Cuasaquëpi ñaquëna, Egípto paipi Israel paire co'aye yo'oquëna, ñani Moisés coçasi'i caquë yo'oquë Egípto paire huani jeopi.

25 Moisés cato jaje yo'oquëna, ñani i cajeohua'ipi Diusu johua'ire huasoja'quëre jëjo daoquë api cuasajajë caquë yo'opi. Yo'oquëta'are i cajeohua'ipi jaje cuasaye pahuë.

26 Yo'osiquëpi ñatasi mu'se Israel paipi cayaohua'i sa'ñe uihuajëna, Moiséspi t'japi. T'jani uihuama'pë pa'ijajë caquë capi: '¿Me neñu'ju te'e tsëcapëta'a sa'ñe uihuaye'ni?'

27 Caquëna, iti se ai huaiquëpi Moisésre jëtëpi jëjo saoque capi: '¿Nepi më'ëre pai ëjaëre cui'ne yëquë yo'oye ñaquë ne de'huaja'quëre nere'ni?'

28 ¿Ñamina'a Egípto paire huani jeose'eje pa'ye yê'ëre huani jeosi'i caquë?'

29 Caquëna, iyere asani Moisés Madián yejana cati saji'i. Sani jarote t'j yejare huero pa'i caya mamajëre papi.

30 Cuarenta ometëca tëtö saisi maca, zarza ñëpi toa corohuërepa tsë'isicoja'a huññaëpi ñai nëcapi, Sinaí cutihuëna cuene yejana.

31 Cani ñaëje pa'ye Moisés ñaquë iquere pa'ni cuasaquë ñapi. Jaje cuasaquë de'oyerepa ñasi'i caquë tsiojai asapi, Ejaë yê'ore ñeje caquëna:

32 Yê'ê cato më'ê aipë Diusu a'ê. Abraham, Isaac, cui'ne Jacob Diusu a'ê, Yê'ê. Jare asani Moisés iti ca huë'ña ñama'ê, ca'raquë coa tsasi huëouna.

33 Ja maca Ejaëpi caëña: 'Dutajê'ê, quëo ju'iyë. Më'ê nëca huë'ña cato de'o huë'ñare pa'ê.

34 Egípto yejare pa'ijë yê'ê pai ai yo'oye t'jñarepa ñaquë pa'iyë. Aiohua'ipi ai yo'ojë oijëna, asani huasosi'i caquë cajehuë. Jaje pa'iyë sëtë daijê'ê, yê'ëpi më'ëre Egíptona jëjo saosi'i.'

35 Israel pai coejë '¿nepi më'ëre pai ëjaëre cui'ne yëquë yo'oye ñaquë ne de'huaquëre nere'ni casiquëni?' Maija'quëpi pai ëjaëre cui'ne paire huasoquëre neni jëjo saopi, johua'i quë'rona. A'ri soquë yê'ê ñasiquë huññaëpi cocaina, yo'o t'jajaquë caquë.

36 Iquë Moisés mai aipëre Egíptopi etopi, pai yo'o t'ja ma'ñere yo'oquëna, cuarenta ometëcahuëña.

37 Jare iquë Moiséspi capi, Maija'quëpi mësarü aquëni yê'ëje pa'ire neja'quë api, ite quëcaiquë pa'ija'quëre.

38 Cui'ne jare iquë Moiséspi Israel pai ja're tsi'sini coca ca'aji'i, jeto cuene yejana. Jare ipi huññaëre coca ca'aji'i, Sinaí cutihuëna. Jare ipi mai aipë ja're pa'aji'i. Cui'ne jare ipi pa'i cocarepa asapi, maire quëa ja'ñeje.

39 Jare pa'iquëta'are mai aipë cato sehuocaiye coehuë. Coejë Egíptona co'iñu'u cahuë.

40 Jaje cajë Aarónre cahuë, yëquëre saja'a diusuohua'ini necaijê'ê. Huesëyë. Me sa'repa yëquëre Egíptopi etosiquë Moisés neni jo'cuarepa nëji, cahuë.

41 Jaje cani duruhuequëje pa'ire diusu api cajë de'huahuë. De'huani ite isiñu'u cajë nëicohua'ire huani isijë cui'ne jai pai tsi'sini johua'i de'huasi diasure sihuajë yo'ohuë, Maija'quë api cajë.

⁴² Jaje yo'ojëna, Maija'quëpi jaohua'ire ña jujani jeocopi ma'ñocohua'i ma'tëmo pa'icohua'ini secohua'i pa'ijajë caquë. Jaje pa'ina, Maija'quëre quëacacohua'i toyapëna toyase'e pa'iji, ñeje:

Israel pai, zmësaruru jeto cuene yeja cuarenta ometëca pa'i maca, Yë'ëre sihuajë de'oye señu'u cajë nëtërojaicohua'ire huani isijë, cui'ne co'amaña coa isijë yo'ore?

⁴³ Pahuë, mësaruru jaje yo'oye. Coa ai jerepa Moloc diusu huë'ere hue'ejë sajë,

Cui'ne Refán diusu ma'ñoconi hue'ejë sajë

Cui'ne mësaruru señu'u cajë de'huasi diusuohua'ini hue'ejë sajë yo'ohuë.

Ja do'ire mësarute yë'ëpi Babiloniana jëjo saoja'quë a'ë.

⁴⁴ Ja maca cato mai aiohua'i ca'nipi nesi huë'ere pahuë, Maija'quë ja're. Jaje yo'oñu'u, cajë nejaquë nese'ere ñno huë'ere. Ja huë'e cato Moisésre Maija'quë caquë ñnoni ñeje pa'ioire nejë'ë caquë cuañese'eje pa'ioire nesico paji'i.

⁴⁵ Ja huë'e mai aiohua'i tsoe pasiconi Josué ja're daicohua'ipi te'e johua'i daiyeje dahuë, yecohua'i yeja jio maca Maija'quëpi johua'i ñajëna, yequë paire nejo maca. Jaje pahuë, ja huë'e David pa'i macaja'a.

⁴⁶ Pajë pa'icohua'ini Davidpi Maija'quëre de'oye ña cuañequëpi Jacob Diusu huë'e necasi'i cuasapi.

⁴⁷ Cuasaquëta'a papi. Necaiye paquëna, mamaquë Salomónpi necaji'i.

⁴⁸ Jaje pa'iquëta'are Maija'quë irepa cato pai nesi huë'ere pa'ima'quë api. Jaje pa'ina, Maija'quëre quëacaiquëpi capi, ñeje:

⁴⁹ Ma'tëmo cato yë'ë pa'i huë'ña'ë. Yë'ë ñu'i cuañe huë'ña'ë.

Yeja cato yë'ë quëo meñe tsa'cupa huë'ña'ë.

¿Jaje pa'ito me yë'ë huë'e necaija'cohua'i a'ni? caji, Ejaë.

¿Jero a'ni, yë'ë pëa huajëja'to?

⁵⁰ Si'aye yë'ë ne saose'epi pa'ito.

⁵¹ Jaje pa'iquëta'are mësaruru cato nuñerepa asajëta'a nuñere pare yo'oyere coecohua'i a'ë. Jaje pa'iohua'ipi cajonoaje asama'cohua'ipi cui'ne joñoaje ti Maija'quëre cuasama'cohua'i a'ë, mësaruru. De'hue Maija'quë joyore sañope yo'ocohua'i a'ë. Aiohua'i pa'ise'eje pa'iohua'i a'ë.

⁵² Jaje pa'ina, ¿jequë a'ni, Maija'quëre quëacaiquë mësaruru aiohua'i co'aye yo'oye pasiquë? Ti peoji, te'ije. Jaje pa'ina, co'aye yo'ojë huani jeohuë, nuñerepa pa'i dai ja'ñere quëacohua'ire. Yure ipi nuñerepa pa'ipi daquëna, mësarupi tseani huani jeohuë.

⁵³ Mësaruru huññaohua'ipi cuañese'e isijëna, isicohua'i de'oye sehuocaima'pë pa'iyë." Jare capi, Esteban.

Estebanre Huani Jeoñe

⁵⁴ Jaje caquëna, asani Estebanre ai pëijë cuji qui'cohuë.

⁵⁵ Jaje yo'otoje Esteban cato de'o joyo tımësiquëpi ma'tëmore ñaquë Maija'quë de'oyere pare ñapi. Ñaquë cui'ne Jesure ñapi, Maija'quë ëja të'hui quë'rore nëcaquëna.

⁵⁶ Ñani capi:

"Ina ma'tëmo hui'yosiconi ñañë, cui'ne Jesupi Maija'quë ëja të'huire nëcaquëna."

⁵⁷ Caquëna, asani pëijë cajonoa pë'pëni cuijë ina da tome daë'ë.

⁵⁸ Da tome dani tseani pai daripëpi etoni quëna pëapi jea huegahuë, co'aye yo'oquë api cajë. Huaicohua'ipi johua'i caña du'teni te'e posë Saulo hue'equëna, isihuë, ñacaijë'ë cajë.

⁵⁹ Quëna pëapi jeajëna, Estebanpi Maija'quëre sei capi:

"Ejaë Jesús, yë'ë joyo më'ëpi de'huacaijë'ë."

⁶⁰ Cani ja maca do're ja'runi ai tutu capi:

"Ejaë yë'ëre huaicohua'i yo'ose'e saima'ë pa'ijë'ë." Jare cani juji'i.

8

¹ Juní huesëquëna, iti maca Saulo nëcaquë ñaquëpi. De'oji, Estebanre huaise'e cuasaquë ñapi.

Sehuosicohua'ire Saulo Yo'oye

² De'o paire papi Estebanre ai oijë ta jeohuë.

³ Jare yo'ojëna, Saulo cato sehuosicohua'ire huë'ña ñape cacaquë ëmëohua'ire, nomiohua'ire, quë're etoquë co huë'ñana cosi'i caquë yo'opi.

Samaria Paire De'o Coca Quëaye

⁴ Jaje yo'ojëna, Jerusalénpi etasicohua'ipi si'a huë'ña saijë huaso coca quëahuë.

⁵ Quëajëna, johua'i aquë Felipepi Samaria daripëna sani Jesús coca quëapi.

⁶ Quëaquë pai yo'o tija ma'ñe yo'opi. Yo'ouquëna, ñajë si'aohua'i tsi'sini ai asahuë, Felipe caye.

⁷ Jai pai huati quë'iohua'i pa'isicohua'ipi huatire eto sao cuañohuë. Huatiahua'ipi etajë cuijë etahuë. Cui'ne jai pai cu'ima'cohua'ije, cui'ne do'pëjë cu'icohua'ije co'yasicohua'i paë'ë.

⁸ Ja yo'o do'ire ja daripë acohua'i ai sihuahuë.

⁹ Ja sihua hue'ñare te'i ëmë Simón hue'equë ja'në dahuë pa'isiquë paji'i. Samaria paire care payeje caquë jerepa pa'i a'ë caquë yo'osiquë paji'i.

¹⁰ Jaje pa'ini si'aohua'i a'ricohua'i maña cui'ne jaicohua'ina çoni i caye asacajë cahuë:

“Iquë api, irepa Maija'quë tuture paquërepa cahuë.”

¹¹ Jaje cajë ite de'oye i caye sehuocaë'ë. Tsoe hue'ña noni i dahuë ñañepi yo'ouquë care payeje caquëre sête jaje sehuocaë'ë.

¹² Jaje yo'ojë pa'icohua'ipi Felipe quëayere asani Maija'quë cuañe te'te ayere cui'ne Jesucristo ayere asani ëmëohua'i cui'ne nomiohua'i sehuohuë. Sehuoni oco do cuañohuë.

¹³ Do cuañojëna, i Simónque sehuoni oco do cuañoni ai de'oyere pare pai yo'o tija ma'ñere ñaquë ai de'oyere pa'ni cuasaquë Felipe ja're te'e cu'i huëopi.

¹⁴ Samaria paipi Maija'quë coca sehuorena, Jesús doce soisicohua'ipi asani Jerusalén pa'icohua'ipi Pedrone cui'ne Juanre jëjo saohuë, Samariana.

¹⁵ Jëjo saorena, sani Samaria sehuosicohua'ire Maija'quëre secacaë'ë, de'o joyore pajajë cajë.

¹⁶ Jesús mai Ejaë mamipi do cuañosicohua'ita'a ja yë'ta'a de'o joyo peocohua'i paë'ë.

¹⁷ Ja do'ire Pedro cui'ne Juanpi jëñapi jëjo pajë Maija'quëre sejëna, de'o joyore isi cuañohuë.

¹⁸ Jëñapi Jesús jëjo saocohua'ipi jëjo pajë sejëna, Maija'quë joyore isiña. Isina, ñani Simónpi curipi huerosi'i cuasaquë caëña.

¹⁹ “Isijë'ë, ja tuture pare yë'ëje isina, ja tutupi yë'ëpi jëñapi patoquë seina, de'o joyore isi cuañojä'cohua'ire.”

²⁰ Caquëna, Pedropi ite capi:

“Më'ë curiquë ja're më'ë ne huesëye pa'iji. Maija'quë isiyë curiquëpi hueroye peoji.

²¹ Maija'quë ña hue'ña më'ë nui joyo peoyë. Jaje pa'ina, ja tutupi isi cuañone peoji, më'ë.

²² Më'ë co'aye cuasayere jëocojë'ë. Jëoconi mai Ejaëre sejë'ë. Seina, de'hue oni yeje'ña pa'i api, më'ë jaje cuasase'e.

²³ Yecohua'ipi de'oye yo'ojëna, ñani sihuama'ë. Ñañepi më'ë timësiquëpi pa'ina, ñaquë cayë. Ja do'ire më'ë co'aye cuasayepi huësiquëre paji, më'ëre.”

²⁴ Caquëna, Simónpi capi:

“Mësarupi yë'ë do'ire secacajë'ë, Ejaëre. Si'aye mësarü case'eje pa'ye tëtö saiye paja'core yë'ëre.”

²⁵ Iye a'ë, maire caquë Jesús yo'ose'e cajë quëajë cui'ne Maija'quë coca quëa tējini Jesús jëjo saocohua'ipi Samaria yeja a'ri daripëana, de'o coca quëahuë. Quëa tējini yureta'a Jerusalenna co'ihuë.

Felipe Cui'ne Etiopia Aquë Yo'ose'e

²⁶ Ja jeteyo'je mai Ejaë hujñaëpi Felipere capi:

“Huëni Jerusalén ma'ana saijë'ë, Gazana sai ma'ana huë'ehuë te'tena.”

Iye ma'a cato cuënesi yejaja'a sa sai ma'a paji'i.

²⁷ Caëna, asani Felipe huëni ja ma'aja'a saji'i. Saiquëpi ma'ana Etiopia paire tija'api. Jaë cato ëjaërepa paji'i. Etiopia ëjao curi de'huacaiquë paji'i. Jaëpi Jerusalëna Maija'quëre sësi'i caquë saisiquë paji'i.

²⁸ Jaje saisiquëpi i yejana co'iquë caballopi quërëcore ñu'i sai Maija'quëre quëacaiquë Isaías toyase'ere ñaquë saji'i.

²⁹ Saina, joyopi Felipere capi:

“Caballo quërëco quë'rona saijë'ë.”

³⁰ Caëna, Felipe tsiojai asaquëna, Isaías toyase'ere ñaquë caquë saji'i, Etiopia aquëpi. Ja maca ite seji'i:

“¿Asaquë më'ë, më'ë ñase'e?”

³¹ Seina, sehuopi:

“¿Me asa tija'ñe'ni, iti quëaquëpi peoto?”

Cani Felipere yë'ë ja're mëni ñu'i saijë'ë caquë seji'i.

³² Toyasico i ñasico cato ico paco'ë, ñeje caco:

Huai hue'ñana yëi ñamare sayeje pa'ye sahuë, ite.

Sarena, tëacohua'i ña hue'ñana yëi ñama memëne pañeje pa'ye memëne papi.

³³ Teaye pa'i paji'i. Jaje pa'ita'are nuñerepa de'oye ite necaiye pahuë.

Iye yeja pa'iquëni i pa'iyë naë tãa jëoñere, ¿nepi cacaija'cohua'i a'ni, i tsëcapë?

³⁴ Etiopia aquëpi Felipepe seji'i:

“Quëare pajë'ë, yë'ëre. ¿Neni caquë'ni, Maija'quëre quëacaiquë ija'a co'ye caquë panita'a yequëni caquë?”

³⁵ Caquëna, ja maca Felipe Etiopia pai ñasico acopi toyase'e cayepi huëoni Jesús aye de'oco coca quëapi, ite.

³⁶ Quëaquëna, oco quë'roja'a sa sai Etiopia aquëpi capi:

“¿Ina oco iñore pa'iji, yë'ëre doye de'oma'quë?”

³⁷ Caquëna, Felipepi capi:

“Më'ëpi si'a joyorepa de'oye sehuoquë pa'ito doye de'oji.”

Caquëna, ipi capi:

“Jesucristo Maija'quë mamaquë api asayë, yë'ë.”

³⁸ Caëna, ja maca omejani si'a jupë cayaohua'i Felipe cui'ne Eunuco cõni oco quë'rona sa cajeni Felipepi oco dopi.

³⁹ Do tējini tumasi maca mai Ëjaë joyopi Felipepe sapi. Tirona saëna, Etiopia aquë tujupë ñama'ë paji'i. Jaje pa'iquëta'are sihuaquë saji'i.

⁴⁰ Felipe cato Azoto daripëre paji'i. Pa'i pai ñape dari Maija'quë coca quëaquë Cesarea daripëna tji'api.

9

Saulo Sehuoye

(Hch 22.6-16; 26.12-18)

¹ Jaje yo'oye pa'ina, Saulopi Jesure sehuosicohua'ire huasi'i caquë yo'oquëpi Maija'quë huë'e ñacaicohua'i ëjaërepa quë'rona saji'i.

² Sani ite seji'i: Toyacajë'ë, Damasco pai tsi'si huë'ñana, si'aye yë'ëpi cacani co'equë Jesure sehuocohua'ire ëmëohua'ire cui'ne nomiohua'ireje tseani huëni Jerusalëna dani coja'quëre capi. Caquë seina, toyacaquëna, saji'i.

³ Sai je'nërepa Damasco quëno macare pa'ina, ma'tëmopi Saulona miañerepa ju'api, si'aëre cuasama'tore papi.

⁴ Ju'acquëna, yejana tani yë'ose'e caquëna, asapi:

“¿Saulo, Saulo, Me yo'oquë yë'ëre josa yo'oquë'ni?”

⁵ Caquëna, Saulopi seji'i:

“¿Ëjaë, më'ë iquëipi caquë'ni?”

Caquëna, yë'ose'e sehuopi:

“Jesu a'ë, yë'ë. Më'ë sañope yo'oquë a'ë. Tsoa tarapë jëjësë ñaca quë'iopi duruhuequëre jëjo saojëna, huequëpi tarapëna co'ye titoquë pani a'si ju'iquë api, më'ë cui'ne yo'oyë, huequë yo'oyeje pa'ye.”

⁶ Caquëna, Saulopi quëquëni tsasiquë capi:

“¿Yë'ë Ëjaë, iquere yo'oja'quë a'ni, yë'ë?”

Caquëna, capi:

“Huëni ja daripëna cacajë'ë. Jaropi më'ë yo'o ja'ñe quëaye pa'iji.”

⁷ Caquëna, Saulore cõcchua'ijë asahuë. Asajëta'a iti caquëre ñama'pë ai quëquëni cama'pë paë'ë.

⁸ Pa'ijëna, Saulo yejapi huëni ñacoa sëtaquëta'a ñama'ë paji'i. Jaje ñama'ë pa'ina, ite cõcchua'ipi jëtëna tseajë Damascona sahuë.

⁹ Sarena, toaso mu'seña ñama'quëpi, aima'quëpi, cui'ne ucuma'quëpi coa paji'i.

¹⁰ Pa'ina, Damasco daripëre te'i Jesure sehuosiquë paji'i. I mami cato Ananías hue'equë paji'i. Pa'ina, jaëna cani ñañeje pa'yeja'a mai Ëjaëpi ñaini capi:

“¡Ananías!”

Caquëna, capi:

“Ëjaë, pa'iyë.”

¹¹ Sehuoquëna, mai Ëjaëpi ite capi:

“Huëijë'ë. Huëni saijë'ë, Nui ma'a hue'yosi ma'ana. Sani iñore Saulo Tarso aquë pa'iquë' caquë sejë'ë. Judas huë'ena Maija'quëni sei pa'iji.

¹² Pa'iquëpi cani ñañeje pa'yeja'a ñapi. Te'i ëmë Ananías hue'equëpi dani jëñapi ite jëjo paquë ñaja'quë caquë seccacaina, Maija'quëre.”

¹³ Caquëna, asani Ananíaspi capi:

“Ëjaë, iquëpi Jerusalën daripë pa'icohua'ire, më'ëre sehuocohua'ire ai sañope co'aye yo'oji jai pai cajëna, asahuë, yë'ë.”

¹⁴ Jaje pa'ipi yure ñhona daji'i, Maija'quë huë'e ñacaicohua'i ëjaëohua'i cuañesi tutupi si'aohua'ire më'ëre secohua'ire tseseni huëni sasi'i caquë."

¹⁵ Caquëna, Ëjaëpi capi:

"Jaje pa'ita'are sani ñajë'ë. Yë'ëpi ite soihuë, yë'ë cocare Israel paire quëacaiquë, cui'ne yequë paire quëacaiquë, cui'ne ëjaohua'ire quëacaiquë pa'ijaquë caquë.

¹⁶ Yë'ë coca quëa do'ire ïpi ai yo'oye pa'i ja'ñiere ite ñhosi'i."

¹⁷ Caëna, Ananiáspi Saulo pa'i huë'ëna sani cacani j jëñapi Saulore patoquë capi:

"Saulo, yë'ë yo'jei, Ëjaë Jesupi yë'ëre ma'aja'a më'ëre daina, ñasiquëpi jëjo daopi. Më'ëpi ñaquë pa'ijaquë caquë, cui'ne Maija'quë joyo quë'i pa'ijaquë caquë."

¹⁸ Ca macarepa ñacoa pa'ise'epi so'coje pa'yepi tompëpi. Tomeina, de'oye ñaquë de'oni huëni oco do cuañopi.

¹⁹ Do cuañosi jeteyo'je, aó ani, tutu tsi'soni, Damasco sehuosicohua'i ja're pëani tsoe maca mu'seña paji'i.

Damasco Paire Saulopi Yëhuoye

²⁰ Tutu tsi'sosiquëpi Israel pai tsi'si huë'ñana Jesucristo Maija'quë mamaquë api, quëa huëopi.

²¹ Quëaquëna, si'a asacohua'ipi ai cuasajë co'a ju'tijë cahuë:

"Iquëpi Jerusalén pa'icohua'ire huëni Maija'quë huë'e ñacaicohua'i ëjaohua'ina sani isisi'i caquë daisiquë api."

²² Jaje catoje Saulopi ai jerepa nuñerepa capi, Jesús cocare ca'raye peoyerepa. Ca'rama'ë quëaquë capi, Cristo api, mai huasoquërepa. Jaje quëaquëna, Israel pai Damasco acohua'ipi asajë ai cuasahuë, ¿merepa neni ja jerepa caquë'ni? cajë.

Saulo Yahuerëpa Saiye

²³ Ai tsoe mu'seña quëaquë pa'ina, ñani Israel paipi Saulore huani jëoñu'u cuasahuë.

²⁴ Cuasani yo'ojëna, Saulo de'hue asapi, johua'i yo'oye huañu'u cajë si'a mu'señapi, cui'ne ñamiñapi daripë eta sa'noa ñape utehuë, Saulote.

²⁵ Utejë pa'ina, Jesure sehuosicohua'ipi ñami jai do'rohuëna Saulote ayani jai daripë tëhuopaja'a meñe casahuë. Casarena, de'hue catipi. Jaje jëapi, de'hue.

Saulo Jerusalén Pa'iyë

²⁶ De'hue jëasiquëpi Jerusalénna Saulopi ti'ani Jesure ye'yecohua'i ja're coni pasi'i caquë yo'oqueña, jaohua'ipi sehuoma'quë api cuasajë ite ca'rahuë.

²⁷ Ca'rajëna, Bernabépi Saulore Jesús jëjo saocohua'i quë'rona dani ññoquë quëapi, ite yo'ose'ere ñeje: Iquë Damasco ma'ana mai Ëjaëre pare ñasiquë api. Mai Ëjaëre papi ite coca caquëna asasiquë api, cui'ne Damasco daripëna ca'raye peoyerepa quëcoquë Jesús coca de'oye quëasiquë api, capi Bernabé.

²⁸ Jaje quëaquëna, "de'oji," careña. Saulo Jerusalénna pëapi. Pëani johua'i ja're cu'i yo'oque Jesús cocare ca'raye peoyerepa quëapi.

²⁹ Israel paita'a griego cocapi cacohua'ire coca caquë cui'ne sañope cajëna, ije sañope caquë yo'opi. Quëaquëna, jaohua'ipi ite huañu'u cajë yo'ohuë.

³⁰ Yo'ojëna, sehuosicohua'ipi asani Cesareana sahuë, ite. Jaropi yureta'a Tarso yejana jëjo saohuë, Saulore.

³¹ Ja maca si'aohua'i sehuosicohua'i Judea yeja pa'icohua'i, Galilea yeja pa'icohua'i cui'ne Samaria yeja pa'icohua'i sañope yo'oye jëorena, de'oye pa'i huëohuë. Pa'ijë joyo pa'iyë ai tutu quë'iohua'i de'ohuë. De'ojë Maija'quë yëyere de'oye sehuocaijë paë'ë. Pa'ijëna, de'o joyopi cocaina, si'a mu'señaja'a sehuocohua'ijë pa'ijë jai saë'ë.

Eneas Ne Co'yaye

³² Pedropi sehuosicohua'ire do'i ñasi'i caquë saisiquëpi Lida pa'icohua'irejë sehuosicohua'ire ñasi'i caquë saji'i.

³³ Saisiquëpi ñaquëna, Jarote te'i ëmë Eneas j mami huë'equëpi, ocho ometëca uiquë paji'i, ti cu'ima'quëpi.

³⁴ Pa'ina, Pedro ñani ite capi:

"Eneas, Jesucristopi më'ëre ne co'yaji, huëni më caiñe de'huajë'ë."

Ca macarepa huëji'i.

³⁵ Huëina, ñasicohua'ipi Lida acohua'ipi cui'ne Sarón acohua'ipi Ëjaë Jesucristore sehuohuë.

Dorca Ju'isico Huëiyë

³⁶ Ja mu'seña jope daripëre te'o nomio sehuosico paco'ë. Io mami cato Tabita huë'ecopi, griego coca cato Dorcas caye pa'iji. Jao cato peocohua'ire de'oye cocaiço paco'ë.

³⁷ Jaje pa'ïopi ju'i huëoni juco'ë. Jucóna, io ca'ñihuë tsoani ëmëjë'e tu'rihuëna oahuë.

³⁸ Qani Pedrose esa Jopena daijê'ê, tsoe nêife peoyerepa cajê huëoja'cohua'ire cayaohua'ire jêjo saohuê, sehuosicohua'ipi. Jope cato Lida quêno macare pa'ye sête. Jaje yo'ohuê, Pedropi Lidare pa'iji asani.

³⁹ Sani huëojêna, Pedropi johua'i ja're çoni saji'i. Sa t'i'asi maca ju'isico ui huê'ñana êmêje'e tu'rihuêna îte sahuê. Sasi maca si'a hua'jeohua'i oijê jo necaisi ca'ñare îte iñohuê.

⁴⁰ Ja maca Pedropi si'aohua'ire eto saoni do're ja'runi Maija'quêre seji'i. Sesi jeteyo'je ju'isicore ñaquê capi:

“Tabita huêjê'ê.”

Caquêna, sêtani îte ñani huêni ja'ruo.

⁴¹ Ja'ruona, Pedropi jo jêtêna tseani huëo nêcopi. Huëo nêconi sehuosicohua'ire cui'ne hua'jeohua'ire soini huajêco pa'ico yure caquê iñopi.

⁴² Iye yo'ose'ere si'a Jope daripê pa'icohua'i asahuê. Asani jai pai Êjaêre sehuohuê.

⁴³ Iye yo'osiquêpi Pedro Jope daripêna pêapi. Pêani tsoe mu'seña maña Simón huê'ena, ca'ni de'huaquê huê'ena.

10

Pedro Cui'ne Cornelio

¹ Cesarea daripêre te'i êmê Cornelio hue'yosiquê paji'i, cien soldado pai êjaê. Capitán paji'i. I Cien soldado tsêcapê aquê mami cato Italiano hue'yosico paco'ê.

² Jê cato de'oquê paji'i, Maija'quêre ca'raquêpi. Jaje pa'ipi si'a i huê'e acohua'i ja're Maija'quêre sei pa'iquê paji'i. Jaje pa'ipi peocohua'ire de'oye isipi, çocas'i' caquê judío pa'ire, cui'ne si'a mu'seña Maija'quêre sei paji'i.

³ Pa'ipi te'e mu'se na'iquêna, tres pa'i maca çani ñaheje pa'ye ñaquêna, Maija'quê jêjo daoquê huñâepi i huê'ena cacapi. Cacaquêna, t'iñarepa îte ñapi. Ñaquêna, capi:

“¡Cornelio!”

⁴ Caquêna, ñni ñaquê quêquêni seji'i, îte:

“Êjaê, ¿Iquere yêquê'ni?”

Caquêna, huñâepi capi:

“Mê'ê seña Maija'quê asaji, cui'ne mê'ê peocohua'ire de'hue çocai yo'oyeje ñaji, Maija'quê capi, jaje pa'iyê sête.

⁵ Yure êmêohua'ire Jopena jêjo saojê'ê, Simón Pedro hue'yosiquêre quêrêjajia'cohua'ire. Pedro cato yequê Simón huê'ere pêsiquêpi pa'iji.

⁶ Yequê Simón ca'ni de'huaquê huê'ere pa'iji. Ja huê'e cato jaira têtêpare pa'iji.”

⁷⁻⁸ Maija'quê jêjo daosiquêpi saisi maca Cornelio ipe îte necaicohua'ire cayaohua'ire cui'ne te'e soldadore soini i ñase'e si'aye quêani Jopena jêjo saopi. Soldado cato Maija'quêre cuasaquê paji'i. Jaje pa'ini Corneliojê de'oye cuasaquê paji'i. Jaje pa'ini Corneliojê de'oye cuasaquê jêjo saopi.

⁹ Jêjo saouna, se ñatas mu'se ja yê'ta'a ma'are saijê'ê Jope quêno macare pa'ijêna, jopo mu'serepa pa'i maca Pedropi huê'e êmêje'e totona mêji'i, Maija'quêre sesi'i caquê.

¹⁰ Ja yê'ta'a aore cua'cojêna, ao êaye nêi macapi çani ñaheje pa'ye ñapi.

¹¹ Ñaquêna, ma'têmoni hui'yon'i jai ca çatipêje pa'iona, cajese'e sica que'quesicono,

¹² si'a nêicohua'ire, uijê cu'icohua'ire cui'ne ja'jêcuhua'ire ayasi tu'upi yejare pana cajeo.

¹³ Cajê maca yê'ose'e îte jutapi ñeje:

“Pedro, huêni huani aijê'ê.”

¹⁴ Caquêna, Pedropi sañope capi:

“Pasi'i, Êjaê. Ai ma'ñe a'ê. Si'si a'ê. Si'siohua'ire yê'ê ti aima'quê a'ê.”

¹⁵ Caquêna, t'jupê yê'ose'e îte jutaêna:

“Maija'quê si'si peoye nese'ere si'si a'ê caye peoji.”

¹⁶ Jaje toasoñe pa'ye Maija'quê îte ca têjini co'amaña ayasi tu'ure ma'têmona mēa huesopi.

¹⁷ Mēa huesouna, Pedro çmerepa yo'o ja'ñere jaje pa'ye iño u'ni? caquê ai cuasaquê paji'i. Pa'ina, Cornelio jêjo saosicohua'ipi jato sa'ro quê'rona t'itahuê, ¿Simón huê'e jerore pa'ico'ni? cajê seni asajê daicohua'ipi.

¹⁸ Jaohua'i t'itani tutu cajê sei'ê: Iño Simón hue'equêpi cui'ne yequê mami Pedro hue'equê pa'ima'quê cajê sei'ê.

¹⁹ Jaje seni asajêna, Pedro cato ja yê'ta'a i ñase'ere cuasaquê paji'i. Pa'ina, de'o joyopi capi, îte:

“Ina, mê'êni toaso êmêohua'i co'errojainê.

²⁰ Huêni johua'i ja're saijê'ê, jêa coeye peoyerepa. Yê'ê jêjo daosicohua'i a'ê.”

²¹ Caêna, Pedro cajeni capi:

“Yê'ê a'ê, mēsar u' co'equê. ¿Iquena date'ni?”

²² Caquêna, johua'ipi cahuê:

“Yèquè cato Cornelio jèjo daocohua'ipi daè'è. Maija'què huññaèpi mè'èni soijatena. Cornelio huè'ena dani quèaquèna, ìpi mè'è quèaye asajaquè caèna, asani Cornelio, soldado pai èjaèpi jèjo daoquèna, daè'è. Nuñe pa'iquèpi, Maija'quère sequèpi, cui'ne si'a judío pai de'oye yo'oquè api cajè oiquèpi jèjo daocohua'i a'è.”

²³ Cajèna, Pedropi capi: “Cacani pèajè'è.” Caèna, cacani ì ja're conì pèahuè, ja ñami. Ñatasi mu'se Pedropi ìohua'i ja're conì saji'i. Saina, ìte coñu'u cajè Jope acohua'ijè ì ja're saè'è, Maija'quère sehuosicohua'ipi.

²⁴ Jaje saiscohua'ipi se ñatasi mu'se Cesareana tì'ahuè, Cornelio cui'ne ì tsècapè cui'ne ì ai oi cajeohua'i conì tsi'sini ute huè'ñana. Jaohua'i cato Cornelio huèosicohua'ipi daiscicohua'ipi paè'è.

²⁵ Pa'ijèna, Pedropi huè'ena tì'acquèna, Corneliopi pèpasi'i caquè etaquèpi Pedrote yè'è èjaèrepa caquè do're ja'ruèña.

²⁶ Ja'ruquèna, Pedropi ìte naè huèò nècoquè capi:

“Yè'èje mè'èje pa'i a'è.”

²⁷ Jaje ì ja're caquè sa cacaquè ñaquèna, jai pai tsi'sicohua'ipi paè'è.

²⁸ Pa'ijèna, ñani Pedropi capi:

“Mèsarupi asacohua'i a'è, Israel pai ti tì pai ja're tsiyoye peoye. Panita'a yequè pai huè'ena cacaye peoye. Israel pai yo'oye jaje pa'iji. Jaje pa'iquèta'are yè'ère Maija'quèpi ye'yapi paire co'acohua'i a'è, si'siohua'i a'è caye pajè'è caquè.

²⁹ Jaje pa'ina, jaohua'i sani yè'ère sejèna, ai cuasaye peoyerepa esa daè'è. De'oji. Yureta'a quèajè'è. ¿Iquere cajè yè'ère soire'ni?”

³⁰ Caquèna, Corneliopi capi:

“Pa'iji, cuatro mu'seña, iye ja'i maca na'iquèna, tres pa'i maca yè'è huè'ere pa'i ao àima'quèpi Maija'quère seji pa'ise'e. Pa'iquèpi na'iquèna, Maija'quère señere seina, Maija'què jèjo daoquèpi ai mia ju'l carepa ju'iquèpi ñaini capi:

³¹ ‘Cornelio, mè'è Maija'quère seña Maija'què asaji, cui'ne mè'è peocohua'ire cçaiyeje Maija'què ñaquè sihuaji de'oyerepa yo'oji caquè ñaji.

³² Jaje pa'iyè sète yurepi èmèohua'ire Jopena jèjo saojè'è, Simón Pedro hue'equère quèèjani ñona daja'cohua'ire. Ì cato yequè Simón huè'ere pa'iji, jaè yequè Simón cato ca'nipi de'huaquè api. Ì huè'e cato jaira tètèpare pa'iji, capi, yè'ère.

³³ Caèna, asani esa mè'ère quèèjajia'cohua'ire jèjo saohuè. Jaje jèjo saouna, yure mè'èpi daquèna, de'oji. Maija'què coca asañu'u cajè yèquè tsi'sisicohua'ipi pa'iyè, mè'ère mai Èjaèrepa cajè'è caquè isiyere caquèna, asañu'u, yèquè.”

Pedro Quèaye

³⁴ Caquèna, Pedropi quèapi:

“Yureta'a asayè, Maija'quèpi paire cui'ne pa'iohua'ise'ere ñaquè pa'iyè.

³⁵ Jaje pa'ina, Maija'què cato si'a paire ìte de'oquère pa'ni ccohua'ire cui'ne nuñerepa yo'ocohua'ire de'oji caquè ñaji, coa si'a tsèca acohua'ire.

³⁶ Jaje pa'ina, si'aohua'i Èjaè Jesucristoja'a de'oye pa'iyè tì'añere, Maija'què ì coca Israel paina isipi.

³⁷ Mèsarupi si'aohua'i asayè, Juan oco doquè cui'ne quèaquè yo'osi jeteyo'je Jesupi Galileapi huèoni si'a huè'ña judío pai pa'i huè'ña yo'ose'e cu'ise'e.

³⁸ Jaje pa'ina, Maija'quèpi Jesús Nazaret aquère de'o joyo tuture isipi. Isina, huati tutupi yo'oquèna, ai yo'ojè pa'icohua'ire jujucai cui'ne paire de'oye yo'ocai cuji'i, Maija'quèpi ì ja're pa'i do'ire.

³⁹ Jaje yo'oquèna, yèquè ñasicohua'i a'è, Jesús yo'oye. Jerusaléna cui'ne Judea yejana yo'oquèna, ñasicohua'i a'è. Ja jeteyo'je yureta'a ìte soquè sarahuana que deoni huani jeohuè, judío paipi.

⁴⁰ Jaje huaisiquèta'a toaso mu'seña pa'i maca Maija'quèpi huajèquère huèopi. Huèoni yèquère ñopi.

⁴¹ Coa yèquèse'ere ñai ñopi. Si'a paire ñai ñoñe paipi. Yèquè ì tsoe sahua nèosicohua'ise'ere ñai ñopi. Jaje pa'ina, yèquè ì ja're conì ucujè cui'ne aijè yo'ohuè, ì huèisi jeteyo'je.

⁴² Jaje jaèni Maija'quèpi ju'isicohua'ire cui'ne huajècohua'ire ñani ca tèjiquère nepi cajè quèaja'cohua'ini yèquère jèjo daopi.

⁴³ Jaje pa'ina, tsoe Maija'quère quèacaicohua'i Jesús ayere cajè cahuè, ìte Jesure sehuocohua'ipi ìohua'i co'aye yo'ose'ere saì de'huani oni yeje cuañoja'cohua'i a'è.”

Judío Pai Peocohua'ita'a Maija'què Joyo Isi Cuaño'se

⁴⁴ Ja yè'ta'a Pedro caquèna, de'o joyoyi ì caye asacohua'ina tsio daji'i.

⁴⁵ Tsio daquèna, Israel pai sehuoye sehuocohua'ipi Pedro ja're daiscicohua'ipi ai cuasajè ñahuè, Israel pai peocohua'ipi de'o joyore isi cuañojè,

⁴⁶ yequë pai cocapi cajë cui'ne Maija'quëre de'ouquëre pa'ni cajë yo'ojëna.

⁴⁷ Jaje ai cuasajëna, Pedropi capi:

“Icohua'ire oco doye de'oji, mai isi cuañose'eje pa'ye de'o joyore isi cuañosicohua'ire.”

⁴⁸ Cani johua'ire Jesucristo mamipi do cuañofie pa'iji cani docaji'i. Ja jeteyo'je johua'ipi Pedrore cahuë, yëquë ja're tsoe mu'seña maña pëani pa'ijë'ë.

11

Pedro Sehuosicohua'ire Quëaye

¹ Israel pai tsëca peocohua'ipi Maija'quë coca de'oyerepa sehuose'ere Jesús jëjo saocohua'ipi cui'ne yëquë sehuocohua'ipi asahuë, Judea pa'icohua'ipi.

² Asani Pedropi Jerusalënna co'ina, Israel pai sehuoye sehuocohua'ipi i yo'ose'ere sañope cahuë.

³ Cajë ite sei'ë:

⁴ “¿Me yo'oquë Israel pai peocohua'i huë'ena cacani johua'i ja're cõni ai yo'o u'ni?”

⁴ Cajëna, Pedropi si'aye ite du'ru macarepa huëoni yo'ose'eje pa'ye jaohua'ire quëapi:

⁵ “Jope daripëre pa'i Maija'quëre sei cani ñañeje pa'ye ñahuë. Naquëna, ma'tëmopi jai ca'tipëje pa'iona, ayasi tu'ure cajese'e sjcapëa que'quesicona, yë'ë quë'rona casaëna, ñahuë.

⁶ Ayasi tu'ure ñaquëna, si'aohua'i nëicohua'i, ññaje pa'iohua'i coti saiheuipi cu'icohua'i, cui'ne ja'jëcohua'i paë'ë.

⁷ Pa'ijëna, yë'ëre yë'ose'e jutapi: ‘Pedro huëtjë'ë. Huëni huani aijë'ë’, capi.

⁸ Caquëna, cahuë: ‘Pasi'i, Ëjaë. Ai ma'ñe a'ë. Si'si a'ë. Si'siohua'ire yë'ë ti aima'quë a'ë’, cahuë.

⁹ Caquëna, tijupë yë'ose'e yë'ëre juta copi: ‘Maija'quë tsoa tose'ere si'si a'ë cama'ë pa'ijë'ë’, capi.

¹⁰ Jaje toasoñe Maija'quë cui'ne pa'ye capi. Ca tējina, ayasi tu'upi ma'tëmona mëni huesëo.

¹¹ Ja macarepa toaso ëmëohua'i Cesarea yejapi jëjo daosicohua'ipi yë'ëre co'ecohua'ipi yë'ë pa'i huë'ena tjtahuë.

¹² Tjtarena, Maija'quë joyopi yë'ëre cuañepi: ‘Johua'i ja're cõni saijë'ë’, caquë ‘ai cuasama'ë’, capi. Caëna, asani saë'ë, icohua'i seis sehuosicohua'i ja're cõni. Sani si'aohua'i pa'i huë'ena cacahuë.

¹³ Cacarena, Maija'quë jëjo daoquëre i huë'ena ñase'ere cui'ne ñaquëna, i case'ere quëapi. Jopena më'ë jo'yare jëjo saojë'ë, Simón Pedro hue'equëre daja'cohua'ire.

¹⁴ Jaëpi dani huaso coca quëaquëna, asani më'ë cui'ne më tsëcapë huasosicohua'i pa'ija'cohua'i a'ë capi, quëapi.

¹⁵ Quëaquëna, asani yë'ëpi cocare quëa huëoquëna, de'o joyopi johua'ina daji'i, maire du'ru macarepa daise'eje pa'ye.

¹⁶ Ja maca mai Ëjaërepa case'ere cuasahuë, ‘Juan cato ocopi dopi. Jaje pa'iquëta'are mësarü cato de'o joyore isi cuañoja'cohua'i a'ë.’

¹⁷ Jaje pa'ina, Maija'quëpi maire Ëjaë Jesucristore sehuocohua'ire isise'eje pa'ye isiru, ¿me sañope Maija'quë yo'o ma'ñe a'ë caye'ni?” Capi, Pedro.

¹⁸ Caquëna, asani Jerusalën acohua'i sehuosicohua'ipi sañope caye jëoni Maija'quë ai de'oyerepa yo'oji, cajë cahuë:

“Jaje yo'oquë judio pai peocohua'ire isiji, ite sehuoni ti pani huesëye tjt'añe.”

Antioquia Pqi Sehuoye

¹⁹ Estebanre huani jëosi jeteyo'je Jesure sehuocohua'ire josa yo'o huëohuë. Josa yo'o huëorena, yecohua'ipi Feniciana, Chipre saodohuëna, cui'ne Antioquia daripëna cati saë'ë. Saisicohua'ipi jaronä Israel paise'ere Maija'quë coca quëahuë. Yëquë paireta'a quëaye pahuë.

²⁰ Pajëta'are Chipre cui'ne Cirene quë'ro acohua'i sehuosicohua'ipi Antioquia daripëna tjt'ani griego paire mai Ëjaë Jesús de'o cocare quëahuë, judio pai peocohua'ina.

²¹ Mai Ëjaë johua'i ja're cõni pa'ina, de'oye quëajëna, jai pai ja'në jtire pa'ë cuasase'e jëoni Ëjaë Jesuna sehuohuë.

²² Jaje yo'ojëna, sehuosicohua'i Jerusalën pa'icohua'ipi asani Bernabëre Antioquia daripëna jëjo saohuë.

²³ Jëjo saorena, Bernabëpi tjt'ani Maija'quëre sehuosicohua'ire Maija'quë de'oye yo'ocaiyere ñapi. Nani ai sihuapi. Sihuaquë Bernabë yëhuopi, de'oyerepa. Ti jëoma'pë tuijë mai Ëjaërepa case'eje, caquë yëhuopi.

²⁴ Bernabë cato ai de'oquë paji'i. Maija'quëre ai cuasaquëpi cui'ne de'o joyo ttmësiquëpi paji'i. Jaje pa'ipi yëhuoquëna, asani jai pai sehuohuë, mai Ëjaë case'ere.

²⁵ Ja jeteyo'je Bernabëpi Saulore co'esi'i caquë Tarso daripëna saji'i.

²⁶ Sani t'ani ite Antioquía daripëna sapi. Sani jaron a te'e ometëcahuë pëahuë, sehuosico-hua'i ja're çoni. Pëani pa'ijë jai paire ye'yahuë. Jaron Antioquía daripëna du'ru macarepa Cristiano hue'yohuë, sehuosicohua'ire.

²⁷ Ja mu'seña Antioquiana t'itahuë, Maija'quëre quëacaicohua'ipi Jerusalén daicohua'ipi.

²⁸ T'itasicohua'i aquëpi Agabo hue'equëpi nëcaquë capi, de'o joyopi quëaquëna, yequë mu'seña pa'i ja'ñere. Yequë mu'seña si'a hue'ña aiñe peoquëna, pa'i ai ëa ju'ija'cohua'i a'ë. Jaje tëto saji'i, Claudio César pai ëjãrepa pa'i maca.

²⁹ Jaje caëna, asani Antioquía sehuosicohua'ipi Judea sehuosicohua'ire çocai ja'ñere isini jëjo saon'u'cahuë, pai ñape cuasaye ja'ye.

³⁰ Cani isini yureta'a ite isise'ere jëjo saohuë, Bernabé cui'ne Saulo ja're sehuosicohua'i aihua'ina Judeana.

12

Santiagore Huaiye Cui'ne Pedrorre Coye

¹ Ja mu'seña pai ëjã Herodespi sehuosicohua'i acohua'ire josa yo'oquë,

² Santiagore hua'tipi huani jeojë'ë cuañeina, huani jeohuë, Juan maja'yëre.

³ Yo'orena, judío paipi ñani sihuajëna, Herodespi Pedrorreje tseani copi, sihuaja'cohua'i a'ë caquë. Iye cato yo'opi, levadura ne ma'ñe pan aijë tsi'si maca.

⁴ Jaje yo'oquë Pedrorre tseani co hue'ñana copi, cuatro tsëca soldado pai ñajë nëca hue'ñana, te'e tsëcapëre cuatro pa'iohua'i pa' huë'ñana. I cato Egítopi Maija'quë Israel paire etoquë pa'ise'ere cuasajë, tsi'si tējisi maca tseasiquëre etoni paire iñosi'i cuasaquë yo'opi.

⁵ Jaje pa'ina, Pedro cato tseja cuañosiquëpi paji'i, etama'quë cajë ña hue'ñare. Jaje pa'itoje sehuosicohua'i cato Maija'quëni sejë paë'ë, si'a joyorepa cuasajë Pedroni cajë.

Pedro Cosiquëni Maija'quëpi Etoye

⁶ Herodes ñamina'a Pedrorre etoni paire iñosi'i cuasaquëna, Pedro cato huëore çaji'i, caya soldado paina quëna mepi se sëasiquëpi jopore pare ui. Caina, yequë soldado paipi paire co huë'e eta sa'rore etama'quë cajë ñajë nëcahuë.

⁷ Jaje pa'i macarepa mai Ëjã hui'ñaë si'a co tu'rihuë mia merepa ñai nëcapi. Ja maca Pedrorre pato sëtoni capi:

“Esa huëijë'ë.”

Caquëna, jëña huëse'e pa'ise'e joye tompëpi.

⁸ Ja maca Ëjã jëjo daoquëpi capi:

“Më'ë caña suñajë'ë, cui'ne zapatoje suñajë'ë.”

Caquëna, yo'oquëna, cui'ne yequeje capi:

“Më'ë dëi ju'i çaje suñani yë'ë ja're daijë'ë.”

⁹ Caëna, mai Ëjã jëjo daoquë jeteyo'je dani etapi, coa huesërepa. Mai Ëjã jëjo daoquëpi yo'oji, cuasama'ë paji'i, coa cani ñañë cuasaquëpi.

¹⁰ Cuasaquëta'a du'ru nëcajë ñacohua'ire sa tëto sani cayaye acohua'ire sa tëto sani yureta'a ma'ana eta hue'ñarepa acore t'arena, jose'e hui'yo eta sa'ro hui'yona, etani ma'aja'a te'e saë'ë. Jaje çoni saiquëpi mai Ëjã jëjo daoquëpi peo hue'ña saji'i, te'ire jeoni.

¹¹ Jëjo saquëna, yureta'a Pedropi capi:

“Yureta'a asayë, Herodes ñamina'a yë'ëre yo'o ja'ñere cui'ne Israel pai yë'ëre yo'oye yëyere Ëjãepi asani i hui'ñaëre huasoja'quëre jëjo daopi.”

¹² Jaje yo'ou cuasani Pedropi saji'i, Juan pëca ja'co María huë'ena Juanpi yequë mamije Marcos hue'equë pëca ja'co quë'rona. Jarote jai pai tsi'sicohua'ipi paë'ë, Maija'quëni sejë.

¹³ Pa'ijëna, Pedropi ma'a eta sa'rona t'ani t'ëcapi, soiquë. Soiquëna, asani te'o nomi tsi'o Rode io mami hue'ecopi çnepi soiyë'ni? cuasani sani ñasi'i caco eta sa'ro quë'rona daco'ë.

¹⁴ Dani Pedro yë'ore asani sihuaco eta sa'ro hui'yocaima'o co'ye huë'huë cacao, Pedropi eta sa'rore pa'iji quëasi'i caco.

¹⁵ Quëacona, johua'ipi jote cahuë:

“Cuepeco, caco.”

Cajëna, cao:

“Nuñerepa cayë.”

Cacona:

“Pedrorre ñacaiquë ma'tëmo aquë pa'ini.”

¹⁶ Cajëna, ja yë'ta'a Pedropi t'ëcaye jeoma'ë paji'i. Pa'ina, hui'yoni ite ñani ai quëquëhuë.

¹⁷ Quëquëjëna, jëtëpi cama'pë caquë yo'onni jeorena, ite co hue'ñapi etose'ere quëapi. Quëaquë capi:

“Santiagore cui'ne yecohua'ire sehuosicohua'ire quëacaijë'ë, yë'ëre etose'ere.”

Cani yequë hue'ñana saji'i.

¹⁸ Ñata tomesi maca Pedro peoquëna, soldado pai ai cuasajë huesëjë sa'ñe ai yo'ojë cahuë.

¹⁹ Yo'ojë cajëna, Herodespi cuañepi, Pedroro co'ejë'ë caquë. Cuañeina, co'e jujahuë. Co'e jujarena, de'oye ñajë'ë casicohua'ipi ñama'pë pa'isicohua'ire huani jeojë'ë, cuañepi. Cuañeina, huani jeohuë, soldado paire. Jaje yo'osi jeteyo'je Herodes Judea pa'iyë jëoni Cesareana sani pajï'i.

Herodes Ju'ise'e

²⁰ Herodes Sidón paire cui'ne Tiro paire pëi pajï'i. Pa'ina, johua'ipi pai ëjaë Herodesre ca de'huañu'u, cajë te'e. Jaje yo'oñu'u cahuë. Casicohua'ipi i quëno macarepa cõcai pa'iquë Blasto hue'equëna cajeohua'i de'ohuë. De'oni jãëja'a se'i'ë, Herodesre de'oye pëima'ëna, pa'iyere. Tiro cui'ne Sidón pai cato Herodes yejana aõ huerocohua'i paë'ë. Jaje pa'ina, jaje yo'ohuë.

²¹ Jaje yo'osicohua'ini yequë mu'se Herodespi capi, ja mu'se pai tsi'siye pa'iji, caëna, tsi'sirena, de'o cañarepa suñasiqëpi i ñu'i paire cuañe hue'ñana ja'runi cocare capi, paire.

²² Caquëna, asacohua'ipi tutu cuihuë. Ñeje cajë:

“Maija'quëpi caji, paipi caye pajï.”

²³ Cajëna, Ëjaë huññaëre jëjo daoquëpi ju'iñe nepi, ite, jare iti yo'ojë ca macapi. Neina, pecona aõ juji'i. Maija'quëre jerepa pa'ipi cacaima' do'ire juji'i, ija'a co'ye Maija'quëje pa'i a'ë caquë sihuaquë asa do'ire.

²⁴ Jaje yo'ojë pa'ijëna, Maija'quë coca cato jerepa jai saji'i. Jai saina, si'a hue'ña iti cocare quëahuë.

²⁵ Bernabé cui'ne Saulo co'amaña ne tëjini Jerusaléni co'ijë Juanrejë dahuë, yequë mami Marcos hue'equëreje.

13

Bernabé Cui'ne Saulo Yo'o Huëoye

¹ Antioquia yejare Maija'quëre quëacaicohua'i cui'ne Maija'quë coca ye'yacohua'i paë'ë, sehuosicohua'i ja're coní. Icohua'ipi paë'ë, Bernabé, Simón yequë mami Negro hue'equë, yequë Lucio Cirene aquë pajï'i, Manaén pajï'i, (Herodes ja're ai de'osiquë Galilea yeya cuañequë pa'isiquë) cui'ne Saulo pajï'i.

² Jaje pa'icohua'ipi te'e mu'se aima'cohua'ipi mai Ëjaëre sejëna, de'o joyopi capi:

“Jahohua'ire Bernabére cui'ne Saulore jëjo saojë'ë, yë'ë nejajë caquë soise'e nejaja'cohua'ire.”

³ Caëna, aima'pë Maija'quëre se'ni tëjini jahohua'ire jëñapi jëjo pajë se'acani jëjo saohuë, se ñajë saijë'ë cajë.

Chipre Paire Yëhuoye

⁴ Maija'quë joyopi jëjo saquëna, saicohua'ipi Bernabé cui'ne Saulo saë'ë, Seleucia daripëna saicohua'ipi. Jaropi jai yohuëna aya mëni Chipre hue'e saodohuëna saë'ë.

⁵ Saicohua'ipi Salamina yo sa'rona ti'ani judío pai tsi'si hue'ñana Maija'quë coca quëa huëohuë. Juan johua'ire cõcasi' caquë saisiqëje johua'i ja're pajï'i.

⁶ Si'a saodohuë quëarajajë Pafos daripëna sa ti'ahuë. Ti'ani jarona ñahuë, Israel paipi dahuëpi Barjesús hue'equëre. Jãpi Maija'quë cocare cayë caquë paire cosoquë yo'oquë pajï'i.

⁷ Jaë dahuëpi Sergio Paulo ta'ñe asaquë ja're pai ëjaë ja're pajï'i. Pa'ina, pai ëjaëpi Bernabére cui'ne Saulore quërejajaja'cohua'ire jëjo saopi, Maija'quë coca quëajëna, asayere yë.

⁸ Jaje yo'oquëta'are griego pai coca cato Elimas hue'equëpi dahuëpi pai ëjaë sehuoyere ësequë Bernabére cui'ne Saulore sañope capi.

⁹ Caquëna, Saulopi Pablo hue'equëpi Maija'quë joyo tímësiqëpi ite ai ñani,

¹⁰ capi:

“iCosou, co'aquërepa, huati mamaquë si'aye de'oyere sañope yo'oquë ai! ¿Je yëhua Ëjaëre sañope yo'oye jëoja'quë a'ni, më'ë?”

¹¹ Yure Maija'quëpi më'ëre si'sesipi. Si'sequëna, tose mu'seña ñama'ë pa'i cui'ne ëse miaheje ñama'ë pa'ija'quë a'ë, më'ë.”

Ca macarepa Elimas ñama'quë de'opi, ñamije pa'iose'ere ñaquë de'oni. Ja maca ite jëtëna tse'ejë cuaja'cohua'ini co'epi.

¹² Jare ñani ai de'oyere pa'ë, Ëjaë aye ye'yaye cuasaquë pai ëjaë sehuopi.

Pablo Cui'ne Bernabé Antioquiare Pa'iyë Pisidia Yejare

¹³ Pablo cui'ne ite cõcohua'i jai yohuëna aya mëni Pafos daripë jëoni Perge daripëna ti'ahuë, Perge daripë Panfilia yeya quë'ro acona. Jarona Juan jëoni Jerusalëna co'ipi.

14 Perge sa sani Pisidia yeja quë'ro daripëna Antioquíana tì'ahuë. Tì'ani huajë mu'se pa'ina, Israel pai tsi'si huë'ena cacani ja'ruhuë.

15 Ja'runi ñu'ljëna, tsi'si huë'e ëjaohua'ipi cuañese'e cui'ne Maija'quëre quëacaicohua'i toyasi pëpë ña tējini cahuë:

“A'yë dohuë, paire yëhuoye pa'ito quëajë'ë, yurepi.”

16 Carena, ja maca Pablo huëni nēcani jētēpi cama'pë caquë ja'jēni capi:

“Ēmëohua'i Israel pai cui'ne si'aohua'i yequë pai Maija'quëre ca'racohua'i asajë'ë.

17 Israel pai Diusupi mai aiohua'ire jo'ya nepi. Jo'ya neni jaohua'ija'a jai pai jojo saiye nepi, yequë pai yeja Egiptore pa'i maca cui'në ja jeteyo'je i tutupi yo'oquë etopi, ja yeja pa'isicohua'ire.

18 Etouna, Israel paipi cuarenta ometëca pai peo huë'ña cuenesi yejaja'a cu'ijë yo'ojëna, Maija'quëpi johua'ire de'oye ñacajiji'i, yo'o jujama'ë.

19 Jaje yo'oquë siete tsëcapëarepa Canaán yeja pa'icohua'ire nejopi, jaohua'i yejare mai aipëna isisi'i caquë.

20 Si'aye iye yo'oye cato cuatrocientos cincuenta ometëca paji'i. Ja pa'isi jeteyo'je yureta'a Maija'quëpi Israel pai yo'oyere ñani ca tēji ëjaohua'ire isipi, Maija'quëre quëacaiquë Samuel pa'i macaja'a.

21 Jaje yo'oye pa'ina, yureta'a se'i'ë, yëquëre cuañe ëjaëre pare necajj'ë cajë. Sejëna, Maija'quëpi Cis mamaquë Saúlñi pai ëjaëre necajji'i, cuarenta ometëca johua'ire cuañeja'quëre. Jaë cato Benjamín tsëcapë aquë paji'i.

22 Pa'ina, jeteyo'je Maija'quëpi Saúlre pai ëjaërepa pa'iyë jioni Davidna isipi, pai ëjaërepa pa'iyë. Davidni Maija'quë capi, ñeje: 'Isaí mamaquë David cato yë'ë yëyere yo'osi'i cuasaji. Jaje pa'ipi, yë'ë ña hue'ñaje de'oye yo'oquë api.'

23 Jaje pa'ina, i ca nēose'eje pa'ye Israel paire huasosi'i caquë jëjo daopi, Jesure. Jesús cato David tsëcapë aquë paji'i.

24 Ja yë'ta'a Jesús daima'në Juanpi si'a Israel paire Maija'quë coca quëapi. Quëaquë capi, ja'në cuasase'ere jëoni Maija'quëna ponëj'ë. Ponëjëna, oco doye pa'iji.

25 Casiquëpi je'në i pani tējyie tì'acquëna, capi Juan: 'Yë'ë mësaru cuasayeje pa'i poyë. Yë'ë pa'isi jeteyo'je te'i jerepa pa'ipi daiji. Jaëre yë'ë i zapato dutacaiyeque peoquëpi, teaye pa'i a'ë.'

26 Jaje pa'iyë sète ëmëohua'i Maija'quë do'ijë Abraham tsëcapë acohua'i, cui'ne mësaru tìohua'i, Maija'quëre ca'rajë i yëyëje pa'icohua'i, iye huaso coca mësaru asa ja'ñere jëjo daose'e a'ë.

27 Jerusalén pa'icohua'i cui'ne johua'i ëjaohua'ijë Jesure huesëjë coa pajje pa'ire ñahuë. Ñajë cui'ne huajë mu'seña ñape pai tsi'si huë'epi Maija'quëre quëacaicohua'i toyase'ere ñanije asa tì'añe pahüë. Pajë jare johua'ipi Maija'quëre quëacaicohua'i case'ere yo'o tì'aca'ë, Jesure huani jëjo maca.

28 Jesús co'aye yo'ose'ere tì'ama'pëta'a Jesure huani jëoñere Pilatopi soldado paina cuañejaquë cajë se'i'ë.

29 Ja jeteyo'je yureta'a si'aye iye yo'o ja'ñere toyase'e cayere yo'o tējini soquë sarahua dequëni casani yejana tãhuë.

30 Jaje yo'osiquëta'are Maija'quëpi ite huajëquëre huëopi.

31 Huëosiquëpi Jesús jai so mu'seña ñaiquë jñopi, i ja're coní Galileapi Jerusalénna saina, saisicohua'ire. Yure jaohua'ipi i coca quëacohua'i pa'iyë.

32 Jaje pa'iyë sète yëquë mësarute de'o cocare quëayë, mai aiohua'ire ca nēose'ere yo'o tì'api, mai pa'i maca i ca nēosi tsëcapë acohua'ina.

33 Ja i ca nēose'ere yo'o tì'acquë Jesure ju'isiquëni huajëquëre huëopi, Maija'quëpi. Salmos cayaye acore toyase'eje pa'ye yo'opi. Japi caji, ñeje: 'Më'ë yë'ë mamaquë a'ë. Yurepi yë'ë më'ë ja'quë a'ë.'

34 Jaje pa'ina, Maija'quë yequë huë'ña toyase'ëja'a capi: 'Davidre isija'quë a'ë, ca nēose'ere. De'oyere pare nuñerepa ca nēose'ere isija'quë a'ë, më'ëre.' Jaje pa'ina, tsoe Maija'quëpi quëapi, ju'isiquëpi huëi ja'ñe cui'ne i capë ja'juñe pa ja'ñe.

35 Jaje pa'ina, yequë huë'ña toyase'e caji: 'Më'ë jo'yaë de'oquërepa capë ja'ju huesëye më'ëpi ëseja'quë a'ë.'

36 De'oji, yure jaje pa'iyë sète casi'i. David cato Maija'quë ite cuañese'eje pa'ye i paire necani tējini juni huesëpi, i aiohua'i ju'ise'eje pa'ye. Jaje juni i capë ja'ju huesëpi.

37 Jaje pa'iquëta'are jaë, Maija'quë huëosiquë Jesús capë cato ja'juñe papi.

38-39 Jaje pa'iyë sète mësaru Maija'quë do'ijëpi asaye pa'iji. Jesuja'a co'aye yo'ose'e oni yeje cuañoñe pa'iji, cajë. Jaje pa'ina, si'aye Moisés cuañese'e oni yejeye pase'ere Jesure ire pare asacohua'ire oni yejeye pa'iji, itire pa'ë.

⁴⁰ De'hua ñajë'ë, mësaruna Maija'quëre quëacaicohua'i toyase'e tomezquë iohua'i toyase'e cato caji:

⁴¹ Nuñere pare ñajëta'a co'aji cajë coecohua'i, ne huesëjë'ë.

Mësarü pa'i mu'seña yë'ëpi co'amañare nequëna,

Yecohua'ipi mësarute quëatojë care payë cajë sehuocaiye paja'cohua'i a'ë."

⁴² Judío pai tsi'si huë'ëpi Pablo cui'ne i cajeohua'i çoni etajëna, tsj'nëna, judío pairepa peocohua'ipi cahuë: Yequë semana huajë mu'se pa'ina, cui'nare quëajë'ë, yëquëre.

⁴³ Ca tējisi maca tsi'si huë'ëpi Pablo cui'ne Bernabé saijëna, jai pai judío paipi cui'ne judío pai peocohua'ipi judío ye'yayena huero ye'yesicohua'ipi iohua'i ja're saë'ë. Saijëna, iohua'ipi yëhuojë cahuë. Nuñerepa Maija'quë mësarute oi soise'ere pa'ijë'ë, yo'o jujama'pë.

⁴⁴ Casicohua'ipi yequë semana huajë mu'se tijaëna, ja daripë pa'icohua'ipi si'aohua'i tsi'siye ja'i maca jai pai tsi'sihuë, Maija'quë coca asañu'u cajë.

⁴⁵ Tsi'sijëna, ñani Israel paipi ësejë oijë Pablo ai co'aque api sañope ca huëohuë.

⁴⁶ Cajëna, Pablopai cui'ne Bernabépi quëcojë sañope cahuë, iohua'ire:

"Mësarü judío paini du'ru macarepa Maija'quë coca quëaye pa'iji. Pa'isiconi mësarupi coejë cui'ne ti pani huesëyere paye cuasama'pëna, yure cato judío pai peocohua'ina sani quëaye pa'iji.

⁴⁷ Jaje pa'ina, Ejaëpi yëquëre cuañequë capi:

Si'a paire miacaija'quëre jeoñë, mësarute.

Yë'ë huaso cocare si'a huë'ña so'o pa'icohua'ire quëacajë'ë."

⁴⁸ Jaje caquëna, asani judío pai peocohua'ipi sihuajë si'aohua'i Maija'quë coca ai de'oye a'ë, cajë ti pani huesëyere tija'cohua'i a'ë, caquë ña nëosicohua'ipi sehuohuë.

⁴⁹ Sehuojëna, jaje Maija'quë coca quëahuë, ja yeja pa'icohua'ire.

⁵⁰ Jaje sehuojëta'are judío paipi Pablöre cui'ne Bernabére eto saon'u cajë, de'o nomiohua'i ja're cui'ne de'o emëohua'ire cui'ne iti daripë ëjahua'i ja're coca cahuë, sañope jahua'ire yo'oñu'u cajë cani sañope yo'ojë etohuë.

⁵¹ Etorena, saijë iohua'i nëcañoa ya'ore tito tohuë, jahua'i yo'oyere sañope cayere iñojë. Jaje yo'oni Iconiana saë'ë.

⁵² Jaje pa'iquëta'are iti sehuosicohua'i cato sihuahuë, de'o joyopi iohua'i ja're pa'ina.

14

Pablo Cui'ne Bernabé Iconiore Pa'iye

¹ Pablopai cui'ne Bernabépi Iconiore pa'ijë judío pai tsi'si huë'ena cacani Maija'quë coca quëajëna, jai pai judío pai cui'ne judío pai peocohua'i sehuohuë.

² Sehuojëna, judío pai sehuoma'cohua'ipi sañope yo'ojajë cajë judío pai peocohua'ire cuañejëna, sehuosicohua'ire co'aye cuasa huëohuë.

³ Jaje co'aye cuasa huëo do'ire ai tsoe ja daripëna pëani Maija'quë coca de'oyerepa quëahuë. Quëajëna, Maija'quëpi pai yo'o tija ma'ñe yo'o tutu isiquëna, jaiye de'oyere yo'ohuë. Jaje yo'ojëna, Maija'quë oiye iohua'i quëaye do'i quë'yerepa pa'iye iñoji.

⁴ Jaje pa'iquëta'are iti daripë acohua'ipi caya tsëca huasicohua'i paë'ë. Pa'ijë yecohua'ipi judío pai cayere de'oye a'ë, cacaë'ë. Cajëna, yecohua'ipi Ejaë jëjo saocohua'i cayere de'oye a'ë, cacaë'ë.

⁵ Jaje cajë pa'ijëna, judío paipi cui'ne judío pai peocohua'ipi Pablöre cui'ne Bernabére co'aye yo'ojë quëna pëapi jea jo'añu'u cajë iti daripë ëjahua'i ja're coca cani te'e jaje yo'oye de'oji, cuasa nëohuë.

⁶ Cuasa nëose'ere asani Pablopai cui'ne Bernabépi catihuë, Listrana cui'ne Derbena Licaonia jejana cui'ne iti yeja yequë daripëa pa'iyna.

⁷ Catini jaroje quëahuë, de'o cocare.

Pablöre Quëna Pëapi Jeañe

⁸ Listra daripëre te'i emë tsi'nëna cu'ima'quë ai de'osiquëpi paji'i, coa ñu'iquëpi.

⁹ Coa ñu'iquëpi Pablo quëayere asaquë Maija'quëpi yë'ëre ne co'yaye pa'iji cuasaquë ñuji'i. Ñu'ina, Pablopai jaje Maija'quëre cuasaye asani

¹⁰ ai tutu capi:

"Huëni nëcajë'ë."

Caquëna, ca macarepa te'ere papi huëni nëceni cu'i huëopi.

¹¹ Jaje Pablo yo'ouna, ñani Licaonia cocapi tutu cuijë cahuë:

"Diusuohua'ipi pajje pa'iohua'i de'oni mai quë'rona cajeni yo'oyë."

¹² Cajë Bernabéni diusu Zeus hue'yohuë. Hue'yojë Pablöni iti coca ca do'ire Hermes hue'yohuë. Listra pai diusu mamire hue'yohuë.

¹³ Ja maca yureta'a pai daripë caca sa'ro yë'quë macare diusu Zeuste se huë'e paquëpi iti huë'e ñacai ëjaëpi duruhuequëre cui'ne de'o joro nese'ere dapi. Dani Jesús jëjo saocohua'ire

de'ocohua'ire pa'ni caquë ses'i, caquë yo'opi. Yo'oquëna, yecohua'ije i ja're señu'u, cajë yo'ohuë. Yo'ojë johua'i ai yo'ojë pacohua'ini nëicohua'ire huani coa isijë señu'u, cajë yo'ohuë.

¹⁴ Yo'oyere asani Bernabépi cui'ne Pablopi co'aji, ja yo'oye cajë. Ju'i cañana co'rëjë, cuijë sa tomejaë'ë, johua'i jopona.

¹⁵ Ñeje cuihuë:

“¿Merepa mësarujë yo'oye'ni? Yëquë cato mësarujë pa'iohua'i a'ë. Yure mësarujë coa yo'oye jeoni Maija'quë iti yeja, ma'tëmo, jai tsiaya cui'ne si'aye iote pa'iyë de'huasiquëre pani sehuoni pa'ijajë cajë quëañu'u cajë daisicohua'i a'ë.

¹⁶ Jaje pa'iquëta'are yequë mu'seña cato johua'ise'e johua'i yëyeje yo'ojë pa'ijajë caquë ñapi, Maija'quë.

¹⁷ Jaje yo'ojë pa'itoje Maija'quëpi de'oye yo'oyeja'a inopi, yë'ë pa'iyë caquë. Jaje pa'ina, ipi mësarute oco cui'ne de'oye quëquëna tëaye cui'ne aiñe cui'ne sihuajë pa'iyë isiji.”

¹⁸ Jaje si'aye canije ai yo'ojë maña duruhuequëre huaiye pajë'ë, cajë ësehuë, diusuohua'ire isijë señu'u cajë yo'ocohua'ire.

¹⁹ Jaje yo'ojë ca maca da tütahuë, Israel pai, Antioquía yeja cui'ne Iconia yeja pa'icohua'i. Jaohua'ipi tütani tiñe cuasayena paire ponahuë. Ponarena, Pablöre quëna pëapi jea jo'ahuë. Jea jo'ani huani jeohuë, cuasajë pai pa'i daripë hue'sena quëre etohuë.

²⁰ Quëre jeorena, sehuosicohua'ipi i ui hue'ñana tsi'sini nëcajëna, huëji'i. Huëni pai daripëna cacapi. Cacasiquëpi ñatasi mu'se Bernabé ja're coní Derbe daripëna saë'ë.

²¹ Sani jaro Derbena de'o coca quëajëna, jai pai sehuohuë. Sehuorena, ñani jaropi Listrana, Iconiana cui'ne Antioquía darina co'ihuë.

²² Co'ini, jaro sehuosicohua'i pa'icohua'ire yo'o jujama'pë ñese tuijë'ë, cahuë. Cajë cui'ne Maija'quëre cuasare pajë pa'ijë'ë, cahuë. Jaje cajë cui'ne yequeje cahuë, Maija'quë cuñe te'tena cacañu'u caní jaiye ai yo'oye pa'iji.

²³ Jaje cajë cui'ne yequeje sehuosicohua'i tsëcapëa ñape johua'i ëjaohua'i pa'ija'cohua'ire nehuë. Neni aó aima'cohua'ipi Maija'quëre sejë yo'o tējini icohua'ire de'oye ñacajë'ë, cajë Maija'quëre se'cacaë'ë, johua'i sehuosiquëna.

Antioquiana Pablopi Cui'ne Bernabépi Co'iyë

²⁴ Pisidia yeja sa tēto sani Panfilia yejana t'ihuë.

²⁵ T'iani Perge yeja pa'icohua'ire de'o coca quëahuë. Quëa tējini Antalia daripëna saë'ë.

²⁶ Sani jarona yureta'a yohuëna aya mëni Antioquiana, Maija'quë oiyë ayepi necajë'ë cajë cuñe sitona, johua'i de'oye iti case'eje ne tēji sitona co'ihuë.

²⁷ Co'ini Antioquiana tütani si'a sehuosicohua'ire si'soni Maija'quë johua'i ja're coní yo'ocuhëna, Ejaëpi judío pai peocohua'ipi sehuojajë caquë jato sa'roje pa'iore hui'yocaquëna, de'oye sehuose'ere quëahuë.

²⁸ Quëasicohua'ipi sehuosicohua'i ja're coní iti macana pëani tsoe paë'ë, jarote.

15

Jerusalénna Tsi'siyë

¹ Ja mu'seña Judeapi Antioquiana cayao maña saiscohua'ipi Maija'quë do'ijëre ye'yajë cahuë huaso cuñe'ne peoji, Moisés cuñese'ere yo'oma'pë pani, ca'ni tëama'pë pani, cahuë.

² Jaje cajëna, Pablopi cui'ne Bernabépi coní johua'i ja're ai sa'ñe yo'ojë cahuë. Jaje yo'ojë cajëna, Pablöre, Bernabëre cui'ne yecohua'i sehuosicohua'ire Jerusalénna sani Jesús jëjo saocohua'i ja're cui'ne ja daripë sehuosicohua'i ëjaohua'i ja're ca'ni tëaye ayere coca caja'cohua'ire jëjo saofnu'u, caní jëjo saohuë.

³ Antioquía daripë sehuosicohua'i pa'icohua'ipi jëjo saojëna, saicohua'ipi Fenicia yejaja'a cui'ne Samaria yejaja'a sa saijë quëahuë, judío pai peocohua'ipi ja'në itire pa'ë cuasajë pa'ise'ere jëconí Maija'quëre sehuose'ere quëajëna, asani si'aohua'i sehuocohua'i sihuahuë.

⁴ Jerusalénna Pablo cui'ne Bernabé t'arena, sehuosicohua'ipi cui'ne Jesús jëjo saocohua'ipi cui'ne sehuosicohua'i ëjaohua'ipi coní de'oye pëpahuë. Pëparena, pa'ijë si'aye Maija'quë johua'i ja're yo'ose'ere quëahuë.

⁵ Quëajëna, fariseo acohua'ipi Maija'quëre sehuosicohua'ipi huëni nëcani cahuë:

“Yeque pa'ipi sehuosicohua'ire ca'ni tëaye pa'iji. Ja maca Moisés cuñese'ere yo'o t'ajë'ë, cuñe'ne pa'iji.”

⁶ Cajëna, asani ja maca Jesús jëjo saocohua'ipi cui'ne sehuosicohua'i ëjaohua'ipi tsi'sihuë, fariseo acohua'i case'ere sa'ñe coca cajë asañu'u cajë.

⁷ Jaje cajë tsi'sisicohua'ipi ai sa'ñe ca tēji maca Pedropi huëni nëcani capi:

“Maija'quë do'ijë mësarupi tã'ñe asayë, yë'ëre mësaru aquëni Maija'quëpi jo'ya nese'e tsoe hue'ña i huaso cocare judío pai peocohua'ina quëaquëna, jaohua'ipi itire pa'ë cajë sehuojajë caquë.

⁸ Maija'quë pai joña cuasaye ñaquëpi yë'ë tsecohua'ire neñë caquë ñnoquë, de'o joyore isipi, judío pai peocohua'ina maire isise'eje pa'ye.

⁹ Jaje pa'ina, Maija'quë cato jaohua'ire cui'ne maire tiñe pa'iohua'ire ñañe paji, si'aohua'ire cui'ne pa'iohua'ire ñaji. Jaje pa'ina, Maija'quëre cuasa do'ija'a de'o joña tsoa toçaji'i, jaohua'ireje.

¹⁰ Yure jaje pa'ito, çme yo'ojë Maija'quë yo'oyere sañope uihuaye'ni, sehuosicohua'ina dëquëcoje pa'iore hue'locaijë maije cui'ne mai aipëje yo'o ti'añe pase'ere?

¹¹ Jaje pa'ina, yëquë cato cuasayë jaohua'ire huasose'eje pa'yepi yëquëreje Èjaë Jesús oi coa isiyepi huasopi cuasayë.”

¹² Caquëna, si'aohua'i jo'cua jeoni Bernabé cui'ne Pablo cayere asahuë. Iohua'i ja're Maija'quë pa'i çocaina, yequë mu'seña pa'i ja'ñe ñnose'e cui'ne pai yo'o ti'a ma'ñe yo'ose'e quëajëna, asahuë.

¹³ Ja maca quëa tëjjëna, Santiagopi capi:

“Maija'quë do'ijë asajë'ë.

¹⁴ Maija'quëpi judío pai peocohua'ire de'oye yo'ocai jaohua'i acohua'ini sahuani i pairepa pa'ija'cohua'ire nese'ere Simónpi maire quëaquëna, asahuë.

¹⁵ Jaje pa'ina, iye toyase'e cato Maija'quëre quëaçacohua'i toyase'eje pa'ye yo'ose'e a'ë. Jaje pa'ina, ñeje caji, toyase'e:

¹⁶ Ja jeteyo'je co'i coní

David huë'e tãisicore ne de'huacasi'i

Cui'ne jo co'a de'ose'e si'aye ne de'huasi'i.

¹⁷ Ne de'huaëna, ëjaëre judío pai co'ejajë,

yë'ë mami secohua'i judío pai peocohua'i ja're.

¹⁸ Tsoe hue'ña iye yo'o ja'ñe quëasiquëpi, ëjaëpi isipi iye coca.

¹⁹ Jaje pa'ina, yë'ë cato cayë, judío pai peocohua'ipi ja'në itire pa'ë cuasase'ere jeoni Maija'quëni tuicohua'ire cuañese'ere yo'ojë'ë cajë cuañeñe peoji.

²⁰ Jaje pa'ina, coa iyese'e yo'oma'pë pa'ijë'ë cajë toyase'e tsoe ti'api. Pai de'huasi diisure isisi hua'ire aima'pë pa'ijë'ë, ëmëre cui'ne nomiore coa yo'orojaima'pë pa'ijë'ë, quio hue'asicohua'ire aima'pë pa'ijë'ë, pañita'a tsie aima'pë pa'ijë'ë.

²¹ Ja maña toyañu'u, Moisés cuañese'e cato tsoe hue'ñapi pai ñape daripëa pa'icohua'ire quëajë pa'iyë, huajë mu'seña ñape tsi'si huë'ñapi iti toyase'ere ñajë. Jaje pa'ito me airepa caye'ni.”

Judío Pai Peocohua'ina Toyani Jëjo Saose'e

²² Ja maca yureta'a Antioquíana johua'i acohua'ini sahuani Pablo cui'ne Bernabé ja're jëjo saon'u, cajë si'a sehuosicohua'i. Sehuosicohua'i ëjaohua'i cui'ne Jesús jëjo saocohua'i te'e cuasahuë. Cuasani yo'ojë Judas hue'equëni, jare ipi yequë mami Barsabás hue'equëni cui'ne Silasni saija'cohua'ire nehuë, de'ocohua'ire pare.

²³ Neni jaohua'i ja're ñeje toyasicore jëjo saohuë:

“Yëquë Jesús jëjo saocohua'ipi cui'ne sehuosicohua'i ëjaohua'ipi mësaru a'yëohua'ijë pa'iohua'ipi mësarute yëquë yo'je tsije pa'iohua'ire cuasajë judío pai peocohua'ipi sehuosicohua'ire pëpayë, jaro Antioquíana daripë, cui'ne Siria cui'ne Cilicia yeja pa'icohua'ire.

²⁴ Cui'ne yëquë jëjo saoma'cohua'ipi ñnopi. Saisicohua'ipi mësarute josa yo'ojë huesë ëaye ca co'me huesojëna, ai yo'ojë asahuë.

²⁵⁻²⁶ Jaje pa'ina, asani si'aohua'i jaje yo'oye de'o'ji cuasani mësarute yëquë acohua'ipi sani ñaja'cohua'ire neñu'u cani nehuë, yëquë ai oicohua'i Pablo cui'ne Bernabé ja're saija'cohua'ire, ju'ñe pa'itoje quëcojë Jesucristo coca do'ire quëarojaicohua'i ja're saija'cohua'ire.

²⁷ Jaje yo'osicohua'ipi yure mësaru quë'rona jëjo saoyë, Judasre cui'ne Silasre mësaru ja're te'e tsiarepa ñajë coca si'aye quëaja'cohua'ire, yëquë quëase'eje pa'ye.

²⁸ Jaje pa'ina, de'o joyoje de'o'ji, jaje yo'oye caquëna, ñaquëna, yëquëje mësarute jaiye yo'ojë'ë cajë cuañeñe peoyë. Coa do'i quë'yese'e yo'ojë'ë caye yëvé, iyese'e:

²⁹ Pai de'huasi diusuna isisi hua'i aima'pë pa'ijë'ë, quio hue'asicohua'ire aima'pë pa'ijë'ë, tsieje aima'pë pa'ijë'ë, cui'ne ëmëpi nomiohua'ire coa yo'orojaiñe yo'oma'pë pa'ijë'ë, nomioje ëmëohua'ire coa yo'orojaiñe yo'oma'o pa'ijë'ë. Iye case'ere yo'oni mësaru de'oye pa'ija'cohua'i a'ë. De'oye pa'ijë'ë. Ca tëjihue'.”

³⁰ Ja maca sai huëoni pépa tëjini yureta'a Antioquíana saë'ë. Sani ti'ani sehuosicohua'ire tsi'soni toyasicore isihuë.

³¹ Isirena, sehuosicohua'ipi toyase'ere ñajë cajëna, asajë jai paï sihuahuë, ìte yëhuoyere asajë.

³² Sihujajë asajëna, Judas cui'ne Silaspi Maija'quë caye asani quëacai tutu pacohua'ipi ai tsoe quëahuë, yëhuojë. Jaje yëhuojëna, asa huajjë jerepa tutu quë'i joñoa paë'ë.

³³ Jaje quëajë pani tējirena, sehuosicohua'ipi sani pëpacajj'ë si'aohua'ire mësarute jëjo daosicohua'ire cajë pëpa tējihuë, co'ijaj'cohua'ire.

³⁴ Jaje pa'iquëta'are Silasse'e de'oji pëaye cuasani pëapi.

³⁵ Pëaquëna, cui'ne Pablojé cui'ne Bernabéjé pëahuë, Antioquiana, Maija'quë coca ye'yajë cui'ne quëarojajjë yo'ojaj'cohua'ipi. Pëarena, jai paï sehuosicohua'ipi johua'i ja're conï yo'ohuë, ìti co'amaña.

Maija'quë Coca Quëasi'i Caquë Pablo Cayaye Acore Saise'e

³⁶ Ai tsoe pa'iquëpi Pablo capi, Bernabére:

“Sehuosicohua'ire tìjupë do'i sani ñañu'u, mai ja'në Èjaë coca quëasi daripëana. ¿Me pa'iyeni?”

³⁷ Caquëna, Bernabépi Juanre yequë mami Marco hue'equëre sañu'u capi.

³⁸ Caquëna, Pablopi ësepi, saye. Jaë Marcopi ja'nëje Panfiliana j yo'oye jëoconi te'e nema'ë yo'osiquëre me caquë.

³⁹ Jaje pa'ina, te'e cuasaye peoquëna, te'ohua'ise'e huahuë. Huani Bernabépi Marcose sapi. Saquë jai yohuëna aya mëni Chiprena saë'ë.

⁴⁰ Saijëna, Pablopi ìte coja'quëre Silasni tì'api. Tì'aëna, sehuosicohua'ipi Maija'quëre secacatena, etani saji'i.

⁴¹ Saiquëpi Siria yejaja'a cui'ne Cilicia yejaja'a sa tëtö sai Maija'quëre sehuosicohua'ire quëa huasoquë cuji'i.

16

Timoteopi Pablore, Silasre Co Huëoye

¹ Pablopi Derbena cui'ne Listrana tì'ani jaronna Timoteore ñapi. Judío nomiopi sehuosico mamaquëni cui'ne j pëca ja'quëpi griego paï pajji'i.

² Jaje pa'ini Timoteore sehuosicohua'ipi de'oque api cahuë, Listra cui'ne Iconia pa'icohua'ipi.

³ Jaje caquëni Pablopi ìte coja'quëre sasi'i, cuasaquë. Ja yë'ta'ta sama'në Timoteo ca'nihuëre yëtö tëapi, judío paï j saija'to pa'icohua'ipi co'aye cama'cohua'ini caquë. Cui'ne si'aohua'i Timoteore griego paï mamaquë api, asa do'ire jaje yo'opi.

⁴ Jaje yo'osi jeteyoj'e si'a daripëa maña johua'i sa saiyeyë pa'ye Jesús jëjo saocohua'i cui'ne Jerusalén pa'icohua'i sehuosicohua'i ëjaohua'i case'ere quëahuë, sehuosicohua'ina ñeje yo'oj'ë cajë.

⁵ Jaje yo'ojëna, sehuosicohua'ipi johua'i sehuose'ere ìtire pa'ë asajë tutu quë'i joñoa paë'ë. Pa'ijëna, mu'seña ñape jai paï sehuojë jai saë'ë.

Pablo Cani Ñañe Macedonia Aquëre

⁶ De'o joyopi Asia yejana Maija'quë coca quëaye ëse do'ire Frigia yeja cui'ne Galacia yeja sa tëtö sani,

⁷ Misia yeja niamona tì'ahuë. Tì'ani jaropi Bitinia sañu'u cuasahuë. Cuasajëta'are Jesús joyopi ësepi.

⁸ Èsequëna, Misia yejajë sa tëtö sani Troas yo sa'rona meñe cajehuë.

⁹ Cajeni jaronna Pablopi canï ñapi, te'i Macedonia aquëpi nëcaquë ìte yëquëre dani cöcaijj'ë caquëna.

¹⁰ Jaje Pablopi canï ñaëna, jaro Macedoniana de'o coca quëaye pa'iji caquë Maija'quëpi soiji cajë ne de'huahuë, sañu'u cajë.

Pablo Cui'ne Silas Filipos Pa'iyë

¹¹ Troas yo sa'rona aya mëisicohua'ipi te'e mu'serepa saë'ë, Samotracia saodohuëna. Saisicohua'ipi ñatasi mu'se Neápolisna tì'ahuë.

¹² Tì'ani jaropi Filiposna saë'ë, romano paï daripëna. Jaro Macedonia yeja ai ëja daripëre pana saë'ë. Sani jaronna pëahuë, tsoe mu'seña maña.

¹³ Pëasicohua'ipi huajë mu'se pa'ina, paï daripëpi hue'sena etani saë'ë. Tsiaya tëtëpa quë'rona sani cuasahuë, judío paï Maija'quëre se hue'ña'ë. Iño cuasani ja'rundi ñu'lij de'o cocare quëahuë, nomiohua'ire ìti maca tsi'sini ñu'icohua'ire.

¹⁴ Quëajëna, te'o nomio Lidia hue'ecopi. Tiatira daripë païopi, jai do'i caña ma ja'ñe isicopi tsi'sicohua'i ja're paco'ë. Jaje pa'iona, Maija'quëpi Pablo cayere de'oyerepa asajaco caquë necaina, ai Pablo cayese'e asao, si'aye j quëaye. Jao cato Maija'quëre seco paco'ë.

¹⁵ Jaje pa'ioipi jo tsëcapë ja're conï oco do cuañoni yëquëre cao:

“Mésarupi yé'ère sehuosicore pare ñani yé'è hué'ena sani pëajë'è.”

Jaje caco ai seona, io hué'ena sani pëahué.

¹⁶ Pëasicohua'ipi te'e mu'se Maija'quère se hue'ñana saijë te'o nomi tsio ta'ñe yequë mu'seña pa'i ja'ñere quëa joyore hue'econi ti'ahué. Jaje pa'ioipi io ëjaohua'ire jaiye curiquë necaico paco'è, io ta'ñe ca do'ipi. Io cato jöhua'i jo'yao paco'è.

¹⁷ Jaje pa'ioipi Pablöre cui'ne yëquère pe'te hue'oni pe'teco cui'o:

“I'cohua'i cato Diosu tutu quë'ire pare necaicohua'i a'è. Jaje pa'iohua'ipi mësarute huaso cocare pare quëayë!”

¹⁸ Jajese'e si'a mu'seña cuico pe'terojaiona, yo'o jujani Pablöpï co'ye ponëni jöte ta'ñe ca cocare capi:

“Jesucristo mamipi cuañëñë, icore jëoni etani saijë'è, co'a joyo.”

Ca macarepa jare iti macapi co'a joyo jöte etani saji'i.

¹⁹ Jaje huatipi etaëna, io ëjaohua'ipi ñani yure curiquë neñe peoji cuasajë Pablöre cui'ne Silasre tseahué. Tseani co'amaña huero hue'ñana sahué, ja daripë ëjaohua'i quë'rona.

²⁰ Dani ëjaohua'ire cahué:

“Icohua'i Israel pai a'è. Jöhua'ipi mai daripë ai josa yo'oyë.

²¹ Israel pai yo'oyere ye'yayë, jöhua'i. ¿Me mai romano pai jöhua'i caye asani yo'oye'ni?”

²² Cajëna, si'aohua'i cui'ne cahué. Cajëna, ja daripë pai yo'oye ñacohua'ipi Pablöre cui'ne Silasre ju'i caña du'teni si'sejë'è, cuañehué.

²³ Cuañejëna, ai si'sehué. Si'se tējini co hue'ñana sani cosicohua'ire ñaquère de'hua ñajë'è, icohua'ire cajë cuañëni co huesohué.

²⁴ Cuañërena, asani ai sa'nanuë tu'rihuëna sani copi. Coni soquë totona coña nesicono nëcañoa jua nëoni hue'ñopi.

²⁵ Hue'ñosicohua'ipi ñu'ijë jopo ñami pa'ina, Pablöpï cui'ne Silaspi conï Maija'quère sejë cui'ne jëjë yo'ojëna, si'a cosicohua'i asahué.

²⁶ Ja macarepa yejapi ai ñu'cueo. Ñu'cuecona, co hue'ña eta sa'noapi si'aye hui'yo sao, cui'ne paire quëna meapi huëse'ejë tōme sapi, peo hue'ña.

²⁷ Ja maca cosicohua'ire ñaquëpi sëtani hui'yose'e eta sa'noa pa'iona, ñani cosicohua'ipi tsoe etahué cuasaquë i hua'tipi dutani co'ye huasi'i caquë yo'opi.

²⁸ Yo'okuëna, Pablöpï tutu capi:

“Yo'oma'è. Si'aohua'i yëquë iye macare pa'iyë.”

²⁹ Caquëna, asani miañe dajë'è cani tsasiquë ca'raquë hué'hué cacani Pablo cui'ne Silas quëo quë'rona do're ja'rupi.

³⁰ Yo'o tējini huëni nëcani Pablöre cui'ne Silasre etoni seji'i:

“¿Huasosiquë pa'iyë cani me yo'oye pa'iquë'ni, yé'è?”

³¹ Seina cahué:

“Jesucristoni sehuojë'è. Sehuoni huasosiquë pa'ija'quë a'è, më'è. Cui'ne më'è hué'e acohua'i huasosicohua'i pa'ija'cohua'i a'è.”

³² Ja maca jte cui'ne si'aohua'i i hué'e acohua'ire mai Ejaë cocare quëahué.

³³ Jare iti quëa tēji maca, cosicohua'ire ñaquëpi Pablöre cui'ne Silasre si'sese'e a'si tsoapi. Ja jeteyo'je i cui'ne si'aohua'i i hué'e acohua'i oco do cuañohué.

³⁴ Do tējisi maca tumani Pablöre cui'ne Silasre j hué'ena sani aopi. I cui'ne j tsëcapë acohua'i Maija'quère sehuosicohua'i pa'ijë ai sihuahué.

³⁵ Nea hue'ña pa'i maca pai yo'oye ñani ca de'huacohua'ipi Pablöre cui'ne Silasre eto saojë'è cajë cosicohua'ire ñaquère quëaja'a soldado paire jëjo daohué.

³⁶ Sani quëarena, cosicohua'ire ñaquëpi capi, Pablöre:

“Pai yo'oye ñacohua'ipi yé'ère mësarute eto saojë'è, cuañehué. Jaje pa'iyë sête señajë de'oye saijë'è, yure.”

³⁷ Caquëna, Pablöpï capi:

“Quëañu'u cajë daisicohua'ire soldado paire yëquë romano paini mësarü ti co'aye yo'ose'ejë cama'pë do'i peocohua'ini si'a pai ñajëna, si'sehué. ¿Yure jaje yo'osicohua'ipi yahuerapa etoñu'u cayë? Jaje yo'oye coeyë, iti yëquère cosicohua'ipi dani eto saojajë.”

³⁸ Caquëna, soldado paipi sani romano pai a'è, quëarena, pai yo'oye ñani ca de'huacohua'ipi quëquëhué.

³⁹ Quëquësicohua'ipi dani pai yo'oye ca de'hua ëjaohua'ipi yëquë mësarute co'aye yo'ose'e oijë'è cajë se'è, Pablöre cui'ne Silasre. Jaje cani etoni iye daripëpi etani saijë'è cajë se'è.

⁴⁰ Setena, Pablöpï cui'ne Silaspi co hue'ñapi etani Lidia hué'ena saë'è. Sani sehuosicohua'ire ñajë cui'ne jëoma'pë tuijë'è cajë yëhuo tējini etani saë'è.

¹ Pablo cui'ne Silas saicohua'ipi Anfípolis cui'ne Apolonia dari sa sani Tesalónica daripëna tì'ahuè. Tì'arena, jarote Israel pai tsi'si huè'ena paji'i.

² Pa'ina, Pablopì jì noni yo'orojáiñe sète Israel pai tsi'si huè'ena saji'i, toaso semanarepa huajè mu'se ñape sai iohua'i ja're Maija'què toypère ñaquè iti cayeje pa'ye,

³ caquè quèaquèpi. Jesús ju'isiquèpi cui'naèpi huajèquè huèiye pa'iji. "Jaje pa'ina, yè'è mèsarute quèaquè Jesús jì api, maire huasoquè."

⁴ Caquèna, Israel pai acohua'ipi sehuoni Pablona cui'ne Silasna tsiohuè. Cui'ne jai pai Maija'quère secohua'ipi griego paije sehuohuè. Sehuojëna, cui'ne jai pai èja nomiohua'ije sehuohuè.

⁵ Jaje sehuojëna, ñani oijè pëijè Israel pai sehuoma'cohua'ipi co'a pai ma'ñare nema'pè co'a nècarojaicohua'ini tsi'sohuè, jaohua'ipi ca huèojëna, si'a pai daripè pa'icohua'ipi pèti huèoni josa yo'ojè cajajè cajè. Jaje yo'ojëna, tsi'sisicohua'ipi Pablóni cui'ne Silasni coejè Jasón huè'ena tomejani cacani josa yo'ohuè, pa'ijëna, tseani etoni paina isiñu'u cajè.

⁶ Yo'ojëna, iohua'i cajè yo'ocohua'ipi peojëna, coa pa'iohua'ini Jasónni cui'ne yecohua'i sehuosicohua'ini tseani quèrè etoni ja daripè pai èjaohua'i què'rona sahuè. Sani cuijè cahù:

"Icohua'ipi si'a huè'ña pa'icohua'ire tñe pa'iyena ponajè yo'ocohua'ipi iñoje dani yo'oyè.

⁷ Yo'ojëna, Jasónpi iohua'ire oi jì huè'ena pèaye isipi. Jaje yo'ocohua'i si'aohua'i César si'a pai èjaè cuañese'ere sañope yo'oyè. Yo'ojè cayè, yequè pai èjaèrepa pa'iji, Jesu api irepa cayè."

⁸ Cajëna, ja daripè acohua'ipi cui'ne iohua'i èjaohua'ipi asani zja jerepa yo'ocohua'i a'ni? cuasa huèohuè.

⁹ Cuasajëta'are Jasónpi cui'ne yecohua'i sehuosicohua'ipi mèsaru cuañeñe tì'acaija'cohua'i a'è canì curiquère isi nèoni eto cuañohuè.

Pablo Cui'ne Silas Bereare Pa'ise'e

¹⁰ Ja ñami sehuosicohua'ipi esa Berea daripëna saijè'è cajè jèjo saohuè, Pablöre cui'ne Silasre. Jèjo saojëna, saicohua'ipi tì'ani Israel pai tsi'si huè'ena cacahuè.

¹¹ Berea acohua'i Israel pai de'o pai paè'è. Tesalónica paire sa tètò saicohua'i paè'è. Jaje pa'iohua'ipi Pablo quèaye de'oye asajè nuñerepa quèaquè cajè si'a mu'señapi Maija'què toypère ñahuè.

¹² Jaje yo'ojè jai pai Israel pai acohua'ipi sehuohuè. Sehuojëna, cui'ne griego pai èmèohua'i cui'ne èja nomiohua'ije sehuohuè.

¹³ Sehuojëna, Pablopì Bereana Maija'què coca quèaquè pa'iji asani Tesalónica Israel paipi Bereana dani Pablöre paipi josa yo'o ja'ñe ne huèohuè.

¹⁴ Jaje yo'o huèojëna, sehuosicohua'ipi Pablöre esa eto saohuè, jai tsiaya tèt'èpa què'rona. Jèjo saojëna, coa Silaspi cui'ne Timoteopi conì pèahuè, Bereana.

¹⁵ Pèarena, Pablöre conì saijè sasicohua'ipi Atenas daripèja'a jèojani co'ihuè. Co'ijè Timoteore cui'ne Silasre Pablo esa daijè'è case'ere dani quèahuè.

Pablopì Atenas Daripère Pa'iyè

¹⁶ Pablopì Silasre cui'ne Timoteore Atenas daripèpi pa'i utequè si'a huè'ña pai de'huasi diusure pase'e pa'ijëna, ñaquè ojì'i, co'ayerepa yo'oyè'nì cuasaquè.

¹⁷ Jaje pa'ina, Israel pai tsi'si huè'ena cacaquè Israel pai ja're cui'ne Maija'quère secohua'i ja're conì capi. Caquè cui'ne si'a mu'señapi huero huè'ñana tsi'sisicohua'ireje yèhuoquè capi.

¹⁸ Caquèna, pai pa'iyè asacohua'i epicúreos paipi cui'ne estoicos paipi ite ca huèoni cajè yecohua'ipi cahù:

"¿Iquere iquè caquè'ni, jai cocaè maca?"

Cajëna, yecohua'ipi cahù:

"Yequè pai diusuohua'i ayere quèacaiquè api cuasayè."

Jaje cahù, Pablopì de'o coca Jesús ayere cui'ne jì ju'isiquèpi huèise'ere quèaquèna.

¹⁹ Ja maca Pablöre Areópago cutihuèna sahuè, èjaohua'i tsi'si huè'ñana. Sani ite se'è:

"¿Yèquè asaye yèyè, iquè huajè ye'yaye a'ni, iye mè'è yèquère quèaye?"

²⁰ Yèquè asa ma'ñere mè'èpi caquèna, asa jujani ziquere mè'è caye quèaquè'ni? cajè señè, mè'ère."

²¹ Atenas paipi cui'ne tì paipi ite maca pa'icohua'ipi ja'a yo'ose'ere pase'e asacohua'i paè'è. Jaje pa'iohua'i sète jaje cahù.

²² Cajëna, iohua'i joporepa pa'iquèpi Pablo huèni nècani Areópago cutihuèpi nècaquè iohua'ire capi:

"Atenas pai yè'è mèsarute ñañe cato mèsaru diusuohua'ire cuasañu'u cajè ai yèjè yo'ocohua'i a'è.

²³ Jaje yo'ocohua'ini yè'è mèsaru se huè'ñana cacani ite tèoje se huè'ñana ñeje toyase'e pa'ina, ñahuè: 'Tì pai ñama'a diusure se huè'ña'è.' Jaje pa'ina, yè'è, jaè mèsaru ti ñama'pè se diusu ayere quèaquè a'è.

²⁴ Jaëpi yeja cui'ne iote pa'iyë nesiquë jaje pa'ina, i api, ma'tëmo cui'ne yeja ëjaërepa. Jaje pa'ipi pai nesi huë'ñare pa'ima'quë api.

²⁵ Painsi necaij'ë, yë'ëre cama'quë api. I api, maire pa'iyë si'aye yë'eye cui'ne yequë co'amañaje isisiquë.

²⁶ Te'ire paire de'huasiquëpi jaëpi te'ipi jai pai daripëa nepi, Maija'quëpi si'a yeja pa'ijajë caquë. Jaje pa'ina, pai iohua'i pa'ija'to cui'ne ite iohua'i co'ëja'a macajë ca nëopi.

²⁷ Jaohua'ipi Maija'quë mai quëno macare pa'iquëta'are coa cuasarepa ina co'e t'ajajë caquë nepi.

²⁸ Jaje pa'ina, mai ina pa'iyë, huajëcohua'i pa'ijë cu'iyë. Mësarü aipë ta'ñe coca cacohua'i case'erepa: 'Mai cato Maija'quë tsëcapë acohua'i a'ë'.

²⁹ Jaje Maija'quë tsëcapë acohua'i sëtë pai iohua'i cuasayepi huëojë curiquëpi, po curiquëpi cui'ne quënapa de'huase'ere Maija'quëje pa'i api, cuasama'pë pañu'u.

³⁰ Ai tsoe cato Maija'quë pai huesëjë yo'oye coa ñaquë paji'i. Jaje pa'isiquëta'a yure cato Maija'quë cuañëji, si'a huë'ña pa'icohua'ire ina sehuoquë daij'ë caquë.

³¹ Jaje pa'ina, Maija'quëpi pai yo'ose'e nuñerepa caquë ne de'huaja'a mu'se ca nëopi: Jesu api, ja yo'oye yo'oja'quë, i jo'ya nesiquëpi. Jaje pa'ina, Jesuna cuasaye pa'iji caquë si'aohua'ire iñopi, ju'isiquëni huëoquë."

³² Jaje ju'isicohua'i huëiye ayere caquëna, asani cue'cuehuë. Cue'cuejëna, yecohua'ipi cahüë:

"Yequë mu'se asañu'u, më'ë caye."

³³ Cajëna, jaohua'ire quëaye jeopi.

³⁴ Jaje pa'iquëta'are yecohua'ipi sehuoquë. Sehuoni i ja're conï tsiohuë. Cui'ne jaohua'i ja're conï paë'ë, Dionicio. Cui'ne te'ne nomio Dámaris hue'eco paco'ë. Jaohua'i cato Areópago tsëcapë acohua'i paë'ë. Pa'ijëna, cui'ne yecohua'ije conï paë'ë, iohua'i ja're conï.

18

Pablo Corinto Daripëre Pa'ise'e

¹ Jaje yo'lo tējini Atenaspi etani Corinto daripëna saji'i, Pablo.

² Jarona te'ire Israel paire Aquilare t'api. Jaë cato Ponto yeja aquë paji'i. Jaje pa'ipi Pablo ja yë'ta'a t'ama'në Aquila cui'ne i paco Priscilapi conï Pontona t'asichua'ipi paë'ë. Jaohua'i cato Italiapi etani daisicohua'i paë'ë. Claudio romano pai ëjaëpi si'a Israel pai Roma pa'icohua'i etaye pa'iji caquë cuañequëna, etasichua'i paë'ë. Jaje pa'iohua'ini Pablo do'i ñasi'i caquë saji'i.

³ Sani iohua'i ja're conï pëapi. Iohua'i neñeje pa'ye ca'nipi huë'ña nequë sëtë iohua'i ja're conï nesi'i caquë pëapi.

⁴ Pëasiquëpi pa'i si'a huajë mu'seña Israel pai tsi'si huë'ena sai quëapi, Israel paire cui'ne yequë paire asare pajajë caquë.

⁵ Macedonia pa'icohua'ipi Silas cui'ne Timoteo conï t'asi maca Pablopi si'a mu'seña Maija'quë coca quëa huëoni quëaquë judío paire capi. Jesús paji'i, maire huasoquërepa.

⁶ Jaje caquëna, jaohua'ipi ite sañope cajë pë'ë. Pëijëna, Pablo ña jujani iohua'ire sañope cayere iñosi'i caquë i ju'i care ta'të topi. Ta'të toni capi, iohua'ire:

"Mësarü do'i pasipi mësarü ne huesëye, yë'ë do'i peosipi. Jaje pa'ina, yurepi jerepa cato judío pai peocohua'ina sani Maija'quë coca quëaja'quë a'ë."

⁷ Cani tsi'si huë'ñapi etani Justo huë'ena saji'i, Maija'quëre sequë huë'ena, Israel pai tsi'si huë'e quëno maca pa'i huë'ena.

⁸ Jaje pa'iquëta'are Israel pai tsi'si huë'e ñacohua'i ëjaërepa Crispo hue'equëpi Maija'quë coca asani sehuopi. Sehuoquëna, cui'ne si'aohua'i i tsëcapë acohua'ije sehuoquë. Sehuojëna, cui'ne Corinto daripë acohua'ije jai pai sehuoquë. Sehuorena, oco dopi, sehuosicohua'ire.

⁹ Jaje yo'oquë pa'ina, te'e ñami Èjaëpi canï ñañeje pa'yeja'a ñaini capi, Pablore:

"Ca'rama'ë pa'ijë'ë, coca quëaye, jeoma'ë cajë'ë.

¹⁰ Yë'ë coca sehuoja'cohua'ire iye daripë acohua'ire jai paire payë. Yë'ëpi më'ë ja're conï pa'iyë. Pa'ina, më'ëre paipi co'aye yo'lo t'añe paja'cohua'i a'ë."

¹¹ Caëna, asani Pablopi Corintona te'e ometëcahuë jopore paja'a pëani pa'i Maija'quë cocare ye'yapi, iohua'ire.

¹² Jaje yo'oquë pa'ina, Acaya pai ëjaë Galión pa'i maca judío paipi Pablore sañope yo'oñu'u cajë tsi'sihuë. Tsi'sini tseani sahuë, pai yo'oye ca de'hua huë'ñana.

¹³ Sani iohua'i ëjaëre cahüë:

"Iquëpi cuañese'e cayëje pa'ye yo'oma'pë, t'ñe Maija'quëre señe pa'iji caquë paire ye'yaquë api."

¹⁴ Cajëna, asani Pablopi casi'i cuasaquëna, Galiónpi du'ruja'a capi, Israel paire:

“Co'aye yo'ose'ere panita'a paire huani jeose'ere yo'ojë catota'a mësarua Israel paire asa catira'huë.

¹⁵ Jaje pa'iquëta'are yure cato coa coca yë'ose'e case'ere, mami ayere, cui'ne mësarua cuañeñe ayere yo'ojë cayë. Jaje pa'iyë sête mësaruse'e ne de'huajë'ë. Mësarua yo'ojë cayere cui'na maca yo'oquë cayë coeyë.”

¹⁶ Jaje cani pai yo'ose'e ca de'hua hue'ñapi eto saopi, johua'ire.

¹⁷ Eto sauna, pai yo'ose'e ca de'hua hue'ña tiña macare pana Sóstenesre tseani të'cahuë. Jaë cato Israel pai tsi'si huë'e ñacai ëjaë paji'i. Jaje yo'otoje Galión cato co'a ju'i ñaño papi, johua'i yo'oye.

Pablopi Tijupë Antioquiána Saiye

¹⁸ Ja yë'ta'a Pablo Corinto daripëna pëasiqüëpi tsoe mu'seña paji'i. Pa'iquëpi sai huëoni sehuosicohua'ire saiye, caquë pëpa tējini sai Priscila cui'ne Aquila ja're coní saji'i. Siria yejana yohuëja'a ja yë'ta'a yohuë aya mëima'në Cencreana naña peo ca'topë hueopi, j nesi'i ca nëose'ere yo'o t'i'asi'i caquë.

¹⁹ Jaje yo'osi jeteyo'je Efesona t'i'ahuë. T'i'ani Pablopi Priscilare cui'ne Aquilare jeoni Israel pai tsi'si huë'ena saji'i. Sani Israel pai tsi'sicohua'i ja're coca capi.

²⁰ Caquëna, asani johua'ipi ite pëajë'ë cajë se'i'ë. Sejëna, pañë, pëaye cani.

²¹ Pëpani sai capi:

“Maija'quëpi yëna cui'naëpi yeque co'ini ñasi'i.”

Cani ja jeteyo'je yohuëna aya mëni Efesopi yequë hue'ñana saji'i.

²² Ja maca Cesareana t'i'ani sehuosicohua'ire pëpasi'i caquë Jerusalénna saji'i. Sani jaropi yureta'a Antioquiána saji'i.

²³ Sani jarona tsoe maca pani yureta'a cui'naëpi cu'i huëo cöpi, pai ñape darina, Galacia cui'ne Frigia yeja daripëana, sehuosicohua'ire tutu quë'johua'ire quëa huasoquë.

Apolos Efeso Paire Yëhuoye

²⁴ Ja mu'seña te'i Israel pai aquëpi Apolos hue'equëpi Efesona titapi, Alejandría daripë aquëpi. Jaë cato ai ta'ñe coca caquë cui'ne Maija'quë toyapë ai de'oyerepa asaquë paji'i.

²⁵ Jaje pa'ipi mai Èjaërepa coca pa'iyena ye'yesiquë paji'i. Jaje pa'ipi tuturepa caquë Jesús ayere tiñarepa ye'yapi, coa Juan oco doyese'e asaquëta'a.

²⁶ Jaje pa'ipi Apolos Israel pai tsi'si huë'ena jai pai asajëna, caquëna, Priscila cui'ne Aquilapi asani ite te'ire tirona sani quëahuë, ai tiñarepa Maija'quë coca ayere.

²⁷ Quëasiqüëpi Apolos Acayana sasi'i caquë yo'oquëna, sehuosicohua'ipi j sai ja'ñe cöcaë'ë. Cöcaijë cui'ne te'e carta toyahuë, Acaya sehuosicohua'i pa'icohua'ina de'oye ite pëpcaijë'ë cajë. Jaje yo'orena, Acaya t'i'ani Maija'quë oi do'ipi sehuosicohua'ire ai de'oyerepa cöcaji'i.

²⁸ Cöcai si'aohua'i ña hue'ñana Israel paire toyapëna ñaquë Jesús irepa maire huasoquë paji'i caquë sañope capi. Johua'ijë më'ë coa cayë cayë peoyere papi, capi.

19

Pablo Efeso Pa'iyë

¹ Apolos Corintore pa'ina, Pablopi cuti quë'roja'a sa sani Efesona t'i'api. T'i'ani jarona jai paire sehuosicohua'ire t'i'api.

² T'i'ani jaohua'ire seji'i:

“¿Mësarua sehuo maca de'o joyo tsio daquë?”

Caquëna, johua'ipi cahuë:

“Pani, de'o joyo pa'iyë ayeque cayë yëquë ti asama'cohua'i a'ë.”

³ Cajëna, Pablopi capi:

“¿Iquere asajë do cuañore'ni?”

Caquëna, johua'ipi cahuë:

“Juan oco doquë quëase'ere asani sehuojë do cuañosicohua'i a'ë.”

⁴ Cajëna, Pablopi capi:

“De'oji, Juan cato co'aye yo'ose'ere jeoni Maija'quëna ponëcöhua'ini oco dopi, doquë capi: Jijeteyo'je daiquëni sehuoye pa'iji. Jaëre cato Jesuni.”

⁵ Jaje caquëna, asani Jesuni ire papi cuasani sehuorena, Èjaë Jesús mamipi cani dopi, johua'ire.

⁶ Dosicohua'ini Pablopi jëñapi patoquëna, de'o joyopi johua'ina tsio daji'i. Tsio daina, yequë cocapi cajë yo'ohuë. Yo'ojë Maija'quë cayere asajë yecohua'ina se quëahuë.

⁷ Iti jaje yo'osicohua'i cato doce ëmëohua'i paë'ë.

⁸ Pablopi paire Maija'quë cuañe tēte ayere quëare pasi'i caquë ti ca'rama'ë toaso ñañëohua'ire Israel pai tsi'si huë'ena sai capi.

⁹ Caquëna, yecohua'ipi sehuocaiye pajë, si'aohua'i ña hue'ñana huajë ma'a Pablo ye'yaye co'aye a'ë cahuë. Cajëna, Pablopi jaohua'ire jëoni sehuosicohua'ise'ere huani sapi, Tiranno coca ca huë'ena.

¹⁰ Jarona sani si'a mu'señapi coca caquë jajese'e caya ometëcahuëa yo'opi. Yo'oquë pa'ina, Asia provincia yeja pa'icohua'ipi Israel paipi cui'ne Israel pa' peocohua'ipi Èjaë coca asahuë.

¹¹ Jaje yo'oquëna, Maija'quëpi Pablo ja're pa'i jaiye pai yo'o t'ia ma'ñe yo'opi.

¹² Yo'oquëna, Pablo ju'i cañapi cui'ne a'ri tëno ca'ti pëa i papise'epi ju'icohua'ina sani nejëna, ju'icohua'ipi co'yahuë. Cui'ne huati quë'iohua'ijë huatire eto sao cuañoahuë. Ja jerepa yo'opi.

¹³ Jaje yo'oquëna, ñani cui'ne Israel pajie paë'ë, ma'aja'a cu'ijë huati joñoapi paire pa'iye eto saohua'ijë, coa yo'ocohua'i. Jaohua'ipi cuasahuë, Jesús mamipi cajë huatire eto saoye pa'iji. Cuasani huati joñoare cahuë:

“Pablo quëaquë Jesús mamipi cuañëñë, etajë'ë.”

¹⁴ Iye yo'oye cato Maija'quë huë'e ñacaicohua'i ëjaërepa Israel pa' Esceva siete mamajëpi yo'ohuë.

¹⁵ Jaje yo'ocohua'ini yequë mu'se huati joyopi johua'ire sañope sehuoquë capi:

“Jesure asayë, cui'ne Pabloreje asayë. ¿Mésaruta'a ne a'ni?”

¹⁶ Caquë jare iti macapi huati quë'ipi jaohua'ire tuturepa yo'oquë tseani a'si neina, a'si quë'iohua'ipi caña peoñoa huë'epi etani cati saë'ë.

¹⁷ Iye yo'ose'ere si'aohua'i Efeso pa'icohua' griego pai cui'ne Israel pai asani ca'rahuë. Jaje yo'ojëna, Jesús mami jerepa ai de'oye a'ë, si'a hue'ña pa'icohua'i cahuë.

¹⁸ Jaje cui'ne jai pai sehuosicohua'ipi johua'i co'aye yo'ose'ere jai pai ña hue'ñana oijë quëahuë.

¹⁹ Quëajëna, cui'ne jai pai ja'në dahuëohua'i pa'isicohua'ipi jo dahuë toyapëre pai ña hue'ñana dani ëohuë. Ja toyapë do'ire cuëcue ña'ne cato cincuenta mil curiquë të'ñarepa do'i paji'i.

²⁰ Jaje yo'oco mai Èjaë coca jerepa jai sacco'ë, si'a hue'ña jo tuture paire iñooco.

²¹ Ja jeteyo'je Pablo Macedoniana cui'ne Acayana do'i sani cui'ne jaropi Jerusalénje do'i sasi'i cuasapi. Cuasaquë yequeje capi, jaro Jerusalén saisi jeteyo'je Romaje saija'quë a'ë.

²² Jaje caquë Timoteore cui'ne Erastore iti cõcaicohua'ire cayaohua'ire Macedoniana jëjo saopi, ise'e ja yë'ta'a Asia yejana a'ri maña pëaquë.

Efeso Acohua'i Sañope Yo'ose'e

²³ Ja mu'seña Efeso daripë pa'icohua'ipi ai josa yo'ojë cahuë, huajë ma'a ayere.

²⁴ Demetrio po curiquë de'huaquëpi ca huëouna. Jaëpi diusa Diana huë'ejë pa'ye a'ri huë'ña maña nequë paji'i. Jaje nequëpi ite cõcaicohua'ire jaiye curiquë isiquë paji'i.

²⁵ Jaëpi ite cõcaicohua'ire cui'ne i' neñeje pa'ye necohua'ire tsi'sopi. Tsi'soni capi:

“Èjaohua'i mësarupi asayë, iye a'ri huë'ña de'hua do'i mai de'oye pa'iye.

²⁶ Jaje pa'iquëta'are jaë Pablopi mësarupi asajë cui'ne ñajëna, caji, pai de'huase'e diusu peoye a'ë. Jaje caquë jai paire ye'ya huesoji, i cayena. Iño Efeso paire cui'ne si'a Asia provincia pa'icohua'ire jaje ye'yaji.

²⁷ Iye i jaje ye'yaye ai co'aji, mai co'amaña peo huë'ña ne huesëye pa'iji, cui'ne diusa Dianaje jo yure do'i quë'io pa'iye peo huë'ña tõmeñe pa'iji. Jaje tõmeni iye diusa co'a coa cue'cue cuañoja'coa. Yure iye provincia Asia pa'icohua' tsecopi cui'ne iye yeja si'a yeja pa'icohua' tsecopi carajasa.”

²⁸ Caquëna, asani pëtiteni tutu cuijë cahuë:

“Pa'ijë'ë, Diana Efesios pai ja'corepa.”

²⁹ Jaje yo'ojë cajëna, si'a iti daripë acohua'i coa huesë asahuë, johua'i yo'ojë caye. Jaje yo'ojë cajë Pablore cõcõhua'ire cayaohua'ire Macedonia acõhua'ire Aristarcõre cui'ne Gayore tseani quë'rëjë sahuë, pai tsi'sijë ña hue'ña quë'rore pana.

³⁰ Jaje yo'ojëna, Pablopi paire casi'i caquë yo'oquëna, sehuosicohua' ite ësehuë.

³¹ Cui'ne jaro ëjaohua'i pa'i hue'ñare yecohua' ëjaohua'ipi Pablore ñacõhua'ique paë'ë, pa'ijë jaohua'ijë ai ësehuë, cõni yo'oquë cama'ë cajë. Jaje pa'ina, ite quëaja'cõhua'ire jëjo saohuë. Pablo quë'rona.

³² Jaje yo'o maca, cato iti tsi'sisicohua' cato de'huarepa yo'ojë cahuë, yecohua' tñe cuijëna, cui'ne yecohua' ai yeque cajëna, yo'ohuë. Jaje yo'ohuë, pai. Coa ca huëosi do'ire huesërepa tsi'sini, jai pai yecohua' ite cajë tsi'sise'eqe huesëhuë.

³³ Jaje jai pai huesëjëna, Alejandroje huesëquëna, yecohua'ipi quëahuë, iti cajë tsi'sise'e. Jaëni judío paipi coca cajë'ë cajë jëjo eto nëcõhuë, pai ña hue'ñana. Ja maca Alejandroje paire coca casi'i judío pai ayere caquë jëñapi yo'opi. Yo'oquëna,

³⁴ ije judío paipi casi'i caquë yo'oji asani ai tutu cuihuë, caya horas:

“Pa'ijjé'ë, Diana Efesios pai ja'co.”

³⁵ Cuijé pejë jeorena, iti daripé pa'iyé toyaquëpi capi, paire:

“Efesios pai asajé'ë, si'a pai iye yeja acohua'i asayé, iye daripé pa'icohua'i si'aohua'i Dianate ne huesoma'pé paye pa'iji case'e. Cui'ne ma'témopi tómesi quëñaorejë ñacaiye pa'iji, asayé.

³⁶ Jaje pa'iyé sête co'arepa huëojé co'aye yo'oma'pé pa'ijjé'ë. Du'ru macarepa ai cuasajé'ë, je huesëjéna, airepa yo'ojé caye'ni.

³⁷ Iconi mësaru tseani dasicohua'i co'aye caye pahué, mai ja'core pare.

³⁸ Jaje pa'ina, Demetriopi cui'ne i ja're yo'ojé cacohua'ipi yecohua'ire sañope cayere pani pai yo'ose'e asani ca de'huacohua'ina quëajé'ë. Jaohua'i pa'iyé, mësaru yéye ëjaohua'ina cajé'ë. Ja maca pai ñape mësaru pa'iyé quëa de'huajé ne de'huajé'ë.

³⁹ Mësarupi yequë co'amañare seña pacohua'i pani jai pai de'oyerepa tsi'si sitona coca caye pa'iji.

⁴⁰ Yure iye yo'ose'e co'aji. Ejaohua'ipi asani maire caye pa'iji coa josa yo'ojé cacohua'ire. Iquere yo'ojé care'ni, cajé seto quëaye peoji. ¿Jere quëaye'ni, iti cajé yo'ose'e peoto?”

⁴¹ Jaje se ca tējini jeopi, iti yo'oye.

20

Pablo, Macedonia, Cui'ne Greciana Saiye

¹ Josa yo'ojé ca tējisi jeteyo'je Pablopi sehuosicohua'ire soini yëhuo tējini saiyé caquë pépani Macedoniana saji'i.

² Sani si'a hue'ña jaro pa'i daripëana do'i sai sehuosicohua'ire sihua ëaye yëhuo huasoquë cuji'i. Cuni tējini jeteyo'je Greciana t'i'api.

³ T'i'ani jaroná toaso ñañëohua'ire péapi. Péasiquëpi pa'iquëpi Siriana sai yohuëna aya mëni tējiquëpi ite judío pai huañu'u cajé cui'ñase'ere asapi. Asani Macedonia yejaja'a cui'naëpi tēto sai quëopi co'isi'i cuasapi.

⁴ Cuasani saina, i ja're cōni saë'ë, Sópater Berea aquë, Pirro mamaquë, Aristarco, Segundo Tesalónica acohua'i, Gayo Derbe mamaquë, Timoteo, Tíquico. Cui'ne Trófimo Asia yeja acohua'i saë'ë.

⁵ Saisicohua'ipi Maija'quë do'ijjépi yëquëre Troaspi utehuë.

⁶ Utejéna, yëquëpi levadura co'mema'a ao aife tsi'sini yo'o tējini, Filipos daripëpi etani jai yohuëja'a cinco mu'seña saijé t'i'ahuë, Troasna. T'i'ani jaroná siete mu'seña pëahuë.

Pablo Troas Pa'iyé

⁷ Huajé mu'se pa'ina, Jesús yo'ose'ere cuasajé ao jë'yeni añu'u cajé tsi'sisicohua'ipi pa'ijjéna, Pablopi ñatasí mu'se saiyeque pa'iji caquë ai yëhuopi, ñami jopo pa'i macare paja'a.

⁸ Yëhuoquëna, ëmëje'repa tu'rihuëna tsi'sisicohua'ipi paë'ë, jaiye toa tsëopëa tsëo sitore.

⁹ Pa'ijjéna, te'i posé Eutico hue'equëpi hue'se ña sa'rona ja'rusicuëpi ñuji'i. Ñu'iquëpi, Pablopi airepa tsoe quëaye sête cai huëoni yureta'a çani huesëni jaro toaso ya'ripa ëmëje're papi tómepi. Tómeina, ju'isiquëni çani huëohuë.

¹⁰ Jaje ju'isiquëni çarena, Pablopi çajeni jai capi posëna jani su'cuapi. Su'cuani capi, sehuosicohua'ire:

“Quëquëma'pé pa'ijjé'ë. Huajéquë api.”

¹¹ Cani ja jeteyo'je, ja'né pa'i sitona mëni ao yëtoni ani jare Maija'quë coca quëaquë ñatapi. Ñata tómequëna, caye jeoni saji'i.

¹² Saina, yecohua'ijjé tsihua'ëre huajéquëre sahuë. Sajé ai sihuajé saë'ë, iti yo'ose'ere cuasajé.

Mileto Saiye

¹³ Çutihuëja'a sasi'i caëna, yëquëpi du'ru saë'ë, yohuëja'a Asón daripëna. Jaroná Pablora i case'ejé pa'ye ayañu'u cajé.

¹⁴ Yo'osicohua'ipi Asónna ite t'i'ahuë. T'i'arena, aya mëquëna, sani i ja're cōni Mitilenena t'i'ahuë.

¹⁵ T'i'asicohua'ipi jaropi sani se ñatasí mu'se Quío daripé je'ñere paja'a sa saë'ë. Sa sani se ñatasí mu'se, Samos yo sa'rona t'i'ahuë. T'i'asicohua'ipi se ñatasí mu'se Meletona t'i'ahuë.

¹⁶ Jaje yo'ohuë, Pablopi esa Jerusalénna t'i'ani du'ru quëise'e téa fiestare pasi'i caquëna. Ipi Efesona saisiquë paní Asia yejana ai tsoe péayere coequëna, jaje yo'ohuë.

Efeso Sehuosicohua'ire Yëhuoye

¹⁷ Miletore Pablo pa'i Efeso sehuosicohua'í ëjaohua'ire soipi.

¹⁸ Soina, asani datena, capi, jaohua'ire:

“Yë'ë du'ru macarepa Asiana t'i'asi mu'se aquëpi yë'ë pa'i yo'ose'e asacohua'í a'ë, mësaru.

¹⁹ Si'ané mésarú ja're pa'i jerepa pa'i a'è caquè yo'oma'è mai Èjaëre necaiyè. Israel paipi yè'ère jaiye josa yo'oñu'u cuasajè yo'o jopopi ai yo'oquè mésarute otare papi oi quèahuè. Jaje pa'ina,

²⁰ mésarute de'oye pa'iyè isiyere quèa jujani jeoma'è pai tsi'si hue'ñana cui'ne mésarú hue'ñana cu'i quèarojã'è'è.

²¹ Jaje quèaquè Israel paire cui'ne griego paireje cahuè, Maija'quèna ponèni mai Èjaè Jesucristore sehuojè'è."

²² Jaje mésarute quèasiquèpi yureta'a joyore papi Jerusalénna saiye pa'iji caquè yè'ère cuañequèna, jaroná saija'què a'è, yè'ère yo'o ja'ñe huesèquè.

²³ Coa iyese'e de'o joyo quèaquèna, asaquè pa'iyè, mè'ère co hue'ñapi cui'ne ai yo'oyepi uteji. Jajese'e caji, yè'è sai daripèa ñape.

²⁴ Jaje pa'iquèta'are yè'è cato, yè'è pa'iyere ai oi me neja'què a'ni cama'è pa'iyè. Coa sihuaquè yè'è pani tèji macaja'a de'o cocare Maija'què paire oiyere Èjaè Jesús quèacajjè'è caquè isise'ere ne saoyese'e pa'iji.

²⁵ Mésarú yè'è quèaquèna, Maija'què cuañe te'te asasicohua'i yè'ère tijupè ña coñe paja'cohua'i a'è. Jaje yure cato asayè coa caye pañè.

²⁶ Jaje pa'ina, mésarute caye yèyè, mésarú acohua'ipi ne huesèto yè'è quèama'è pa'isi do'i peosipi.

²⁷ Mésarute tsoe si'aye Maija'què cuasa nèose'ere yo'ose'ere si'aye yahueye peoyerepa quèahuè.

²⁸ Jaje pa'iyè sète mésaruja'a co'ye ñare pajè pa'ijè, i tsiè do'ipi huerosicohua'ire si'a sehuosicohua'ire Maija'què tsecohua'ire yèi ñamare ñacohua'i yo'oyeje pa'ye de'oye ñacajjè'è, de'o joyopi mésarute ñacaicohua'i pa'ijajè caquè nesicohua'i sète.

²⁹ Yè'è saisi jeteyo'je yai ai yèyeje pa'iohua'ipi sehuosicohua'ire nejo saon'u'u cajè yecohua'ipi daija'cohua'i a'è.

³⁰ Yequeje jare mésarú acohua'ipi cosoyere ye'yajè yo'oja'cohua'i a'è sehuosicohua'ipi johua'ini tuijajè cajè.

³¹ Yè'è mésarú ja're toaso ometèca pa'i mu'señapi cui'ne ñamiñapi otarepa oi pai ñapere yèhuoye jeoma'è yèhuose'ere huånèyema'pè jare cuasajè ñare pajè pa'ijè'è.

³² Maija'què do'ijè, mésarute Maija'quèna cui'ne i oi coca cayena isi nèonè. Ja coca tutu què'yepi mésarú joñoa jerepa de'oye cuasaye necaiyena cui'ne si'aye i ca nèose'ere i de'o paina isiyena.

³³ Yecohua'i co'amañare, curiquère, cañare oima'è paè'è.

³⁴ Coa ai jerepa yè'è jètèpi nequè yè'ère caraye tì'acquè pahuè. Paquè cui'ne yè'è ja're conì pa'icohua'ireje cõca'è, yè'èpi nequè. Jaje yo'oye mésarupi ñahuè.

³⁵ Ñajèna, mésaruteje jaje co'amaña neje yecohua'ire co'amaña peocohua'ire cõcaicoa caquè ye'yahuè, si'anèpi. Jesús caquè pa'ise'ere cuasaquè i case'e cato caji: "Isi cuañoni sihuaye jerepa sihuaye pa'iji, yecohua'ina se isini."

³⁶ Ca tèjini Pablo do're ja'rúni Maija'quère seji'i, johua'i ja're conì.

³⁷ Ja maca Pablora ai oijè su'cuani sihuahuè. Jaje yo'ohuè, ipi yè'ère tijupè ña coñe paja'cohua'i a'è caèna. Ja maca yureta'a te'e saijè sani i sai yohuè què'roro paja'a jeoja'è'è.

³⁸ Pablópi yè'ère tijupè ti ñahe paja'cohua'i a'è case'e cuasajè ai oicohua'i paè'è. Pa'ijè Pablo ja're conì yohuèja'a saè'è.

21

Pablópi Jerusalénna Saiye

¹ Maija'què do'ijère jeoni aya mèni te'ere papi Cos daripèna saè'è. Sani ñatasi mu'sepi Rodasna tì'ahuè. Tì'ani jaopi Pátarana saè'è.

² Sani Pátarana jai yohuè tì'ahuè, Feniciána saiconi tì'ani jona ayamè'è.

³ Aya mèni saicohua'ipi Chipre saodohuè coa ñajè saè'è. Ari te'tere pa'iona, ñajè saicohua'ipi Siriana tì'ahuè. Tì'ani Tiro yo sa'rona co'amaña ma'ñe pa'iyè sète jaroná yohuè sè'ao.

⁴ Sè'aona jaroná Maija'què do'ijère tì'ahuè. Tì'ani johua'i què'rona pèahuè, siete mu'seña. Pèarena, de'o joyopi Pablo ai yo'o ja'ñere quèaquèna, asani cahuè, Pablora Jerusalénna saima'è pa'ijè'è.

⁵ Jaje casicohua'ita'are siete mu'seña tèto saisi maca etani saè'è. Saijèna, si'aohua'i èmèohua'i cui'ne nèjohua'i tsi maña conì yèquè ja're da'è'è, pai daripè hue'sere pana. Datena, jaroná mejahuèna do're ja'rúni Maija'quère seji'è. Seni tèjini saiyè cajè pèpani,

⁶ jai yohuèna aya mèni yèquè cato saè'è. Saijèna, johua'ipi johua'i hue'ñana co'ihuè.

⁷ Tiropi Tolemaidana tsiaya saiye sani tèjini Maija'què do'ijère pèpani te'e mu'se iti macana pèahuè, johua'i ja're conì.

⁸ Ñatasi mu'se saicohua'ipi Cesareana t'lahuë. T'i'ani Jesús jëjo saocohua'ire cõcaicohua'i siete aquë Felipe huë'ena pëahuë, de'lo coca quëaquë huë'ena.

⁹ Jaë Felipepi cuatro mamajëre nomi tsire huejama'cohua'ire paquë paji'i. Jaohua'i cato yequë mu'se pa'i ja'ñere quëacohua'i paë'ë, Maija'quëpi quëaquëna.

¹⁰ Ja huë'ere tsoe mu'seña maña pa'ijëna, daji'i, Agabo Judeapi. Jaë cato yequë mu'se yo'lo ja'ñere quëaquë paji'i.

¹¹ Pa'ipi titani yëquë ña huë'ña Pablo tëicore ñni jëña cui'ne nëcaña co'ye ija'a huëpi, huëni capi:

“Ñeje iye tëica paquëre hueja'cohua'i a'ë, judío paipi Jerusalénna ja jeteyo'je t'i paina isija'cohua'i a'ë, ñte. Jaje caji, de'lo joyopi.”

¹² Caquëna, asani yëquë Pablote cõcõhua'ipi cui'ne ja daripë sehuosicohua'ipi Jerusalénna saima'ë pa'ijë'ë, cajë ësehuë.

¹³ Ësejë cajëna, Pabloli capi:

“¿Me yo'ojë oiye'ni, yë'ere co'a ju'ñe'ni? Yë'ë Jerusalénna ju'ñe de'oji, huësiquëpi mai Ëjaë Jesús yëye yo'oto.”

¹⁴ Jaje caquë Jerusalénna sasi'i caquëna, asani ñte pëajë'ë caye jëoni cahuë:

“Mai Ëjaë yëyeje pa'ijaquë.”

¹⁵ Ja jeteyo'je co'amaña de'hua tëjini Jerusalénna saë'ë.

¹⁶ Saijëna, Cesarea pa'i sehuocohua'ipi yëquëre cõni saijë sahuë. Sani jaohua'ipi Jerusalénna t'ani Mason huë'ena sahuë, yëquë pëaja'tona. Mason cato Chipre aquë paji'i, ai tsoe Maija'quë coa sehuosicquë paji'i.

Pabloli Jacobo Quë'rore Pa'iyë

¹⁷ Jerusalénna t'ajëna, sehuocohua'ipi sihuajë yëquëre pëpahuë.

¹⁸ Pëparena, ñatasi mu'se Pablo ja're cõni Jacobo quë'rona do'i saë'ë. Sa t'ajëna, jarote cui'ne si'aohua'i sehuocohua'i ëjaohua'i paë'ë.

¹⁹ Pa'ijëna, pëpa tëjini Pabloli si'aye quëapi, judío pa'i peocohua'ire quëarojaina, Maija'quëpi jaohua'ire necaise'ere.

²⁰ Quëaquëna, asani Maija'quë ai de'oji cani Pablote cahuë:

“Maija'quë do'iquë, de'oji më'ere quëañu'u. Jai pa'i Israel pa'i sehuosicohua'i pa'iyë, ñno. Jaohua'i cato Moisés cuañese'ere yo'oye pa'iji cacohua'i a'ë.

²¹ Jaje cacohua'ipi asayë më'ëpi judío pa'i yequë pa'i quë'ro pa'icohua'ire Moisés cuañese'ere yo'oma'pë caquë cui'ne ca'ñije tëama'pë pa'ijë'ë caquë, cui'ne aiohua'i yo'ose'e yo'oma'pë caquë ye'yaji asayë.

²² Jaje asacohua'ipi më'ë ñno daise'e asaja'cohua'i a'ë. ¿Jaje pa'ito me neja'cohua'i a'ni?

²³ Iyese'e më'ë yo'oye pa'iji cuasajë, ñnore cajese'e pa'i ëmëohua'i pa'iyë ñohua'i Maija'quëre ca nëose'ere yo'oja'cohua'i.

²⁴ Jaohua'i ja're sani Moisés cuañese'ere yo'oquë jaohua'i ja're te'e si'sire tsoa tojë'ë, nañare tëa cuañoquë. Cui'ne më'ëpi jaohua'i tëa cuañno do'ijë saicajë'ë. Jaje yo'oquëna, si'aohua'i ñani më'ëre sañope case'e coa case'e a'ë cuasajajë, Moisés cuañese'ere sehuocai më'ëje yo'oquëna, ña jujani.

²⁵ Tsoe toyahuë, yëquë cuasase'e judío pa'i peocohua'ipi sehuosicohua'i yo'lo ja'ñe. Jaohua'i cato yo'oye pa'iji, a'ñne peoji de'huasi diusuna isisihua'i. Tsiejë a'ñne peoji, cui'ne quio huëasicohua'ire a'ñne peoji. Huejama'cohua'ipi ëmëre nomiore yo'oye peoji. Jaje toyahuë.”

²⁶ Jaje casi maca Pabloli cuatro ëmëohua'ire sapi. Sani ñatasi mu'se ñohua'i ja're te'e si'sire cuya toni Maija'quëre se huë'ena cacapi, ñohua'i ca nëosi mu'se t'ajaja'a mu'se quëasi'i caquë. Jaje cõni cayë, pa'i ñape Maija'quëre coa isiyere daja'a mu'se t'ajëna yo'lo ja'ñere.

²⁷ Jë'në siete mu'seña sa tëto saiyë ja'i maca pa'ina, Asia yëja acohua'ipi Israel paipi Maija'quëre se huë'ere Pablo pa'ina, ñani paire ca huëohuë. Ca huëojë Pablo quë'rona sa tomejaë'ë,

²⁸ tutu cuijë:

“Israel pa'i cõcaijë'ë. Iquëpi si'a huë'ña cu'i maire sañope caquë ye'yaquë cui'ne Moisés cuañese'e cui'ne iye huë'ë sañope caquë ye'yaquë. Jaje pa'ipi yure Maija'quë huë'ena griego paire dapi, iye de'lo huë'ere si'si necai, cahuë.”

²⁹ Jaje cahuë, Pabloli Efeso aquë Tróximo ja're cõni Jerusalénre pa'ina, ñasicohua'ipi, judío pa'i peocohua'i ja're cõni Maija'quë huë'ena cacapi cuasajë jaje cahuë.

³⁰ Jaje yo'ojëna, si'a ja daripë pa'icohua'i asani pëijë tsi'sini Pablote tseani hue'sena quëjëjë sahuë. Hue'sena quë'rë etoni, Maija'quë huë'e eta sa'noa si'ñe sahuë.

³¹ Pablote ja maca huani jëoñu'u cajë yo'ojëna, yecohua'ipi soldado pa'i ëjaëre Coronelre, si'a Jerusalén acohua'i ai josa yo'oyë, quëahuë.

³² Quëarena, Coronelpi asani i soldado pai ja're coní iti yo'o hue'ñana huë'huëhuë. Huë'huë t'ajëna, ñani Pablote huaiye jëohuë.

³³ Ja maca Coronelpi t'iani i soldadore cuañepi. Pablote tseani caya quëna meapi huej'ë caquë ja maca Pablote seji'i: "¿Ique mami a'ni?" caquë, cui'ne "¿Iquere yo'okuëna, më'ëre sañope yo'oye'ni?" caquë.

³⁴ Seina, yecohua'ipi ai tutu cajëna, yecohua'ipi yequere tutu ai cajëna, asama'ë soldado daripëna saj'ë, cuañepi.

³⁵ Cuañëina, sacohua'ipi jë'nërepa soldado pai daripë mëiconna t'iani soldado paipi coa cuaij'ë sahuë, Pablote huajo yëcohua'ipi ai josa yo'o do'ire.

³⁶ Sajëna, jai pai tutu cuihuë:

"Ite huaij'ë".

³⁷ Sajëna, soldado huë'e caca maca Pablopi Coronelre capi, griego cocapi:

"A'ri maña më'ëre casi'." Caquëna, soldado ëjaëpi capi:

"¿Më'ë griego cocare caquë aë?"

³⁸ Më'ë pa'ima'quë Egipto pai ëjaëre sañope yo'okuëpi, cuatro mil ëmëohua'i huaicohua'i ja're coní pai peo hue'ñaja'a saisiquë."

³⁹ Caquëna, Pablopi capi:

"Pani, yë'ë cato Israel pai a'ë. Cilicia yeja Tarso daripë aquë a'ë. Jaje pa'ina, më'ëre señë, jaohua'ire coca casi'."

⁴⁰ Caquëna, de'oji, caëna. Caquëna, Pablopi soldado huë'e mëiconi nëcaquë jëtëpi ja'jëquëna, ñani coca caye jeorena, Pablopi hebreo cocapi capi, Israel paire:

22

¹ "A'yë dohuë, cui'ne ja'quëohua'i asaj'ë si'aye quëasi'i, mësarute."

² Jaje hebreo cocapi caquëna, asani Pablo caye ai jerepa jo'cua jëoni cama'pë asajëna, capi:

³ "Yë'ë Israel pai a'ë. Cilicia yeja Tarso daripëna coasiquë a'ë. Jaje pa'ipi iye daripë Jerusalëna ai de'ohuë. Ai de'okuëna, Gamalielpi yë'ëre ye'yapi, mai aiohua'i cuañese'ere si'aye. Ye'yasiquëpi si'aye Maija'quë yëye yo'osi'i caquë de'hue yo'ohuë, mësaruru yo'oyeje pa'ye cui'ne.

⁴ Jesús ye'yase'ere ësequë ite sehuocohua'ire huani jëosi'i caquë ite sehuocohua'ire tseani si'seni co hue'ñana jëjo saohuë, ëmëohua'ire cui'ne nomiohua'ire.

⁵ Maija'quë huë'e ñacaicohua'i ëjaërepa cui'ne si'a Israel aiohua'i asayë. Yë'ë jaje yo'ose'e, jaohua'ipi Damasco acohua'ina Israel paina toyani jëjo saohuë, Jesure sehuocohua'ire co'equë tseani iño Jerusalëna dani si'seye pa'iji caquë.

Pablopi I Sehuose'ere Quëapi

(Hch 9.1-19; 26.12-18)

⁶ Ma'aja'a sai Damasco t'iañe ja'i maca pa'ina, jopo mu'se ma'tëmopi ai miañerepa yë'ëna ju'api.

⁷ Ju'acquëna, yejana tomehuë. Ja macapi asahuë, yë'ose'e: "¿Saulo, Saulo me yo'okuë yë'ëre josa yo'okuë'ni?"

⁸ Caquëna, sehuohuë. "¿Ne a'ni ëjaë?" cahuë. Caquëna, capi: "Yë'ë Jesu a'ë. Nazaret aquë a'ë, më'ëre josa yo'okuë."

⁹ Caquëna, yë'ëre cöcöhua'i cato miañe ñajëta'a Jesús cayete asama'pë quëquësicohua'i pateña.

¹⁰ Pa'ijëna, Jesús caquëna, asani cahuë: "¿Iquere yo'oja'quë a'ni, Ejaë?" Caquëna, mai Ejaëpi capi: "Huëni Damascona saij'ë. Jaropi më'ëre yo'o ja'ñe quëaye pa'iji."

¹¹ Ai miañepi ju'a huesouna, ñama'quë de'ohuë. Yë'ëre cöcöhua'ipi jëtëre tse'ejë sahuë, Damascona.

¹² Jarote Ananías Moisés cuañese'e yo'okuëpi Damascore pëasiquëpi paji'i. Jaë cato ai de'okuë api, si'aohua'i judío pai cajëna, pa'iquë paji'i.

¹³ Damascona t'iani pëahuë. Pëaëna, Ananíaspi dani nëcaquë capi: "Saulo yë'ë yo'jei, yure më'ëpi ña'ne pa'iji. Caquëna, ñahuë, iti macapi."

¹⁴ Ja maca yë'ëre capi: "Mai aiohua'i Diosupi j yëyere asaquë yo'ojaquë caquë më'ëre jo'ya nepi, nuñe pa'ini ñaquë cui'ne Jesús cayere asaquë yo'oja'quëni soipi."

¹⁵ Jaje pa'ina, më'ëre ñase'ere cui'ne asase'ere si'aohua'ire quëaye pa'iji. Më'ëre cato j pa'iyere quëacaiquë pa'ija'quë a'ë.

¹⁶ ¿Yure me yo'okuë utequë'ni? Huëni do cuañoj'ë, mai Ejaë mamire cuasaquë më'ëre co'aye yo'ose'e tsoa tösiquë pa'iquë."

Judío Paj Peocohua'ire Quëaquë De'ose'ere Quëaye

17 Jeteyo'je Jerusalénna co'ini Maija'quère sę huë'ena cacani Maija'quëni sęi çani ñaņęe pa'ye ñahuë.

18 Ñaquëna, Ęjaępi yë'ere capi: 'Esa Jerusalénpi etani saijë'ë. Iye daripë pa'icohua'i yë'ë coca më'ë quëaye asacaiye paja'cohua'i a'ë.'

19 Caquëna cahuë: 'Ęjaë, me jaohua'ire quëaye'ni, tsoe jaohua'ipi yë'ë më'ere sehuocohua'ire judío pai tsi'si huę'ñana sai tseaquë tē'caquë cui'ne co huę'ñana coquë yo'ose'e asacohua'ire.

20 Cui'ne më'ë jo'yaë Estebanre huani jeojëna, yë'ępi huaicohua'i çaña ñacai nęcaquë huaiye de'oji cuasahuë. Si'a pai asayë, yë'ë yo'ose'e.'

21 Caquëna, mai Ęjaępi yë'ere capi: 'Saijë'ë. So'ona jęo saosi'i, yë'ë cocarepa yequë paire quęaja'quère, Israel pai peocohua'ini,' capi."

Coronel Yo'oye

22 De'oye iye ca macaja'a asa tęjini ai tutu cui huëohuë:

"Huajęquë pa'ito co'aji. Me huajęquë pa'ija'quë."

23 Jaje jęoņe peoyerepa ai tutu cuiję pęjįę jöhua'i ju'i sara du'teni jęaję cui'ne ya'o ne'ñare Ęmęje'ena jęaję yo'ohuë.

24 Yo'ojëna, soldado huë'ena Pablote coni ça'ni mepi si'sejjë'ë. ¿Si'sejjëna, quęajaquë i co'aye yo'ose'e. Iquere yo'oquëna, ai saņope caye'ni? Asasi'i caquë cuañępi, Coronelpi.

25 Si'seņu'u caję huęni yo'ojëna, Pablote Capitánre capi:

"Yë'ë yo'ose'e asama'pë si'seyę peoji. Cuaņese'e pa'iji, yë'ë romano a'ë."

26 Caquëna, Capitánpi asani sani i Ęjaere capi:

"Iquere de'hua ñani yo'ojjë'ë. Romano api."

27 Caquëna, Coronelpi dani capi:

"Yë'ere quęajjë'ë. ¿Romano a'ë, më'ë?"

Caquëna, Pablote capi:

"Jjęję'ë."

28 Caquëna, Coronelpi capi:

"Jaiye curiquë saņini yë'ë romano pai de'ohuë."

Caquëna, Pablote capi:

"Yë'ë saņiņe pahüë. Yë'ë cato tsi'nëna romano pai a'ë."

29 Caquëna, si'seņu'u caję yo'osicohua'ipi jte jęoni sateña. Cui'ne Coronelpi romanore huęjë'ë cuaņesiquępi quęquępi.

Judío Paj Ęjaohua'ire Pablo Case'e

30 Ñatasi mu'se Coronelpi Israel pai Pablote saņope case'ere asasi'i jque do'ire saņope caye'ni caquë Maija'quë huë'e ñacai Ęjaohua'ire cui'ne judío pai yo'oye asani ca tęji Ęjaohua'ire tsi'sopi. Aiohua'ire tsi'soni Pablote quęna mea joyeni tsi'si huę'ñana daęña.

23

1 Sa nęcouna, Israel pai yo'oye asani ca tęji Ęjaohua'ire Pablote ai ñani capi:

"Maija'quë do'ijję, iye macaja'a Maija'quë ña huę'ña yë'ë ai cuasaquë co'a ju'i pa'iyę paņę."

2 Caquëna, Ananiaspı Maija'quë huë'e ñacaicohua'i Ęjaere papi Pablote ja'ye nęcacohua'ire capi: "Yë'opona tętoję'ë."

3 Cuaņequëna, Pablote jte capi:

"Më'ęni coa caquere Maija'quępi tętoja'quë api, më'ë cato Moisés cuaņese'epi yë'ë yo'ose'ere asani ne de'huaja'quępi ja'rusiquępi ñu'iñę, ja maca. Jaje pa'ita'a ¿me yo'oquę tętoję'ë, cuaņequę'ni? Jaje canı më'ępi Moisés cuaņese'ere saņope yo'oyę."

4 Caquëna, iti maca nęcacohua'ipi jte cahuë:

"¿Maija'quë huë'e ñacaicohua'i Ęjaere pare pęi saņope caquę?"

5 Cajęna, Pablote capi:

"Do'ijję Ęjaere huesęquë cahuë. Ęjaępi asani jaje caye para'huë. Maija'quë toya pępę caji: 'Pai Ęjaere pęi saņope cama'ę pa'ijję'ë.'"

6 Canı ja jeteyo'je, Israel pai yo'oye asani ca tęjicohua'i acohua'ipi saduceo pai cui'ne fariseo pai pa'iyę asani, Pablote tutu capi:

"Do'ijję, yë'ę fariseo'ę. Fariseo tsęcapę aquę a'ę. Ju'isicohua'i huęiye pa'iji cuasa do'ire tseą cuaņosiquę pa'iyę."

7 Jaje caęna, fariseohua'ipi, saduceohua'i ja're saņope yo'oję caję caya tsęca huahuë, tsi'sisicohua'ipi.

8 Saduceohua'i cato ju'isicohua'i huęiye paņę, cui'ne huįñaohua'iję peoyę, cui'ne joyoję peoyę cacohua'i a'ę. Jaje pa'iquęta'are fariseohua'ipi ju'isicohua'i huęiye pa'iji, cui'ne huįñaohua'iję pa'iyę cui'ne joyoję pa'iji cuasacohua'i a'ę. Jaje pa'ina, saņope cahuë.

⁹ Ai cuijê yo'ojê cajêna, fariseo acohua'i cuañese'e ye'yacohua'i huëni nêcani cahuê:
 “Iquê co'aye yo'ose'e peoji. Jaje pa'ina, joyopi quëaquêna, panita'a huiñaëpi quëaquêna, casiquëni huesêjê yo'ojê Maija'quëni sañope yo'oye pa'ini, cuasayê.”

¹⁰ Cajêna, ai jerepa sañope yo'ojêna caye paji'i. Pa'ina, Coronelpi Pablote yo'ojê huani jêo ma'ñe caquê ca'raquê i soldado païre quërêjaija'cohua'ire jêjê saopi. Jaohua'ipi dani etoni soldado paï huê'ena cui'naëni sajäjê caquê.

¹¹ Se na'isi ñami mai Ejaëpi ñai nêcani Pablote capi: Tutu hue'ejê'ê, yo'o'ujahuê cuasama'ê. Iño Jerusalén yê'ê coca quëase'ejê pa'ye cui'ne quëaye pa'iji, Roma daripêna yê'ê coca.

Pablote Huañu'u Caye

¹² Ñatasi mu'se Israel paï acohua'ipi Pablote huañu'u cuasa nêohuê. Cuasani, Pablote huaima'pê pani aiñe cui'ne ucuye peoji, ca nêo huesohuê.

¹³ Jaje, ca nêosicohua'ipi cuarenta paï jerepa paê'ê.

¹⁴ Jaohua'ipi sani Maija'quê huê'e ñacaicohua'i êjaohua'ire cui'ne Israel paï aiohua'ire quëahuê:

“Yëquëpi Pablote huaima'pê atu yëquëna co'ayepi tmejaquê cahuê.

¹⁵ Jaje pa'ito yure mësarupi cui'ne Israel paï yo'oye asani ca tējicohua'ipi soldado êjaëre sejê'ê, Pablote ñamina'a tījupê darena, yeque dahuêre seni asañu'u pa'iji cajê. Cajê setena, dajêna, yëquê utecohua'ipi jte tsi'si huê'ña ja tī'ama'ëna, huani jêoye pa'iji.”

¹⁶ Ja ca nêose'ere Pablo yo'jêo mamaquëpi asani soldado daripêna cacani Pablote quëapi.

¹⁷ Quëaquêna, asani Capitánre te'ire soini jte capi:

“Iquê posêre sajä'ê, më êjaê Coronel quê'rona, jte quëaye paji.”

¹⁸ Caëna, capitánpi posêre soldado êjaê quê'rona sani capi:

“Pablo cosiquëpi yê'êre soini iquê posêre më êjaê quê'rona sajä'ê. Quëaye paji, seji'i, yê'êre.”

¹⁹ Caquëna, soldado êjaê paï peo huê'ñana tsihua'êre jê'têna tseani sani te'ire seji'i:

“¿Iquere quëaja'quê a'ni, yê'êre?”

²⁰ Caquëna, tsihua'ëpi capi:

“Israel paï acohua'ipi te'e jaje yo'oñu'u cuasasicohua'ipi më'êre seja'cohua'i a'ê, ñamina'a Pablote sajäquê cajê ca tēji êjaohua'i ña huê'ñana, ai dahuêrerepa i yo'ose'e seni asañu'u cajê cayeje pa'ye caja'cohua'i a'ê, coa yequere cuasajê.

²¹ Jaje seto sehuocaima'ê pa'ijê'ê. Cuarenta paï jerepa catini uteyê, Pablote huani jêoma'pê pani aiñe cui'ne ucuye pañu'u ca huesêsicohua'ipi. Jaohua'ipi yure cui'ñani uteyê, coa më'ê sehuoyese'ê uteyê.”

²² Caquëna, soldado êjaëpi tsihua'êre yureta'a yecohua'ire quëama'ê pa'ijê'ê yê'êre quëase'e cani jêjo saopi.

Felipe Quê'rona Saye

²³ Soldado paï êjaëpi cayaohua'ire i Capitán acohua'ire soini iye ñami a las nueve pa'i maca Cesareana saiyeque pa'iji ne de'huajê'ê docientos soldado païre yeja saija'cohua'ire, setenta caballoja'a saija'cohua'ire, cui'ne docientos uitu saja'cohua'ire, caquê cuañepi.

²⁴ Cui'ne Pablo ñu'i saija'quêre caballore ne de'huajê'ê, êjaê Felix quê'rona huajêquere jêasiquëni de'oye ñacajê sacajê'ê, cuañepi.

²⁵ Jaohua'i ja're çoni toyasicore jêjo saopi. Toyase'e cato caji:

²⁶ “Romano êjaê jerepa pa'i, më'êre pëpayê. Yê'ëpi Claudio Lisiaspi.

²⁷ Israel païpi iquêre Pablote tseani huani jêoñu'u cajê yo'ojêna, yê'ëpi romano api asani yê'ê soldado paï ja're sani jte huasohuê.

²⁸ Israel paï jte sañope case'ere asasi'i caquê jaohua'i êjaohua'i tsi'si huê'ñana Pablote sahuê.

²⁹ Sani asaquëna, Pablote johua'i cuañese'e cayere yo'oma'ê tñe yo'o' do'ire sañope caye pa'iji. Jaje pa'ina, huani jêoñe peopi, jte. Cui'ne co'acohua'ire co huê'ñana coyeyê peopi.

³⁰ Jaje pa'iquêta'are judío païpi huani jêoñu'u cuasajê yo'oyere asa tī'ani iquêre më'ê quê'rona jêjo saoyê. Jêjo saocquê cui'ne jte sañope yo'ocohua'irejê sei'ê, më'ê asa huê'ñana sani jte sañope payere cajê'ê, caquê. Ca tējihuê.”

³¹ Ja maca soldado paï iti cuañese'ejê ñami saijê Pablote Antípatris daripêna sahuê.

³² Ñatasi mu'se soldado paï quêo saicohua'ipi huê'ena co'ihuê. Co'ijêna, caballo saico-hua'ise'e Pablo ja're çoni saê'ê.

³³ Ñatasi mu'se Cesareana tī'ani toya ja'hua romano êjaëna isijê cui'ne Pablote isihuê.

³⁴ Isirena, toya ja'hua seña tējini Pablote seji'i: ¿Ique yeja aquê a'ni? Seina, Cilicia yeja aquê a'ê capi. Caquëna, asani,

³⁵ capi:

“Mê'êre co'aye cacohua'ipi datena, më'êre asasi'i.”

Jaje caquë Herodes huë'ena iquëre sani de'hua ñajë'ë, capi, Felix.

24

Pablopi Felixre Caye

¹ Cinco mu'seña tëto sai maca Maija'quë huë'e ñacaicohua'i ëjaërepa Ananíaspi cui'ne aihua'i coní daë'ë. Daijëna, cui'ne iti coca caquërepa Tertulojé daji'i. Jaohua'i cato pai ëjaë quë'rona daë'ë, Pablote sañope cañu'u cajë.

² Dani Felix quë'rona tsi'sijëna, Pablote dahuë. Darena, Tertulopi sañope ca huëopi, ñeje: "Ëjaë Felix, më'ëpi de'oquëpi iye yejaña ñacaina, ai yo'oye peoyë. Cui'ne më'ëpi de'oye cuasaquëpi cuañequëna, yëquë pai si'aohua'i ai jerepa de'oye pa'iyë."

³ Si'a huë'ña më'ëre de'oye cayë. Yëquë romano Ëjaë më'ë Felix ai jerepa pa'i. Jaje pa'ina, ai sihuayë.

⁴ Më'ëpi tsoe cajëna, ai yo'oma'quë cuasajë a'ri maña cañu'u yëquë cuasajë daise'e asacajjë'ë, yëquëre.

⁵ Iquë tiro saicohua'i Nazareno hue'yosicohua'i ëjaëpi ai josa yo'oquë api. Si'a huë'ña Israel paire yequere ye'yaquë cunirojaj quëapi, yequë tsëcapëa nequë.

⁶ Jaje pa'ipi Maija'quë huë'e de'oconí si'si nesi'i caquë yo'oquëna, ñani ite tseahuë, yëquë cuañese'e cayeje pa'ye ne de'huañu'u, cajë.

⁷ Jaje yo'ojëna, Soldado pai ëjaë Lisiaspi dani ai tutu jio dani Pablote sapi.

⁸ Sani Pablote sañope yo'ocohua'ire cuañepi, më'ë quë'rona sani quëaye pa'iji caquë. Yure më'ëpi Pablote seni asajë'ë. Seni asani si'aye yëquë caye nuñerepa sañope caye a'ë asaja'quë a'ë, më'ë."

⁹ Caquëna, si'a Israel pai nuñerepa caji, cahuë, iti maca pa'icohua'i.

¹⁰ Cajëna, romano pai ëjaëpi yure caye pa'iji, caquë jëtëpi iñoquëna, Pablopi ca huëopi:

"De'oji sihuayë, tsoe ometëcana ëjaë pa'i Israel pai yo'oye asani ne de'huaquëpi asaquëna, yë'ë yo'ose'ere sañope sehuoye pa'ina.

¹¹ Coa doce mu'seña pa'iji, Jerusalëna yë'ë t'j'ase'e Maija'quëre sesi'i caquë.

¹² T'j'asiquëpi pa'i te'ireje sañope caye pahuë. Jai pai tsi'sini josa yo'ojajë caquë ca huëoyeje pahuë. Maija'quëre se huë'ere pa'i tsi'si huë'ere jai daripëre josa yo'oye pahuë.

¹³ Yë'ë co'aye yo'oma'ë pa'isiquëre jaohua'i me iñoja'cohua'i a'ni, më'ëre.

¹⁴ Nuñerepa quëasi'i. Maija'quëre sehuoyë, jaohua'i tiro sai ma'a'ë cacore. Maija'quë yëyere yo'oquë pa'iyë. Si'aye Maija'quë coca toyapë, Moisés cuañese'e, Maija'quëre quëacaicohua'i toyase'e si'aye nuñerepa case'e a'ë, cuasani sehuoyë.

¹⁵ Jaohua'i cuasayeje yë'ë cui'ne cuasayë, yequë mu'seña Maija'quëpi ju'isicohua'ire huëoja'quë api, de'ocohua'ire cui'ne co'acohua'ire.

¹⁶ Si'a mu'seña Maija'quëpi yë'ëre ñaquëna, cui'ne paipi yë'ëre ñajëna, asani nuñerepa de'oye yo'osi'i caquë ai yo'oyë. Jaje pa'ina, Maija'quëre ca'raye pañë, paireje.

¹⁷ Tsoe ometëca yequë pai darire pa'isiquëpi iño yë'ë quë'rona co'ihuë. Co'ini t'j'ani peocohua'ire cõcasi'i cui'ne Maija'quëre jsisi'i caquë Maija'quë huë'ena cacahuë.

¹⁸ Cacaní Moisés cuañese'e yo'oní si'sire cuya tosiquë pa'ina, Asia acohua'i Israel pai acohua'i yë'ëre ñahuë, jai pai ja're pa'iyë paquëna, cui'ne josa yo'oma'ë pa'ina.

¹⁹ Yë'ë sañope case'e pa'ito, yë'ëre ñasicohua'ipi dani caye pa'iji.

²⁰ Judío pai yo'ose'ere asani ca tëji ëjaohua'i tsi'si huë'ñare pa'i maca yë'ë co'aye yo'ose'ere t'j'asicohua'i pani, icohua'i iye maca pa'icohua'ipi sañope cajajë.

²¹ Yë'ë te'erepa iohua'i ja're pa'i maca tutu cahuë, ñeje: Ju'isicohua'i huëiye pa'iji asa do'ire yure mësarú yë'ëre sañope sehuoye cahuë, co'aye case'e pani jase'e pati'ne pa'io."

²² Jaje caquëna, Felixpi Jesure sehuoye cohua'i pa'iyere asaquëpi capi:

"Soldado ëjaë Lisiaspi daquëna, nuñerepa asasi'i mësarú yo'ojë caye."

²³ Cani Capitánre cuañepi Pablote coma'ë ñajë'ë. I cajeohua'ipi dani ite cõcajja'cohua'i a'ë. Jaohua'i cacaye de'oji, capi.

²⁴ A'ri maña tsoe mu'seña pa'i maca Felixpi cui'ne j paco Drusila coní daji'i. Jao cato Judía paio paco'ë. Felixpi dani Pablote quë'ërajajë'ë, caquë cuañeina. Quë'ëjatena, dani Jesucristore sehuoni pa'iyere Pablopi quëaquëna, asapi.

²⁵ Asaquëna, Pablopi nuñerepa pa'iyere cui'ne yëyere quëco saojë pa'iyere, cui'ne yequë mu'se pai ñape yo'ose'le ca de'hua ja'ñere quëaquëna, asani Felixpi quëquëpi. Quë'ëni capi: "Sajjë'ë, yure cato yequë mu'se më'ëre soini asasi'i."

²⁶ Yeque cato Felix cuasapi, Pablopi curire jsijaquë, jsina joye saosi'i. Jaje cuasaquë si'anë soiquë coca caquë yo'opi.

²⁷ Caya ometëca sa tëto saquëna, Felixpi etaëna, Porcio Festo romano ëjaë de'opi. Israel pai ite sihuaja'cohua'i a'ë, cuasaquë Pablote etoma'ë pajji'i.

25

Festore Quëaye

¹ Festopi romano ëjaë de'oni toaso mu'seña sa tëto sani Cesareapi Jerusalénna maji'i.

² Mani ti'aëna, Maija'quë huë'e ñacaicohua'i ëjaohua'ipi cui'ne Israel pai aiohua'ipi Pablote sañope coca case'ere quëareña. Quëajë seteña.

³ Pablote Jerusalénna jëjo daojë'ë cajë jaohua'i cato daina, huani jeoñu'u cajë sei'ë.

⁴ Sejëna, Festo capi: "Pani Cesareare Pablo cosiquëpi paji'i. Jarore pa'ijaquë. Yë'ëpi ëa maca jarona sasi'i."

⁵ Ja maca capi:

"Mësarü ëjaohua'ipi yë'ë ja're conï Cesareana saijë'ë. Sani sañope ite coca pa'ito jarona quëajë'ë."

⁶ Festopi ocho mu'seña panita'a diez mu'seña Jerusalén pani tējini Cesareana co'ipi. Co'ini ñatani pai yo'oye ne de'hua huë'ñana sani ja'runi ñu'i Pablote dajë'ë, cuañëpi.

⁷ Cuañëina darena, Israel pai Jerusalén daisicohua'ipi jaiye co'aye yo'osiquë api cahuë. Jajë johua'i sañope caye pa'iquëta'are i yo'ose'ere iñojë quëayere pahüë.

⁸ Pajëna, Pablopi sañope johua'i cayere caquë capi:

"Co'aye ti yo'oma'quë a'ë, yë'ë. Judío pai cuañëse'ere sañope yo'oma'quë a'ë, yë'ë. Maija'quëre se huë'ëje sañope yo'oma'quë a'ë, cui'ne romano pai ëjaëreje sañope yo'oma'quë a'ë."

⁹ Caquëna, Israel paipi sihuajajë cuasaquë Festopi Pablote seji'i:

"Jerusalénna saiye yëma'quë? Jarona yë'ëpi më'ëre sañope case'e ne de'huaja'quëre seji'i."

¹⁰ Seina, Pablopi capi:

"Romano pai ëjaëpi pai yo'ose'e asani ne de'hua huë'ñan'ë, iño. Yë'ë tayose'e pa'ito ne de'hua huë'ñare pa'iyë. Tsoe më'ëpi yë'ë quëaye asahuë, judío paire sañope co'aye yo'oye pase'e."

¹¹ Yë'ëpi ai co'aye yo'osiquë pa'ito huani jeoñe de'oji, ju'iñe pasi'i cama'ë pa'iyë. Jajë pa'iquëta'are yë'ëre sañope cayepi nuñerepa yo'ose'ere pare caye peoto, yë'ëre te'iñe jaohua'ina isi ti'añe peoji. Jajë pa'ina, seña romano pai ëjaëre papi yë'ë tayose'e pa'ito asani ca de'huajaquë."

¹² Caëna, Festopi ite cocohua'ire sa'ñe coca cani cuasani Pablote caëña:

"Romano ëjaërepa quë'rona saiye seto jarona saiye pa'iji."

Agripare Quëaye

¹³ Casiquëpi pa'ina, ëjaë Agripa i paco Berenice conï Festore pëpañu'u cajë Cesareana dateña.

¹⁴ Dani pa'ijëna, Festo jaohua'ire quëapi. Pablo tseja cuañosiquë pa'iyë quëaquë capi:

"Te'i ëmë Felix cosiquë iño pa'iji."

¹⁵ Jerusalénre pa'ina, Israel pai ëjaohua'ipi cui'ne Israel pai aiohua'ipi Pablote sañope coca quëajë ite huaijë'ë."

¹⁶ Cajëna, yë'ë cahuë: "Romano pai ëjaohua'i cato te'ire paire coa huëoni ja asama'pë huani jeoñena cuañëma'cohua'i a'ë. Jajë yo'oma'pë iti ca cuañoquëni ite sañope cacohua'ini sañooperepa ñaquë johua'i sañope ite cayere sañope johua'ire sehuoyere isicohua'i a'ë, caquë quëajaquë cajë."

¹⁷ Jajë pa'ina, Israel paipi iñona datena, ñatasi mu'sepi pai yo'ose'ere ne de'hua huë'ñare ñu'i Pablote dajë'ë, cuañëhuë.

¹⁸ Cuañëina, ire sañope cacohua'ipi quëahuë. Ai co'aquë ai co'aye yo'osiquë api, caja'cohua'i a'ë, cuasaquëta'are.

¹⁹ Coa Israel pai aiohua'i case'ere yo'oma'quë api, cahuë. Cui'ne yequë Jesús cocare jare cahuë. Jesús ju'isiquëpi huëni huajëquë api, caquë api Pablo.

²⁰ Ja mañase'e cajëna, me yo'oja'quë a'ni, cuasaquë Pablote sei'ë. Jerusalénna saiye de'oma'quë, jarona asani ne de'huaye, de'oma'quë cahuë.

²¹ Caquëna, Pablopi romano ëjaëpi ne de'huaye pa'iji, caquë api. Caquëna, de'oji iñore cosiquë pa'ijë'ë cahuë. Yequë mu'seña jëjo saosi'i, romano ëjaërepa quë'rona, cahuë."

²² Caquëna, ëjaë Agripapi Festore caëña:

"Yë'ëje ipi caquëna, asasi'i." Caquëna, Festopi capi:

"Ñamina'a ite asa'ñe pa'io."

²³ Nataquëna, ai de'o caña suñasicohua'ipi ëjaë Agripa i paco conï, jo'yaohua'i conï pai yo'ose'e asa tu'rihuëna cacareña. Jaro soldado ëjaohua'ipi cui'ne Cesarea daripë ëjaohua'ipi tsi'sireña. Cacarena, Festopi Pablote dajë'ë, cuañëina.

²⁴ Festopi cuañëquëna, dareña. Dani caëña:

“Ëjaë Agripa cui'ne si'aohua'i asajë'ë. Si'a Israel pai Jerusalén acohua'i cui'ne ñño acohua'i Pablote huaiye pa'iji, ca jujama'cohua'i a'ë.

²⁵ I yo'ose'ere asani ñte huaiye peoji, cuasahuë. Pablopi yë'ë yo'ose'ere ëjaërepa Augustopi ne de'hua'ñe pa'i api, caquëna, jãrona jëjo saosi'i, cuasahuë.

²⁶ ¿Jaje pa'ina, co'aye yo'oma'quëni me toyaye'ni, mai Ëjaëre? cuasaquë Pablote dahuë, ñño. Më'ëpi ñte asani quëajë'ë, mai Ëjaëre toya ja'ñe.

²⁷ ¿I co'aye yo'ose'ere huesëquë me cosiquëre jëjo saoye'ni, mai Ëjaë quë'rona?”

26

Pablopi Ëjaë Agripa Quëaye

¹ Ja maca Agripa Pablote capi:

“¿Më'ëre sañope cayere sehuojë'ë?”

Caëna, Pablopi jëtë mëani ca huëopi, ñeje:

² “Israel pai yë'ëre sañope case'ere yë'ëpi sehuoquëna, Ëjaë Agripa më'ëpi asaja'quë api caquë sihuayë.

³ Si'aye Israel pai ja'në yo'ojë pa'ise'e asaquëpi, cui'ne si'aye jaohua'i ja're yë'ë sañope coca cayë asaquëpi, yure yë'ëpi quëaquëna, asa jujama'ë dahuëre asacajjë'ë caquë señe më'ëre.

Pablo Tsoe Pa'ise'ere Quëaye

⁴ Yë'ë tsoe Jerusalénre posë pa'inë pa'ise'e si'a Israel paipi asayë.

⁵ Fariseohua'i cato Israel pai yo'oye nuñerepa yo'ocohua'i a'ë, tayoye paohua'i a'ë. Yë'ë fariseo, de'ose'e Israel paipi asayë. Jaohua'ipi yëni Pablo de'oye yo'opi, caja'cohua'i pa'ini.

⁶ Jaje pa'iquëta'are Maija'quë, yëquë aiohua'ire tsoe acohua'ire, ca nëose'ere yë'ë ute do'ire sañope yo'ojë yë'ëre ñño na dahuë. Ju'isicohua'i tujupë huëni huajëcohua'i pa'ija'cohua'i a'ë, ca nëose'ere ute do'ire.

⁷ Jaje pa'ina, si'a Israel pai doce tsëca pa'icohua'i si'a mu'seña si'a ñamiña Maija'quëre sejë j ca nëose'ere uteyë. Tj'aquëna, ñaña'u cajë yë'ë Ëjaë Agripa yë'ëje cui'ne ute do'ire yë'ëre sañope judío pai cayë.

⁸ ¿Me yo'ojë mësarü, Maija'quë ju'isicohua'ire huëo tj'añe paji, cuasaye'ni?

Pablopi Sehuosicohua'ire Josa Yo'o Ja'ñere Quëaye

⁹ Ja'në Jesucristo Nazaret aquë cocare ësequë sehuocohua'ire sañope yo'oye pa'iji, cuasahuë.

¹⁰ Cuasaquë jaje Jerusaléna yo'ohuë. Maija'quë huë'ë ñacaicohua'ipi cuañejëna, jai paire cohuë, Jesure sehuocohua'ire. Yecohua'ipi sehuocohua'ire huani jeojëna, asaquë sihuacuë de'oji cahuë.

¹¹ Jesure sehuocohua'ipi Jesure sehuoye pañë caja'cohua'i a'ë cuasaquë sehuocohua'ire tj'ani ai si'sehuë. Israel pai tsi'si huë'ñana cacarojai sehuocohua'ire co'ehuë. Jaohua'ire ai pëi yo'ohuë, Judea dari jere paje sani co'eroja'ë, si'sesi'i caquë.

Pablo I Pönëse'ere Quëaye

(Hch 9.1-19; 22.6-16)

¹² Jaje caquë Damascona saë'ë, Maija'quë huë'ë ñacaicohua'i ëjaëpi cuañese'e toyani yë'ëre isini jëjo saquëna.

¹³ Saina, ñna ëjaë Agripa jopo mu'se pa'i maca, ma'tëmopi ësë jerepa miañepi yë'ëre ju'api, yë'ëre cõcohua'ireje.

¹⁴ Ju'aquëna, ñani tãtajëna, yë'ose'e asahuë, hebreo cocapi. Caquëna, ‘¿Saulo, Saulo me yo'okuë yë'ëre josa yo'okuë'ni? Tarapë jëjësë ñacana duruhuequë tito pë'iyeje pa'ye më'ëja'a a'si ne ju'ñeje yo'oyë, më'ë.

¹⁵ Caquëna, yë'ëpi ‘¿ne a'ni, Ëjaë?’ cahuë. Caquëna, ‘Jesu a'ë. Më'ë josa yo'okuë a'ë.

¹⁶ Huëni nëcajë'ë, yë'ë jo'yaëre paire quëacaiquëre nesi'i, caquë më'ëre ññoñë. Më'ëpi yë'ë jo'yaë de'oni yure ñase'ere cui'ne yequë mu'seña yë'ëpi ññoquëna, paire quëaye pa'iji.

¹⁷ Më pai cunë Israel tsëca pa'ima'cohua'i huaiye peoji caquë de'oye ñacajja'quë a'ë, më'ëre. Yure Israel tsëca pa'ima'cohua'ina jëjo saosi'i, më'ëpi ye'ya sëtõja'quëre.

¹⁸ Jaohua'i cato caisicohua'ijë pa'iohua'i pa'iyë. Jaohua'i cato coa huesëjë yo'ocohua'i a'ë. Jaje pa'ina, mëna jo'yaohua'i pa'iyë. Jaohua'ire ye'ya sëtõsi'i caquë më'ëre jëjo saosi'i, jaohua'ire quëa sëtõja'quëre, më'ëpi quëaquëna, asa sëtani pönëni Maija'quë jo'yaohua'i pa'ijë, nuiñe yo'ocohua'i, yë'ëre sehuocohua'i. Sehuojë jiohua'i co'aye yo'ose'ere sai de'hua cuañõsicohua'i pa'ijë yë'ëre yecohua'i sehuosicohua'i ja're cõni te'e pa'ijë sehuosicohua'i pa ja'ñere paja'cohua'i a'ë.

Pablopi De'oye Sehuoye

¹⁹ Jaje pa'ina, ëjaë Agripa, Jesús ma'tëmo aye ññose'e asani de'oye sehuohuë.

²⁰ Sehuoni du'ru macarepa Damasco pa'icohua'ini quëahuë. Jeteyo'je Jerusalén pa'icohua'ire quëahuë. Cui'ne si'a Judea yeja pa'icohua'ire quëahuë. Cui'ne Israel pai peocohua'ireje quëahuë, ñeje: "Tsoe pa'ise'e jeoni Maija'quëre sehuojë'ë. Sehuoni sehuosicohua'i yo'oyere yo'ojë'ë."

²¹ Ja yo'o do'ire Israel pai pëijë yë'ëre huani jëoñu'u cajë Maija'quë huë'ena tseahuë.

²² Jaje pa'iquëta'are Maija'quëpi cöcaina, nuñerepa saiye. Ja yë'ta'api yureje si'aohua'ire Maija'quë coca quëaquë, ëjaohua'ire cui'ne ëjaohua'i peocohua'ireje quëahuë, Maija'quëre tsoe quëacaicohua'ipi cui'ne Moisés tsoe quëase'ejë pa'ye.

²³ Jare quëahuë, ñeje: Cristopi ai yo'oni juni huesëye pa'iji. Jeteyo'je ipi du'ru huëni de'o pa'iye, huasoyere iñoja'quë api, maire Israel paire cui'ne Israel pai peocohua'ire."

²⁴ Pablopi ïte sañope cayere sañope jaje caquëna, asani Festopi ai tutu capi:

"Pablo më'ë cuepequë cayë. Itise'e ñaquë ye'ye huesëni."

²⁵ Caquëna, Pablopi sehuopi:

"Pani ëjaë Festo, cuepema'ë nuñerepa cayë. Jaje pa'ire paji cuasajë asayere.

²⁶ Ique mai ëjaë Agripa yë'ë caye si'aye asaji. Jaje pa'ina, ca'rama'ë cayë si'aye i ña hue'ñana, nuñerepa yë'ë caye ëjaëpi asa t'i'aji, huesëma'ë cuasayë. Cama'ë pa'iye, yequë hue'ñana pai ñama'tona tëto saise'ere.

²⁷ Èjaë Agripa, ¿Maija'quë coca tsoe quëacaicohua'i case'ere nuñerepa coca'ë cuasaquë? Asayë, më'ë. ¿Jaje pa'ima'quë?"

²⁸ Caquëna, ja maca Agripa Pablote capi:

"Më'ëpi quëaquëna, Jesús cocare sehuoye ja'i maca yo'ohuë, më'ë capi."

²⁹ Caquëna, Pablopi capi:

"Më'ë sehuoquëna, cui'ne si'aohua'i iye mu'se yë'ëre asacohua'ijë sehuoja'cohua'i a'ë cuasaquë Maija'quëre señë. Yë'ëje pa'iohua'i sehuosicohua'i pa'ijëta'a sëa mea peocohua'ipi sehuosicohua'i pa'ijajë caquë señë."

³⁰ Pablopi ñeje ca tëji maca Èjaë Agripa huëni nëcaquëna, cui'ne ja yeja cuañequëje cui'ne Bereniceje cui'ne si'aohua'i ïti maca ducohua'ijë huëni nëcahuë.

³¹ Huëni sani tïropi johua'ise'e sa'ñe coca cahüë, ñeje:

"¿Iquë co'aye yo'oma'quëre me huani jëoñë'ni, cui'ne cosiquëpi pa'iyeje peoji, iquëre?"

³² Caquëna, ja maca Agripapi Festore capi:

"Romano ëjaërepapi ne de'huajaquë ipi cama'quë pa'ito yurepi ïte joyeni etora'huë."

27

Pablote Romano Quë'rona Saye

¹ Yëquëre Italiana jëjo sañu'u cuasani, Pablote cui'ne yequë cosicohua'ire Capitán Juliona isihuë, jaëpi ñajaquë cajë Augusto hue'yosi tsëcapë aquëna.

² Adramitio yo sa'ro yohuëna ayamë'ë, Asia yeja yo sa'noana sani tëjire pacona. Jaona aya mëni saë'ë. Saijëna, cui'ne yëquë ja're conï Aristarcoje saji'i, Tesalónica daripë aquë Macedonia pai.

³ Nataso mu'sepi Sidón yo sa'rona t'i'ahuë. Jaronna t'i'arena, Juliopi de'oye yo'oquë Pablo cajeohua'ipi necaijajë cuasaquë Pablote eto saquëna, sani j cajeohua'ire, pëpaquë yo'opi.

⁴ Tutu ju'ama' t'ëhuija'a Sidónpi saicohua'ipi ai tutu sañope ju'a do'ire Chipre saodohuë yë'quë macaja'a saë'ë.

⁵ Saicohua'ipi Cilicia yeja cui'ne Panfilia yeja je'ñerepa sa sani Mira daripëna t'i'ahuë. Mira cato Licia yeja daripë aco paji'i.

⁶ Jaronna Capitánpi yequë jai yohuë t'i'api, Alejandría daripëpi daisiconi. Ja yohuëpi Italia yejana saija'coni asani Capitánpi aya mëijë'ë, cuañepi. Cuañëina, aya mëteña.

⁷ Tutu sañope ju'a do'ire dahüere saë'ë, ai tsoe mu'seña. Ai yo'ojë Gnidona t'i'ahuë. Ai tutuquëna, jerepa saiye co'api. Co'acquëna, Creta saodohuë tutu ju'ama'a t'ëhuija'a t'ëijani saë'ë, Salmón daripë je'ñere paja'a.

⁸ Të'tëpaja'a saijë ai yo'ojë De'o Yo Sa'ro hue'yosi yo sa'rona t'i'ahuë, Lasea daripë quë'rona.

⁹ Tsoe ne huesëni yo'orojainë sëte ai huajëya'ye nëji'i, ja yë'ta'api yohuëja'a saiye tsoe je'ñerepa oco tëcahuë t'i'añe sëte. Jaje pa'ina, asaquë Pablopi yëhuoquë capi:

¹⁰ "Èmëohua'i yohuëja'a mai saini ai yo'oja'cohua'i a'ë, si'aye mai saye, cui'ne yohuë nejaja'cohua'i a'ë, cui'ne maije jut'i'ne pa'iohua'i a'ë."

¹¹ Caquë yëhuoquëna, Capitánpi sehuocaiye paquë coa asa topi, Pablo cayë. Iti yohuë paquë cayere cui'ne yohuë quëhuiquë cayere sehuocaji'i.

¹² Jaje pa'ina, si'aohua'i cuasahuë iye yo sa'ro cato co'aji oco tëcahuë pëani tëto saiye. Sañu'u, Fenicena ësé du'ina t'i'ñarepa ña sa'rona. Jaronna oco tëcahuë jëañu'u, cuasahuë.

Asi Tsiaya Ai Co'poye

¹³ Jaje cuasajëna, huë'ehuë te'tepi a'ri ja'ye tutu ju'aquëna, saiye de'oji cuasajë yohuë dëquëye ne huahuase'e naë mëa saoni ayani saë'ë, Creta tët'ëpaja'a.

¹⁴ Saijë pa'i maca ëmëje'e të'hui jai tuturepa daiyepi dani yohuëre tutu sao.

¹⁵ Tutu saocona, sañope yo'o jujarena, tutupi quëconi sao. Sacona, jo jëjo saoyeje saë'ë.

¹⁶ Saicohua'ipi t'e a'ri saodohuë Claudia hue'eco jeteyo'jena t'i'ahuë, ai tutuma'tona t'i'ani. Jaron a' yo'ojë a'ri yohuë paire huaso yohuë ayahüë.

¹⁷ Aya tējini jai yohuë joima'coni cuasajë jai yëi meapi huëhuë yohuë, cui'ne a'ji me-jahuëana Sirte hue'eyena ju'a huesë ma'ñe cajë ca'rajë dëquëyere jopoja'a jëa dëso neñahuë, yohuëpi ju'aye pajaco cajë. Jaje yo'oni coa huahuajë tutu sao cuaño huë.

¹⁸ Natas mu'seje ai tutuquëna, ña jujani iti saicohua'ipi yohuë sayere tsiayana moe dëso huëohuë.

¹⁹ Toaso mu'se acona yureta'a johua'i jëñare papi ñajë jëa dësohuë, yohuë pa'ise'e.

²⁰ Ai tsoe mu'seña ëšere cui'ne ma'ñocore ñama'pë pa'ijë cui'ne ai tutu ju'aquëna, tutu sao cuañojë yureta'a ti ne huesëre pahuë cuasahuë.

²¹ Ai tsoe aima'pë pa'iyë sëte, Pablupi si'aohua'i jopona huëni nëcani capi:

“Yë'ë Cretana pëañu'u caye asani sehuocaisicohua'i pa'ito de'ora'pi. Jaron a pëasicohua'i pani si'aye iye ai yo'oye para'huë.

²² De'oji, yure ai cuasama'pë, tutu mañare hue'ejë'ë, si'aohua'i mësar u huajëja'cohua'i a'ë, yohuëse'e ne huesëtoje.

²³ Yë'ë pacacai necaiquëpi Maija'quëpi iye ñami i huññaëre jëjo daouna, dani capi, ñeje:

²⁴ Pablo ca'rama'ë pa'ijë'ë, César quë'rona saiyeque pa'iji. Jaje pa'ina, më'ë ñno pa'i do'ire Maija'quëpi si'aohua'ire më'ë ja're yohuë pa'icohua'ire huasoja'quë api, ju'ñere.

²⁵ Jaje pa'iyë sëte ëjaohua'i tutu mañare hue'ejë'ë, yë'ë cato Maija'quëpi i case'ejë ñacajja'quë api cuasayë, cui'ne huññaë quëase'ejë pa'ye pa'ija'coa cuasayë.

²⁶ Mai cato saodohuëna yohuëse'e ju'a huesëcna, tumasicohua'i pa'ija'cohua'i a'ë.”

²⁷ Tutupi tutu saosicohua'ipi jai asi tsiaya Adriaticore huahuahuë, jopo ñami pa'i maca, catorce mu'seña pa'i maca ja maca, ñami jopo pa'i maca yohuë ñajë sacohua'ipi jë'nërepa yeja t'i'añë cuasahuë.

²⁸ Asani huaiñere cuëcujëna, treinta y seis metros paji'i, huaiñe. Pa'ina, ai seña maca sani tujupë cuëcujëna, veintisiete metros paji'i.

²⁹ Pa'ina, jai quëna pëana ju'a huesë ma'ñe cajë ca'rajë yo sëtijëja'a cuatro quëna ca'huanoa jëo dësohuë, iti dëquëco naupa ja'ñere. Yo'ojë esa ñatama'coni cuasahuë.

³⁰ Iti yohuë sacohua'ire papi yahuerepa jai huëre jëo sañu'u cajë ea du'iona, jëa yohuëre a'ri yohuëre tsiayana casa huahuoñu'u cajë yo'ohuë, quëna ca'huanoare corohuë quë'rona jëa dësoñu'u cajë yo'oyeje pa'ye yo'ohuë.

³¹ Yo'ojëna, Pablupi quëapi, Capitánre cui'ne i soldado paire ñeje caquë:

“Iye yohuë sacohua'ipi iye yohuëre pa'ima'pë pa'ito mësar u huajëcuhua'i pa'iyë peosipi.”

³² Jaje caquëna, asani soldado acohua'ipi a'ri yohuë sëa mea tëa jëoreña.

³³ Nata maca Pablupi si'aohua'ire a'o huëopi ñeje caquë:

“Mai catorce mu'seña aima'cohua'i a'ë, mai pa'i ja'ñere huesëjë.

³⁴ Jaje pa'iquëta'are yureta'a aijë'ë, tutu paja'cohua'i, mësar u naña me macajë ne huesëye peoji.”

³⁵ Jaje ca tējini aore ini Maija'quëre seni tējini yëtoni ai huëouña.

³⁶ Ai huëoquëna, ñani quëcojë aore aña.

³⁷ Yohuë pa'icohua'i cato, docientos setenta y seis pai pateña.

³⁸ Ani tējini trigore tsiayana ña'ñe dësofeña, peojaço cajë.

Yohuë Ne Huesëye

³⁹ Nata tomesi maca yohuë sacohua'ipi iti yeja mamire huesëcuhua'i paë'ë. Pa'ijë mejahuëre ñani, jaona së'añu'u cuasajë yo'ohuë.

⁴⁰ Jaje yo'ojë yohuë jëaye sëani huahuasi mea yë'te tëtëni iti hue'ñana quëna ca'huanoa jëa coehuë, cui'ne yohuë tayo peruje joyehuë, iti po'neñeje. Jaje yo'oni tutuquëna, sai cañare mëohuë. Mëorena, yohuëpi mejahuëna tsiojai huëo.

⁴¹ Tsiojaijëna, jai yohuë corohuëpi mejahuëna ju'anëni huesëo. Ja maca yureta'a yo sëtijëja'a joni saco'ë, ai tutu to'acquë ju'ayepi.

⁴² Ja maca soldado paipi cosicohua'ire huani jëoñu'u cajë yo'ohuë, jaohua'ipi mamini catire paja'cohua'i a'ë cuasajë.

⁴³ Jaje yo'ojëna, Capitánpi Pablöre huasosi'i caquë yo'oma'pë pa'ijë'ë, capi. Cani si'aohua'ire cuañepi mamicohua'i cato du'ru du'teni mamijë'ë, caquë.

⁴⁴ Ja jeteyo'je yecohua'ipi yohuë toñana tseani mamijë saijë'ë, capi. Caëna, jaje yo'ojë si'aohua'i huajëcuhua'i yejana t'i'ahuë.

28

Malta Saodohuëre Pa'iyë

¹ Si'aohua'i yejana de'huë t'lasicohua'i pa'ijë ja saodohuë mami asahuë, Malta.

² Si'aohua'ire yëquëre iti maca pa'icohua'ipi de'oye yo'ohuë. Jaje yo'ojë toa suani dani cuijê'ë, cahuë. Ja mu'se cato ocoquë sësëye pa'iji. Jaje pa'ina, si'aohua'ire huëohuë, cuija'cohua'ire.

³ Ja maca Pablo ja'ju jeca mañare co'eni suaquëna, toapi uquëna, etacopi, aña cuco'ë, jëtëna.

⁴ Pablo jëtëna añaapi cuni decona, ñani iti maca pa'icohua'i sa'ñe cahuë:

“Iquë paire huaiquë pa'ima'quë, jaje pa'ipi jai tsiaya mamini jëasiquë pa'itoje, ja yë'ta'api ite de'oye pa'iyë peoyerepa Maija'quëpi yo'oma'quë.”

⁵ Pablopi añaare toana ya'cue toni ti a'si ju'ñe peoyerepa paji'i.

⁶ Pa'ina, si'aohua'i je sa'yëhua cotoja'quë api, panita'a huajërepa juni taji'a'quë a'ni cuasajë utehuë. Utejëna, ai yo'oye paquëna, ña jujani tiñe cuasaye ponani Diusu api, cahuë.

⁷ Yëquë pëa sito quëno macare Publio hue'equë jai tsio paji'i. Jaë cato saodohuë ëjaërepa paji'i. Jaëpi yëquëre i huë'ëna de'oye pëpani tres mu'seña aqoquë ñacaji'i.

⁸ Jarote Publio pëca ja'quë suña dahuëna cui'ne tsie ëta dahuë coni ju'iquë paji'i. Pa'ina, Pablopi cacani ñani Maija'quëre seni tējini ite jëtëpi patoquëna, co'yapi.

⁹ Co'yaëna, asani ite saodohuë acohua'ipi jai pai ju'icohua'ipi daë'ë. Daijëna, si'aohua'ire jujupi.

¹⁰ Jaje jujuquëna, ñani sihuajë ai de'oye yo'ohuë. Yo'ocohua'ipi yequë yohuëna aya mëni sai huëo maca yëquë saijë ai ja'ñe cui'ne si'aye jopo caraye isihuë.

Pablo Romana Tj'añe

¹¹ Toaso ñañëohua'ire saodohuë pani tējini yureta'a jai yohuëna ayamë'ë, Alejandría acona, oco tëcahuë pa'ina, pëasicona, Castor cui'ne Póluz diusuohua'i a'ë cajë nesicohua'ipi quë'iona ayamë'ë.

¹² Aya mëni saicohua'ipi Siracusana t'lahuë. Tj'ani toaso mu'seña pëahuë.

¹³ Pëasicohua'ipi tsiaya tëtëpaja'a saicohua'ipi Regiona t'lahuë. Tj'ani ñatasi mu'se saijëna, huë'ehuë t'e'tepi ai tutu ju'api. Jaje ju'acquëna, saicohua'ipi se ñatasi mu'se t'lahuë, Puteolina.

¹⁴ Tj'ani jarona ñahuë, Maija'quë do'icohua'ire. Ñajëna, jaohua'ipi pëajë'ë cajëna, siete mu'seña pëani paë'ë. Pani saicohua'ipi yureta'a Romana t'lahuë.

¹⁵ Yëquë saiyë tsoe asani pa'icohua'ipi Maija'quë do'ijëpi sañope dani t'lahuë, yëquëre. Forona Apio quë'rona, toaso cono ucu huë'ña pa'i huë'ña, ja Romarepa t'ama'në. Ja maca Pablo ña huajëni sihuaquë Maija'quëre de'oji caquë pëpapi.

¹⁶ Jaje Romana t'asi maca ëjaohua'ipi te'i pa'ijaquë Pablo cani te'e soldadore ite ñaja'quëre nehuë. Neni te'ire pëpahuë.

Romare Pablo Pa'iyë

¹⁷ Toaso mu'seña Roma pëani pa'iquëpi Pablo jëjo saopi, judío pai ëjaohua'ire soija'cohua'ire. Soina, judío pai tsi'sirena, capi:

“Do'ijërepa yë'ë judío paire co'aye sañope yo'oma'quë a'ë, cui'ne ja'në aiohua'i case'eje sañope yo'oma'quë a'ë. Jaje pa'iquëta'are yë'ëre Jerusalénre pa'ina, tseani romano paina isihuë.

¹⁸ Isirena, jaohua'ipi si'aye yë'ë yo'ose'e seni asa tējini huani jëoñe peoquëna, etoñu'u cahuë.

¹⁹ Cajëna, judío paipi asani ësehuë. Èsejëna, sei'ë. Jaje pa'ito romano pai ëjaëre papi Césarpi yë'ë yo'ose'e asani ne de'huajaquë caquë, nuñerepa yë'ë paire sañope caye peoquëta'a jaje cahuë.

²⁰ Jaje pa'ina, mësarute soihuë, ñaquë coca caji'cohua'ini, yë'ë iye maca tseja cuañosiquëpi quëna me së'i pa'iyë, mai Israel pai utejê pa'iyere cuasa do'ire.”

²¹ Jaje caquëna, iohua'ipi cahuë:

“Yëquë më'ëre sañope cajë toyase'e ñama'cohua'i a'ë, Judea pa'icohua'i toya daose'e cui'ne jaropi do'ijërepa judío pai daisicohua'ijë më'ëre co'aye yo'oquepi api cayeje pa'ahuë'ë.

²² Jaje pa'ina, yëquë asaye yëyë, më'ë cuasayere. Yëquë iño asajë pa'iyë, si'a huë'ña pa'icohua'ipi huajëya'yere sañope cajëna.”

²³ Jaje cani iti tsi'sija'a mu'se ca nëohuë ca nëosicohua'ipi jai pai tsi'sihuë, Pablo pëani pa'i huë'ñana. Tsi'sirena, Pablopi nea huë'ña huëosiquëpi neatorepa quëa tējipi ma'tëmo pa'i te'te ayere, Maija'quëre quëacaicohua'i toyase'epi cui'ne Moisés cuañese'epi cono iñoquë quëapi, Jesús ayere care paji cajë sehuojajë caquë.

²⁴ Jaje caquë quëaquëna, yecohua'ipi Pablo caye sehuocaë'ë, yecohua'ipi sehuocaiye pahuë.

- ²⁵ Jaje yo'ojë te'e cuasaye peoquëna, sai huëohuë. Sai huëojëna, Pablopi capi:
 “Maija'quë de'o joyopi nuñerepa capi, mësarü aipëre ìte quëacaiquë Isaiás yë'opoja'a ñeje:
- ²⁶ Sani quëajë'ë, ja daripë paire.
 De'huarepa asanije asa tì'añe paja'cohua'i a'ë.
 De'huarepa ñanije ña tì'añe paja'cohua'i a'ë.
- ²⁷ Iohua'i cuasajë pa'iyepi cara huesësico pa'i do'ire,
 Cajonoaje ta'pise'ere hue'eyë.
 Cui'ne ñaco caje sïose'ere hue'eyë, ñaño pañë.
 Asayeje pajë, cui'ne jaje pa'iquë cuasajë asa tì'añe pajajë caquë nëina,
 Cui'ne yë'ëna co'iyë pajëna, yë'ëpi iohua'ire jujucaiye pajaquë cajë jaje yo'oyë.
- ²⁸ Jaje pa'ina, yure iyere asajë'ë, iye Maija'quë huaso cocare judío pai peocohua'ina quëaye pa'iji. Jaohua'ita'a de'oye asacaija'cohua'i a'ë.”
- ²⁹ Jaje Pablo caquëna, judío paipi pëijë sañope cajë saë'ë.
- ³⁰ Pablopi jaronä caya ometëcahuëa pëani paji'i, i pa'i huë'e do'i ìpi saiquë. Jarore pa'i si'aohua'ire ìte do'i saicohua'ire de'oye pëpaquë yo'opi.
- ³¹ Yo'oquë pa'i Maija'quë cuäñe te'te ayere ca'raye peoyerepa quëaquë cui'ne Èjaë Jesucristo ayere ye'yapi, yecohua'ipi ti josa yo'oma'pëna.

ROMANOS

Pablo Romano Sehuosicohua'ire Toyaye

¹ Yë'ë Pablo, Jesucristo jo'yaë'ë. Maija'quëpi yë'ëre soini cui'ne j jëjo daoquëre nepi, yë'ëre j huaso cocare quëaja'quëre.

² Maija'quëpi ja huaso coca ai tsoe ca nëoquëna, ire quëacaicohua'ipi j de'o toya pëpëna toyaahuë'ë.

³ Maija'quë mamaquë Jesucristo ayere Jesucristo pai de'oni judío pai ëjaë David tsëcapë aquë paji'i.

⁴ Pai pa'iquëta'a Maija'quë mamaquë tutu quë'ire papi asayë, j de'o joyo tutupi yo'oquëna, ju'lisiquëpi huëni iñouna.

⁵ Jaje pa'ina, Jesucristo do'ipi Maija'quë yëquëre j mamipi j jëjo daocohua'ire nepi, si'a yeja pa'icohua'ipi sehuoni cui'ne j case'ere necaicohua'i pa'ijajë caquë.

⁶ Mësaruje jaohua'i acohua'ipi Maija'quë soisicohua'i pa'iyë. Jesucristo tsecohua'i pa'ijajë caquë.

⁷ Si'aohua'i Roma daripë acohua'i Maija'quë soisicohua'ire caquë toyayë, mësarute. Maija'quë oi soipi, mësarupi ina jsisicohua'ipi de'oye pa'ijajë caquë. Soisicohua'ipi de'oye pa'ijë'ë, Diusu Maija'quëpi cui'ne Jesucristopi de'oye pa'iyë isiquëna.

Romana Pablo Do'i Sai Ëaye

⁸ Du'ru macarepa Jesucristo do'ire yë'ë ja'quëre sihuayë, si'aohua'ire mësaruni cuasaquë. Mësarü Maija'quëre cuasajë pa'iyë si'a huë'ña pa'icohua'ire de'oye quëajëna, sihuayë. Sihuaquë de'oji cayë, Maija'quëna.

⁹ Yë'ë si'a joyorepa cuasaquë Maija'quëre necai pa'iyë, j mamaquë cocarepa quëacaiquëpi. Maija'quë api, iti ñasiquë si'anë yë'ë mësarute cuasaquë seccaiye.

¹⁰ Si'anë Maija'quëre señë, j yëyepi pa'ina, yë'ë jaro do'i sasi'i caquë.

¹¹ Jaje pa'ina, cöcaiye yëyë, mësarute joyo pa'iyë, ai jerepa tutu quë'iohua'i pa'ija'cohua'ire.

¹² Ñeje caquë cayë: Maija'quëre mai cuasayere sa'ñe cöcaiye caquë yë'ëpi mësarü cuasayere se cöcaina, mësarupi yë'ë cuasayere cöcaijë'ë. Jaje yo'ojë sa'ñe cöcaiye pa'iji.

¹³ Maija'quë do'ijë yë'ë mësarü quë'ro sasi'i si'anë caquëta'a yureje ja yë'ta'a saiye pañere asajë'ë caquë quëayë. Hueare tëayeje pa'ye mësaruja'a Maija'quë joyo ayere sani tëasi'i caquë cuasahuë, yequë huë'ña judío peocohua'ija'a tëayeje pa'ye.

¹⁴ Jaje pa'ina, yë'ë sehuosi do'ire tañe asacohua'ire, hoesëcohua'ire, ëjaohua'ire cui'ne ëjaohua'i peocohua'ire, si'aohua'ire quëaye pa'iji.

¹⁵ Jaje yo'oquë cui'ne mësarü Roma pa'icohua'ireje Maija'quë coca quëacaiye yëyë.

Maija'quë Coca Tutu Quë'i

¹⁶ Maija'quë huaso coca quëaye yë'ëre huajëya'ye nëiñe paji. ¿Maija'quë tutu quë'i cocarepa me yë'ëre huajëya'ye nëico'ni? Si'aohua'ire ite sehuocohua'ire huaso ja'ñe a'ë, judío paire cui'ne judío pai peocohua'ireje.

¹⁷ Jaje pa'ina, necaire paye pa'iji cuasa do'ire Maija'quëpi nuñerepa pa'icohua'ire neñere quëaji, de'o cocapi: "Nuñerepa pa'iquë cato, Maija'quëpi necaire paye pa'iji cuasayepi pasipi" caji tsoe toyase'e.

Do'i Quë'iohua'i Pa'iyë

¹⁸ Iohua'i co'aye yo'oyepi Maija'quë coca ye'yayere sañope yo'oyë. Jaje yo'osicohua'ire Maija'quëpi ma'tëmore papi iohua'i yo'osi do'i co'ayerë papi sai ja'ñe jëjo dao ja'ñere iñopi, maire.

¹⁹ Jaohua'i tsoe asayë, ta'ñe Maija'quë ayere. Jaje pa'ina, ipi jaohua'ire du'ru iñopi, j ayere ña ja'ñe.

²⁰ Si'aye iye yeja pa'iyë ipi de'huapi. I de'huani pa'i macapi huëoni j nese'ere ñajë Maija'quë pa'iyë asayë, ite ñama'pë pa'inije. Jaje pa'ina, Maija'quë tutu quë'ipi cui'ne ti pani huesëquë pa'iyë asajëta'a de'oye yo'oye pasi do'ire, ca de'huani jëa ti'añe peoji, jaohua'i.

²¹ Jaje Maija'quë pa'iyë asacohua'ipi Maija'quëre papi cajë ite oiye pahué. Cui'ne yequeje de'ocuëre papi cayë pahué. Co ai jerepa yeque ti do'i peoyere cuasahuë. Cui'ne iohua'i huesë joñoapi nea huë'ñana ne huesëhuë, co'a joñoa hue'e do'ire.

²² Jaje pa'ina, ta'ñe pa'iohua'i a'ë cacohua'ita'a coa ai jerepa huesëohua'i pa'iyë.

²³ Maija'quë de'ocuërepa pa'iquëta'are tiñere señë, ju'icohua'ijë pa'iohua'ire de'huase'ere, paije pa'ire, pi'aje pa'ire, nëicohua'ijë pa'ire cui'ne añaje pa'ire de'huase'ere.

²⁴ Jaje pa'ina, señajë mësarü yëyeje yo'ojë pa'ijë'ë caquë jeocopi, Maija'quë. Jaje caquë jeocouna, huajëya'ye sa'ñe yo'ohuë, ìohua'ì capëje ti oiye peoyerepa.

²⁵ Nuñerepa Maija'quë cocare asaye yëma'pë coa ai jerepa cosoyere asahuë. Cui'ne jaje yo'ojë Maija'quë de'huasi co'amañare sei'ë, de'oquëre pa'ë cajë. Maija'quëre pare sema'pë cui'ne Maija'quëre pa'ë caye pahuë. Maija'quë cato ti de'oquëre pa'ë caye pa'iji, si'anë. Jaje pa'ijaquë.

²⁶ Jaje pa'ina, Maija'quëpi jeocopi, co'aye si'sire yëcohua'ini coequë. Jaje pa'ina, nomiohua'ije Maija'quë cuañese'e jeoni sa'ñe nomiohua'ija'a ëmëre yo'oyeje yo'ohuë, si'si.

²⁷ Cui'ne jaje ëmëohua'ije nomiohua'ire yo'oye jeoni sa'ñe ëmëohua'ija'a yo'ohuë. Ëmëohua'ipi huajëya'ye yequë ëmëohua'ini yo'o do'ire ìohua'ì capëapi ai yo'oyë, ìohua'ì co'aye yo'o do'ire sai cuañojë.

²⁸ Jaje pa'ina, ìohua'ìpi Maija'quëre asaye coeye sëte, ije ìohua'ìre jeocopi, joyo huesëohua'ì pa'ijë ìohua'ì yëyeje co'ayere pa'ijajë, caquë.

²⁹ De'oye nuñerepa pa'iyë peocohua'ìpi co'ayese'epi tímësicohua'ìpi pa'iyë, si'si yo'oye, nomi yëye, ëa ña'ñe jaiye tayo yo'oye. Co'amañare ëa ñajë co'aye cuasaye, huani jeoñe, uihuaye, cosoye, co'a merepa co'acohua'ìpi cui'ne co'a coca carojaicohua'ì pa'iyë.

³⁰ Yecohua'ini co'acohua'ì a'ë cayë, Maija'quëreje coecohua'ì a'ë, josa yo'ocohua'ì a'ë, coa pa'ipi ne tì'a'ne pa'iji cuasacohua'ì a'ë, cui'ne yë'ëpi jerepa pa'ì a'ë cuasacohua'ì a'ë. Co'ayere ai jerepa se cuasa huëocohua'ìpi cui'ne pëca ja'quëohua'ìreje de'oye sehuoma'cohua'ì a'ë.

³¹ Yëhuoye asa tì'a'ne coecohua'ì a'ë. Ìohua'ì ca nëose'eje yo'o tì'ama'cohua'ì a'ë. Ìohua'ì sihuama'cohua'ì a'ë. Yecohua'ìreje sa'ñope yo'ose'ere sai de'huama'cohua'ì a'ë. Ai yo'ocohua'ìre taye pa'ìohua'ìre yecohua'ìre ñama'cohua'ì a'ë.

³² Jaohua'ì cato Maija'quë cuañese'e si'aye asacohua'ì a'ë, iye yo'osicohua'ì pani do'ì quë'ìohua'ìpi pa'ijë jüni huesëye pa'iji case'eje. Jaje asacohua'ìta'a ai jerepa co'ayere yo'ojë pa'iyë. Cui'ne yecohua'ìpi co'aye yo'ojëna, sihuajë yëjë ña'ñë.

2

Maija'quë Nuñere Papi Ca Huesoye

¹ Yequë yo'ose'ere ña tējini co'aye yo'oque api ca huesoque pani ca de'huani jëa tì'a'ne peoji. Më'ëpi yequë yo'ose'ere ña tējini co'aye yo'oque api ca huesoque pani, më'ëja'a co'ye ca huesoye pa'iji, më'ëje cui'ne yo'o do'ire.

² Jaje pa'ina, asayë, mai Diusupi pai yo'oyere ña tējini ì coca cayeye pa'ye nuñerepa ca huesoja'quë api, ja co'ayere yo'osicohua'ìre nejoñe pa'iji ca maca.

³ Jaje pa'ina, më'ëpi cuasani Maija'quë pai ñape yo'ose'e ña tējini ca hueso mu'se tì'a'ena, yecohua'ìre tayoyë, cuasaquëpi cui'ne më'ëpi ìohua'ì yo'oyeje yo'oque pani çjëaja'quë a'ë, cuasaquë? Jëaye peoji.

⁴ ¿Më'ëre ponañere caquë Diusu dahuëre quëcoquë yo'oqueña, ì oi yo'oyere asama'ë huesëquë coeyë, më'ë?

⁵ Jaje pa'iquëta'are më'ë joyo jëa do'ire më'ë pa'iyë ponëma'ë coequë pa'ë, më'ë. Jaje yo'oque ai jerepa më'ë nejo cuaño ja'ñere tsi'so tímëñë, më'ë Maija'quë pai ñape yo'ose'e ña tējini ca hueso mu'se tì'a'ena, sai ja'ñere më'ë yo'ose'eje pa'ye.

⁶ Ja maca ìpi pai ñape yo'ose'eje pa'ye saija'quë api.

⁷ De'oye yo'oyere yo'o jujama'cohua'ìpi ëja deoyere cui'ne ì de'oye pa'iyere cui'ne ju'ì ma'ñere co'esicohua'ìni Maija'quëpi ti pani huesëyere isija'quë api.

⁸ Isiquëta'a yecohua'ìpi ìohua'ìse'e cuasajë nuiñere sehuoma'pë coa co'ayere tuiyë. Jaohua'ìre cato Maija'quëpi pëi nejoja'quë api.

⁹ Si'aye co'aye yo'ocohua'ìre ai yo'oye cui'ne oiye pasipi, du'ru macarepa judío pa'ipi jeteyo'je judío pai peocohua'ìje.

¹⁰ Jaje pa'iquëta'are Maija'quëpi de'oye yo'osicohua'ìre cato sihuaye, cui'ne ëja deoyere cui'ne de'oye pa'iyere isija'quë api. Du'ru macarepa judío paini jeteyo'je judío pai peocohua'ìreje isija'quë api.

¹¹ Jaje pa'ina, Maija'quë cato icohua'ì yecohua'ì a'ë caquë yo'oma'quë api, si'a yë'quë maca ñaquë api, si'a paire.

¹² Jaje pa'ina, Moisés cuañese'ere asama'cohua'ìpi co'aye yo'ocohua'ì pa'itoje ja yë'ta'a nejoja'cohua'ì a'ë, Moisés cuañese'e asama'cohua'ìre. Cui'ne Moisés cuañese'e asasicohua'ìta'a co'aye yo'osicohua'ìre nejoñe pa'iji, Moisés cuañese'e ca do'ire.

¹³ Cuañese'ere coa asacohua'ì cato, nuñerepa pa'icohua'ì peoyë. Cuañese'ere yo'ocohua'ì cato nuñerepa pa'icohua'ì a'ë ca huesoye pa'iji.

¹⁴ Judío pai peocohua'ì cato toya cuañese'eje ti peoyë. Jaje pa'ìohua'ìta'a cuañese'e pacohua'ìpi yo'oyeje pa'ye yo'ojë pa'iyë, ìohua'ì cuasase'epi. Jaje yo'ojë ìohua'ìpi ìohua'ìre cuañëne neñë.

¹⁵ Jaje pa'ina, iohua'i yo'oyepi iñoñë, iohua'i joñoare cuañese'e pa'iyë paye. Jaje pa'ina, iohua'i joñoa cuasayepi caja'coa, de'oji më'ë yo'ose'e panita'a co'aji, më'ë yo'ose'e. Jaje cani iñoji, cuañese'epi joñoare pa'iyë.

¹⁶ Cui'neje iohua'ire caja'quë api, Maija'quë ca hueso mu'se pa'ina. Ja mu'se cato Maija'quëpi Jesucristo ja're si'a pa'i yahue yo'ose'e ña tējini ca huesoye pa'iji, yë'ë de'o cocarepa quëase'eje pa'ye.

Judío Pa'i Cui'ne Moisés Cuañese'e

¹⁷ Më'ëpi judío pa'i pa'ima'quëje ñani caquë jerepa pa'i a'ë cuasaquëpi, Moisés cuañese'ere asaquëpi, Maija'quëre pare payë caquë sihuaquëpi,

¹⁸ Maija'quë yëye ta'ñe asaquëpi, cui'ne cuañese'epi de'oyerepa ti'añere ye'yesiquëpi,

¹⁹ yecohua'i ñaco ca peocohua'ije pa'iohua'i pa'icohua'ire ye'yaquëre pa'ë cuasaquëpi, cui'ne nea hue'ñaje pa'i hue'ñare pa'icohua'ire de'oyepi miacaiyeje pa'ye yo'o iñoquëre pa'ë cuasaquëpi,

²⁰ cuañese'e pacohua'ipi, ta'ñe asaye cui'ne nuñerepa yo'oyere ye'yaye payë cuasaquë huesëcohua'ire ye'yaquë pa'iquëpi cui'ne tsije pa'iohua'ire quëa ti'añë cuasaquëpi.

²¹ Jaje pa'iquëpi ye'yaquë a'ë cuasaquë pani çme yo'oquë më'ëja'a co'ye ye'yama'quë'ni? Jare më'ëpi co'amaña yahue i ma'ñe a'ë quëaquëta'a çcui'ne me nesi'quë më'ëpi co'amaña yahue imaquë'ni?

²² Yequë nomiore yo'oma'ë caquëta'a, çme yo'oquë më'ëpi jaje yo'oquë'ni? Cui'ne më'ëpi coa de'huasicohua'ire ñani coequëta'a çme nesi'quë iohua'i se hue'ña pa'i co'amaña yahue imaquë'ni?

²³ Maija'quë cuañese'ere pare pacohua'ipi pa'iyë caquëta'a, mësarupi cuañese'ere de'oye sehuocaima' do'ire yecohua'ipi Maija'quë co'aquë api cayë.

²⁴ Jaje yo'oye pa'ina, ñare paquë toyase'e caji: "Judío pa'i peocohua'i co'aye cayë, Maija'quëre, mësarupi co'aye yo'o do'ire."

²⁵ Jaje pa'ina, më'ëpi cuiri ca'ni tēasiquëpi Moisés cuañese'ere si'aye sehuocaito cōcāiji, më'ë yo'ose'e. Jaje pa'iquëta'are më'ëpi cuañese'ere sehuocaima'quë pani ca'ni tēama'quëje pa'i pa'iyë pa'iji.

²⁶ Jaje pa'ina, tēama'quëta'a si'aye cuañese'ere yo'oni ca'ni tēase'eje pa'i pa'iyë pa'iji.

²⁷ Jaje pa'ina, i ca'nihuë tēama'quëta'a, cuañese'ere si'aye sehuoquëna, ja yo'oyepi më'ëni co'aye yo'oquëre iñoja'quë api, toyase'e paquëta'a cui'ne ca'ni tēasiquëta'a sehuoma'ë pa'isiquëre.

²⁸ Judiorepa pasi'i caquë coa ëmëje'ese'epi yo'ojë ti'añe peoji. Cui'ne nuñerepa cuiri ca'ni tēaye cato ëmëje'epi yo'oye peoji.

²⁹ Jaje pa'ina, judiorepa cato pa'iyë pa'iji nuñerepa sa'nahuëre papi. Cui'ne cuiri ca'ni tēase'epi sa'nahuë joyore pana tēasiquëje pa'i pa'iyë pa'iji. Coa cuañese'epi ti'añe peoji. Maija'quë joyo neñe a'ë, iye cato. Jaje pa'ina, iye cayeje ne cuañosiquë cato Maija'quëre papi de'oquë api caquë ña nëosiquë api, pani pa'i mañapi.

3

¹ Jaje pa'ina, çiquere do'i paquë'ni, judío pa'i pa'iyë cui'ne cuiri ca'ni tēasicohua'i pa'iyë?

² Ja cato jaiye cōcāiye pa'iji, du'rurepa Maija'quë judío pa'ina i coca de'hue pacaija'cohua'i a'ë caquë isisi do'ire.

³ Jaje pa'iquëta'are jaohua'i judío acohua'ipi nuñerepa yo'oyere yo'o jujani jētoje Maija'quë cato i ca nëose'ere jare yo'o ti'aquë pa'iji.

⁴ Maija'quë cato i coca nuñerepa cayeje pa'ye yo'o ti'aquë api, si'a pa'i coa cosocohua'i pa'itoje. I cato cosoma'quë api. Jaje pa'ina, toyase'e caji:

Nuñerepa pa'iquëre iñoñe pa'iji, më'ë case'epi.

Cui'ne yecohua'ipi më'ëre ña tējini ca hueso maca më'ëpi de'oquërepa etaja'quë a'ë.

⁵ Mai tayo yo'oyepi Maija'quë nuñe yo'oyere de'oyerepa iñojë pa'ito Maija'quë mai tayo do'ire nejoquë pani Maija'quë nuñe yo'oma'quëpi nejoji. Çjaje caye pa'iquë? Pani, pa'i caye ayepi caye a'ë.

⁶ Jaje caye peoji. Maija'quëpi nuñe yo'oma'quë pani, si'a pa'i tayo yo'ose'e ña tējini çme pa'i yo'oyere ca huesoye pa'iquë'ni?

⁷ Jaje pa'iquëta'are yë'ë cosoyepi Maija'quë nuñerepa pa'yere ai jerepa de'oye iñoaiye pa'ito çme neni yë'ëre tayoquë api caye'ni?

⁸ Jaje pa'ito çme yo'oquë co'ayere yo'oma'quë'ni, de'oyepi pa'ija'core? Iye cato yecohua'ipi cayë, maire. Co'aye cuasajë sañope cacohua'ini co'aye yo'ojë de'oyere ti'añe pa'iji ye'yayë cayë, maire. Jaje cacohua'ire nuñerepa yo'oquë nejoñe pa'iji.

Si'ahua'i Do'i Quë'iohua'ipi Pa'iyë

⁹ ¿Jaje pa'ito mai judío paipi jaohua'i seña maca de'ocohua'ire pa'ë cuasajë pa'iyë? ¡Pani! De'ocohua'i peoyë. Tsoe mai judío paipi de'ocohua'i pa'i ma'ñe iñoñuë. Jaohua'i ja're si'a yë'quë maca co'ayepi pacona, pa'iyë.

¹⁰ Jaje pa'ina, toyase'e caji:

Te'i macaje ti peoji, de'oquë.

¹¹ Asani pasi'i cacohua'ijë peoyë.

Peoyë, Maija'quëre co'ecohua'ijë.

¹² Si'aohua'i tayo sani huesësi'cohua'i a'ë. Si'aohua'i do'i peocohua'i a'ë, ti coçaima'cohua'ipi. De'oye yo'ocohua'i, te'i macaje ti peoji, de'oye yo'oquëje.

¹³ Jaje pa'ina, si'aohua'i tërëhuëa cato paire tasico de'hua sïoma'coje pa'io, coa nejo cocare etaye.

Si'aohua'i tsemeñoapi coa cosoyë.

Aña tsmajaje pa'yepi si'aohua'i yë'opga pa'iyë.

¹⁴ Yequëre ai yo'o huãno'i co'ayese'e yecohua'ire cayë, cui'ne sëjeñese'e.

¹⁵ Paire esa huani jeoñese'e yëcohua'i a'ë.

¹⁶ Si'aohua'i co'aye yo'oyepi ai yo'oye cui'ne nejoñe isiyë.

¹⁷ Cui'ne ñama'pë pa'iyë, de'oye pa'i ma'arepa.

¹⁸ Jaje pa'iohua'ipi ti ca'raye nëima'ëna, Maija'quëre cuasama'pë pa'iyë, a'ri mañaje.

¹⁹ Si'aye tsoe huë'ña Moisés cuañese'e judío pai cuañese'e pacohua'ipi si'aye yo'oye pa'iji caji cajë asayë, mai. Jaje pa'iquëta'are iohua'i tayo do'i ca de'huani jëaye peosipi. Maija'quë pai ñape yo'ose'e ñani ca hueso mu'se t'i'asi maca si'aohua'i iye yeja acohua'i ca hueso cuañoja'cohua'i a'ë.

²⁰ Jaje pa'ina, cuañese'ere sehujë yo'ocohua'i cato Maija'quë ja're cõni pa'iyë t'i'añe paja'cohua'i a'ë. Cuañese'epi mai tayose'ere iñoji.

Maija'quëre Cuasayepi Huaso Cuañoñe Pa'iji

²¹ Yure cato Maija'quë nuñerepa pa'iohua'ire de'ocohua'ire pare neñere iñoji, cuañese'e cayere yo'oma'ë, tirona se õani. Iye cato Maija'quëre quëacaicohua'i toyase'ere cui'ne Moisés cuañese'e toyase'ere ñajë asayë, i jaje yo'oye.

²² Jaje pa'ina, Maija'quë iquë jerepa pa'ire cuasama'quëpi i nëñerepa pa'iyere isiquë api, coa si'aohua'i Jesús ire papi cuasacohua'ire.

²³ Jaje pa'ina, si'aohua'i tayo yo'ocohua'ire sëte si'aohua'ire Maija'quë de'oyerepa t'i'añe caraji.

²⁴ Jaje pa'ijëta'are Maija'quëpi oi nuñerepa pa'iohua'ire nepi, i coa isiyepi, Jesucristo do'ipi huasoquë.

²⁵ Jaje pa'ina, Maija'quëpi Cristo ju'ini tsie jëosi do'ipi pai co'aye yo'oye saï de'huaye nepi. Ja saï de'huayere t'i'añe pa'iji. Jesuni necaiquëre papi asa do'ipi. Cui'ne tsoe acohua'i tayo yo'ose'ere coa sa tëto saima'ë paji'i, Maija'quë. Jesús tsiese'epi saï de'huapi. Jaje yo'oquë i nuñerepa pa'iyere cui'ne i quëcose'ere iñoji.

²⁶ Iñoñi yureje Diosu nuñerepa pa'i a'ë caquë iñoquë yo'opi. Yëquëje cui'ne Jesús tsiese'epi Jesure ire papi cajë asacohua'ire nuñerepa pa'iohua'ire nequë a'ë caquë iñoquë yo'opi, Maija'quë.

²⁷ ¿Yure jerore pa'ico'ni, mai jerepa pa'iohua'i a'ë cuasaye? Tsoe peoco. ¿Me yo'oco peoco'ni? Maija'quëre necaiquëre pare cuasa do'ire peoco, pani cuañese'ere yo'o do'ire.

²⁸ Maija'quëre necaiquëre pare cuasaquëni nuñerepa pa'i api ca huesoye pa'iji, Maija'quëpi cuañese'e yo'oma'quë pa'itoje. Jare tsoe asayë, mai.

²⁹ ¿Mësarupi cuasato Maija'quë judío pai Diosuse'e pa'iquë? ¡Pani! Judío pai peocohua'ijë Diosure payë, ite.

³⁰ Jaje pa'ina, yequë Diosu peoji, te'i api. Jare ipi paire nuñerepa pa'iohua'ire ca huesoye pa'iji, ca'ni tëasicohua'ire cui'ne pa'cohua'ireje, coa si'aohua'i ite necaiquëre pare asacohua'ini.

³¹ Jaje pa'ito ¿coa mai ite necaiquëre pare asayepi ja'në cuañese'e jëocoye pa'iquë, coçai ma'ñe de'huani? ¡Pani, jaje yo'oye! Coa ai jerepa yureta'a cuañese'ere de'oyere pa'ë cacajë yo'oyë.

4

Abraham Yo'ose'epi Iñoñe

¹ ¿Iquere mai ai Abraham t'i'aë'ni, i yo'o do'ipi? I ayere cañu'u, yure.

²⁻³ Toyase'e caji: “Diusupi Abrahamre nuñerepa pa'ire ca huesopi, Abrahampi Diosuni ire papi caquë cuasa do'ire.” I yo'o do'ipi nuñerepa pa'i pa'iyë Abraham t'i'añe papi. T'i'asiquë pani jerepa pa'i a'ë cara'pi. Yure cato Maija'quë ña huë'ñana jaje ca t'i'añe peoji.

⁴ Co'amaña necaiquëre sañe cato coa isise'e peoji, nesi do'ire sañe a'ë.

⁵ Jaje pa'iquëta'are co'amaña nesi do'ire peoquëpi Maija'quëni nuñerepa pa'i ca hueso cuañoñe pa'iji. Coa ite ire papi cuasa do'ire co'aquëre nuñerepa pa'iquë api, ca huesoquëni cuasa do'ire. Jaje yo'oye pa'iji.

⁶ Maija'quëpi yequëre ñani i yo'ose'ere cuasama'ë nuñerepa pa'ire ca huesoquëpi ai sihuaji. Davidje cui'ne capi, toyase'epi.

⁷ I case'e cato caji ñeje:

Sihuacohua'i pa'iyë, Maija'quëpi iohua'i co'aye yo'ose'ere oni yejesicohua'ipi, cui'ne iohua'i co'aye yo'o do'ire coa sai tōsicohua'ipi.

⁸ Sihuaquë pa'iyë, Ëjaëpi co'aye yo'ose'ere cama'ëna, sai tōsicohua'ipi.

⁹ ¿Jaje pa'ito iye sihuaye ca'ni téasicohua'ise'ere sihuaye pa'iquë? Páni. Ca'ni téama'cohua'ije ja sihuaye payë. Tsoe maipi asahuë. Toyase'e cato caji, Diusupi Abrahamre nuñerepa pa'ire ca huesopi, Abrahampi Diusuni ire papi caquë cuasa do'ire.

¹⁰ Jaje pa'ito ¿ite je yëhua nuñe pa'iquë api, Abrahamre ca'ëni, i ca'ni téasi jeteyo'je? Páni ja yë'ta'a téama'në jaje ca nëopi.

¹¹ Ca nëosiquëpi jeteyo'je, ca'ni téa cuaño'pi, Maija'quë cuañequëna. I ca'ni téase'epi iñoñe a'ë, Maija'quëpi téama'quë pa'inë nuñerepa pa'iquë api, ca huesose'ere. Cui'ne Abraham cato téama'cohua'ipi Maija'quëre necaiquëre pare cuasacohua'i pëca ja'quë api. Jaje pa'ina, Abraham cuasase'ejë cuasacohua'ire Maija'quëpi nuñerepa pa'iohua'ire ca huesoji.

¹² Ca'ni téama'quë pa'inë Abraham Maija'quëre necaiquëre pare cuasase'ejë pa'ye ca'ni téasicohua'ipi cuasacohua'i pëca ja'quë api.

Maija'quë Ca Nëose'ere T'i'añere Quëaye

¹³ Maija'quë Abrahamre cui'ne i tsëcapë acohua'ire iye yejare isija'quë a'ë ca nëoni, ca nëoma'ë paji'i, Abrahampi cuañese'ere yo'o t'i'a do'ire. Coa ai jerepa ca nëopi, Abrahampi Maija'quëni necaiquëre papi cuasa do'ire. Ja do'ire Abrahamre nuñerepa pa'ire ñaquë Diusu isisi ca nëopi.

¹⁴ Jaje pa'ina, cuañese'e caye yo'o t'i'acohua'ipi Maija'quë ca nëose'ere t'i'añe pa'ito, Maija'quëre necaiquëre papi cuasayepi do'i peoye patira'pi, cui'ne Maija'quë ca nëose'epi do'i peoye ne huesëra'pi.

¹⁵ Cuañese'e cato ai yo'o ja'ñere isiji, Maija'quë sai de'huaquëna. Cui'ne cuañese'epi peoquëna, ¿Me saño'pe yo'oye pa'iquë'ni?

¹⁶ Maija'quë ca nëose'e cuañese'ere pacohua'ise'e t'i'añe peoji. Cuañese'e peocohua'ije t'i'añe pa'iji. Jaje pa'ina, Abraham tsëcapë acohua'ipi t'i'añe pa'ijaquë cani coa do'i peoye i ca nëose'ere isiyë pa'iji, Abraham cuasase'ejë pa'ye cuasacohua'ini. Jaje pa'ina, Abraham mai pëca ja'quë api.

¹⁷ Toyase'epi caji: “Jai pai pëca ja'quëre yë'ëpi nehuë, më'ère.” Jaje Diusu ca nëouña. Abraham cato Maija'quëre ju'isicohua'ire pa'iyë isiquë api asapi.

¹⁸ Cuasaquëpi ñani uteye peotoje Abraham cato ca nëose'erepa pa'ija'coa cuasaquë utequë paji'i. Jaje pa'ina, jai pai pëca ja'quë de'opi, Abraham. Maija'quë ite ca nëose'ejë pa'ye t'i'api. Ja ca nëose'e cato caji: “Jai pai pa'ija'cohua'i a'ë, më'ë tsëcapë.”

¹⁹ Ca nëose'ere asaquëpi cien ometëca paye ja'i maca pa'ina, Zara i paco i cōni aiohua'i pa'inije Abraham tsj paye peoji asaquëta'a necaiye pa'iji cuasase'e coa ne huesoma'ë paji'i.

²⁰ Jaje pa'ina, Maija'quë ca nëose'e jëa coeye papi. Coa case'e a'ë cuasaye papi. Coa ai jerepa pa'i ja'ñere pa'ë cuasapi. Jaje cuasaquëpi ai jerepa cuasare paquë de'opi. De'osiquëpi Maija'quëre de'oquëre pa'ni caquë sihuapi.

²¹ Maija'quë si'aye ne t'i'añe tutu paquëpi i ca nëose'ere neja'quëre papi cuasapi, jëa coeye peoyerepa.

²² Jaje pa'ina, Maija'quë nuñerepa nequë api cuasa do'ire nuñerepa pa'ire ca huesopi.

²³ Abrahamre Maija'quë nuñe pa'ire ca huesopi cajë toyase'e Abrahamse'ere cajë toyaye pahüë, mairejë cajë toyase'e a'ë.

²⁴⁻²⁵ Jaje pa'ina, maire nuñerepa pa'iohua'ire nesi'i caquë mai do'ire jucacani huëji'i, Jesús. Jaje pa'ina, mai Ëjaë Jesure ju'isiquëpi huëisiquëni ire papi cajë cuasacohua'ire Diusupi nuñerepa pa'iohua'ire ca huesoji, maipi ite necaire paquë api cuasa do'ire.

5

De'oye Pa'iyë

¹ Pa'ire paji cuasa do'ire Maija'quë maire nuñe pa'iohua'ire ca huesopi. Jaje pa'ina, Maija'quë ja're cōni de'oye pa'iyerepa t'i'ahuë, asajë pa'iyë, mai Ëjaë Jesucristo do'ire.

² Cui'ne mai Ëjaë Jesucristo do'ipi de'hue t'i'ahuë, Maija'quë i oi pa'i hue'ñarepa yure sihuajë pa'iyë. Maija'quë de'oyerepa pai ñape pa'ija'cohua'i a'ë cuasajë ute jujama'pë pa'iyë.

³Ja yë'ta'a ai yo'oyeje pa'iji. Jaje tì'aruje sihuayë, ai yo'oyepi quëcojë dahuëre pa'iohua'ire de'oye.

⁴Quëcojë dahuëre yo'oyepi mai tì'añe pa'iji, neñasicohua'irepa pa'iyena. Neñasicohua'irepa pa'iyepi jëa coeye peoyerepa utejë pa'iyena tì'añe pa'iji, mai.

⁵De'o joyo j'isiquë yo'oyeja'a Maija'quëpi mai joñoana i oiyere isi tímë huesoji. Jaje pa'ina, mai jëa coeye peoyerepa utejë pa'iyë coa teaye ute tayoye peoji.

⁶Jaje pa'ina, co'ye huasoye peoquëna, ne tì'ama'cohua'i pa'i do'ire Cristo jucacaji'i, iti macarepa tì'aëna, co'acohua'ini caquë.

⁷A'jiñe peoji, yequëni jucacaiye. Nuñe pa'ire pani jucacasi'i caquë yo'oquëje peoji. Coa te'i pati'ñe pa'i api, ai de'oquërepa do'ire caquë jucacaiquë.

⁸Jaje pa'iquëta'are Maija'quë cato j' oiyë ñnopi, maire, ja yë'ta'api co'acohua'i pa'itoje Cristo maire jucacaiyepi.

⁹Jaje pa'ina, Cristo Jesús ju'isi do'ipi maire nuñerepa pa'icohua'ire ca huesopi. Jaje pa'ina, yure cato jerepa Jesús oi necai do'ire tēji mu'serepa Maija'quë pēi nejoquëna, jëaja'cohua'i a'ë, mai.

¹⁰Mai ite sañope yo'ocohua'i pa'i macata'a Maija'quë maire j' mamaquë ju'i do'ipi j' ja're de'oye pa'iyë nepi. Jaje nesiquëpi yure cato jerepa Cristo huajëquërepa pa'iyepi huasoja'quë api, maire, tsoe ñpi de'oye pa'iyë sēte.

¹¹Cui'ne jase'e pa'iyë paji. Maija'quëre sihuayë, Cristo Jesús do'ire ñni pacacaijë. Jaje pa'ina, Cristo do'ipi j' ja're con de'oye pa'iyë tì'ahuë.

Adán Cui'ne Cristo

¹²Te'i ëmëpi co'aye yo'o huëopi. Ja yo'o do'ire juni huesëye huëopi. Jaje pa'ina, si'aohua'i juni huesëye pa'iji, si'aohua'i co'aye yo'ocohua'i sēte.

¹³Ja yë'ta'a cuañese'e peo'në co'aye yo'oyepi tsoe paji'i, iye vejare. Pa'ina, cuañese'e peoquëna, co'aye yo'ocohua'ire sañope cayë peopi.

¹⁴Jaje pa'iquëta'are Adán pa'inëpi Moisés pa'inëna si'aohua'i juju huesëahuë'ë, Adán Maija'quë cuañese'ere sehuoma'ë yo'ose'eje pa'ye yo'oma'cohua'ita'a co'aye yo'ocohua'ipi. Adán cato Jesucristo daija'quëje pa'i paji'i.

¹⁵Jaje pa'iquëta'are Maija'quë isiyepi Adán co'aye yo'ose'e tēto saise'ere pa'ë. Te'i Adán co'aye yo'osi do'ire jai pai jujuhuë. Jaje pa'ina, Jesucristo do'ipi Maija'quë jai pai de'oye pa'i ja'ñere, huasoyere coa isiyepi jerepa pa'ye a'ë.

¹⁶Adán co'aye yo'ose'epi maire necaiye peoji. Maija'quë isise'epi jaiye necaiye pa'iji. Te'ipi te'ore co'aye yo'o do'ire maire nejoñe pa'iji. Maija'quë isise'e cato jaiye co'aye yo'osicohua'i pa'itoje nuñerepa pa'iohua'ire necaiye a'ë.

¹⁷Ju'ñe je'quë te'i ëmë co'aye yo'osi do'ire tutu papi. Jaje pa'ye jerepa tutu paja'cohua'i a'ë, huajëyerepa pa'iyere Jesucristo te'i do'ire Diosupi nuñerepa pa'icohua'ire ca huesocohua'ipi.

¹⁸Jaje pa'ina, Adán j' co'aye yo'osi do'ipi si'a paire ne huesëja'cohua'ire nepi. Cui'neje pa'ye yo'oquë Jesucristo nuñerepa yo'oyepi si'aohua'i de'oye ti ne huesëye peoye de'oye pa'i ja'ñe necaji'i.

¹⁹Ñeje caquë cayë: Te'i de'oye sehuocaima'ë pa'isi do'ipi, si'aohua'i co'acohua'i pa'ë. Jaje pa'iquëta'are, te'i de'oye sehuocaiquë pa'isi do'ire jai pai nuñe pa'iohua'irepa pa'iyë tì'ahuë, Jesucristo do'ipi.

²⁰Jaje pa'ina, Maija'quëpi cuañese'e isipi, co'ayepi ai jerepa pa'ija'quë caquë. Jaje jaiye co'aye pa'itoje Maija'quë oiyepi ai jerepa jaiye pa'iji.

²¹Ja'në co'ayepi cato pai ëjaërepaje pa'ye paji'i, paire cuañequë juni huesëyena saquëpi. Yure cato Maija'quë oiyepi nuñerepa yo'oyeja'a pai ëjaërepaje pa'ye de'opi, Jesucristo yo'o do'ipi, ti pani huesëyena saja'quë caquë.

6

Cristore Sehuosicohua'i Pa'iyë

¹¿Jaje pa'ito me caja'cohua'i a'ni? ai jerepa co'ayere yo'oñu'u, Maija'quë oiyere jerepa ññoja'quë api caquë.

²¡Pani jaje cayë! Tsoe mai co'aye yo'oye jeosicohua'i cato ju'isicohua'ijë pa'yepi pa'iyë. ¿Me jaje pa'ito ja yë'ta'api co'aye yo'ojë pa'iyë'ni?

³Oco do maca Cristo Jesús ja're tsioni pa'iyena cacajë j' ju'ise'eje pa'ye ju'ë, mai. Mësarujare tsoe asayë.

⁴Jaje mai oco do maca ju'isicohua'ire Cristo ja're te'le ta cuañosicohua'ijë pa'iohua'i pa'iyë. Ja maca Cristore pëca ja'quë j' de'o tutupi yo'oquëna, Jesús huëise'eje pa'ye cui'ne maije huëyë pa'iji, huajëye pa'iyena.

⁵ Jaje pa'ina, Cristo ju'ise'eje pa'yena tsiosicohua'i sête, cui'ne i huëise'eje pa'ye maipi huëye pa'iji.

⁶ Co'ayere ëjaëje pa'ire pajë necaiyere cui'ne mai paise'e yë tuture nejose'e pa'lïjaquë cajë Cristo ja're que cuañoscicohua'ipi pa'iyë asayë, mai.

⁷ Jaje pa'ina, ju'isiquë cato co'ayepi jo'ya nesiquë peoji.

⁸ Jaje pa'ina, Cristo ja're te'e ju'isicohua'i pani i ja're conï pa'lïja'cohua'i a'ë cuasayë.

⁹ Tsoe maipi asajë pa'iyë, Cristo te'e juni huesësiquëpi tïjupë juni coñe pase'e. Ju'iñe ite tïjupë quëcoye peoji.

¹⁰ Co'a tutupi naë payere ti nejoquë Cristo juji'i. Jaje ju'isiquëta'a i huajëquë pa'iyepi Maija'quëre pacacajï.

¹¹ Jaje cui'ne ju'isicohua'ije pa'i pa'lïj'ë, co'aye itire yo'oma'pë cajë, co'aye yo'oyepi pa'itoje. Jare cuasajë huajëcohua'irepa Maija'quëre pacacajï'ë, mai Èjaë Cristo Jesús ja're pa'icohua'ipi.

¹² Jaje pa'icohua'i sête mësarü co'ayepi cuañe cuañosciquëje pa'i pajë'ë, capë yëyere yo'oma'pë cajë.

¹³ Yureta'a mësarü capëare isima'pë pa'lïj'ë, co'ayere yo'oja'co cajë. Mësarü capëare ju'isicohua'i huëiscicohua'ije pa'icohua'ire Maija'quëna isijë'ë, de'o nuñerepa yo'oyere nejajë cajë.

¹⁴ Co'aye yo'oyepi yureta'a ëjaë cuañëjeje pa'ye maire cuañe cuañone peoji, Moisés cuañëñepi maire meñe cuañe cuañone peo do'ire, coa Maija'quë oiyepi meñe pa'i do'ire.

Jo'yaohua'i Pa'ye Ayere Quëaye

¹⁵ ¿Maija'quë oi ñacaiyere meñe pa'lïjë cuañese'e meñe peo do'ire co'ayere yo'ojë pa'iyë pa'iquë? Páni. ¿Me neni jaje yo'oye'ni?

¹⁶ Jaje pa'ina, mësarupi tsoe ta'ñe asayë. Jo'yaë cato ëjaëna isisiquëpi i cuañëñere sehuocaija'quëpi pa'iji, cajë. Jaje pa'ina, ëjaëre necaicohua'i cato sehuocaiye pa'iji, iohua'i ëjaëni. Jaje pa'ye cui'ne co'aye yo'oyere sehuocacohua'i cato co'ayere ëjaëre payë. Jare sehuocaiye cato ju'iñena saye a'ë. Ja yë'ta'a Maija'quëre sehuocaiye cato nuñerepa pa'iyena saye a'ë.

¹⁷ Ja'në co'ayepi jo'ya nesicohua'ipi paë'ë, mësarü. Pa'isicohua'ita'a Maija'quë ye'yayena isisicohua'ipi si'a joyorepa ja ye'yayere sehuohuë. Jaje pa'i do'ire Maija'quëre sihuaquë de'o'ji cayë, ite.

¹⁸ Yureta'a co'ayere ëjaëre peocohua'ipi Maija'quëre necaiyena, jo'yaohua'i de'ohuë, nuñe pa'iyere yo'oñu'ü cajë.

¹⁹ Mësarü ta'ñe asa ja'ñere caquë coa pai cayere papi cayë. Ja'në mësarü co'ayena isisicohua'ipi co'ayere necajë paë'ë, co'ayere yo'ojë, co'ayere mësarü capëpi necaise'eje pa'ye. Yureta'a nuñe pa'iyena mësarü isiyë pa'iji, Maija'quë yëyere yo'ocohua'i pa'lïja'cohua'ipi, ina isisicohua'ipi.

²⁰ Mësarü co'ayepi cuañescicohua'i pa'i maca, nuñerepa pa'iyere necajë pa'iyë pahüë.

²¹ ¿Iquere de'oye pa'iyë isi o'ni, ja co'aye yo'oyepi, yure mësarü huajëya'ye asa cuañonepi? Ja cato ju'iñena saye pa'iji.

²² Jaje pa'isicohua'ita'a yure, de'oye pa'iyë. Co'ayepi jo'ya nesicohua'ire paye paquëna, Maija'quëre necaiyena cacani pa'iyë. Jaje pa'ina, mësarute de'oyerepa pa'iyë necajï. Iyeta'a Maija'quëna isisicohua'ipi pa'lïjë cui'ne tëjyere papi ti pani huesëyere payere necajï.

²³ Co'aye yo'osi do'ire co'ayepi sañe cato ju'iñe a'ë. Jaje pa'iquëta'are Maija'quëpi mai Èjaë Jesucristo do'ipi maire coa isiyë cato ti pani huesëye a'ë.

7

Huejayeje Pa'ye Quëase'e

¹ Maija'quë do'lïjë, mësarü Maija'quë cuañese'ere asacohua'ipi asayë, mai huajëcohua'i pa'i macase'e cuañëñepi sëasicohua'ije pa'iohua'ire paye paire.

² Jaje pa'ina, nomio huejasico cato cuañese'e do'ire io ëjëre sëasicoye pa'io pa'ico, ïpi ju'ima'quëpi pa'ina. Èjëpi ju'isiquë pa'itota'a, cuañese'epi sëase'eje pa'ye peoji.

³ Jaje pa'iquëta'are ïopi ja yë'ta'a ëjë pa'ina, yequë ëmëna tsiojaisico pani ëmëre yo'oco. Jaje pa'iquëta'are ëjëpi ju'isiquë pa'itota'a yequë ëmëre tsiojani paye pa'iji, ëmë yo'oco peoco ja maca.

⁴ Jaje cui'ne mësarujë Maija'quë do'lïjë, Cristo ju'i do'ipi ju'isicohua'ije pa'iohua'ipi pa'iyë, cuañese'epi naë pacona pa'isicohua'ipi, cuañese'ere ëjëje pa'ire pasicohua'ipi yure cato, yequë ëmëni payeje pa'iohua'i a'ë, Cristo ju'isiquëpi huëisiquëre pani, Maija'quë ña hue'ña de'oyere pare mai yo'ojë pa'lïja'cohua'ipi.

⁵ Ja'në mai yëyere yo'ojë pa'icohua'i paë'ë. Pa'lïjë mai co'aye yëyere cuañese'epi ne sëtouna, ai jerepa mai yëyere yo'ohuë. Ja yo'oyepi ju'iñena sapi, maire.

⁶ Cuañese'epi sēasicohua'ijē pa'iohua'i paë'ë. Yureta'a joyesicohua'ijē pa'iohua'i pa'iyë, mai ju'isi do'ipi. Jaje pa'ina, cuañese'epi jo'ya nesicohua'i peocohua'ipi Maija'quë joyo huajëye pa'iyē isiyepi Maija'quëre necaiyë. Necaima'pë pa'iyë, cuañese'e cayere.

Co'aye Yo'oyepi Pa'iyē, Yë'ëna

⁷ Jaje pa'ito çme caja'cohua'i a'ni, cuañese'e co'aye a'ë caye? ¡Pani jaje caye! Yë'ë quëaquëna, asajë'ë, yë'ë yo'ose'ere. Cuañese'epi yecohua'i co'amaña yëcaima'ë caye pato yë'ë asaye para'huë, yecohua'i co'amaña yëcaiyē co'ayere papi pa'iyē. Cuañese'e ëse do'ipi co'aye yo'oye asahuë.

⁸ Yecohua'i co'amaña yëcaima'ë pa'ijë'ë cayeja'a co'ayepi yë'ëre jerepa co'ayere yëyena ne sêto. Jaje cuañese'epi caye pato co'aye yo'oye ju'ise'eje pa'ye a'ë, itise'e pani.

⁹ Te'repa tsoe yë'ë cuañese'e asama'quëpi coa paë'ë. Pa'ina, cuañese'epi tütani co'aye yo'oyere ne co'yao.

¹⁰ Ne co'yacona, yë'ëpi juë'ë. Ju'ina, cuañese'e pa'iyē isisi'i ca nëota'a yë'ëre ju'iñena sapi.

¹¹ Cuañese'epi yo'oma'ë cacona, co'aye yo'oyepi jerepa co'ayere cosoco. Co'ayepi yo'oma'ë cuañese'e cayeja'a ju'iñere isio.

¹² Jaje pa'ina, ja cuañese'e cato Maija'quë tse a'ë, nuñere pa'ë cui'ne maire çocaiye a'ë, si'aye Maija'quë cuañese'e cato de'oyere pa'ë.

¹³ Ja de'oyepi yë'ëre ju'iñena saye pao. Pa'cona, co'ayepi yë'ëre cato ju'iñena sao. Sacona, ja do'ire asahuë, co'aye pa'iyē. Cui'ne asahuë, cuañese'e ëseyeja'a co'ayepi ai co'ayerepa pa'iyē.

¹⁴ Jaje pa'ina, asayë, mai. Cuañese'e cato joyo aye a'ë cajë. Jaje pa'iquëta'are yë'ë cato pai a'ë, tara cui'ne ça quë'i a'ë. Jaje pa'ina, co'ayepi jo'yaëre paji, yë'ëre.

¹⁵ Jaje pa'ina, asa t'ama'ë pa'iyë, yë'ë yo'oye. Yë'ë yëyere yo'oma'ë ai jerepa yë'ë coeyere yo'oyë.

¹⁶ Jaje pa'ina, yë'ë yo'oye coeyere yo'oni ja maca cuañese'e de'oyerepa pa'iyē asayë.

¹⁷ Jaje pa'ina, yë'ë pa'ima'ë pa'iyë, iti yo'oquë. Yë'ëre sa'nahuë co'aye pa'iyepi yo'oji.

¹⁸ Jaje pa'ina, yë'ë çapë pa'ise'e yë'ë pa'iyē ti de'oye peoji, yë'ëre. Jaje pa'ina, de'oyere yo'osi'i cuasaquëta'a yo'o t'ama'ë pa'iyë.

¹⁹ De'oye yë'ë yëyere nema'ë, coa ai jerepa yë'ë coeyere nequë pa'iyë.

²⁰ Jaje pa'ina, yë'ë coeyere yo'oni yë'ë pa'ima'ë pa'iyë, iti yo'oquë. Yë'ëre co'aye sa'nahuë pa'iyepi yo'oji.

²¹ Jaje pa'ina, ñeje iye yë'ëre pa'iji, de'oye yo'oye yëquëta'a de'hue co'ayese'ere yo'oyë.

²² Jaje pa'i sête yë'ë cuasaye cato Maija'quë cuañese'ere yëyë.

²³ Yëquëta'are yë'ë çapëpi sañope yë'ë cuasa hue'ñana yo'oco. Ja cato co'ayepi yë'ë çapëre pa'iyepi yo'oji. Japi cose'eje pa'ire paji, yë'ëre.

²⁴ ¡Co'acquëre pa'ë, yë'ë! ¡Nepi yë'ëre ne huasoja'cohua'i a'ni, iye çapë ju'iñena saco aire?

²⁵ Coa Maija'quëse'e ne huasoja'quë pa'iji, Cristo Jesús mai Èjaë do'ipi. Jare asaquë sihuayë. Jaje pa'ito yë'ëpi Maija'quë cuañese'ere sehuocaiye pa'iji, yë'ë cuasayepi. Jaje pa'iquëta'are yë'ë çapëpi co'ayena cuañe cuañosiquëpi jo'yaëje pa'i pa'iyë.

8

Maija'quë Joyo Do'ipi Pa'iyē

¹ De'oji, yure cato Cristo Jesús ja're tsioni pa'icohua'ire ti sa'i de'hua cuañoñe peoji.

² Jaje pa'ina, co'ayepi cui'ne jani huesëyepi jo'yaëre paquëni eto huasopi, yë'ëre, Cristo Jesús ja're tsioni pa'iyepi, joyo pa'iyepi.

³ Moisés cuañese'e cato jaje eto huasoye papi. Paise'e co'aye yo'oyepi neñu'u cajë yo'ojëna, cuañese'epi tutu peoye de'opi. Jaje pa'iquëta'are Maija'quëta'a ne t'api, iye pa'iyere isiquë. Jaje pa'ina, jare ne t'asi'i caquë i mamaquëre pai çapë quë'ere cui'ne coa paije pa'ire jëjo daopi, co'aye yo'o do'ire sa'i tçaijaquë caquë. Jaje yo'oni co'ayere ja çapë do'ija'a nejo huasoye t'api.

⁴ Maipi de'hue Moisés cuañese'ere yo'o t'ajajë caquë pa'icohua'ipi yure mai pa'ima'pë pa'iyë, noni paise'e pa'iyere. Coa ai jerepa yure cato joyo pa'iyepi pa'iyë.

⁵ Jaje pa'ina, paise'e noni pa'iyere pa'icohua'i cato paise'e cuasayere cuasajë pa'iyë. Jaje pa'ijëta'are joyo pa'iyere pa'icohua'i cato joyo pa'iyere cuasajë pa'iyë.

⁶ Jaje pa'ina, paise'e noni pa'iyere cuasayepi cato ju'iñena saye a'ë. Jaje pa'iquëta'are Maija'quë joyo ayere cuasayepi cato de'oye pa'iyena saye a'ë.

⁷ Coa paise'e noni pa'iyere cuasajë yo'ocohua'i cato Maija'quëre sañope yo'ocohua'i a'ë. Jaje pa'icohua'ipi Maija'quëre coecohua'ipi i cuañe sehuojë pani t'añe peoyë.

⁸ Jaje pa'ina, paise'e noni pa'iyere sehuojë pa'icohua'i cato Maija'quë sihuaquë ñañere yo'o t'añe peoji.

⁹ Jaje pa'ina, mēsarū cato paise'e noni pa'iyere sehuoma'pē pa'iyē. Coa ai jerepa Maija'quē joyo cayere sehuocohua'ipi pa'iyē, Maija'quē joyopi mēsaruni pa'ina. Jaje pa'ina, Cristo joyore peocohua'i pani Cristo tsecohua'i peoyē.

¹⁰ Mēsarū ja're cōni Cristopi pa'ito mēsarū joñoa huajēyepi pa'iji, nuñerepa pa' do'ipi. Jaje pa'iquēta'are mēsarū capēa co'aye yo'o do'ire ju'isicohua'ije pa'ye pa'iyē.

¹¹ Cristo Jesure ju'isiquēni huēosi joyopi, ja joyopi mēsaruteje ju'i capē quē'iohua'ireje huēoja'quē api, huajēye pa'iyena, Maija'quē joyopi mēsaruni pa' do'ire.

¹² Jaje pa'ito paise'e noni pa'iyere pa'ima'pē Maija'quē do'ijē. Mai cato joyo cayere pa'iyepa'iji.

¹³ Jaje pa'ina, mēsarupi paise'e yo'ojē pa'iyere pa'ini ju'ija'cohua'i a'ē. Jaje pa'iquēta'are joyopi cōcaina, paise'e yo'ojē pa'iyere nejoni mēsarū pa'ija'cohua'i a'ē.

¹⁴ Si'aohua'i Maija'quē joyopi cuaquēna, pa'icohua'i cato Maija'quē mamajē a'ē.

¹⁵ Jaje pa'ina, mēsarū Maija'quē mamajēre pare ne joyore isi cuañohuē. Jaje pa'ina, ja joyopi mai ja're caquēna, ja'quēre papi cayē, Maija'quēre. Isima'pē jo'ya ne cuañosi joyore, cui'naohua'ipi Maija'quēre ca'raohua'i pa'ija'a joyore.

¹⁶ Maija'quē joyopi mai joyo ja're cōni nuñerepa Maija'quē mamajērepa pa'icohua'i a'ē quēayē, maire.

¹⁷ Jaje pa'ina, Maija'quē mamajē sēte mai si'aye i ca nēose'e paja'cohua'i a'ē, Cristo ja're cōni te'e. Maipi te'e i ja're ai yo'osicohua'i pani, i de'oyerepa jeteyo'je paja'cohua'i a'ē, i ja're cōni.

¹⁸ Yure mai ai yo'oye teaye pa'ye a'ē. Jaje pa'ina, mai ai yo'oyepi cōni ñato peoji, jeteyo'je mai pa'i ja'ñere. Jaje pa'ina, Maija'quē de'oyere papi maini pa'ina, de'ocohua'irepa pa'ija'cohua'i a'ē.

¹⁹ De'hue Maija'quē mamajēre iñoquēna, ñasi'i caco si'a yeja Maija'quē de'huasico ai ña ēa ju'io uteco pa'ico.

²⁰ Jaje pa'ina, si'aye Maija'quē du'ru ne de'huase'e cato carajaise'e a'ē, ju'iñepi, ja'juñepi, cui'ne pu'cayepi pa' do'ire. Maija'quēpi jare caquē yēni ne de'huapi, jeteyo'je yequē mu'se de'oyerepa pa'ija'coa caquē.

²¹ Jaje pa'ina, ju'ijē ja'juñe carajasipi, si'aye Maija'quē ne de'huaquē pa'iyē. Ja do'ire si'a mu'seña Maija'quē mamajē ai yo'ojē pa'icohua'ipi utejē pa'iyē, si'aye de'oyerepa pa'ija'coa cajē.

²² Jaje pa'ina, yurejē mai asayē, si'aye Maija'quē de'huasicopi nomio tsj cōa huēoni ai a'si ju'iñeje pa'ye ai yo'oco oio pa'iyē.

²³ Iye yejase'e ai yo'oye paço maije ai yo'oyē, yequē mu'se pa'i ja'ñere joñoapi oijē. Du'ru pajē pa'ijē'ē caquē de'o joyore isi nēosicohua'ije yequē mu'se de'oyere pare paja'cohua'ita'a ai oijē pa'iyē. Jaje pa'ina, joyore papi ai oijē uteyē, Maija'quē maire i huero mamajēre neja'a macare cui'ne mai huaso cuañohere cajē.

²⁴ Mai yequē mu'se pa'i ja'ñere jēa coeye peoyerepa ute do'ire huasosicohua'i pa'iyē, mai. Jaje pa'iquēta'are paipi i uteyere ña huesoni yequē mu'se pa ja'ñere uteye peoji. Jaje pa'ina, tsoe itire ña huesoni uteye peoji.

²⁵ Jaje pa'iquēta'are mai yure ña ma'ñere ñañu'u cajē uteni dahuēre quēcōjē uteye pa'iji.

²⁶ Jaje cui'ne Maija'quē joyopi cōcaini, mai tutu peoyere. Maija'quēre seña huesēyē, mai. Jaje pa'ina, de'o joyopi ai oi Maija'quēre secacaini, pai yē'opi ca t'i'añe peoyerepa.

²⁷ Jaje seña, Maija'quē sa'nahuē joyorepa cuasaye ñaquēpi i joyo cuasaque seña asaji, joyopi i tsecohua'i pa'i ja'ñere caquē, Maija'quē yēyeje pa'ye seña.

Si'aye Ne T'i'asicohua'i Pa'iyē

²⁸ Jaje pa'ina, i yēyere yo'ojā'cohua'i a'ē caquē soisicohua'ire si'aye tēto saiyepi de'oye pa'i ja'ñere cōcaini'coa, Maija'quē oicohua'ire asayē, mai.

²⁹ Jaje pa'ina, Maija'quē maire tsoe du'ru ña nēopi i mamaquēje pa'iohua'i pa'ija'cohua'i a'ē caquē. Jaje pa'ina, i mamaquē cato sehuosicohua'i maja'yē pa'ija'quē api.

³⁰ Tsoe i ja'nē cuasa nēosicohua'ire Maija'quē soipi. Soisicohua'ireje nuñerepa pa'iohua'ire nepi. Nuñerepa pa'iohua'ire nesicohua'ireje i de'oyerepa pa'iyere isipi.

³¹ Jaje Maija'quēpi maire de'oyerepa necaisiquēre ¿nepi maire sañope yo'o t'i'añe pa'iquē'ni? Ti peoji, sañope yo'o t'i'acquē.

³² Maija'quē i mamaquēre papi mai do'ire jucacaijaquē caquē ¿sisiquē me isiye paquē'ni, i mamaquē ja're co'amaña pa ja'ñe? Si'aye isija'quē api. ¿Me paquē'ni?

³³ Jaje pa'ito Maija'quē soisicohua'ire ¿nepi co'acohua'i a'ē caye pa'iquē'ni? Jare coa Maija'quēse'e maire nuñerepa pa'icohua'ire nesiquē pa'iji.

³⁴ Cristo ju'isiquēpi cui'naēpi huēisiquēpi Maija'quē ēja te'tere ñu'i maini caquē pēca ja'quēre secacai pa'ito ¿iquēipi maire nejoñe pa'iji ca huesoye pa'iquē'ni?

³⁵ Jaje pa'ito ai yo'oyepi, co'a ju'ijë oiyepi, sañope yo'oyepi, aïñe peoyepi, ju'iyë peoyepi, ne ju'iñepi, pañita'a juni huesëyepi ¿Cristo maire oiyere nejocaiye pa'iquë? ¡Pañi!

³⁶ Toyase'e cato caji:

Më'ë do'ire si'a mu'seña ne ju'iñere pa'iyë.

Jaje pa'ina, yëi ñamare huai hue'ña sase'eje pa'iohua'i pa'iyë.

³⁷ Jaje si'aye iye yo'oye pa'iquëta'are maipi ñese quëcosicohua'irepa pa'iyë, maire oisiquë do'ipi.

³⁸ Jaje pa'ina, Maija'quë maire oiyere nejocaiye ti peoji. Nuñerepa asayë, yë'ë. Ja do'ire ju'iñepi, pa'iyepi, huñiaohua'ipi, cuañecohua'i tutupi, cuañe tutupi, yure pa'iyepi, jeteyo'je pa'i ja'ñepi,

³⁹ Mëñe ayepi, meñe ayepi, Maija'quë de'huase'epi, nejo t'ña peoji, Maija'quë maire oiyere mai Ejaë Jesucristona t'ñase'ere.

9

Israel Paise'ere Maija'quë Joya Nese'e

¹ Nuñerepa cayë, Cristore sehuoquë sëte. Coa cosoma'ë pa'iyë. Jaje pa'ina, Maija'quë joyopi cuasaquëna, yë'ë joyo cuasaye nëiñepi më'ë nuñerepa cuasayë cacaiji, yë'ëre.

² Jaje pa'ina, si'anëpi yë'ë joyo a'siyerepa ai oi pa'iyë.

³ Jaje oi cuasayë, yë'ëpi merepa Cristore hua sani nejo cuañoñere pa'ina, yë'ë pai, Israel tsëcapë cajeohua'ipi jëacaitota'a de'ora'pi, cuasayë. Jaje yo'o do'ipi çocaiye pa'ito yo'ora'huë cuasayeque cuasayë.

⁴ Jaohua'i cato Israel tsëcapë acohua'i a'ë, Maija'quëpi i mamajëre nesicohua'i a'ë. Maija'quë johua'i ja're miañerepa pa'ina, pa'isicohua'i a'ë. Maija'quë cayere johua'ipi de'oye sehuojëna, i çocai ja'ñe ca nëose'e pasicohua'i a'ë. Moisés cuañese'e pacohua'i a'ë. Cui'ne Maija'quë huë'ere ñacaiyere pasicohua'i a'ë. Cui'ne i de'oye ca nëose'e pasicohua'i a'ë.

⁵ Jaohua'i cato mai aipë tsëcapë acohua'i a'ë. Jare ja tsëcapëja'paina Cristoje ai de'opi. Jaë cato Diusu paji'i, si'aye jerepa pa'i. Jaëni de'ouquëre pa'ni caye pa'iji, si'anëpi. Jaje pa'ijaquë.

⁶ Cama'ë pa'iyë, Maija'quë ca nëose'epi t'ña paëna, coa ai jerepa yë'ë cato cayë, si'aohua'irepa Israel tsëcapë acohua'ipi Israel paire peo do'ire.

⁷ Jaje pa'ina, Abraham tsëcapë acohua'i Maija'quë ña hue'ña si'aohua'irepa i mamajë peoyë. Jaje pa'ina, Maija'quëpi capi: "Më'ë tsëcapërepa cato Isaacja'a ai de'ojal'cohua'i a'ë."

⁸ Jaje pa'ina, iyepi maire t'ñarepa quëa iñoji, Maija'quë mamajërepa pa'iyë cato pai tsëcapëja'a t'ña peoye, coa ai jerepa Maija'quë ca nëose'ejaj'a ai de'osicohua'ipi i mamajërepa pa'iyë t'ña.

⁹ Jaje pa'ina, Abrahamre Maija'quëpi ca nëoquë capi: "Zara mamaquëre pajaj'coa, yeque ometëcahuë yë'ë co'i maca."

¹⁰ Iyese'e pa'iyë papi, yequeje cui'ne mai ai Isaac mamajërepa pa'ë, Rebeca caya mamajë.

¹¹⁻¹³ Jaohua'ire Maija'quëpi ja yë'ta'a co'ama'në cui'ne ja yë'ta'a co'aye pañita'a de'oye yo'oma'në Rebecare ca nëopi. Më'ë mamaquë maja'yëpi yo'jeire necaiquë pa'ijaj'quë api. Jaje cui'ne toyase'e caji: "Jacoboni oi, Esauni coehuë." Jaje pa'ina, iye yo'ose'epi Maija'quë i cuasayeje pa'ye yëni yo'oquë sahuapi, johua'i yo'o do'ire cuasama'ë, coa i yë do'ire.

¹⁴ ¿Jaje yo'oquëna, ñani maipi Maija'quë nuiñe yo'oma'quë api caja'cohua'i a'ni? ¿Pañi me jaje caye'ni?

¹⁵ Najë'ë, Maija'quë Moisésre case'ere: "Yë'ë yëquëni oni yejesi'i teaye pa'ire ñani, cui'ne yë'ë yëquëni oi ñani çocasi'i."

¹⁶ Jaje pa'iyë sëte pai yëyepi, pañita'a tutu yo'oyepi t'ña peoji. Coa Maija'quë teaye ñani oi çocaiyepi t'ña pa'iji, i sahuasicohua'i pa'iyë.

¹⁷ Jaje pa'ina, toyase'e caji, Egípto pai ëjaëre, Maija'quë case'ere: "Më'ëre Egípto pai ëjaëre nehuë, më'ëja'a yë'ë tuture iñosi'i caquë, cui'ne si'a hue'ña pa'icohua'ipi yë'ë mamire asajajë caquë."

¹⁸ Jaje pa'ina, Maija'quë cato jare i teaye ñani oi quëni oi quë api, cui'ne jare i yëquëni jëa joyo ne huesoquë api.

¹⁹ Jaje pa'ina, mësarupi caja'cohua'i a'ë, yë'ëre. Cui'ne jaje yo'oquëta'a çme yo'oquë Diusu paipi co'ayë caquë'ni? ¿Nepi, i cuasaquë yo'oye sañope ca t'ña pa'ina?

²⁰ ¿Pai maca më'ë iquë'ni, Maija'quëre sañope ca ja'ñe? ¿Soto cua'coropi iti nesiquëre sañope caye? ¿Me nesiquë yë'ëre co'aye nei'ni? cama'coa.

²¹ Jaje pa'iyë sëte sotopi de'huaquë cato jare i yëyëje pa'ye neñe pa'iji. Jaje pa'ina, jare iti sotopi neñe pa'iji de'o cua'cororepa ëja co'amañase'e nejaj'core cui'ne yeconi si'a co'amaña nerojajaj'core neñe pa'iji.

²² Jaje pa'ina, iohua'i co'aye yo'osi do'ire sai cuañojè nejo cuañoja'cohua'i a'è, co'a cua'conoaje pa'yepi. Jaohua'i josa yo'ojèna, Maija'quèpi ai dahuère quècopi yo'opi, i pèi saifnere cui'ne i tuture iñosi'i caquè.

²³ Jaje yo'o maca maina de'o cua'conoaje pa'iohua'ina i pa'iyè de'oyere pare iñosi'i caquè yo'opi. Jaje pa'ina, maire teaye ñani oni yejepi. Oni yejeni tsoe hue'ñana de'ocohua'ire èja de'huapi, maire, i pa'i hue'ñare çoni pa'ijajè caquè.

²⁴ Jaje pa'ina, Maija'quèpi maire soipi, judío pai acohua'ire cui'ne judío pai peocohua'i acohua'ire.

²⁵ Maija'què quècaiquè Oseas toya pèpè Maija'què capi, ñeje:

Yè'è paire hue'yoja'què a'è, tì pa'isicohua'ini.
Yè'è oima'co pa'isiconi yè'è oicore hue'yosiquè a'è.

²⁶ Cui'ne mèsaru yè'è pai peoyè casicohua'ini,
Jare iohua'ini, Maija'què huajèquèrepa mamajère hue'yoja'què a'è.

²⁷ Jaje pa'iquèta'are Israel pai ayere Maija'què quècaiquè Isaiáspi ñeje capi: "Israel pai tsècapè acohua'ipi jai pai pa'ija'cohua'i a'è, jai tsiaya meja pa'iyèje pa'yerepa. Pa'ijèta'a coa a'ri pai maña jao acohua'ipi huasosicohua'i pa'ija'cohua'i a'è.

²⁸ Jaje pa'ina, Èjaèpi i case'eje pa'ye yo'o tì'aquè i nuñerepa yo'oyepi esa ne de'huaja'què api, si'a yeja pa'icohua'ire."

²⁹ Jare ìpi Isaiás capi, ñeje:

Si'a huiñaohua'i Èjaère papi mai tsire isima'què pa'ito
Tsoe Sodoma cui'ne Gomorra dari nejose'eje pa'ye nejosicohua'i patira'huè.

Judío Pai Cui'ne Maija'què De'o Case'e

³⁰ ¿Jaje pa'ito me cajà'cohua'i a'ni, mai? Iyere asani, judío pai peocohua'ipi nuñerepa pa'iyere tì'ahuè, nuñerepa pa'iyere ti co'ema'cohua'ipi. Coa necaiquère pare cuasa do'ipi tì'ahuè.

³¹ Jaje pa'iquèta'are judío pai cato nuñerepa pa'iyere tì'añu'u cajè cuañese'ere sehuoni tì'añe pa'iji cuasajè yo'ohuè. Yo'ojèta'a tì'añe pahuè.

³² ¿Me yo'ojè pase'eje ñani, iohua'i yo'oyepi tì'añe pa'iji, cuasa do'ire? Coa necaiquère pare ìte cuasama' do'ire tì'añe pahuè, iohua'i yo'o do'ipi tì'añu'u cuasa do'ire. Jaje pa'ina, ju'ahuè, ju'a taçore, quènaona.

³³ Toyase'e Maija'què capi, ñeje:

Yè'èpi Sión cutihuèna quènaore qañè. Jaona mèsaru sañope ju'aja'cohua'i a'è.
Iona quèco paquè cato, huajèya'ye pa'iyè peosipi.

10

¹ Maija'què do'ijè yè'è joyore papi oi Maija'quère señe cato Israel pai mañapi huaso cuañosicohua'ipi pa'ijajè cuasaquè señe a'è.

² Jaje pa'ina, cayè, iohua'i cato Maija'quère necaiye ai yèyè. Jaje pa'iquèta'are iohua'i yèjè yo'oyepi nuñerepa asa tì'ani yo'oyere pa'iyè paji.

³ Jaje pa'ina, Maija'quèpi pai nuñerepa pa'iyè isiquè cajè asa tì'añe pañè. Jaje pa'ina, iohua'i tutupi yo'ojè nuñerepa pa'icohua'i pònèñu'u cajè yo'oyè, Maija'què nuñere pa'iyè isiyere sehuocaima'pè.

⁴ Cuañese'e cayere Cristopi si'aye ne saopi. Jaje pa'ina, Maija'quèpi Cristoja'a nuñerepa pa'iyè tì'añe necaji'i, Cristore sehuocohua'ini.

⁵ Cuañese'ere yo'ojè nuñerepa pa'icohua'i tì'añere Moisés toyapi, ñeje: Cuañese'e cayere si'aye yo'o tì'asiquèpi nuñerepa pa'iyere pa'ija'què api.

⁶ Jaje pa'iquèta'are, coa necaiquère pare cuasa do'ipi nuñerepa pa'icohua'ire neñepi, ñeje: "Mèsaru joñoa cuasama'pè pa'ijè'è. ¿Nepi ma'tèmo mèni Cristore quèrèjani yejana daja'cohua'i a'ni? panita'a,

⁷ ¿nèpi coje sa'nahuère pana cajeni Cristore ju'isiquèni huèoja'cohua'i a'ni?"

⁸ Toyase'e caye cato iye a'è: "Mè'è yè'què macare pare ti de'o coca pa'iji, mè'è yè'opore, cui'ne mè'è joyore." Iye coca cato coa necaiquère pare cuasaye a'è. Ja cuasayere yèquè quèayè.

⁹ Jaje pa'ina, mè'è yè'opopi Jesure yè'è Èjaèpi cani cui'ne mè'è joyopi Maija'quèpi ju'isiquère huèopi cuasaquè asani tsoe huaso cuañosiquè pa'iyè.

¹⁰ Jaje pa'ina, joyopi ìtìre pa'è cuasaquè pani tsoe nuñerepa pa'iquè pa'iji, cui'ne yè'opopi Jesús huasoquè api ìte cajè seni tsoe huaso cuañosiquè pa'iji.

¹¹ Toyase'epi caji: "Ìte nuñerepa pa'iquè api cuasacohua'i cato pañete sehuore'ni caye peosipi."

¹² Jaje pa'ina, peoji, tìñe pa'i judío cui'ne yequè pai. Jaje pa'ina, mai Èjaè si'aohua'i Èjaèpi, jaèpi si'aohua'ire ìte secohua'ire jaiye de'oye pa'iyè isiquè.

¹³ Jaje pa'ina, toyase'e caji: "Si'aohua'i mai Ējaëre secohua'i huasosicohua'i pa'ija'cohua'i a'ë."

¹⁴ Jaje pa'iquëta'are ¿me ite ire pare cuasama'cohua'i pani seja'cohua'i a'ni? ¿Cui'ne me ite sehuoye'ni, i ayere quëaye asama'cohua'i pani? ¿Cui'ne me asaja'cohua'i a'ni, iti coca quëacohua'ipi peoto?

¹⁵ ¿Cui'ne me iti coca quëaja'cohua'ire jëjo sacohua'ipi peoto sani quëaja'cohua'i a'ni? Jaje pa'ina, toyase'epi caji: "Airepa de'oji, de'o cocare quëaja'cohua'ipi titaye."

¹⁶ Jaje pa'iquëta'are, si'aohua'i Maija'quë coca caye asani sehuoma'pë pa'iyë. Isaías toyase'e cayeje: "¿Ējaë, nepi yëquë quëaye asani itire pa'ni caye'ni?"

¹⁷ Jaje pa'ina, ire pare cuasaye cato, de'o cocarepa Cristo ayere quëase'ere cajoro asayeja'a t'añe pa'iji, itire pa'ë cuasase'ere.

¹⁸ Jaje pa'ina, yë'ëpi señë: ¿Asama'pë pate, iti coca quëaye? Pani asahuë, jaohua'ipi. Jaje pa'ina, toyase'e caji:

Iti quëacohua'ipi quëajëna, si'a yeja pa'icohua'ipi asahuë.

Cui'ne coa si'a hue'ña maña iye yeja pa'icohua'ina johua'i coca quëaye t'i'api.

¹⁹ Jaje pa'iquëta'are t'ijupë seni coñë: ¿Israel paise'e jaje pa'ito asama'pë pate? Jaje pa'ina, du'ru macarepa Moisés toyapi, Maija'quë case'ere, ñeje:

Yë'ëpi mësarü oicohua'ire neja'quë a'ë, yecohua'ini necaise'ere ña ëajëna.

Cui'ne mësarü pëicohua'ire neja'quë a'ë, huesëohua'ipi.

²⁰ Ja jeteyo'je Isaías ca'rama'quëpi caji:

Yë'ëre co'ema'pë pa'isicohua'ipi t'ihuë, yë'ëre.

Cui'ne yë'ëre jerore pa'iquë'ni cajë sëma'pë pa'isicohua'ini iñohuë, yë'ë pa'iyë.

²¹ Cui'ne Israel pa'ini Maija'quëpi caquëna, Isaíaspi toyapi, ñeje: "Si'a mu'sepi mësarute soiquë yë'ë jëña ca'cahuë nesiquëpi utehuë, de'oye sehuoma'cohua'ipi cui'ne sañope yo'ocohua'ini."

11

Maija'quë Sahuaye Israel Pa'ire

¹ Yure cui'ne señë, jaje pa'ina: ¿Jaje pa'ito Maija'quë Israel pa'ire i pasicohua'ire jeocou? Pani nejoñe papi. Jare yë'ë i Israel pa'ipi pa'iyë, Abraham tsëcapë aquëpi cui'ne Benjamín pa' aquëpi.

² Ai tsoe jare i Maija'quëpi Israel pa'ire i tsecohua'i a'ë ca huesopi. Jaje pa'ina, yure jeocoma'ë pa'iji. ¿Huesëye mësarü Maija'quëre quëacaiquë Eliáspi Maija'quëre se'i, Israel pa'ire co'acohua'i a'ë cuasaquë se'i case'ere toyase'e quëajji?

³ Sei capi: "Ējaë më'ëre quëacaicohua'ire si'aohua'ire huani jeahuë. Cui'ne më'ëre isijë tëojë se hue'ñaje nejo saohuë. Jaje yo'ojëna, yë'ëse'e te'i maca nëasiquëni cui'ne yë'ëreje huani jeoñu'u cayë."

⁴ Jaje caquëna, Diusupi capi, ite: "Siete mil pa'ire yë'ëre oicohua'ire hua nëohuë, de'huasi diusu Baalre do're ja'rujë sëma'cohua'ire."

⁵ Jaje ja'ñe yo'ose'ëje pa'ye yureje judío pa' acohua'i a'ri ja'i pa' nëahuë, Maija'quë i oiyepi sahuasicohua'i.

⁶ Jaje pa'ina, Maija'quë maire coa isiyepi t'i'añe pa'iyë sëte, pa' tutu yo'oyepi t'i'añe peoji. Yure pa' yo'o tutupi t'i'añe pa'ito Maija'quë oi maire coa isiyë peora'pi.

⁷ ¿Jaje pa'ito me yo'ore'ni? Israel pa' mañapi johua'i co'ese'e t'i'añe pahuë. Pajëna, Maija'quë sahuasicohua'ise'e t'ihuë. Yecohua'ipi jëa joyo ne hueso cuañohuë.

⁸ Toyase'e cayeje pa'ye ñeje: "Diusupi isipi cuasa t'i'a ma'a joyore cui'ne ñaco caje ña ma'ñere cui'ne cajo yacaje asa t'i'a ma'ñere. Jaje pa'ina, yure iye mu'seje jaje pa'iohua'i pa'iyë."

⁹ Cui'ne Davidje capi:

Jare johua'i si'aye payë, cuasayepi co'ye johua'ire ne tãoñe,

Cui'ne huatënëa de'osipi, mësarupi iona ju'ajë si'se cuañosicohua'i pa'ijajë caquë.

¹⁰ Ñaco caje ñama'cohua'i de'ojaj'cohua'i a'ë.

Cui'ne jete në me huesësicohua'i pa'ijaj'cohua'i a'ë, jaiye hue'e do'ire.

Judío Pa' Peocohua'ipi Huaso Cuañone

¹¹ Cui'ne yure señë: ¿Si'aohua'i judío pa' ju'ajë peo hue'ñarepa tome sare? ¡Pani. Jaje yo'oye pahuë! Coa ai jerepa, jaohua'i de'oye sehuoma'pë ne huesë do'ire yecohua'ipi de'hue t'ihuë, huaso cuañone, Israel pa'ipi ñani cui'neje pañu'u cajë oijajë cajë.

¹² Jaje pa'ina, judío pa' co'aye yo'ose'epi si'a yeja pa'icohua'i jerepa de'oye pa'iyë ponëpi, cui'ne johua'i yo'ojë co'a de'ose'epi judío pa' peocohua'i de'oye pa'iyë ponëpi. Jaje pa'iyë sëte judío pa'ipi Cristore sehuoni cui'naohua'ipi caca cõcohua'i pa'ito ai de'oye pa'ijaj'coa, cuasayë.

¹³ Jaje pa'iquëta'are mësarute judío peocohua'ire caye payë, yeque maña. Yë'ëre Maija'quëpi jëjo daopi, judío pa'i peocohua'ina. Jaje pa'ina, yë'ë yo'oye Maija'quë isise'e a'ë asaquë si'a yë'ë tutupi yo'oyë.

¹⁴ Jaje yo'okuëna, mësarupi sehuojëna, ñani yë'ë tsëcapë acohua'ijë ñajë cui'ne ëa ñajë oijë huasosicohua'i pa'ijajë caquë yëyë.

¹⁵ Jaje pa'ina, judío paipi ña'nosicohua'i pa'ijëna, iye yeja pa'icohua'i de'hue Maija'quë ja're de'oye pa'iyë t'i'ñe pa'iji. Jaje pa'ina, merepa pa'ija'coa'ni cui'naohua'ini Maija'quëpi ito, judío paipi sehuojë pa'i maca ai silhuaye pasipi. Ja cato ju'ise'eje pa'iohua'ipi pa'iyena huëiye a'ë.

¹⁶ Jaje pa'ina, pan sëpë aye poni du'ru nese'ere Maija'quëna isito si'a iti sëpëje Maija'quë isise'e pa'iji, de'ocore pare. Cui'ne Olivo soquë yë tsitamopi Maija'quëna isisico pa'ito iti capëaje isise'e pa'iji.

¹⁷ Yecohua'i judío pa'i acohua'i Olivo soquë yë capëa pa'isicohua'ipi t'ë'ca tète cuañoñuë, noni jo ja're pa'icohua'ipi. Jaohua'i peo sa'ro pa'i do'ire mësarupi airo olivo soquë capëje pa'ipi sëo cuañoñuë. Jaje yo'ouna, mësaru de'hue t'i'ahuë, iti tsitapi pa'iyë isiye cui'ne olivo pa'iyepi mësarute pa'iyë isiye.

¹⁸ Jaje pa'ina, cuasama'pë pa'ijë'ë, yë'ë a'ë iti ñërepa capëa jerepa de'okuë. Jaje pa'ina, më'ëpi de'okuë a'ë cuasani, de'hua cuasa ñajajë'ë. Më'ëpi tsita pa'iyë isima'ë pa'iyë caquë coa tsitamooapi më'ë pa'iyë isiye.

¹⁹ Jaje pa'iquëta'a yeque më'ëpi ca'ñe pa'i a'ë: "Jaje pa'ijë'ë, yë'ëpi olivona sëa cuañosiquë pa'ijaquë caquë t'ë'ca tëtëpi jaohua'ire iti capë acohua'ire pare."

²⁰ Ja cayere nuñerepa caye a'ë. Iohua'i ite coa necaiquëre pare cuasama' do'ire t'ë'ca tète cuañoñuë. Jaje pa'iquëta'are më'ë cato ite coa necaiquëre cuasa do'ire de'hue iti ñëre pana tsiosiquë pa'iyë. Më'ë jaje pa'iyë sëtë yë'ë a'ë jerepa pa'i cuasama'ë, coa airepa ca'raquë ñaquë pa'ijë'ë, mësarute t'ë'ca tète cuañoñë.

²¹ Maija'quë iti ñërepa pa'isi capëare t'ë'ca tète jëosiquëme, me paquë'ni, mësaruje.

²² Ñajë'ë. Maija'quë nuñerepa de'oye yo'okuë api. Jaje pa'ita'a nuñe yo'oma'cohua'i cato tuturepa yo'okuë api. Co'aye yo'osicohua'ire saipi, iohua'i yo'osi do'ire. Jaje pa'iquëta'are mësarute de'oye yo'opi. Jaje pa'ina, më'ëpi de'oye i yëyëje pa'iyë pa'iji. Jaje pa'iyë pato më'ëreje cui'ne tëto tējaja'quë api.

²³ Cui'ne yequeje, judío paipi iohua'i jëa coeyere jëoni sehuocohua'i pani, cui'na olivo soquë yëna sëo cō cuañoñë, tujupë. Maija'quëpi pa'iji, tutu cui'naohua'ini sëo cōñe cui'na ñëna.

²⁴ Më'ëre judío peoquëta'are airo olivo soquë capëje pa'ini t'i'ani de'o olivo soquë yëna de sëosiquë i zme neni de'o olivo soquë yë acohua'ire judío paire sëoye paquë'ni? Sëoja'quë api, de'o olivo soquë yëna cui'naohua'ini.

Israel Paire Tëjijerepa Huasose'e

²⁵ Jaje pa'ina, Maija'quë do'ijë, Maija'quë ise'e nesi'i cuasase'ere mësarute quëaye yëyë, mësarupi jerepa ta'ñe asajë pa'iohua'i a'ë cuasama'pë pa'ijajë caquë. Israel pa'i cato jai pai jëa joñoa ne cuañosicohua'i pa'iyë, Israel pa'i peocohua'ipi si'aohua'i Maija'quë ca nëosicohua'ipi cacajajë cajë.

²⁶ Ja maca yureta'a si'aohua'i Israel paipi huasosicohua'i pa'ija'cohua'i a'ë, toyase'e cayeje:

Sión daripëpi daija'quë api, huasoquë.

Dani jaëpi Jacob pa'i co'aye yo'ose'ere nejocaija'quë api.

²⁷ Jaje yë'ëpi iohua'i co'aye yo'ose'ere nejocaisi maca,

Ja maca jaohua'ini caquë iye ca nëose'ere pasipi.

²⁸ Jaje pa'iquëta'are huaso coca asaye coecohua'ipi Maija'quëre sañope yo'ocohua'i a'ë, mësarupi iohua'i coe do'ire de'hue asajajë cajë. Jaje pa'iquëta'are jaohua'i judío paire Maija'quëpi ja yë'ta'a oiji, iohua'i aipëni i tsecohua'ire nesiquë sëtë.

²⁹ Jaje pa'ina, Maija'quë isise'e jioye paquë api cui'ne i soisicohua'ire t'iohua'ire nema'quë api.

³⁰ Ja'ñë tsoe mësarupi Maija'quëre sañope yo'ohuë, de'oye sehuocaima'pë. Jaje yo'osicohua'ini yure judío paipi de'oye sehuocaiye pa do'ire Maija'quëpi mësarute teaye ñani oi cōcaji'l.

³¹ Mësaru ja'ñë de'oye sehuocaiye pase'eje pa'iohua'i a'ë, yure judío paipi. Jaje pa'iyë, Maija'quëpi mësarute teaye ñani oi cōcaji'quë cajë cui'ne iohua'ireje oi ñani cōcaji'quë cajë.

³² Jaje pa'ina, Maija'quëpi caji si'aohua'ire ite de'oye sehuocaima'cohua'ire ne huesopi, si'aohua'ire ipi oi teaye ñaquë cōcasi'i caquë.

³³ ¡Airepa ta'ñe pa'i a'ni, Maija'quë si'aye asaquë pa'iquërepa! I cuasaye asani quëaquëje peoji. Maija'quë yo'okuë pa'iyë asa t'iaquë peoji.

34 “¿Nepi Ëjaë cuasaye asa tì'lañe pa'iquè'ni? Panita'a ¿nepi ìte ñeje yo'ojè'è cajè ye'yaye pa'iquè'ni?”

35 ¿Nepi du'ru Ëjaëre co'amaña isini yure isisi do'ire saijè'è, cuañeñe pa'iquè'ni?

36 Jaje pa'ina, si'aye Maija'què tse a'è, i nesi do'ire. Ini pacacaiji, si'anè. Sihua'yè, Maija'quère jerepa pa'ire. Jaje pa'ijaquè.

12

Maija'quèna Isicohua'i Pa'iyè

1 Jaje pa'iyè sète Maija'què do'ijè mèsarute señè, Maija'què oni yejesi do'ire, mèsaru pa'iyere Maija'quèna isi huesèjè'è, huajèquère pare. Ina isisicohua'ipi pani, Maija'què sihuaja'què api cui'ne ja isiyè cato nuñerepa yo'oye a'è.

2 Jaje pa'ina, mèsarujè pa'ijè'è, iye yeja pai yo'ojè pa'iyere coa ai jerepa jare yo'oma'pè. Mèsaru cuasayere tñe cuasajè pa'iyena ponajè'è, mèsaru pa'iyepi tñe yo'ojè pa'iyè ponèja'core. Ponèona, yureta'a Maija'què yèye asa tì'aja'cohua'i a'è. Asa tì'acohua'ipi pani de'oyere, Maija'què sihuaquè ñañere cui'ne nuñere pare asaye pa'iji.

3 Quèajaquè caquè Maija'què yè'ère coa isipi. Ja do'ire mèsarute cayè, mèsaru aquèpi te'ijè yè'èpi ai asayè cuasayè pajaquè, itì cuasa maña ìpi isiyè ja'i maña cuasaja'què. Jaje pa'ina, Maija'quère necaiquère pare asa do'ire yo'o ja'ñe isise'e ja'ye cuasajè yo'oye pa'iji. Tèto saiperepa cuasato co'aji.

4 Ñajè'è, mai capè yo'o ja'ñe huahuese'e pa'iyere. Si'aye te'e co'amañare yo'oye paji.

5 Jaje cui'ne maije jai pai pa'ijèta'a Cristona tsiosicohua'ipi pa'i do'ire Cristo capè acohua'i pa'iyè. Pa'ijè pai ñape yequèna se tsiosicohua'ipi te'e capè acohua'i pa'iyè.

6 Jaje pa'ina, Maija'quèpi pai ñapere tñe pa'ye yo'o tutu isipi, i yèyeje pa'ye. Jaje pa'ina, Maija'què ayere asani quèa tuture isisiquè pa'ito, quèañu'u coa necaiquère pare mai cuasaye ja'ye.

7 Yecohua'ire cõcai tuture isiquè pa'ito, yecohua'ire de'oye cõcañu'u. Yecohua'ire ye'ya tuture isisiquè pa'ito ye'yayese'e yo'oñu'u.

8 Yo'o jujacohua'ire quèa tuture isisiquè pa'ito quèa huasoñu'u, tutu què'iohua'i pa'ija'cohua'ire. Co'amaña isiquè pani yè'è de'oye yo'oyere ñajè'è caye peoyerepa isiyè pa'iji. Cuañe tuture isisiquè pa'ito de'oyerepa cuasaè yo'ojè'è. Ai yo'ojè pa'icohua'ire cõcaiquè pani sihuaquè cõcaiyè pa'iji.

Sehuosicohua'i Pa'iyè

9 Sa'ñe nuñerepa oijè pa'ijè'è. Co'ayere coejè, de'oyere yo'ojè pa'ijè'è.

10 Sa'ñe oiyè pa'iji, Maija'què do'ijè èaye. Yecohua'ini de'ocohua'ire cuasajè coa tea ju'ìneje yo'oma'pè sa'ñe oijè de'oye pa'ijè'è.

11 Nere pacohua'i pa'ijè'è. Josaohua'i pa'ima'pè pa'ijè'è. Mai Ëjaèni necaijè'è, si'a joyorepa cuasajè toa tsè'ise'eje pa'i joyore papi.

12 Sihua'yè pa'ijè'è, mèsaru yequè mu'se pa'i ja'ñere utejè pa'icohua'i. Ai yo'onije quècojè'è. Jeoma'pè pa'ijè'è. Maija'quère señe si'anè sejè pa'ijè'è.

13 Cõcaijè'è, Maija'què tsècapè acohua'ire, ìohua'ire jopo caraye pa'ito. Mèsarute do'i daicohua'i pa'ito de'oye yo'ojè'è.

14 Mèsarute josa yo'ocohua'ire de'oye pa'ijajè cuasacaijè'è. ìohua'i de'oye pa'i ja'ñere seccaijè'è, pani ai yo'oye pa'ijajè cuasajè señe.

15 Sihua'cohua'i ja're tsioni pa'ijè sihuacohua'i pa'ijè'è. Cui'ne ota oicohua'i ja're pa'ijè mèsarujè oicohua'i pa'ijè'è.

16 Si'aohua'i sa'ñe de'oye yo'ojè pa'ijè'è. Yè'è a'è, jerepa pa'i cuasama'pè pa'ijè'è. Coa ai jerepa teaye pa'iohua'i pa'iyena ìni pa'ijè'è. Ta'ñe pa'iohua'i a'è cuasama'pè pa'ijè'è.

17 Sa'ima'pè pa'ijè'è, co'aye yo'osicohua'ire cui'ne co'ayepi. Coa ai jerepa de'oye cuasajè yo'ojè'è, pai ña hue'ñana.

18 Mèsaru ai cuasayè ja'i maca de'oye yo'ojè pa'ijè'è, yecohua'i ja're de'oye pa'iyere cajè.

19 Maija'què do'ijè maña mèsarupi sa'ñu'u cajè yo'oma'pè pa'ijè'è, co'aye yo'ocohua'ire. Coa ai jerepa Maija'quèpi sa'caija'què api cuasajè pa'ijè'è. Jaje pa'ina, toyase'e caji: “Yè'èpi co'aye yo'ocohua'ire sa'ñe payè, si'seye pa'itoje,” caji, Ëjaère papi.

20 Cui'ne caji jare ìpi: “Mè'ère sa'nope yo'oquèpi a'o èa ju'ito a'ojè'è. Cui'ne cõno èa ju'iquè pa'ito ocua'yè'è. Jaje yo'ojèna, itì sa'nope yo'oquèpi yè'è co'aquère pa'ni cuasaja'què api, huajèya'ye pa'ija'quèpi.”

21 Co'ayena quèco cuañoma'è pa'ijè'è. Coa ai jerepa co'ayere ñese quècojè'è, de'oye yo'oyepi.

13

¹ Si'aohua'i iye yeja cuaeñe òjaohua'ire de'oye sehuocaiye pa'iji. Jaje pa'ina, peoji, coa Maija'què yèma'èna èjaè de'osiquè. Jaje pa'ina, Maija'quèpi iye yeja cuaeñeja'cohua'ire nepi, jaohua'ire.

² Jaje pa'ina, pai èjaohua'i cuaeñeñere sañope yo'oni Maija'què de'oye yo'o ja'ñe caquè jouse'ere sañope yo'oyè. Jaje sañope yo'ocohua'i cato saija'cohua'i a'è, co'ayepi.

³ Jaje pa'ina, èjaohua'i cato pa'ima'pè pa'iyè, de'oye pa'icohua'ipi ca'rajajè cajè. Coa ai jerepa co'aye yo'ocohua'ire yo'o quècoja'cohua'ipi pa'iyè. Mè'èpi èjaohua'ire ca'raye peoye pasi'i cani de'oye yo'oquè pa'ijè'è. Jaje pa'ina, èjaohua'ipi mè'è pa'iyè neñani de'oye pa'iquè api caja'cohua'i a'è.

⁴ Jaohua'i cato Maija'quèni necaijè pa'iyè, mè'è de'oye pa'iyere cajè. Jaje pa'iquèta'are mè'èpi co'aye yo'oquè pani ca'rajè'è. Jaohua'i cato coa hua'ti mèama'cohua'i a'è jare co'aye yo'oquèni sañu'u cajè yo'ocohua'i a'è, Maija'quère necaicohua'i sète.

⁵ Jaje pa'iyè sète de'oye a'è, èjaohua'i cuaeñeñe sehuoye. Pàni iohua'ipi co'aye yo'oma'cohua'ini cajè, coa ai jerepa tayose'e peoye nëina, mai cuasajè pa'iyere cajè de'oye pa'iyè pa'iji.

⁶ Jaje pa'ina, mèsaru pa'i do'i sañè, èjaohua'i Maija'quère necaicohua'ini cajè. Jaohua'i cato jase'e yo'ocohua'i a'è.

⁷ Pa'i do'ire pai ñape sañè pa'ito saijè'è, pai ñapere iohua'ire do'i paye ja'ye. Yeja pa'i do'ire sañè pa'ito saijè'è. Èjaohua'i pa'ito èjaohua'ire ñajè pa'ijè'è. Coa si'aye do'i què'iohua'i pa'ito do'i què'iohua'ire ñajè de'oyerepa iohua'ire cuasajè pa'ijè'è.

⁸ Debe pama'pè pa'ijè'è, yecohua'ire. Coa ai jerepa yecohua'ire oiyere debeje pa'ye pajè'è, yecohua'ire. Jaje pa'ina, coa pàini oiquè pani tsoe cuaeñese'e cayere yo'o t'api, si'aye.

⁹ Cuaeñese'epi caji: Èjère cui'ne nējore pacohua'ipi yecohua'ini yo'oma'pè pa'ijè'è. Huani jeoma'è pa'ijè'è. Yahurepa co'amaña ima'è pa'ijè'è. Èa ñama'è pa'ijè'è. Si'aye iye cui'ne yeque cuaeñese'ere con'i yo'o t'añu'u cani coa mè'è cajeire oijè'è, mè'èja'a co'ye cuasayeje pa'ye. Ja' caye ayere yo'oni pa'ito si'aye yo'o t'añe pa'iji, cuaeñese'e cayere.

¹⁰ Jaje pa'ina, pàire oiquèpi co'aye yo'oye paji. Jaje pa'ina, oiyepi si'aye cuaeñese'e ne t'añe pa'iji, tayoye peoyerepa.

¹¹ Si'aye yure mai pa'i tècahuè pa'iyere ñani cuasajè'è, tsoe sèta maca'è huèò caicohua'i. Yureta'a maire huasoye ai ja'yere pa'iji. Ja'nè so'o macare paji'i, mai itire pa'è cuasajè jì coca asa maca.

¹² Tsoe jai ñamire pa'è. Yure je'nèrepa ñata tōme huèoji. Jaje pa'ina, jeoñu'u, nea huè'ñana co'amaña yo'oye. Jeoni suñañu'u, mia ca'core pana, soldado hua'jo saquè suñañeje pa'ye.

¹³ Nuñe de'oye ñare pajè yo'oñu'u, mu'sere yo'oyeje pa'ye. Cu'ima'pè pañu'u, conore cueperojajè, jaiye ao aijè. Tsi'sini josa pisiye yo'ojè cayere yo'oma'pè pañu'u. Nuñerepa yo'oye pa'ina, coa co'aye si'sire yo'orojajima'pè pañu'u. Coa si'aye co'ayere ye'yesicohua'ipi pa'ima'pè pañu'u. Te'le cuasama'pè do'ire uihuayere pa'ima'pè pañu'u. Cui'ne yecohua'i payere èa ñajè oima'pè pañu'u.

¹⁴ Coa ai jerepa mèsaru cato suñajè'è, Èjaèrepa Jesucristona, ije pa'i pa'ijajè cajè. Jaje yo'oni capè co'aye yèyere ne huasocaiye paja'cohua'i.

14

Cajeire Cuasaye Cato

¹ Jaje pa'ina, Maija'quère necaiquère pare cuasayere joyo tutu carasiquè pa'ito, tsiojè'è, ite, pai cuasase'ere ca huèoni sa'ñe uihuama'pè.

² Ñajè'è, cui'ne iyere, yecohua'i cuasacohua'i pa'iyè. Si'aye aĩñese'e de'oji cuasajèna, yecohua'ipi Maija'què necaiquère pare cuasayere joyo tutu carajacohua'ipi ja'o cui'ne ao, cui'ne ca aĩñe de'oji cuasayè, hua'i cato aima'cohua'ipi.

³ Jaje pa'ina, si'aye aiquèpi yequère hua'i aima'quère co'aye cuasaquè ñama'è pa'ijè'è. Cui'ne iyepi de'oye a'è caquè sahuaquè si'ayere aiquèje cue'cuema'è pa'ijè'è. Si'aye aiquère, cui'ne hua'i aima'quèreje Maija'quèpi tsiosicohua'i a'è.

⁴ Jaje pa'ina, ¿mè'è iquè'ni yequère necaiquèni ñaquè tayo yo'oji caquè yo'o ja'ñe? I èjaèpi ña'ne pa'iji, de'oquè pànita'a co'aquè pa'iyè. Jaje pa'iquèta'are de'oquèrepa pa'ija'què api, mai Èjaè de'oye ne tutu paquère me, me co'aquè'ni.

⁵ Yequeje quèaye payè: Pa'iyè, yecohua'i ai jerepa èja mu'se pa'iji, cuasacohua'i. Cui'ne yecohua'ipi cuasacohua'i pa'iyè, si'a mu'seña cui'ne pa'yese'e pa'iji. Jaje pa'ina, pai ñape itire pa'è cuasase'ere cuasajè pa'iyè pa'iji.

⁶ Iye mu'se éja mu'sere pa'è cuasaquë yo'oquë pani Maija'quëni de'oye yo'oji. Cui'ne si'aye aiquëje mai Éjaëni de'oye yo'oji, Maija'quëre de'oji caquë pépa toquë ai do'ire. Cui'ne hua'i aima'quëje Maija'quëre sei ai do'ire de'oye yo'oji, mai Éjaëni.

⁷ Jaje pa'ina, mai pa'ima'pë pa'iyë, maija'a co'ye pacacaijë. Cui'ne ju'inije ju'ima'pë pa'iyë, maija'a co'ye jucacaijë.

⁸ Jaje pa'ina, mai huajëcohua'i pa'ini pa'iyë, mai Éjaëni pacacaijë. Cui'ne juni huesënije mai Éjaëna jucacaijë. Jaje pa'iyë sête ja pa'inije cui'ne juni huesënije mai Éjaë tşecohua'i pa'iyë.

⁹ Jaje pa'ina, huajëcohua'i cui'ne ju'isicohua'i Éjaë pasi'i caquë Cristo juni cui'naëpi huëji'i.

¹⁰ Jaje pa'iquëta'are žmë'ë me yo'oquë Maija'quë do'iquëre co'aye caquë'ni? žPanita'a me nesi'quë coequë ñaquë'ni? Mai yo'ose'e si'aohua'i Maija'quë ña huë'ñana iñoja'cohua'i a'ë, ipi pai ñape yo'ose'e ñaquë ca huesoja'quëre.

¹¹ Jaje pa'ina, toyase'e caji:

Care payë, caji, Éjaë. Si'aohua'i yë'ë ña huë'ñana do're ja'ruja'cohua'i a'ë.

Cui'ne ja maca si'aohua'i de'oquëre pa'ni Maija'quë caja'cohua'i a'ë.

¹² Jaje pa'iyë sête, pai ñape mai yo'ose'e iñoja'cohua'i a'ë, iti yo'ose'eje pa'ye, Maija'quëna.

Ne Taoñe Pajë'ë, Maija'quë Do'iquëre

¹³ Jaje pa'ina, yecohua'ire señažë cayere jeoni coa ai jerepa iohua'i asase'ere cuasajë de'oyere yo'ojë pa'ijë'ë, Maija'quë do'ijë ne taoja'core nema'pë cajë.

¹⁴ Yë'ë cato asayë, si'aye si'si peoyese'e pa'iyë Éjaë Jesure sehuoquë sête. Jaje pa'ire paji, cuasaquë asayë, iye. Jaje pa'iquëta'are paipi iye si'si a'ë cuasato jare si'si pa'iji, iti jaje cuasaquëse'ere.

¹⁵ Jaje pa'iquëta'are më'ë aiñepi sehuosiquë Maija'quë pa'ire paji cuasayere nejoñe pa'ito më'ëpi ite oiye paquë yo'oyë. Jaje pa'ina, Cristo jucacaisiquëre më'ë aiñepi nejoñe pajaquë caquë pa'ijë'ë.

¹⁶ Jaje pa'ina, sa'ro neocaima'pë pa'ijë'ë, yecohua'ipi co'aye mësaru de'oye yo'ojë pa'iyere cama'cohua'ini.

¹⁷ Jaje pa'ina, Maija'quë cuañe te'te cato pa'ima'ë pa'iji, coa ao aiñepi cui'ne ucuyepi. Coa itirepa cato nuñerepa pa'iyë a'ë, de'oye jo'cua pa'iyë a'ë, cui'ne sihuaye a'ë, Maija'quë joyo pa'i do'ire.

¹⁸ Jaje Cristore de'oye necaiquë pa'ito ja necaiyepi Maija'quë sihuayere neñe pa'iji. Cui'ne jaje pa'ini paije de'o api cajë ñañe pa'iji.

¹⁹ Jaje pa'iyë sête co'ejë pañu'u, de'oye jo'cua pa'iyena sayere. Cui'ne ai tutupi yo'ojë co'eñu'u, mai ai de'oyena sa ja'ñere, si'aohua'i ai de'ojajë cajë.

²⁰ Jaje pa'ito ai do'ipi Maija'quë nese'ere nejoma'ë pa'ijë'ë. Si'aye aiñe cato si'si ti peoye a'ë. Jaje pa'iquëta'are, mai ai do'ipi yecohua'ire ne taoñe cato ai co'are paji.

²¹ Ja do'ire Maija'quë do'iquëre hua'i aiñepi, cono ucuyepi, coa si'aye yo'oyepi ne taoñe pa'ito nuñe yo'oye peoji.

²² Maija'quë ña huë'ñana si'aye aiñe pa'iji cuasaquë pani jare paire caroja'ima'ë coa më'ëse'e paye pa'iji. Sihuaquërepa pasipi, tayo yo'osiquëje pa'ire nëima'ëna, pa'iquë cato.

²³ Jaje pa'iquëta'are i cuasayepi aiñe cui'ne pañe cuasaye pa'ina, iti coa asaquë aiquë pani jai do'i ani huesëye pa'iji, i cuasaye quëayere yo'oma' do'ire. Jaje pa'ina, si'aye mai sehuosicohua'i cuasayepi quëayere neñe pa'iji. Paquë pani co'aye neñe a'ë.

15

Paini De'oye Yo'ojë'ë, Më'ëja'a Co'ye Oima'ë

¹ Maipi tutu quë'iohua'ipi Maija'quëre necaiquëre pare cuasacohua'ita'a jopo carasicohua'ipi de'oye yo'oma'cohua'ire quëcojë cöcayie pa'iji, tutu peocohua'ire. Maise'e de'oye pa'iyere cuasaye pañu'u, Jaje pa'ina, maipi cöcayie pa'iji, jaohua'ire.

² Jaje pa'ina, pai ñape mai cajeohua'ire de'oye yo'oye pa'iji, i de'oye pa'i ja'ñere cajë. Cui'ne i Maija'quëre ai seña maca jaiye cuasaquë mëi ja'ñere cöcayie pa'iji.

³ Ñajë'ë, Cristo i de'oye pa'iyere cuasama'ë paji'i. Coa ai jerepa toyase'e cayere yo'o t'i'api, ñeje cayere: "Më'ëre pëicohua'i pëiñe yë'ëna tomepi."

⁴ Si'aye iye ja'në tsoe toyajë pa'ise'e toyase'e a'ë, mai ye'ye ja'ñere cuasajë. Itina ñajë ai yo'oye pa'itojé quëcojajë cui'ne huaso cuañöñe uteye pajajë cajë toyase'e a'ë.

⁵ Jaje pa'ina, Maija'quëpi yo'o juja ma'ñe cui'ne yëhuo huasoye isiquëpi, cöcayijaquë mësarute yecohua'i ja're coní de'oye yo'ojë pa'i ja'ñe Cristo Jesús pa'ise'eje pa'ija'cohua'ire.

⁶ Jaje pa'ijë si'aohua'i te'e Maija'quë Diosure de'oquëre pa'ni cajë sihuaja'cohua'ire, mai Éjaë Jesucristo péca ja'quëre.

Judío Peocohua'ire Quëaye

⁷ Jaje pa'ie sête pai ñape yecohua'ire de'oye tsiøjë'ë, Cristo mësarute de'oye tsiöse'eje pa'ye, si'aohua'i Maija'quëre de'oquëre pa'ni cajajë caquë.

⁸ Jaje pa'ina, cayë. Cristo cato judío païre necasi'i caquë daji'i, mai aïohua'ire ca nëoquë pa'ise'ere yo'o t'i'asi'i caquë. Jaje yo'oquë Maija'quë ï ca nëöse'ere nuñerepa yo'o t'i'aquë pa'iyere iñosi'i caquë.

⁹ Daji'i, cui'ne judío paï peocohua'ireje, Maija'quëre de'oquëre pa'ni cajë sihuajajë caquë, teaye ñani oni yejesi do'ire. Toyase'e cayeje:

Jaje pa'ina, më'ëre de'oquëre pa'ni casi'i si'a yeja pai pa'i hue'ñana.

Cui'ne më'ë mamire sihuaquë jëjësi'i.

¹⁰ Cui'ne yequë hue'ña toyase'epi caji:

Sihuajë'ë, paï daripëa, Maija'quë tsecohua'i ja're çoni.

¹¹ Cui'ne yequë hue'ña toyase'epi caji:

De'oquëre pa'ni sihuajë cajë'ë, Èjaëre.

Pai yejaña cui'ne si'a paï daripëa maña, judío paï peocohua'ipi.

¹² Cui'ne Isaíasje toyapi:

Isaï tsëcapë aquëpi Èjaë pa'ija'quë api.

Pa'i jaëpi si'aohua'i judío paï peocohua'ire cuañëja'quë api.

Cuañëquëna, jaëpi necaija'quë api cajë uteja'cohua'i a'ë.

¹³ Maija'quëre señë, mai utejë pa'ie isiquëre, sihuaye cui'ne ti se co'a ju'ñe peoyerepa pa'ie isija'quë caquë, mësarute ïte necaiquëre pare cuasacohua'ire. Jare isiquëna, pa'ijë Maija'quë joyo tutu quë'iohua'ipi Maija'quë ca nëöse'ere de'oyerepa utejë pa'ija'cohua'ire caquë seccaiyë.

¹⁴ Maija'quë do'ijë, yë'ë tsoe asayë, mësarute de'oye yecohua'ire cuasayena tïmësicohua'ipi pa'ie, cui'ne si'aye ta'ñe asacohua'ipi pa'ie, cui'ne de'oye cuasajë yecohua'ire yëhuocohua'ipi pa'ie.

¹⁵⁻¹⁶ Jaje pa'iquëta'are ca'rama'quëpi nuñerepa quëasi'i caquë iyere toya saoyë, mësarute tsoe asa maña çoni, mësarupi huanëyema'pë pa'ijajë caquë. Yë'ë cato judío peocohua'ire caquë Jesucristore necaiquëpi yo'oyë, Maija'quë oi do'ipi yë'ëre cuañëse'eje pa'ie. Jaje pa'i do'ire iyere caquë toyayë, mësarute. Yë'ë Maija'quëre necai yo'oye cato iye a'ë. Judío paï peocohua'ire huaso cocare quëaye a'ë. Jaje yo'oyë, jaohua'i Maija'quë joyo yo'o do'ire Maija'quë tsecohua'i pa'ijajë caquë. Jaje pa'ina, jaohua'i de'ocohua'ire pani ïna isisi'i, Maija'quë tsecohua'i pa'ijajë cajë, cui'ne Maija'quë sihuaja'quë cajë.

¹⁷ Maija'quë co'amaña necai yo'osi do'ire de'oyerepa yo'ohuë caye pa'iji, yë'ëpi, Jesucristore sehuosiquë sête.

¹⁸ Jaje pa'ita'are coa yequere caye coeyë. Coa Cristopi yë'ë ja're tsoni nese'ere caye yëyë, judío paï peocohua'ipi Maija'quëre asani de'oye sehuocaise'ere. Iye cato yo'ohuë, coa quëayepi cui'ne ne iñonepi çoni.

¹⁹ Paï yo'oma'a tutupi yo'o iñoquë cui'ne Maija'quë joyo tutupi yo'oquë iñoquë quëahuë. Jaje yo'oquë huaso coca quëacaiye de'oye quëa t'i'ahuë, Jerusalén huëosiquëpi cui'ne si'a hue'ña lïrïco yeja quë'rorre paj'a'ana.

²⁰ Jaje yo'oquë quëahuë, huaso coca Cristo mami ti asama'cohua'i quë'rona, yecohua'i tsoe quëasicohua'ini cui'na ëmëje'ena meñe quëa çofere coequë.

²¹ Coa ai jerepa de'oye yo'ohuë, toyase'e cayeje pa'ie:

Ñaja'cohua'i a'ë, ï pa'ie aye ti asama'pë pa'isicohua'ipi.

Cui'ne asa t'i'aja'cohua'i a'ë, ï caye ti asama'pë pa'isicohua'ipi.

Pablopi Roma Quë'rona Saiyere Cuasapi

²² Jaje iyere yo'oquë pa'i do'ire jaro do'i sani ñama'ë paë'ë, si'anë sani ñaño yëquëta'a.

²³ Yure yë'ë iño yo'oye ne saosiquë sête, yë'ë Españana sai maca de'hue mësarute do'i ñasi'i, ai tsoe mësarute ña ëa ju'isiquëpi.

²⁴ Mësarute ña huajësi jeteyo'je mësarupi yë'ëreje jëjo saocaiye pa'iji, España quë'rona.

²⁵ Jaje pa'iquëta'are yure cato Jerusalënna saiye, sehuosicohua'i jaro pa'icohua'ire çocai ja'ñere saquë.

²⁶ Jerusalén sehuosicohua'i curiquë peocohua'ire isi ja'ñere, Macedonia cui'ne Acaya pa'icohua'ipi iohua'i cuasayepi curiquë tsi'soñu'u cuasahuë, jëjo sao ja'ñere.

²⁷ Jaohua'ipi sihuajë curi tsi'soni jëjo saohuë, Jerusalënna, judío paï sehuosicohua'ire, judío païpi Maija'quë coca quëa do'ire judío peocohua'ipi Maija'quë joyo pa'iyere t'i'ahuë, huaso cocare. T'i'asicohua'ipi iye yeja ayere curiquëpi judío paï sehuosicohua'ire çocaiye pa'iji. ¿Me pañe'ni?

²⁸ Jaje pa'ina, si'aye iye yo'o tëjini cui'ne curiquë sehuosicohua'i tsi'sose'e Jerusalén paina isisi maca sai huëoja'quë a'ë, Españana. Jaronna sai mësarute do'i ñaquë sasi'i.

²⁹ Iyere cuasayë. Yë'ë mësarú qu'èro saisi maca tì'aja'quë a'ë, Cristo coca quëaye tìmësiquëpi mësarute quëa huaso ja'ñere saquë.

³⁰ Maija'quë do'ijë, mai Èjaë Jesucristo do'ipi cui'ne Maija'quë de'ò joyo mësarute oi do'ipi mësarute señë, yë'ère còcaijë'ë, mësarú Maija'quëre seccacaiyepi.

³¹ Maija'quëre seccacaijë'ë, Judea pa'icohua'i sehuoma'cohua'ipi yë'ère cò'aye yo'oye paja'cohua'ire cui'ne yë'ë sacaise'e de'oye sihuajë is'e'e pa'ija'core Jerusalén sehuosicohua'i pa'icohua'ipi.

³² Jaje seccacaijëna, Maija'quëpi yëna, mësarú qu'èrona sihuaquë saija'quë a'ë, mësarú ja're còni pëa huajësi'quë pa'ija'quë caquë.

³³ Maija'quë de'oye pa'iyë isiquëpi si'aohua'ire mësarute pa'ijaquë. Jaje pa'ijaquë.

16

Pai Ñapere Pëpaye

¹ Cenrea sehuosicohua'i pa'icohua'ire còcaio pa'iconi Maija'quë do'ico, de'ocore pao, Febeni caquë quëayë, mësarute.

² Jajore de'oye mai Èjaë mamipi cuasajë yo'ocaijë'ë, sehuosicohua'ire te'e cuasacohua'ire yo'oyere papi yo'ojë. Jaje yo'ojë cui'ne si'aye iote jopo cò'amaña caraye pa'ito còcaijë'ë. Jajò cato jai pa'ire còcaisicoa, cui'ne yë'ëreje còcaisicoa.

³ Pëpacaijë'ë, Priscilare cui'ne Aquilare, yë'ë ja're còni Cristo Jesús cò'amaña còcaisicohua'ire.

⁴ Jaohua'i cato yë'ë pa'iyere huasoñu'u cajë ìohua'i pa'iyere ti nejo cuañofne ja'i maca huajëya'yerepa yo'osicohua'ire. Jaje pa'ina, yë'ëse'e de'oji, ìohua'i yo'ose'e cayë pañë. Cui'ne de'oji, cayë, jaohua'i yo'ose'e Maija'quë do'ijë judío pai peocohua'ije.

⁵ Pëpacaijë'ë, Priscila cui'ne Aquila huë'ena Maija'quë do'ijë tsi'sisicohua'ire. Pëpacaijë'ë, Epenetore, yë'ë oiquëre, Asia yeja aquëpi du'ru macarepa Cristo coca asani sehuoquë pa'isiquëre.

⁶ Pëpacaijë'ë, Mariareje mësarute cuasaco jaiye necaio pa'isicore.

⁷ Pëpacaijë'ë, yë'ë cajeohua'ire Andrónicore cui'ne Juniasre yë'ë ja're còni cò'amaña sito te'e pa'isicohua'ire. Jaohua'i cato Jesús jëjo saocohua'ipi ai de'ocohua'ia'ë, cayë. Cui'ne jaohua'ipi du'ru sehuosicohua'ia'ë, yë'ë ja' yë'ta'a sehuoma'në.

⁸ Pëpacaijë'ë, Ampliatore yë'ë oiquëre mai Èjaë do'ipi.

⁹ Pëpacaijë'ë, Urbanore mai ja're còni mai Èjaë cò'amaña yo'okuëre, cui'ne yë'ë oiquë Estaquisre pëpacaijë'ë.

¹⁰ Pëpacaijë'ë, Apellesre, Cristore coa necaiquëre pare asaquëpi jaiye neñañe pa'itoje quëcosiquëre. Cui'ne pëpacaijë'ë, Aristóbulo tsëcapëre ì huë'e pa'icohua'ire.

¹¹ Pëpacaijë'ë, yë'ë cajeire Herodiónre, cui'ne Narciso tsëcapëre, mai Èjaëre sehuocohua'ire.

¹² Pëpacaijë'ë, Trifenare cui'ne Trifosare, mai Èjaë cò'amaña necaicohua'ire. Cui'ne mai oicorepa Percidare mai Èjaë cò'amañare ai cuasaco necaio pa'icore pëpacaijë'ë.

¹³ Pëpacaijë'ë, Rufore, mai Èjaëre sehuoni pa'iquëre pare. Cui'ne ì pëca ja'core yë'ë ja'coje pa'iore pëpacaijë'ë.

¹⁴ Pëpacaijë'ë, Acincritore, Flegortere, Hermas, Patrobas, Hermes cui'ne ìohua'ia'ë ja're còni pa'icohua'ire. Si'aohua'ire pëpacaijë'ë, Maija'quë do'ijëre.

¹⁵ Pëpacaijë'ë, cui'ne Filoyo cui'ne Juliare, Nereore, cui'ne ìo yo'jeore, Olimpasre, cui'ne si'aohua'ia'ë ìohua'ia'ë ja're còni Maija'quë do'ijë pa'icohua'ire.

¹⁶ De'oyerepa sa'ñe sihuajë pëpajë'ë. Si'aohua'ia'ë Cristore asacohua'ipi mësarute pëpa saoyë, jaro pa'icohua'ire.

¹⁷ Maija'quë do'ijë señë, mësarute. De'hua ñajë pa'ijë'ë, yequë tsëcapë a'ë cajë yo'oye, cui'ne ne taofne necohua'ire. Jaje yo'oye cato mësarú case'ere sañoje yo'oye a'ë. Jaohua'ire tsioma'pë pa'ijë'ë.

¹⁸ Jaje cacohua'ia'ë cato mai Èjaë Jesucristore necaima'pë pa'iyë, coa ai jerepa ìohua'ia'ë de'oye pa'iyere cuasajë yo'oyë. Jaje yo'ojë esa sehuoacohua'ini coa cosoyë, ìohua'ia'ë ña'ña de'ò yë'ò cayepi.

¹⁹ Si'aohua'ia'ë asayë, mësarú de'oye sehuocaise'e. Jaje pa'ina, yë'ëje sihuayë. Ja yë'ta'a mësarú ta'ñe cuasacohua'ia'ë pa'ija'cohua'ire caquë seccacaiyë, mësarú de'hue de'oyere yo'ojajë caquë, cui'ne cò'ayere ti yo'oma'pë caquë.

²⁰ Jaje pa'ijëna, Maija'quë de'oye jo'cua ai cuasama'pë pa'iyë isiquëpi Satanás huati ëjaëre mësarú quëo huë'ehuëna esa jëjo oaja'quë api. Mai Èjaë Jesucristopi de'oye ñacaina, de'oye pa'ijë'ë.

²¹ Mësarute pëpa saoji, Timoteo yë'ë ja're còni cò'amaña nequë pa'iquëpi. Cui'ne Lucio cui'ne Jasón, cui'ne Sosípater yë'ë cajeohua'ia'ë mësarute pëpa saoyë, jaro.

²² Cui'ne yë'ë Tercioje iye toya ja'hua toyacaiquëje jaro mësarute pëpa saoyë, mai Ējaërepa do'ipi.

²³ Mësarute pëpa saoji, Gayoje. I huë'ere pa'iyë, yë'ë, cui'ne i huë'ena si'aohua'i sehuosico-hua'i tsi'sijë pa'iyë. Cui'ne pëpa saoji, Erastoje, pai pa'i daripë curiquë de'huacai pa'iquëpi. Cui'ne Maija'quë do'iquë Cuartoje pëpa saoji, jaro.

²⁴ Mai Ējaë Jesucristo coa isiyepi mësaru ja're pa'ijaquë. Jaje pa'ijaquë.

Pëpa Tëjjiye

²⁵ Tsoe mësarute quëahuë, huaso cocare. Ja cocaja'a asayë, mai. Maija'quë mësarute quëcojë nëñerepa pa'icohua'ire necai tuture payë. Ja do'ire mësaru i tsecohua'ipi pa'iyë. Iye yo'oyere cato iye yeja de'huama'në Maija'quë nesi'i cuasase'e a'ë. Jare tsoe yahuese'e paji'i.

²⁶ Jaje pa'iquëta'are yureta'a Maija'quë ti pani huesëquëpi cuañequëna, Maija'quëre quëacaicohua'i toyase'ejä'a yure cato maire iñopi. Cui'ne Maija'quë nesi'i cuasa nëose'e yahue pase'ere si'a yejaña pa'icohua'ire iñopi, jaohua'ipi itire pa'ë cuasajë de'oye i cuañeñe sehuocaijajë caquë.

²⁷ Maija'quë te'i si'aye asaquë ta'ñe pa'ire pani si'anëpi Jesucristo do'ija'a de'oquëre pa'ni cajë sihuajë pañu'u. Jaje pa'ijaquë.

1 CORINTIOS

Corinto Sehuosicohua'ina Pablopí Toya Saoye

¹ Maija'quë ì yëyeyë yè'èrë Pablöre nepí. Jesucristo jëjo daoquëre nesiquëpi pa'iyë. Iye toya ja'hua Sóstenes ja're toyayë, Cristo do'ire, Maija'quë do'iquë de'osiquë ja're cõni.

² Jaro Corinto daripë sehuosicohua'i pa'icohua'i cajë toyayë, Cristo Jesuna tsioni pa'i do'ire. Maija'quë tsecohua'i pa'icohua'ina cajë toyayë. Si'a hue'ña sehuosicohua'i pa'ijë Ëjaë Jesucristo de'oguërepa mamire secohua'i ja're cõni mësaruteje soipi, ina isisicohua'ipi de'ocohua'i pa'ijajë caquë. Jaje pa'ina, Cristo api, mai Ëjaë cui'ne jaohua'i Ëjaë.

³ Diusu Maija'quëpi cui'ne mai Ëjaë Jesucristopi cõni de'oye yo'ose'ere pajë cui'ne de'oye pa'iyë isise'ere pajë de'oye pa'ijë'ë.

Cristo Do'ipi De'oye Pa'iyë

⁴ De'oyerepa Maija'quë mësarute yo'o u'ni Ëjaë Jesucristo do'ipi caquë, Maija'quëre si'anë de'oji caquë, sihuayë.

⁵ Jaje pa'ina, Maija'quëpi mësarute ta'ñe coca caye cui'ne ta'ñe asaye isipi, joyo aye do'i quë'yere pare.

⁶ Jaje pa'ina, coa caye peoyerepa Cristo cocapi mësarute tiñe pa'iyë ponapi.

⁷ Ponaëna, pa'ijë Jesucristo daija'a mu'sere utejë pa'icohua'ire tiñe ponaëna, pa'iyë Maija'quë isiyë ti jopo caraye peoji.

⁸ Jaje pa'ina, mësarute Diusupi ocue pa'i macarepa ñacai pasipi, tëji mu'sere paja'a, yecohua'ipi mësaru Maija'quë quëcosicohua'ire Jesucristo daisi maca tayo yo'ocohua'i a'ë caye paja'cohua'ire ipi ñacai pajaquë.

⁹ Maija'quë ì ca nëose'eje pa'ye yo'o t'iaquëre papi mësarute soipi, ì mamaquë mai Ëjaë Cristo Jesús ja're tsioni pa'ijajë caquë.

Sehuosicohua'i Huase'e

¹⁰ Maija'quë do'ijë mësarute señë, mai Ëjaë Jesucristo mamipi, de'oye te'e cuasajë, cui'ne te'e nëina, pa'ijajë caquë. Huahuesicohua'i pa'ima'pë pa'ijë'ë. Coa ai jerepa te'e cuasayepi pa'ijë'ë.

¹¹ Jaje mësarute cayë, Cloé tsëcapëpi mësaru te'e cuasama'pë pa'iyere quëarena.

¹² Jaje te'e cuasama' do'ire mësaru cayë, pai ñape ñeje: "Yë'ë cato Pablo aquë a'ë." Yecohua'ipi cayë: "Yë'ë cato Apolos aquë a'ë." Yecohua'ipi cayë: "Yë'ë cato Pedro aquë a'ë." Yecohua'ipi cayë: "Cristo aquë a'ë."

¹³ ¿Jaje pa'ito Cristo ì a'ri te'ña maña huahuesiquë a'ë? ¿Panita'a Pablo, yë'ëpi cruz que cuañore mësaru do'ire? ¿Panita'a Pablo mamipi do cuañosicohua'i a'ni?

¹⁴ Pani, de'oji sihuayë, Maija'quë ñacaina, de'hue jai paire doye pahüë. Coa Crispore cui'ne Gayore dohuë.

¹⁵ Jaje doye pasi do'ire yecohua'ije yë'ë Pablo mamipi do cuañosiquë a'ë caye paja'cohua'i a'ë.

¹⁶ Coa Estéfanas tsëcapëse'ere oco dohuë. Cui'ne, yecohua'ita'are doye pahüë, cuasayë.

¹⁷ Yë'ëre paire oco doquë pa'ijë'ë caquë Cristo cuañeñe papi. Coa ì cocare quëacajë'ë caquë cuañepi. Jaje pa'ina, ì cruz ju'ise'e do'ì quë'yere quëayë. Yë'ëpi de'o pa'ì cocapi caquë quëaquëna, paipi yë'ëna ire papi cuasajë Cristo cruz ju'ise'ere do'ì peoye necaiye coeyë.

Cristopi Maija'quë Tuture Cui'ne Ta'ñe Asaye Paquë

¹⁸ Cristo cruz ju'ise'e cato do'ì peo coca asa cuañoji, ne huesë hue'ña saicohua'ire. Jaje pa'iquëta'are iye coca Maija'quë tuturepa asa cuañoji, huaso cuañocohua'ire cato.

¹⁹ Jaje pa'ina, toyase'e caji: Ta'ñe asacohua'i asaye nejaja'quë a'ë.

Cui'ne asa t'iacohua'ireje johua'i asa t'iañe tirona yahueja'quë a'ë.

²⁰ ¿Maija'quëpi, ta'ñe asaquëre, ye'yaquëre cui'ne iye yeja ayere ta'ñe ca de'huaquëre do'ì peoquëre neru, yure ìquere cocaiye'ni, jaohua'ì? Cocaiye pañë, Maija'quëpi iye yeja ta'ñe asayere do'ì peoye neina.

²¹ Jaje pa'ina, iye yeja paipi ì coca do'ì peoye cuasayë. Cuasajëta'a ja cocare quëase'epi ìte ire pare asacohua'ise'ere huasoye pa'iji. Jaje pa'ina, pai ta'ñe asayepi Maija'quëre t'iañe pañë.

²² Judío paipi pai yo'o t'ia ma'ñere yo'ojëna, ñañe yëyë. Griego paipi cato ai ta'ñe asacohua'ì pa'iyere co'eyë.

²³ Jaje pa'iquëta'are yëquë cato jaohua'ì co'eyere yo'oma'pë pa'ijë coa Cristo cruz que cuañosiquë ayere quëayë. Quëajëna, judío paini ta'tëpoje pa'ye asa cuañoji, johua'ì

quesiquëni quëajëna. Cui'ne judío pai peocohua'ini griego paini coa do'i peoyere yo'ojë cayeye pa'ye asa cuañoji.

²⁴ Jaje pa'iquëta'are judío paipi panita'a griego paipi Maija'quë soisicohua'ire cato Maija'quë tuturepa cui'ne i ta'ñe yo'oyerepa do'i quë'ye asa cuañoji.

²⁵ Maija'quë yo'ose'e do'i peoye paire asa cuañoñepi, pai ta'ñe asayere tëto saise'e pa'iji. Jesupi juquëna, tutu peoquëje pa'iji. Ja yë'ta'a i ju'i maca i tutupi pai tutu tëto saise'erepa pa'iji.

²⁶ Maija'quë soisicohua'i mësaruru te'ohua'ise'e pai ëjaohua'i pa'iyë. Te'ohua'ise'e iye yeja pa'iyë ta'ñe asacohua'i pa'iyë. Cui'ne te'ohua'ise'e ëjaohua'irepa tsëcapë acohua'ijë pa'iyë. Mësaruru tsoe asayë, jaje pa'iyë. Maija'quëpi jaje soipi, mësarute.

²⁷ Paipi huesëohua'ire ñacohua'ini Maija'quëpi sahuapi, ta'ñe pa'iohua'i a'ë cacohua'ire iño quëcos'i caquë. Cui'ne cuañe tutu peocohua'ire pai ñacohua'ini cuañe tutu quë'iohua'ire sahuapi, cuañe ëjaohua'ini iño quëcos'i caquë.

²⁸ Iye yeja paipi do'i peocohua'ire ñacohua'ini Maija'quëpi sahuapi, do'i quë'iohua'i pa'isicohua'ini cui'ne ëjaohua'ini do'i peocohua'ire nesi'i caquë.

²⁹ Jaje pa'ina, yë'ëpi jerepa pa'i a'ë cuasaye peoji, Maija'quë ña hue'ña.

³⁰ Maija'quëpi Cristo Jesús ja're tsioni pa'iyë nepi, maire. Cui'ne Cristo asipi, mai ta'ñe asaye, Cristo do'ipi Maija'quë ja're tsioni nuñerepa pa'iyë, Cristo do'ipi ina isisicohua'ipi nuñerepa yo'ocohua'i pa'iyë, cui'ne Cristo do'ipi huasosicohua'i pa'iyë, nequë.

³¹ Jaje pa'ina, Maija'quë coca toyase'e cayeye pa'ye: "Jerepa pa'i a'ë cuasaye yëni Ejaë Jesuni cuasaye pa'iji, jerepa pa'ire pani."

2

Cristo Quë Cuañosiquë Coca

¹ Maija'quë coca mësarute quëa maca ta'ñe cacohua'i cocapi caquë quëama'ë pa'ë'ë.

² Mësaruru ja're pa'i maca yequere cuasarøjai cama'ë pa'ë'ë. Coa Jesucristo quë cuañosiquëni cuasaquë quëahuë.

³ Coa tsasiquë maca ca'raquë teaye pa'i macapi mësaruru quë'ro t'ihuë.

⁴ Mësaruru yë'ë cayere sehuocaijajë caquë pa'ise'e cuasajë ta'ñe coca cayepi caquë mësaruru quëaye pahuë. Coa Maija'quë joyo cocaiyepi cui'ne Maija'quë tutupi quëahuë,

⁵ mësaruru Maija'quëre necacaiquëre pare asayepi Maija'quë tutupi nese'e pa'ijaquë caquë, pa'ni pai ta'ñe asayepi.

Diusupi Iñopi I Joyo Ayeja'a

⁶ Jaje pa'iquëta'are ta'ñe pa'i cocapi cajë quëayë, Maija'quëre tuicohua'i nuñerepa asacohua'ire cato. Iye yeja ta'ñe pa'iohua'i ca cocapi cajë cui'ne pai ëjaohua'i coa esa ne huesëja'cohua'i ca cocapi cajë quëaye pañë.

⁷ Coa ai jerepa Diusu de'oque'erepa ta'ñe pa'ye ye'yayepi quëayë, Maija'quë ise'e cuasaquë pa'iyere. Ja yë'ta'a yeja de'huama'në mai ai de'oye pa ja'ñere cuasa nëose'ere quëayë.

⁸ Iye yëquë quëaye ti iye yeja cuañecohua'i asa t'iañe pañë. Jaje asa t'ia'ama' do'ire Jesucristore de'oque'ere pare quëni huani jeoa'huë'ë, asa t'iasicohua'i pani para'huë, huaiye. Jaje yo'ohuë, jaje toyase'e cayepi pa'ina.

⁹ Iti toyase'e cato caji:

Paije ti ña ma'ñere pai ti asa ma'ñere,

Cui'ne pai ti a'ri mañaje cuasa ma'ñere,

Maija'quëre oicohua'ire isi ja'ñe ne de'huacaise'e pa'iji.

¹⁰ Jare yëquëre iñopi, i joyopi yëquëni pa'i do'ire. De'o joyo cato si'aye Maija'quë cuasaquë pa'iyë asaquë api. Jaje pa'ipi si'aye iyere iñopi.

¹¹ Pai asa t'ia'ñe peoji, yeque cuasaquë pa'iyë. Coa jare i joyose'e i cuasaquë pa'iyë asaquë pa'iji. Jaje cui'ne Maija'quëre jare i joyose'e i cuasaye asaquë pa'iji.

¹² Mai cato Maija'quë joyore payë. Iye yeja joyore paye pañë. Jaje pa'ina, Maija'quë maire oi coa isiyere asayë.

¹³ Isina, i joyo isi cocapi cajë quëayë, Maija'quë ye'yayepi. Coa yëquë ta'ñe cuasayepi cajë quëama'pë pa'iyë. Maija'quë joyo yo'oye quëayë, Maija'quë joyo yo'oye asacohua'ina.

¹⁴ Maija'quë joyo peoquë cato iye ti asa t'ia'ñe peoji. Coa do'i peoyeje pa'ye asaye pa'iji. Iye cato joyo aye a'ë. Jare joyo pa'iyë asacohua'ise'e asaye pa'iji.

¹⁵ Jepi nuñere pa'ni caquë si'aye asaquë api, Maija'quë joyo paquë cato. Jaje pa'ini i pa'iyere yecohua'ipi ca tējini de'huasi'i cajë yo'oye peoji.

¹⁶ Jaje pa'ina, toyase'e caji: "Ejaë cuasaye asa t'ia'ñe peoji. Cui'ne Maija'quëre paipi se ye'yaye peoji." Jaje pa'iquëta'are mai cato Cristo cuasayere payë.

3

Maija'quë Co'amaña Necaicohua'i Yo'oye

¹ Maija'quë do'ijë, yë'ë mësarute ca maca cama'ë paë'ë, Maija'quë joyopi cuaquëna, pa'icohua'ire cayepi. Pahuë, caye mësarupi Cristo ayere asa t'ama'cohua'ipi tsjitu'uje pa'iohua'i pa'i do'ire. Jaje pa'ina, païse'e yëye yo'ocohua'ire cayepi cahuë.

² Jaje pa'ina, mësarute a'jiñere ye'yahuë, tsj maña oje tsu'sucohua'ire yo'oyeje pa'ye. Jaje ye'yahuë, mësarupi jëa go ani t'ama'cohua'ijë pa'iohua'i pa'ijëna, ñaquë. Yureje ja yë'ta'a joyo pa'iyere asa t'ama'cohua'i pa'iyë, mësaru, païse'e cuasayere ja yë'ta'api pa'ijë.

³ Ja do'ire ja yë'ta'a païse'e cuasayere payë: yecohua'i payete ña ëaye, sa'ñe pëti yo'oye, cui'ne te'le cuasama'pë sañope cuasayere cayere. Ja do'ire sehuoma'cohua'i yo'oyere yo'oyë, mësaru.

⁴ Ja do'ire yecohua'i ñeje cayë: "Pablöre ye'yequë a'ë." Yecohua'ipi cayë: "Yë'ë Apolosre ye'yequë a'ë." Jaje yo'ojë cani mësaru coa païse'e cuasayere pa'icohua'i cayere cayë.

⁵ ¿Jaje pa'ito iquei'ni, Pablo? ¿Cui'ne iquei'ni, Apolos? Yëquë cato coa Maija'quëre necaicohua'i a'ë. Jaje pa'ina, yëquëpi quëajëna, mësaru cato asajë sehuosicohua'i a'ë, mai Ejaëni. Pai ñape yëquë mai Ejaë ñaquë isise'eje pa'ye yo'ohuë.

⁶ Yë'ëpi tañeje pa'ye quëahuë, Maija'quë cocare cui'ne Apolospi tase'ere oco do'ecaiyeje pa'ye quëapi, Maija'quë coca mësarute. Jase'e pa'iji, yëquë nese'e. Jaje pa'iquëta'are tase'e mëoñe cato Maija'quë yo'oye a'ë. Jaje pani Maija'quëpi mësarute ai de'huaji, ite cuasayena.

⁷ Maija'quëpi iti ñese mëaño cato neji. Iti taquë cui'ne iti oco do'equë do'i peoyë.

⁸ Jaje pa'ina, taçohua'i cui'ne oco do'equë si'a yë'quë maca pa'iohua'i a'ë. Jaje pa'iquëta'are Maija'quëpi pai ñapere iohua'i nese'eje pa'ye saïja'quë api.

⁹ Yëquë cato Maija'quë co'amañare necaicohua'i a'ë. Mësaru cato i tsioje pa'iohua'i a'ë.

Cui'ne mësaru Maija'quë huë'e'ë.

¹⁰ Maija'quë yëyere ta'ñe yo'oye isise'eje pa'ye nehuë. Yë'ë cato de'oyerepa huë'e ne huëose'ere oahuë. Yë'ë nesi jetyo'je yequëpi huë'e ëmëje'e cato neñe pa'iji. Jaje pa'iquëta'are pai ñape ñare pajë nejajë, ëmëje'e cato.

¹¹ Jesucristo api, iti du'ru huëöcore pajë pa'i, quëco paquërepa, yequë peoji. Jaje pa'ina, yecore du'ru huëöcore neñe peoji.

¹² Ico ëmëje'ena neñe pa'iji, coa si'aye pai yëyeje pa'ye: oropi panita'a yeque plata hue'yosi quënapa, jai do'i quënapa, soquë toñapi, ja'opi panita'a huecapi.

¹³ Jaje nesicohua'ita'are pai ñape nese'e ña mu'se t'ia'ëna, t'ñarepa ñaja'cohua'i a'ë, pai ñape nese'e. Ja mu'se cato pai ñape nese'e toapi ëo ñaño pasipi.

¹⁴ Toaje ti uma'a huë'e nesiquëpi sai cuañoja'quë api, i nesi do'i.

¹⁵ Jaje pa'iquëta'are i nesicopi coa u huesëru sai cuañoñe paja'quë api, i nesi do'i, ise'e jëaja'quë api, jai huë'e ucona jëayeje pa'ye.

¹⁶ Mësaru a'ë, Maija'quë huë'e. Ja huë'e cato Maija'quë joyopi pëani pa'i sito. ¿Jaje pa'iyë mësaru huesëye?

¹⁷ Jaje pa'ina, paipi Maija'quë huë'ere co'a de'huacaito Maija'quëpi iteje nejoñe pa'iji. Maija'quë huë'e cato de'o co'sija'i huë'e a'ë. Mësaru a'ë, iti huë'e.

¹⁸ Co'ye cosoma'pë pa'ijë'ë. Iye yeja ta'ñe asayere ai cuasaquë a'ë cuasaquë pani, ja cuasase'ere jeoni huesëquëje pa'i de'onu ye'yëjë'ë, ta'ñe asayere pare.

¹⁹ Iye yeja pai ta'ñe asayere Maija'quë cato coa huesëcohua'i yo'oye a'ë caquë ñaji. Jaje pa'ina, toyase'e caji: "Diusupi ta'ñe asacohua'ire iohua'i ta'ñe yo'oyë cuasajë yo'oyena ne taoji."

²⁰ Cui'ne caji yequeje: "Ejaëre papi ta'ñe asacohua'i cuasaye de'oye a'ë caquë ñaji."

²¹ Ja do'ire paini ye'yëjë jerepa pa'i a'ë cuasama'pë pa'ijë'ë. Si'aye mësaru tse'se'e pa'iji:

²² Pablo, Apolos, Pedro, iye yeja ju'iñe, yure pa'iyë, yequë mu'se pa'i ja'ñe, si'aye mësaru tse' a'ë.

²³ Mësaru cato Cristo tseçohua'i a'ë, cui'ne Cristopi Maija'quë tsequë api.

4

Jesucristo Jëjo Saosicohua'i Nese'e

¹ Jaje pa'ina, yëquëre cato Cristore necaicohua'i a'ë cuasajë ñajë'ë. Yëquë cato Diusu cuasa nëose'e ña t'ia ma'ñe quëacajja'cohua'ire nesicohua'i a'ë.

² Ja do'ire necaiquë cato i jëajë cuañese'ere si'a yë'quë maca yo'ocquëna, necaiquëre papi yecohua'ijë cuasajë ñajëna, yo'ocquë api.

³ Jaje pa'iquëta'are yë'ë cato ai co'a ju'iñe pañë. Mësarupi cui'ne yecohua'ipi yë'ëre de'oye yo'opi panita'a co'aye yo'opi cayere cui'ne yë'ëja'a co'ye de'oye yo'oyë ca t'iañeje peoyë.

⁴ Yë'ë cuasayepi yë'ëre sañope caye peoquëna, sihuaquë nuñerepa pa'i a'ë cuasaye peoji. Ja do'ire Ejaëpi caye pa'iji, de'oji panita'a co'aji.

⁵ Jaje pa'i do'ire mésaruse'e de'oye yo'oquë api panita'a tayoquë api caye pajë'ë. Utejë'ë, Ëjaë dai macaja'a. Ëjaëpi dani tiña iñoja'quëre. Ja maca pai ñape joñoa cuasase'e ñaë pa'iji. Ja maca Diusupi pai ñape yo'ose'eje pa'ye isija'quë api, pai ñapere.

⁶ Maija'quë do'ijë, mësaru de'oye cuasajë pa'i ja'ñere iñosi'i caquë Apolos pa'iyë cui'ne yë'ë pa'iyë iñoquë quëahuë, mësarupi toyase'e pa'ina, sa tëto saipe yo'oma'pë pa'ijajë caquë. Ja do'ire yëquë quëase'ere ye'yeni te'ire jerepa pa'i api cuasajë cui'ne yequëni co'aquë api cuasama'pë pa'ijë'ë.

⁷ Maija'quë mësarute de'ocohua'ire nepi. Mësaru tutupi ti'añe pahuë. Jaje pa'ina, Maija'quë coa isise'ere paye sëte jerepa pa'iohua'i a'ë cuasama'pë pa'ijë'ë.

⁸ Yure mësaru si'aye payë, mësaru yëye. Ja do'ire mësaru pai ëjaohua'ijë pa'iohua'irepa nëina, pa'iyë. Jaje nëina, yëquëre huanëyei'ë, mësaru. Sihua'ahuë, mësarupi nuñerepa ëjaohua'i pa'ito, mësaru ja're te'e coni cuañesi'i caquë.

⁹ Yëquëre Jesucristo jëjo saocohua'ire Diusupi jeteyo'jena nëcopi cuasayë, huani jëjo'cohua'ire nëcose'eje pa'iohua'ire. Jaje pa'ina, huiñaohua'i cui'ne si'a pai yëquëse'ere ñaë, johua'i yo'ojëna, ñañu'tu cajë.

¹⁰ Cristo do'ire yëquëre huesëohua'ire cayë, pai. Cajëna, mësarupi Cristo ayere ai asacohua'i a'ë cuasajë sihuayë. Yëquëpi tutu peocohua'i pa'ijëna, mësarupi tutu quë'iohua'i pa'iyë. Yëquëre cato pai coeyë, ñaë. Mësaruni ëjaohua'i a'ë cajë ñaë.

¹¹ Yureje ai yo'ojë aë ja ju'ijë, oco ëa ju'ijë, cañaje peoquëna, paije co'aye yo'ojëna, cui'ne huë'eje peocohua'ipi ai yo'ojë pa'iyë.

¹² Yëquë jëñapi ai tutu nejë, cui'ne paipi pëijë tea ju'itoje Maija'quëpi de'oye ñacajajaquë cahü. Paipi josa yo'otoje quëcoyë.

¹³ Co'aye yo'ocohua'i a'ë cayë, yëquëre. Jaje catoje dahuëre quëcojë yëhuoyë, de'oyepi. Iye yeja ja'ju co'amaña nejose'eje pa'iohua'ire ñaë, yëquëre iye mu'seje.

¹⁴ Jaje toyani toyama'ë paë'ë, mësaruni huajëya'ye ca quëcosi'i caquë. Coa ai jerepa yë'ë mamajëre sëte yëhuosi'i caquë toyahuë.

¹⁵ Mësarupi Cristo coca ye'yacohua'ire diez mil paire pare patoje yë'ë te'i pa'iyë, mësaru ja'quëje pa'i, yë'ëpi mësarute huaso coca du'ru quëasi do'ire. Ja do'ire mësaruje Cristore sehuohüë.

¹⁶ Jaje pa'ina, mësarute cayë. Yë'ë yo'oquëna, ñase'ere mësaruje yo'ojë'ë.

¹⁷ Jare caquë mësaru quë'róna jëjo saoyë, Timoteore, yë'ë oiquëni, mai Ëjaë do'ire yë'ë mamaquëje pa'ini, nuñerepa pa'ini. Jaëpi mësarute quëaja'quë api, yë'ë Cristo Jesure sehuosiquë yo'oquë pa'iyë cui'ne yë'ë si'a huë'ña sehuosicohua'i tsëcare ye'yarojajinë quëase'ere.

¹⁸ Mësaru acohua'i yecohua'i yë'ë sani ñama'ë pa'ija'quë api cajë jerepa pa'iohua'i a'ë cuasajë yo'oyë.

¹⁹ Jaje pa'iquëta'are Ëjaëpi yëto esa sani ñaja'quë a'ë, mësarute. Ja maca ñasi'i, jerepa pa'iohua'i a'ë cuasacohua'i nejë pa'iyë, coa cacohua'i pa'ima'pë caquë.

²⁰ Maija'quë cuañe te'te cato cocase'e caye peoji. Maija'quë tutupi yo'ojë pa'iyë a'ë.

²¹ ¿Quere yëye'ni, mësaru, yë'ëpi sani tarapëpi si'seyere yëye, panita'a ai oi sani ñañere yëye?

5

Yo'o Ma'ñere Yo'ojëna, Ca De'huaye

¹ Mësaru aquëpi sehuoma'cohua'ijë yo'o ma'ñere yo'oquë pëca ja'quë nëjoni nëjore payeje paji cajëna asayë.

² Jaje pa'iquëta'are mësaru ti co'aye yo'oji cama'pë Cristore sehuocohua'ire pa'ë cuasajë pa'iyë, ti co'a ju'ima'pë. Jaje pa'ijëna, yë'ëpi yure cayë, ja co'ayerepa yo'osiquëre eto saojë'ë, mësaru ja're pa'ima'ë pa'ija'quë.

³ Jaro yë'ë pa'ima'ë panije ja co'aye yo'ose'e asani ai coeyë. Jaje pa'ina, yë'ëpi jarore pa'iyëje pa'yerepa iti co'aye yo'osiquëre coequë tsoe co'aji, cayë.

⁴ Ja do'ire mai Ëjaë Jesucristo do'ipi mësaruse'e tsi'sijë'ë. Tsi'sini yo'ojëna, yë'ë jarote mësaru ja're te'e pa'iyëje pa'ye pasi'i, yë'ë joyopi. Cui'ne Ëjaë Jesucristo tutupi jarote pa'ija'coa, mësaru ja're coni.

⁵ Ja maca tsi'si sitopi co'aye yo'oquëre huati ëjaëna isijë'ë, i capë yëyere nejoja'quëna, nejoquëta'are joyose'e huaso cuañoja'quëre Ëjaë Jesucristo dai maca.

⁶ Jerepa pa'iohua'i a'ë cuasama'pë pa'ijë'ë. A'ri maña o'sacopi huajë sëpëna co'meto si'a sëpë o'saye pa'iji caye mësarupi asacohua'i a'ë, aiohua'i case'e.

⁷ Ai huano o'sa sëpëje pa'ire co'aquëre eto saojë'ë, mësaru de'ocohua'ise'e pa'ija'cohua'i, huajë sëpëje pa'iohua'ise'e. Egíptopi judío pai etajë pa'ise'ere cuasajë aiñeje pa'i pan pa'ijë'ë, ti co'mema'cohua'i. Cristo mai do'ire jucacaji'i. Jaje pa'ina, jaë api, yëi ñama mai eta huajëse'ere cuasajë yo'oquë.

⁸ Jaje pa'ina, mai eto huaso cuañosi mu'sere sihuajë nuñere papi cui'ne ta'ñere papi sihuañu'u, o'saye co'mema'a aoje pa'yere papi. Si'sipi cui'ne tayo yo'oyepi conì sihuaye pañu'u. Ja cato ai o'sa sêpêje pa'ye a'ë.

⁹ Ja'nê toya saocore toyahuë, co'aye yo'ocohua'ire cui'ne nêjo peoconi yo'ocohua'ire tsioma'pê pa'ijê'ë caquë.

¹⁰ Jaje tsioma'pê pa'ijê'ë cani cama'ë paë'ë, iye veja paini tsioma'pê caquë jaiye co'amaña yëcohua'ini, co'amaña yahue imacohua'ini, yequere Maija'quë a'ë cuasacohua'ini cui'ne nomiohua'ire yo'ocohua'ini. Jaje yo'oye pa'ito mësaru iye veja pa'iyë peora'pi.

¹¹ Yë'ë cato ñeje cahuë, tsioma'pê pa'ijê'ë, sehuohuë caquëpi ja yë'ta'a yahue nomiore yo'oquëre, co'amaña yahue imaquëre, jaiye co'amaña yëquëre, Maija'quëre cuasaye jerepa co'amañase'e cuasaquëre, co'a coca caquëre cono cuepequëre. Jaje pa'ire cato conì tsiomi aima'pê pa'ijê'ë, cahuë.

¹²⁻¹³ Sehuoma'cohua'ini tayoyë, maipi caye peoji. Maire cato sehuosicohua'ise'ere ñaquë ca de'huaye pa'iji. Sehuoma'cohua'ire cato Maija'quëpi co'aji caye pa'iji. Jaje pa'ina, mësarupi sehuosicohua'i aquëpi tayoto ca de'huaye pa'iji. Ja do'ire jaëte tayo yo'oquëre mësaru ja're pa'iquëre eto saoye pa'iji, ponëma'quë pani.

6

Sehuosicohua'ise'e Sañope Caye Pa'ito Ne De'huaye

¹ Je'nërepa mësaru aquëpi yequëni sañope caye pani tsoe saiji, pai yo'oye ña ëjaë quë'rona ne de'huacaija'quëre. ¿Me yo'ojê jaje yo'oye'ni, Maija'quëre sehuocohua'ina quëama'pê?

² Maija'quëre sehuocohua'ina quëaye de'oji, jaohua'ipi asani ne de'huaja'cohua'ire. Iye veja pai yo'ose'e mësarupi ca de'huaja'cohua'i a'ë case'e asacohua'i a'ë, sehuoma'cohua'ire. Mësarupi jaje yo'oja'cohua'i sête iye a'ri co'a coca mësaruse'e ca de'huajê pa'ijê'ë.

³ Cui'ne yequejê asacohua'i a'ë, mësaru, sehuosicohua'ipi huiñaohua'i yo'ose'e ca de'huaye pa'iji, case'e. Jaje yo'oja'cohua'i sête ai jerepa iye veja yure pa'iyë mësaruse'e ne de'huaye pa'iji.

⁴ Jaje pa'iohua'ita'a mësaru, iye veja pa'iyere sa'ñe coca pani tsoe sehuoma'cohua'ina sani quëayë, sehuosicohua'i pa'iyë ti asama'cohua'ina.

⁵ Mësarupi pañete yo'ore'ni cajë ai cuasajê oijajê caquë cayë. ¿Mësaru aquë ta'ñe asaquë ti peoquëna, jaje yo'ore, sehuosicohua'i aquëpi iye yo'oye ca de'huaquë ti peoquëna, yo'ore?

⁶ Sehuosiquëpi cajë sehuosiquëre sañope caye payere iye veja ëjaë sehuoma'quëna quëaye co'aji.

⁷ Mësaru sañope yo'ojê cayepi tsoe co'a de'osico pa'iji. Jaje pa'ito ¿Me yo'ojê quëco ma'ñe'ni, më'ëre sañope yo'oyere, cui'ne më'ë co'amañare ima cuañonije?

⁸ Jaje pa'iquëta'are mësarupi Maija'quë do'ijêre nuñerepa yo'oma'pê co'amañare yahue imajê yo'oyë.

⁹ Mësarupi asayë, nuñerepa yo'oma'cohua'i Maija'quë cuañe te'te conì pa'iyë ti peoye. Jaje pa'ito co'ye mësaruja'a cosoma'pê pa'ijê'ë. Maija'quë cuañe te'te pa'iyë peoji, pai de'huasi diusuohua'ire secohua'i, huejama'cohua'ipi yo'ocohua'i, huejasicohua'ipi yequë nomiore panita'a ëmëre yo'ocohua'i, ëmëohua'ija'a yo'ocohua'i.

¹⁰ Cui'ne co'amaña yahue imacohua'i, co'amañase'e ai icohua'i, cono cuepecohua'i, co'a coca yequëna quëacohua'i jerepa jaiye curiquë neñu'u cajë cosojê necohua'i, si'aohua'i jaje yo'ocohua'i tj'añe paja'cohua'i a'ë.

¹¹ Jaje pa'iohua'i paë'ë, mësaru acohua'i. Pa'isicohua'ipi yure cato mai Ëjaë Jesucristo yo'o do'ipi cui'ne Maija'quë joyo yo'o do'ipi tsoa tosicohua'i pa'iyë. Maija'quëna isisicohua'ipi pa'iyë, Maija'quë cajeohua'i de'oni.

Mai Capë Cato Maija'quë Tse

¹² Si'aye yo'oye pa'iyë, mai. Jaje pa'iquëta'a yeque yo'oye cato cõcai ma'ñe a'ë, maire. Jaje pa'ina, de'hua ñaquë pa'iyë, te'e co'amaña ai yë huesëna, ja yëyepi jo'ya ne huesoyere coequë.

¹³ Ètatu'u cato ao aija'copi pa'iji cani pai nuñerepa cayë. Jaje pa'iquëta'are Maija'quëpi ètapë cui'ne ao nejaja'quë api. Pai capë coa si'a nomiohua'ire yo'oyere caquë pa'iji cani coa tayo cayë. Pai capë cato Èjaëni pacacaico cui'ne Èjaëpi pai capëre pacacaji.

¹⁴ Jaje pa'i do'ire maire Dusupi i tutupi ju'isicohua'ini huajëcohua'ire huëoja'quë api, Jesucristore huëose'eje pa'ye.

¹⁵ Pai ñape mësaru Cristo capë acohua'i a'ë. ¿Yë'ë Cristo capë aquëpi si'a ëmëohua'ire yo'ocona tsioye de'oquë? Ai co'aji, me neni tsioye'ni.

¹⁶ Mësarupi tsoe asayë, ëmëpi si'a ëmëohua'ire yo'ocona tsiomi io capëna tsioye pa'iji. Jaje caji toyase'e iyere ñajê'ë: "Te'ijje pa'iohua'i tsioye pa'iji, cayaohua'i pa'isicohua'ita'a caji."

¹⁷ Jaje pa'ye paipi Jesucristona tsioni te'ije pa'iohua'i de'oyë, i joyona tsiosicohua'i pa'i do'ire.

¹⁸ Huejama'cohua'ipi pani nomiore yo'oyere yo'oma'pë catijë'ë. Ja cato capë nejoñe a'ë. Yeque tayo yo'oye cato ëmëje'ese'e co'aye neñe a'ë. Ja do'ire ti ja yo'oma'pë pa'ijë'ë, capë co'a de'huaye a'ë.

¹⁹ Mësarü capë Maija'quë joyo pa'i huë'e a'ë. Ipi mësarute pa'iji. Jaje pa'ina, mësarü capë mësarü tseco peoji, Maija'quë tsecoa.

²⁰ Maija'quëpi jai do'i hueropi, mësarute ai yo'osi do'ipi. Ja do'ire mësarü Maija'quëre ai oijë mësarü capëpi i de'oyerepa necaiye iñoñe pa'iji.

7

Huejayere Yëhuoye

¹ Yure cato mësarü sejë toyase'ere sehuosi'i: ëmëpi nomiore ti yo'oye pato ai de'oji, me co'aquë'ni.

² Jaje pa'iquëta'are jaiye co'aye yo'oyepi pa'i do'ire pa'i ñape nëjore paye pa'iji, cui'ne nomiohua'ijë pa'i ñape ëjëre paye pa'iji.

³ Ejëpi nëjo yëyeje yo'oquë pa'iyë pa'iji, ëjë sëte. Cui'ne nëjore ëjë yëyeje pa'ye pa'iyë pa'iji, nëjo sëte.

⁴ Nëjo cato ëjë tsecoa. Ejë api, iti tse aquë. Ejë cato nëjo tsequë api.

⁵ Jaje pa'ina, ëjë yëye panita'a nëjo yëye pa'ito pañë cama'pë pa'ijë'ë. Cayaohua'i yure tsoe maca yo'oma'pë Maija'quëse'ere señu'u cani yo'oma'pë sejë pa'ijë'ë. Ja jeteyo'je cui'naohua'ipi tsioni pa'ijë'ë. Mësarü pa'iyepi yo'o'jëna, mësarute quëco t'ama'pëna Satañáspi co'aye yo'oyena ne taoma'quë de'hua ñajë'ë.

⁶ Mësaruni yëhuoquë caquë cuañema'ë pa'iyë.

⁷ Yë'ë cato si'ahua'i yë'ëje pa'iohua'ise'e pa'ijë'ë, cuasayë. Cuasaquëta'are Maija'quëpi pa'i ñapere t'ñe tutu isipi.

⁸ Huejama'cohua'ire cui'ne hua'jeohua'ire cayë, huejaye pato jerepa de'oji, yë'ëje pa'iohua'i pa'ito.

⁹ Jaje pa'iquëta'are quëco t'añepi peoto huejayepi de'oji. Co'aji, coa ëa ju'ijë ai yo'o'jë pa'iyë.

¹⁰ Huejasicohua'ire cato cuañëñë, ëjëre jeocoye ti peoji. Ja cato yë'ëse'e caye pañë. Ejaërepaje jaje cuañëji.

¹¹ Jaje pa'iquëta'are nëjopi ëjëre jeocosico pani yequëre huejaye peoji, panita'a cui'naëna co'i coñe pa'iji. Ejëre nëjore jeocoye peoji.

¹² Iye cato yë'ëpi cayë, Ejaërepa case'ere caye pañë. Sehuosiquëpi sehuoma'coni nomiore paquëna, iopi de'oye i ja're pasi'i cuasaco pa'ito jeocosi'i caquë yo'oye pajë'ë.

¹³ Yeque sehuosicopi sehuoma'quëni pacona, ipi de'oye io ja're pasi'i cuasaquë pa'ito jeocosi'i caco yo'oye pajë'ë.

¹⁴ Jaje pa'ina, sehuoma'quëpi nëjo sehuosicore pa do'ire Maija'quëna isisiquëje pa'iji. Cui'ne nomioje sehuoma'copi sehuosiquëni ëjëre pa do'ire Maija'quëna isisicoje pa'ico. Jaje yo'oye peoto mësarü mamajëpi sehuoma'cohua'i mamajëje pa'iohua'i co'acohua'i patira'huë. Jaje patira'sicohua'ita'a yure cato de'ocohua'i pa'iyë, Maija'quë ña hue'ña.

¹⁵ Jaje pa'iquëta'are sehuoma'quëpi panita'a sehuoma'copi jeosi'i cato de'oji cajë'ë, ai oima'pë sehuosiquëpi panita'a sehuosicopi ai yo'o'jë pa'ito co'aji. Maija'quë cato de'oye sihuajë pa'ijë'ë caquë soipi, maire. Jaje pa'iquëta'are ai yo'o'jë pa'ito co'aji.

¹⁶ Nëjo sehuosicopi ëjë sehuoma'quëre huasora'se'ere huesëco panita'a ëjë sehuosiquëpi nëjo sehuoma'core huasora'se'ere huesëji.

¹⁷ Mësarute soi maca pa'ise'ëje pa'ijë, pa'i ñapere Ejaë nejë'ë caquë isise'ëje pa'ye yo'o'jë pa'ijë'ë. Jaje cuañëquë ye'yayë, si'a hue'ña sehuosicohua'i pa'i tsëcare.

¹⁸ Cui'ne cui'i ca'ni tëasiquëni Maija'quëpi soisiquë pa'ito jare jaje pa'ipi Maija'quëre tuijë'ë. Ca'ni tëama'quëni soisiquë pa'ito jare tëama'quëpi tuijë'ë, Maija'quëre.

¹⁹ Ti coçai ma'ñe a'ë, cui'i ca'ni tëaye cui'ne tëa ma'ñeje. Ti coçaiye cato Maija'quë cuañëñere de'oye sehuoye a'ë.

²⁰ Jaje pa'ina, pa'i ñape pa'iyë pa'iji, Maija'quë i soima'në pa'ise'ëje pa'iohua'i.

²¹ Jo'yaë pa'isiquë pani, co'a ju'ima'ë pa'ijë'ë. De'hue eta huajëye pa'ito eta huajëjë'ë.

²² Jo'yaë pa'ina, Maija'quëpi soisiquë pa'ito jo'yaë peoquë ponëji, mai Ejaëre necaiquë ponëni. Jo'yaë peoquëni Cristopi soina, Cristo jo'yaë de'oye pa'iji.

²³ Mësarute Maija'quëpi jai do'i hueropi. Ja do'ire pa'i jo'yaohua'i pa'ima'pë pa'ijë'ë.

²⁴ Jaje pa'ina, Maija'quë do'ijë ja yë'ta'a Maija'quë mësarute soima'në pa'isi macare pa'ijëta'a Maija'quë ña hue'ñana de'oyerepa pa'ijë'ë.

²⁵ Huejama'cohua'ire cato mai Ējaë cuañese'e peoji. Jaje pa'iquëta'are yë'ë cuasayepi cayë yëyë, mësarute. Mai Ējaëpi yë'ëre oi huasosiquë sëte nuñerepa caji cajë asacaiquëre papi cayë.

²⁶ Mësarute cayë, huejama'pë pa'ito jerepa de'oji. Cui'ne quëasi', iye mu'seña co'a mu'seña'ë. Jaje pa'ito me huejaye'ni.

²⁷ Huejasiquë cato nëjore jëcoye peoji. Huejama'quë pani huejasi'i caquë nomiore co'ema'ë pa'ijë'ë.

²⁸ Jaje pa'iquëta'are më'ëpi huejaquë pani co'aye yo'oye pañë. Nomi tsjopi huejaco panije co'aye yo'oye paco. Jaje pa'iquëta'are huejasicohua'i cato ai yo'oja'cohua'i a'ë. Jaje pa'ina, yë'ë cato iye ai yo'oyepi peojaquë caquë huejaye pañepi jerepa de'oji cayë.

²⁹ Maija'quë do'ijë, mësarute cayë, mai iye yeja pa'iyë a'ri tëcahuë maca pa'iji. Jaje pa'ina, yure cato huejasicohua'ipi hueja ma'ñeje pa'iohua'i pa'iyë pa'iji, mai Ējaë co'amañare jerepa cuasajë.

³⁰ Iye yeja mai pa'iyë carajaija'coa. Ja do'ire oicohua'i panije oima'pë pa'ijë'ë. Si-huacohua'i panije sihuama'cohua'ijë pa'iyë pa'ijë'ë. Co'amañare huerosicohua'i panije co'amañare peocohua'ijë pa'iyë pa'ijë'ë, mai Ējaë ayere neja'quë caquë.

³¹ Iye yeja co'amañare de'oye a'jiñe t'ajë jaiye pacohua'i pani co'amañare sihuama'pë pa'ijë'ë. Peocohua'i pa'iyëje pa'ijë'ë. Mësarupi asayë, iye yeja carajaija'coa cajë. Ja do'ire iye yeja co'amaña sihuaye peoji.

³² Yë'ë cato yëyë, mësarupi iye yeja co'amañare ai cuasajë co'a ju'ima'pë pa'iyere. Jaje pa'ina, ëmëpi huejama'quë pani Ējaë co'amañase'e cuasaquë ite de'oye iñõñere caquë yo'oji.

³³ Jaje pa'iquëta'are huejasiquë cato iye yeja co'amañare cuasaquë co'a ju'iji, nëjore de'oye necaiyere cuasaquë. Jaje pa'ina, cayaye cuasaye pa'iji.

³⁴ Jaje cui'ne huejasi nomioje iye yeja co'amañare co'a ju'ico io ëjëre de'oye yo'ocaiyere cuasaco. Jaje pa'iquëta'are nomi tsjo cato mai Ējaë co'amañase'e cuasaco io capë cui'ne io joyo Maija'quëna isisicopi pa'ico.

³⁵ Jaje cani mësarü de'oye pa'iyere caquë cayë. Huejama'pë pa'ijë'ë cayë pañë. Coa ai jerepa Ējaë yëyese'e cuasajë de'oye pa'ijë ise'ere necaiyere caquë quëayë.

³⁶ Te'ipi i huejaja'co ai de'o huesëo cuasaquë iona yëyere quëcoma'quë pani huejajë'ë. Co'aye yo'oye paji. De'oye yo'oji.

³⁷ Jaje pa'iquëta'are yequëpi i yëyere meñe quëcoquë pani huejaja'core huejaye pasi'i cuasa nëopi. Ja yo'oquëna, i joyopi cuasaquë yo'o do'ire de'oye yo'oji.

³⁸ Jaje pa'ina, huejaja'core huejasiquë cato de'oye yo'oji. Cui'ne huejaja'core huejama'quë jerepa de'oye yo'oji.

³⁹ Nëjo cato ëjëni tsiosico paco'ë, te'i de'ojëna. Ējë ju'isi maca te'o de'oni ja maca yureta'a nomi tsjoje pa'io de'oco. Ja maca huejaye yëni huejaye pa'iji, Maija'quëre sehuosiquëni.

⁴⁰ Jaje pa'iquëta'are yë'ë cato cuasayë, hueja coñe pañepi jerepa de'oji. Jaje cani yë'ëje Maija'quë joyo paquëpi cayë cuasayë.

8

De'huasi Diusuohua'ina Ao Isiye

¹ De'huasi diusuohua'ina ao isiye ayere toyayë, mai si'aohua'i ta'ñe cuasacohua'i a'ë. Jaje pa'iquëta'are ta'ñe asaye cato coa jerepa pa'i a'ë cuasayena neñe a'ë. Jaje pa'iquëta'are paire oiye cato joyo pa'iyë ñese mëocaiye a'ë, coçaiye a'ë.

² Jaje pa'ina, de'hue asayë, cuasaquëre ja yë'ta'a asa t'iañerepa carapi.

³ Jaje pa'iquëta'are Maija'quëpi ñaji, ite oiquëre pare.

⁴ Maipi asayë, pai de'huasi diusuna ao isise'e ayere a'ñere cayë. Pai de'huasi diusu iye yeja coa pa'iji, te'i Maija'quëse'e jrepa pa'iji, yequë diusu peoyë.

⁵ Ja yë'ta'a ma'tëmore cui'ne iye yejare jai pai diusuohua'i cui'ne ëjaohua'i pa'iyë cuasato, jai pai diusu cui'ne ëjaohua'ijë pa'iyë.

⁶ Jaje pa'ijëta'are maire cato te'i Diusu pa'iji, Maija'quëse'e. Maija'quëpi si'aye de'huapi. Jaje pa'ina, i do'ipi pa'iyë, mai. Cui'ne te'i Ējaë pa'iji. Jaë cato Jesucristo api. Ija'a do'ire pa'iji, si'aye cui'ne maije.

⁷ Jaje pa'iquëta'are yecohua'i iye yë'ë yure quëaye asa t'iañe pañë. Jaje pa'ina, sehuosicohua'ita'a pai de'huasi diusuni johua'i sejë ye'yase'epi ja yë'ta'a pa'ina, pai de'huasi diusuni isisi hua'i co'aji a'ñe cuasayë. Cui'ne johua'i cuasaye tutu peo do'ire si'si a'ë cuasayë, co'a diusure isise'ere aini.

⁸ Mai ao a'ñepi Maija'quë maire oiye t'iañe peoji. Jaje pa'ina, aisi do'ipi de'ocohua'i pa'iyëje peoji. Cui'ne aisi do'ire jerepa co'acohua'i pa'iyëje peoji.

⁹ Jaje pa'iquëta'are de'hua ñajë'ë, yo'ojë si'aye asa t'ia'ama'cohua'ini tutu peocohua'ini co'a de'huaye mësarü si'aye de'oye ai do'ipi.

¹⁰ Jaje pa'ina, mē'ēpi si'aye asaquēpi pai de'huasi diusure isise'ere ai ñu'ina, si'ayerepa asa t̄i'ama'quēpi ñaji. Nani ije aiji ja yē'ta'a co'aji cuasaquēta'a.

¹¹ Jaje cuasaquēta'a ai do'ire mē'ēpi do'i quē'i pa'iyē, ani iño do'ire ja maca yureta'a mē'ēpi Cristo ite jucacaisi do'ire sehuosiquēni si'aye mē'ē asa t̄i'a do'ipi j asayere nejocaiyē.

¹² Tutu peocohua'i Maija'quēre a'ri maña cuasayere nejocai do'ire, mēsaru Cristoni sañope yo'oyē.

¹³ Ja do'ire aĩne pañepi jerepa de'oji. Co'aji, yē'ē ai do'ire Maija'quē do'iquēre ne taõ.

9

Maija'quē Jējo Daocohua'i Yo'oye

¹ Yē'ere cato si'aye de'oye yo'oye pa'iji. Ta'tēpo peoji, Maija'quē jējo daoquēre sēte. Mai Ējaē Jesucristore yē'ē ñaco capi ñasiquē a'ē, cui'ne yē'ē j coca quēasi do'ire mēsaruje sehuosicohua'i pa'iyē.

² Jaje pa'iquēta'are yecohua'i cato yē'ere cayē, Maija'quē jējo daoma'quē api. Jaje pa'itoje mēsaru yē'ē quēaquēna, Cristo coca sehuosicohua'ise'e Maija'quē jējo daosiquēre papi cayē.

³ Yē'ere sañope cacohua'ire ñeje sañope sehooquē quēayē.

⁴ Yē'ē si'aye aõne cui'ne õcuaye aĩne pa'iji, cui'ne õcuaye pa'iji, Maija'quē jējo daoquē pa'i do'ire.

⁵ Cui'ne sehuosiconi huejani cuarojaĩne de'oji. Mai Ējaē jējo daocohua'i cui'ne j yo'je tsj cui'ne Pedro yo'oyeje pa'ye yo'oye de'oji. ¿Me ta'tēpo pa'iquē'ni, yē'ēse'ere?

⁶ ¿Bernabé cui'ne yē'ē con Maija'quē do'ijē cõcaima'pēna yēquē jēñapi co'amaña neje Maija'quē coca quēajē pa'iyē pa'iji, cuasaye mēsaru?

⁷ ¿Iqueipi soldado de'oni j pa'i do'i saiquē pa'iyē pa'iquē'ni? ¿Iqueipi tsio neni quēquēna, tēani aima'quē pa'iquē'ni? ¿Iqueipi yēi ñama oje de'sequēta'a õcuma'quē pa'iquē'ni?

⁸ Jaje pa'ina, pa'ise'e cuasaquē caye a'ē cuasama'pē pa'ijē'ē. Moisés cuañese'ejē cui'ne caji yē'ēse'e caye pañē.

⁹ Cuañese'epi toya pēpēna toyase'e pa'iji, ñeje: "Iti ca po'te saihué tē'ijai po'tequēre duruhuequēre yē'opo sēama'pē pa'ijē'ē, ise'e ai nejaquē." Jaje cani Maija'quē duruhuequēse'ere oi cama'ē paji'i,

¹⁰ maini caquē coa iñoquē. Ja cato capi, maire. Yecohua'i cõcái ja'ñere capi. Jaje pa'ina, sehuosicohua'ipi Maija'quē coca quēacaicohua'ire cõcayē pa'iji, co'amañapi. Taja'to a'ji yeja nequē cui'ne huea po'tequē jõhua'i tsio quēise'ere pajajē cuasajē yo'oyē.

¹¹ ¿Jaje pa'ito mēsaru joyo pa'i cocare pare quēasicohua'ini mēsarupi mēsaru co'amañapi cõcayē co'aquē? Pani de'oji, yēquēre cõcayē.

¹² Yecohua'ire ai pa'ñe pa'iohua'ini mēsaru de'oye cõcaicohua'i a'ē yēquēre jerepa cõcayē pa'iji, mēsarute Maija'quē coca quēasicohua'ire.

Jaje pa'iquēta'are yēquē mēsarute cõcaijē'ē caye pahué. Coa ai jerepa quēcojē yēquē jēñapi neje aē'ē. Cristo coca quēayerē mēsarupi jõsa yo'oye a'ē, cuasama'cohua'ini cajē. Jaje yo'ohué.

¹³ Mēsarupi tsoe asacohua'i a'ē. Maija'quē huē'e ñacaicohua'i cato jote pa'i co'amañapi pa'icohua'i a'ē, cajē. Hua'ire õojē Maija'quēre se hue'ña cõcaicohua'ijē Maija'quēna isisi hua'ire aicohua'i a'ē.

¹⁴ Huaso coca quēacaicohua'i cato, huaso coca quēa do'ipi pa'iyē pa'iji caquē mai Ējaē nepi.

¹⁵ Yē'ē jaje quēa do'ire saĩ cuañoñe pa'iquēta'a saĩ cuañoñe pahué. Cui'ne jaje toyani toyama'ē pa'iyē, mēsarupi isijajē caquē. Coa ai jerepa yē'ē ne do'i sihuayerē yecohua'ipi sioyere coeyē. Ju'iñere jerepa de'ora'pi cuasayē, yē'ē ne do'i sihuayerē sioto.

¹⁶ Jerepa pa'i a'ē cuasaquē quēaye pañē, Maija'quē coca quēani. Yē'ere cuañe nõose'ere ne t̄i'añe pa'iji. Yē'ēpi Maija'quē coca quēama'quē pani teaye pa'iyē.

¹⁷ Jaje pa'ina, yē'ēpi neñe yē'ē sihuaquē yo'onita'a yē'ē do'ire isise'e payē. Jaje pa'iquēta'are yē'ēpi jõsa coenije neñe pa'iji, cuañe nõose'e pa'ito me pañē'ni.

¹⁸ Huaso coca quēa do'ire se'ñe pa'ita'a sihuaquē sēma'ē pa'iyē, huaso cocare asacohua'ipi saĩne peojajē quēquē. Jare cayē, yē'ē sihuayerē.

¹⁹ Pai jo'yaē peoquēta'a si'aohua'i jo'yaē de'ohué, Cristona jai paire dacasi' caquē.

²⁰ Judío pai ja're con pa'ini judío pai yo'oyeje pa'ye yo'oque pa'iyē, judío paini Maija'quē te'tena dasi'i caquē. Jaje cani cayē, Moisés cuañese'ere sehoojē yo'ocohua'ire nesi'i caquē yo'oyere. Yē'ē cato nuñerepa ja cuañeñere pa'ima'quēta'a jõhua'ire Maija'quēna dasi'i caquē yo'oyē.

²¹ Cui'ne Moisés cuañese'ere asama'cohua'i ja're pa'i jõhua'ijē pa'i de'oyē, Maija'quēna jõhua'ire dasi'i caquē. Ja yē'ta'a Diusu cuañese'ere pa'iyē, Cristo cuañeñere sehooquē pa'i do'ire.

²² Tutu peocohua'ire Cristona dasi'i caquë johua'ije pa'i de'ohuë. Pai ñapeje pa'i de'ohuë, de'hue te'ohua'ise'e huaso cuañoscuhua'i pa'ijajë caquë.

²³ Jaje yo'oyë, huaso coca quëayere paipi jerepa asajajë caquë. Cui'ne huaso cocapi de'o co'amaña isiyere yecohua'i coni pajajë caquë yo'oyë.

²⁴ Huë'huëni co'amaña imañu'u cajë huë'huëcuhua'i cato si'aohua'i huë'huë huëocohua'i a'ë. Jaje yo'osicohua'ita'a ti'ama'cohua'i a'ë, co'amaña. Ti'ama'pëna, coa te'i iti de'hue nesiquëse'e co'amaña saquë api. Jaje pa'ito mësarujë ai cuasajë huë'huëjë'ë, co'amaña iñu'u cajë huë'huëyeje pa'ye.

²⁵ Si'aohua'i sañope yo'ojë ca'a yo'ocohua'i si'aye ca'a yo'orojaiñe jeoni ñare pajë yo'ocohua'i a'ë, coa carajai co'amañare imañere cajë yo'ojëta'a. Jaje pa'iquëta'are mai cato ti pani hueseyere pare ti'añu'u cajë yo'oyë.

²⁶ Jaje pa'ina, yë'ë cato coa huesë huë'huëma'ë pa'iyë, cui'ne peo de'otona t'ëcaquë, huaiyeje pa'ye yo'oma'ë pa'iyë.

²⁷ Capëre cuañëñë, coa ai jerepa yë'ë capëre t'ëcaquë yo'oyë, de'oye sehuocaiyere caquë. Yecohua'ise'ere de'oye sehuoye pa'iji caquë ye'ya tējini yë'ëpi ye'yama'quë pa'ija'quë caquë eto cuañoñere coequë jaje yo'oyë.

10

Itire Pa'ë Cuasayere Sañope Saquë Yëhuoye

¹ Maija'quë do'ijë mësarute quëasi'i, mai aipë yo'ojë pa'ise'e, si'aohua'i mai aipë Maija'quë sirio huë'ehuëre pa'ahuë'ë. Cui'ne si'aohua'i jai Maja'iñaje je'a'huë'ë.

² Iye yo'o ja'ñepi si'aohua'i Moisésre tuicohua'i pa'iyë iñoa'ji'i, oco do cuañoñeje sirio huë'ehuëre cui'ne jai Maja'iñaje t'ëto saijë pa'i ja'ñepi.

³ Cui'ne si'aohua'i Maija'quë isisi ao a'ahuë'ë.

⁴ Cui'ne si'aohua'i Maija'quë isisi oco oca'ahuë'ë, joyo ayere ucuhüë. Johua'ire sai saquë Cristo quënaoje pa'irepa joyo ocore oca'ahuë'ë.

⁵ Jaje pa'iquëta'are jai pai ñasicohua'ita'a, cuene yejana jujua'huë'ë, Maija'quë yëyeje yo'oma'pë pa'isicohua'ire.

⁶ Iye yo'ose'e cato maire quëaye a'ë, jaohua'i yo'ose'ëje pa'ye yo'oma'pë pa'ijë'ë caquë. Jaohua'i cato co'ayere yë do'ire jujua'huë'ë.

⁷ Jaje pa'ina, mësarú cato pai de'huasi diusuohua'ini señu'u cajë yo'oma'pë pa'ijë'ë, jaohua'i yo'ose'ëje pa'ye. Maija'quë coca toyase'e caji: "Ao aijë cono ucujë, ja jeteyo'je jai pai tsi'sijë pairajë sihuajë yo'ohuë."

⁸ Jaje yo'ocohua'ipi te'e mu'sepi veinte y tres mil jujua'huë'ë, yequë nomiohua'ire cui'ne yequë ëmëohua'ire yo'o do'ire. Jaje pa'ina, jaohua'i yo'ose'ëje pa'ye yo'oma'pë pañu'u, mai cato.

⁹ Maija'quëre neñañu'u cajë sañope yo'o do'ire añañi ao jujua'huë'ë. Jaje pa'ina, Maija'quëre sañope yo'oye pañu'u.

¹⁰ Maija'quë de'oye yo'oma'aji'i, carojajë'ë. Jaje yo'ojë ca do'ire huññaëpi dani huani jea'ji'i, jaohua'ire. Jaje pa'ina, Maija'quëre co'aye yo'oji carojaiñe pañu'u, mai cato.

¹¹ Si'aye mai aipëre yo'ose'e cato maire iñoñe a'ë, tēji mu'seña pa'icohua'ire, maipi cui'ne yo'oye pajajë caquë.

¹² Nuñerepa de'oye pa'iyë cuasaquë pani, de'hua ñajë'ë yo'oquë ta'añe.

¹³ Neñañe pa'ina, mësarú ai yo'oyeje pa'ye yecohua'ije ai yo'ojë pa'iyë. Mësaruse'e ai yo'oye pañë. Neñañe cato cui'ne pa'ye a'ë, si'aohua'ire. Jaje pa'iquëta'are Maija'quëpi mësarute mësarú quëco ti'añe jerepa neñañe ëseja'quë api. Jaje pa'ina, Maija'quëna quëco pajë'ë, jaëpi necaija'quë api cuasajë. Jaje pa'ina, neñañepi pa'ina, Maija'quëpi eto hua-soja'quë api, ai yo'oyere quëcojajë caquë.

¹⁴ Si'aye Maija'quërepa peoyere Maija'quë api cuasajë yo'oye yo'oma'pë pa'ijë'ë, Maija'quë do'ijë maña.

¹⁵ Mësarú cato ta'ñe pa'iohua'i a'ë. Jaje pa'ina, cayë se mësarupi yë'ë case'ere ai cuasani ñañe pa'iji.

¹⁶ Mai de'o ucu duruhuë ucuyë Maija'quëre de'oji, cajë pëpa maca Cristo tsie da'cana tsioyë, te'ijë pa'iohua'i ina. Cui'ne panre huahuëni ainije Cristo capëna tsioyë, te'ijë pa'iohua'i ina.

¹⁷ Jai pai mai pa'ijëta'a te'oni si'aohua'i pan ai do'ire te'e capë acohua'i pa'iyë.

¹⁸ Jaje pa'ina, ñajë'ë, cui'ne judío pañi. Jaohua'i je'quë Maija'quëna isiyë cajë yo'osicohua'ire ai do'ire joja'a johua'i acohua'irepa pa'iyë.

¹⁹ Jaje cani cama'ë pa'iyë, pai de'huasi diusupi do'i quë'ye a'ë caquë. Panita'a pai de'huasi diusuna hua'i isise'epi jerepa do'i quë'ye pa'iji cama'ë pa'iyë.

²⁰ Yë'ë cato cayë sehuoma'cohua'ipi Maija'quëna hua'i isiyë cajë yo'oni huatiohua'ina isiyë. Jaje pa'ina, yë'ë cato mësarute ëseyë, huatiohua'i ja're çoni pa'iyë.

²¹ Huati ucu duruhuë ucuye ti peoji, mai Èjaë ucu duruhuë ucucuhua'ipi. Èjaë mesana aço acohua'ipi huati mesa aïñe ti peoji.

²² Èjaëpi oi pëijaquë cajë huatire sihuajë yo'oye co'aji. Ijerepa tutu quë'iohua'i peoyë, coa teaye pa'iohua'i mañapi.

Sehuosicohua'i Yo'oye Cui'ne Oiyë

²³ Maipi si'aye yo'oye neñe pa'iji. Jaje pa'iquëta'are yeque cato çocai ma'ñe a'ë. Si'aye yë'ë yëyeje pa'ye yo'oye pa'iji. Jaje pa'iquëta'are yeque cato joyo pa'iyë ñese mëñe çocai ma'ñe a'ë.

²⁴ Jaje pa'ina, yecohua'i de'oye pa'i ja'ñere cuasajë de'oye yo'oye pa'iji. Co'ye de'oye pa'iyere cuasajë yo'oye co'aji.

²⁵ Jaje pa'ina, aço huero hue'ña isiyere coa hueroni aijë'ë. De'huasi diusuna isise'e pa'ima'quë cuasajë sema'pë pa'ijë'ë, ai cuasaye peojaquë.

²⁶ Iye yeja cui'ne si'aye jote pa'iyë Maija'quë tse a'ë.

²⁷ Panita'a sehuoma'quëpi aço aijë'ë caquë huëouna, sehuoni i huë'ena saiscohua'i pani, de'huasi diusure isise'e pa'ima'quë cuasajë sema'pë coa si'aye i aço aijë'ë.

²⁸ Jaje pa'iquëta'are yequëpi mësarute quëa'ñe pa'i api, iye hua'i pai de'huasi diusure isise'e a'ë caquë. Jaje quëaru aima'pë pa'ijë'ë. Mësarute quëasiquë cuasayere co'a de'huayere coejë aïñe pajë'ë.

²⁹ Iye cato cayë yequë co'aye a'ë, cuasayere. Mësarua cuasayere cama'ë pa'iyë.

Jaje pa'iquëta'are paipi setü'ñe pa'iohua'i a'ë. ¿Me neni yë'ë yëyeje yo'oyere yequëpi ñaquë yo'oji ca de'huaye pa'iquë'ni?

³⁰ Yë'ëpi tsoe Maija'quëre seni de'huani aiquë pa'ito ¿me neni yë'ë aïñere yecohua'ipi ca de'huaye pa'iquë'ni?

³¹ Aïñepi ucuyepi, cui'ne co'amaña yo'oyepi Maija'quë de'oquëre pa'ni cajë sihuayere yo'ojë'ë.

³² Sehuosicohua'ire, judío paire cui'ne judío pai peocohua'ireje si'aohua'ire co'aye ne iñoma'pë pa'ijë'ë.

³³ Jaje pa'ina, yë'ë si'aohua'ire de'oye yo'osi'i caquë yo'oyë. Yë'ë yëyere yo'oma'ë pa'iyë. Jaohua'ijë si'aohua'i de'oye cuasajë huaso cuañosicohua'i pa'ijajë caquë yo'oyë.

11

¹ Jaje cui'ne mësarujë yë'ë yo'o iñose'eje pa'ye cui'ne yo'ojë'ë. Cristo yë'ëre yo'o iñose'eje pa'ye yo'oyë, yë'ëje.

Nomiohua'i Maija'quëre Se Hue'ña Pa'iyë

² Maija'quë do'ijë, sihuayë, mësarua yë'ëre si'anë cuasajë yë'ë ye'yase'eje pa'ye pa'ijëna.

³ Jaje pa'iquëta'are iyeje asajajë caquë quëayë. Cristo cato si'a ëmëohua'i mëñe ëjaëpi. Èjë cato nëjo mëñe ëjaëpi, cui'ne Diosu cato Cristo mëñe ëjaëpi.

⁴ Jaje pa'ina, ëmëpi i sïopë cañapi puani Maija'quëre sequë pa'ito co'aye ña cuañoji. Caña puasi do'ipi Cristore ëjaëre pare cuasama'cohua'ipi jaje yo'oye pa'iji.

⁵ Jaje cui'ne nomiopi io sïopë cañapi puama'o Maija'quëre seço pa'ito panita'a Maija'quë quë'ro ayere asase'ere quëaco pa'ito, co'aji ëjëni huajëya'ye ña cuañoji, naña peo hue'ñarepa tãase'eje pa'ïopi quëa do'ipi. Èjëpi jerepa pa'i caye iñoñe a'ë, sïopëna cañapi puane cato.

⁶ Nomïopi sïopë puama'o pani nañare peo hue'ñarepa hueo jeojaco, te'ere papi. Jaje pa'ina, nañare hueo jeoni huajëya'ye pa'ima'copi cuasani puajaco, io sïopë.

⁷ Èmë cato i sïopë puane peoji, Maija'quëje pa'ire de'huasiquë me puaquë'ni. Jaje pa'ina, ëmë cato Maija'quë de'oquërepa pa'iyere iñoçai pa'iji. Jaje pa'iquëta'are nomio cato ëmë de'oquë pa'iyere iñoçai pa'ico.

⁸ Maija'quë ëmëre de'hua maca nomio ayepi neñe papi. Nomïota'are ëmë ayepi de'huapi.

⁹ Èmëni caquë Maija'quë nomiore nepi. Nomïoni caquë ëmëre neñe papi.

¹⁰ Ja do'ire hujñaohua'ire iñoñere caco nomio io sïopëna çapi pë'pësico pa'iyë pa'iji.

¹¹ Jaje pa'iquëta'a mai sehuosicohua'i pa'iyë cato nomio peoto ëmë pa'iyë peoji. Jaje nomiopi peotoje ëmëje pa'iyë peoji.

¹² Èmë capëre ini nomiore de'huapi, Maija'quë. Ja yo'ose'e nuñere pa'ë. Jaje pa'iquëta'are yure cato nomiopi ëmëre ai de'huaye pa'iji. Si'aye iye yo'oye Maija'quëpi neñe a'ë.

¹³ De'oquë nomiopi Maija'quëre seço çapi sïopë puama'o pa'ito mësarupi ca de'huajë'ë, ñani.

¹⁴ Jaje pa'ina, iye yeja jare jöse'e maire ëmëohua'ire huajëya'ye nëñe neji, ëmëohua'ipi tsoa naña hue'eto.

¹⁵ Nomio cato tsoa ñaña hue'eni sihuaco io s̄jopè pè'pè ja'ñere isise'e sète.

¹⁶ Iye ayere yecohua'ipi jaje yo'o ma'ñe a'è cajè sañope cacohua'i pani iye a'è quèajè'è, yèquè asayere ye'yaye. Yèquè cuasayeje pa'ye yequè hue'ña sehuosicohua'ijè cuasayè, iye yo'oyese'e cato.

Èjaè Ao Ai Pa'ise'ere Cuasajè Tayo Yo'ose'e

¹⁷ Jaje pa'iquèta'are mèsaru tsi'sijè yo'oyepi mèsarute còcati'ñe pa'yepi mèsarute co'a de'huaye pa'ina, asaquè mèsaru yo'oye sihuama'è iye toya ja'hua toyayè.

¹⁸ Maija'què coca cañu'u cajè tsi'si maca tsècapèa huahuejè yo'oyè cajè yè'ère quèayè. Quèajèna, jaje pa'iji cayè cuasaye nèiji, yè'èpi.

¹⁹ Mèsarute tsècapèase'e huahueni pati'ñe nèiñe jèa tì'añe peoji. Jare jaje huahueye pa'iji. Jaje yo'ojèna, nuñerepa sehuosicohua'i pa'iyè ña'ñe pa'iji.

²⁰ Jaje pa'iquèta'are mèsaru tsècapèa huahueni tsi'sini ao a'ñe nuñerepa mai Èjaè tse peoji,

²¹ mèsaru ao a' maca tì'aèna, pa' ñape ao du'ruija'a a' do'ire, yecohua'ipi ao èa ju'ijèna, yo'o do'ire cui'ne yecohua'ipi ñese còno ucu cuepere pajè yo'o do'ire.

²² ¿Huè'e pacohua'i sète me yo'ojè huè'ena ucujè a' ma'ñe'ni? Mèsaruse'e a'ijèna, nuñerepa peocohua'i mañapi huajèya'ye nèina, ñañè. Ja yo'oyepi Maija'què tsecohua'ini co'aye yo'oyè, mèsaru. ¿Jaje yo'oto yè'è me mèsaru yo'oye de'oyerepa yo'oyè cacaiye'ni? ¡Mèsaru yo'oye sihuacaiye pa'ñè!

Èjaè Ao Ai'ne

(Mt 26.26-29; Mr 14.22-25; Lc 22.14-20)

²³ Yè'è mèsarute ye'yase'e Èjaèna ye'yese'e paji'i. Jare ye'yahuè, mèsarute. Ite cajei yo'oyeje pa'ye yo'oque cosoquè tseja jèo cuañoja'a ñami na'liquèna, Èjaè Jesupi jujuma' ao ini,

²⁴ Maija'quère pèpani cui'ne yeteni huahuequè capi: "A'ijè'è. Iye a'ñe cato yè'è capè a'è. Mèsaru de'oye pa'ja' ñere caquè isiye a'è. Yè'è yo'ose'ejè pa'ye yo'ojè'è, yè'èni cuasajè."

²⁵ Cui'ne ao a'ni tètisi jeteyo'je ucu duruhuè i jèñapi ini capi: "Iye ucu duruhuè pa'iyè cato yè'è tsie a'è. Iye do'ipi Maija'què mami huajè ca nèose'e pa'iji. Jaje pa'i do'ire ucuye ñape yè'èni cuasajè yo'ojè pa'ija'cohua'i pa'ijè'è."

²⁶ Jaje yo'oni mèsaru i ju'ise'ere quèa iñojè yo'oyè, ao a'ñe ñape cui'ne iye ucu duruhuè ucuye ñape, i dai macaja'a. Jaje yo'ojè pa'ijè'è.

Ñeje Yo'oye Pa'iji, Èjaè Ai Pa'ise'ere Cuasajè Yo'oye

²⁷ Èjaère pa'è cuasama'pè mai Èjaè a' pa'ise'ere coa huèojè a'ini, cui'ne coa huèojè ucuni sañope mai Èjaè capère cui'ne i' tsiere yo'oyè, co'ayere.

²⁸ Ja do'ire ja yè'ta'a iye ao a'ima'nè cui'ne ucuma'nè pa' ñape joñoa co'ye ña'ñe pa'iji.

²⁹ Jaje pa'ina, Èjaè capè ayere cuasama'è coa huèojè iyerè a'ini cui'ne iyerè ucuni ja co'ayere do'iquèpi yo'oji.

³⁰ Jaje pa'ina, jai pa' mèsaru acohua'i ju'icohua'i cui'ne tutu peocohua'i pa'iyè. Jaje yo'ojè yecohua'i jujuhuè.

³¹ Jaje pa'iquèta'are mai joñoa co'aye pa'iyere nejojè ñare pajè a'ito Èjaè maire sañope yo'o do'i què'iohua'ire ña'ñe pa'iji.

³² Jaje pa'iquèta'are Èjaèpi maire tayojèna, sañope caquè si'seji, maipi iye yeja acohua'i ja're còni toa yejana saiye pajajè caquè.

³³ Jaje pa'iyè sète Maija'què do'ijè maña Jesús ju'ise'ere cuasajè tsi'sisicohua'i pani yecohua'ire uteni si'aohua'i tsi'sirena, te'e a'ijè'è.

³⁴ Ao èa ju'icohua'ipi cui'na maca tsioni yo'osi do'ire Maija'què si'sema'è pa'ijaquè cani yecohua'ini ao èato huè'ere pana a'ñe pa'iji. Yequeta'a yè'èpi sani ne de'huasi'i, mèsarute do'i ña maca.

12

Maija'què Joyopi Pai Ñapere Tutu Isiye

¹ Maija'què do'ijè mèsarute quèasi'i, Maija'què joyo pa' ñapere tutu isiye.

² Mèsarupi asayè, ja yè'ta'a sehuoma'cohua'i pa'inè pa' de'huasi diusuna saijè seje pa'ise'e ti asama'cohua'ina.

³ Jaje pa'ina, yure mèsarute quèaye yèyè, iyerè. Jesús co'acquè api caquè cato Maija'què joyo tutupi caye paji, cui'ne Jesure Èjaèpi caquè cato de'o joyopi caye pa'iji.

⁴ Jare te'e Maija'què joyopi isiquèta'a pa' ñapere tñe pa'ye isiye pa'iji, tutu.

⁵ Jaje pa'ina, pa' ñape Èjaè Jesure necaiye pa'iji, tñe pa'ye. Jaje pa'iquèta'are te'i api, Èjaè cato.

⁶ Pa' ñape tñe pa'i co'amañare yo'oye pa'iji. Jaje pa'iquèta'are Maija'què cato jare ipi pa' ñapere yo'o huèojèna, yo'oyè.

⁷ Maija'quëpi j joyo ayere pai ñapere isiji, tiñe pa'i tutu si'aohua'i sa'ñe cõcaijë de'oye pa'i ja'ñere caquë.

⁸ Yecohua'ini Maija'quë joyopi isiji, Maija'quë yëyere ta'ñe asa ti'añere. Yecohua'ini jare ja joyopi isiji, si'ayerepa asacohua'i pa'ijë yecohua'ire ye'ya ja'ñere.

⁹ Yecohua'ini jare ja joyopi isiji, nuñerepa ne ti'añe pa'iji asayere. Cui'ne yecohua'ini ju'icohua'ire jujuyere isiji.

¹⁰ Yecohua'ipi pai yo'o ti'a ma'ñere yo'oyere isi cuañoñë. Yecohua'ipi Maija'quë quë'ro ayere asase'ere quëa tuture isi cuañoñë. Yecohua'ipi isi cuañoñë, coso joña caye ta'ñe asaye cui'ne nuñerepa de'oye caye asayere. Yecohua'ini isiji, yeque tiñe cocapi ca ja'ñere. Cui'ne yecohua'ini ja coca case'ere asani quëayere isiji.

¹¹ Jaje pa'iquëta'are si'aye ja Maija'quë joyopi yo'oji, j yëyeje pa'ye pai ñapere.

Sehuicohua'i Te'e Capë Pa'iyë

¹² Pai capë jaiye te'ñapi tsi'sisicopi pa'iji. Jaje pa'icota'a te'e capë a'ë. Jaje Cristoje pa'iji.

¹³ Jaje pa'ina, mai si'aohua'i judío pai, griego pai, jo'yaohua'i panita'a jo'yaohua'i peocohua'i si'aohua'i te'e capë acohua'i pa'iyë, te'e joyopi dosi do'ire. Jaje pa'ina, si'aohua'ire maire joyo ayere õcupi.

¹⁴ ¿Me pai capë pa'ico'ni, te'te maca pani? Jaje pa'ina, jaiye te'ñapi pa'icoa.

¹⁵ Quëopi caco pani ca'ñe pa'io: "Jëtëje ñani yë'ë cato yecoa'ë." Jaje canije capëre hua sani tiõ ponëni pa'iyë peoji.

¹⁶ Panita'a cajoropi caco pani ca'ñe pa'io: "Ñacoaje ñani yë'ë cato yecoa'ë." Jaje canije capëre hua sani tiõ pa'iyë peoji.

¹⁷ ¿Si'a capë ñacoase'e pa'ito me asara'reni? panita'a ¿si'a capë cajorose'e pa'ito me yë'era're'ni?

¹⁸ Jaje pa'ina, Diusupi ñaquë si'a te'ñare tsioni te'ore nepi, j yëyeje jarote jaopi pa'ijaco caquë.

¹⁹ Jaje pa'ina, si'a capë te'ese'e pa'ito, ¿jerore patira'oni yeque yo'oye?

²⁰ Jaiye te'ñapi pa'iquëta'are yure cato te'e capë pa'iji.

²¹ Ñacoapi jëtëre ca ti'añe peoji: "Më'ëre ne cuañoñe pañë." Cui'ne siõpëpi quëore, "më'ëre ne cuaño'mo pa'iyë," ca ti'añe peoji.

²² Coa ai jerepa tutu peoye cõcai ma'ñeje pa'ye nëiñepi ai jerepa maire cõcaiye a'ë. ¿Ja peoto me pa'iyë'ni?

²³ Jaje pa'ina, iti mai ai a'ri maña do'i quë'ye a'ë cayere jerepa ñare pajë su'ñecaiyë, cui'ne tiñarepa iñoñe peoyere ai de'oye ñacaiyë.

²⁴ Tiña ñañe cato airepa de'oye ñacaiye pañë. Jaje pa'ina, Maija'quëpi pai capë de'huapi, do'i peoye ña cuañoñepi jerepa do'i quë'ye pa'ijacquë caquë.

²⁵ Jaje pa'ina, pai capë cato si'a te'ñapi tsiosicopi te'ere cuasajëje pa'ye sa'ñe cõcaio pa'ico.

²⁶ Jaje pa'ina, te'e te'te capë a'si ju'ito si'a capë ai yo'oye pa'iji, cui'ne yequeje te'e te'te de'oye ne cuaño'to si'a capë sihuaye pa'iji.

²⁷ De'oji, jaje pa'iyë sëte. Mësaruru sehuicohua'i cato mësaruru pai ñape Cristo capë acohua'i a'ë.

²⁸ Jaje pa'ina, Maija'quëpi sehuicohua'ire ñacaija'cohua'i ñeje pa'ijajë cuasapi. Jaje pa'ina, nepi, du'ru macare pare j doce jëjo saocohua'ini. Ja jeteyo'je Maija'quë cayere asani quëacohua'ire nepi. Cui'ne ja jeteyo'je Maija'quë coca ye'yacohua'ire nepi. Ja maca ai jeteyo'jerepa pai yo'o ti'a ma'ñe yo'ocohua'ire nepi. Cui'ne ju'icohua'ire ne co'yacohua'ire nepi. Cui'ne paire de'oye cuasayepi cuañecohua'ire nepi. Cui'ne yequë cocapi cacohua'ire nepi.

²⁹ ¿Si'aohua'irepa j doce jëjo saoyeje pa'iohua'ise'e pa'iyë? Pañë. ¿Si'aohua'irepa Maija'quë quë'ro aye asase'e quëacohua'ise'e pa'iyë? Pañë. ¿Si'aohua'i Maija'quë coca ye'yacohua'ire pase'e pa'iyë? Pañë. Panita'a ¿Si'aohua'i pai yo'o ti'a ma'ñe yo'ocohua'ise'e pa'iyë? Pañë.

³⁰ ¿Si'aohua'i ju'icohua'ire ne co'ya tutu pacohua'ire pase'e pa'iyë? Pañë. ¿Si'aohua'i tiñe coca cacohua'ire pase'e pa'iyë? Pañë. ¿Si'aohua'i tiñe coca asani se quëacaicohua'ise'e pa'iyë? Pañë.

³¹ Jaje pa'ina, mësaruru cato ai de'oye tuture pañu'u cuasajë yëjë'ë. Jaje pa'ina, yë'ëpi mësarute ai jerepa tutu de'oye quëasi'i.

13

Oiyere Quëaye

¹ Yë'ëpi si'a pai coca caquëpi cui'ne huiñaohua'i coca caquëpi paire oima'quë pani, coa huatihuë té'cajëna, pisiyeje pa'i a'ë. Panita'a coa quëna de'huana té'cajëna, pisiyeje pa'i a'ë.

² Cui'ne si'aye Maija'quë quë'ro aye asayere quëaquëpi cui'ne si'aye pai ña ma'ñe ñaquëpi cui'ne si'aye ta'ñe asaquëpi cui'ne si'aye Maija'quëpi nequëre pare cuasaquëpi ai cutiohua'ire tirona cuañe saquëpi ja yë'ta'a paire oima'quë pani coa caquë a'ë.

³ Cui'ne si'aye yë'ë paye yecohua'ina huahuecai yo'okuëpi cui'ne yë'ë capëre pajë yecohua'i do'ire ëo cuañoja'core isiquë yo'okuëpi ja yë'ta'a paire oima'quë pa'ito si'aye iye yo'oye coaiye paji.

⁴ Paire oiquë cato; sañope yo'oyere quëcoquë api, paire oi coçaiquë api, yecohua'i payere ëa ñaquë pëima'quë api, yë'ë jerepa pa'i a'ë cama'quë api,

⁵ ai jerepa pa'i a'ë cuasaquë yo'oma'quë api, ise'e yo'oye pa'iji cuasaquë yecohua'i yëyere meñe ña'no toma'quë api, pëtitema'quë api, co'aye ite yo'ose'ere cuasaquë oima'quë api,

⁶ yecohua'i tayojë co'aye yo'oyere ñaquë sihuama'quë api, coa ai jerepa nuñere pare ñaquë sihuaquë api,

⁷ si'aye ai yo'oye pa'itoje quëcoquë api, de'hue neñe pa'iji cuasaquë, de'oyere pa'ija'quë caquë utequë api, cui'ne dahuëre cuasare paquë yo'okuë api.

⁸ Paire oiye carajai ma'ñe a'ë. Maija'quë quë'ro ayere asani quëayeta'a yequë mu'se carajai ja'ñe a'ë. Yequë coca caye cui'ne ta'ñe mai asaye carajai ja'ñe a'ë.

⁹ Jaje pa'ina, mai asaye cui'ne Maija'quë quë'ro ayere asani quëaye jopo carase'e a'ë.

¹⁰ Jaje pa'ina, yequë mu'se maipi peo hue'ñarepa asa tija' maca, si'aye mai te'te maca asajë quëase'e carajasipi.

¹¹ Yë'ë tsihua'ë pa'inë jare tsihua'ë cayepi cui'ne jare tsihua'ë cuasayepi cui'ne tsihua'ë asaquë yo'oyepi yo'ohuë. Yo'osiquëpi yureta'a ai ëmë de'oni si'aye tsihua'ë pa'inë yo'ose'e jeohuë.

¹² Jaje pa'ye yure, mai coa huesë ëaye Maija'quë coca asayë. Ai tsiña de'hua poresicore ñañeje pa'ye asayë, mai. Jaje pa'isicota'are tiñarepa ñaja'cohua'i a'ë. Yë'ë yure cato coa te'te maca ñañë. Jaje pa'iquëta'are yequë mu'se Diosute ñaja'quë a'ë, yë'ëre i ñañeje pa'yerepa.

¹³ Maija'quëre necaiquëre pare asaye, paire oiye, cui'ne yequë mu'se pa'i ja'ñere uteye iye cato ti pani huesë ja'ñe a'ë. Si'aye jerepa pa'ye cato paire oiye a'ë.

14

Yequë Pai Cocapi Cayere Ñare Pajë Caye

¹ Paire oicohua'i pa'ijë'ë. Diosu de'oto tuture pare jaiye pañu'u cajë ai yëcohua'i pa'ijë'ë, cui'ne i quë'ro ayere asani yecohua'ina se quëacaiyere jerepa yëcohua'i pa'ijë'ë.

² Jaje pa'ina, yequë pai coca caquë cato pa'ini caye paji. Maija'quëni caji. Jaje pa'ina, pai asaye ti pañë, i caye. Joyopi cato me asaye'ni. Jaje pa'ina, ja cato yeque a'ë pai asa tija' ma'ñe a'ë.

³ Jaje pa'iquëta'are Maija'quë quë'ro ayere asani quëaye cato paire quëaye a'ë Maija'quëre cuasayere ñese mëjajë cajë, yo'o jujacohua'ire sihua ëaye ca huëoye a'ë, cui'ne oicohua'ire yëhuo huasoye a'ë.

⁴ Jaje pa'iquëta'are Maija'quë isi coca caquë cato ija'a jerepa Maija'quëre cuasaquë pa'iye neñe a'ë. Cui'ne Maija'quë quë'ro ayere asani quëaquë cato sehuocohua'i Maija'quëre jerepa cuasajë pa'i ja'ñere coçaiquë api.

⁵ Si'aohua'i mësaruru yeque coca ca tuturepa Maija'quë isise'e pacohua'i pa'ijë'ë, cayë, yë'ë cato. Jaje caquëta'a jerepa yëyë, mësarupi Maija'quë quë'ro ayere asani yecohua'ire se quëayere pajë'ë caquë. Ja quëayepi jerepa de'oji. Yeque cocapi casi maca iti case'ere asani sehuosicohua'ina se quëacaicohua'ipi pa'ijëna, cajë'ë, yequë cocapi, sehuosicohua'ipi jerepa Maija'quëre cuasajë pa'ija'cohua'ire.

⁶ Maija'quë do'ijë, yë'ëpi mësaruru quë'rona do'i saisiquëpi yeque cocapi caquë pa'ito mësarute ti coçaiye peoji, yë'ë caye. Jaje pa'iquëta'are Maija'quë ñnose'ere, panita'a huajëye asase'ere quëayere, panita'a Maija'quë quë'ro ayere asani quëayere panita'a Maija'quë cocare ye'yayere yo'onita'a mësarure coçaiyë.

⁷ Cañu'u, jetu juiyere panita'a pi'cohuë juiyere. Ja je'quë de'oye juima'pë pa'ito jare juiyë cajë asaye peoji.

⁸ Cui'ne duruhuëpi tiñarepa pisima'o pa'ito huajo sacohua'i ne de'huaye pañë, huajo ñese sa ja'ñe.

⁹ Cui'ne mësarute pa'iji. Jaje pa'ina, mësarupi yequë cocapi cacohua'i pa'ito yecohua'i asaye pañë. ¿Me jare cayë cajë asaye'ni, coa peo de'otona case'eje pa'ye pa'ito?

¹⁰ Si'a yeja jaiye pai coca pa'iji. Si'aye asayese'e pa'iji, iti coca acohua'i cato.

¹¹ Jaje pa'iquëta'are yë'ëpi yecohua'i cocare asama'ë pani ti pa'iyë. Cui'ne ja coca caquëje ti pa'iji, yë'ëre.

¹² Maija'quë joyo tuture paye yëcohua'i sëte Maija'quëre ai cuasajë pa'iyere sehuosicohua'ire quëa tuture yëjë'ë, jaohuaipi mëojajë caquë.

¹³ Jaje pa'ina, tĩne coca caquë pani Maija'quëre señe pa'iji, iti casi cocare de'oye se quëaja'a tuture isijaquë caquë.

¹⁴ Cui'ne yë'ëpi Maija'quëre tĩ cocapi seni asama'ë pa'iyë, yë'ë caquë señe, nuñerepa joyo cato Maija'quëni sequëta'a.

¹⁵ ¿Jaje pa'ito me yo'oye pa'iquë'ni? Joyopi señe pa'iji. Joyopi sequëta'a yë'ëje asaquë señe pa'iji. Joyopi jëjëne pa'iji, cui'ne yë'ëje asaquë jëjëne pa'iji.

¹⁶ Jaje pa'ina, më'ë joyopi Maija'quëre sihuaquë de'okuëre pa'ni caquë sihuaquëna, yequëpi më'ë ja're çoni te'e sihuacaiye pasipi, ja coca asama'ë pa'i do'ire.

¹⁷ Jaje pa'ina, më'ë Maija'quëre pëpayepi de'oyerepa pa'itoje iti asaquëpi joyo sihuaye ñese më'ëne pasipi.

¹⁸ Maija'quëre ai de'oji cayë, mësarucaye jerepa tĩne pa'i cocapi caquë pa'i.

¹⁹ Jaje pa'iquëta'are sehuosicohua'i tsi'si sitona cayë ai jerepa de'ora'pi, te'e jëtë pa'i yë'orepa, ñohua'i asa cocapi yecohua'ire ye'ya ja'ñere caquë. Yë'ëpi pa'i asama' cocapi jaiyerepa case'e cato yecohua'ire çocaiye peoji.

²⁰ Maija'quë do'ijë, tsi cuasayeje pa'ye cuasama'pë pa'ijë'ë. Tsiye pa'iohua'i pa'ijë'ë, co'aye yo'oyere yo'oma'cohua'ipi. Jaje pa'iohua'ita'a mësarucuasayere aiohua'i pa'ijë'ë.

²¹ Maija'quë cuañesi toya pëpë ayepi caji: "Caja'quë a'ë, iye paire yequë pai cocapi tĩ pa'i yë'oja'a. Jaje catoje ti asani sehuoma'pë pa'ija'cohua'i a'ë, yë'ë cayë caji, Ejaë."

²² Jaje pa'ito tĩne coca cayë cato sehuoma'cohua'ire ññojë cayë a'ë, pa'ni sehuosicohua'ire. Jaje pa'iquëta'are Maija'quë quë'ro ayere asani quëaye cato sehuosicohua'ini cayë a'ë, pa'ni sehuoma'cohua'ire.

²³ Jaje pa'ina, si'a sehuosicohua'i tsi'si sitopi, si'aohua'i tĩ cocapi cajë yo'oto huesëcohua'ipi, panita'a sehuoma'cohua'ipi çoni cacasicohua'ipi cuasaja'cohua'i pa'ini cuepejë yo'ojë cayë, cajë.

²⁴ Jaje pa'iquëta'are si'aohua'i Maija'quë quë'ro ayere asani quëajë yo'otota'a sehuoma'cohua'ique panita'a huesëcohua'ique çoni cacasicohua'ijë ñohua'i co'aye yo'oyere asa quëquëjë cui'ne ñohua'i pa'iyë asa tĩ'aja'cohua'i a'ë, si'aohua'i cayere asajë.

²⁵ Jaje yo'ojëna, ñohua'i joyo co'aye pa'iyepi tĩñarepa ña cuañoquëna, Maija'quëre do're ja'rujë seja'cohua'i a'ë cui'ne Maija'quë nuñerepa mësarucaye ja're pa'iji caji'cohua'i a'ë.

De'oyerepa Tsi'sicohua'i Yo'oye

²⁶ Jaje pa'ito Maija'quë do'ijë iye a'ë, iti yo'oye: Tsi'sicohua'i pani yecohua'ipi Maija'quëre jëjëne payë. Yecohua'ipi ye'yaye payë. Yecohua'ipi Maija'quë ñnose'ere quëaye payë. Yecohua'ipi tĩ cocapi cayë payë. Ja case'ere yecohua'ipi quëaye payë. Jare yo'ojë'ë, sehuocohua'i joñoa jerepa Maija'quëre oiyë ne pajajë cajë.

²⁷ Tĩ cocapi cacohua'i pani cajajë cayaohua'i panita'a toasocohua'i pa'i ñape te'ohua'ise'e cajajë. Cajëna, yecohua'ipi iti case'ere quëajaquë.

²⁸ Jaje pa'iquëta'are tĩne coca case'ere quëaquë peoto itijë cayë pajë'ë, sehuosicohua'i tsi'si sito. Jaje pajë coa pa'i ñape Maija'quëse'ere joyose'ere cuasajë señe pa'iji.

²⁹ Cui'ne Maija'quë quë'ro ayere asani quëayeje cayaohua'i panita'a toasocohua'i cajajë cajëna, yecohua'ipi nuñere pa'ni cajë iti quëayere neñajajë.

³⁰ Jaje pa'iquëta'are tsi'sito ñu'iquëre Maija'quëpi ññoquëna, jaëpi casi'i caquë yo'oto ja maca du'ru caquëpi jëoñe pa'iji. Jëoquëna, yequëpi cayë pa'iji.

³¹ Jaje pa'ina, si'aohua'i mësarucaye Maija'quë ñño coca asacohua'i te'ohua'ise'e cayë pa'iji, si'aohua'i ye'ye ja'ñere cajë. Cui'ne yo'o jujahuë cuasacohua'ijë taise'eje pa'iohua'ipi huëi ja'ñere cajë yo'ojë'ë.

³² Maija'quë ayere asani quëacohua'i cato ñohua'ipi ñohua'i joyo nëñere de'oye ña'ne pa'iji, tayo ma'ñe cajë.

³³ Maija'quë cato huesë ëaye nëñere isima'quë api. Maija'quë cato de'oye ai cuasama'pë jo'cua pa'iyere isiquë api.

Si'a hue'ña Maija'quë pa'i yo'ojë pa'iyere pa'iji.

³⁴ Nomiohua'i cayë peoji, sehuosicohua'i tsi'si sito. Cayë ëses'e a'ë. Jaje pa'ina, nomiohua'i sehuojë cama'pë jo'cua pa'ijë'ë, Maija'quë judío paire cuañese'eje pa'ye.

³⁵ Seni asa'nu'u cuasacohua'i pani, ëjëni señe pa'iji, huë'ena sani. Jaje pa'ina, nomiopi Maija'quë coca asa hue'ñapi caco pa'ito de'oye ña cuañoñe paji.

³⁶ De'hua cuasajë'ë. Iye Maija'quë coca mësarupi du'ru ca huëoma'pë paë'ë. Mësaruse'eyë coca asani sehuoma'pë paë'ë, yecohua'ijë mësarucaye jerepa tsoe asahuë, cui'ne sehuohuë, iye cocare.

³⁷ Maija'quë ññosi coca quëaquë a'ë cuasaquëpi, cui'ne Maija'quë joyopi caquëna, cayë cuasaquë cato iye yë'ë mësarute toyase'e mai Ejaë cuañese'ere toyapi caquë tĩñarepa asaye pa'iji.

³⁸ Jaje pa'iquëta'are yë'ë toyase'ere Maija'quë cuãñese'e a'ë caquë ñama'quëpi quëaquë pa'ito i cayeje asama'pë pa'ijë'ë.

³⁹ Jaje pa'iyë sëte Maija'quë do'ijë maña Maija'quë quë'ro aye asase'ere yecohua'ire se quëayere cajë yo'oyere yëjë'ë. Yequë coca cayeje ësema'pë pa'ijë'ë.

⁴⁰ Si'aye de'oye ñare pajë yo'ojë'ë. Iti pa'iyëje coa huesë ëaye yo'oma'pë pa'ijë'ë.

15

Cristo Ju'isiquëpi Huëise'e

¹ Yure Maija'quë do'ijë, mësarupi yë'ë ja'në huaso coca quëase'ere co'ye cuasa cojajë caquë cayë. Iye coca cato mësarupi asani nuñere pa'ë cajë de'huase'e a'ë. Jaje pa'ina, mësarupi itina tseasicohua'ipi nuñerepa pa'iyë.

² Cui'ne iye coca quëa do'ija'a mësarupi huasosicohua'í pa'iyë, mësarupi nuñerepa itire pa'ini. Jaje pa'iquëta'are yequere pa'ini coa tayo asasicohua'í a'ë.

³ Du'ru macarepa mësarute ye'yahuë, yë'ëre ye'yase'ere. Mësarute toyase'e Maija'quë coca cayeje pa'ye ye'yahuë, Cristo mai tayo yo'ojë pa'í do'ire jucacaise'ere.

⁴ Maija'quë coca toyase'ëje pa'ye Cristo tasiquëpi toaso mu'seña acona huëji'i, huajëquërepa.

⁵ Huëisiquëpi Pedrona ñaipi cui'ne ja jeteyo'je i jëjo saocohua'ina ñaipi.

⁶ Jeteyo'je ñaipi, quinientos ai jerepa sehuosicohua'ina. Ja yë'ta'a iti ñasicohua'í jai pai pa'iyë. Yecohua'ise'e ju'isicohua'í pa'iyë.

⁷ Jeteyo'je Jacobona ñaipi, cui'ne jeteyo'je si'aohua'í i jëjo saosicohua'ina ñaipi.

⁸ Ai tëji huë'ñare pana yë'ëreje ñaipi, ti ñaño pa'ñe pa'ita'are. Coa huñña coase'ëje pa'ye yë'ëre yo'osiquëpi Jesure ñahuë.

⁹ I jëjo saocohua'í de'hue de'ocohua'í a'ë, yë'ëre tëto saisicohua'ipi. Jaje pa'ina, yë'ëpi Maija'quë paire sañope co'aye yo'ohuë. Ja do'ire i jëjo saoque hue'e ti'añe peoyë.

¹⁰ Jaje pa'iquëta'are Maija'quë coa isisi do'ipi jaje pa'í pa'iyë. Yë'ëre i coa isise'e ne ma'ñe nëañe papi. Jaje pa'ina, yë'ëpi si'a i jëjo saocohua'í jerepa nehuë. Yë'ëpi yo'oye pahuë. Maija'quëpi yë'ë ja're coní yo'oquëna, i coa isiyepi yo'ohuë.

¹¹ Jaje pa'iquëta'are yë'ë yo'ose'e cui'ne i jëjo saocohua'irepa yo'ose'e de'oji. Ja yo'ose'ere sañope caye peoji. Jesucristo coca yëquë quëajëna, mësarupi sehuose'e a'ë, itirepa.

Ju'isicohua'í Huëiye

¹² Yëquë cato mësarute quëahuë, Cristo ju'isiquëpi huëise'ere. Jaje pa'iquëta'are mësarupi acohua'ipi cayë, ju'isicohua'í huëiye peoji. ¿Me yo'ojë jaje caye'ni?

¹³ Jaje pa'ito ju'isicohua'í huëiye peoto, Cristoje huëiye papi.

¹⁴ Jaje pa'ito Cristopi huëima'ë pa'isiquë pa'ito yëquë quëaye ti do'í peoye a'ë, cui'ne mësarupi pa'ija'cohua'í a'ë cuasajë pa'iyëje ti do'í peoye a'ë.

¹⁵ Diusupi ju'isiquëni Cristore huëopi cajë quëahuë. Ja quëa do'ire cosocohua'ipi pa'iyë, ju'isicohua'í huëiye peoto.

¹⁶ Jaje pa'ina, ju'isicohua'ipi huëiye pato Cristoque huëiye pasiquë pa'ini.

¹⁷ Jaje pa'ina, Cristopi huëima'ë pa'isiquë pa'ito mësarupi sehuose'ëje co'ai ma'ñe pa'iji, cui'ne mësarupi ja yë'ta'api co'ayere pa'iyë.

¹⁸ Cui'ne Cristore sehuoni ju'isicohua'ijë coa ne huesësicohua'í pa'iyë.

¹⁹ Jaje pa'ina, Cristore mai uteyepi coa iye yeja pa'iyese'e co'aiye pa'ito mai pa'iyë, yecohua'ire jerepa teaye pa'iohua'í.

²⁰ Jaje pa'iquëta'are Cristo ju'isiquë pa'isiquëpi huëji'i. Huajëquërepa jaë api, du'ru macarepa ju'isicohua'í aquëpi ti huëisiquë.

²¹ Adánpi iye yeja si'a pai ju'iñe huëopi. Jaje cui'ne Cristoje te'í ëmëpi ju'isicohua'í huëi ja'ñe huëopi.

²² Jaje pa'ina, si'aohua'í Adán acohua'í pa'í do'ire ju'iñe, cui'ne Cristo acohua'í pa'í do'ire si'aohua'í pa'iyë paja'cohua'í a'ë.

²³ Jaje pa'iquëta'are pai ñapere nuiñe pa'iji. Jaje pa'ina, Cristo cato du'ru macarepa tase'epi quëquëna, tëayeje pa'ye yo'osiquë api, ju'isiquëpi huëisi do'ire. Jeteyo'je Cristo dai maca ite secohua'í huëija'cohua'í a'ë, i huëise'ëje pa'ye.

²⁴ Cristopi si'aye ëja pa'ise'ere, cuãñe pa'ise'ere, cui'ne si'a cuãñe tuturepa nejni i ëjaë pa'ise'ere péca ja'quë Diusuna isisi maca ja maca yureta'a i yo'oyere yo'o saopi, tëji macarepa.

²⁵ Jaje pa'ina, Cristo cuãñequëpi pa'iji, si'aohua'ire ite sañope yo'ocohua'ire i quëo huë'ehuëna tsa'cu qe sao macaja'a.

²⁶ Si'aye sañope yo'oye meñe tsa'cu qesi jeteyo'je tējyere pana ju'iñere nejosipi, iti sañope yo'oyere.

²⁷ Maija'quëpi Cristore si'aye isipi, ipi si'aye cuañequë pa'ijaquë caquë. Jaje Maija'quë coca toyase'e caquëta'a Maija'quë ise'ere caye papi. Pëca ja'quërepa pa'ito me sehuoye'ni. Si'aye i nese'e a'ë.

²⁸ Jaje pa'ina, Cristopi si'aye meñe cuañequë de'oni ja maca yureta'a pëca ja'quë Diosuna meñe cuañë cuañoquë de'oja'quë api. Ite si'aye isisiquëna, ja maca Diosupi si'a co'amaña cuañequërepa pa'ija'quë api.

²⁹ Jaje pa'ito yecohua'i çme neñu'u cajë ju'isicohua'ipi ocore do cuañoñë cajë huajëcohua'ina oco do'ejë yo'oye'ni, ju'isicohua'ipi huëiye peoto? çMe neñu'u cajë ju'isicohua'ini oco docaiyë cajë yo'oye'ni?

³⁰ çCui'ne me yo'ojë mai si'anëpi ju'iñe quëno macare huajëya'ye pa'iyë'ni?

³¹ Maija'quë do'ijë yë'ë si'a mu'señapi ju'iñe yë'quë macare pa'iyë. Mësaruru mai Èjaë Jesucristore sehuosicohua'i pa'ijëna, yë'ë sihuayeje pa'yerepa iye ju'iñeje pa'iji. Coa caye ti peoji.

³² Yë'ëre ai sañope yo'ohuë, Efeso daripë paipi çucu yëcohua'irepa, yai yo'oyeje pa'ye. Jaje yo'ojëna, yë'ë johua'ire sañope yo'oque nese'e çiquere çocotira'ëni, ju'isicohua'ipi ti huëiye peoto? Coa pa'i cayeje añu'u cui'ne uçuñu'u ñamina'a ju'ija'cohua'i me pañe'ni cayese'e patira'pi, ju'isicohua'ipi huëiye peoto.

³³ De'hua ñajë pa'ijë'ë, yecohua'ipi mësarute co'aye yo'oyere ye'yajë, pa'i case'ejë pa'ye ñeje: "Co'a cajehua'ipi de'oye yo'oyere nejocaiçohua'i a'ë."

³⁴ Co'aye yo'oyere jeoni nuñerepa pa'iyena ponëjë'ë, co'aye yo'oma'pë pa'ijajë cajë. Yecohua'i mësaruru acohua'i Maija'quëre nuñerepa asama'cohua'ique pa'iyë. Jaje cayë, mësarurupi pañete yo'ore'ni cajë oijajë caquë.

çMe Mëoñe, Ju'isicohua'ire?

³⁵ Jaje pa'iquëta'are yequëpi seti'ñe pa'i api, çme pa'iohua'i ju'isicohua'i huëiye'ni? çMe pa'i ca'nire hue'ejaj'cohua'i a'ni?

³⁶ Coa huesëcuhua'irepa seña a'ë. Jaje seña, iti çare çasicohua'i pa'ito iti çapi ju'ini ne huesëcoa. Ne huesëquëna, itü ñëpi mëacoa.

³⁷ Mësarurupi hueare panita'a trigore çacohua'i pani iti ñëare çama'cohua'i a'ë, iti çare çacohua'i a'ë.

³⁸ Ja jeteyo'je Diosupi i yëyeje pa'i ça necaiquë api, pa'i ñape iti ñëa ñape i yëyeje pa'ye.

³⁹ Te'ojë pa'iohua'i pa'iyë pañë, ñajë'ë, iyere: Nëtërojaicohua'ipi tiñe pa'iohua'i pa'iyë, pi'api tiñe pa'iohua'i pa'iyë, tsiaya hua'ipi tiñe pa'iohua'i pa'iyë, pa'ire papi ai tiñe pa'iohua'i pa'iyë.

⁴⁰ Jaje cui'ne ma'tëmo acohua'ijë tiñe pa'ye johua'i de'ocohua'i pa'iyë payë. Pajëna, yeja acohua'ipi tiñe pa'iohua'i pa'iyë, johua'i de'ocohua'i pa'iyë.

⁴¹ Èsë miañe tiñe pa'ye a'ë, cui'ne ñañë miañe tiñe pa'ye a'ë, ma'ñoco miañeje tiñe pa'ye a'ë. Yequëjë ma'ñocoje yecohua'ipi ai miäjëna, yecohua'ipi a'ri maña miacohua'i pa'iyë, si'a yë'quë maca miañe pañë.

⁴² Jaje cui'ne ju'isicohua'i çapëje ja'ju çapëpi çasicopi tiñe pa'io huëija'coa, ti ju'ima'core papi.

⁴³ Co'aconi çarena, de'ocore papi huëija'coa. Tutu peo çapëre çarena, tutu quë'ioipi huëija'coa.

⁴⁴ Iye yeja çapëre ça huesorena, joyo pa'iyepi huëija'coa. Iye yeja pa'i çapë pa'iyëje pa'ye, cui'ne joyo acohua'i pa'iyëje pa'iji.

⁴⁵ Ñeje Maija'quë coca toyase'e çaji, ñeje: "Du'ru macarepa pa'i Adán cato çapë pa'iyë quë'i paji'i. Jaje pa'iquëta'are tëji Adán cato joyo pa'iyë isiquë api." Jaje pa'ina, ju'isicohua'ire pa'iyë isi tutu paji. Jaë cato Cristo api.

⁴⁶ Jaje pa'iquëta'are du'ru macarepa cato iye çapëpi pa'i huëoji. Ja jeteyo'je joyo pa'iyë huëoji.

⁴⁷ Jaje pa'ina, du'ru macarepa ëmë cato yepi de'huasiçquë paji'i. Jaje pa'ina, yeja aquë paji'i. Jeteyo'je ëmë cato ma'tëmo aquë paji'i, mai Èjaë Jesucristo.

⁴⁸ Jaje pa'ina, iye yeja çapë hue'ecohua'i yepi de'huasiçquë Adánje pa'iohua'i a'ë. Ma'tëmo acohua'ipi jare ma'tëmo aquë Cristoje pa'iohua'i a'ë.

⁴⁹ Adánje pa'iohua'i yure ña cuañoñë, mai. Jaje ña cuañosicohua'ita'a ma'tëmo aquë Cristoje pa'iohua'i pa'ija'cohua'i a'ë.

⁵⁰ Maija'quë do'ijë, caye yëyë, mësarute. Çapë cui'ne tsie quë'iohua'i Maija'quë cuañë t'e'te pa'iyë peoji. Ti carajaima'tona quëco ma'ñepi çoni pa'iyë peoji.

⁵¹ Jaje pa'iquëta'are mësarute quëaye yëyë, pa'i asa ma'ñere. Si'aohua'irepa ju'iñe paja'cohua'i a'ë. Jaje pa'iquëta'are si'aohua'i tiñe ponësicohua'i pa'ija'cohua'i a'ë.

⁵² Coa mal'ji tōñje pa'yerepa tējicore pare duruhuē jui maca asani pōnēsicohua'i pa'ija'cohua'i a'ē. Duruhuē pisi maca ju'isicohua'i huēija'cohua'i a'ē, ti ju'iñe paja'cohua'ipi. Cui'ne mai huajēcohua'i cato t'iohua'i pōnēsicohua'i pa'ija'cohua'i a'ē.

⁵³ Iye mai pa'ie carajaico sēte ti carajai ma'ñena suñañe pa'iji. Cui'ne ju'i capē pa'isicopi ti ju'i ma'ñena suñañe pa'iji.

⁵⁴ Iye mai pa'ie carajaico pa'isicopi ti pani huesēyena suñasi maca cui'ne mai capēpi ju'iñere pa'isicopi ti ju'i ma'ñena suñasi maca, ja maca yureta'a ju'iñe pa'ise'ere, toyase'e cayeje t'iasipi, ñeje: "Sañope yo'oye peoyerepa ju'iñe nēo cuaño.

⁵⁵ ¿Jorore ju'iñe mē'ē tutu yēquēre huaiye pa'iquē'ni? ¿Jorore ju'iñe pa'iquē'ni, yēquēre a'si tota ñaca pa'isico?"

⁵⁶ Tayo yo'oye a'ē, maire a'si ne huəñañe pa'io, pa'ie. Cui'ne Moisésre Diosu cuañese'epi tayo yo'oyere tutu isiji.

⁵⁷ Jaje pa'iquēta'are mai Ējaē Jesucristo do'ija'a Maija'quēpi ñese quēcoye isiji. Jaje pa'ina, de'oji cayē, ite.

⁵⁸ Jaje pa'ie sēte Maija'quē do'ijē maña, si'anēpi jerepa mai Ējaē co'amañare necaijē'ē, nuñerepa pa'yere. Jaje pa'ina, tsoe mēsarupi ta'ñe asayē, mai Ējaē ja're tsioni i co'amaña yo'oye cato coa yo'o ma'ñe a'ē cajē.

16

Sehuosicohua'ire Coçai Curiquēre Quēaye

¹ Yē'ē Galilea paire Cristore sehuosicohua'ire ye'yase'eje pa'ye yo'ojē'ē. Sehuosicohua'ire coçai curiquēre tsi'socohua'i pani, ñeje yo'ojē'ē.

² Domingo mu'seña ñape curiquē t'irona huajē'ē, pai ñape mēsarū nese'e sehuosicohua'ire coçai ja'ñere cajē. Huajē'ē, iti ne'ese'e ja'i maña yē'ē saisi maca tsi'so huēoni yo'oye paja'cohua'i. Mēsaruse'e du'ru tsi'sojē pa'ijē'ē.

³ Yē'ē jaro t'iasī maca mēsarū tsi'sosi curiquē cui'ne mēsarū jējo saocohua'ire quēa toya ja'o jējo saosi'i, Jerusalēna, sehuosicohua'ire co'amaña peocohua'ire coçai ja'ñere.

⁴ Yē'ēreje sat'ñe pa'ire nēina, yē'ēpi saiquē pa'ito yē'ē ja're sat'ñe pa'iohua'a'ē, curiquē sacohua'ije.

Pablo Sasi'i Cuasaye

⁵ Yē'ē jaro sai maca saiye pa'iji, Macedonia yejaja'a. Ja jeteyo'je jaro Corinto yeja t'ijaja'quē a'ē, mēsarū quē'ro.

⁶ T'iani mēsarū ja're ai tsoe maca pati'ñe pa'i a'ē, panita'a yeque jaronā si'a oco tēcahuē pēaja'quē pa'ini. Ja maca yureta'a yequē huēña saija'quē a'ē. Saina, mēsarū coçati'ñe pa'iohua'a'ē, yē'ē sai ja'ñe.

⁷ Mēsarute coa sa sai ñañese'e yēye pañē. Mēsarū quē'rona tsoe maca pēani pa'yere yēyē, mai Ējaē jaje yēto.

⁸ Jaje pa'iquēta'are yure cato Efeso daripēna pēaja'quē a'ē, Pentecostēs mu'se t'ia macaja'a.

⁹ Efeso daripēna mai Ējaē co'amaña necaiye jaiye pa'iji. Jaje pa'ina, jai pai sehuoja'cohua'i a'ē, yē'ē quēa do'ipi cuasayeje pa'ina, jai sa'ro hui'yocaisicoje pa'ioipi pa'iji, Ējaē coa quēaja'a sa'ro. Jaje pa'iquēta'are jai pai yē'ē jaro saiye ēsejē sañope yo'oyē.

¹⁰ Timoteopi t'iasiquē pa'ito de'oye yo'ojē'ē, mēsarū ja're sihuaja'quēre cui'ne co'a ju'iñe paja'quēre. Jaēje mai Ējaē co'amaña nequē api, yē'ē neñeje pa'ye.

¹¹ Ja do'ire ite mēsarū acohua'i te'ije co'aye ñama'pē pa'ijē'ē. Coa ai jerepa de'oye coçaijē'ē, ai yo'oye peoye dani yē'ēre ñaja'quēre. Maija'quē do'ijē ja're utequē pasi'i, daina, ñasi'i caquē.

¹² Maija'quē do'iquēpi Apolospi mēsarute sehuosicohua'i ja're conī sani ñajaquē caquē ai seina, yure maca saiye pañē, capi. Jaje pa'iquēta'are yequē mu'se sani ñasipi, saiye pa'ina.

Pēpa Tējiye

¹³ Çaise'eje pa'iohua'i pa'ima'pē pa'ijē'ē. Mēsarū Maija'quēre necaiquēre pare asayena nuñerepa tseasicohua'ipi pa'ijē'ē. Ēmēohua'irepa do'i quē'iohua'i pa'ijē'ē, tutu quē'iohua'i.

¹⁴ Jaje pa'ina, si'aye mēsarū neñe pa'ito paire oiyepi neñē'ē.

¹⁵ Mēsarupi Maija'quē do'ijē tsoe asayē, Acaya yeja pa'iohua'i du'ru macarepa Maija'quē coa sehuosicohua'ipi Estēfanas tsēcāpēpi jaohua'ipi Maija'quē do'ijēre coçaijē pa'iyē, cajē.

¹⁶ Jaje pa'ina, mēsarute cayē. Mēsarupi jaohua'i cayere cui'ne si'aohua'i iye co'amaña coçaijē necohua'i cayere sehuocaijē pa'ijē'ē.

¹⁷ Sihuayē, Estēfanastre, Fortunatore cui'ne Acaicore mēsarū peo do'ire de'hue daisicohua'ipi pa'ijē yē'ēre coçatena.

¹⁸ Jaje pa'ina, jaohua'ipi dani yé'ère joyo sihua éaye quèa huasohuè. Jaje cui'ne mèsaruteje sihua éaye joyona quèa huasosicohua'i a'è. Jaje pa'iohua'ire mèsarupi de'oye cuasajè sihuajè ña'ne pa'iji.

¹⁹ Asia veja paipi sehuosicohua'ipi mèsarute pèpa saoyè, Aquila cui'ne ì paco Priscila conì. Cui'ne si'aohua'ì jaohua'ì huè'ena tsi'sisicohua'ìje mèsarure pèpa saoyè, mai Èjaè do'ire cuasajè.

²⁰ Si'aohua'ì sehuosicohua'ì mèsarute pèpa saoyè. De'oyere papi cuasajè sa'ne su'cuajè sihuajè pèpajè'è.

²¹ Yé'è Pabloje yé'è jètèpi mèsarute toyaquè pèpayè.

²² Yecohua'ipi mai Èjaè Jesucristore oima'cohua'ì pani nejo cuañosicohua'ì pa'ijajè. ¡Mai Èjaè Jesús daijè'è!

²³ Èjaè Jesucristopi mèsarute jaiye coa isijaquè, ì payere.

²⁴ Si'aohua'ire mèsarute yé'è oiyè jèjo saoyè, Cristo Jesure oi do'ipi. Ca tējihuè. Jaje pa'ijaquè.

2 CORINTIOS

Pablo Toyase'e Cayaye Acore Corinto Paina

¹ Yê'ê Pablo Maija'quê yê do'ipi Jesucristo jêjo saoque de'osiquê a'ê. Jaje cani cayê, i jêjo daoque a'ê caquê. Iye toya ja'hua toyayê, Maija'quê do'iquê Timoteo ja're conî, Maija'quê tsecohua'ina Corinto daripê pa'icohua'ina cajê, cui'ne Maija'quê paina cajê toyayê, si'a Acaya yeja pa'icohua'ina.

² Diusu Maija'quêpi cui'ne Jesucristopi mésarute i coa isiyere cui'ne co'a ju'ima'pê pa'iyere mésarute isijaquê.

Pablo Ai Yo'ose'e

³ De'oque pa'ni Diusu mai Êjaê Jesucristo pêca ja'quêre cañu'u. Jaêpi mai teaye pa'iohua'ire ñaquê oi cçai ja'quêrepa, cui'ne jaê api, mai ai yo'ojê oiyere ne yê'huaquê Diusure.

⁴ Jaje pa'ina, Maija'quêpi si'aye mai ai yo'ojê oiye ne yê'hua'ji, maipi i maire ne yê'huayeje pa'ye yecohua'ire ne yê'hua'jê caquê.

⁵ Jaje pa'ina, Cristo ai yo'ose'e maini ai pa'iji. Pa'ina, i ja're conî mai ai yo'oyê. Ja ai yo'oyeje pa'ye cui'ne Cristo do'ija'a jaiye payê, ne yê'hua' cuañõeje.

⁶ Jaje pa'ina, yêquêpi ai yo'oni, mésarupi ne yê'hua' cuañõeje pajajê cui'ne huaso cuañõeje pajajê cajê yo'oyê. Jaje pa'ina, Maija'quêpi yêquêre ne yê'hua'ni, mésarujê ne yê'hua' cuañõeje pajajê caquê yo'oji. Jaje pajê tutu hue'ejê yêquê ai yo'oyeje pa'ye ai yo'oye pa'itoje quêcojajê caquê.

⁷ Jaje pa'ina, nuñerepa mésarute cuasayê. Yêquê ai yo'oyeje pa'ye ai yo'ocohua'i cato cui'ne Maija'quê isiyere ne yê'hua' cuañõeje yêquê ja're payê, cuasayê.

⁸ Maija'quê do'ijê, yêquê Asia yeja pa'i maca ai yo'ose'ere cui'nare cuasajajê cajê quêaye yêyê. Yêquê jaro pa'i maca jêayerpa neñañe pa'ina, quêco tutu mañaje carajani cui'ne ñeje huajêcohua'i maña etayeqe cuasama'pê ai yo'ohuê.

⁹ Huani jeoja'cohua'ini nejose'je pa'iohua'ire nêji'i. Jaje pa'iquêta'are iye yo'ose'e cato ju'isicohua'ire huêoquêna, Maija'quêna quêcoyere ye'yaye paji'i. Co'ye yêquêja'a ne tî'acohua'i a'ê cuasaye pa'ja'ñere ye'yaye paji'i.

¹⁰ Maija'quêpi yêquêre huasopi. Jaje huasosiquêpi ja yê'ta'api huasoja'quê api, juti'ne pa'lyere pajê. Jaje pa'ina, yêquê ina quêco pajê pa'iyê, ai yo'oye pa'itoje cçaija'quê api cajê. Mésaru secai do'ire jaje yo'oja'quê api.

¹¹ Jaje pa'ina, mésarupi Maija'quêre yêquêni cuasajê secaijêna, cui'ne jai pai yêquêni cuasajê secaisicohua'i pa'ito, jai pai mésaru a'ê de'oji caja'cohua'i a'ê, Maija'quêre, i yêquêre de'oye ñacai do'ire.

Corintona Saima' Do'ire

¹² Iye yeja paire cui'ne mésarute de'oyerepa si'si peoyepi pa'ijê cui'ne nuñere papi yo'ohuê, caye nêji, yêquêre. Ja de'oye yo'ohuê cuasayepi yêquêre sihuaye pa'iji. Iye yêquê de'oye pa'iyere yêquê iye yeja ta'ñe asayepi pa'iyere pahuê. Coa Maija'quê oi isiyere cçaiyepi jaje pa'ê.

¹³ Yêquê mésarute se toya saoye toyama'pê pa'ê, tiñe pa'ye. Coa ai jerepa ñajê asa tî'añe toyahuê. Jaje pa'ina, ñani mésarupi si'aye asa tî'aja'cohua'i a'ê, cuasayê.

¹⁴ Jaje pa'ina, mésaru de'hue ari te'te maca asasicohua'ipi, mai Êjaê Jesucristo dai maca yêquêre sihuaja'cohua'i a'ê. Sihuajêna, yêquêpi mésarute sihuaja'cohua'i a'ê.

¹⁵ Iyere cuasaquê du'ru macarepa mésarute sani ñasi'i cuasahuê. Jaje yo'oque cayaye mésarute do'i ña huasosi'i cuasahuê.

¹⁶ Jaje pa'ina, cuasahuê, du'ru macarepa Macedoniana sai sa do'i ñaquê. Saisiquêpi cui'ne co'iquê tîjupê ñasi'i cuasahuê. Ja maca yureta'a mésarupi yê'ê Judea saija'a cçaijajê cuasahuê.

¹⁷ ¿Jaje yê'ê yo'osi'i cuasani coa noni cuasa nêore? ¿Caye mésaru yê'êpi jaje yo'osi'i cuasa nêoni te'epi cayaye "pasî'i cui'ne nesi'i" cuasaquê caji?

¹⁸ Jaje pa'ina, Maija'quê api, yêquê mésarute te'epi "nesi'i" cui'ne "pasî'i" cuasajê caye pa'ñe ñaquê.

¹⁹ Yêquê Silvano ja're Timoteo ja're cui'ne yê'ê mésarute quêaquê Cristo Jesús Maija'quê mamaquê cato ti te'epi cayayese'e "nesi'i" cui'ne "pasî'i" cama'quê api. Jaje pa'ina, Cristo Jesús cato nuñerepa yo'oque api, i case'ere.

²⁰ Jaje pa'ina, si'aye Maija'quê nesi'i ca nêose'e ina tî'api. Jaje pa'ina, Maija'quêre sihuani cayê: "Jaje pa'ijaquê Cristo Jesús do'ija'a."

²¹ Jaje pa'ina, Maija'quëpi jo'ya neni yëquëre cui'ne mësarute Cristo ja're jëayerepa tsioni pa'iyë neji'i.

²² I tsecohua'ire pa'ë asajajë caquë Maija'quëpi i de'lo joyore isipi, mai joñoana. Isiquëna, j joyopi pa do'ire asayë, si'aye Maija'quë isisi'i ca nëose'ere paja'cohua'i a'ë, mai.

²³ Jaje pa'iquëta'are Corintona tïjupë saiye pahuë, mësaru oima'cohua'ini caquë. Jare sani pa'ito mësaru yo'oyere sañope yo'oye nëiji. Maija'quë asaji, ja yo'oyere coequë. Ja do'ire saiye pahuë.

²⁴ Yëquë mësaru asase'ena nuñerepa cuasajë pa'icohua'ini, Mësaru itire pa'ë cajë asaye yëyere ta'ñeñu'u cajë yo'oye pañë. Yëquë cato yëyë, mësaru ja're co neñere mësarupi sihuajajë cajë.

2

¹ Mësarute oi ëaye neñere coequë tïjupë sani ñañe pa'si'i, cuasahuë.

² Yë'ëpi mësaru quë'rona sani mësarute oi ëaye nesiquë pa'ito çyë'ëre nepi sihua ëaye yo'lo huasoja'cohua'i a'ni? Jare yë'ë oi ëaye nesicohua'ipi yë'ëre sihua ëaye yo'ocaiye pa'ini!

³ Jaje pa'ina, jare jaje mësarute toyahuë, yë'ë sani tï'a maca yë'ë oi ëaye neñere jëoni de'huasicohua'i pa'ijajë caquë. Yë'ëpi jaro sani sihuaquëna, mësarujë sihuaja'cohua'i a'ë cuasahuë.

⁴ Jaje pa'iquëta'are ja toya ja'hua toya maca cato ai cuasaquë co'a ju'i cui'ne otare paque oi toyahuë. Toyama'ë pa'ë, mësaruni oi ëaye nesi'i caquë. Coa ai jerepa yë'ë mësarute joyore papi oiyeere iñosi'i caquë toyahuë.

Co'aye Yo'oquëre Oiyë

⁵ Yë'ëre oi ëaye yo'osiquë pani yë'ëse'ere oi ëaye yo'oye papi cuasayë. Mësaruteje si'ahua'ire oi ëaye yo'opi cuasayë. Ai co'ayerepa yo'opi cayere coequë, oi ëaye yo'opi cayë.

⁶ Mësaru j co'aye yo'osi do'ire si'sese'e tsoe de'oji, ja ja'ye pa'ijaquë.

⁷ Jaje pa'ina, yure cato j tayose'ere sai de'huacani yëhuo huasoje'ë, yo'oquë tëto saiperepa ai oiyeppi daima'quëni cajë.

⁸ Jaje pa'ina, mësarute señë, cui'naëni ite ai oiyeere iñoje'ë, de'oye yo'oyepi.

⁹ Ja'në mësarute toyahuë, iye yo'ose'e ayere caquë, mësarupi yë'ë ye'yayere si'aye sehucaito ñasi'i caquë.

¹⁰ Jaje pa'ina, mësaru sai de'huacaiquëni yë'ëje sai de'huacaiyë. Tayose'e pa'ina, sai de'huacaiye, pa'ina, sai de'huacaisiquë pani, Cristo ña hue'ñana sai de'huacaiyë, mësaru do'ire.

¹¹ Jaje yo'ojëna, Satanáspi j yëye tï'añe pa'sipi, maire. Tsoe maipi asayë, j maire nesi'i caquë yo'oye.

Troasre Pablo Pa'i Ai Cuasase'e

¹² Cristo coca quëasi'i caquë Troas daripëna tï'asi maca jaiye Cristo co'amaña de'oye necati'ñe pa'ye tï'ahuë.

¹³ Jaje pa'iquëta'are yë'ë joyo sihuayepi peopi, Maija'quë do'iquë Titore tï'ama'ë pa'isi do'ipi. Jaje pa'ina, jaohua'ire saiye caquë pëpani Macedonia yejana saë'ë.

De'hue Quëco Saoye

¹⁴ Maija'quëpi maire si'anë Cristo Jesús ja're ñese quëco saoyena saji. Jaje pa'ina, maija'a j cocare pare iñoji, paire.

¹⁵ Mai cato Jesucristo ma'ña huëo sëñeje huëo së pa'iohua'i a'ë. Cristo Maija'quëna huëo së ma'ña isiyeye pa'ye. Jaje pa'ijë, si'a hue'ñana huaso cuañocohua'ina cui'ne ne huesësicohua'ina iti sëñepi ju'aji.

¹⁶ Ne huesësicohua'ire cato, iti sëñe tsimare pa'ë. Pa'iquëta'are huaso cuañocohua'ire cato huëo sëñere papi pa'iyë isiyere pa'ë. Jaje pa'ina, çnepi iye yo'oyere ne tï'aja'cohua'i a'ni?

¹⁷ Yëquë Cristo ja're tsioni pa'i do'ire j jëjo daosicohua'i sëte Maija'quë ña hue'ñana nuñerepa care pajë cayë. Yecohua'i jai pai Maija'quë coca quëa do'ipi curiquë neñu'u cajë yo'oyeje pa'ye yo'oye pañë, yëquë.

3

¹ Çñeje cani mësarupi asato coa yëquëja'a co'ye jerepa de'oye yo'ohuë, cuasajë cayë a'ni, panita'a yëquë ayere cajë toyacaisi ja'ore mësaruna sani iñoñe pa'iquë? Çpanita'a yëquëpi, mësaruni yëquë ayere cajë, yecohua'i ñaja'core toyacaijë'ë cajë sëñe pa'iquë, yecohua'i yo'oyeje?

² Pani jaje yo'oye, mësaru a'ë, yëquë toya cuañosi ja'huaje pa'iohua'i. Japi tsoe tï'api, yequë ja'hua caraye paji. Jaje pa'ina, mësaru a'ë, yëquë joñoa toyasicohua'i. Jaje pa'ina, si'a pai mësaru pa'iyë asajë ñañë, tïñarepa.

³ Jaje pa'ina, pa'i ñani tũña asayë, toyani jëjo sao ja'huajë pa'iohua'i mësaru pa'i do'ire. Yëquëpi i cocare quëajëna, Maija'quë huajëquëre papi i joyopi toyapi, mësaruna quëna toñana tintapi toyama'ë paji'i, mësaru joñoare pana toyapi, Cristo case'ere.

⁴ Jaje pa'ina, Cristoja'a iyere Maija'quëpi necaija'quë api asayë.

⁵ Jaje pa'ina, si'aye yëquë yo'o tũ'añe Maija'quë isise'e a'ë. Ja do'ire yëquëpi yo'o tũ'añe caye peoji.

⁶ Jaje pa'ina, ipi yëquëre i huajë ca nëose'ere quëacaicohua'ire nepi. I huajë ca nëose'e cato joyo ayere pa'ë, coa toyasico maca pa'iyë pani. Cuañese'e toyase'e cato ju'iñena isiye pa'iji. Joyo aye cato pa'iyë a'ë.

⁷ Moiséspi cuañese'ere quëna toñana toyase'ere daquë ñaco ma'ñañerepa daji'i. Daina, Israel pai i tsia ña tũ'añe pañuë, ai ñaco ma'ña do'ire. Ja cuañeñe paire ju'iñena neñeta'a miañerepa de'oyerepa daji'i, miañe sa carajaiñeta'a.

⁸ Ijaje pa'iyë sëte airepa de'oye a'ni, joyore pana neñere huajëye ca nëose'ere quëayë!

⁹ Ja'në ca nëose'e cato de'oyere pa'ë. Ja yë'ta'a maire nejoñere isipi. Ja cuañese'e tayo yo'o do'ire. Jaje pa'iyë sëte airepa de'oye a'ni Maija'quë huajë ca nëose'e nuñerepa pa'icohua'ire neñe pa'i do'ire.

¹⁰ Ja'në de'oyerepa ca nëose'epi yure ai de'oyere pana con i ñato ja'në de'oyerepa pa'ise'epi do'i peoye ponëpi.

¹¹ Jaje pa'ina, miañe sa carajaiñeta'a de'oyerepa pa'ise'e sëte, jerepa de'oyere pa'ë, ti pani huesë ja'ñe cato.

¹² Jaje pa'ina, iye mai uteyere pajë ti ca'raye peoyerepa cayë, si'aohua'i asa hue'ñana.

¹³ Israel paipi miañe yayayere ñama'pë pa'ijajë caquë ësequë Moisés capi i tsia pë'pëni yo'ose'eje pa'ye yo'oye pañë, yëquë cato.

¹⁴ Moisés tsia pëpëyeje paye Israel pai asa tũ'añe pëpësicohua'ipi pa'iyë. Jaje ca nëose'ere ñajëta'a asa tũ'añe paçohua'i a'ë. Ja pëpëse'e cato nejoñe pa'iji, Cristoni ire papi cajë cuaca do'ire.

¹⁵ Ja yë'ta'a Israel paipi yure iye mu'seña Moisés cuañese'ere ñato iohua'i asayena pëpësicohua'ipi pa'iyë, asa tũ'ama'pë pa'icohua'ipi.

¹⁶ Jaje pa'iquëta'are paipi Cristona sehuoto ja pë'pëyepi peo hue'ña ne huesëji.

¹⁷ Jaje pa'ina, mai Èjaë cato joyo api. Jaje pa'ina, Èjaë joyo pa'i hue'ña cato ta'tëpo ti peo hue'ña'ë.

¹⁸ Jaje pa'ina, mai si'aohua'i mai tsia pë'pëse'e peocohua'i cato tsĩña de'huajë pa'iohua'i a'ë, Èjaë de'oyepi maina ju'aquëna, iñocohua'ipi. Jaje yo'ojë ije pa'iohua'irepa pönëjë saiyë, i de'oyere si'anëpi jerepa pa do'ire. Jaje pa'iohua'i pa'iyë, Èjaëpi, joyo sëte yo'o do'ipi.

4

¹ Jaje pa'ina, yo'o jujaye peoyerepa necaiyë, Maija'quëpi teaye yëquëre ñani oi iye co'amañare necaijë'ë caquë cuañe nëouna.

² Jaje pa'ina, yëquëpi si'aye yahuerepa huajëya'ye co'are paji cahuë, tañe cayepi paire cosoñu'u cajë. Cui'ne Maija'quë cocare tañe pönani yeque ye'yañu'u cajë yo'oye pañë. Jaje yo'oma'pë coa ai jerepa nuñere pase'e asani yo'ojë pa'iyë, Maija'quë ña hue'ña. Ja yo'oyere si'aohua'i nuñerepa yo'ocohua'i a'ë cuasajajë cajë.

³ Jaje pa'ina, huaso coca yëquë quëayepi yecohua'ire jëaye asa ëa ma'ñe pa'ini jare ne huesësicohua'ini jaje pa'iji.

⁴ Jaje pa'ina, Iohua'i sehuoye coe do'ire iye yeja cuañe diusupi iohua'i asayena ne pore huesopi Maija'quë pa'iyë aye iñoquë de'oquërepa Cristo de'o coca miañere ña tũ'ama'pë pa'ijajë caquë.

⁵ Jaje pa'ina, yëquë ayere quëama'pë pa'iyë. Coa ai jerepa Cristo Jesús ayere quëayë, mai Èjaëre pa'ë cuasajajë caquë. Yëquë cato mësarute necaicohua'i a'ë, Jesure oi do'ire.

⁶ Jaje pa'ina, iye yeja miañe nequëpi mai joñoana Maija'quëpi miañe necaji'i, yecohua'ire iñojajë caquë. Maija'quë jaje necaji'i, maipi Jesucristo ayere ye'yejë ire cui'ne i de'oyere pare asajajë caquë.

Necaiquëre Pare Asajë Pa'iyë.

⁷ Ja asayere jai do'i a'ë. Jare maina payë, soto cua'conoa ayayeje pa'ye. Maija'quëpi maina tutu peocohua'ire isipi, ja asaye. Maija'quë tutu a'ë asajajë caquë. Pani, pai tutu.

⁸ Ja tuture pajë, jaiye ai yo'oye pa'itojë de'hue yo'o jujama'pë pa'iyë. Ja tuture pajë jaiye co'a ju'iñe pajëta'a me neja'cohua'i a'ni cuasayere peoyë.

⁹ De'oye pa'iyë peoye josa yo'oyë, maire. Jaje yo'otojë jecocicohua'i pa'iyë pañë. Ne tañë, maire. Jaje pa'iquëta'are ne huesoye pañë.

¹⁰ Jesús ai yo'osiquëni ite huajo yëjë yo'ose'eje pa'yepi si'anë maire huajo yëcuhua'ipi pa'ijëna, ai yo'ojë pa'iyë, Jesús pa'iyere iñoñu'u cajë mai pa'iyëja'a.

¹¹ Jaje pa'ina, mai huajëcohua'i pa'icohua'ipi si'anëpi ju'iñena isisicohua'ipi pa'iyë, Jesús do'ire, mai ju'i capëa hue'eyeja'a i pa'iyere iñoñu'u cajë jaje pa'iyë.

¹² Pa'ijë Maija'quë cocare quëa do'ire ju'iñepi ja'ye pa'iji, yëquë. Jaje pa'ijëta'a cui'ne mësarupi pa'iyepi ti pa'iyena ti'ahuë.

¹³ Maija'quë toya pëpëpi caji ñeje yequë hue'ña: "Pa'ire paji cuasaquë ja do'ire quëahuë". Jaje pa'ye cui'ne yëquëje pa'ire paji asajë quëayë.

¹⁴ Jaje pa'ina, asayë, Maija'quëpi ju'isiquëre Cristore huajëquëre huëopi. Cui'ne yëquëreje ju'isicohua'ini huëoja'quë api, Jesús ja're. Huëoquë cui'ne mësaruteje huëoni yëquë ja're con'i te'e i quë'rona saja'quë api, asayë.

¹⁵ Jaje pa'ina, si'aye iye yo'oye pa'iji, mësaru de'oye pa'iyere caquë. Jaje pa'ina, Maija'quë jaiye de'oye pa'iyere jerepa paire isiyëje pa'yerepa cui'ne ite de'oyerepa yo'o u'ni cajë pëpacohua'ije jai pai pa'ijajë caquë jaje yo'opi.

¹⁶ Jaje pa'ina, yëquë coa yo'o jujahuë cuasaye pañë. Iño ëmëje'le capë cato aiohua'i de'onije jeto sa'nahuë cato mu'seña ñape huajëcohua'i de'o'jë pa'iyë.

¹⁷ Jaje pa'ina, iye yeja yëquë ai yo'oye cato coa da saiye a'ë. Jaje pa'ina, ja ai yo'oyepi ti pani huesëye ai jerepa de'oyere pa ja'ñere necaiji.

¹⁸ Jaje pa'ina, yëquë cato cuasama'pë pa'iyë, ñaco ca ña ti'añere. Coa ai jerepa yëquë cato cuasayë, ña ti'a ma'ñere. Si'aye ña'ne cato coa carajaiñe a'ë. Jaje pa'iquëta'are ja yë'ta'a ña ti'a ma'ñe cato ti pani huesëye a'ë.

5

¹ Mai cato huë'ëje pa'iohua'i a'ë. Ca'ni huë'ëje pa'iohua'i a'ë. Coa esa tëto saicohua'i a'ë. Jaje pa'ioipi iye huë'e ne huesëto, Maija'quëpi ti pani huesë huë'erepa ne de'huasiconi payë, jeto ma'tëmo, pai jëñapi nema'a huë'ere.

² Jaje pa'ina, ma'tëmo huë'ere pa'i ëa ju'iñë, ja yë'ta'a iye yeja huë'ere pa'ijë.

³ Jaje pa'ina, ja huë'epi maire caña suña toçaiyeje pa'ye suña'ja'coa, capë pejë peoñoaje pa'ye paja'cohua'ire.

⁴ Jaje pa'ina, yure cato iye capë carajai huë'ere payë. Pa'ijëta'a ma'tëmo huë'ere ti pa'i capëre pa'i ëa ju'iñë. Coa iye yeja ca'nipi huë'e nesico ne huesëyere caye pañë. Coa ai jerepa ti ne huesëma' huë'ere pajajë cajë cayë, iye ju'ija capëre ti pa'iyena ne huesëjaquë caquë.

⁵ Jaje pa'ina, iye pa ja'ñe cato Maija'quëpi ne de'huacaji'i. Cui'ne jare ipi i de'o joyo maina isipi, yequë mu'se isi ja'ñe iñoñe.

⁶ Jaje pa'ina, itire cuasajë ca'raye pañë, yëquë. Jaje pa'iquëta'are asayë cui'ne, iye capëre ja yë'ta'a pa'iyere cato so'ore pa'iyë, mai Ëjaëre.

⁷ Jaje pa'ina, yure ite ña'ne pañë. Jaje pajëta'a pa'ire paji cuasayeja'a asajë pa'iyë.

⁸ Jaje pa'i do'ire itire cuasajë ca'raye pañë. Jaje pa'ina, coa ai jerepa iye capë pa'iyere jeoni etani sani Ëjaë quë'rona i ja're pa'iyere yëyë.

⁹ Jaje pa'ina, si'anë Ëjaë yëyese'le yo'oyere yëyë, iye capë pa'iyere jeonije, panita'a ini ja yë'ta'a tuinije iye yejare pa'ijë.

¹⁰ Jaje pa'ina, iye yeja ja yë'ta'a pa'i maca de'oye panita'a co'aye yo'ose'ëje pa'ye pai ñape isi cuañoñere cajë, si'aohua'i Cristo pai ñape iye yeja capëpi yo'ose'e ne de'hua huë'ñana saiye pa'iji.

De'oye Pa'i Coca

¹¹ Jaje pa'ina, Ëjaëre pare ai ca'raye asayë, yëquë. Jaje asa do'ire paire yëhuoyë, sehuojajë cajë. Si'aye yëquë pa'iyere Maija'quë ñaji. Jaje cui'ne mësarujë yëquë pa'iyere asa ti'ajajë cajë uteyë.

¹² Jaje cani cama'pë pa'iyë, tijupë yëquëja'a co'ye jerepa pa'iohua'i a'ë cuasajë. Coa ai jerepa yëquë cato isiyë, mësarute sa'roje pa'iore mësarupi yëquëre de'ocohua'ire pare pajë sihuajajë cajë. Sihuacohua'ipi yecohua'ire joyorepa pa'iyepi yo'oma'pë coe ëmëje'ese'e yo'oyere sihuacohua'ire sañope cajajë cajë cayë.

¹³ Jaje pa'ina, yëquëpi cuepeohua'ije pa'iohua'i ña cuañoñi Maija'quëni necai do'ire jaje ña cuañoñë. Jaje pa'iquëta'are cuepeohua'i ña cuañoñe pani mësaruni necaijë pa'iyë.

¹⁴ Jaje pa'ina, te'i Cristopi si'aohua'i do'ina jucacaji'i asasi macapi Cristo oiyepi yëquë pa'iyere cuañequëna, pa'iyë. Jaje pa'iyere sëte si'aohua'i i ja're con'i ju'isicohua'ipi pa'iyë.

¹⁵ Jaje pa'ina, Cristopi si'aohua'ire caquë jucacaji'i, coa ai jerepa huajëcohua'ipi ini pacacajajë caquë, pani johua'ija'a co'ye cuasaye. Jare cuasaquë juni huëji'i.

¹⁶ Jaje pa'ina, yëquë iye yeja pai yecohua'ire cuasajë ña'neje pa'ye cuasajë ña'ne pañë. Jaje pa'ina, ja'ñere iye yeja pai cuasajë Cristore ña'neje pa'ye cuasajë ñasicohua'ita'a yure cato jaje cuasajë ña'ne pañë, ite.

¹⁷ Jaje pa'ina, Cristona tsioni pa'iquë cato huajë pai api. Jaje pa'ina, ai co'amaña cato tsoe nejose'e a'ë, yure pa'iyere cato huajëye a'ë.

¹⁸ Jaje pa'ina, si'aye iye Maija'quë yo'oye a'ë. Jaje pa'ina, Cristo do'ija'a maire i cajeohua'ire nepi. Neni maire cuãñe nëopi, yecohua'ini i ja're cajeohua'i de'oyere quëcaijj'ë caquë.

¹⁹ Jesucristo ja'a iye yeja pa'icohua'ire yë'ë cajeohua'i de'ojajë caquë Maija'quëpi nepi, johua'i co'aye yo'o do'ire tsoe saï tsoisiquëpi. Jaje yo'osiquëpi Maija'quë cajeohua'ire ne cocare isipi, maire, yecohua'ire quëajajë caquë.

²⁰ Jaje pa'ina, yëquë Cristo jëjo daocohua'i a'ë. Ja cato Maija'quëpi yëquëja'a cõni mësarute señeje pa'ye a'ë. Jaje pa'ina, mësarute señë, Cristo mamipi Maija'quë ja're cajeohua'i de'oë'ë cajë.

²¹ Cristo ti co'aye yo'oma'quë paji'i. Jaje pa'iquëta'are Diusupi co'ayere yo'oyeje pa'yerepa Cristore yo'opi, mai do'ire. Jaje yo'opi, Cristo do'ija'a jai do'i mai ite sañope pase'ere peo hue'ña nejocasi'i caquë.

6

¹ Jaje pa'ina, yure maipi Maija'quë co'amaña cõ necaicohua'ipi pa'iyë. Pa'ijë mësarute señë. Maija'quë oiye mësarute coa isise'ere coa asani pa'ima'pë nejë pa'ijj'ë cajë cayë.

² Jaje pa'ina, ipi caji, toyase'ena:

Ai de'o maca pa'iji. Jaje pa'ina, asahuë, më'ë cayë.

Huaso mu'se pa'i maca më'ëre cõcaë'ë.

Jaje pa'ina, yure a'ë, huaso cuãño'ñe pa'i sa'ro cui'ne i huaso mu'se a'ë.

³ Yecohua'ipi yëquë co'amaña yo'oyere co'aye cacaima'cohua'ini cajë yecohua'ire co'aye yo'o iñoñe peoyerepa de'oyepi iñojë yo'ojë pa'iyë.

⁴ Jaje pa'ina, si'aye ai yo'oye pa'ina, quëcojë yo'oyepi yëquë Maija'quëre necaicohua'i pa'iyë iñoñë. Co'amaña caraquëna, cui'ne jai caquipëje pa'ye ai yo'oye pa'ina, quëcojë tëto saïye iñoñepi cui'ne,

⁵ si'sejëna, co hue'ña cojëna, jai paï sañope cuijë yo'ojë cajëna, jëa co'amaña neñe, si'a ñami ñajë ñataye, cui'ne go ëaye tëto saïye quëcoyepi iñoñë.

⁶ Cui'ne yëquë de'oye nuñerepa pa'iyepi, yëquë nuñerepa coca ta'ñe asayepi, yëquë quëcoyepi, yëquë de'oye yo'oyepi, yëquë ja're Maija'quë joyo pa'i do'ipi, yëquë paire oïre pajë yo'o do'ipi,

⁷ yëquë nuñerepa cocare quëa do'ipi, yëquë ja're Maija'quë tutu pa'i do'ipi iñoñuë. Jaje pa'ina, nuñerepa yo'o uihua ja'ñepi ñese nehuë, cui'ne jare itipi sañope yo'oyeje jëahuë.

⁸ Jaje pa'iquëta'a yecohua'ipi yëquëre sihuasicohua'ipi, yëquëre ñañe coesicohua'ipi yecohua'ipi yëquëre de'o paï a'ë casicohua'ipi, yëquëre co'acohua'i a'ë casicohua'ipi yo'ojë. Jaje pa'iquëta'are yëquë cato nuñerepa pa'icohua'ipi, cui'ne nuñerepa cacohua'i a'ë, yecohua'ipi cosocohua'i a'ë catoje.

⁹ Yecohua'ipi yëquëre ñama'cohua'ire yo'oyeje pa'ye yo'oyë, noni ñacohua'ita'are. Yecohua'ipi yëquëre ju'lijacohua'i a'ë cacohua'i a'ë. Cajëta'a huajëcohua'ipi pa'iyë. Si'seyë, yëquëre. Jaje pa'iquëta'are huani jeoñere pañë.

¹⁰ Oiyere pajë pa'iyë. Jaje pa'iquëta'are si'anëpi sihuajë pa'iyë. Ti peocohua'ijë pa'iohua'i ña cuãñoñë. Jaje pa'iquëta'are jai paire jaiye co'amaña paye necaë'ë. Co'amaña peocohua'i ña cuãñoñë. Jaje pa'iquëta'are si'aye payë.

¹¹ Maija'quë do'ijë Corinto pa'icohua'i mësarute yëquë nuñerepa cahüë, ti yëquë joñoa cuasaye yahuema'pë.

¹² Jaje pa'ina, yëquë mësarute yahuese'e ti peoyë. Jaje pa'iquëta'are mësarü a'ë, yëquëre yahuese'e pacohua'i.

¹³ Jaje pa'ina, mësarute mamajëre pëca ja'quë señeje pa'ye señë, mësarü cuasayepi yë'ëre nuñerepa cajë'ë caquë, yë'ë mësarute yo'oyeje pa'ye.

Mai Cato Maija'quë Huë'e A'ë

¹⁴ Tsioma'pë pa'ijj'ë, sehuoma'a paire. Jaje pa'ina, ñajë'ë, nuñerepa yo'oye ti tsioye peoji, nuñe yo'o ma'ñe ja're cõni. Cui'ne miañeje ti tsioye peoji, neañena cõni.

¹⁵ Cristopi huati ja're te'e yo'oye paji. Sehuosiquëpi sehuoma'quë yo'oyeje cui'ne te'e yo'oye paji.

¹⁶ Jaje cui'ne Maija'quëre se huë'e tjo pa'ina, cui'ne tjo pa'iji, coa de'huasi diisure se huë'eje, te'e cui'ne yo'oyeje peoji. Jaje pa'ina, Maija'quë huajëquërepa huë'e a'ë, mai. Jaje pa'ina, ipi caji, ñeje:

Johua'i ja're cõni pa'i, johua'i ja're cusu'i. Yë'ëpi johua'i Diusu pa'ijaquë a'ë.

Cui'ne johua'ipi yë'ë pairepa pa'ija'cohua'i a'ë.

¹⁷ Jaje pa'ina, mai Èjaëpi caji:

Jaohua'i jopo pa'icohua'ipi etani,

jaohua'ire tsioma'pë,

cui'ne si'sijë pu'pema'pë pa'ijë'ë.

Jaje pa'ijëna, yë'ëpi mësarute sihuaquë imasi'i.

¹⁸ Imani mësaruru ja'quë pasi'i. Pa'ina, mësarupi ëmëohua'i cui'ne nomiohua'i yë'ë mamajë pa'ija'cohua'i a'ë.

Jaje caji, Ejaërepa si'aye tutu paquëre papi.

7

¹ Jaje pa'ina, Maija'quë do'ijë maña iye a'ë, maire ca nëose'e mai paye. Jaje pa'ina, de'ocohua'irepa pañu'u, si'aye capë, cui'ne joyo si'si neñere yo'oma'pë. Ja pa'iyere cajë Maija'quëni ca'rajë si'aye mai pa'iyë ina isi saoni pañu'u.

Corinto Paj Ponëñe

² Jë'ëpi. Jaje pa'ito yëquëre sihuajë tsojë'ë! Te'irejë yëquë co'a de'huama'cohua'i a'ë. Te'irejë yëquë care payeje cajë cosoma'cohua'i a'ë.

³ Jaje cani, mësaruni nuñe yo'oma'cohua'i a'ë caquë cama'ë pa'iyë. Jaje pa'ina, tsoe mësarute cahüë. Mësarute yëquë joñoare papi oijë pa'iyë, yëquë huajëcohua'ipi pa'ijëna, cui'ne ju'itoje.

⁴ Jaje pa'ina, yë'ë mësaruru de'oyerepa sehuojajë cuasaquë si'aye yë'ë cuasayere caye payë. Cui'ne mësaruru do'ire ai sihuayëje payë. Jaje pa'ina, si'aye ai yo'o jopopi ai sihua joyo payë, mësaruru do'ipi.

⁵ Yëquë Macedonia ti'asi macapi ti huajëma'pë paë'ë, a'ri mañaje. Si'a huë'ña ai yo'oyese'e ti'ahuë, yëquë quëno macapi sañope yo'oyese'e paji'i. Jaje yo'oye pa'ina, yëquë joñoapi quëquë huesëcöhua'i paë'ë.

⁶ Jaje pa'iquëta'are Maija'quë co'a ju'icöhua'ire yëhuo huasoquëpi yëquëreje cui'ne yo'oquëna, sihua ëaye nepi, Tito daiyepi.

⁷ Jaje pa'ina, i daisi mañase'e sihua ëaye neñe papi, mësaruru sihua ëaye ite yo'ose'e quëaquë, cui'ne mësaruru yëquëre ña ëa ju'iñeje quëaquë, cui'ne mësaruru oijë pa'iyë se quëaquë, cui'ne yë'ëre ai cuasajë co'a ju'iñe quëaquë yo'opi. Jaje quëaquëna, si'aye iyepi yë'ëre ai sihua ëaye nëji'i.

⁸ Yë'ë toyasicopi mësarute ne oesico pa'itoje, itire cuasaquë oima'ë pa'iyë. Ja'në cato oë'ë, yë'ë toyasicopi mësarute a'ri tëcahuë ne oecona, ñaquë. Jaje oisiquëje yure cato sihuayë.

⁹ Sihuama'ë pa'iyë, mësarute ne oesi do'ire, yë'ë cato sihuayë, ja oiypipi mësaruru yo'oye jëoni Maija'quëna ponëñe necaisi do'ire. Jaje pa'ina, Maija'quëpi sihuaquë ñapi, mësaruru oijë quëcojë yo'oye. Jaje pa'ina, yëquë toyase'ëpi mësarute co'aye nema'pë paë'ë.

¹⁰ Jaje pa'ina, joyo oiye cato tiñe pa'iyë ponëñena cui'ne huasosicöhua'i pa'iyena saye a'ë. Jaje pa'iquëta'are iye yeja pai yo'ojë oiye cato, ju'iñena saye a'ë.

¹¹ Jaje pa'ina, ñajë'ë, yure Maija'quë yëyeje pa'ye yo'oyë oise'ëpi etase'ere. Iye a'ë, iti etase'ere: Esa co'ayere ne de'hua ëaye nëñe, mësaruru aquë co'ayere yo'osi do'ire huajëya'ye nëñe, co'aye sañope cama'cohua'ita'are huajëya'ye nëñe, co'ayere yo'osiquëpi ponëjaquë cajë ai yo'oye nëñe, co'aye yo'oquëre si'seye pa'iji cuasaye nëñe, mësarupi, si'ayere de'oyerepa yo'ohuë, nuñerepa yo'ocöhua'ipi.

¹² Jaje pa'ina, yë'ë ja toya ja'hua toya maca iti co'aye yo'oquëni panita'a iti co'aye yo'o cuñoquëni caquë toyaye pahüë. Coa ai jerepa yë'ë cato mësaruru yëquëre co'a ju'ijë pa'iyepi, Maija'quë ña huë'ñana ñañe pa'ijajë caquë toyahuë.

¹³ Ja cato yëquëre ne yë'huayë pa'iji.

Jaje pa'iquëta'are iye asa yë'huase'ere jerepa ña huajëhuë, mësaruru de'oye pa'ijë pa'icöhua'ire ña do'ire Tito sihuaquë pa'iyere.

¹⁴ Jaje pa'ina, mësaruru ai de'ocöhua'i a'ë caquë Titore tsoe quëahuë. Titopi yë'ë mësaruru ayere quëase'ere nuñere pa'ë caquë asa ti'api, mësaruru de'oye pa'ijë pa'iyere ñaquë. Asa ti'acquëna, co'a ju'iñe peoyë, mësaruru ayere cato yo'oma' do'ire. Si'aye mësarute yëquë quëase'ere cato nuñerepa quëase'ere a'ë, cui'neje Titopi nuñere pa'ë caquë asa ti'api, yëquë quëase'ere.

¹⁵ Jaje pa'ina, yureta'a jje mësarute ai jerepa yëji, si'aohua'i mësaruru ite de'oye dahuëre ñajë pëpani pajë, i caye si'aye de'oye sehuojë yo'ocaise'ere cuasaquë.

¹⁶ Jaje pa'ina, yë'ë mësarute ai sihuayë, de'oyerepa yo'ojacöhua'i a'ë caquë!

De'oyerepa Isiye

8

¹ De'ëpi. Yure Maija'quë do'ijë, mësarute quëaye yëyë, Maija'quë oi coa isise'ëpi Macedonia pa'icöhua'i sehuosicöhua'i yo'o iñoñere.

² Jaohua'i teaye co'amaña peocöhua'ita'a ëseye peoyerepa sihuajë isihuë, yecöhua'ire cöcai ja'ñere. Jaiye co'amaña pacöhua'i isiyëje pa'yerepa isihuë. Cui'ne jaiye neñañe pa'ina, tëto sainije sihuacöhua'i pa'iyë.

³ Cui'ne yè'èpi ñahuè, ìohua'i de'oyerepa cuasajè èseye peoyere papi ìohua'i payere cui'ne ìohua'i paye jerepa ìsijèna.

⁴ Jaje yo'ojè yèquèje Maija'què paire cõcaiyè yèyè, èsema'pè cajè ai seì'è, yèquère.

⁵ Sesìcohua'ìpi coa curiquèsele ìsiye pajè coa ai jerepa yo'ohuè. Yo'ojè du'ru macarepa Èjaèna ìohua'i pa'iyere ìsihuè. Ja jetyo'je ìsihuè, yèquèna, Maija'què yèyeje.

⁶ Jaje pa'ina, Titore ì ja'nè yo'o huèose'ere yo'oquè mèsaru què'rojè iye de'oye cuasajè cõcai curi ìsiye tsi'so saojaquè cajè seì'è.

⁷ Mèsaru si'aye de'oyerepa pa'ìcohua'ìpi pa'iyè: Pa'ire paji cuasacohua'ìpi, tañè coca cacohua'ìpi, tañè asacohua'ìpi, de'oye yecohua'ìre necaìcohua'ìpi, cui'ne yèquère ai oìcohua'ìpi. Jaje pa'ìcohua'ìpi iyereje cuasajè yecohua'ìre tètò saìsìcohua'ìpi yo'ojè pa'ìjè'è, peocohua'ìre cõcai ìsiyere.

⁸ Mèsarute tsepoje pa'ìore ìsiyè, mèsarupi yecohua'ì de'oye yo'oyere ñani mèsarujè, mèsaru nuñerepa paire oìcohua'ì pa'iyere ìñojajè cajè. Jaje pa'ina, mèsarute cuañema'pè pa'iyè.

⁹ Jaje pa'ina, mèsaru cato tsoe asayè, mai Èjaè Jesucristo maire de'oye coa ìsisi'ì caquè, jaiye co'amaña paquèpi, co'amaña peoquè de'ose'le, mèsaru do'ìre. Mèsarupi ì co'amaña peoquè de'osi do'ìpi, jaiye pacohua'ì pa'ìjajè caquè yo'opi.

¹⁰ Mèsaru de'oye pa'iyere caquè, iye yo'oye aye mèsarute cahuè, yè'è cuasaye mèsarupi ja'nè tètò saìsì ometècahuè ai sihuajè de'oye yo'o huèohuè, iye ìsiye ayere.

¹¹ Jaje yo'osìcohua'ì sète yureje sao macajà'a, jare ocue pa'ì maca cuasajè, sihuajè ìsijè yo'ojè'è, mèsaru paye ja'ye.

¹² Jaje pa'ina, paìpi Maija'quère ìsiye yère paquè ì paye ja'ye ìsito, Maija'què sihuacquè ñacaiquè api. Maija'què co'amaña peoquèni ñaquèta'a, ìsijè'è caquè se'ma'què api.

¹³ Cama'è pa'iyè, yecohua'ìre cõcai do'ìre, mèsarupi co'amaña carajani, ai yo'ojajè caquè.

¹⁴ Yè'è cato cayè, si'aohua'ì si'a yè'què maca co'amaña payere caquè. Jaje pa'ina, yure mèsarupi cõcaiyè pa'ìji, ìohua'ìre peoyere. Cõcatena, cui'ne yequè mu'se ìohua'ìpi mèsaru peoyere cõcaiyè pa'ìji, mèsarute. Jaje yo'ojè si'a yè'què maca pajà'cohua'ì a'è.

¹⁵ Pajèna, toyase'e cayeje: "Jaiye si'sosiquère nèañeje papi, cui'ne a'ri maña tsi'sosiquèreje caraye papi."

Tito Cui'ne Ite Cocohua'i

¹⁶ De'oji, cayè, Maija'quère, Tito joyona yè'è mèsarute ai cuasaquè pa'iyeye pa'ye ai cuasaye necaìsiquère.

¹⁷ Jaje pa'ina, Titopi, yè'è mèsarute sani ñajè'è caquè señe, de'oyerepa sehuocajì'ì. Ipi mèsarute ai cuasaquè ña èa ju'ì pa'iyè sète. Jaje pa'ina, yure ì yèyese'epi mèsarute ñasi'ì caquè saiji.

¹⁸ Si'a hue'ña sehuosìcohua'ì pa'ìcohua'ì què'rona, huaso coca de'oyerepa necaì do'ìre de'oquère pare yèhuoquèni, Maija'què do'ìquère te'ìre, Tito ja're cõni jèjo saoyè, mèsaru què'rona.

¹⁹ Coa ai jerepa si'a hue'ña sehuosìcohua'ì pa'ìcohua'ìpi ìte sahuareña, yèquè ja're cu'ì yèquè yo'oye cõcaija'quèni. Jaje pa'ina, yèquè mai Èjaère de'oye neca'nu'u cajè coa ìsi co'amaña tsi'sojè yo'oyere cui'ne yèquè cõca'nu'u cuasaye ìño'nu'u cajè yo'oyere, cõcaija'què api.

²⁰ Jaje yo'ojèna, iye yèquè jaiye co'amaña tsi'soyere, de'oyerepa huahuesi'ì cajè yo'oyè, yecohua'ìpi co'aye cama'pè pa'ìjajè cajè. Jaje yo'oyè.

²¹ Jaje pa'ina, yèquè cato de'oyere pase'e yo'oye yèyè, mai Èjaè ña hue'ña, cui'ne pajè ña hue'ñaje.

²² Cui'ne jaohua'ì ja're cõni te'e jèjo saoyè, yequèreje Maija'què do'ìquère. Jaè cato jaiye de'oye yo'oquè yèquère ì yo'oyepi, ì nuñerepa pa'iyè ìñoquèpi, cui'ne yureje mèsarute, nuñerepa pa'ìcohua'ì a'è cuasaquè api. Jaje pa'ini jèjo saoyè.

²³ Jaje pa'ina, yecohua'ìpi ìquei'ni cajè Titore secohua'ì pa'ìto quèajè'è. Jaè cato Pablora tsi'oquè api, cui'ne ì ja're co'amaña nequè api, mèsarute cõcasi'ì caquè, cajè'è. Cui'ne Maija'què do'ìjè ì ja're cõni saìsìcohua'ìni secohua'ì pa'ìto cajè'è. Jaohua'ì cato sehuosìcohua'ì tsi'sini cuasani jèjo daosìcohua'ì a'è. Cristore de'oye necaìcohua'ì a'è cajè'è.

²⁴ Jaje pa'ina, si'a hue'ña sehuosìcohua'ì ñañere cajè, mèsaru ìohua'ìre nuñerepa oiyere oni ìñojè'è. Jaje pa'ina, yèquè mèsaru ayere case'eje pa'ye sihuayè, mèsarupi jaje yo'ore pajà'cohua'ì a'è cuasajè.

Maija'què Do'ìjère Tsisocaise'ì

9

¹ Mèsaru cõca'nu'u cuasayere asa do'ìre, Maija'què do'ìjère pa'ìcohua'ìre tsi'soni ìsi ja'ñeta'a mèsarute toyaye pañè.

² Si'anë sihuaquë cayë, Macedonia acohua'ire, mësaru Acaya pa'icohua'i, ja'në ometëcahuë cöcañu'u cajë cui'ñasicohua'ipi pa'ise'ere pa'ijëna, mësaru de'oye cuasayere ñani, jai pa'i Macedonia acohua'ipi mësaru esa ne ëa ju'ijë yo'oyere ñani de'oye yo'oñu'u cajë yo'ose'ere cayë.

³ Jaje pa'iquëta'are Maija'quë do'ijëre jëjo saoyë, iye yo'oye aye, yë'ë mësarute de'oye yo'ocohua'i a'ë case'epi coa case'le pa'ima'quëni caquë. Jaje cani cayë, mësarupi yë'ë cuasaquë case'eje pa'yerepa coa isiye ne de'huasicohua'ipi pa'ijajë caquë cayë.

⁴ Mësarupi ne de'huama'cohua'ipi pa'ijëna, yë'ë ja're yeque Macedonia acohua'ipi conï sani ñama'cohua'ini caquë cayë. Mësarupi tsi'soyere nema'cohua'ipi pa'ito yëquëre ai huajëya'ye pasipi, mësarute nuñerepa neñë cuasajë sihua'jë casi do'ipi, cui'ne mësaruteje jerepa huajëya'ye nësipi.

⁵ Jaje pa'ina, mësarute du'ru sani do'i ñaja'cohua'ire, Maija'quë do'ijëre jëjo saoyë, jaohua'ipi mësaru coa isiñu'u ca nëose'le cöcaijë tsi'so saojajë caquë. Jaje yo'orena, mësaru coa isiye'pi ëseye peoyere papi de'oyerepa cuasajë yo'oyere iñoñe pasipi.

⁶ Iyere cui'ne cuasajë'ë: A'ri maña tasiquëpi jare a'ri maña tëaye pa'iji, cui'ne jare jaiye tasiquëpi jare jaiye tëaye pa'iji.

⁷ Jaje pa'ina, pa'i ñape isiye pa'iji, joyo cuasase'le ja'ye, isima'pë pa'ijë'ë co'aye nëi joyopi, panita'a yecohua'ipi cuañejëna. Jaje pa'ina, Maija'quë cato oi ñacaiquë api, sihuaquë isiquëni.

⁸ Jaje pa'ina, Maija'quëpi mësarute si'a mu'seña coa si'a co'amaña jaiye isija'quë api. Mësarupi si'aye mësarute caraye pajë nëaquëna, si'aye de'oye yo'o co'amañare cöcaija'cohua'i a'ë.

⁹ Jaje pa'ina, toyase'le caji:
Co'amaña peocohua'ire ëseye peoyerepa isisiquëre cato,
I nuñe yo'ose'le ti pani huesëji.

¹⁰ Jaje pa'ina, Maija'quë mai ta ja'ñe, cui'ne ai ja'ñe isiquëpi si'aye mësaru ta ja'ñe, cui'ne mëa ja'ñe necaija'quë api. Necaina, mësaru ësema'pë isiyepi jaiye nuñerepa yo'oyere tëaye pasipi.

¹¹ Jaje yo'ojëna, Maija'quë mësarute jaiye co'amaña isija'quë api, peocohua'ire cöcaijajë caquë. Ja tsi'soni jëjo saoyere jai pa'i Maija'quë do'ijëpi de'o'ji cajë Maija'quëre pëpajacohua'i a'ë.

¹² Jaje pa'ina, iye yëquë Maija'quë do'ijëre cöcai ja'ñe sacaini coa johua'ire carayese'le cöcai ja'ñere saye pañë, coa johua'ipi ai jerepa Maija'quëre ai de'o'ji cajë pëpa ja'ñere sayë.

¹³ Jaje pa'ina, iye mësaru cöcaiyepi mësaru Cristo coca de'oye sehuocaiye iñoquëna, ñajë johua'ipi Maija'quëre de'oquëre pa'ni cajë sihua'ja'cohua'i a'ë. Sihuajë johua'ije Maija'quëre de'oye yo'oja'cohua'i a'ë, mësarupi johua'ire cui'ne si'aohua'ire yecohua'ireje ëseye peoyerepa cöcaiyere ñajë.

¹⁴ Jaje pa'ina, Maija'quëpi i oiyere mësarute iñosi do'ire cuasajë ai yëjë Maija'quëre mësarute secacaija'cohua'i a'ë.

¹⁵ Jaje pa'ina, Maija'quëre ai de'o'ji cayë, iye ai de'oyerepa i isise'ere!

10

Pablo Cristo Jëjo Daoquë Sëte I Tutu Payere Case'e

¹ Yë'ë Pablopi mësarute Cristo a'jiñe yo'oyepi cui'ne i oiyepi cuasaquë, mësarute señë. Yë'ëre cayë, mësaru ja're pa'ini tutu caye caraquëta'a cayë. Jaje pa'iquëta'a so'ore pa'i toyase'aja'a irepa cayeje tutu cayë.

² Jaje ca do'ire mësarute quëayë, yë'ë mësarute ñasi'i caquë sai maca ja yë'ta'api de'oye pa'iyë pajë, mësaru acohua'ipi pa'i yëyepi yo'oji cacohua'ire cato tuturepa caja'quë a'ë.

³ Jaje pa'ire paji yëquë cato pa'i a'ë. Jaje pa'iquëta'are iye yeja pa'i sañope yo'oyeje pa'yepi yo'oye pañë.

⁴ Mai uihua co'amaña cato, Maija'quë tutu quë'i uihua co'amaña'ë. Si'aye co'a tutu quëco pa pa'i huë'ñare nejo co'amaña'ë. Jaje pa'ina, mai uihuama'pë pa'iyë, iye yeja pa'i uihua co'amañaje pa'yepi.

⁵ Jaje pa'ina, ja uihua co'amañapi, si'aye Maija'quë ta'ñe asaquë yo'oyere, sañope tñe pa'ye cuasayere nejoñe pa'iji. Cui'ne ja uihua co'amañapi, si'aye mai cuasayere tsi'soni Cristona isiye pa'iji, maipi ite de'oyerepa sehuo ja'ñere cajë.

⁶ Jaje pa'ina, si'aohua'i mësaru de'oye sehuoicohua'ise'e pa'i maca, yëquëpi si'aye de'oye sehuo ma'ñere si'seye tsoe cui'ñasicohua'ipi pa'iyë.

⁷ Mësaru cato coa ëmëje'e pa'iyese'e ñañë. Jaje pa'ina, yë'ë nuñerepa Cristo aquëre pa'ë asaquë pani, yëquëreje nuñerepa Cristo acohua'i a'ë cuasaquë ñasipi.

⁸ Jaje pa'ina, yè'èpi yèquè yo'oye pa'iquèta'are seña maca mésarute cuañequè yo'osiquè panije, co'ayerera yo'ore'ni cuasaquè ca'raye pañè. Èjaèpi mésarute nejoñe peoyerepa, jerepa joyo pa'iyere ñese mèocaija'a tutu isiquère me ca'raye'ni.

⁹ Jaje pa'ina, yè'è toya saose'ejà'a mésarute ca quècosi'ì caquè toyase'ejè pa'ye ñama'pè pa'ijè'è.

¹⁰ Pa'iyè, yecohua'ì yè'ère ñeje cacohua'ì. Pa'ì ñato tutu peoquè maca, cui'ne coca canije, èjaèrepa cayeje meñerepa paire cama'quèpi, ja yè'ta'a toya daoyese'e jèaye caquè cui'ne cuañequè cayeje caquè toyaquè api.

¹¹ Jaje cacohua'ì maña, iyere yèquè yo'o ja'ñere asani pa'ijajè, yèquè cato jaje pa'ina, yèquè coca case'ejè pa'ye, cui'ne so'ore mésarute pa'ijè toyase'ejè pa'ye cui'ne yo'ojà'cohua'ì a'è, mésaruru ja're pa'ì maca.

¹² Nuñerepa caye, yèquè de'ocohua'ì a'è casicohua'ìre yèquèpi johua'ìre cuecuc ñajè cui'ne pa'iohua'ì a'è panita'a jerepa pa'iohua'ì a'è cuasajè yo'oma'pè pa'iyè. Jaje pa'ijèta'are me pa'ì a'ni yè'è cuasajè sa'ñe cuecuc ñajè pa'icohua'ì cato huesèohua'ìrepa yo'oyepi yo'ojè pa'iyè.

¹³ Yèquè yo'oye pa'ina, coa ai jerepa pa'iohua'ì a'è cuasajè sa tètò saipe yo'oye paja'cohua'ì a'è. Jaje pa'ina, yèquè co'amaña neja'to Maija'quèpi iye macaja'a neje'è, caquè ña nèocaiji. Jaje pa'ina, ipi yèquère mésaruru què'ro Corinto tì'ajè'è, caquè ñaquèna, tì'ahuè.

¹⁴ Jaje pa'ina, yèquère neje'è, ca nèosi macaja'a yo'oyè. Jerepa yo'oma'pè pa'iyè. Jaje pa'ina, yèquèpi ja'nè mésaruru ja're conì pa'ima'pè patu co'ara'pi. Jaje pati'ne pa'iotà'are yèquèpi du'ru sani mésarute Cristo de'o cocare quèahuè.

¹⁵ Cui'ne yèquère ca nèose'ere sa eta sani yecohua'ì nese'ere jioni sihuama'pè pa'iyè, ai jerepa pa'iohua'ìpi de'oyerepa nehuè cajè. Coa ai jerepa yèquère ca nèose'ejà'a yo'oyè, mésarupi Maija'quère pa'ire paji cuasa tì'ajèna. Mésaruru ja're pa'ijè jerepa Maija'què co'amañare neñu'u cuasajè yo'oyè, yèquère Maija'què ca nèose'ejè pa'ye.

¹⁶ Cui'ne cuasayè, mésarupi. Pa'ire paji cuasa tì'ajèna, mésaruru pa'ì yeja Corinto jerepa pa'ì yejañaje sani huaso coca quèañu'u cajè. Yecohua'ì nese'ere jioni, yèquèpi jerepa pa'iohua'ìpi de'oye nehuè, cajè sihuayere coejè, cui'ne yecohua'ì Maija'quère necaiyere nerojai hue'ña cacaye pañu'u cuasayè.

¹⁷ Jerepa pa'ì a'è cuasayè yèquè pani, jerepa pa'ì api cuasajè'è. Èjaèna. Jaè api, jerepa pa'ì.

¹⁸ Jaje pa'ina, Ija'a co'ye de'oquè a'è caquè cato neñama'quèpi nuñerepa pa'iquè peoji. Coa Èjaèse'e de'oquè api caquè cato neñasiquèpi nuñerepa pa'iquè api.

11

Pablo Cui'ne Coa Cacohua'ì

¹ Quècojè dahuère asajè'è, yè'è caye, a'ri maña cuepe cocajè pa'ye, catoje.

² De'oji, yè'è cato mésarute oi ai èseyè, Maija'què oi èseye ayepi, mésarute Cristona te'ire huejosi'ì ca nèosi do'ire èseyè. Jaje pa'ina, nomì tsjo èmère yo'oma'core pajè pa'iohua'ini, ina isisi'ì caquè yo'oyè.

³ Jaje pa'iquèta'are ca'rayè, añapi io ta'ñe cayepi, Evare cosose'ejè pa'ye, mésarute cosocna. Cristore nuñerepa cuasajè sihuayere mésarupi jèoma'cohua'ini caquè.

⁴ Jaje ca'raquè ñaquèna, mésaruru, yecohua'ìpi daijè yèquè quèase'ejè pa'ye quèama'pè coa tì'ne pa'ì Jesuni quèajèna, coema'pè asayè, mésaruru. Cui'ne ja'nè isi cuañose'ejè pa'ì joyo peoyere coa tì'ne pa'ì joyore isi cuañojè, cui'ne mésaruru ja'nè asase'ejè pa'ye peoyere tì'ne pa'ì huaso cocare quèajèna, sehuojè pa'ijacohua'ì a'è, tì'ne pa'iyè.

⁵ Jaje pa'itoje yè'è cato jaohua'ì Jesús jèjo saocohua'ì a'è coa cacohua'ì huè'ehuère pa'iyè pañè. Jare cuasayè.

⁶ Yè'èpi de'oyerepa coca ca tì'ama'què pa'itoje, yè'è ta'ñe asayè cato jaiye a'è. Ja asayere mésarute iñohuè, si'aye yèquè yo'ojè pa'iyepi.

⁷ ¿Co'aye yè'è yo'ore mésarute, huaso coca quèa do'ire curi sema'è, cui'ne mésarute ñese mèoñere caquè yè'èpi teaye pa'ì maca de'oni yo'ore? Pani, co'aye yo'oye pahuè.

⁸ Jaje pa'ina, yequè sehuosicohua'ì tsisosi curire johuè, mésarute necasi'ì caquè.

⁹ Mésaruru ja're pa'ì maca yè'ère jopo carayere, cocajè'è caquè mésarute sema'è pa'è. Paquèna, Maija'què do'ijè Macedonia daisicohua'ìpi cca'è'è, co'amaña isijè yè'ère caraye. Mésarute josa yo'oye pasi'ì cuasahuè, jare jajese'e yo'oquè pa'ija'què a'è.

¹⁰ Yè'è cato Cristore pa'ì do'ire nuñerepa cayè. Jaje pa'ina, yè'è si'a Acaya yeja pa'icohua'ìre curiquè sema'è quèase'ere sihuaye sioye ti peoji.

¹¹ ¿Me yo'oquè jaje caye'ni, mésaruni oima'è, jaje caye? Pani Maija'quèpi ñaji, yè'è mésarute oiyè.

¹² Johua'ì yo'oyere itire pa'è cajè sihuajè maije pa'iohua'ì a'è cañu'u cajè yo'oyere, johua'ì quèco payere jiosi'ì caquè yè'è curi sema'è yo'oyere yo'oquè pasi'ì.

¹³ Jaohua'i cato Cristo jëjo daocohua'irepa peoye coa j i jëjo daocohua'ije pa'iohua'i de'oni cosojë yo'ocohua'i a'ë.

¹⁴ ¿Me yo'ojë jaje yo'oye'ni, ai cuasama'pë? Jare j huati ëjaëpi huiñaëje pa'irepa mi-aquërepa de'oni yo'oquë api.

¹⁵ ¿Jaje yo'oquëre sëte me pañe'ni, ite necaicohua'ije? Jaje pa'ina, de'o pajje pa'iohua'i de'oni yo'ojë cosoyë, paire. Jaje pa'iquëta'are iohua'i yo'ose'e pa'iyeye sai cuañoñe pa'iji.

Pablo Ai Yo'ose'e Jesús Jëjo Saoquëpi

¹⁶ De'oji, tjjupë mësarute ca coñë, te'ijje yë'ëre cuepequë caji, cuasacohua'i pani coa asajë'ë, yë'ë mësarute cuepequë cayeye caquëna, yë'ëje a'ri maña casi'i jerepa pa'i a'ë cuasaquë.

¹⁷ Iye yë'ë jerepa pa'i a'ë cuasaquë casi'i caye cato cama'ë pa'iyë, mai Ëjaërepa cuañese'epi. Ja cato cayë, coa cuepei cayepi.

¹⁸ Jai pa'iohua'i yo'oyere ñajë jerepa pa'iohua'i a'ë cuasajë sihuacohua'i pa'iyeye sëte, yë'ëje cui'ne yë'ë yo'oyere ñaquë jerepa pa'i a'ë cuasaquë sihuasi'!

¹⁹ Mësaru ai ta'ñe pa'iohua'ita'a cuepeohua'i cayere quëcojë ai yëjë asayë.

²⁰ Jaje pa'iohua'ipi quëcojë jaohua'ipi jo'ya nerena, mësaru sihuajë coçaiyë, mësarute coa co'acohua'ire ñajë yo'ocohua'ini, coa cosocohua'ini, mësarute coe ëaye ñacohua'ini, yequere tsiana të'cajë yo'ocohua'ini coçaiyë, mësaru.

²¹ Yëquë paë'ë, ai tutu peocohua'ipi mësarute jaje yo'oye pasicohua'i. Jaje caye huajëya'ye nëcota'are cayë:

Jaje pa'iquëta'are yecohua'ipi jerepa pa'iohua'i a'ë cuasato yë'ë cui'ne jerepa pa'i a'ë cuasasi'i, iyere cuepei cayeye caquë.

²² Jaohua'i hebreo pai a'ë, yë'ëje j a'ë. Jaohua'i Israel pai a'ë, yë'ëje j a'ë. Jaohua'i Abraham tsëcapë acohua'i a'ë, yë'ëje j a'ë.

²³ Jaohua'i Cristore necaicohua'i a'ë. Yë'ëje jaohua'i necaiye jerepa Cristore necaiquë a'ë. Jaje pa'ina, jaohua'i neñe jerepa nehuë. Cui'ne jaohua'i si'se cuañoñe'e jerepa si'se cuañoñuë. Cui'ne jaohua'i co cuañoñe'e jerepa co cuañoñuë. Jaje yo'oquë si'anëpi ne ju'iñere paë'ë.

²⁴ Judío paipi cinco pa'ye yë'ëre tsëajë treinta y nueve pa'ye si'sehuë, tsëañerepa si'se mepi.

²⁵ Toasoñe pa'ye tarapi të'cahuë. Cui'ne te'erepa quëna pëapi jeahuë. Toasoñe pa'ye yë'ë sai yohuëapi ea dutupí. Ea du'ina, duni j uni tëjiquë te'e ñami cui'ne te'e mu'se jai tsiayare coa huahuahuë.

²⁶ Si'anë cu'iyese'e yo'oquë ñasiquë a'ë, tsiaya duni juti'ñe pa'ye, ñacohua'ina huahuo'ñe pa'ye, cajeohua'ipi huati'ñe pa'ye, t j paipi huati'ñe pa'ye, jai daripë acohua'ipi huati'ñe pa'ye, tsio huë'ña acohua'ipi huati'ñe pa'ye, jai tsiayana duni juti'ñe pa'ye, Maija'quë do'ijë a'ë, coa cacohua'ipi huati'ñe pa'ye yo'ojëna ñaquë tëto saisiquë a'ë.

²⁷ Cui'ne, jaiye jë'joye nëina neñe, cui'ne ai yo'oye tëto saë'ë. Jaje pa'ina, yequere ti caima'ë tëtosaë'ë. Yequere aq peoquëna, cui'ne oco ëa ju'i tëtosaë'ë. Yequere ti aima'quëpi coa paë'ë. Yequere caña peoquëna, sësë ju'i ai yo'oquë paë'ë.

²⁸ Iye cui'ne yequë co'amaña jerepa co cuasaquëna mu'seña ñape yë'ëna dëquëyeje pa'ye tomëquëna, si'a huë'ña sehuacohua'i me pa'iyë'ni cuasaquë co'a ju'i pa'iyë.

²⁹ Jaje pa'ina, yequë te'i tutu peoquë pa'ito yë'ëje j jare coní te'e ai yo'oquë tutu peoquë pa'iyë. Co'ayena ne taosiquë pa'ito yë'ë joyo a'siyerepa oiyë.

³⁰ Jerepa pa'i a'ë cayepi nëiñe pa'ito yë'ë teaye pa'i tutu peoyere iñosi'i, yë'ë cayepi.

³¹ Jaje pa'ina, Diusu mai Ëjaë Jesucristo pëca ja'quëpi yë'ë caye nuñerepa caji caquë asaji, si'anëpi de'oquëre pa'ni cajë sihuaquëre papi.

³² Yë'ë Damascore pa'i maca, romano pai ëjaë Aretasre coçaiquëpi, pai ëjaëpi, yë'ëre tsëaja'cohua'ire jai daripë eta sa'noana soldado paire në'quepi.

³³ Jaje yo'ouna, yecohua'ipi yë'ëre do'rohuëna ayani jai daripë tëhuopa etaye ña sa'roja'a casarena, catihuë, Aretasre.

12

Maija'quë Pablöre Iñose'e

¹ Do'i peoye a'ë, co'ye de'oyerepa yo'oquë a'ë cajë sihuaye. Jaje pa'iquëta'are mësarute quëaye yëyë, yë'ëre Ëjaë huëo caní ñañeje pa'ye cui'ne yequë mu'seña pa'i ja'ñere iñose'e.

² Pa'iji, catorce ometëca te'ire Cristo sehuoquëre ma'tëmona, toaso pëpë acona sase'e. Iye yo'ose'ere asaquë a'ë, yë'ë. Si'a capë sa cuañosiquë pa'ini, panita'a joyose'e sa cuañosiquë pa'ini huesëyë. Ja cato Maija'quëse'e asaji.

³ Jaje pa'iquëta'are asayë yë'ë cato, jaëte si'a capë quë'ire, panita'a joyose'e sasiquë pa'ini huesëyë. Coa Maija'quëse'e asaji.

⁴ Ite cato Maija'quë tsona sapi. Saëna, jàrona asapi, ti pai asani i case'eje pa'ye ca t'iañe peoyere pare.

⁵ Yë'ë ja'ëje pa'ire pani, jerepa pa'i api caquë sihuacati'ñe pa'i a'ë. Yë'ëja'a co'ye jerepa pa'i a'ë caquë sihuayeta'a pasi'i. Jaje pa'iquëta'are sihuasi'i yë'ë ne t'ia ma'ñere.

⁶ Jaje pa'iquëta'are, yë'ëpi jerepa pa'i a'ë caquë pani, coa cuepequë caye pa'ñe pa'i a'ë, jare nuñere cajuquë pa'i do'ire. Jaje pa'iquëta'are iyere yë'yë, yecohua'ipi yë'ëre jerepa pa'i api cuasama'cohua'ipi, iohua'i yë'ë yëhuose'ere asayepi cui'ne yë'ë pa'iyere ñañepi cuçuejé.

⁷ Jaiye iñose'ere paquëta'a pa'ina, yë'ëpi jerepa pa'i a'ë cuasama'quëni caquë, yë'ëre josa yo'oja'core huati ëjaë hua'jo ñacaje pa'ioipi yë'ë capëna ai yo'oyere miuje pa'ioire ne nëopi.

⁸ Jaje neina, ai yo'oque toasoñe mai Èjaëre, ja ai yo'oye nejocaij'ë caquë se'i'ë.

⁹ Seina, ipi capi: "Yë'ë më'ëre oiyepi tsoe do'oji, yë'ë tuture tutu peocohua'ija'a de'oyerepa iñofne pa'iji" capi. Jaje pa'ina, sihuayë, yë'ë tutu peoyeja'a Cristo tuture iñofne pa do'ire.

¹⁰ Jaje pa'ina, sihuayë, tutu peoyere, pëpoyere, co'amaña carayere, huani jëoñu'u cajë yo'oyere, cui'ne Cristo do'ire necai ai yo'oyere. Jaje pa'ina, yë'ëpi tutu peoque pa'i maca, ja maca jerepa tutu quë'i pa'iyë.

Corinto Sehuosicohua'ire Pablo Co'a Ju'ñe

¹¹ Mësarupi cacaima' do'ire, cuepei cayeje cahuë, mësarute. Mësarupi yë'ëre de'oque api cacaiye pa'iji, pani yë'ëja'a co'ye. Yë'ë mësarute ye'yacohua'i huë'ehuëre pa'iyë pañë, jdo'i peoque maca pa'inije!

¹² Jaje pa'ita'a, yequë mu'se pa'i ja'ñe iñofnepi, pai yo'o t'ia ma'ñe yo'oyepi, jaiye de'o co'amaña mësaruni jare pa'i dahuëre quëcoquë yo'o iñose'epi, japi iñohuë, Jesús jëjo daoquërepa yë'ë pa'iyë.

¹³ Jaje pa'iquëta'are yequë huë'ña sehuosicohua'ipi jerepa de'oyerepa necaise'e payë cuasayë. Mësaruni coa mësarute necaiye tayo yo'ose'e pa'ito iyese'e a'ë: Yë'ë carase'e mësarute sëma'ë pa'ë. Ja tayo yo'oyere ai cuasama'pë sai tçaiyeje pa'ye de'oye cuasajë oni yejéj'ë, yë'ëre.

¹⁴ Mësarute toasoñe acore do'i sai ja'ñere yure ne de'huaquë pa'iyë. Yureje mësarute dëquëyeje pa'ye yo'oma'ë pa'ija'quë a'ë. Mësaruni curire pasi'i caquë yo'oma'ë pa'iyë. Yë'ë cato mësaruni caquë yo'oyë. Jaje pa'ina, pëca ja'quëohua'ipi mamajëre isija'a curiquë tsi'socohua'i a'ë, pani mamajëpi pëca ja'quëohua'ire isi ja'ñere tsi'oye.

¹⁵ Jaje pa'ina, yë'ëpi mësarute ai oina, mësarupi yë'ëre a'ri maña oitöje, yë'ë de'oye cuasa do'ipi si'aye yë'ë curi paye sai saosi'i, cui'ne yë'ë tutu mañaje ne saosi'i caquë sihuaquë yo'oyë, mësaruni joña de'oye pa'iyere caquë.

¹⁶ Nuñerepa cayë, yë'ë mësarute dëquëye yo'oma'ë pa'ë. Jaje pa'iquëta'are yecohua'i mësaruni acohua'ipi cayë, yequëre coa i ta'ñe cosoyepi yo'oque se'queoje pa'iona, eo nëopi.

¹⁷ ¿Yë'ë mësaruni ñato, yë'ë yëyere cosoque nesi'i caquë jaohua'ire jëjo saore?

¹⁸ Titore do'i mësarute sani ñajaque caquë seni cui'ne i ja're con yëquëre Maija'quë do'iquëre jëjo saohuë. ¿Jëjo saosiquepi Tito sani mësarute i yëyere nesi'i caquë cosoque yo'ou? ¿Yëquëre te'e joyopi cui'ne nëiñe isiquëna, cayaohua'i si'a yë'quë macarepa yo'oma'pë pate, mësaruni ñato?

¹⁹ Yeque mësaruni ca'ra'ñe pa'iohua'i a'ë tayo yo'ose'ere, yëquë iti ñasicohua'i ña huë'ñana ca de'huañu'u cajë cayë. Jaje cajë caye pañë, yëquë cato Maija'quë ña huë'ñana cayë, Cristo acohua'i sëte. Jaje pa'ina, si'aye yëquë caye cato, mësaruni Maija'quë do'ijë joyo pa'iyë jerepa ñese mëi ja'ñere cçañu'u cajë caye a'ë.

²⁰ Jaje pa'iquëta'are ca'rayë, mësarute ñasi'i caquë sani tiñe pa'ijëna, ña quëquëyere cui'ne mësarupi yë'ëreje tiñe pa'ina, ñañere. Ca'rayë, te'e cuasaye peoquëna, pëtise'e, te'i payese'e, co'a cocase'e, yecohua'ire cue'cuyese'e, jerepa pa'i a'ë cuasayese'e, cui'ne coa co'a tiyapë pa'iyese'e pa'ima'quëni caquë.

²¹ Jaje pa'ina, cui'ne t'ijupë do'i ñasi'i caquë saquëna, yë'ë Diosupi huajëya'ye nëiñe nema'quëni mësaruni yo'oyere ñaquëna, caquë ca'rayë. Ja maca mësaruni tsoe huë'ña acohua'ipi tayojëta'a ti jëoma'pë, jai pai si'si yo'ojë coa nomiohua'ire cui'ne ëmëohua'ire yo'ojë pa'iyere, cui'ne ja'ne yo'ojë sëo mease'ere jëoma'pë pa'iyere, iño oema'quëni caquë ca'rayë.

Yëhuoye Cui'ne Pëpa Tëjyerepa

13

¹ Iye do'i saise'e pa'ija'coa, yë'ë mësarute toasoñe acore do'i saico. Te'ire sañope coca caye pa'ito ne de'huaye pa'iji, cayaohua'i panita'a toasçohua'i, iti ñasicohua'ipi cajëna.

² Jaje pa'ina, t'ijupë yure ca cõñë, so'ore pa'i. Yë'ë ja'ne cayaye acore do'i saisi maca mësarure pana ñaque case'eje ca cõñë. Ja'ne co'aye yo'ojë pa'isicohua'ire, cui'ne si'aohua'ire cayë. Yë'ëpi co'i cõsiquë pani, mësaruni tayoye coa ñañe pa'ija'quë a'ë.

³Ja maca jaje yë'ëpi cani iñoquëna, mësarua asaja'cohua'i a'ë. Yë'ë caye cato Cristo case'e a'ë. Ja case'epi mësaruna tutu carajañe peoji, Cristo tuturepa quë'i coca'ë.

⁴Jaje pa'iquëta'are Cristore tutu peoquëre quëni huani jeoñeje huani jeohuë. Huani jeosicohua'ita'are Maija'quë tutupi huajëquëre papi pa'iji. Jaje pa'ina, cui'ne yëquëje i tutu peoquë pa'ise'e ayere çoni pa'icohua'ije i ja're tsioni pa'i do'ire Maija'quë tutupi pa'ija'cohua'i a'ë, mësarute necaiyere cajë.

⁵Mësarujaj'a ñare pajë co'ye neñajë'ë, nuñerepa yëquë Maija'quë pa'ire paji cuasayere pa'iyë cajë. Neñajëna, Cristopi mësarua ja're çoni pa'ima'quë pa'ito coa cacohua'i pa'iyë.

⁶Jaje pa'ina, cuasayë, mësarupi neñasicohua'i pa'ijë, yëquëreje tayoma'pë de'oyerepa pa'icohua'i a'ë, asa t'ajajë cajë uteyë.

⁷Jaje pa'ina, mësarupi co'aye yo'oma'pë pa'ijajë cajë Maija'quëre seçacaiyë, mësarute. Yëquëpi jerepa pa'iohua'ipi ne ti'ahuë cajë señe pañë. Coa ai jerepa yëquë cato, mësarupi de'oye yo'ojajë cajë señë. Yëquëpi tayose'eje pa'iohua'i ña cuañotoje.

⁸Yëquë cato nuñerepa yo'oyere sañope yo'oma'cohua'i a'ë. Coa ai jerepa nuñerepa yo'oyere ñese çocaicohua'i a'ë.

⁹Jaje pa'ina, sihuayë, yëquëpi tutu peocohua'i pa'ijëna, mësarupi tutu quë'iohua'i pa'ito. Jaje pa'ina, mësarua de'ocohua'irepa pa'iyë t'añere cajë, Maija'quëre si'anë seçacaijë pa'icohua'i a'ë.

¹⁰Jaje pa'ina, yë'ë ja yë'ta'a mësarua quë'ro saima'në iye toya ja'hua toya saoyë, yë'ë mësarua quë'ro t'iasi maca, yë'ëre Ëjaëpi mësarute nejoma'ë, joyo pa'iyere ñese mësarute mëocaijaja tutu isise'epi, jëayerepa yë'ë cuañequërepa pa'i tutupi mësarute cayere coequë, jaje yo'oyë.

¹¹De'oji, yure ca tējihuë. De'oye sihuajë pa'ijë'ë. Mësarua pa'iyepi de'ocohua'irepa pa'iyere ponëñere yo'ojë pa'ijë'ë, yë'ë case'ere pa'ijë'ë, cui'ne jo'cua de'oye sa'ñe de'oye yo'ojë pa'ijë'ë. Jaje pa'ijëna, Maija'quë paire oiquëpi, cui'ne jo'cua de'oye pa'iyere isiquëpi mësarua ja're pasipi.

¹²Sa'ñe pëpajë sihuajë'ë, si'si peoyere papi.

¹³Mësarute pëpa saoyë, si'aohua'i Maija'quë do'ijëpi.

¹⁴De'oji. Mai Ëjaë Jesucristo, coa isiyepi, Maija'quë mësarute oiypipi, cui'ne Maija'quë joyo si'anë mësarua ja're pa'iyepi, si'aohua'ire mësarute pa'ijaquë.

GÁLATAS

Pablo Toyase'e Galacia Sehuosicohua'ire

¹ Yé'ère Pablöre paipi cani neni jëjo daosiquë peoyë. Coa Jesucristopi, cui'ne Diusu Maija'quëpi, Jesús ju'isiquëre huëosiquëpi jëjo daosiquë a'ë, cui'ne

² si'aohua'i Maija'quë do'ijë yë'ë ja're ñno pa'icohua'ijë, mësarute yë'ë ja're toyayë, iye ja'hua sehuosicohua'i Galacia yeja pa'icohua'ina.

³ Diusu Maija'quëpi cui'ne Jesucristopi coní, mësaruna coa carajaiñere cui'ne jo'cua de'oye pa'iyere isijajë. Jaje pa'ina,

⁴ yure mai co'a yeja pa'icohua'ini, huasosi'i caquë Jesucristo mai do'ire jucacaji'i, Maija'quë Diusu yëyepi.

⁵ Jaje pa'ina, Maija'quëse'ere de'oquëre pa'ni cajë sihuaye pa'iji. ¡Jaje pa'ijaquë!

Peoji, Yequë Huaso Coca

⁶ Cristo necai do'ipi Maija'quë mësarute soisicohua'ipi, yequë huaso cocare tui huëoni cuasama'topi Maija'quëre tuiye jeorena, ña quëquëyë.

⁷ Nuñerepa cayë, mësarute yequë huaso coca ti peoji. Jaje peoquëta'are mësarute yecohua'ipi ca co'me huesoyë, Cristo huaso cocare tiñe ponafi'u cacohua'ipi.

⁸ Jaje pa'ina, huaso cocare yecohua'ipi tiñe quëacohua'i pani ti nejosicohua'i pa'ijajë. Yë'ëpi tayo tiñe quëaquë pa'itojé nejoñe pa'iji. Panita'a huññaë ma'tëmo daisiquëpi tiñe quëaquë pa'ito ti nejoñe pa'iji.

⁹ Tsoe ja'në mësarute case'ere ca coñë, yecohua'ipi mësaru du'ru macarepa huaso coca asani de'huase'eje pa'ye quëama'cohua'i pani ti nejosicohua'i pa'ijajë.

¹⁰ Jaje pa'ina, ¿yë'ëni paipi de'oquë api, cajajë caquë yë'ë yo'oye? ¿Panita'a Maija'quëpi de'oji, cajuquë caquë yo'oye? Jaje pa'ina, yë'ëpi paipi de'oquë api cajajë caquë yo'oquë pani Jesure necaquë peoyë.

Me De'o Uní, Pablo Maija'quë Jëjo Saoquë

¹¹ Yë'ë quëaye huaso coca paí cuasase'e pa'ima'ë pa'iji. Jaje pa'ina, Maija'quë do'ijë, mësarupi paí cuasaye a'ë cuasama'pë pa'ijë'ë caquë quëayë.

¹² Jaje pa'ina, paipi yë'ère iye coca isima'pë paë'ë. Cui'ne paina ye'yema'ë paë'ë. Coa Jesucristopi yë'ère iye coca ta'ñe asaye necaji'i.

¹³ Ja yë'ta'a judío paí sehuoyere sehuoquë pa'inë, yë'ëpi Maija'quëre sehuocohua'ire tuirojai nejo saosi'i caquë yo'ose'e asahuë, mësaru.

¹⁴ Jaje pa'ina, judío paí sehuoyere yë'ë jerepa ta'ñe asaquëpi yë'ë cajeohua'ire yë'ë ja'ye ometëca pacohua'ire tëto saisiquë paë'ë, yë'ë aipë case'ere ai de'oye nuñerepa sehuoquë pacacaiquë paja'quë caquë pa'í do'ire.

¹⁵ Jaje pa'ita'are Diusupi ja yë'ère coama'në sahuapi. Jaje pa'ina, ¡ai oiyepi soipi, yë'ère.

¹⁶ Yë'ère ñnopi, ¡mamaquëre yë'ëpi judío peocohua'ire huaso coca quëajaquë caquë. Jaje yo'osi maca yecohua'ini seni asasi'i caquë yo'oye pahué.

¹⁷ Cui'ne saima'ë paë'ë, Jerusalénna, Jesús tsoe jëjo daocohua'i ye'yayere ye'yepi'ñasi'i caquë. Jaje yo'oma'ë, tsoe nëiñe peoyerepa Arabiana saë'ë. Saisiquëpi jeteyo'je Damascona co'ihuë.

¹⁸ Tres ometëca tëto sai maca Jerusalénna saë'ë, Pedrorre ñasi'i caquë. Sani ¡ja're coní quince mu'seña pëahuë.

¹⁹ Jaje pa'iquëta'are ñama'ë paë'ë, yecohua'ire Jesús jëjo saocohua'ire. Coa mai Ejaë yo'jei Jacobose'ere ñahuë.

²⁰ Care payë, Maija'quë ña hue'ñana, më'ère yë'ë iye toyaye nuñere pa'ë.

²¹ Ja jeteyo'je saë'ë, Siria yejana cui'ne Ciliciana.

²² Ja maca cato Cristore sehuocohua'i Judea yeja pa'icohua'i yë'ère pare ñama'cohua'ipi paë'ë.

²³ Coa yecohua'ipi "ja'në maire josa yo'oquë pa'isiquëpi yure Maija'quë pa'iji cuasayere quëaquë cu'iji. Ja'në nejo saosi'i caquë yo'oquë pa'isiquëpi cajë quëayese'e asacohua'i paë'ë."

²⁴ Jaje pa'ina, yë'ère de'oye yo'osi do'ire cuasajë Maija'quëre ai de'oji cajë sihuajë paë'ë.

2

Yecohua'i Jesús Jëjo Saocohua'ipi Pablöre Sehuocaiyë

¹ Catorce ometëca pa'í maca tñupë Jerusalénna sai Bernabére cui'ne Titore sahuë.

² Jaro saë'ë, Diusupi yequë yo'oyequë pa'iji caquë ñhouna. Jaro Jerusalénre sehuocohua'i ëjahua'ise'e tsi'sicohua'ipi paë'ë. Pa'ijëna, yë'ë judío paí peocohua'ire huaso coca quëayere

quëahuë, jaohua'ipi asacatena, yë'ë nese'epi cui'ne yë'ë ja neñepi do'i quë'yerepa pa'ijaquë caquë.

³ Cui'ne Tito judío peoquëpi yë'ë ja're cõni pa'iquëreje ca'ni tëaye pa'iji cajë cuañeñeje peopi.

⁴ Jaje pa'iquëta'are Maija'quë do'ijë a'ë cacohua'ita'a coa cacohua'ijë paë'ë, yëquë ja're cõni yahue cacasicohua'ipi. Jaohua'ipi ca'ni tëaye pa'iji cahuë. Icohua'i cato Cristo Jesure tsioni mai de'oye pa'yiere ñani tujupë judío pai yo'oyena cuañese'le jo'yaohua'i pa'yiena ponañu'u cajë cacasicohua'i paë'ë.

⁵ Jaje pa'iquëta'are ti johua'i caye asacaiye pahuë, mësarupi nuñerepa huaso cocare de'oyerepa pajë pa'ijajë cajë.

⁶ Huajëye yo'o ja'ñe quëaye pahuë, yo'o ja'ñere quëacohua'ijë. Ejaohua'ire pa'ë, cuasama'ë pa'yie, jaohua'ipi ejaohua'i pa'itoje. Maija'quë cato si'aohua'ire cui'ne pa'iohua'ire ñaquë api.

⁷ Huajëye yo'o ja'ñere quëa'ñe pa'iohua'ita'a judío pai peocohua'ire quëaja'quëre Maija'quëpi yë'ëre cuañe nëosiquë api, Pedrorre judío paire quëaja'quëre cuañe nëose'ejë pa'ye, cajë asahuë.

⁸ Jaje pa'ina, Maija'quë Pedrorre judío paire quëaja'quëre jëjo saouquëpi, yë'ëreje judío pai peocohua'ire quëaja'quëre jëjo saopi.

⁹ Jaje pa'ina, Jacobo, Pedro cui'ne Juan sehuosicohua'i ejaohua'ire pa'ë cajë ñajëna, pa'icohua'ire papi ñani Maija'quëpi ja yo'o ja'ñe mësarute isipi, cajë jëtëpi yë'ëre cui'ne Bernabëre tseani pëpahuë. Jaje yo'ojë iñohuë, te'e cajeohua'i pa'yie. Cui'ne ja maca de'oji cahuë, mësarupi sani judío peocohua'ire quëajëna, yëquëpi judío paire quëaye.

¹⁰ Coa iyese'ere cuañehuë, co'amaña peocohua'ire cuasacajj'ë cajë. Yë'ë ñare paquë nesi'i caquë yo'okuë pa'yiere cuañehuë.

Antioquía Daripëna Pablopí Pedro Tayoyere Yëhuose'e

¹¹ Pedropi Antioquía daripëna daisi maca te'e tsiarepa ñaquë yëhuohuë, ipi tayosiquë pa'iquëna.

¹² Jaje yo'okuë du'ru macarepa judío pai peocohua'i ja're aji'i, Jacobo ja're pa'isicohua'i ja titama'në. Titasi maca aisiquëpi jaohua'i ja're aine jeoni cui'ne tsioyeyë paquë yo'opi, ca'ni tëaye pa'iji cacohua'i acohua'ini ca'raquë.

¹³ Ja maca jaje yo'okuëna, ñajë judío pai sehuosicohua'ijë Pedro ca'raquë yo'oyena ñani cui'ne yo'ohuë. Yo'ojëna, Bernabëje cui'na ca'raquë yo'opi, jaohua'i yo'oyere ña do'ire.

¹⁴ Jaje nuñerepa huaso coca ye'yayeje pa'ye yo'oma'ëna, yë'ëpi ñani si'ahua'i tsi'si sitona si'ahua'i asajëna, Pedrorre cahuë: Mé'ë judío paita'a judío peocohua'i ja're paë'ë, judío pa'yiepi pa'ima'ë. Jaje pa'iquëta'are ¿me nesi'quë judío peocohua'ire judío pai pa'yieje pa'ijj'ë cuañequë'ni?

Si'aohua'i Maija'quëre Cuasayepi Huasosicohua'i De'oye

¹⁵ Mai cato tsj'ñëna judío paire pa'ë. Co'acohua'i judío pai peocohua'i pa'yie pañë.

¹⁶ Jaje pa'iquëta'are, mai nuñe pa'icohua'irepa pa'yie tja'ñe peoji, Moisés cuañese'ere yo'ojë. Coa Jesucristore ire pare cuasayepi tja'ñe pa'iji, nuñe pa'icohua'i pa'yie. Jaje pa'ina, yëquëje Jesucristoni ire papi cajë asahuë. Cristore ire pare cuasayej'a nuñe pa'icohua'i pa'yie tja'ahuë. Jaje pa'ina, cuañese'ere yo'ojë nuñe pa'icohua'i pa'yie tja'ñe peoji.

¹⁷ Cristona ponëni, i nuñe pa'yiere pañu'u cajë yo'ojë judío peocohua'ijë pa'iohua'i, co'acohua'i pa'yie asa tja'ñë. ¿Jaje pa'ito Jesupi maire co'a de'osicohua'i pa'yie nei? Papi, jaje neñe.

¹⁸ Jaje pa'ina, cuañese'ere ne tja'jë, huaso cuañoñe pa'iji caquë ye'yasiquëpi, ja ye'yayere jeosiquëpi tujupë cui'nare ye'yaquë pani cuañese'ere sañope do'i quë'i de'oji.

¹⁹ Jaje pa'ina, yë'ë, cuañese'le yo'oyere jeosiquëpi ju'isiquëje pa'i pa'yie, Maija'quëni pacacasi'i caquë.

²⁰ Cristo ja're que cuañosiquëpi pa'yie. Ja yë'ta'a huajëquëpi pa'yie, Cristopi yë'ëni pa'i do'ipi. Yë'ëpi pa'yie pañë. Jaje pa'ina, iye capë huajëquë pa'yie cato Maija'quë mamaquëni yë'ëre oi jucacai isiquëni de'hue yë'ëre ñacajja'quë api cuasaquëpi pa'yie.

²¹ Jaje pa'ina, Maija'quë paire oi yo'ose'ere tirona oañe pañë. Cuañese'le cayere sehuojë yo'oyepi nuñe pa'icohua'i tja'ñe pa'ito, Cristo ju'ise'epi do'i peoye patira'pi.

3

Paire Cuañeñe Panita'a Maija'quë Pa'iji Cuasaye

¹ Ina, Gálatas pai airepa huesëohua'i a'ë, mësarú. ¿Nepi mësarute co'a de'huare'ni, nuñerepa cocare sehuoma'pë pa'ija'cohua'ire? Mësarú ña hue'ñana de'oye iñojë quëahuë, Jesús que cuañosiquë ayere.

² Jaje pa'ina, iyere seina, quëajë'è: ¿Maija'quë joyo mësarute isi, Moisés cuañese'ere yo'o do'ire, panita'a, Jesure ire pare cuasa do'ire isipi?

³ ¿Airepa huesëohua'ini mësaru, Maija'quë joyopi yo'oquëna, ne huëosicohua'ipi, yure cato pai tutupi nuñerepa pa'iyere ne tija'ñu'u cuasacohua'í?

⁴ ¿Mësaru jaiye ai yo'oyepi coa pa'iyë? Ja ai yo'oyepi a'ri maña ye'yajajë caquë oiyë.

⁵ Maija'quëpi i joyere mësaruna isini, pai yo'o tija ma'fiere mësaru ja're yo'oni, ¿ique do'ire yo'oquë'ni? ¿Mësarupi cuañese'e cayere sehua tija do'ire yo'oquë? Pani, mësarupi Maija'quë coca nuñere pa'ë cuasa do'ire yo'oji.

⁶ Abrahampi Maija'quë pa'iji cuasa do'ire Maija'quëpi ite capi, nuñe pa'iquë api.

⁷ Jaje pa'ina, Abraham cuasase'ejë pa'ye cuasaye pacohua'ipi Abraham tsëcapë acohua'í a'ë.

⁸ Judío pai peocohua'ire necaiquëre pare cuasayeja'a nuñe pa'icohua'ire neñe pa'iji cuasa nëopi, Maija'quë. Ja yë'ta'a i toya pëpëna toyama'në Maija'quëpi Abrahamre ja de'o cocare quëapi: "Si'a pai sihuaja'cohua'ire de'oye necaija'quë a'ë, më'ëja'a."

⁹ Abraham jare sihuacohua'ire nesicohua'ipi pa'iyë, i cuasase'ejë necaiquëre pare cuasacohua'ije.

¹⁰ Si'aohua'í cuañese'ena quëco pacohua'í cato nejo cuañoñere pa'iyë. Jaje pa'ina, toyase'e caji: "Cuañe toya pëpë cayejë si'anë yo'o tija'ama'cohua'í cato nejosicohua'í a'ë."

¹¹ Tiñarepa quëaji. Jaje pa'iyë sëte te'ijë cuañese'e cayere yo'osi do'ipi, nuñe pa'í pa'iyë tija'ne peoji. Jaje pa'ina, toyase'e caji: "Nuñe pa'í cato Maija'quëre necaiquëre pare asa do'ipi pa'ija'quë api."

¹² Jaje pa'iquëta'are Moisés cuañese'e cato caji: "Si'aye cuañese'e cayejë yo'o tija'quëpi, iti yo'o tija do'ija'a pa'ija'quë api." Jaje pa'ina, Moisés cuañese'e cato necaiquëre papi asaye peoye a'ë.

¹³ Cuañese'e cayere si'a yë'quë maca yo'oma'cohua'ipi nejosicohua'í pa'ijëna, Cristopi maire huasopi. Ja do'ire co'aquejë pa'í de'opi, mai do'ire. Jaje pa'ina, toyase'e caji: "Soquë sarahuana sëa deosiquë cato co'aque'api."

¹⁴ Si'aye Abrahamre Maija'quë ca nëose'ere judío peocohua'ije paja'cohua'í a'ë caquë Jesupi soquë sarahuana jucacaji'í. Jaje pa'ina, i ca nëose'ere i joyere isiye pa'iji, si'aohua'ire Jesucristore de'hue neja'quë api, asajë pa'icohua'ire.

Cuañese'e Panita'a Ca Nëose'e

¹⁵ Maija'quë do'ijë, mësarute pai ca nëoni yo'oyena quëaquë iñosi'i: Ñajë'ë, paipi yëni yequëna co'amañare isisi'í ca nëoni toya nëo huesose'e, yecohua'ipi nejocaiye peoji, cajë.

¹⁶ De'oji jaje cui'ne yure Maija'quëpi Abrahamre cui'ne i tsëcapë aquëna ca nëopi. Jaje pa'ina, toyase'e më'ë tsëcapë cama'ë pa'iji, jai paire cayejë, coa te'ire caji më tsëcapë aquëna. I ca nëosiquë cato Cristo api.

¹⁷ Jaje cani cayë: Maija'quëpi Abrahamre ca nëoni ti jaje yo'o ja'ñere ca huesopi, caquë. Jaje pa'í do'ire Moisés cuañese'e jeteyo'je cuatro ciento treinta ometëca pa'í maca huëose'epi Maija'quë ca nëose'ere do'í peoye neni nejoñe peoji.

¹⁸ Jaje pa'ina, Maija'quëpi coa isisi'í Abrahamre ca nëopi. Jaje pa'iquëta'are Moisés cuañese'ere yo'ojë tija'ne pani Maija'quë coa isisi'í ca nëose'e peora'pi.

¹⁹ Jaje pa'ito, ¿iquere co'ai Moisés cuañese'e pa'iquë'ni? Ja cato Maija'quë yëyere pai tayose'ere iño ja'ñepi pa'iji. Jaje pa'ina, Abraham tsëcapë aquë, i ca nëosiquë Cristo dai macaja'a ja cuañese'e yo'oye paji'í. Cuañese'e cato Maija'quëpi huññaohua'ina caëna, jaohua'ipi Moisésre isihuë, paina isicaija'quë. Isirena, Moiséspi iti yo'o ja'ñe paire quëapi.

²⁰ Jaje pa'iquëta'are yure cato coa Maija'quëse'e te'í pa'iji iti yo'oquë peoji, iti se quëacaiquëje.

Iti Cuañëne Do'í Quë'ye

²¹ ¿Jaje pa'ito Moisés cuañese'epi Maija'quë ca nëose'ere sañope cayë pa'iquë? Pani. Jaje pa'ina, cuañese'e yo'oyepi Maija'quë cajeohua'í pa'iyë tija'ne pa'ito, ja cuañëñere sehuojë yo'o do'í tija'ra'huë, nuñe pa'icohua'í pa'iyë.

²² Jaje pa'iquëta'are yure cato Maija'quë toya pëpë caji: cuañese'e tayo yo'o do'ire co'ayepi si'a pai tseasicohua'ipi pa'iyë. Jaje pa'ina, jare Jesucristoni necaiquë api cuasasicohua'ipi de'hue Maija'quë ca nëose'e paye pa'iji.

²³ Ja yë'ta'a Cristore necaiquëre pare cuasaye tija'ama'në cuañese'epi maire co'aye yo'oma'cohua'ini caquë cose'ejë pa'ye ñacaiye paji'í. Jaje pa'ina, cosicohua'ipi utejë pa'ë'ë, iye cuasayere iñoñe pa'í macana.

²⁴ Tsire ñacaiyeje maire cuañese'epi ñacai ye'yaquë paji'í, Cristona saja'quë. Saëna, Cristoni ire pare cuasani nuñe pa'icohua'í pa'iyë tija'ajajë caquë, yo'opi.

²⁵ Ja pa'ina, yure necaiquëre cuasaye daisi maca cuañese'epi maire necaiye peoji.

²⁶ Jaje pa'ina, mésarú si'aohua'i Maija'quë mamajë a'ë, Cristore necaiquëre pare cuasa do'ipi.

²⁷ Cristo do'ire oco do cuañsicohua'i cato, Cristo ayere suñsicohua'ipi pa'iyë, ije pa'iohua'i de'ojëna.

²⁸ Jaje pa'ina, peoyë, judío pai. Peoyë, griego pai. Peoyë, jo'ya nesicohua'i. Peoyë, coa pa'icohua'i. Peoyë, ëmë. Peoyë, nomio. Jaje pa'ina, Cristo Jesuna tsoni pa'icohua'ipi te'ije pa'iohua'i pa'iyë.

²⁹ Jaje pa'ina, mésarupi Cristo tsecohua'i pani Abraham tsëcapë acohua'i pa'iyë, Maija'quë ite isisi'i ca nëose'ere paja'cohua'ipi.

4

¹ Pëca ja'quë co'amaña si'aye paja'quëta'a tsihua'ë pani jo'yaëje pa'i pa'iji, si'a co'amaña paja'quëta'a.

² Jaje pa'ina, yecohua'ipi ite ñacajë pa'iyë, i ne'ñe pa'yere. Ñacajë pa'ijëna, pëca ja'quëpi yureta'a ai de'o tëjipi caquë ina si'aye co'amaña isi macaja'a.

³ Jaje pa'ye maije tsije pa'iohua'i pa'i maca iye yeja cuñe tutupi jo'ya nesicohua'ire papi, maire.

⁴ Jaje paquëna, iti yo'o maca ti'aëna, Diusupi i mamaquëre jëjo daopi. Judío paije pa'i daji'i, nomiona jëjo daopi, mésarú joñoana. Ja joyo pa do'ire cayë, mai: "yë'ë Ja'quë."

⁵ Jaje daji'i, ja cuñeñe yo'ojë pa'icohua'ini maire huasosi'i caquë Maija'quëpi i yëhuiohua'ire pajaquë caquë.

⁶ Jaje pa'ina, mésarupi tsoe i mamajë a'ë cajë asayerë iñosi'i caquë Maija'quëpi i mamaquë joyore jëjo daopi, mésarú joñoana. Ja joyo pa do'ire cayë, mai: "yë'ë Ja'quë."

⁷ Jaje pa'ina, Maija'quë mamaquë a'ë, më'ë, jo'yaë peoye. Jaje i mamaquë pa'i do'ire Maija'quëpi i yëyepi isija'quë api, i ca nëosi co'amaña.

Pablopi Ai Co'a Ju'i Pa'ise'e Maija'quëre Sehuocohua'ire

⁸ Ja yë'ta'a Maija'quëre asama'në, mésarú yeque diusuohua'i pai nese'e jo'ya nesicohua'ipi paë'ë. Pa'ijëta'a nuñerepa yeque diusuohua'i peoyë.

⁹ Jaje pa'isicohua'ita'a yureta'a asare payë, Diusuni. Ai tiña casi'i, Diusupi mësarute i tsecohua'ire ñaji. Jaje pa'ito ¿me neni cui'naohua'ipi tutu peoyere cui'ne teaye pa'yere cuasa cojë, sehuocajë jo'ya ne cuañeñe yëye'ni?

¹⁰ Mésarú ja yë'ta'a Maija'quë yëyere yo'o ti'aja'cohua'i a'ë cuasajë judío pai yo'oyere mu'se de'huajë, ñañëohua'ire cui'ne ometëcare yo'oyë.

¹¹ Jaje yo'ojëna, yë'ë ca'rayë, mësarute ai yo'oquë quëase'epi coa yo'ose'e pa'ima'quëni caquë.

¹² Maija'quë do'ijë señë, mësarute. Yë'ëje pa'iohua'i de'ojë'ë, jo'yaohua'i peocohua'i, yë'ë je'quë mësarujë pa'i de'ohuë, judío pai cuañeñe peoquë. Yë'ëre mésarú ti co'aye yo'oma'cohua'i a'ë.

¹³ Tsoe mésarupi asayë, yë'ë ju'i dahuë peoto quëaye pa'ñe pa'ipi mësarute de'o coca quëahuë, yë'ë du'ru macarepa mësarute quëacore.

¹⁴ Yë'ë ju'i dahuë cato yë'ëre neñañe paji'i. Pa'ina, mésarú ja ju'i dahuëre yë'ëre coejë eto saoye pahuë. Pajë coa ai jerepa Maija'quë huññaëre necaiyeje panita'a jare Jesucristopi daquëna, necaiyeje pa'yerepa yo'ohuë, mésarú.

¹⁵ Jaje pa'ina, mësarute cayë, ¿me nei'ni, mésarú sihuajë pa'ise'e, mésarú de'oye yo'ose'ere yë'ë cocaiye paye? Nuñerepa cayë, mésarú dutaco pa'ito, mésarú ñacoare dutani yë'ëre isira'huë, yë'ëre ai oi do'ire.

¹⁶ Jaje yë'ë nuñerepa cocare mësarute casi do'ire mësarute sañope yo'oquë de'ore? Páni.

¹⁷ Jaohua'i mësarute, ai de'oye ñacañu'u cajë yo'ojëta'a co'aye cuasajë yo'oyë. Iohua'i yëye cato mësarupi yëquë ja're pa'isicohua'ini, tiohua'ire neñu'u cuasaye a'ë, jeteyo'je mësarupi iohua'ise'ere de'oye necajë pa'ijajë cuasajë yo'oye a'ë.

¹⁸ Jaje pa'ina, yecohua'ire de'oye cuasajë, mai yëyeje yo'ojajë cajë ñacaiye de'oye a'ë. Jaje pa'ina, yë'ë mésarú ja're pa'i macase'e yecohua'ipi de'oye yo'ojë, si'anë jajese'e de'oye yo'oto de'oji, yë'ë peo macajë.

¹⁹ Jaje pa'ina, yë'ë mamajë, Cristo mësarute ije pa'iohua'ire de'o macaja'a mësaruni ai cuasaquë, nomio tsj coa huëoni a'si ju'iñeje pa'ye ai yo'oquë pa'iquë a'ë, tijupë.

²⁰ Yurepi merepa yë'ë jarote mésarú ja're patira'ye yeque maña quëaja'quëpi. Jaje pa'ina, mësarute me cayë'ni caquë co'a ju'iñë.

Agar Cui'ne Zara Iñõnere Quëaye

²¹ Moisés cuañese'ere sehuocañu'u cuasacohua'ipi cajë'ë: ¿Mësarupi cuañese'e cayere asajë pa'icohua'i a'ni?

²² Ñeje toyase'e caji: Caya mamajëre Abraham papi, te'ire i jo'yaona, yequëni i ñejore pana papi, jo'yao peocona.

²³ I jo'yaona ai de'huasiqüë cato iye veja pai yo'ojë payepi parena, coasiquë paji'i. Ñejorepa mamaquë cato, Maija'quë ca nëose'epi t'i'a ja'ñere coasiquë paji'i.

²⁴ Iye caya nomiohua'i iñoñë, Maija'quë maire cayaye cuasa nëose'ere. Jaje pa'ina, iye ai cuasajë asaye paji: Agar, Abraham jo'yaopi Arabia quë'ro acore Sinai cutihuë ayere iño, judío paire, Maija'quë cuañeñe isisi pa'i sito. Iye cuasa nëose'e acohua'i cato jo'yaohua'i pa'ija'cohua'ipi coa cuañeñë.

²⁵ Agar cato Sinai cutihuëre iño, Arabia veja pa'iconi, yure pa'i Jerusalénre. Ja daripë cato si'a jo mamajë cõni cuañese'epi jo'ya ne cuañosicopi pa'ico.

²⁶ Jaje pa'iquëta'are, ma'tëmo Jerusalén cato jo'yao peoco. Jaje pa'ina, mai jo mamajë a'ë.

²⁷ Jaje pa'ina, toyase'e caji: Sihuajë'ë, carao, mamajëre peocopi. Sihuaço cuijë'ë, tsj coaco a'si ju'iñe asama'copi. Jaje pa'ina, jeoco cuañosicopi jai paire mamajëre paja'coa, ëjere pacore jerepa.

²⁸ Maija'quë do'ijë, mësarü Isaacje pa'iohua'i a'ë, Diusu ca nëosi mamajë a'ë.

²⁹ Jaje pa'iquëta'are pai yëyepi ai de'huasiqüëpi tose hue'ña, Maija'quë joyopi yo'ouquëna, ai de'osiquëre josa yo'ose'eje pa'ye maire josa yo'oye pa'iji.

³⁰ Jaje pa'iquëta'are toyase'e ñeje caji: Eto saojë'ë, jo'yaore, cui'ne jo mamaquëre. Jo'yao mamaquë ja're te'e jo'yao peoco mamaquë co'amaña paye peoji.

³¹ Jaje pa'ina, Maija'quë do'ijë jo'yao mamajëre pa'iohua'i peoyë, mai. Jo'yao peoco mamajëre pa'iohua'i a'ë.

5

Nuñerepa Jo'yaohua'i Peocohua'i

¹ Jo'yaohua'i peocohua'i pa'ija'cohua'i a'ë caquë Cristopi sai de'huapi. Jaje pa'iyë sëte jo'yaohua'i peocohua'i pa'iyere pa'ijë'ë, cui'naohua'ipi cuañese'ere neñu'u cajë yo'ojë jo'yaohua'i pa'iyena ponëma'pë pa'ijë'ë.

² Asajë'ë, yë'ë Pablopï cayë, mësarute. Mësarupi ca'ni tëaye pa'iji cajë yo'ocohua'i pa'ito, Cristo yo'o do'i mësarute coçaiye peoji.

³ Tjijupë ca coñe yëyë, ca'nihuë tëa cuañosiquë pani si'aye Moisés cuañese'e cayere yo'oye pa'iji.

⁴ Jaje pa'ina, mësarü Moisés cuañese'ere, nuñe pa'icohua'i de'oñu'u cajë, yo'ojë pa'icohua'ipi, Cristore hua saijë cui'ne Maija'quë mësarute oiye yo'oyere peocohua'i de'ohuë.

⁵ Jaje pa'ina, mai cato Maija'quë joyoja'a Maija'quë maire necai ja'ñere cuasa do'ipi uteyë, nuñerepa de'ocohua'i pa'ija'cohua'i a'ë, cajë.

⁶ Jaje pa'ina, maipi Cristo Jesús ja're tsioni pa'ito ca'ni tëaye cui'ne pañe coçaiye peoye a'ë. Jaje pa'ina, maipi necaiquëre pare ite cuasajëna, ja cuasayepi paire oicohua'ire necaina, pa'iyë a'ë, do'i quë'ye.

⁷ Mësarü de'oye yo'ojë pa'ë'ë. ¿Jaje pa'isicohua'ire nepi mësarute nuñerepa cocare yo'oma'pë ca tatore'ni?

⁸ Ja caye cato Maija'quë mësarute soisiquë tse peoji.

⁹ Jaje pa'ina, case'e pa'iji, a'ri o'sa sëpëpi huajëcona co'merena si'a sëpë o'sa huesëyeje pa'iji.

¹⁰ Jaje pa'ina, Ejaëpi mësarute coçaina, tiñe pa'ye cuasaye paja'cohua'i a'ë cuasayë. Jaje pa'iquëta'are mësarute josa ca co'me huesoquëre cato Maija'quëpi si'seja'quë api, iquëi pa'itoje.

¹¹ Jaje pa'ina, Maija'quë do'ijë, yë'ëpi ja yë'ta'a ca'ni tëayere pa'iji ye'yaquë pa'ito, judío pai huajo yëye para'huë. Jaje yo'oye pani Cristo cruz ju'isi cocapi sañope iohua'ire yo'oye peora'pi.

¹² Mësarute josa ca co'me huesorojaicohua'ipi, iohua'ija'a co'ye te'ere papi peo hue'ña tëasicohua'i pa'itota'a de'oji!

¹³ Mësarü cato Maija'quë do'ijë jo'ya nesciohua'i peoyë. Coa de'oye pa'ija'cohua'ini soisicohua'i a'ë. Jaje pa'ina, ëseye peo do'ire capë yëyere yo'oma'pë pa'ijë'ë. Coa ai jerepa paire oijë, sa'ñe de'oye necaijë pa'ijë'ë.

¹⁴ Jaje pa'ina, si'aye Moisés cuañese'e iye cayena tomejï: "Më'ëja'a co'ye oiyeje pa'ye oijë'ë, yecohua'i." Ja cayere yo'oni si'aye cuañese'ere sehüo t'i'añë.

¹⁵ Jaje pa'iquëta'are mësarupi sa'ñe se co'aye cajë cui'ne sa'ñe cue'cuejë yo'oni, sa'ñe ani huesëyeje pa'ye yo'ojë carajajia'cohua'i a'ë, de'hua ñajë pa'ijë'ë.

Capë Yëye Cui'ne Maija'quë Joyo Pa'iyë

¹⁶ Cayë, mésarute. Maija'quë joyo cuayepi pa'ijë'ë. Jaje pa'ijë mésaru capë yëye yo'oye paja'cohua'i a'ë.

¹⁷ Jaje pa'ina, paise'e yëyepi Maija'quë joyo yëyere sañope yo'oji. Yo'oguëna, cui'ne Maija'quë joyopi sañope yo'oji, capë yëyere. Jaje sa'ñe yo'o do'ire mésaru yëye yo'o t'ñañe peoji.

¹⁸ Jaje pa'ina, Maija'quë joyopi mésarute cuaquë pa'ito, mésaru ja maca cuañese'ere sehuocaijë pa'iyë paja'cohua'i a'ë.

¹⁹ Huesëma'pë a'jiñe ña'ñe pa'iji, iti yo'oyena, pai co'aye yëyere yo'ocohua'ire. Jaohua'ipi ñeje pa'iyë, huejama'cohua'ipi coa parojaicohua'i pa'iyë. Tsi'sire yo'ocohua'ipi cui'ne co'ayena sêo measicohua'i pa'iyë.

²⁰ De'huase'ere Maija'quë api cajë secohua'ipi cui'ne dahuë necohua'i pa'iyë. Paire coecohua'ipi te'e cuasama'cohua'ipi cui'ne johua'i yëyese'e yo'ojajë ësecohua'i cajë pa'iyë. Esa pëtitecohua'i pa'iyë, yecohua'ipi ti cuasama'cohua'ipi çnepi ai jerepa de'oye ne'ne'ni? cajë yo'ocohua'i pa'iyë. Tjohua'i a'ë cajë tsëcapëase'e huasicohua'i pa'iyë.

²¹ Co'amafiare ëa ñajë pëti ëaye cuasacohua'i pa'iyë. Paire huani jecohua'i pa'iyë. Cono cuepeohua'i pa'iyë, cui'ne jai aohua'ipi jaiye yequeje co'aye yo'ocohua'i pa'iyë. Ja'në case'ere mésarute cayë. Jaje pa'ye yo'ocohua'i cato, Diusu cuañe te'te pa'iyë ti peoji.

²² Jaje pa'iquëta'are, Maija'quë joyo maina ne'ne iye a'ë: Paire oiye, sihuaye, jo'cua de'oye pa'iyë, yo'o jujama'pë quëcojë yo'oye, yecohua'ire coa ñama'pë de'oye necaiye, de'oye yo'ocaiye, ca nêose'ere de'hue ne t'ñañe,

²³ jerepa pa'i a'ë cuasa ma'ñe, cui'ne ñe yëyere co'ye quëco t'ñañe. Jaje pa'iyë cato cuañese'epi sañope yo'oye ti peoji.

²⁴ Jaje pa'ina, Jesucristo tsecohua'i cato ai huano, co'a ëmë ja're te'e ñe ñaquë pasi'i caquë pa'ise'e, cui'ne co'aye yëse'e çoni quë jeosicohua'i a'ë.

²⁵ Jaje pa'ina, yure Maija'quë joyo pa'iyepi pa'ini, ina jsiñu'u mai pa'iyëje, ñi cuaja'quëre.

²⁶ Jaje pa'ina, jerepa pa'iohua'i a'ë cuasaye pañu'u, cui'ne çnepi jerepa de'oye yo'oye'ni? cuasayeje pañu'u, cui'ne mai acohua'i de'oye yo'oyere ëa ñajë, sa'ñe pëti ëaye ña'ñeje pañu'u.

6

Sa'ñe Çocaijë'ë

¹ Maija'quë do'ijë, yecohua'ipi co'aye yo'ojë co'a de'osicohua'i pa'ito, mésaru Maija'quë joyopi cuaquëna, pa'icohua'ipi çocaijë'ë, cui'naohua'ipi huëija'cohua'ire. Çocaiçohua'i pani jerepa pa'i a'ë cuasama'pë çocaijë'ë. Yo'ojë iti çocaisicohua'ipi cui'ne pa'yena yo'ojë co'a de'oye. Jaje pa'i do'ire pai ñape co'ye mésaru pa'iyere ñajë'ë.

² Mésaru acohua'i ai yo'ojë pa'icohua'ire çocaijë'ë. Jaje yo'ojë Jesucristo cuañese'ere ne t'ñaja'cohua'i a'ë.

³ Teaye pa'i macata'a, de'hue yë'ëpi jerepa pa'i a'ë cuasani co'ye jja'a coso huesëji.

⁴ Jaje pa'iquëta'are coa ai jerepa pai ñape ña'ñe pa'iji, me yë'ë pa'iyë'ni cajë. Si'anë jaje neña'ne pa'iji, më pa'iyere. Neña'ne, de'oye yo'oyepi pa'ina, ja yo'ose'ere sihuaye pa'iji. Pani yecohua'i pa'iyena cuëcue ñani.

⁵ Jaje pa'ina, te'ohua'ise'e yo'oye pa'iji, johua'i ayere.

⁶ Maija'quë coca yo'o ja'ñe ye'ya cuañoquëpi, ñte ye'yaquëre ñ de'oye payepi çocaiye pa'iji.

⁷ Co'ye cosoma'pë pa'ijë'ë. Maija'quëre ti coso t'ñañe peoji, ñama'ë pa'ija'quë api cajë. Jaje pa'ina, pai ñape tase'ere quëquëna tëaye pa'iji.

⁸ Jaje pa'ina, paipi ñ capë yëyere yo'osiquë pani co'ayere tasi do'ire ju'ñere tëaye pa'iji. Jaje cui'ne Maija'quë joyo yëyere yo'osiquë pani de'oyere tasi do'ire ti pani huesëyere tëaye pa'iji, Maija'quë jsiyere.

⁹ Jaje pa'iyë sête, jë'joye peoyerepa de'oyere yo'ojë pañu'u. Jaje pa'ina, maipi yo'o jujama'cohua'i pani tēja'cohua'i a'ë, ja pa'iyere, iti mu'se t'ña'ne.

¹⁰ Jaje pa'i do'ire de'oye yo'o'ñe pa'i sa'rore pa'ito coa ñama'pë si'ahua'ire de'oye necañu'u, mai ai cuasaye ja'ye. Cui'ne ai jerepa de'oye necañu'u, Jesucristore cuasacohua'ire.

Yëhuoye Cui'ne Tëjyerepa Pëpaye

¹¹ Yure yë'ë jëtëre papi jai toya toyayë, mésarupi ñajë'ë caquë.

¹² Mésarute ca'ni tëaye pa'iji cajë ye'yacohua'i cato, paipi de'oye caja'cohua'i a'ë cajë yo'oyë, cui'ne Cristo cruz ju'ise'e ayere quëama'cohua'ipi josa yo'oma'cohua'ini cajë ca'rajë.

¹³ Jaje ca'ni tëaye yo'ocohua'ita'a cuañese'e cayere si'aye yo'o t'ñama'cohua'i a'ë. Jaje pa'iohua'ita'a mésarupi, mésaru capëre tëani hue'ejëna, sihuaja'cohua'i a'ë yëquë jerepa pa'iohua'i a'ë cajë mésarupi johua'i case'ere sehuocai do'ire.

¹⁴ Jaje pa'ina, yè'è cato mai Ējaē Jesucristo cruz ju'ise'ere sihuaquē quēayē. Cristo cruz ju'isi do'ipi yè'ère iye yejapi tutu de pase'e juni huesēpi. Ju'ina, yè'ēpi iye yeja yēye ayere yo'oma'quē de'ohuē, ju'isiquēje pa'i.

¹⁵ Cristo Jesús ja're tsioni pa'icohua'ire cato ca'ni tēasicohua'i pa'iyē, pa'nita'a pa'cohua'i pa'iyē coçaiye peoji. Iti do'i quē'yerepa cato maipi huajē pai pōnēni pa'iyē a'ē.

¹⁶ Si'ahua'i jaje yo'ojē pa'icohua'ire Maija'quē oi teaye necaise'ere cui'ne jo'cua de'oye pa'iyē isiquēna, de'oye pa'ijē'ē, jaje yo'ocohua'ipi, Maija'quē paipi.

¹⁷ Iye macapi jerepa cato yè'ère josa yo'oma'pē pa'ijē'ē, tsoe mēsarupi ñañē, nuñerepa Jesús jo'yaērepa pa'iyere jñoquē, yè'ē capēre a'si ja'juse'e hue'equēna.

¹⁸ Maija'quē do'ijē, mēsarute si'aohua'ire mai Ējaē Jesucristopi de'oye pa'iyē, isijaquē. Jaje pa'ijaquē.

EFESIOS

Pablo Toyase'e Efesios Sehuosicohua'ina

¹ Yé'ë Pablo Maija'quë yëë do'ire Jesucristo jo'yaë pa'iyë, cayë ñeje, ipi jëjo daosiquë a'ë caquë. Toyayë, iye toya ja'hua Maija'quë acohua'ina, cui'ne Jesucristore sehuocohua'ina caquë, Efeso pa'icohua'ina.

² Maija'quëpi i jo'cua de'oye pa'iyë isiquëna, cui'ne Ëjaë Jesucristopi ñacaina, de'oye pa'ijë'ë.

Maire Isise'e Cristo Do'ipi

³ De'okuëre pa'ni cañu'u, Diusure, mai Ëjaë Jesucristo pëca ja'quëre, Maipi Cristo ja're coní tsioni pa'i do'ire, si'aye Maija'quë cuañe te'te aye joyo pa'iyë isiquëre.

⁴ Diusupi maire ja yé'ta'a yeja de'huama'në Cristo do'ija'a ai oi sahuapi, i ña hue'ñana ina isisicohua'ipi si'si te'ñaje peocohua'ipi pa'ijajë caquë.

⁵ Jaje pa'ina, ipi ai oi jaje yo'osi'i cuasa nëose'eje pa'ye yo'okuë Jesucristo do'ija'a i mamajëre coa huerosicohua'ire nepi, maire.

⁶ Jaje pa'ina, Maija'quë maire ai de'oyerepa yo'ocaise'ere cuasajë sihuañu'u. I oi mamaquëre pana tsioni pa'i do'ire de'oyerepa maire necaisiquëre.

⁷ I ai oi do'ire Diusupi maire i mamaquë tsie nejosi do'ipi mai co'aye yo'ose'ere sai de'huacai huasopi.

⁸ Jaje pa'ina, Maija'quëpi si'aye mai carajañere i ta'ñe asayepi cui'ne maire oiye yo'oyepi maire isipi.

⁹ Isini maire ise'e jaje yo'osi'i cuasa nëoquë pa'ise'ere, i yahuese'ere asa tñ'añe necaj'i.

¹⁰ Jaje pa'ina, iti cuasa nëose'eje pa'ye si'aye yo'o tñ'aja'quë api, Diusupi iti yo'o maca tñ'asi maca. Ja maca Diusupi si'a co'amaña ma'tëmo pa'iyë, cui'ne yeja pa'iyë, te'ona tsioja'quë api, Cristopi meñe cuañequë pa'ijaquë caquë.

¹¹ Cristo ja're tsioni pa'i do'ire i co'amaña i ja're coní huero pajajë caquë tsoe hue'ñana Diusupi maire i tsecohua'ire paja'quë a'ë cuasa nëopi, i yëyeje pa'ye si'aye ite de'oye ña cuañõnese'e yo'okuëpi. Jaje nepi.

¹² Nequëpi maire sahua nëopi, Cristore du'ru macarepa necaiquë api cuasasicohua'ipi Maija'quë ai jerepa pa'i pa'iyere sihuajë pa'ijajë caquë.

¹³ Jaje pa'ina, de'o coca mësarute huasoyere nuñerepa cocare asa maca tsoe mësarú Cristo ja're tsiosicohua'i paë'ë. Jaje pa'ijëna, Cristore ire pare cuasa maca i isisi'i ca nëosi de'o joyore mësaruna isipi.

¹⁴ Ja joyo cato maire Maija'quë du'ru isi nëosi joyo a'ë. Ja joyore pani asayë, mai, i tsecohua'ire huaso tëji maca, si'aye Maija'quë ca nëose'ere paja'cohua'i a'ë cajë, ja maca Maija'quëre sihuaja'cohua'i a'ë, i jerepa pa'i pa'iyere.

Pablopi Sehuosicohua'ire Seccaiye

¹⁵ Asaquë pa'iyë, mësarú Ëjaë Jesure necaiquëre pare cuasajë pa'icohua'ipi, si'aye Maija'quë tsecohua'ireje oijë pa'iyë.

¹⁶ Jaje pa'ina, yé'ë Maija'quëre se maca mësarú de'oye yo'oyere cuasaquë si'anë de'oji caquë pëpayë, Maija'quëre.

¹⁷ Jaje pa'ina, mai Ëjaë Jesucristo mëñe Diusure seccaiyë, mësaruni ta'ñe asa joyore isija'quë caquë. Isiquëna, mësarupi i iñõne asa tñ'ajë cui'ne jerepa nuñe asa tñ'ajajë caquë seccaiyë.

¹⁸ Señë, cui'ne ipi mësarú cuasayena miañe necaina, mësarute caquë soise'ere utejë pa'iyere nuñerepa asa tñ'ajajë caquë, cui'ne Maija'quë i tsecohua'ire isi ja'ñe airepa de'oye a'ni cajë asajajë caquë seccaiyë.

¹⁹ Cui'ne airepa jaiye a'ni Maija'quë tutu ja'rujanë ti peoyerepa, maire, ite sehuosicohua'ire yo'ocai tutu, cajë asa tñ'ajajë caquë seccaiyë, jare iye tutupi Maija'quë si'a tuturepa yo'o iñopi.

²⁰ Jesucristore ju'isiquëni huëoni i ëja te'tena, jeto Maija'quë cuañe te'tena ño maca,

²¹ Ja maca si'a cuañeñere, si'aye Ëjaë pa'iyere, si'a tuture si'a jo'ya ne tutu pa'ise'ere, jerepa pa'ire Cristore nepi, coa si'ayere cayë mamire hue'eyere iye yeja yure pa'iyere cui'ne si'a mu'seña pa'i ja'ñere ëjaëre pare nepi.

²² Neni si'a co'amaña i quëo huë'ehuëna oapi. Jaje pa'ina, Cristona sehuocohua'ireje isipi. Jaje pa'ina, sehuosicohua'i sjopë api, Cristo.

²³ Jaje pa'ina, sehuosicohua'i cato Cristo capë acohua'i a'ë. Jaje pa'ina, Cristopi si'a sehuosicohua'ire pani huesoji, cui'ne ipi si'a co'amaña Ëjaërepa pa'iji.

2

Maija'quë Oi Do'ire Huasosicohua'i Pa'iyë

- ¹ Ja'në mësaru co'aye yo'oyena cui'ne cuañese'e tayo yo'oyena ju'isicohua'ipi paë'ë.
² Pa'ijë iye yeja pai yo'oyere, iye de'otose'e cuañequë, Maija'quëre sañope yo'ocohua'ire cuaquë yëyere yo'ohuë.
³ Jaje mai si'aohua'i ja'në mai capë yëyere co'ayere yo'ohuë, iye yeja pai coa noni yo'ojë pa'iyere, mai cuasayere. Jaje coa noni yo'ojë pa'i do'ire Maija'quëni nejo cuaño ja'ñe pa'iohua'ipi paë'ë.
⁴ Jaje pa'iquëta'are, Maija'quë paire teaye ñani coçaiquëpi maire ai oi,
⁵ ja yë'ta'a mai co'aye yo'oyena ju'isicohua'ipi pa'ijëna, pa'iyere isipi Cristo do'ipi. Jaje pa'ina, mësaru Maija'quë oi de'oye yo'o do'ire huaso cuañosicohua'i pa'iyë.
⁶ Jaje pa'ina, Maija'quëpi maire ju'isicohua'ini Cristo Jesús ja're huëoni j ja're te'e ñopi, Maija'quë cuañe te'tena.
⁷ Iye cato yo'opi Cristo Jesús do'ipi maire j ai oiyere, cui'ne j de'oye maire yo'ocaise'ere yequë mu'seña maire iñosi'i caquë.
⁸ Jaje pa'ina, mësaru Maija'quëpi de'oye oi yo'o do'ire huaso cuañosicohua'i pa'iyë payë, necaiquëre pare ite cuasa do'ipi. Iye mësarupi yo'ojë t'ase'e peoji, coa Maija'quëpi mësarute isise'e a'ë,
⁹ cui'ne mësaru yo'o do'ipi etase'e peoji. Jaje pa'ina, te'ijë yë'ëpi nehuë, ca t'añeje peoji.
¹⁰ Maija'quë co'amaña'ë, mai j nesicohua'i a'ë. Jaje pa'ina, Maija'quë tsoe huëña ne de'huacaise'eje pa'ye Cristo do'ija'a de'o co'amaña yo'oja'cohua'ire nesicohua'i a'ë.

De'oye Pa'iyë Cristo Do'ipi

- ¹¹ Cuasajë'ë, ja'në mësarute pai tãase'ere hue'ecohua'ipi judío paipi ca'ni tãama'cohua'ire hue'yose'ere judío pai peo do'ire.
¹² Ja'në cato mësaru Cristore peocohua'ipi, Israel pai peocohua'ipi, Maija'quë ca nëose'ere peocohua'ipi, yequë mu'se pa ja'ñere uteye peocohua'ipi. Diusureje peocohua'ipi te'ohua'i iye yejana ne huesësicohua'ipi paë'ë.
¹³ Jaje pa'iquëta'are yure mësaru Cristo Jesús tsie do'ipi ina tsioni ja'yere pa'iyë, ja'në ite so'ore pa'isicohua'ipi.
¹⁴ Cristo api, mai jo'cua de'oye pa'iyë. Ipi judío paire cui'ne judío pai peocohua'ireje te' tsëcapëna nepi. Tsoe nejopi, ta'tëpo, yecohua'i a'ë cajë pa'ise'e.
¹⁵ Jaje pa'ina, Cristo mai tayo do'ire sa'i de'huaní j capëpi Moisés cuañeña coa pa'iyë nepi, caya pai tsëca pa'ise'ere te'e huajë pai tsëcapë pa'ija'quë caquë. Jaje neni jo'cua de'oye pa'iyë nepi.
¹⁶ Jaje Cristo j cruz ju'i do'ipi caya tsëca pa'ijë uihuayere nejoni te'e paire nepi. Neni Maija'quë ja're jo'cua de'oye pa'iyë necaji'i, maire.
¹⁷ Mësaru so'ore Maija'quëre pa'icohua'ire cui'ne judío paire, ite ja'ye pa'icohua'ire si'aohua'ire jo'cua de'oye pa'iyere, de'o cocare quëasi'i caquë Cristo daji'i.
¹⁸ Jaje pa'ina, yureta'a Cristo do'ija'a si'aohua'i judío cui'ne judío pai peocohua'ijë Maija'quëna tsioja'ñe pa'iji, maipi te'e joyore hue'e do'ire.
¹⁹ Jaje pa'ina, mësaru tjo hua'i peoyë, yecohua'i yejare pa'icohua'ijë pa'iohua'i pa'iyë. Jaje pa'ina, yure mësaru cato Maija'quë pai ja're coní te'e pa'iyë, Maija'quë do'ijë acohua'i de'osicohua'ipi.
²⁰ Mësaru jai huë'eje pa'iohua'i a'ë. Jaje pa'iohua'ipi j jëjo saocohua'i cui'ne Maija'quëre quëacaicohua'i nesiconá, mëñe nesicohua'ipi pa'iyë, Jesucristo cato ne huëojë du'ru macarepa oasi quëna pëje pa'i api.
²¹ Cristona si'a huë'e quëco paco ina tsisicorepa pa'io, jerepa jaico ai de'oja'co, Ejaërepa de'o huë'erepa pasi'i caco.
²² Jaje cui'ne mësaruje, si'aohua'i Cristona tsioni pa'ijë, Maija'quë joyo pa'i huë'e pa'iyë.

3

Judío Peocohua'ire Quëaquë Api Pablo

- ¹ Yë'ë Pablo, Jesucristona tseja cuañosiquë a'ë, mësaru judío pai peocohua'ini caquë.
² Jaje pa'ina, Maija'quë mësarute oi coa isiyere yë'ëpi quëacaijaquë caquë ipi cuañe nëopi cajë asayë, cuasayë.
³ Jaje pa'ina, Diusupi j yahue cuasa nëose'ere yë'ëna quëa iñopi. Jare yë'ëpi j quëase'eje pa'iyë mësarute a'ri maña quëaquë toyahuë.
⁴ Yë'ë toyase'ere ñajë mësaru asa t'ija'cohua'i a'ë, yë'ëpi Cristo aye yahuese'ere asaquë pa'iyë.

⁵ Iye cato cayë tsoe acohua'ire i cuasa nëose'e iñoma'ë yahueni pase'ere, jare yure i joyopi i de'ocohua'ire pare jëjo saocohua'ina, cui'ne ite quëacaicohua'ina, yo'oyeja'a Maija'quëpi iñopi, si'aye.

⁶ Iye a'ë, iti yahuese'e cato: Cristo Jesús do'ijja'a Maija'quë ca nëose'ere huaso coca quëayeja'a, judío pai peocohua'ipi, judío pai pa ja'ñere te'e cui'neje si'a yë'quë maca pa ja'ñe a'ë, i capë acohua'ipa'i do'ire.

⁷ Maija'quë yë'ëre oi coa isise'eja'a Diusu tutupi iye coca quëacaquëre nesiquë a'ë, i yëyeje.

⁸ Yë'ë, Maija'quë tsecohua'i seña maca huë'ehuërepa pa'iquëni, Maija'quëpi coa isipi, judío pai peocohua'ire, jaiye de'o co'amaña cuëcuc t'ñañe peoyerepa Cristo payere, de'o coca quëayere.

⁹ Si'aye co'amaña de'huasiquëpi Diusupi yë'ëre i tsoe hue'ña cuasase'ere yahuese'e pase'ere si'aohua'ire quëa iñoja'quëre nepi.

¹⁰ Jaje paji'i, yure sehuosicohua'i pa'iyëja'a cuñecohua'ipi cui'ne ëjaohua'ipi joñoase'e pa'i hue'ñana Diusu ta'ñe yo'oyere si'aye ña t'ajajë caquë.

¹¹ I cuasa nëo huesose'eje pa'ye cui'ne yo'opi, Diusu, mai Èjaë Jesucristo do'ijja'a si'aye ne sao maca.

¹² Jaje pa'ina, Cristo do'ipi Diusuna de'hue a'jiñe tsiojañe payë, asajë mai, ite de'hue necaiquë api cuasa do'ijja'a.

¹³ Jaje pa'ina, señë, mësarute. Yë'ë mësaruni caquë ai yo'oyere ñani yo'o jujama'pë pa'ijë'ë. Yë'ë ai yo'oye cato mësaruni jai do'i quë'iohua'i pa'iyere iñoque yo'oye a'ë.

Jesús Oiyë

¹⁴ Iyere caquë mai Èjaë Jesucristo pëca ja'quë ña hue'ñana do're ja'ruyë,

¹⁵ si'a i tsëcapë ma'tëmo pa'icohua'i cui'ne yeja pa'icohua'i i mamire hue'ejë pa'iquëna.

¹⁶ Do're ja'runi Maija'quëre señë, i de'o co'amañare pare mësaruni joyona Maija'quë joyo yo'o do'ipi jerepa pa'yere tuture isijaquë caquë.

¹⁷ Cui'ne ite pa'iji cuasa do'ipi Cristopi mësaruni joyore pa'ijja'quë pa'ina, Cristo paire oiyena jëayerepa tsita mesicohua'ipi pa'ijë.

¹⁸ Si'a sehuosicohua'i ja're coní Cristo paire oiyë: je'ñe tëcapë jaiye, tsoaye, huajñe, cui'ne mëne tsoaye asa t'ajajë'cohua'i a'ë caquë señë.

¹⁹ Señë, cui'ne mai asaye jerepa tëto saise'ere paire oiyere asa t'ajajë caquë, jaje asa t'ajë Diusu oiyepi timësicohua'i pa'ijajë caquë.

²⁰ Yure airepa de'oquëre pa'ni Maija'quë cajë sihuañu'u, i tutupi maija'a yo'ocaiquëre pare, si'aye mai pañu'u cajë señe maña, pañita'a mai cuasaye maña, jerepa de'oye necai tutu paquëre.

²¹ De'oquëre pa'ni Diusu, cajë sihuañu'u, sehuosicohua'i Èjaëre, Cristo Jesús do'ipi. Jajese'e si'anë tsoeje ite sihuañë pañu'u. Jaje pa'ijjaquë.

4

Te'ijë Pa'iohua'i Pa'iyë, Te'i Joyopi Pa'i Do'ire

¹ Èjaëre tseja cuañosiquëpi señë, mësarute Maija'quë caquë soise'eje pa'ye nuñerepa pa'ijë'ë caquë.

² Jaje pa'ina, jerepa pa'iohua'i a'ë cuasama'cohuaipi paire oicohua'ipi, pai ñape t'ñe cuasayere sañope cama'cohua'ipi quëcocohua'ipi oicohua'i pa'ijë'ë.

³ Jaje pa'ijëna, mësaruni jo'cua pa'iyepi necaina, Maija'quë joyopi cocaina, si'anë tsiosicohua'ipi pañu'u cajë de'hua ñajë pa'ijë'ë.

⁴ Te'e capë cui'ne te'e joyo pa'iji, Maija'quë mësarute te'ore utejë pa'iyena soise'eje pa'ye.

⁵ Pa'iji, te'e Èjaë. Pa'ico, te'o Maija'quëre cuasaye, te'e oco doye pa'iji.

⁶ Pa'iji, te'e Diusu si'aohua'i pëca ja'quërepa. Jajëpi pa'iji, si'aye ëmëje'e te'tere pare, si'aohua'ire tsioquë yo'oquë cui'ne si'aohua'ire tsioni pa'iquërepa.

⁷ Jaje pa'iquëta'are Cristopi mai yo'oja'a tuture pai ñapere i yëyeje pa'ye isipi.

⁸ Jaje pa'ina, toyase'e caji:

I ma'tëmo mëi maca, te'e i ja're coní tseja cuañosicohua'ireje sapi.

Saquë i yo'o tuture pa'ina isipi.

⁹ "Mëji'i" caní, cayë du'ru yejare pana cajesiquëpi mëji'i cajë.

¹⁰ Iti cajesiquëpi jare ipi mëji'i ai ëmërepa ma'tëmona, si'aore i pa'iyepi timësi'i caquë.

¹¹ Jare ipi pai ñapere isipi, yo'oja'a tutu, yecohua'ini i jëjo saocohua'ire nepi, yecohua'ini Maija'quë caquëna, asase'ere quëacaicohua'ire nepi, yecohua'ini huaso cocare quëaja'cohua'ire nepi. Yecohua'ini yëi ñamare ñacaiyeje pa'ye sehuosicohua'ire ñacai'cohua'ire nepi. Cui'ne yecohua'ini de'oye ye'yaja'cohua'ire nepi.

¹² Jaje i tsecohua'ire yo'oja'a tutu isipi, i yëyere yo'ojajë caquë. Yo'ojëna, Cristo capë acohua'ipi ai de'ojajë caquë iohua'i necai do'ipi.

¹³ Jaje pa'ina, i ne de'huasicohua'ipi necaiye pa'iji, si'aohua'i te'i cuasayeje pa'ye Maija'quëre cuasajë pa'i macaja'a cui'ne Maija'quë mamaquëre asa ti'a macaja'a. Ja maca yureta'a joyo aiohua'irepa de'oni Cristo ja'iohua'irepa pa'ija'cohua'i a'ë, si'aohua'i.

¹⁴ Ja maca tsije pa'iohua'i pa'iyë paja'cohua'i a'ë. Tsi cato johua'i cuasase'e esa jeoni yeque cuasayena a'jiñe pönëcohua'i a'ë, tayosi ma'a saicohua'i cosoyena sehuocaijë.

¹⁵ Jaje pa'ina, mai cato joyopi paire oiyere nuñerepa cocare cajë ñese ai de'oye pa'iji si'aye pa'iohua'irepa, Cristo sehuosicohua'i siöpëna tsioni pa'ijë.

¹⁶ Jaje pa'ina, Cristo do'ipi si'a capë jëayerepa sa'ñe si'a te'ña tsio huesëji, te'oje pa'ioyerepa. Jaje tsioni si'a te'ña de'oye yo'ojëna, si'a capë ai de'oji, sa'ñe oiyena.

Huajë Pa'iyë Cristo Do'ipi

¹⁷ Iye a'ë, yë'ë mësarute mai Ejaë mamipi cuañequë caye: Pa'ima'pë pa'ijë'ë, ja yë'ta'api Maija'quëre cuasama'cohua'i pa'iyëje pa'ye. Jaohua'i cato pa'iyë, coa noni do'i peoyere cuasajë pa'iyepi.

¹⁸ Jaje pa'iohua'ipi sëtama'cohua'ijë pa'ye de'oye cuasama'cohua'i a'ë, Satanáspi johua'ire ñamije pa'ye necai do'ire. De'oye cuasama'cohua'ipi nuñe coca coe do'ire huesëicohua'ipi pa'iyë. Jaje pa'ijë Maija'quë pa'iyë peocohua'ipi pa'iyë.

¹⁹ Jaje pa'ina, huajëya'ye nëñe peocohua'ipi si'aye co'ayere yëyena dahuëyesicohua'ipi pa'ijë, ja'rujaiñe peoye, coa si'aye si'si co'amañare yo'ojë pa'iyë.

²⁰ Jaje yo'ojë pa'iyere Cristo mësarute ye'yama'ë paji'i.

²¹ Jaje pa'ina, mësarupi nuñerepa coca paquëni, i cayere asasicohua'i pani, cui'ne i pa'iyere ye'yëyesicohua'i pani,

²² jeocojë'ë, mësaru tsoe pa'ise'ere, sehuoma'cohua'i pa'ise'ere. Ja tsoe pa'ise'e yëyepi cosoquë co'ayena sayere.

²³ Jeocojëna, si'a mu'seña huajë yëyere cui'ne cuasayere pa'ye pa'iji.

²⁴ Jare pajë huajë pa'iyere pajë'ë, cañare suñañeje pa'ye. Iye huajë pa'iyë cato Maija'quë nuñerepa pa'iyëje, cui'ne Maija'quë de'oyerepa pa'iyëje nese'e a'ë.

²⁵ Jaje pa'ina, ja yë'ta'api cosoma'pë pa'ijë'ë. Coa ai jerepa pai ñape nuñerepa cocapi cajë'ë, paire. ¿Si'aohua'i te'e capë acohua'i me yeque yo'oye'ni?

²⁶ Pëicohua'i pani, ti pëni huesëma'pë pa'ijë'ë, tayoye. Pëtise'e cajë na'ijaima'pë pa'ijë'ë.

²⁷ Huatire sa'ro nëocaima'pë pa'ijë'ë.

²⁸ Co'amaña yahue imaquë pa'isiquë pani jeojë'ë, ja yo'oye. Jeoni co'amaña ne huëojë'ë, më'ë jëtëpi, de'oye co'amaña yecohua'ire carayere isisi'i caquë.

²⁹ Si'si cocare cama'pë pa'ijë'ë. Coa ai jerepa iti asacohua'ire de'oye pa'iyë necaiyere, cui'ne jerepa ñese mëñe necaiyere cajë'ë.

³⁰ Maija'quë mësaruna i joyore isipi, i tsecohua'irepa iño ja'ñere mësarute huaso tëji mu'serepa. Jaje pa'ina, co'a coca cayepi ne oema'pë pa'ijë'ë, Maija'quë joyore.

³¹ Jeocojë'ë, yecohua'ire saisi'i caquë oi joyo pa'iyere: pëi sañope cuasayere, pëi sañope yo'oyere, sañope tutu cayere, cui'ne yecohua'ire co'acohua'i a'ë cayere. Coa si'aye yecohua'ire sañope yo'o ayere jeocojë'ë.

³² Jeoni sa'ñe oijë cocajë'ë. Cui'ne yecohua'ire sa'i de'huacajë pa'ijë'ë, mësaru co'aye yo'o do'ire Cristo do'ipi Maija'quë sa'i de'huacaise'ejë pa'ye.

5

Maija'quë Mamajë Pa'iyë

¹ Mësaru Diusu oi mamajë sëte ije pa'iohua'i pañu'u cajë, yo'ojë'ë.

² Cristo maini oi ija'a co'ye Maija'quëna isiquë jucacajii'i. Ja yo'oye cato de'oye ma'ña sëñeje pa'ye a'ë, Maija'quëna. Ja yo'oyepi maire i oiyere iño. Yureta'a i oiyëje pa'ye yecohua'ire yo'oñu'u. Jare yo'ojë pa'ijë'ë.

³ Jaje pa'ina, yure Maija'quë acohua'i pa'iyë sëte nomiohua'i paye coca caye ti cama'pë pa'ijë'ë, cui'ne si'a si'si yo'o cocare cui'ne si'aye pa ëaye nëi cocare ti cama'pë pa'ijë'ë.

⁴ Cui'ne cama'pë pa'ijë'ë, si'si cocare, coa cayere, coa cayere, nëi ça'a cocata'a si'ayere co'aye yo'oyena cuasa huëoyere cama'pë pa'ijë'ë. Coa ai jerepa mësaruse'e, Maija'quëre de'oji cajë pëpaye pa'iji.

⁵ Mësarupi tsoe ta'ñe asayë, yequë nomiore panita'a yequë ëmëre yo'ocohua'ipi, panita'a si'sire yo'ocohua'ipi, panita'a jaiye co'amañare paye yëcohua'ipi Cristo cui'ne Diusu cuañe te'te cacaye ti peoyë. Jaiye co'amañare yëcohua'ipi cato pai de'huasi Diusuni señeje pa'iohua'i a'ë.

⁶ Iye tayo yo'oyere de'oye a'ë cacohua'ini coso cuañoma'pë pa'ijë'ë. Jaje yo'ocohua'ire Maija'quëpi pëi nejaja'quë api, ite sehuocaima'pë yo'ocohua'ire.

- 7 Jaje pa'ina, mësaru jaohua'ire tsioma'pë pa'ijë'ë.
- 8 Ja'rë mësaru nea hue'ñare paë'ë. Yure mai Ëjaë ja're tsoni pa'i do'ire mia hue'ñare pa'iyë. Jaje pa'i sête mia hue'ña pai sête de'oye pa'iyepi pa'iji.
- 9 Iye miañepi iyere neji: de'oye yo'oyere, nuñerepa cayere cui'ne tayo saima'pë pa'iyere.
- 10 Maija'quë yëye yo'oyere ye'yejë'ë.
- 11 Cui'na maca yo'oma'pë pa'ijë'ë, ççai ma'ñere, nea hue'ña acohua'i yo'oyere. Coa ai jerepa co'ayere mia hue'ñana eto iñojë'ë.
- 12 Jaje pa'ina, sehuoma'cohua'i yahue yo'oyere cayeque huajëya'ji, maire.
- 13 Jaje pa'iquëta'are miañepi yahue yo'ose'ena ju'aquëna, si'aye tñarepa ñaño pa'iji. Jaje pa'ina, si'ayere yahue yo'ose'ere çoni iñoja'quë api, miañepi.
- 14 Jaje pa'ina, case'le pa'iji:
Sëtajë'ë, çaiquë,
ju'isicohua'i jopopi huëijë'ë,
Cristopi miacaija'quëre.
- 15 Jaje pa'iyë sête de'hua mësaru yo'ojë pa'iyere ñajë pa'ijë'ë. Huesëohua'ijë pa'iohua'i pa'ima'pë, coa ai jerepa tã'ñerepa asajë pa'ijë'ë.
- 16 De'o co'amañare esa nejë'ë, co'a mu'señare pa'i do'ire.
- 17 Coa huesërepa yo'oma'pë pa'ijë'ë, du'ru macarepa jere Ëjaërepa yëquë'ni cuasani, i yëyere yo'ojë'ë.
- 18 Çono cüepema'pë pa'ijë'ë. Ja cato nëajaiñe peoyerepa coa yo'oyena saye a'ë. Ai jerepa Maija'quë joyopi tımësicohua'ipi pa'ijë'ë.
- 19 Pa'ijë tsoe jëjëñe toyase'epi sehuosicohua'i jëjëñepi cui'ne joyo jëjëñepi sa'ñe cajë pa'ijë'ë, cui'ne iye jëjëñepi jëjëjë si'a joyorepapi sihua'jë Maija'quëre de'oquëre pa'ni cajë pa'ijë'ë.
- 20 Si'anë Maija'quëre de'o'ji, cajë pëpajë pa'ijë'ë, mai Ëjaë Jesucristo mamipi.
- Sehuosicohua'i Huë'e Pa'iyë*
- 21 Sa'ñe de'oye sehuojë pa'ijë'ë, Maija'quëre ca'ra do'ipi.
- 22 Nëjohua'i ëjere de'oye sehuocaijë pa'ijë'ë, mai Ëjaëre sehuoyeje pa'ye.
- 23 Cristo sehuosicohua'i mēñe siopë api, cui'ne pa'ye ëjëje nomio mēñe siopë api, Cristo sehuosicohua'ire huasoquë api, i çapë acohua'ire.
- 24 Jaje pa'ina, Cristore sehuosicohua'i de'oye i çuañeñe sehuojë pa'iyeyë pa'ye cui'ne nëjore ëjere si'aye sehuoco pa'iyë pa'iji.
- 25 Ëjëpi nëjore oiyë pa'iji, Cristo oi i oiyere iñoquë sehuosicohua'ire juçacaise'eje pa'ye.
- 26 Jaje pa'ina, i tsecore pare nëjore pa'iore pasi'i caquë Maija'quë coca quëa do'ija'a Maija'quë joyo ocopi tsoa topi si'a ite sehuocohua'ire.
- 27 Jaje tsoa topi i ñaquë payere caquë si'si te'ñaje, sëje, cui'ne yeque co'aye ña çuañoñe peocore pani de'oconi i tsecore pasi'i caquë.
- 28 Jaje pa'ye ëjëohua'ipi nëjohua'ire oiyë pa'iji, iohua'i çapëa oiyeyë pa'ye. Nëjore oiquë cato ija'a co'ye oiyeyë pa'ye oiiji.
- 29 Co'ye iohua'i çapëre coecohua'i peoyë, pai. Coa ai jerepa çojë cui'ne ñacaicohua'i a'ë. Jaje cui'ne Cristojë ite sehuosicohua'ire i çapë acohua'ire ñacaiji.
- 30 Jaje pa'ina, mai i çapë cui'ne tara acohua'i a'ë.
- 31 Jaje pa'ina, ëmëpi huejaquë pëca ja'quëre cui'ne pëca ja'core jeoñe pa'iji, nëjona tsioyere caquë. Ja maca cayahua'i pa'isicohua'ipi tsoni te'ijë pa'iohua'i pa'ija'cohua'i a'ë.
- 32 Iye cato yahuese'e a'ë. Jaje me asaye'ni pa'iquëta'are yë'ë cato cayë, Cristopi ite sehuocohua'i ja're tsoni pa'iyë ayere.
- 33 Jaje pa'iquëta'are pai ñape ëmë nëjore oiyë pa'iji, i çapë oiyeyë pa'ye, cui'ne nomiopi ëjere io ëjaëre pare dahuëre ñaco pa'ijaco.

6

Mamajë Cui'ne Pëca Ja'quëohua'i Pa'iyë

- 1 Mai Ëjaëre sehuocohua'i sête mësaru ja'quëohua'i çuañeñere de'oye sehuojë yo'ojë pa'ijë'ë. Jaje yo'oye nuñere pa'ë.
- 2 Moisés çuañese'epi ca nëose'le pacopi du'ru acopi caco ñeje: “Më'ë ja'quëre cui'ne më'ë ja'core oi ëjaohua'ire ñaquë pajë'ë, jai do'i quë'iohua'ire cuasaquë.
- 3 Jare yo'oquëpi iye yeyare ai tsoe sihuaquë de'oye pa'ija'quë api.”
- 4 Cui'ne mësaruje ja'quëohua'ijë, mësaru mamajëre pëti ëaye ne huëoma'pë pa'ijë'ë. Coa ai jerepa tayoyese'e nu'ñejë ye'yajë ai de'huajë'ë, mai Ëjaë oi yëhuoye ayepi.
- 5 Jo'yaohua'i iye yeja mësaru ëjaohua'ire de'oye sehuocaijë'ë. Cristore necaiyeyë pa'ye cuasajë. Ëjaohua'ire ñajë, ca'rajë nuñere papi yo'ojë necaijë'ë.

⁶ Iohua'i mēsaru te ña macase'e de'oye yo'oyeje pa'ye yo'oma'pë pa'ijë'ë, coa ai jerepa si'a joyorepa de'oye cuasajë nejë'ë, Diusu yéyeje pa'ye, Cristo jo'yaohua'i sête.

⁷ Mai Ējaëre necaiyeje pa'ye de'oye cuasajë sihuajë paire co'amaña de'oyerepa necaijë'ë.

⁸ Tsoe mēsaru pi asayë, pai ñapere iohua'i yo'ose'eje pa'ye jo'yaohua'ire cui'ne jo'yaohua'i peocohua'ire Ējaëpi isi ja'ñe.

⁹ Ējaohua'ije de'oye yo'ojë'ë, mēsaru te necaicohua'ire. Tutu cajë yo'oma'pë pa'ijë'ë. De'hua cuasajë'ë, mēsaru cui'ne jaohua'i te'e Ējaëni ma'tëmo aquere payere, si'a yë'quë maca si'aohua'ire ñaquëni.

Sehuicohua'i Joyopi Uihua Co'amaña

¹⁰ Yure cato Maija'quë do'ijë, i tutu jerepa pa'yena tsiõni i ja're pa'ijë, tutu quë'iohua'i pa'ijë'ë.

¹¹ Si'aye huati cosoyere, sañope quëco saojë'ë, ocue pa'i macarepa pa'iyere cajë, Diusu uihua ja'ñe isise'epi.

¹² Mai cato uihuama'pë pa'iyë, paini capë cui'ne tara quë'iohua'ini. Mai cato uihuayë, maire meñe cuañe tutu payere, huati cosoye tutu quë'iyere uihuayë, iye mu'seña nea hue'ña huati Ējaohua'i quë'i cuañe tuture. Maija'quë te'tepi sañope uihuayë, co'ayepi maina cacayere ësejë.

¹³ Jaje pa'ina, co'a mu'se tjaëna, quëcoyere cajë Maija'quë mēsaru uihuaja'a caña isise'ena suñasicohua'ipi pa'ijë'ë. Jaje pa'ijë quëcosi jeteyo'je taima'cohua'irepa pa'ija'cohua'i.

¹⁴ Soldado uihua tējicare suñañeje pa'ye nuñere pare suñasicohua'ipi ocue pa'i macarepa pa'ijë'ë, cui'neje soldado coti saihuë jëacaicore suñañeje pa'ye nuñerepa yo'oyere suñasicohua'ipi ocue pa'i macarepa pa'ijë'ë.

¹⁵ Cui'ne Maija'quë coca jo'cua pa'iyepi ne de'huasicohua'i pa'ijë'ë, soldado zapato suñase'eje pa'iohua'i.

¹⁶ Cui'ne mēsaru Maija'quëre pa'iji cuasayere mēsaru te jëacai cua'arepa pajë'ë, huati hua'jo ñaña toa quë'yepi daina, si'aye ne yayoja'core.

¹⁷ Cui'ne mēsaru huaso cuaño'se'ere quëna mapëje pa'io're pajë'ë, siope jëacaicore pajë cui'ne Maija'quë joyo hua'tiyore Maija'quë cocare isicohua'i pa'ijë'ë.

¹⁸ Cui'ne Maija'quëre seña jeoma'pë si'anë ai sejë pa'ijë'ë, Maija'quë joyo cayeja'a. Yo'o jujahuë cuasama'pë, ocue pa'i macarepa cui'ñasicohua'ipi pa'ijë si'aohua'ire Maija'quë tsecohua'ire secacaijë pa'ijë'ë.

¹⁹ Cui'ne yë'ëreje secacaijë'ë, Maija'quëpi yë'ë ca ja'ñe isiquëna, caquë huaso coca yahuese'ere tñarepa asa tja'ña, quëcoquë caja'quëre.

²⁰ Maija'quëpi yë'ëre, iye cocare quëacaijaquë caquë jëjo daosiquë a'ë, jare quëa do'ire, yure yë'ë co cuañosiquë pa'iyë. Secacaijë'ë, yë'ë ca'rama'ë i coca quëacai ja'ñere.

²¹ Tiquico Maija'quë do'iquë, mai oi'quëpi, jëoñe peoyerepa mai Ējaë co'amaña co'caiquëpi, si'aye quëasipi, yë'ë iño pa'iyë, cui'ne yë'ë yo'oquë pa'iyëje.

²² Jaje pa'ina, jëjo saoyë, mēsaru quë'rona ipi sani iño yëquë pa'iyere quëaquë, mēsaru te jerepa yëjë de'oye yo'oja'cohua'ire nejaquë caquë.

²³ Diusu Maija'quëpi cui'ne Ējaë Jesucristopi Maija'quë do'ijëre jo'cua pa'iyë sa'ñe oiye isijaquë Maija'quë pa'iji cuasa do'ire.

²⁴ Cui'ne Maija'quëpi i oiye yequë ponama'quëpi de'oye ñacaijaquë si'aohua'i Jesucristore oicohua'ire.

FILIPENSES

Pablo Cosiquëpi Toyase'e

¹ Pablo cui'ne Timoteo Jesucristo jo'yapi toyayë, iye toya ja'hua si'a Maija'quë do'ijëna, Maija'quë acohua'ina Jesure cajë, tsiosicohua'ina ëjaohua'ina, cui'ne co'amaña caracohua'ire cõcacohua'ina, cajë toyayë, Filipos daripë pa'icohua'ina.

² Maija'quëpi cui'ne Ëjaë Jesucristopi cõni oi coa isiyepi de'oye jo'cua pa'ijë'ë.

Pablopi Sehuosicohua'ire Secacaiye

³⁻⁵ Du'ru huëosi mu'sepi iye mu'sena, yë'ë ja're te'e de'o coca cõni necai do'ire, yë'ë mësarute cuasaye ñape de'oji caquë pëpayë, Maija'quëna. Cui'ne ite së maca ai sihuaquë mësarute si'aohua'ire secacaiyë.

⁶ Jaje pa'ina, nuñerepa asayë, yë'ë, Maija'quë mësaruna de'o co'amaña ne huëosiquëpi jëoma'ë de'oyerepa ne saoja'quë api, Ëjaë Jesucristo dai macaja'a.

⁷ Jaje pa'ina, mësarupi yë'ë ja're cõni Maija'quë coa isiyere pa do'ire, mësarute ai oi jaje cuasaye nuñere pa'ë. Jaje pa'ina, mësarupi yë'ë joyore pa'i do'ire yë'ë ja're pa'iyë, yë'ëpi co sitore pa'ito panita'a Maija'quë huaso cocare co'aye cajëna, yë'ëpi ësequë sañope, iye nuñerepa coca'ë caquë ëjaohua'i ña huë'ñana quëa huë'ñare.

⁸ Yë'ë mësarute, Jesucristo oiyepi ai oiyë. Ja oiyere Maija'quëpi ñaji.

⁹ Jaje pa'ina, mësarute Maija'quëre secacaiyë, mësarupi ai ta'ñie cuasacohua'ipi cui'ne si'aye asa t'j'acohua'ipi ai jerepa paire oicohua'ipi,

¹⁰ cui'ne de'oyese'e co'ejë yo'ojajë caquë. Jaje yo'ojë pa'ijë mësaru si'si peocohua'i pa'ija'cohua'i a'ë. Pa'ijëna, Cristo dani mësarute sañope caye pasipi.

¹¹ Paquëna, mësarute Jesucristo necai do'ipi nuñerepa yo'oyere quëisë'eje pa'ye pa'ija'cohua'i a'ë, Maija'quëre de'oquëre pa'ni cajë sihua ja'ñere.

Cristo Api, Yë'ë Pa'iyë

¹² Yë'ë tëto saise'epi de'o coca jerepa quëaye ponëpi. Jaje mësaru Maija'quë do'ijëpi iyere asajajë caquë quëayë.

¹³ Jaje pa'ina, si'aohua'i soldado pai ëjaë huë'e pa'icohua'i cui'ne si'aohua'i yecohua'ijë asayë, Cristore tui do'ire tsea cuãñosiquë pa'iyë.

¹⁴ Jaje yë'ë tsea cuãñosiquë pa'ina, ñajë sehuosicohua'ipi ai jerepa mai Ëjaëna quëcojë Maija'quë cocare ti ca'raye peoyerepa yëjë quëayë.

¹⁵ Yecohua'ipi Cristo coca quëayë, yecohua'i quëayere ëa ñajë pëijë, ai jerepa pa'iohua'i a'ë cuasajë. Jaje pa'iquëta'are yecohua'ipi de'oye cuasajë quëayë.

¹⁶ Jaje pa'iquëta'are yecohua'ipi nuñerepa quëama'pë johua'i yëyere t'j'añu'u cuasajë Cristo coca quëayë. Jaje yo'ojëna, yë'ëpi co sito pa'iquëpi ai co'a ju'ijaquë cajë.

¹⁷ Jaje pa'iquëta'are de'oye cuasajë paire oijë quëacohua'i cato asayë, yë'ë ñno pa'iyë, Maija'quë coca sañope cacohua'ire ca de'huaja'quëpi.

¹⁸ Jaje pa'ina, yë'ëre iquepi co'aquë'ni si'aye de'oji, Cristo cocare paire oijë quëatoje, panita'a oima'pë coa quëatoje, si'aye sihuayë.

¹⁹ Jaje pa'ina, Mësaru Maija'quëre secacai do'ipi, cui'ne Jesucristo joyo cõcai do'ipi cosiquëpi huaso cuãñosiquë pa'ija'quë a'ë cuasajë sihuayë.

²⁰ Jaje pa'ina, yë'ë cato coa teaye ca jujani tome huesëma'ë pa'ija'quëpi cayë. Jaje pa'ina, yë'ë pa'iyë ña do'ire mësarupi Cristo ai jerepa pa'i api, cuasajajë caquë yo'oquë pa'iyë, yë'ë huajëquë pa'i maca cui'ne yë'ë ju'isi macajë.

²¹ Jaje pa'ina, yë'ë pa'ye a'ë, Cristo cui'ne ju'ñepi coa jerepa de'oyere se t'j'añe a'ë.

²² Jaje pa'iquëta'are yë'ëpi capëre huajëquë pa'ini, Ëjaë co'amañare yo'oye pa'iji. Jaje pa'ina, iquepi jerepa de'oquë'ni cuasayë, cui'ne de'oyese'e pa'ina, ñaquë.

²³ Jaje cayaye pa'ina, çiquepi jerepa de'oquë'ni, yë'ëre cuasajëna jëaji, iti yo'o ja'ñe? Jaje pa'iquëta'are yë'ëre cato ai jerepa de'oji, juni sani Ëjaë ja're de'oye pa'iyepi.

²⁴ Jaje pa'iquëta'are, mësarute cato jerepa de'oji, yë'ëpi mësaru ja're ja yë'ta'a huajëquë pa'iyepi.

²⁵ Jaje pa'ina, nuñerepa cuasayë, yë'ëpi mësaru ja're cõni pëaye de'oji, mësaru Maija'quëre necaiquëre pare cuasayere se mëocasi'i caquë cui'ne Maija'quëre cuasajë ai jerepa sihua ja'ñere caquë.

²⁶ Jaje pa'ina, mësarupi yë'ëre huajëquë pa'ina, t'jupë ña cojë ai jerepa Ëjaë Jesucristo necaise'ere, ñajë sihuaja'cohua'i a'ë.

²⁷ Yë'ëpi mësarute sani ñaquëna, pa'iyëje pa'ye pa'ijë'ë, yë'ëpi so'ore pa'itoje, Cristo de'o coca cayëje pa'ye pa'ijë'ë. Jaje pa'ijëna, mësaru õcue pa'i macarepa tuiyere, te'e cuasayena

tsiosicohua'ipi, si'aohua'i te'le sañope, huaso cocare nejocaiyere ësejë uihuayere quëajëna, coca asaye yëyë.

²⁸ Mësarute sañope yo'ocohua'ini ne quëco cuaño'ma'pë pa'ijë'ë. Jaje pa'ina, mësaruru quëcojë pa'iyepi tiñarepa iñoji, jaohua'i ne huesë hue'ñana saiyere cui'ne mësarupi huaso cuañosicohua'i pa'iyena saiyere iñoji. Ja pa'iyee cato Maija'quë isiyee a'ë.

²⁹ Jaje pa'ina, Cristo do'ire huaso cuañoñese'e isiyee papi, cui'ne Cristo do'ire, ai yo'o ja'ñee isipi, mësarute.

³⁰ Yureta'a mësaruru yë'ë jare cõni tsiosicohua'ipi te'ere uihuajë pa'iyë, yë'ë ja'në uihuayee ñasicohua'ipi cui'ne yurejë ja yë'ta'api yë'ë uihuayee asajë pa'iyë.

2

Cristo Jerepa Pa'i Pa'iyee, Jerepa Pa'i A'ë Cuasa Ma'ñe

¹ Jaje pa'ina, mësarupi jerepa yëjë neñere Cristo isiquëna, quëcosicohua'i pani, i oiyepi ca yë'huaquëna, asacohua'i pani, Maija'quë joyopi mësaruru ja're pa'ina, asacohua'i pani mësarupi pa'ire teaye pa'iohua'ire pare ñajë ai oiyere pacohua'i pani,

² mësaruru pa'iyepi sihua ëaye necaiyë, yë'ëre, mësaruru sa'ñe de'oyee yo'ojë pa'iyepi, te'le oiyepi, te'le joyopi yo'oquëna pa'iyepi, te'ere cuasajë nejë pa'iyepi.

³ Jaje pa'ina, mësaruru cato mësaruse'e pa ja'ñere cajë neñë cuasayepi, panita'a jerepa pa'iohua'i a'ë cuasayepi yo'oma'pë pa'ijë'ë. Jaje yo'oma'pë ai jerepa pa'iyë cuasama'cohua'ipi, yecohua'ini mësarute jerepa de'ocohua'ire cuasajë ñajë pa'ijë'ë.

⁴ Cui'ne mësaruru de'oyee pa'iyese'e cuasajë yo'oma'pë pa'ijë'ë, yecohua'i de'oyee pa'iyere cuasajë yo'ojë pa'ijë'ë.

⁵ Jaje pa'ina, Cristo cuasase'eje pa'ye cuasajë pa'ijë'ë, mësaruruje.

⁶ Ñajë'ë, i pa'ise'ere Diosuje pa'ita'a, Diosu yë'ëje pasi'i caquë yo'oyee papi.

⁷ Paquë coa ai jerepa yecohua'i co'amaña necaicohua'i maña pa'iyena ñini paije pa'i maca de'opi si'aye Ejaë pa'iyere se jëoni.

⁸ Jaje paije pa'i maca de'oni, jerepa pa'i a'ë cuasama'quëpi i de'oyee sehuocai do'ire cruzu huajëya'ye pa'iona, juj'i.

⁹ Jaje pa'ina, Maija'quëpi ite si'aye jerepa pa'ire nequë cui'ne si'a mami jerepa pa'i mamire pare isipi, ite.

¹⁰ Jaje pa'ina, Jesús mamire asajë ma'tëmo pa'icohua'i cui'ne yeja pa'icohua'i cui'ne yeja huë'ehuë te'te pa'icohua'ijee, si'aohua'i do're ja'ruja'cohua'i a'ë.

¹¹ Do're ja'runi si'a pai maña Ejaëre papi caju'cohua'i a'ë, Jesucristore. Jare yo'ojë Maija'quëreje, de'oyerepa yo'o u'ni cajë iñoja'cohua'i a'ë.

¹² De'oji, Maija'quë do'ijë maña, yë'ë mësaruru ja're pa'i yëhuoquëna, si'anë mësaruru Jesús sehuoyee paye de'oyee sehuocaijë yo'ose'eje pa'ye cui'ne yurejë ai yëjë yo'ojë'ë, yë'ëpi so'ore pa'litoje. Jaje pa'ina, mësaruru huaso cuañosicohua'i pa'iyere iñojë, ca'rajë jerepa pa'iohua'i a'ë cuasama'pë nejë'ë.

¹³ Coa Maija'quë i yëyeje pa'ye mësaruna de'oyee ne ëaye neñe neñepi yo'oyë.

¹⁴ Jaje pa'ina, ai yo'oyë cajë yahue a'ri coca maña sañope cama'pë, cui'ne sa'ñe pëti coca cama'pë co'amaña nejë'ë.

¹⁵ Yecohua'ipi mësarute tayocohua'ire cui'ne co'ayee yo'o do'i quë'iohua'ire ña'ñe paja'cohua'ire. Jaje pa'ina, mësarupi Maija'quë mamajërepa ti si'si te'ña peocohua'ipi iye yeja nea jopore papi ma'ñoco miacaiyee pa'ye miañë, iye co'a pai cui'ne ti nu'ne yo'oyee peocohua'i jopopi.

¹⁶ Pa'iyee isí cocare, iohua'ire quëajë pa'i do'ipi. Jaje pa'ijëna, yë'ë Cristo dai mu'se sihuaja'quë a'ë, mësaruni ñaquë. Yë'ë mësarute quëaquë cu'i maca, coa teaye yo'orojaiñe pahue caquë.

¹⁷ Mësaruru Maija'quëre pa'iji cuasajë coa isiyena yë'ëje cõsi'i caquë yë'ë pa'iyepi ai yo'oquë ju'uitoje de'oji. Jaje pa'ina, yë'ë mësaruru ja're cõni sihuayë,

¹⁸ sihuacuëna, mësaruruje yë'ë ja're cõni sihuayee pa'iji.

Timoteo Cui'ne Epafrodito

¹⁹ Ejaë Jesupi cõcaina, de'hue esa jëjo saosi'i, Timoteore. Mësaruru pa'iyee asani yë'ëre co'ini quëacuëna, sihuaja'quëre cuasayë.

²⁰ Timoteoje pa'ire peoyë, yequëre. Yë'ë cuasayee cuasaquë mësarute oi, mësaruru de'oyee pa'iyere caquë yo'oquëre.

²¹ Jaje pa'ina, yecohua'i cato iohua'i de'oyee pa'iyese'e cuasajë yo'ocohua'ipi pa'iyë, mai Ejaë Jesucristo yëyee yo'oma'cohua'ipi.

²² Jaje pa'iquëta'are tsoe mësarupi ñahuë, Timoteo yë'ë Maija'quë coca quëa maca, ma-maquë pëca ja'quëre cocaiyee pa'ye yo'oquëna.

²³ Jaje pa'ina, yè'è yo'lo ja'ñere du'ru se asani, ja maca esa jèjo saosi'i, mésarute ñaja'quère.

²⁴ Mai Èjaèpi còcaina, yè'èje mésarute de'hue esa sani ñaja'què a'è, cuasayè.

²⁵ Cui'ne yeque ai jerepa de'oji, cuasahuè, Maija'què do'iquè Epafroditoni jèjo saoyepi. Yè'è ja're co'amaña nequèni yè'è ja're te'e sañope yo'oquèni, mésaru yè'ère còcaija'quère cajè jèjo daosiquèni cui'naèni jèjo saoj'a'què a'è, cuasayè.

²⁶ Cui'ne ije mésarute si'aohua'ire ñaño yèji, ai co'a ju'i pa'iji, ju'iji asasicohua'ini ña huasosi'i caquè.

²⁷ Ju'ire paquèna, asahuè, mésaru. Tirepa juni huesèra'pi, Maija'quèpi teaye ai yo'oquèna, oi jujupi. Ise'ere cuasaquè yo'oye papi, yè'è cosiquè ai yo'oquèpi ai jerepa oima'quèni caquè, jaje yo'opi.

²⁸ Jaje pa'ina, jaèni esa jèjo saoyè, mésarupi tìjupè huajèquère ñajè sihuajèna, yè'èje oima'è pasi'i caquè.

²⁹ Sihua-jè ite pèpaj'è, mai Èjaè do'ire. Jaje cui'ne si'anè yecohua'ireje sihuajè oijè de'oye yo'ojè'è, ije pa'iohua'ire.

³⁰ Jaje pa'ina, mésaru yè'ère necani tì'año peoyere necasi'i caquè yo'oquè ti jutira'pi, Cristo co'amañare necai do'ire.

3

Nuñerepa Pa'iyè

¹ Yure cato Maija'què do'ijè, mai Èjaèni sihuajè pa'ijè'è, yè'è ja'nè mésarute toyase'ere toya cotoje, josa te'ere toyaye nèiñe paji, coa ai jerepa ja cato mésarute de'oye ocue pa'i maca pa'iyere còcaiyè a'è cuasaquè toyayè.

² De'hua ñajè pa'ijè'è, jo'ya yaije pa'iohua'ire, co'aye yo'ocohua'ire, ca'ni tèacohua'ire.

³ Jaje pa'ina, mai joñoapi Maija'quère sejè, cui'ne Cristo Jesús acohua'i pa'iyere sihuacohua'ipi nuñerepa ca'ni tèase'èje pa'iohua'irepa pa'iyè, capè neñepi tì'año a'è cuasama'cohua'ipi.

⁴ Yecohua'i capè nese'ena quècojè pa'iyè ai jerepa yè'è cato quècoquè pa'iyè paquèta'a. Jana quècoma'è pa'iyè, ñajè'è.

⁵ Yè'è cato ocho mu'seña coasiquè pa'i maca cuiri ca'nihuè tèa cuañohuè. Jaje pa'ina, judío paire pa'è, Benjamín, tècapè aquè a'è, hebreo pai mamaquè a'è, judío pai cuañèñepi yè'ère fariseore hue'yosiquè paè'è.

⁶ Jaje pa'ipi Jesure sehuocohua'ire coyere èsequè ai josa yo'oquèpi, si'aye cuañese'e cayè de'oye sehuoquèpi, yecohua'i mañaje ti sañope tayoquè api ca tì'año peoquèrepa paè'è.

⁷ Jaje pa'iquèta'are Cristo do'ipi yure cato ti do'i peoye ñaño, ja'nè yè'è itire pa'è cuasase'ere.

⁸ Jaje pa'ina, yè'è Èjaè Jesucristo pa'iyere jerepa pa'yere asaquè còni ñato, jerepa do'i peoye pa'iji. Jaje pa'ina, Cristoni jerepa ja'ys tsiوني pasi'i caquè si'aye coa co'aye ñaño, nejose'èje pa'ye.

⁹ Jaje pa'ina, yureta'a cuañese'e cayere yo'oquè nuñerepa pa'iquè pasi'i caquè yo'oma'è pa'iyè. Coa ai jerepa Cristore ire pare cuasacohua'ire Maija'què nuñerepa pa'iyè isiyere pasi'i caquè pa'iyè.

¹⁰ Yè'è cato Cristo pa'iyere asa tì'añere yèyè, j ju'isiquèpi huèisi tutupi yè'èni pa'ina, asayerè yèyè. Cui'ne j ai yo'ose'e ayere yo'oye yèyè. Ije pa'i pa'iyere yèyè, paire oi ju'ise'ena tì'aquè.

¹¹ Pai ju'isicohua'i huèni pa'iyere tì'asi'i caquè yo'oyè.

Tì'añu'u, Cajè Yo'oye

¹² De'oquèrepa pa'iyè si'aye tì'ama'quèpi tì'asi'i caquè yo'oyè jare pajaquè caquè Cristo Jesupi yè'ère du'ru tì'ani paquèpi.

¹³ Yè'è cato Maija'què do'ijè, ja pa'iyè ja yè'ta'a tì'ama'què a'è, tì'asi'i caquè yo'oquèta'a. Jaje pa'ina, tì'asi'i caquè jeteyo'je neañere huanèyeyi jeto iti seña hue'ña pa'iyere tutu yo'oyè.

¹⁴ Yo'oquè Cristo Jesús ja're tsiوني pa'i do'ire Diosu ma'tèmopi soi hue'ñana j coa isiyere paja'quèpi yo'oyè.

¹⁵ Si'aohua'i Maija'què pa'iji cuasayena ai de'osicohua'i cato jaje cuasayè pa'iji. Mésarupi te'e cuasama'pè yequere a'ri maña tiñe cuasayè pa'ito Maija'quèpi iño sètoja'què.

¹⁶ Jaje pa'iquèta'are te'e cuasayepi te'e neñepi pañu'u mai tì'ase'e cato.

¹⁷ Maija'què do'ijè, yè'è yo'lo iñose'ere pe'tejè'è. Cui'ne ñajè'è, yèquè mésarute ye'yase'èje pa'iyere pa'icohua'ireje.

¹⁸ De'huarepa mésarute cayè: Cristo cruz jucacaise'ere sañope cacohua'i jai pai pa'iyè caquè. Yureje ja yè'ta'api co mea maña se oni toquè cayè:

¹⁹ Jaohua'i cato coa nejo cuañoja'cohua'ipi pa'iyë. Iohua'i diusu cato ëtapë a'ë, cui'ne johua'ire huajëya'ye nëti'ñe pa'yere yo'ojë jerepa pa'iohua'i a'ë cuasacohua'ipi, iye yeja co'amañase'e cuasacohua'i a'ë.

²⁰ Jaje pa'iquëta'are mai cato ma'tëmo pai a'ë. Jaje pa'ina, utejë pa'iyë, ma'tëmopi Cristo Jesús maire huasoquë daija'quë api cajë.

²¹ Ipi mai capë ju'ico pa'isicore j capë de'ocore pajë pa'ioire necaija'quë api, si'aye meñe quëco tutupi.

4

Si'anë Sihuajë Pa'ijë'ë, Mai Ejaëni Cuasajë.

¹ De'oji, Maija'quë do'ijë maña. Yë'ë yëcohua'i, yë'ë oicohua'i, yë'ë ña ëa ju'icohua'i mësarü a'ë, yë'ë sihuaye, cui'ne yë'ë isi cuañoja'a maroje pa'iohua'i. Jaje pa'iyë sëte ocue pa'i macarepa mai Ejaëre tuijë pa'ijë'ë.

² Evodiare cui'ne Síntiquere señë, sa'ñe yo'ojë cayere jeoni mai Ejaë tsecohua'i sëte te'e de'oye cuasajë pa'ijajë caquë.

³ Jaje pa'ina, më'ëre señë, yë'ë yo'oyeje pa'yere nequë pa'iquëna, më'ëpi jaohua'ire Maija'quë do'ijëre coçaijaquë caquë. Huaso coca yë'ë quëaquëna, jaohua'i yë'ëre de'oyerepa coçaisicohua'i a'ë. Clemente ja're coñi, cui'ne yecohua'i yë'ëre coçaicohua'i ja're coñi. Jaje pa'ina, johua'i mami ti pa'i toya pëpëre pana toyase'epi pa'iji.

⁴ Si'anë mai Ejaëni sihuajë'ë. Tijupë cayë, sihuajë'ë, ini.

⁵ Jaje pa'ina, si'aohua'i mësarute de'lo paire pa'ë cajë ñajajë mësarupi quëcojë de'oye yo'ocohua'i pa'ijë'ë. Mai Ejaë ja'yere pa'iji.

⁶ Si'aye tëto saitojë co'a ju'ijë oima'pë pa'ijë'ë. Coa ai jerepa Maija'quëni sejë de'oji cajë pëpajë si'aye mësarü yëyere iñojë'ë, Maija'quëna, ite se maca.

⁷ Jaje yo'ojëna, Maija'quëpi mësarute j jo'cua de'oye pa'iyere isija'quë api, mai asa ti'añe peoyere pare. Isina, iye jo'cua de'oye pa'iyepi mësarü joña cui'ne mësarü cuasajë pa'iyë de'oye ñacasipi, Cristo Jesús do'ipi.

De'oyese'e Cuasajë'ë

⁸ Tëjiyerepa cayë, mësarute. Maija'quë do'ijë, nuñere pare cuasajë'ë, yecohua'ipi Ejaëre ñajëna pa'iyere, jitre pare de'oyere pare sihuajë ñañere, dëoye ca cuañoñere. Si'aye de'oyere cuasajë'ë, yecohua'i sihuajë de'oye cacaiyere.

⁹ Jaje pa'ina, yë'ë ye'yase'ere, yë'ë mësarute quëase'ere, yë'ë caquëna, asase'ere cui'ne yë'ë yo'okuëna, ñase'ere jare yo'ojë'ë. Jaje yo'ojëna, Diusu jo'cua de'oye pa'iyë isiquëpi mësarü ja're coñi pasipi.

Filipenses Acohua'ipi Pablöre Coçaiye

¹⁰ Ai sihuayë, mai Ejaëre, mësarü yë'ëre cuasa huëo coçe'ere caquë. Cama'ë pa'iyë, yë'ëre huañeyesicohua'ipi, coasa huëohuë caquë. Yë'ë cato cayë, yo'o ti'añepi peoquëna, coçaiye yëjëta'a pasicohua'ipi coçai huëohuë caquë.

¹¹ Cama'ë pa'iyë, co'amañapi peoquëna, pa'iyë caquë. Yë'ë cato yë'ë payere sihuaquë pa'iyere ye'yesisiquë a'ë.

¹² Co'amaña peoquëna, pa'iyere jaiye co'amaña payere timësiquë pa'iyere, ai ëa ju'iñere, tëto saise'erepa payere, cui'ne peoquëna pa'iyere, coa si'aye tëto sai ye'yesisiquë a'ë.

¹³ Jaje pa'ina, coa si'aye quëcoquë ne ti'añe payë, Cristo tutupi coçaina.

¹⁴ Jaje pa'iquëta'are mësarupi de'oye yo'ojë yë'ëre coçacë'ë, ai yo'okuëna, mësarü co'amañapi.

¹⁵ Macedoniapi du'ru macarepa huaso coca quëa huëoquë sai maca mësarü Filipos acohua'ipi yë'ëre coçacë'ë, mësarü isiyepi. Yequë hue'ña sehuocohua'i cato coçaiye pahuë. Tsoe mësarupi asayë, ja yo'ose'e.

¹⁶ Ja yë'ta'a yë'ë Tesalónicare pa'ina, mësarü cayaye jëjo saohuë, curiquë, yë'ëre jopo caraye coçai ja'ñere.

¹⁷ Coa mësarü isijëna, payese'e co'ema'ë pa'iyë. Coa ai jerepa mësarujë iti coçaiye ayepi nese'ere, quëise'eje pa'yere pajajë caquë co'ecaiyë.

¹⁸ Si'aye imahuë, mësarü isiyë. Caraye peoji, yure ai payë. Mësarü Epafrodito ja're jëjo daose'ena coñi jerepa payë. Mësarü jëjo daose'e, cato huëo së ma'ñare Maija'quëna coa isiyeye pa'ye a'ë, ai yo'ojë ite isiyeye pa'ye a'ë, Maija'quë sihuaquë ñañe a'ë.

¹⁹ Yë'ë Diusupi mësarute si'aye caraye isija'quë api, Cristo Jesús do'ipi. I jaiye de'oyere pare payeje pa'ye isisipi.

²⁰ Je'nëna de'okuëre pani Diusu. Maija'quërepa cañu'u, ite. Jaje pa'ijaquë.

Pëpa Tëjiye

²¹ Si'aohua'ire pēpacaijē'ë, Jesucristo do'ipi Maija'quë tsecohua'i de'osicohua'ire. Cui'ne iño yē'ë ja're pa'icohua'ije Maija'quë do'ijē mēsarute pēpa saoyē.

²² Si'aohua'i iño pa'icohua'i Maija'quëre pacacaicohua'ipi cui'ne romano pai ējaē huē'e acohua'ije jaohua'ipi airepa cajē pēpa saoyē, mēsarute.

²³ Mai Éjaē Jesucristopi si'aohua'ire mēsarute de'oye ñacaija'quë. Jaje pa'ija'quë.

COLOSENSES

Pëpayë

¹ Yë'ë Pablopï Maija'quë yëyepi Jesucristo jëjo saokuë de'osiquëpi, Maija'quë do'iquë Timoteo ja're çoni,

² iye toya ja'hua Cristore asa do'ire Maija'quë do'ijëpi Colosas daripë pa'icohua'ina, Maija'quë tsecohua'ina sehuosicohua'ina cajë toyayë. Maija'quë mësarute oi i coa isiyepi jo'cua de'oye pa'ijë'ë.

Sehuosicohua'ire Pablo Secacaiye

³ Si'anë mësaruni cajë secacaiyë, Maija'quëna, Jesucristo pëca ja'quëna de'oji cajë.

⁴ Mësarü Jesucristore pa'ire paji cuasajë pa'icohua'ipi. Si'aohua'ire Maija'quë tsecohua'ire oijë pa'iyere quëajëna, asa do'ire pajë señë.

⁵ Jaje mësarü cato yo'oyë, mësarute caquë de'huacaise'e ma'tëmöre pa'iji cajë ute do'ipi. Iye uteye mësarü t'lahuë, nuñerepa huaso cocare quëajëna, asasi do'ipi.

⁶ Mësarute quëajëna, asasi cocapi ai de'oco si'a hue'ña quëiona, tëayë. Mësarü Maija'quë oiyere asani iye oiye nuñere pa'ë cajë asasi maca mësarute yo'ose'eje pa'ye yequë paireje yo'oji.

⁷ Iye cocare pare mësarute yëquë oiquë Epafraspi ye'yapi, yëquë ja're co'amaña nesiquëpi cui'ne mësarü Cristore necaiquëre pare ñaquëpi.

⁸ Jaëpi dani yëquëre quëapi, mësarü pa'ye cui'ne mësarü joñoapi sa'ñe oijë pa'iyere.

⁹ Mësarü pa'ye quëajëna, asasi maca acohua'ipi, mësarute jeoma'pë Maija'quëre secacaiyë, ipi si'aye i yëye, joyo pa'ye ta'ñe asaye isiquëna asajë pa'ijajë cajë.

¹⁰ Jaje asa t'acohua'i pa'ijë yureta'a si'aye de'o co'amañase'e quëiñeje pa'ye yo'ojë, Ëjaë tsecohua'i sëtë i sihuaquë ñañere yo'ojë, cui'ne ai jerepa Maija'quë pa'iyere asa t'ijajë pa'ijë'ë cajë.

¹¹ Jaje pa'ina, cui'ne señë, ite, mësarute i de'o tuture papi tutu quë'iohua'ire necaijaquë cajë. Jaje necaina, tutu isi cuañosicohua'i pa'ijë, yo'o jujaye peoyerepa dahuëre yo'ojë sihuajë si'aye quëco t'ijajë cajë.

¹² Jaje quëco t'acohua'i pa'ijë yureta'a Maija'quëre sihuajë pëpaja'cohua'i a'ë, i tsecohua'ire isi co'amaña ayere çoni mia hue'ñare pana paja'cohua'ire ne de'huasiquëre.

¹³⁻¹⁴ Maija'quëpi maire, nea hue'ñapi jo'yaohua'ire pacohua'ini etoni mai tayose'ere tsie do'ipi sa'i de'huacani i oiquërepa i mamaquë cuañe te'tena ñopi.

Cristo Jucacaisi Do'ipi, Maija'quë Cajeohua'i Pa'iyë

¹⁵ Maija'quë ña cuañoma'quëpi i mamaquëja'a t'ña ña cuañoque daji'i. I mamaquë cato si'aye peo'në aquëre papi.

¹⁶ Jaë ja're çoni Maija'quë si'aye iye yeja pa'iyë cui'ne ma'tëmöre pa'iyë de'huapi, mai ña t'ia ma'ñe, cui'ne mai ñañe de'huapi. Jaje cui'ne si'aye cuañëñere, meñe cuañe tutu payere, ëjaë pa'iyere, jo'ya ne tutu payere Cristo ja're çoni de'huapi, i tse pa'i ja'ñere.

¹⁷ Jaje pa'ina, Cristo cato si'a co'amaña peo'në du'ru pa'isiquë api. Jaje pa'ipi ipi ñacaina, i tutupi si'aye de'oye iti pa'i macare pa'iji.

¹⁸ Cui'ne yequeje Cristo cato sehuosicohua'i sïopë api. Jaje pa'ina, sehuosicohua'ire pa'iyë isiquëpi du'ru pa'iquëre papi si'aye du'ruga'a pasi'i caquë ju'iñeje juni huëji'i.

¹⁹ Jaje pa'ina, Maija'quëpi sihuaipi, si'aye i pa'iyepi Cristore pa'ina.

²⁰ Jaje pa'ina, Maija'quë Cristo do'ijja'a si'a iye yeja pa'icohua'ire cajeohua'i de'osi'i cuasapi, ma'tëmöre acohua'ijë pa'iohua'ire, cuasaquë Cristo cruz ju'i do'ijja'a cajeohua'ire de'huapi.

²¹ Ja'në mësarü joñoapi co'aye cuasajë yo'o do'ire Maija'quë sañope yo'ocohua'ipi t'iohua'i paë'ë, pa'isicohua'ipi. Yure cato Maija'quë cajeohua'i de'ohuë,

²² Cristo ai yo'oque jucacaisi do'ipi. Iye cato yo'opi mësarupi i ña hue'ñare pana ina isicohua'ipi ti si'si te'ña peocohua'ipi pa'ijëna, pasi'i caquë.

²³ Ja'ñaquë payere t'añere cajë mai utejë pa'iyere, huaso coca mësarü asase'ere ti hua saima'yë, Maija'quë pa'ire paji cuasayere ocue pa'i macarepa cuasajë tuiye pa'iji. Iye cocare si'a hue'ña quëacaiyë, yë'ë Pabloje jare quëacaiquë pa'iyë.

Pablo Sehuosicohua'ire Necaiye

²⁴ Cristo i capë acohua'ire oi ai yo'ose'e carayere, yë'ë capëpi mësaruni caquë ai yo'oque ne saocai yure cato ai sihua'yë.

²⁵ Jaje pa'ina, Maija'quëpi yë'ëre sehuosicohua'ire necaija'quëre nepi. Neina, i cuañe nëose'eje pa'ye mësarü de'oye pa'i ja'ñere caquë si'aye i coca quëacaiquë pa'iyë.

²⁶ Jaje pa'ina, tsoe hue'ña ometëcana yahuese'e pai asa ma'ñe pa'ise'ere yureta'a i tsecohua'ina ñnose'ere jare quëayë.

²⁷ Maija'quëpi yë judío pai peocohua'ina, iye pai asa ma'ñe yahuese'ere de'oyere pare ñnopi. Ja cato Cristopi mësaruni pa'iyë a'ë. Jaë api, mësaru utejë pa'iquë de'oquërepa.

²⁸ Yëquëpi Cristo ayere quëayë. Si'ahua'ire de'oyerepa asa t'ajajë cajë ye'yajë cui'ne yëhuoyë. Jaje yo'ojëna, Cristona tsiosicohua'ipi de'oyerepa pai ñape ai de'osicohua'ipa'ijajë cajë.

²⁹ Jare caquë yë'ë, si'a tuturepa yo'oquë neñë, Cristo cuañe tutu yë'ëre isiyepi.

2

¹ Yë'ë cato yëyë, mësarupi yë'ë mësarute caquë jëayerëpa yo'oyere cui'ne Laodicea acohua'ire caquë yo'oyere cui'ne si'ahua'ire yë'ëre ñama'cohua'ire caquë yo'oyere asayere.

² Jaje pa'ina, mësarupi cui'ne jaohua'ipi çoni joñoa quëcoyere pajajë caquë yo'oyë, sa'ñe oiyena tsiosicohua'ipi pa'iji cuasacohua'ipi. Diusu pa'iyë cui'ne Jesucristo pa'iyë yahuese'ere asa t'ajajë caquë yo'oyë.

³ Jaë api, si'aye ta'ñe cuasaye, cui'ne asa t'añe paquërepa.

⁴ Jaje cayë, mësarute, asa ëaye ta'ñe ca cocapi yecohua'ijë cosojë nema'pë pa'ijajë caquë.

⁵ Jaje pa'ina, yë'ëpi mësaru ja're çoni pa'ima'ë panije, mësaru ja're çoni pa'iyë, yë'ë joyopi. Jaje pa'ina, sihuaquë ñañë, mësaru, cui'na hue'ña yo'oma'pë pa'iyena Cristo pa'iji cuasayere ocue pa'i macarepa pa'iyere.

Cristo Ja're Huajë Pa'iyë

⁶ Èjaë Jesucristore mësaru yëjë pa'iji cuasajë sehuose'ejë pa'ye cui'ne ina tsiosicohua'ipi pa'iji cuasajë pa'ijë'ë.

⁷ Ina jëayerëpa, pa'ire paji cuasayepi tsita mesicohua'ipi ocue pa'i macarepa i ja're pa'ijë'ë. Mësaru ye'yese'ejë pa'ye Maija'quëre si'anë de'oji cajë pëpajë pa'ijë'ë.

⁸ De'hua ñajë'ë, yo'ojë jo'ya ne cuañoñe, aihua'i ye'yase'ena, pai cuasayena, iye yeja pai yo'oyena. Ja cato cosoye a'ë, cui'ne do'i peoye a'ë. Ja cato Cristo yo'o ma'ñe a'ë.

⁹ Ñajë'ë, si'aye, Maija'quë ayepi Cristoni pa'iji.

¹⁰ Jaje pa'ina, mësaru Maija'quë pa'iyepi timësicohua'i carajajima'cohua'ipi pa'iyë, Cristona tsoni pa'i do'ire. Jaë cato si'aye meñe Èjaë api. Cui'ne si'aye meñe cuañequë api.

¹¹ Cui'ne i ja're mësaru tsoni pa'i do'ire, noni tsinëna co'acohua'i pa'iyere huaso cuañoñuë, cuirri ça'ni tëayeje pa'ye mësarute yo'oquëna. Pai jëñapi çapëna tëayeje pa'yepi neñe papi, mësarute.

¹² Cui'ne mësarupi Maija'quë tutupi ju'isiquëre huëopi cuasajë sehuo do'ire mësaru oco do cuaño maca Cristo ja're ta' cuañoñuë. Ta' cuañosicohua'ipi cui'ne i ja're çoni huëo cuañoñuë, ju'isicohua'ipi.

¹³ Ja'në mësaru tayo yo'ocohua'ipi, cui'ne ça'ni tëa cuaño'ma'cohua'ipi joñoa ju'isicohua'i pa'ë'ë. Pa'ijëna, Maija'quëpi Cristo do'ija'a mësarute i ja're çoni pa'iyë necaji'i. Necai si'aye tayo yo'ose'ere sai de'huacaji'i, Cristo do'ipi.

¹⁴ Mai co'aye yo'o do'ire, jare maipi sañe pa'ise'ere Maija'quëpi cruzuna que jëopi, maire sañope toya nëose'ere peo hue'ñarepa nejoquë.

¹⁵ Jaje yo'oquë Cristo cruzna ju'ise'epi si'aye ëja pa'ise'ere cui'ne maire meñe cuañecohua'i tutu pa'ise'ere meñe quëco huesëpi, si'ahua'i ña hue'ñare pana.

Ma'tëmo Co'amañare Co'ejë'ë

¹⁶ Jaje pa'iyë sëte yecohua'ijë mësarute nuñe yo'oma'cohua'i a'ë, cama'pë pa'ijajë mësaru aññere, pañita'a ucuyere pañita'a fiesta mu'señare, ñañëja'a së'ayere, pañita'a pëa huajë mu'se ayere.

¹⁷ Si'aye iye cato, itirepa dai ja'ñe pa'ina, pai to'ouje pa'ye a'ë. Ja itirepa cato Cristo a'ë.

¹⁸ Jaje pa'ina, de'hua ñajë'ë, mësarute isija'a co'amañare nejocajë teaye pa'iohua'i ña cuañocohua'ipi cui'ne huññahua'ire secohua'ipi, mësarupi iohua'i yo'oyena ñajë sehuojëna. Jaohua'i cato ti johua'ijë ña ma'ñere cui'ne pa'ise'ere huëojë cuasayere yëcohua'i a'ë, jerepa pa'iohua'i a'ë cuasacohua'ipi.

¹⁹ Jaohua'i cato Maija'quë cuasa nëose'ejë pa'ye yo'oquë pai ñape te'ña te'le çapëna tsioquë, acoquë ai de'huaquë Cristona, iti sjoñëna tsioma'cohua'ipi yo'oyë.

²⁰ Mësaru Cristo ja're ju'isicohua'i a'ë. Jaje pa'ina, iye yeja cuañe tutupi cuañequëna, pa'iyë pañë, mësaru. Jaje pa'iquëta'are mësaru me yo'ojë ja yë'ta'a iye yeja pai yo'ojë pa'iyere pa'ijë,

²¹ iye yo'oma'pë, añe pajë'ë, iye, cui'ne iyere tseama'ë, me'ë jëtëpi cayë'ni?

²² Si'aye jaje cayë cato, pai cuañejë ye'yaye a'ë, si'aye ja co'amaña cato iti yo'o macana cara ja'ñe a'ë.

²³ Nuñerepa cayë, ja teaye pa'iohua'i pa'ijë cui'ne capë ai jëaye cuañejë yo'oye ai ta'ñe yo'oyerepa ña cuañoji, Maija'quëre ti'añu'u cajë yo'oye. Jaje pa'iquëta'are mai capë yëyere sañope yo'oyere coçai ma'ñe a'ë.

3

¹ Mësarü Cristo ja're huëisicohua'i sëte ma'tëmo co'amañare co'ejë'ë, Maija'quë ëja të'huire Cristo ñu'u huë'ña ayere.

² Ma'tëmo ayere ai yëjë pa'ijë'ë, iye yeja co'amañare cuasama'pë.

³ Mësarü cato, tsoe Cristo ja're çoni ju'isicohua'i a'ë. Jaje pa'ina, mësarü pa'iyë yure Cristo ja're Maija'quëna yahuese'epi pa'iji.

⁴ Jaje pa'ina, Cristo mësarü pa'iyepi ñai co maca mësarujë i de'oyere pare timësicohua'ipi ñaija'cohua'i a'ë, i ja're çoni.

Tsoe Pa'iyë Cui'ne Huajëye Pa'iyë

⁵ Jaje pa'iyë sëte si'aye mësarü iye yeja aye yëyere ne huëa saojë'ë: yequë nomiore, panita'a yequë ëmëre yo'oyere, ëa ña huesëyere, si'sire yëyere, co'amaña ai tsi'so timëñe cuasayere. Ja cato de'huasi diusure señje pa'ye a'ë.

⁶ Jaje yo'ocohua'ire Maija'quë pëi nejoñepi daija'coa, ite de'oye sehuocaima'cohua'ire.

⁷ Ja'në mësarujë jare yo'ojë pa'ahuë'ë.

⁸ Jaje pa'iquëta'are yure mësarupi si'aye iyere jecojë'ë, pëtire, ëa ña huesëyere, co'ayere yecohua'ire tea ju'ijë tutu cayere, cui'ne mësarü yë'opopi si'si coca cayere.

⁹ Ja'në pa'ise'ere jecisicohua'i sëte, yure yecohua'ire cosoye pajë'ë.

¹⁰ Huajë pa'iyena, suñasicohua'ire ja pa'iyepi si'a mu'señapi ponaquë saiji, maire de'huasiquëje pa'iohua'i pa'iyena ite de'oyerepa asa ti'a macaja'a, yo'o tëjijere caquë.

¹¹ Jaje pa'ina, huajë pa'iyë pacohua'ire cato peoji, griego pai a'ë, judío pai a'ë, caye peoyë, çañi tëacohua'i, tëama'cohua'i, jo'yaohua'i cui'ne jo'ya ne cuañoma'cohua'i. Coa si'a pai te'e pai pa'iyë, Cristo tsecohua'i, ipi si'aohua'ire pa'i do'ire.

¹² Maija'quëpi mësarute ai oi sahuani i pai pa'ijajë caquë soipi. Jaje pa'iyë sëte paire teaye ñani oiyena, de'oye necaiyere pana, ai jerepa pa'iyë cuasama'cohua'i pa'iyena, a'jicohua'i pa'iyena, cui'ne yo'o jujama'cohua'i pa'iyena, suñasicohua'irepa pa'ijë'ë.

¹³ Co'aji, quëco jujahuë caye peoyerepa. Sa'ñe de'oye yo'ojë pa'ijë'ë. Cajeipi sañope yo'ose'e paquë pa'ito, i co'aye yo'ose'ere oni yejejë'ë, Ejaërepa mësarute oi sai de'huacaise'ejë pa'ye.

¹⁴ Paire oiyena suñasicohua'irepa pa'ijë'ë, ja oiyepi de'oyerepa. Te'ijë pa'iohua'i tsioni pa'iyë pa'iji.

¹⁵ Jaje pa'ina, mësarute, Maija'quë jo'cua de'oye pa'iyepi, mësarü joñoa de'oye cuajaquë caquë Maija'quëpi soini te'e capë acohua'ire nepi. Jare de'oji cajë pëpajë pa'ijë'ë.

¹⁶ Jaje pa'ina, si'anë Cristo cocapi mësarü joyo timëse'erepa pa'ijaquë. Pa'ina, yecohua'ire ye'yajë cui'ne yëhuojë'ë, tañe pa'i cocare papi. Mësarü joyore papi i necaise'ere pëpajë sihuajë jëjëjë'ë, tsoe toyase'epi, yure toyase'epi cui'ne joyo etayepi.

¹⁷ Cui'ne coa si'aye mësarü caye panita'a yo'oye pa'ito, mai Ejaë Jesucristore necaiyë cuasajë Jesús do'ija'a Maija'quëre de'oji cajë pëpajë'ë.

Huejasicohua'i Pa'iyë

¹⁸ Nëjohua'i mësarü ëjëohua'ire ëjaohua'ire cuasajë de'oye yo'ojë pa'ijë'ë, ja'ë, Cristore sehuosi nomiohua'i yo'ojë pa'iyë.

¹⁹ Cui'ne mësarü ëjëohua'ijë mësarü nëjohua'ire oijë pajë'ë, co'arepa jëaye tutu caye peoyerepa.

²⁰ Mamajë mësarujë si'aye mësarü ja'quëohua'i caye de'oye sehuocaijë'ë, ja'ë, Maija'quë sihuaquë ñañe.

²¹ Ja'quëohua'i mësarujë mësarü mamajëre de'oye oijë ye'yajë'ë, jerepa de'oye yo'oye yëja'cohua'ire, tea ju'iñeje yo'ojëna, co'a de'ojë.

²² Ejaohua'ire pacohua'i, jo'yaohua'i maña mësarujë mësarü ëjaohua'ire de'oye sehuocaijë nejë'ë. Iohua'i ña macase'e johua'ini de'oye iñoñu'u cajë yo'oma'pë. Coa ai jerepa nuñerepa cuasa joyopi ëjaëre pare pa do'ire yo'ojë'ë.

²³ Jaje pa'ina, paini necaiyë cuasaye peoyerepa co'amaña nejë'ë sihuajë, Ejaë Jesure necaiyëje pa'ye cuasajë.

²⁴ Jaje pa'ina, mësarü nuñerepa Ejaëni Cristore necaisi do'ire, i mësarute i paye ayere isija'quë api, nesi do'ire. Jare mësarü tsoe asajë yo'oyë.

²⁵ Jaje pa'iquëta'are, co'aye yo'oquë cato, jare i co'aye yo'ose'ejë pa'ye sai cuañoja'quë api. Jaje pa'ina, Maija'quëre cato peoji iquëse'ere de'oye yo'ocasi'i cayeje.

4

¹ Mésarujë Ëjaohua'i, ma'tëmore mësaru yo'ose'e caja'quëre mësaru Ëjaëre pare paye sête jare cuasajë mësarute necaicohua'ire de'oye nuñerepa yo'ojë'ë.

² Sêtasicohua'ipi pa'ijë si'anëpi Maija'quëre sejë de'oji cajë ite pëpajë pa'ijë'ë.

³ Cui'ne yëquëreje secacajë'ë, mai Ëjaëpi j coca quëaja'a sa'ro hui'yocaijaquëre, yahuesi cocare Cristo ayere cajë quëaja'quëre, ja cocare yë'ë quëaquë pa'i do'ire tseca cuañosiquë pa'iquë.

⁴ Sejë'ë, cui'ne yë'ë j coca quëa maca tiñarepa asaye quëa ja'ñere.

⁵ Sehuoma'cohua'i ja're pa'ini ñare pajë pa'ijë'ë, si'anë de'oyese'e yo'ojë.

⁶ Jaje pa'ina, mësaru coca cayepi saija'iñeje pa'ye de'oyerepa pa'ijaquë cui'ne johua'i seni asañu'u cajë señere. Pai ñapere de'oyerepa quëajë sehuocaicohua'i pa'ijë'ë.

Pëpa Tëjyë

⁷ Yëquë oiquërepa Tíquico nuñerepa Maija'quë do'iquëpi, yë'ë ja're de'oyerepa mai Ëjaë co'amaña necaiquëpi, mësarute yë'ë yo'oquë pa'iyë quëaja'quë api.

⁸ Jaje pa'ina, mësarute yëquë pa'iyë quëaquë cui'ne Maija'quëre jerepa yëjë quëaja'quëni mësaru quë'rona jëjo saoyë.

⁹ Cui'ne j ja're çoni saiji, yëquë oiquërepa, nuñe pa'iquërepa, Maija'quë do'iquë Onésimoje mësaru aquëje. Jaohua'ipi quëaja'cohua'i a'ë, iño têtö saijë pa'iyë.

¹⁰ Aristarcopi yë'ë ja're tseca cuañosiquë pa'iquëpi mësarute pëpa saoji, cui'ne Marcosje pëpaji, Bernabé mamaëje. Jaëpi mësaru quë'rona saiquë pa'to de'oye pëpani ñacajë'ë, ite.

¹¹ Jesús yequë mami Justo hue'equëje pëpaji, mësarute. Icohua'i a'ë, judío pai acohua'ipi sehuosicohua'ipi, Maija'quë cuãne te'te ayere yë'ë ja're nesicohua'i, jaohua'ipi yë'ëre sihua ëaye necaisicohua'i a'ë.

¹² Epafrajsë mësarute pëpaji, mai Ëjaë Jesucristore necaiquëpi. Jaë cato mësaru aquë api. Jaje pa'ina, mësaruni cuasaquë si'anëpi Maija'quëre secacajë, mësarupi çue pa'i macarepa pa'ijë Maija'quëna mësaru pa'iyere jsisicohua'ire papi j yëyere yo'ojajë caquë.

¹³ Yë'ëpi ñaquë a'ë, Epafrajsë mësarute, cui'ne Laodicea pa'icohua'ire cui'ne Hierápolis pa'icohua'ire ai cuasaquë Maija'quëre sei pa'ina, ñaquë.

¹⁴ Cui'ne Lucas yë'ë oiquë paire jujuquëpi cui'ne Demaspi çoni mësarute pëpayë.

¹⁵ Laodicea pa'icohua'ire, Maija'quë do'ijëre pëpacajë'ë, cui'ne Ninfasreje pëpacajë'ë, io huë'ena sehuosicohua'i tsi'sisicohua'ireje pëpacajë'ë.

¹⁶ Mësarupi iye toya ja'o ña tëjini jëjo saojë'ë, Laodicea sehuosicohua'ina, jaohua'ijë ñaja'cohua'ire. Cui'ne mësarupi ñajë'ë, Laodiceapi yë'ë toya daose'e mësaru quë'ro tijaquëna.

¹⁷ Ñeje Arquipore cajë'ë: "Më'ëre mai Ëjaë necaijaquë caquë cuãne nëose'ere de'oyerepa yo'ojë'ë."

¹⁸ Yë'ë Pablopi pëpaquë iye toya e'que yë'ë jëtë carapëpi toyayë, huanëyema'pë pa'ijë'ë, yë'ë cosiquëpi pa'iyë. Maija'quë oi ñacaiyepi mësaruni pa'ijaquë.

1 TESALONICENSES

Pablo Cui'ne I Çoçohua'i Toyaye

¹ Yê'ê Pablo cui'ne Silvano cui'ne Timoteo çoni toyayê, iye toya ja'hua. Maija'quê do'ijêna, Tesalónica daripê pa'icohua'ina Maija'quêna tsoni cui'ne Jesucristo ja're pa'icohua'ina, Maija'quêpi cui'ne mai Êjaê Jesucristopi çoni coa isiyepi, de'oye pa'ijê'ê.

Tesalonicenses Pa'i Iñose'e

² Mêsarute Maija'quê huasose'ere cuasajê si'anê Maija'quêre şecacaiyê, de'oji cajê ite pëpayê.

³ Cui'ne mësaru mai Êjaê Jesucristopi si'aye ne tî'acaiye paji cuasajê ocue pa'i macarepa uteyepi çocaina, si'aye yo'o jujama'pê ai yo'oye pa'itojê quêcohuê. Cui'ne Maija'quê pa'ire paji cuasayepi co'amaña nehuê. Cui'ne paire oiyepi pa'ina, yecohua'ire necaê'ê. Jare si'anê Maija'quê ña hue'ñana cuasajê señê.

⁴ Maija'quê do'ijê, mësarute Maija'quêpi oi sahuani nesicohua'i a'ê cuasajê pa'iyê, yêquê.

⁵ Cui'ne yêquê mësarute huaso coca quêa maca coa pai yê'ose'e cajê quêaye pahuê. Mësarupi asayê, yêquê mësaru de'oye pa'iyere cajê yo'ose'e, Maija'quê joyo tuture papi yo'ojê cui'ne nuñerepa itirepa cocare quêayê cajê quêase'e.

⁶ Quêajêna, mësarupi yêquê pa'iyere cui'ne Êjaê pa'iyere ye'yehuê, Maija'quê coca asa do'ire ai yo'oye pa'itoje. Jaje pa'ina, mësaru sihuajê asahuê, Jesús cocare Maija'quê joyopi sihuaye isiquêna.

⁷ Jaje yo'ojê mësaru de'oye pani iñoñere tî'ahuê, si'a Macedonia cui'ne Acaya sehuosico-hua'ire.

⁸ Mësaru quê'ro huêose'epi mai Êjaê coca jai saiji, coa si'a hue'ña. Jaje pa'ina, Macedoniase'e cui'ne Acayase'e tî'añe papi. Ai jerepa yequê hue'ñaje tî'api. Tî'acquêna, asayê, mësaru Maija'quê pa'ire paji cuasajê pa'iyere. Jaje pa'ina, yêquê mësaru ayere cajê quêaye peoyê.

⁹ Jaje quêaye pajêna, iohua'ipi quêayê, yêquê mësaru quê'ro do'i saisi maca mësaru yêquêre de'oye pëpani, cui'ne pai de'huase'ere Maija'quê api cuasase'ere jeoni, Maija'quê huajêquêre pani sehuoni necai huêose'ere.

¹⁰ Cui'ne quêayê, Maija'quê mamaquêpi ju'isiquêni huêosiquêpi Êjaê Jesucristo ma'têmopi co'i coja'quê api cajê mësaru utejê pa'iyere. Maire nejoñe daiye huasoquê api, Jesús.

2

Pablo Tesalonicenses Yo'ose'e

¹ Maija'quê do'ijê, mësarupi tsoe asayê, yêquê mësaru quê'ro do'i sainsi coa noni cui'iyê pase'e.

² Jaje pa'ina, mësarupi tsoe asayê, yêquê ja'nê Filiposna ai yo'ose'e, co'acohua'i a'ê cajê josa yo'ojêna. Jaje pa'iquêta'are Maija'quêpi çocaina, quêcojê Maija'quê de'o coca quêahuê, mësarute, jaiye tutu sañope yo'oye pa'itoje.

³ Jaje pa'ina, yêquê yêhuojê soiyê cato coa tayose'e peoji. Si'sije peoji. Cui'ne coa paini cosoñu'u cajê cayeje peoye a'ê.

⁴ Coa ai jerepa Maija'quêpi i de'o cocare quêaja'cohua'i a'ê caquê ñani sahuani nesico-hua'ipi cayê. Paini de'oye yo'o iñoñu'u cajê yo'oma'pê pa'iyê. Coa ai jerepa Maija'quêre pani yêquê joñoa cuasaye ñaquêni cajê yo'oyê.

⁵ Jaje pa'ina, Maija'quê cui'ne mësaru pa'iyê, yêquê mësarute êaye asa cuño cocapi cajê, cui'ne curire tî'añu'u cajê yo'oye pañe ñasicohua'i.

⁶ Paipi de'oye yêquêre cajajê cajê co'eye pahuê. Mësarupi panije yecohua'ipi Cristo jêjo daosicohua'i a'ê cajê yo'oye pa'iquêta'are pahuê.

⁷ Jaje pa'iquêta'are coa ai jerepa mësarute oijê de'o pëca ja'co mamajêre ñaciao ai de'huayeje pa'ye yo'ohuê, mësarute.

⁸ Yêquê mësarute ai oê'ê. Jaje pa'ina, coa de'o cocase'e quêaye yêye pahuê, cui'ne yêquê pa'iyêje mësaruna isiyê yêhuê, yêquê mësarute ai oi do'ire.

⁹ Maija'quê do'ijê, yêquê pa'iyere cuasajê, ñamiñapi cui'ne mu'señapi co'amaña nehuê. Ja yo'ose'e mësarupi asayê. Mësaru acohua'ipi yêquêni çocañu'u cajê ai yo'oma'cohua'ini cajê yêquêpi nehuê, Maija'quê coca quêa maca.

¹⁰ Mësaru cui'ne Maija'quê pa'iyê, yêquê nuñere papi si'si peoyepi, yecohua'ijê co'aye yo'oyê caye peoyere papi, yo'ojêna, ñasicohua'i.

¹¹ Cui'ne mésarupi asayë, yëquë mésarute pai ñapere jerepa yëjë yo'oye ne huëose'ere cui'ne oicohua'i pa'ijëna, ca yë'huase'ere pëca ja'quë mamajëre yo'oyeje pa'ye.

¹² Jaje yo'ojë cui'ne cuañehuë, mésarute Maija'quëre sehuosicohua'irepa pa'iyere pa'ijë'ë, Maija'quë yëyere yo'ojë. Ipi mésarute soipi, i cuañe te'tere, cui'ne i de'oyere pare i ja're coní paja'cohua'ire cahuë.

¹³ Yëquë quëajëna, asani de'hue Maija'quë cocare pa'ë cajë sehuohuë, mésaru. Pai quëaye a'ë cuasajë sehuoye pahuë, nuñerepa Maija'quë cocare pare iye mésaru sehuose'e. Jaje pa'ina, mésaru sehuose'ere cuasajë Maija'quëre de'oji cajë pëpajë señë. Maija'quë cocarepa sête mésarute itipi yo'oquë pa'iji, sehuocohua'ire.

¹⁴ Mésaru Maija'quë coca sehuo do'ire ai yo'oyë, mésaru cajeohua'ipi sañope yo'ojëna. Judío pai sehuocohua'ireje johua'i cajeohua'ipi sañope yo'ojëna, ai yo'ohuë, Cristo Jesús tsecohua'ipi. Jaohua'ire yo'ose'eje pa'ye yo'oyë, mésaruteje.

¹⁵ Iye judío paipi Éjaë Jesure huaë'ë, Maija'quëre quëacaicohua'ire huaise'eje pa'ye, cui'ne yëquëreje pëijë eto saohuë. Maija'quëre cui'ne si'aohua'ire sañope yo'oyë.

¹⁶ Jaje yo'ojë judío paipi éseyë, Maija'quë coca judío pai peocohua'ire huaso cuañojajë cajë quëayer. Jaje yo'ojë jero sa'na johua'i co'aye yo'oyere mëoñë. Jaje yo'ojë pa'icohua'ire yureta'a, titapi, Maija'quë johua'ire ai yo'oyepi sai ja'ñe.

Pablopi Yëji, Tijupë Sani ÑaÑe Tesalónica Pa'icohua'ire

¹⁷ Maija'quë do'ijë, mésarute jeoni so'ore pa'inije huanëyema'pë paë'ë. Si'anë cuasahuë, ñama'pë pa'inije, ai esa sani ña'ñe nëina.

¹⁸ Yë'ë Pablopi coa si'anëpi sani ñasi' i caquëta'a ti saiye pahuë, Satanáspi, huati éjaëpi ése do'ire.

¹⁹ ¿Jaje pa'ina, ique a'ni yëquë uteye, yëquë sihuaye cui'ne yëquë nere pahuë cajë cuasa ja'ñe? Mésaru a'ë, Éjaë Jesucristo dai maca yëquë sihua ja'ñe.

²⁰ Jaje pa'ijë'ë, mésaru a'ë, yëquë de'oyerepa nese'ere ñajë sihua ja'ñe.

3

¹ Mésarute cuasayepi quëcoye peoyena, te'i Atenasna pëasi'i cuasahuë. Cuasani pëaquë

² Timoteore Maija'quë do'iquëre Cristo huasoquë coca quëaquëre jëjo saohuë, jaëpi mésarute tutu isicai cui'ne mésaru Maija'quë pa'ire paji cuasayere jerepa paye necaijaquë caquë.

³ Necaina, mésaru acohua'ipi te'ijë ai yo'oye pa'itoje yo'o jujama'pë pa'ijajë caquë jëjo saohuë. Jaje pa'ina, tsoe mésarupi asayë, mai jaje ai yo'o ja'ñe pa'iyë.

⁴ Iyere mésarute quëahuë, maire ai yo'oye pa'ija'coa cajë. Mésaru ja're yëquë pa'i maca, iti case'epi ai yo'oye titapi, mésaru asase'eje pa'ye.

⁵ Jaje pa'ina, quëcoyepi peoquëna, Timoteore jëjo saohuë, mésaru Maija'quëre pa'ire paji cuasajë pa'iyere seña asaja'quëre. Yeque huatipi co'aye yo'oyena ne taouna, yëquë mésarute quëase'epi do'i peoye pa'ima'quë caquë jëjo saohuë.

⁶ Yure Timoteo mésaru quë'ropi co'ini quëapi, mésaru de'oye Maija'quë pa'ire paji cuasajë cui'ne yecohua'ire oijë pa'iyere. Cui'ne quëapi, mésaru yëquëre yëjë cuasajë pa'iyere. Cui'ne yëquë mésarute ña éaquëna, pa'iyëje cui'ne mésaruje yëquëre ña éaquëna, pa'iyë quëapi.

⁷ Maija'quë do'ijë, yëquë co'a ju'ijë cui'ne ai yo'ojë pa'icohua'ini, mésaru ocue pa'i macarepa Maija'quë pa'ire paji cuasajë pa'iyere quëaquëna, asani sihuahuë.

⁸ Mésaru jaje Éjaëre ocue pa'i macarepa tuiyere asarena, yëquëre huajë pa'i huëose'eje pa'yerepa nëiji.

⁹ ¿Jaje pa'ina, me Maija'quëre cajë pëpaye'ni mésaru necaiyere ai sihuayere yëquë joñoana ta'ye saise'erepa pani Maija'quë ña hue'ñana?

¹⁰ Mu'señapi cui'ne ñamiñapi Maija'quëre señë, jëjo saojë'ë cajë, mésarute sani ñajë mésarute Maija'quë pa'ire paji cuasaye caraye si'aye ne tit'acañu'u cajë.

¹¹ Maija'quëpi cui'ne mai Éjaë Jesucristopi cocaijaquë yëquë mésaru quë'ro do'i sai ja'ñe.

¹² Jare ipi mésarute paire oiye cui'ne sa'ñe ai oijë pa'iyë necaijaquë, yëquë mésarute oiyeje pa'ye oija'cohua'ire.

¹³ Jare ipi mésarute, mésaru joñoana ocue pa'i macarepa cuasajë pa'iyë nejaquë. Nequëna, de'ocohua'irepa pa'ijë'ë, co'aye yo'o do'i peocohua'ire papi, Maija'quë Diosu ña hue'ñana, mai Éjaë Jesucristo i tsecohua' i de'ocohua'irepa ja're dai maca.

4

¹ De'oji, jaje pa'iyē sēte Maija'quē do'ijē, Mēsarute mai Ējaē Jesucristo mamipi cuañejē señē, Maija'quē sihuaquē ñañere, yēquē ye'yase'ere jerepa yo'ojē pa'ijajē cajē. Tsoe mēsarupi jaje pa'iyē.

² Jaje pa'ina, tsoe mēsarupi asayē, mai Ējaē cuañe tutupi yēquē ye'yajē quēase'e, mēsaru yo'o ja'ñere.

³ Maija'quē sihuaquē ñañe iye a'ē, i tsecohua'irepa pa'ijē yequē nomiore panita'a yequē ěmēre ti yo'oma'pē pa'iyē a'ē.

⁴ Pai ñape nējohua'ire pajē, de'oyerepa pa'ijē, iohua'ire ějaohua'ire ñajē paye a'ē.

⁵ Maija'quēre sehuoma'cohua'i yo'oyejē pa'ye yo'oma'pē pa'ijē'ē, tēto saiperepa ěaye nēñepi cui'ne co'aye yēyepi airepa pa'i do'ire. Jaje pa'ina,

⁶ Maija'quē do'iquēre ti i paye josa yo'ocaima'pē pa'ijē'ē, iye yē'ē quēase'e aye. Jaje yo'ocohua'ire, mai Ējaēpi tuturepa saija'quē api, yēquē mēsarute yo'o ma'ñe a'ē quēase'eje pa'ye.

⁷ Jaje pa'ina, Maija'quē maire soima'ē paji'i, si'sire yo'ojē pa'ija'cohua'ini. Coa ai jerepa ina isisicohua'ipi pa'ija'cohua'ini soipi.

⁸ Jaje pa'ina, iye ye'yayere paipi co'aye a'ē cajē asaye coecohua'i pani, pai iti ye'yacohua'ini coema'pē pa'iyē, Maija'quēni coeyē, mēsarute i de'o joyo isisiquēni.

⁹ Tsoe Maija'quēpi mēsarute sa'ñe oijē pa'iyē ye'yasi do'ire, Maija'quē do'ijēja'a sa'ñe oijē pa'iyē aye toyaye pañē.

¹⁰ Jaje pa'ina, mēsaru si'aohua'ire Maija'quē do'ijēre Macedonia pa'icohua'ire oijē pa'iyē. Jaje pa'iquēta'are jero sa'na ai paire oiyepi mēsarute pa'ijaquē cajē cuañēñē.

¹¹ Yecohua'ire josa yo'oma'pē de'oye pa'ijē'ē, mēsaru co'amañare pase'e nejē. Yēquē cuañese'eje mēsaru jēñapi nejē pa'ijē'ē.

¹² Jaje pa'ijēna, sehuoma'cohua'ijē mēsarute ějaohua'ire ñaja'cohua'ire, cui'ne mēsarute carayeje peoja'core.

Mai Ējaē Dai Jq'ñe

¹³ Maija'quē do'ijē, sehuoma'cohua'i cato ju'isicohua'i huēiye peoji cuasacohua'ipi ai oiyē. Jaje pa'ina, mēsarupi jaohua'i oiyeje ju'isicohua'ire ai oima'cohua'ini caquē, ju'isicohua'ire yo'oye quēasi'i.

¹⁴ Jesús ju'isiquēpi huēji'i, mai asayeje pa'ye, cui'ne pa'ye Maija'quēpi si'aohua'ire Jesure sehuoni ju'isicohua'ire Jesús ja're cōni daja'quē api.

¹⁵ Jaje pa'ina, cayē, mēsarute mai Ējaē ayere ye'yaye sēte. Mai huajēcohua'i Ējaē dai maca pa'icohua'i ju'isicohua'ire du'ru tēto saiye paja'cohua'i a'ē.

¹⁶ Jare ipi mai Ējaē ma'tēmopi cuañequē yē'ore papi, tutu quē'ipi, cui'ne huññaohua'i Ējaērepa yē'opi, cui'ne Maija'quē duruhuēpi cōni jui maca cajeja'quē api. Ja maca Cristore sehuoni ju'isicohua'ipi du'ru huēija'cohua'i a'ē.

¹⁷ Huētēna, ja maca mai huajēcohua'ipi huēisicohua'i ja're cōni mēijē peo de'otona, siri quē'rona sañope t'ajaja'cohua'i a'ē, Ējaēre pare. Ti'ani i ja're cōni ti pa'ija'cohua'i a'ē.

¹⁸ Jaje pa'ina, iye cocare sa'ñe cajē yo'o juhahuē cuasacohua'ire tutu isijē'ē, jerepa sihuajē yējē yo'oja'cohua'ire.

5

¹ Iti daija'a mu'se cui'ne iti tēcahuē toyaye pañē, Maija'quē do'ijē.

² Tsoe mēsarupi asayē, mai Ējaē dai mu'se cato co'amaña imaquē ñami daiyeje pa'ye dasipi.

³ Pai de'oji jo'cua pa'ire payē, si'aye de'oji ca maca coa nejoñepi ti'asipi, jaohua'ire, nomio tsj cōa huēocona, a'si huēoyeje pa'ye. Ja maca jēaye peoji.

⁴ Maija'quē do'ijē, mēsaru cato nea hue'ñare pa'ima'pē pa'iyē. Co'amaña ñaē yo'ocuēna, ña quēquēyeje pa'ye mai Ējaē da tita mu'se, ña quēquēye.

⁵ Si'aohua'i mēsaru mia hue'ña acohua'i a'ē, mu'se acohua'i a'ē. Ñami cui'ne neañe acohua'i peoyē.

⁶ Jaje pa'ina, mai caiñe peoji, yecohua'i yo'oyeje. Coa ai jerepa sētasicohua'ipi nuñerepa pa'iyere ñajē pañu'u.

⁷ Jaje pa'ina, caiçohua'i caiñē, ñami. Cui'ne cōno cuepecohua'i cuepeyē, ñami.

⁸ Jaje pa'iquēta'are mai mu'se acohua'i cato ñare pajē nuñere pare tayo ma'ñere pa'iyē pa'iji. Maija'quē pa'ire paji cuasayena cui'ne paire oiyna suñani, soldado i coti saihuē quēna cañapi suñani jēayeje pa'ye, cui'ne huaso tējisicohua'i pa'i ja'ñere uteyena, soldado quēna mapē puani jēayeje pa'ye jēañu'u.

⁹ Maija'quē nejaja'cohua'ini maire soima'ē paji'i. Coa ai jerepa mai Ējaē Jesucristo do'ipi huasosicohua'i pa'ijajē caquē soipi.

¹⁰ Jaje pa'ina, Jesucristo mai do'ire jucacaji'i, maipi i ja're cõni ju'isicohua'i panije, cui'ne huajëcohua'i pa'inije pa'ijajë caquë.

¹¹ Jaje pa'ina, pai ñape yecohua'ire tutu isicaijë, yo'o jujahuë cuasacohua'ire jerepa yëjë yo'oye necaijë'ë. Noni jaje yo'ojë pa'icohua'i sête.

Pablo Yëhuose'e Sehuosicohua'ire

¹² De'oji, yure mësarute Maija'quë do'ijëre señë, mësaruru ja're pa'ijë co'amaña nejë. Iyere yo'ojë'ë cajë, cui'ne yëhuojë, mai Ejaë yëyeje yo'ojë mësarute sacohua'ire, mësarupi ëjaohua'ire ña'ne pa'iji, caquë.

¹³ Jaje pa'ina, mësarute iohua'i necai do'ire cuasajë ai oijë ëjaohua'ire ñajë pajë'ë. Pai ñape sa'ñe de'oye yo'ojë, jo'cua pa'ijë'ë.

¹⁴ Cui'ne Maija'quë do'ijë cuañeñë, mësarute, neñe josa coecohua'ire yëhuojë'ë, caquë. Cui'ne yo'o jujahuë cuasacohua'ire cõcaijë'ë, Jesús yo'oyere jerepa yëjë yo'oja'cohua'ire, cui'ne cõcaijë'ë, Maija'quëre cuasaye tutu peocohua'ire. Si'aohua'ire de'oye cuasajë dahuëre yo'ojë cõcaijë pa'ijë'ë.

¹⁵ De'hua ñajë pa'ijë'ë, te'ijë yequëpi co'aye yo'ouna, cui'ne co'ayepi saisi'i caquë yo'oma'ë pa'ijaquë, coa ai jerepa sa'ñe de'oye yo'ojë pa'ijë, cui'ne si'aohua'ire yecohua'ire de'oye yo'oyere cuasajë'ë.

¹⁶ Si'anë sihuacohua'i pa'ijë'ë.

¹⁷ Si'anë Maija'quëre sejë pa'ijë'ë.

¹⁸ Si'aye mësarute daiye Maija'quëna yëye a'ë. Jaje pa'ina, de'oji cajë Maija'quëre pëpajë'ë, Cristo Jesure sehuocohua'i sête.

¹⁹ Toa yayoyejë pa'ye yo'oma'pë pa'ijë'ë, Maija'quë joyo pa'iyere.

²⁰ Cui'ne coecaima'pë pa'ijë'ë, Maija'quëre quëacaicohua'i caye pa'ito.

²¹ Asani si'aye nuñere pa'ni ïti cajë neñani de'oyese'e de'huajë'ë.

²² Si'aye co'aye yo'oma'pë pa'ijë'ë.

²³ Jare ïpi Maija'quëpi, jo'cua de'oye pa'iyë paquëpi, mësarute nuñerepa de'ocohua'ire necaijaquë, necani mësaruru pa'iyë si'aye joyo, cuasaye cui'ne capë ti si'si te'te peocohua'ire pare ñacai pajaquë mai Ejaë Jesucristo dai mu'sere caquë.

²⁴ Mësarute soisiquë ti tayoma'quë api. Jaje pa'ina, i case'eje pa'ye ne tì'aja'quë api.

Pëpa Tëjjiye

²⁵ Maija'quë do'ijë, yëquëre Maija'quëre secacaijë'ë.

²⁶ De'oye sihuayepi sihuajë, pëpacaijë'ë, si'a sehuosicohua'ire.

²⁷ Mai Ejaë cuañequërepa do'ipi ca nëoñë, mësarute, iye toya ja'hua si'aohua'ire Maija'quë do'ijëre ña asojë'ë caquë.

²⁸ Mai Ejaë Jesucristopi mësaruna i coa necaiyepi yo'oquëna, pa'ijë'ë.

2 TESALONICENSES

Pablo Cui'ne I Cōcōhua'i Toya Cōse'e

¹ Yē'ē Pablo cui'ne Silvano cui'ne Timoteo cōni iye toya ja'hua Tesalónica daripē acohua'ina, Maija'quē Diusuna cui'ne mai Ējaē Jesucristona tsiosicohua'ina toyayē.

² Diusu Maija'quēpi cui'ne mai Ējaē Jesucristopi necaina, jo'cua de'oye pa'ijē'ē, cajē.

Maija'quē Co'ye Yo'ocohua'ire Sai De'huaye

³ Mēsarū Maija'quēre pa'iji cuasayepi ai jerepa ai de'oquēna, cui'ne paire oiyeppi jero sa'na ai jerepa oiye pa'ina, Maija'quēre si'anē mēsaruni cuasajē Maija'quēre sejē de'o'ji cajē pēpayē.

⁴ Cui'ne mēsarū yecohua'ipi josa yo'ojēna, neñañere quēcōjē Maija'quē pa'ire paji cuasa do'ire pa'iyere, yēquēpi sehuosicohua'i ja're cōni de'oyerepa yo'oye'ni cajē sihuayē, mēsarū pa'iyere.

⁵ Iye yo'oyepi Maija'quē pai ñape yo'ose'ere ca de'huaquēpi nuñerepa yo'oyere. Jaje pa'ina, Maija'quēpi mēsarute de'ocohua'ire pare ēja de'hua'j, j cuañe te'te cacaja'cohua'ire ja ai yo'o do'ipi.

⁶ Jaje pa'ina, nuñere pa'ē, mēsarute, josa yo'osicohua'ire Maija'quēpi ai yo'oyepi iohua'ire sañe.

⁷ Mēsaruni ai yo'osicohua'ini pēa huajēyere isiquē, yēquē ja're cōni. Iye yo'oye cato pa'ija'coa, Ējaē Jesús j huiñaohua'i tutu quē'iohua'i ja're cōni ma'tēmopi toa coro ne'su mēñeja'a ñai maca.

⁸ Ja maca Maija'quē pa'iyē asaye coesicohua'ire, cui'ne Jesús huaso coca asaye coesicohua'ire si'sequē nejosiquē daija'quē api.

⁹ Ja maca jaohua'i ti nejo cuañoja'cohua'i a'ē, Ējaērepa cui'ne j de'o tuturepa peo hue'ñana, so'ona.

¹⁰ Jaje nejo cuañosicohua'i pa'ija'cohua'i a'ē, mai Ējaē Jesús j tsecohua'ire de'ocohua'ire pare nesi'quē dai maca, ite sehuocohua'i si'aohua'i ite ña quēquējē de'oquēre pa'ni ca maca, cui'ne mēsarujē te'e cōni sihuaja'cohua'i a'ē, yēquē quēajēna, sehuosicohua'ipi.

¹¹ Maija'quēpi mēsarute de'ocohua'irepa pa'ija'cohua'i a'ē caquē soipi. Soisicohua'ipi jare t'ajajē cajē si'anē Maija'quēre seacaiyē. Cui'ne j tutupi si'aye mēsarū de'oye neñe yējē cuasaye, cui'ne mēsarū Maija'quē pa'ire paji cuasa do'ipi co'amaña neñe cōcāni t'ajajaquē cajē señē.

¹² Señē, cui'ne Jesucristo mamipi de'oyerepa ca cuañose'e pa'ijaquē cajē mēsarute de'oye necai do'ire, cui'ne mēsarujē j do'ire de'oye ca cuañojajē cajē.

2

Ti Co'aquē

¹⁻² Mai Ējaē dai ja'ñere cui'ne mai j ja're tsiojai ja'ñere asacohua'ipi, Ējaē dai mu'se tsoe t'api, yēquē toyase'e a'ē cajēna, asani so'o dai cocare asani panita'a jaje Maija'quē iñopi cayena asani ai cuasa huesēma'pē pa'ijē'ē, cajē mēsarute Maija'quē do'ijēre jaje cuasama'pē cayē.

³ Coso cuañoma'pē pa'ijē'ē. Ja yē'ta'a Ējaē dai mu'se t'ama'nē du'ru macarepa cato Maija'quēre ai sañope yo'oyepi pa'ija'coa. Pa'ina, ne huesē hue'ña mamaquēre papi co'aquēre papi etaja'quē api, iye yejana.

⁴ Jaēpi ai jerepa pa'i a'ē caquē sañope yo'oja'quē api, si'aye Diusu mami hue'eyere panita'a pai señere. Jaje yo'oquē Maija'quēre se huē'ena cacani ja'rūni yē'ē a'ē, Diusu caquē yo'oja'quē api.

⁵ Yē'ē iye ayere tsoe mēsarute quēahuē, mēsarū ja're pa'i maca, cuasajē'ē.

⁶ Yure mēsarupi tsoe asayē, co'aquērepa eta mu'se ja t'ama'ēna, j etaye ēsequēre.

⁷ Jaje pa'iquēta'are tsoe yo'o huēose'epi pa'iji, co'ayerepa yo'o ja'ñe, yahuese'e pa'iyē, coa ite ēsequē Maija'quē joyo iye yejapi eta saiyese'e carapi. Ja maca tsoe co'aquēre papi pa'ija'quē api.

⁸ Pa'ina, Ējaē Jesucristopi dai j yē'opo tutupi séco huēaquē, j dai miañepi ite peo hue'ñarepa nejoja'quē api.

⁹ Iquē co'aquērepa cato Satanás cōcāyepi yo'oquēpi daija'quē api, si'a huati tutu paquēpi, cui'ne pai yo'o t'ia ma'ñe co'a tutupi yo'o iñoquēpi.

¹⁰ Ja tutupi yo'oquē nejo hue'ña saicohua'ire cosoja'quē api, nuñerepa cocare asani huaso cuañoni pa'iyē coesicohua'ire.

¹¹ Jaje pa'ina, Maija'quë ësema'ë coa ñaji, jaohua'ire, nuñerepa cocare sehuoye coesico-hua'ipi tayose'ere itire pa'ë cajë cosoyere sehuojajë caquë.

¹² Sehuoni co'ayese'e sihuacohua'ipi si'aohua'i nejosicohua'i pa'ijajë caquë.

Sahuasicohua'i Pa'iyë

¹³ Maija'quë do'ijë, Ëjaë oicohua'irepa, Diusupi mësarute sahuani soipi, mësarupi nuñerepa coca asa do'ipi, cui'ne Maija'quë joyopi, de'ocohua'ire necai do'ipi du'ru huasosicohua'i pa'iyë t'ijajë caquë. Jaje pa'ina, yëquë mësarü do'ire, si'anë Maija'quëre de'oji cajë pëpaye pa'iji.

¹⁴ Jaje pa'ina, iyere caquë mësarute yëquë ì huaso coca quëayaja'a soipi, mai Ëjaë Jesucristo de'oyerepa pajajë caquë.

¹⁵ Jaje pa'iyë sëte Maija'quë do'ijë, yëquë mësaruna ñajë ye'yase'ere, cui'ne yëquë toya saose'ere huanëyema'pë ocue pa'ì macarepa tuijë'ë.

¹⁶ Mësarute Diusu, Maija'quëpi cui'ne mai Ëjaë Jesucristopi maire oi de'oye necaiquëpi, maire ti ca ye'huaye isisiquëpi, cui'ne de'oyere pare utejë pa'iyë isisiquëpi,

¹⁷ jaëpi mësarü joñoana jerepa yëjë neñe isiquë, mësarute ocue pa'ì macarepa ñacai paquëna, mësarü cayepi, cui'ne mësarü neñepi de'oyerepa pa'ijaquë.

3

Yëquëre Secacaijë'ë

¹ De'oji. Maija'quëre do'ijë, yëquëre secacaijë'ë, iyere cuasajë, mai cocapi si'a hue'ña esa t'iaquëna, paipi sihuajë sehuo ja'ñere mësarü sehuose'eye pa'ye.

² Jaj pa' yecohua'ì Maija'quë pa'iji cuasama'cohua'ì pa'iyë sëte, secacaijë'ë, co'aye yo'oyena dahuëyesicohua'ìpi josa yo'oye paja'cohua'ire, yëquëre.

³ Jaje pa'iquëta'are, Maija'quë ì case'eye pa'ye yo'o t'iaquëre papi mësarute ocue pa'ì macarepa paquë ñacaijaquë, co'aye mësarü neñe peoja'core.

⁴ Jaje pa'ina, cuasayë, mai Ëjaëpi cocaina, nejë pa'icohua'ìpi, yëquë cuañese'eye sehuojë neja'cohua'ì a'ë, jeoñe peoyerepa.

⁵ Jaje pa'ina, mai Ëjaëpi mësarute cocaijaquë Diusu oiyejë pa'ye yecohua'ire oi ja'ñe, cui'ne ai yo'onije, Cristo tutu isiyepi quëcocohua'ì pa'ì ja'ñe.

Co'amaña Neñe

⁶ Maija'quë do'ijë, mësarute mai Ëjaë Jesucristo mamipi cuañeñë, co'amaña neñe coe Maija'quë do'iquëpi yëquë ye'yase'eye pa'ye pa'ima'quëre tsiomapë pa'ijë'ë.

⁷ Tsoe mësarupi asayë, yëquë ye'yase'e tuicohua'ì pa'iyë. Yëquë mësarü quë'ro pa'ì maca co'amaña nema'pë pa'iyë pahüë.

⁸ Cui'ne ajoje do'ì peoye aña pahüë. Sajjë aë'ë, iti tse acohua'ina. Jaje pa'ina, ñami cui'ne mu'se co'amaña nehuë, mësarü acohua'ini dëquëyeje pa'ye yo'oyere coejë.

⁹ Mësarupi yëquëre cocaiye pa'iji cajë seña pa'iquëta'are, co'amañare nehuë, mësarupi yëquëna ye'yeni nejë pa'ì ja'ñere cajë.

¹⁰ Yëquë ja yë'ta'a mësarü ja're pa'ì maca ñeje ye'yahuë: co'amaña neñe coequë, ajoje aña pajaquë.

¹¹ Jaje pa'iquëta'are asayë, jaro mësarü quë'ro acohua'ìpi ti co'amaña nema'pë coa pa'ijë, co'amaña necohua'ì cayeje pa'ye yecohua'ire quëajë cu'iyë, cajëna.

¹² Jaje pa'ina, jaohua'ire mai Ëjaë Jesucristo cuañe tuture papi cuañeñë, co'amaña nejajë johua'ì nese'ere aija'cohua'ì.

¹³ Maija'quë do'ijë, de'oye yo'oye jeoma'pë pa'ijë'ë.

¹⁴ Mësarü acohua'ìpi yëquë cajë iye toya saose'ere sehuocaima'cohua'ì pa'ito, ñani jaëpi paji cani ite tsioma'pë pa'ijë'ë, ite huajëya'ye nëija'core.

¹⁵ Jaje yo'ojëta'a ite mësarü pëiquëre pama'pë pa'ijë'ë, coa ai jerepa yo'jeire yëhuoyeje pa'ye yëhuojë'ë, ite.

Tëjijerepa Case'e

¹⁶ De'oji, mai Ëjaëpi mësarü ja're pa'ì, jo'cua pa'iyë Ëjaëpi mësarute ì pa'iyere isijaquë si'anëpi jajese'e.

¹⁷ Iye me catö yë'ë Pablopì pëpaquë toyayë, yë'ë jëtëpi, iye toya e'quena ñani yë'ë toya saocoa, cuasajajë caquë. Toya tëji hue'ña si'aye yë'ë toya saoye jaje toyaquë a'ë.

¹⁸ Mai Ëjaë Jesucristopi de'oye mësarute si'aohua'ire necaina, pa'ijë'ë. Jaje pa'ijaquë.

1 TIMOTEO

Pablo Toyase'e, Timoteona

¹ Yé'è Pablo, Jesucristo jêjo saokuè a'è, maire huasokuè Diusu cuañeñepi, cui'ne mai Èjaè Jesucristo mai utejè pa'iquèpi.

² Maija'quère pa'ire paji cuasa do'ire yé'è mamaquè a'è, mè'è. Jaje pa'ina, iye toya ja'hua toyayè, Timoteo mè'ère. Maija'quèpi cui'ne mai Èjaè Jesucristopi conì mè'ère de'oye necaijè, teaye ñani oiyere, cui'ne jo'cua de'oye pa'iyere isijajè.

Tayo Ye'yase'ere De'hua Ñañe

³ Nuñerepa ye'yama'pè tayo ye'yacohua'ire mè'èpi, jaje ye'yama'pè pa'ijajè caquè jaohua'ire yèhuojuaquè cuasani Efeso daripèna péajè'è, cuañehuè, yé'è ja yé'ta'a Macedonia saima'nè.

⁴ Aipè coca cocaiye paji, Maija'què pa'ire paji cajè asa tì'ñañe. Jaje pa'ina, aipè coca cui'ne aihua'i pa'ise'e co'ye ye'yama'pè pa'ijajè jaohua'i. Ja cato sa'ñe pèti coca caye a'è.

⁵ Yé'è cato, de'o joyore papi, de'oye cuasayere papi, cui'ne Maija'què pa'iji nuñerepa asayepi, pai ñape yecohua'ire oijè pa'ijajè caquè cuañeñè, iye.

⁶ Iyere yecohua'i yo'oma'pè tayo sani coa cocase'e cacohua'i de'ohuè.

⁷ Jaje tayo saicohua'ipi paire Maija'què coca ye'yacohua'i pañu'u, cajè. Yo'ojèta'a huesèyè, johua'i cayeque. Cui'ne asa tì'ama'pè pa'iyè, johua'i care payè cajè ye'yayere. Jaje pa'ina, nuñerepa ye'yayè, cuasajè tayoyè.

⁸ Maija'què Moisésre cuañese'e de'oye a'è, iti cayeje pa'ye ye'yato. Tayo ye'yatota'a co'aji.

⁹ Jaje pa'ina, Maija'què cuañese'e de'oye yo'ojè pa'icohua'ini caquè pa'iyè paji. Cuañese'e cato, co'acohua'i asa ja'ñepi pa'iji. Jaohua'i cato Maija'quère sañope yo'ocohua'ipi, cuañese'ere sehuoma'cohua'ipi, si'si yo'ocohua'ipi, yo'o ma'ñere yo'ocohua'ipi, cui'ne Maija'quère Èjaère papi cama'cohua'ipi, coa si'aye Maija'quère tì'añu'u cajè yo'oyere cue'cucohua'ipi, ja'quèohua'ire huaicohua'ipi, paire huaicohua'ipi,

¹⁰ yèquè nomiore, panita'a yeco èmère yo'ocohua'ipi, èmèohua'ija'a sa'ñe yo'ocohua'ipi, paire tseani yecohua'ina isicohua'ipi, cosocohua'ipi cui'ne care payè cajè coa cosocohua'ipi, cui'ne de'o cocare sañope cacohua'i asa ja'ñepi pa'iji, Maija'què cuañese'e.

¹¹ Maija'què de'okuèpi iye de'o cocare huaso cocare pare yé'èpi quèacaijaquè caquè cuañe nèopi.

Maija'què Teaye Ñani Cçaise'e

¹² De'oji, caquè pèpayè, mai Èjaè Jesucristore, j co'amaña yé'èpi tayoma'è nuñe neja'què api, caquè tutu isiquè, ite necaiquère nesiquère.

¹³ Yé'è cato ja'nè Jesure sañope caquè, sehuosicohua'ire tseaquè, cui'ne co'aye caquè yo'okuè pa'è. Pa'ina, sehuoma'quèpi huesèquè yo'oji cuasani Maija'quèpi yé'ère teaye ñani oi cçajaji'i.

¹⁴ Jaje yo'oni mai Èjaèpi yé'ère jaiye de'oyere isipi, Maija'què pa'ire paji cuasayere cui'ne paire oiyere Cristo Jesús ja're tsioni pa'ijè, mai payere.

¹⁵ Nuñerepa caye a'è, Cristo Jesús co'acohua'ire huasosi'i caquè iye yejana daise'ere, si'aohua'i asaye pa'iji. Jaje pa'ina, yé'ère ai jerepa co'acquèni huasopi.

¹⁶ Jaje pa'ina, Maija'quèpi yé'ère teaye ñani oi cçajaji'i. Jaje pa'ina, si'aye Jesucristo yo'o juja ma'ñere iñosi'i caquè yé'ère huasopi. Jaje pa'ina, yure yé'è jeteyo'je ite sehuoja'cohua'ire iñoquè a'è, ti pa'iyè tì'aja'cohua'ire.

¹⁷ Jaje pa'ina, Èjaèrepa de'okuère pani ti pani huesè èjaère pani sihuajè pañu'u, juni huesèma'quèni, pajè ñama'quèni, cui'ne te'i Diusure pani. Jaje pa'ijaquè.

¹⁸ Maija'quère quèacohua'ipi ai tsoe mè'è yo'o ja'ñere case'eje pa'ye de'oye yo'ojaquè caquè cuañeñè, Timoteo yé'è mamaquè mè'ère. Jaje case'epi cçaina, Maija'què pa'ire paji cuasaquèni cui'ne de'oyerepa cuasaquèpi de'oyerepa yo'ojè'è.

¹⁹ Yecohua'i johua'i de'oye cuasajè pa'iyè quèayerè sehuocaima'pè yo'ojè, johua'i Maija'què pa'ire paji cuasayere ne huesoni co'a de'ohuè.

²⁰ Jaje yo'ohuè, Himeneo cui'ne Alejandro. Jaje yo'osicohua'ini yé'èpi Satanásna isihuè, co'aye cacohua'ipi Maija'quère co'aye caye pañere ye'yejajè caquè.

2

Maija'quère Señe Ye'yaye

¹ Iyere du'ru macarepa yo'ojë pa'ijë'ë caquë cuañeñë, si'aohua'ire iye yeja pa'icohua'ire secacajë Maija'quë necaiyere de'oji cajë pëpayere, necaire pajë'ë cajë señere, ai teaye cajë señere.

² Cui'ne paire cuañecohua'ire cui'ne pai ëjaohua'ireje secacaiye pa'iji, mai sehuosicohua'ipi de'oye josa yo'oma'pëna, sihuajë pa'iyere cajë.

³⁻⁴ Jaje pa'ina, Maija'quë maire huasoquëpi si'aohua'i huasosicohua'i pa'ijë i nuñerepa cocare asa t'ajajë caquë yëquë sête ai sihuaquë ñaji, mai secacaiye.

⁵ Te'i api, Maija'quë. Cui'ne te'i api, Jesucristo, pai de'osiquë, maire t'ohua'i pa'isicohua'ini Maija'quë ja're con'i tsioye necaiquë. Yequë peoji.

⁶ Jesucristopi si'aohua'ire huasoja'a do'ire juni saicaji'i. Jaje yo'oquë iñopi, i oi necaiyere. Ja iñose'ere si'anë irepa pa'iyë asaye pa'iji.

⁷ Ja coca necaiyere caquë yë'ère coca quëacaiquëre cui'ne i jëjo saoquëre nepi. Judío pai peocohua'ire Maija'quë pa'ire paji cuasayerë cui'ne nuñerepa cocare ye'yajaquë caquë. Quëare payë. Cosoye pañë.

⁸ Yëyë, yë'ë si'a huë'ña pa'icohua'ipi ëmëohua'i Maija'quëre secohua'i pani, de'o jëñapi mëajë, de'o joyore papi, pëti peocohua'ipi, cui'ne yecohua'ire sañope case'e peocohua'ire papi señere.

⁹ Cui'ne nomiohua'ijë de'oye caña ju'ijajë, nomiohua'irepa ju'iyepi, co'aye ña cuaño ma'ñere, ëja de'ocohua'i pani, tëto saiperepa naña yoni, curi nese'ere jua nëoni cui'ne jaiye yi'yo se'huoni panita'a jai do'i cañare suñani de'ocore pa'ë cajë yo'oma'pë pa'ijë'ë.

¹⁰ Coa ai jerepa de'o co'amaña neñepi iñone pa'iji, Maija'quëna iohua'i pa'iyë isisicohua'i pa'iyë.

¹¹ Nomiohua'i cato Maija'quë coca ye'ya huë'ña jo'cuarepa dahuëre ñu'ijë asaye pa'iji.

¹² Cui'ne nomiohua'ire ëseyë, jai pai tsi'si sitona ye'yaye. Cui'ne ëseyë, ëmëohua'ire meñë quëcoyëje. Coa ai jerepa de'oye jo'cua asaye pa'iji, nomiohua'i cato.

¹³ Maija'quëpi ai tsoje Adánni du'ru de'huapi, ja jeteyo'je de'huapi, Evare.

¹⁴ Cui'ne du'ruje Adánpi coso cuañoma'ë paji'i. Nomio'pi coso cuañoni co'ayena t'ome huesëo.

¹⁵ Jaje pa'iquëta'are nomio huaso cuañoja'coa, iopi mamajëre de'oye ñacaio ai de'huacopi, Maija'quë pa'iji cuasacopi paire oicopi, cui'ne de'oyere pare yo'oco pa'icopi.

3

Sehuosicohua'i Ëjaohua'i Pa'iyë

¹ Sehuosicohua'i ëjaë pa'iyë yëquë cato de'o co'amaña yo'oyere pare yëji. Nuñerepa cayë.

² Jaje pa'ina, sehuosicohua'i ëjaë cato de'oye pa'iquëre papi pa'iyë pa'iji, sañope yecohua'ijë cayë peoquëpi, te'ore nëjore paquëpi, ta'ñe yo'oquëpi, ta'ñe asaquëpi, de'oyerepa pa'iquëpi, cui'ne paipi i huë'ena saijëna, si'anë de'oye pëpaquëpi, cui'ne de'oye ye'yaquëpi pa'iyë pa'iji.

³ Cono cuépema'quëpi, uihuaye yëma'quëpi, paire de'oye yo'oquëpi, jo'cua de'oye pa'iyë yëquëpi, cui'ne curire oima'quëpi pa'iyë pa'iji.

⁴ De'oyerepa i huë'e pa'icohua'ire cuañequëpi pa'iyë pa'iji. Mamajëpi i cuañeñe de'oye sehuocohua'ipi, cui'ne ite ëjaëre ñajëna, pa'iquëpi.

⁵ Jaje i huë'ere de'oye cuañema'quë pani, zme cui'ne Maija'quëre sehuosicohua'ire de'oye ñacaia'quë a'ni, huesëquë pani?

⁶ Jaje pa'ina, co'aji, sehuosicohua'i ëjaë pa'iyë, yure maca sehuosiquëpi. Yure maca sehuosiquëpi coa jerepa pa'i a'ë cuasayese'e t'imëni yo'oquë huati ne huesë sitona cui'ne ne huesëye pa'i do'ire.

⁷ Cui'ne yequeje sehuoma'cohua'ipi de'oquë api cajë ëjaëre ñaquëpi pa'iyë pa'iji. Jaje pa'ipi huati huäterë nesicono, cuëni dema'ë cui'ne co'aye cama'pëna pa'ija'quë api.

Sehuosicohua'i Cõcaicohua'i Pa'iyë

⁸ Jaje cui'ne sehuosicohua'ire necaicohua'ijë yecohua'ipi ëjaohua'ire ñajëna, pa'icohua'ipi pa'iyë pa'iji, iohua'i ca nëose'ere si'a yë'quë maca yo'ocohua'ipi, cui'ne cono cuépema'cohua'ipi, cui'ne cosojë curiquë nema'cohua'ipi pa'iyë pa'iji.

⁹ Maija'quë iñosi cocare mai sehuoyere de'oye de'huacohua'ipi, pa'iyë pa'iji. Mai cuasa joyopi sañope cayë ti peocohua'ipi.

¹⁰ Du'ru macarepa neñañe pa'iji, jaohua'ire. Neñajëna, caraye peojë, yureta'a sehuosicohua'ire necaicohua'ipi pa'iyë pa'iji.

¹¹ Cui'ne nëjohua'ijë yecohua'ipi ëjaohua'ire ñajëna, pa'icohua'ipi, cui'ne co'a cocare asani yecohua'ina se quëama'cohua'ipi, ta'ñe yo'ocohua'ipi, cui'ne iohua'i ca nëose'ere si'aye de'oye yo'ocohua'ipi pa'iyë pa'iji.

¹² Maija'quère sehuocohua'ire necaiquë cato te'ore nëjore paquëpi, i mamajëre cui'ne i huë'e pa'icohua'ire de'oye cuañequëpi pa'iyë pa'iji.

¹³ Sehuosicohua'ire necaicohua'ipi iohua'i yo'oyere de'oye necohua'i pa'ito, yecohua'ipi de'ocohua'i a'ë caja'cohua'i a'ë. Cajëna, ai jerepa sihuajë quëcojë Cristo Jesús cocare quëacaija'cohua'i a'ë.

Maija'quë Iñose'ere Mai Sejë Pa'iyë

¹⁴ Esa sani ñañe yëyë, më'ëre. Jaje pa'iquëta'are toyayë, iye.

¹⁵ Yë'ëpi tsoe nëiquë pa'ito, më'ëpi Maija'quë pai tsëcapëre de'oye yo'oye asasiquëpi de'oye yo'ojaquë caquë toyahuë. Maija'quë huajëquërepa tsecohua'ini cayë. Nuñerepa cocare pajë nejocai ma'ñe cajë sañope yo'ocohua'ini.

¹⁶ Mai sehuojë seña jayere pa'ë, pai asa t'i'a ma'ñe.

Cristopi paije pa'i daji'i,

Maija'quë joyopi quëapi, i pa'iyere.

Huññaohua'ipi ite ai cuasajë ñahuë.

Si'a yeja pa'icohua'ire quëahuë, i coca.

Quëajëna, paipi ite sehuohuë.

Maija'quëpi ite i de'o huë'ñare pana sapi.

4

Maija'quëre Cuasase'ere Jeocoja'cohua'i A'ë

¹ Tiñarepa quëaji, Maija'quë joyopi ñeje: Tëji mu'seña jai pai Maija'quë pa'iji cuasayere jeocoja'cohua'i a'ë, caquë. Coa coso joña ye'yayerë tuijë, huatiohua'i ye'yayerë ye'yejë.

² Jaje yo'ojë, quëna tarapë ucopi ëo huesose'ejë pa'iohua'ipi de'oye pa'iyë ti cuasama'cohua'ipi cayere asaja'cohua'i a'ë, nuñerepa pa'ima'cohua'ipi coso paipi ye'yayerë.

³ Jaohua'ipi huejaye co'aji, caja'cohua'i a'ë, cui'ne aiñere ëseja'cohua'i a'ë, nuñerepa coca asacohua'ipi de'oji cajë Maija'quëre pëpajë sejë ai ja'ñere de'huase'ere.

⁴ Jaje pa'ina, si'aye Maija'quë de'huase'e de'oye a'ë. Jaje de'oyere maipi coeye co'aji. Jaje pa'ina, coa ai jerepa Maija'quëni de'oji cajë pëpajë itire pajë cui'ne aiñe de'oji.

⁵ Maija'quë cocapi cui'ne mai ite señepi de'oyerëpa necaiji.

Jesucristo De'o Jo'yaërepa Pa'iyë

⁶ Më'ëpi iyere Maija'quë do'ijëre ye'yaquë, cui'ne më'ëje Maija'quë pa'ire paji cuasayere ani huajëquë pa'i cui'ne më'ëre ye'yase'ere yo'oquë pa'ini, Jesucristo de'o jo'yaërepa pa'ija'quë a'ë, më'ë.

⁷ Jaje pa'ina, ti asacaima'ë pa'ijë'ë, iye yeja aipë coca huesëjë caye. Maija'quë co'amaña necaiyere pare yo'oquë ye'yejë'ë.

⁸ Më'ë tutu quë'i pa'ija'quë caquë ai cuasajë yo'oye a'ri maña coçaiye a'ë. Maija'quëre de'oyerëpa pa'iyë cato iye yeja pa'iyë, cui'ne jetyo'je pa'i ja'ñeje coçaiye a'ë.

⁹ Iye caye nuñere pa'ë. Jaje pa'ina, si'aohua'i asacaijë sehuoye pa'iji.

¹⁰ Jaje pa'ina, i co'amañare tuturepa yo'ojë nejë pa'iyë, Maija'quë huajëquëre pana quëco pajë, si'aohua'ire ite sehuocohua'ise'ere huasoquëna.

¹¹ Jaje pa'ina, iye cocare cuañequë ye'yaye pa'iji, më'ë.

¹² De'hua ñaquë pa'ijë'ë, më'ëre posëni co'aye cajë cue'cuejë. Jaje pa'ina, më'ë coca cayepi, më'ë yo'oyepi, paire oiyepi, Maija'quë pa'ire paji cuasayepi, cui'ne nuñerepa de'oyese'e yo'oquë pa'iyepi iñojë'ë, sehuosicohua'ire. Iohua'ije më'ë pa'iyëje pa'ija'cohua'ire.

¹³ Ja ye'ta'a yë'ë t'i'ama'në Maija'quë toya pëpëre si'a pai sehuosicohua'i asajëna, ñaquë quëajë'ë. Jaohua'ipi jerepa yëjë yo'o jujama'pë pa'ija'cohua'ire. Jaje ye'yajë'ë.

¹⁴ Maija'quëpi quëaquëna, sehuosicohua'i ëjaohua'i jëñapi më'ëna patojë seacaijëna, Maija'quëpi ta'ñe yo'o ja'ñeje isise'ere de'hua ñacai itire yo'ojë'ë.

¹⁵ Jaje pa'ina, iye de'o co'amañase'e yo'oquë pa'ijë'ë, de'oyere yo'oquëpi seña maca de'oquë pa'ina, si'ahua'i ñaja'cohua'ire.

¹⁶ Më'ë pa'iyë, cui'ne më'ë yecohua'ire ye'yaye de'hua ñaquë, si'aye ocue pa'i macarepa yo'oquë pa'ijë'ë. Jaje më'ëpi iyere yo'oquë co'ye huaso cuañoquëna, cui'ne më'ë caye asacohua'ije huaso cuañoja'cohua'i a'ë.

5

Sehuosicohua'i De'oye Yo'ojë Pa'iyë

¹ Aire tutu cama'ë pa'ijë'ë. Coa ai jerepa më'ë ja'quëre yëhuoyëje pa'ye caquë yëhuojë'ë. Posëohua'ini më'ë yo'je tsire yo'oyëje pa'ye yo'ojë'ë.

² Ai nomiohua'ini mē'ē ja'core de'oye yo'oyeje pa'ye yo'ojē'ē. Cui'ne nomi tsini mē'ē yo'je tsj nomiohua'ire cuasaquē yo'oyeje pa'ye yo'ojē'ē, co'aye cuasaye peoyepi.

³ Necaicohua'ire peocohua'ini hua'jeohua'ire cōcaijē'ē.

⁴ Jaje pa'iquēta'are hua'jeopi mamajēre cui'ne naje tsire paco pa'ito jaohua'ipi cōcaiyē pa'iji, iohua'ī tsēcāpē acore. Jaje yo'ojē pēca ja'quēohua'ire cui'ne necuēohua'ire saija'cohua'ī a'ē, ai de'huasi do'ī. Jaje cōcaiyere Maija'quē sihuaquē űaquē api.

⁵ Jaje pa'ina, cōcaicohua'ire peocopi te'o maca nēasicoa, hua'jeorepa. Jaje pa'ioipi Maija'quēpi cōcaija'quē api cuasaco mu'seña cui'ne űamiña seō pa'ico. Jaje seō pa'iconi cōcaiyē pa'iji, sehuosicohua'ipi.

⁶ Jaje pa'iquēta'are hua'jeopi si'aye io cāpē yēyere yo'orojaico cato tsoe ju'isicoa, huajēco pa'icota'a.

⁷ Iyere yo'ojē'ē caquē cuañejē'ē, nuñerepa de'oyese'e yo'ocohua'ī pa'ija'cohua'ire.

⁸ Jaje pa'ina, sehuosiquēpi i huē'e acohua'ī pa'iyere cuasama'ē, de'oye ñacaima'quē pani, sehuoma'quēre seña maca co'aquē pa'iyē pa'iji. Jaje pa'ī pani sehuosico a'ē ca t'ī'añe peoji.

⁹ Hua'jeohua'ire toya pēpēna toyaye pa'iji, sesenta ometēca pacopi cui'ne te'ire ējēre pasiconi.

¹⁰ De'oye yo'ocona, yecohua'ipi ñasiconi, mamajēre de'oye ai de'huasiconi, io huē'ena do'ī daicohua'ire de'oye pēpaco pa'isiconi, sehuosicohua'ire nēcañoa tsoacaisiconi, ai yo'ocohua'ire cōcaio pa'isiconi, jaje si'aye de'oyese'e nesi'ī cato yo'oco pa'isiconi, toyaye pa'iji.

¹¹ Nomi tsipi hua'jeohua'ī pa'ito toyama'ē pa'ijē'ē, hua'jeohua'ire toya pēpēna. Iohua'ī cāpē yēyepi pa'ina, huejañu'u cājē yo'ojē Cristore tuiyē jeoni,

¹² Iohua'ī necañu'u ca nēose'ere ne t'ī'ama'pē jai do'ī quē'iohua'ī de'ocohua'ī a'ē.

¹³ Cui'ne yequeje, huē'ña ñape cu'ijē josaohua'ī de'oni, cui'ne co'a coca cacohua'ī de'oni coa si'aye yo'ojē tī caye pa'ñe pa'yere carojaicohua'ī a'ē.

¹⁴ Jaje pa'ī do'ire nomi tsipi hua'jeohua'ī pani huejajajē cayē, huejani mamajēre pajē, huē'e ñacaicohua'ī pa'ijajē. Pa'ijjēna, huatijē cue'cuema'ē pa'ija'quēre.

¹⁵ Jaje pa'ina, yecohua'ī nomi tsj hua'jeohua'ipi Cristore tuiyē jeoni huati ējaēna pe'te huesēhuē.

¹⁶ Sehuosi nomioipi io tsēcāpē acohua'ini hua'jeohua'ire pani cōcaiyē pa'iji. Sehuosicohua'ipi cōcaija'cohua'ī a'ē cājē uteye peoye. Sehuosicohua'ī cato cōcaicohua'ire peocohua'ini cōcaicohua'ī a'ē.

¹⁷ Sehuosicohua'ī ējaohua'ire ai oiye pa'iji, sehuosicohua'ire de'oyerepa sacohua'ipi, cui'ne Maija'quē cocase'e quējajē de'oye ye'yacohua'ire.

¹⁸ Jaje pa'ina, Maija'quē toya pēpē caji: “Duruhequē yē'opo sēama'pē pa'ijjē'ē, ise'equē ai tsa'cujaquē.” Cui'ne yequeje caji: “Co'amaña nequēre sañe pa'iji, j yo'o do'ī.”

¹⁹ Sehuosicohua'ī ējaēre sañope co'aye caye pa'ito asama'ē pa'ijjē'ē, cayahua'ī panita'a toasocohua'ī j yo'ose'e ñacaicohua'ipi peoto.

²⁰ Ja yē'ta'api co'ayere yo'ojē pa'icohua'ireta'a yēhuo quēcojē'ē, si'aohua'ī ña hue'ñana. Yecohua'ijje jaje yo'oye co'aye a'ē cuasajē ca'raja'cohua'ire.

²¹ Cuañeñē, mē'ere, mai Diosu cui'ne mai Ējaē Jesucristo, cui'ne huññaohua'ī j sahuasico-hua'ī ña hue'ñana, iye cuañese'ere te'ohua'ise'ere yeque yo'oma'ē, si'aohua'ire si'a yē'quē macarepa yēhuojaquē caquē.

²² Jaje pa'ina, mē'ēpi yecohua'ire esarepa patoquē seccaiyē pajē'ē, iohua'ī co'aye yo'o do'ire sai cōñe pa'iji. De'oyerepa cuasani yo'ojē j aye co'ayere yo'oma'quērepa pa'ijjē'ē.

²³ Ētapē a'si ju'iquē sēte ocose'e ucuma'ē pa'ijjē'ē, o'sa cōnoje a'ri maña ucuñjē'ē, mē'ē ētapē cōcai ja'ñe.

²⁴ Yecohua'ī co'aye yo'oye si'a pai t'ñarepa ñaño pa'iji, ja yē'ta'a iohua'ī yo'ose'e ña de'hua hue'ña saima'ē. Yecohua'ī co'aye yo'oyere jeteyo'je dahuēre asaye pa'iji.

²⁵ Jaje cui'ne de'oye yo'oyeje yequere t'ñarepa ña cuañoñe pa'iji. Yequere ñama'pē pa'ise'ere jeteyo'je ñaño pa'iji. Si'anē yahuese'epi pa'ī carajañe peoji.

6

¹ Co'amaña necaija'cohua'ire jo'ya nesicohua'ī pani mēsaru ējaohua'ire ca'rajē ñajē'ē, jaohua'ipi co'aye Maija'quē mamire cui'ne j coca mai ye'yayere sañope cama'pē pa'ija'cohua'ire.

² Panita'a co'amaña necaija'cohua'ire jo'ya nesicohua'ipi sehuosicohua'ini ējaohua'ire pani jēoma'pē pa'ijjē'ē, sehuosicohua'ī a'ē cājē, ējaohua'ire ñajē paye. Maija'quēre sehuosicohua'ipi te'e Maija'quē do'ijēpi paire oicohua'ipi, co'amaña ne cuañoñe sēte jerepa de'oye necaiyē pa'iji. Jaje caquē iyere ye'yaquē quējajē'ē.

Pa'iyē Cui'ne Mai De'oye Cuasaye

³ Yequë paipi mai Ējaë Jesucristo ye'yase'eje pa'ye ye'yama'ë, cui'ne mai nuñerepa Maija'quëre sejë yo'oyeje pa'ye ye'yama'ë pani,

⁴ huesëquëpi ye'yaji, jerepa pa'i a'ë cuasaquëpi. Jaje pa'ipi ju'i dahuëje pa'ye paji, sañope ca éayere. Jaje pa'ina, japi si'aye co'ayere cuasaye huëoji: yecohua'i payere éa ñajë pëti éaye cuasaye, te'e cuasa ma'ñe co'acohua'i a'ë cajë te ju'iñe, coa cacohua'i a'ë cuasaye.

⁵ Jaje cuasacohua'ipi sa'ñe pëti coca ti jëoma'pë cajë pa'iyë, nuñe cuasama'cohua'i ja're, nuñerepa coca asa ti'ama'cohua'ipi, Maija'quëre sehuoni pa'iyë ye'yaye curi neñe a'ë cuasacohua'i ja're. Jaje uihuayë.

⁶ Jaje pa'iquëta'are, co'amaña pa'ina, cui'ne peoquëna, sihuaquë pa'iquëse'ere, Maija'quëre sehuoni pa'iyë ye'yaye, jaiye curi neñeje pa'ye pa'iji.

⁷ Mai iye yeja dai maca co'amaña peocohua'i daë'ë. Daisicohua'ipi cui'ne mai ju'i maca iye yejapi peocohua'i saija'cohua'i a'ë.

⁸ Jaje pa'ina, maipi ao maña cui'ne mai ju'i caña pani sihuajë pañu'u.

⁹ Jaje pa'iquëta'are jaiye curiquë pañu'u, cacohua'i cato jaiye do'i peoyere yëyena quëcoma'pë huati huaterë seisiconacacayë, johua'ire co'a de'huaquë, de'oye pa'ise'ere nejocaiyena, ti ne huesë hue'ñana sayena.

¹⁰ Jaje pa'ina, curiquë oiye cato si'aye co'aye cuasaye huëoye a'ë. Jaje yecohua'i jaiye curiquë yë do'ire Maija'quëre pa'ire paji cuasase'e jëoni ai yo'oyena ne huesëni ai yo'ojë pa'iyë.

De'oye Maija'quë Cocare Quëaye

¹¹ Jaje pa'iquëta'are Maija'quë jo'yaë sëte si'aye co'ayere coequëpi nuñerepa yo'oquë pa'ijë'ë, Maija'quëre necaiquëpi, pa'ire paji cuasaquëpi, paire oiquëpi, yo'o jujama'quëpi, cui'ne jerepa pa'i a'ë cuasa joyo peoquëpi.

¹² Ti pani huesëjaquë caquë Maija'quëpi më'ëre sahuani soipi. Soisiquëpi Maija'quë pa'iji, mësarucuasayere de'oyerepa quëahuë, jai pa'i asajëna. Jaje pa'ina, Maija'quë pa'iji cuasayepi de'oye yo'ojë'ë, ti pa'iyere pacohua'ipi.

¹³ Jaje pa'ina, Maija'quë si'a co'amaña pa'iyë isiquë cui'ne Jesucristo Poncio Pilatore de'oyerepa j pa'iyë quëcoquë iñosiquë ña hue'ñana cuañeñë, më'ëre.

¹⁴ Yëhuo quëcoyë peojaquë cani de'oye yë'ë më'ëre cuañese'e sehuocai yo'ojë'ë. Yeque ponani yo'oma'ë pa'ijë'ë, mai Ējaë Jesucristo dai macaja'a.

¹⁵ Iti yo'o maca ti'aëna, Maija'quëpi si'aye iyere ne de'hua saoja'quë api, te'i si'aye pa'irepa de'o Diusu tutu quë'ipi, cuañecohua'i mëñe Ējaëre papi, cui'ne ëjaohua'i mëñe Ējaëpi.

¹⁶ Jaë api, te'i ti ju'ima'quë, pai tsiojajima'tore mia hue'ñare pa'iquë, te'e pai macaje ñama'quë, cui'ne ña ti'añeje ti peoquë. j tse pa'ijaquë si'anëpi, Ējaërepa pa'iyë cui'ne j jerepa tutu quë'i pa'iyë! Jaje pa'ijaquë.

¹⁷ Cuañejë'ë, jaiye iye yeja co'amaña pacohua'ire, jerepa pa'iohua'i a'ë, cuasama'pë pa'ijajë, cui'ne johua'i co'amañana quëcoma'pë pa'ijajë. Jä cato coa carajaiñe a'ë, coa ai jerepa Maija'quëna quëcojë pa'ijajë, mai pa ja'ñere caquë coa si'aye jaiye isiquëna.

¹⁸ Cuañejë'ë, cui'ne de'o co'amañare yo'ojë jaiye de'oye yo'oyere, co'amañaje pa'ye paja'cohua'ire, pajë peocohua'ire cocajajë, johua'i co'amañapi.

¹⁹ Jaje yo'ojë, jaiye co'amaña tsi'so tujmëja'cohua'i a'ë, yequë mu'se ti pani huesëyere pa ja'ñere.

Timoteore Ca Tëjyë

²⁰ Timoteo de'hua ñaquë pa'ijë'ë, më'ëre de'oye yo'oja'quë api cuasa nëose'ere. Asama'ë pa'ijë'ë, iye yeja do'i peo coca, ta'ñe asayere pa'ë caye, coa cosoye a'ë.

²¹ Yecohua'i Maija'quëre pa'ire paji cuasacohua'ipi jare ta'ñe asayere pa'ë cajë yo'ojë, tsoe ne huesëhuë, tiñena.

Maija'quëpi mësarute necaina, de'oye pa'ijë'ë. Jaje pa'ija'quë.

2 TIMOTEO

Pablopi Toya Cose'e Timoteona

¹ Yë'ë, Pablo Maija'quë yë do'ipi Jesucristo jëjo saoquë pa'iyë, Cristo Jesuna tsoni pa'iyë t'i'añe ca nëose'ere quëaja'quëpi.

² Jaje pa'ina, toyayë, iye toya ja'hua yë'ë mamaquë Timoteona, yë'ë oiquëna. Diusu Maija'quëpi cui'ne Èjaë Jesucristopi ñacai teaye ñaquë cõcaina, ti se co'a ju'ima'pë de'oye pa'ijë'ë caquë.

Cristo Yo'ose'ere Quëaye

³ Mu'seña cui'ne ñamiña seña ñape më'ëre cuasani Maija'quëpi ñacaji, caquë pëpayë, ìte, de'oye cuasayere papi yë'ë necaiquëna, yë'ë aipë yo'ojë pa'ise'eje pa'ye.

⁴ Cui'ne huånëyema'ë si'anë cuasayë, yë'ë jëo saina, më'ë oi co etoquëna, ñase'ere. Jaje pa'ina, më'ëni ña huajë'ñe nëina, ai cuasaquë pa'iyë.

⁵ Jaje cuasayë, më'ëpi nuñerepa Maija'quë pa'iji cuasaquë yo'ose'ere ñasi do'ire. Jaje cui'ne du'ru macare pajë më'ë ñeco Leoidapi cui'ne më'ë ja'co Eunicepi Maija'quë pa'iji cuasacohua'ipi paë'ë. Jaje pa'ina, më'ëje cui'ne cuasaquë pa'iji caquë nuñerepa cayë.

⁶ Yë'ë jëtëpi më'ëna pato maca Maija'quëpi më'ë yo'oja'a tuture isipi. Jaje pa'ina, cuañëñë, më'ëre. Toa ja'jë tsëoñeje pa'ye yo'ojë'ë, ìtire.

⁷ Jaje pa'ina, Maija'quë ca'ra joyore isima'ë paj'i'i, maire. Coa ai jerepa tutu quë'i joyore paire oiyere cui'ne asare pajë de'oye pa'iyere isipi.

⁸ Jaje pa'ina, mai Èjaë Jesucristo do'ire quëacajjë'ë, huajëya'ye peoquëpi. Cui'ne i do'ire yë'ë tseã cuañosiquë pa'ina, ñani huajëya' coema'ë pa'ijë'ë. Coa ai jerepa huaso coca quëajë ai yo'oyere yë'ëje quëaquë pasi'i cuasajjë'ë, Maija'quë tutu isiyepi.

⁹ Jaje pa'ina, Maija'quëpi huasoni soipi, i ja're tsoni de'ocohua'irepa pa'ija'cohua'ini. Ja yë'ta'a yeja de'huama'në maire oji'i, Cristo Jesús necai ja'ñere caquë. Jaje pa'ina, i cuasase'ere yo'oquë huasopi, maire. Mai neñepi t'i'añe pahuë.

¹⁰ I tsoe cuasase'ere yureta'a Jesucristo dani jüni huesë tutu pa'ise'ere nejo maca, cui'ne huaso cocapi, ti ju'ima'pë pa'iyena necai maca, ñnopi.

¹¹ Iye coca quëaja'quëre ca nëosiquë a'ë. Jaje pa'ina, Jesús jëjo saoquë sëte quëaquë, ye'yaquë pa'iyë.

¹² Ja do'ire ai yo'oyë. Jaje ai yo'oquëta'a huajëya'ye peoquëpi yo'oyë, yë'ë quëcoquëre paye sëte. Jaje pa'ina, asayë, tutu quë'ipi yë'ëre de'oye ñacajja'quë api, i ca nëose'ere ne tëji mu'seja'a.

¹³ Yë'ë nuñerepa pa'yere ye'ya ñnose'eje pa'ye tuijë'ë. Cui'ne Jesucristo ja're tsoni pa'ijë paire oiyere, cui'ne Maija'quë pa'iji cuasajë pa'iyere pa'ijë'ë.

¹⁴ Maija'quë joyo maire pa'iquë cõcayepi de'hua ñacajjë'ë, de'oye ye'yayere Maija'quë nuñerepa cocare isise'ere necajja'quë api caquë.

¹⁵ Tsoe më'ëpi asayë, si'aohua'i Asia yeja pa'icohua'i yë'ëre jëcojëna, cui'ne jaohua'i ja're cõni Figelo cui'ne Hermogenes jëose'e.

¹⁶ Onesíforo tsëcapëre mai Èjaëpi oi teaye ñaquë cõcajjaquë. Cosiquë yë'ë pa'ina, jaohua'ipi huajëya'ye cosiquëni yo'oma'quëpi cama'ë sihua ëaye jaiye de'oye yo'o huasopi, yë'ëre.

¹⁷ Jaje yo'oquëpi Roma t'i'asi maca co'e jujani jeoma'ë co'equë t'i'api, yë'ëre.

¹⁸ Jaje pa'ina, mai Èjaëpi ja mu'serepa oi teaye ñacajjaquë Onesíforore. Më'ë ñaquëna, maire Efeso pa'i maca, cõcaise'eje pa'ye cõcaji'i. Jare më'ëpi tsoe asayë.

2

De'o Jesucristo Soldado

¹ Yë'ë mamaquë më'ë cato Cristo Jesús isi tutupi pa'ijë'ë. Jaje pa'i,

² yë'ë jai paire quëaquëna, më'ë asase'ere ne t'i'acohua'ire pana, ta'ñe de'oye yecohua'ire se ye'yaja'cohua'irepa ña cuañocohua'ina cuañe nëojë'ë, ye'yaja'cohua'ire.

³ Më'ë yë'ë ai yo'oyeje pa'itoje quëcojë'ë, Jesucristo de'o soldado sëte.

⁴ Ti te'ije soldadopi soldado peocohua'i yo'oyere cui'na yo'oma'quë api, jare i ëjaërepa cuañese'e de'oyerepa sehuoja'quë caquë.

⁵ Jaje cui'ne ca'a yo'oquëpi ca'a yo'ocohua'ire cuañese'ere yo'oma'ë pani ca nëosi co'amaña ñne peoji.

⁶ Tsio nequë cato i pa ja'ñere du'ru tëaquë api, ja yë'ta'a yecohua'i pajëna.

⁷ Iye yë'ë case'ere cuasaquëna, mai Èjaëpi cõcaina, si'aye asa t'i'añe pa'iji.

⁸ Huañeyema'ë pa'ijë'ë, Jesucristore ju'isiquëpi huëisiquëre David tsëcapë aquëre. Yë'ë jaë ayere huaso coca quëayë.

⁹ Iye de'o coca quëa do'ire ai yo'onije quëcoquë quëayë, paire huani jeoquëre sëayeje quëna meapi sëasiquë pa'inije. Jaje yë'ë pa'iquëta'are de'o coca cato quëna meapi sëa ma'ñe a'ë.

¹⁰ Jaje pa'ina, Cristo Jesuna tsioni pa'ijë Maija'quë sahuasicohua'ipi huasosicohua'i pa'ijë de'oyere pare ti pa'iyere ti'ajajë caquë si'aye ai yo'onije quëcoyë.

¹¹ Iye nuñerepa caye a'ë.

Maipi Cristo ja're ju'isicohua'i pani j ja're çoni pa'ija'cohua'i a'ë.

¹² Ai yo'onije çucue pa'i macarepa ite tuisicohua'i pani j ja're çoni cuañeja'cohua'i a'ë.

Ite ñama'cohua'i a'ë casicohua'i cato ije ñama'quë a'ë caja'quë api.

¹³ Mai cato yo'o jujacohua'i a'ë. Jaje pa'iquëta'are j cato yo'o jujama'quë api.

J case'eje ne ti'aquë api. ¿Me neni j ca neose'e necaima'ë pa'iquë'ni?

Co'amaña Nequërepa Pa'iyë

¹⁴ Iyere huañeyema'ë quëa sëtoquë cuañejë'ë. Sa'ñe cama'pë pa'ijajë do'i peo cocare, ca huëoni. Ja sañope caye ti çocai ma'ñe a'ë. Coa ai jerepa yecohua'i de asacohua'ini co'aye neñe a'ë.

¹⁵ Jaje pa'ina, më'ë cato co'amaña nequërepa ca'raye peoquëre paje pa'i pasi'i caquë, de'oyerepa Maija'quëre iñosi'i caquë, Maija'quë cocare nuñerepa ye'yajë'ë, tayoye peoyerepa si'aye më'ë ai cuasaye ja'ye yo'oquë.

¹⁶ Jaje pa'ipi iye yeja do'i peo cocare cama'ë pa'ijë'ë. Jaje cacohua'i cato jero sa'na ai jerepa co'ayena ne huesëyë.

¹⁷ Jaje ne huesëcohua'i ye'yapi ai a'sio jai saiyeje pa'ye yo'oji. Jaje Himeneo cui'ne Fileto ye'yayë,

¹⁸ nuñerepa cocare tayo saicohua'ipi ju'isicohua'i huëiye tsoe tëto saji'i cajë. Jaje cajë nuñerepa de'oye asacohua'ire ca co'me huesojë yo'oyë.

¹⁹ Jaje caye pa'itoje Maija'quë nesico quëna pëje pa'io jëaco ñu'cuema'cona toyasico pa'iji, ñeje: "Ëjaëre papi ñaji, i tsecohua'ire." Cui'ne yequeje çaji: "Si'aohua'i Cristo pa'i a'ë cacohua'i cato co'aye yo'oyere jeocosicohua'i pa'iyë."

²⁰ Jai huë'e sa'nahuëre së'ño curiquëpi cui'ne po curiquëpi de'huasi co'amañase'e pa'ima'coa. Pa'icoa, cui'ne soquë cui'ne ya'o de'huasi co'amañaje. Ja yeque de'oyerepa cato ëjare pase'e ne ja'ñepi pa'iji. Cui'ne yequepi si'a co'amaña coa nerojai ja'ñepi pa'iji, ya'opi, cui'ne soquëpi de'huase'e cato.

²¹ Ëjaëre pana isisiquëpi ëjare pase'e yo'oja'quë pasi'i cani si'aye co'ayere yo'oma'quërepa pa'iyë pa'iji. Jaje pa'ipi de'o co'amañare pase'e neñe pa'iji.

²² Posëohua'i co'aye yëyere catijë'ë. Catini nuñerepa pa'ijë'ë, Maija'quë pa'iji cuasayere, paire oiyere cui'ne jo'cua de'oye si'aohua'i ja're pa'iyere. Jaje pa'ipi de'o joñoare papi mai Ëjaëre tsecohua'i ja're çoni pa'ijë'ë.

²³ Cui'ne huesëcohua'ipi, ye'yema'cohua'ipi sa'ñe cajëna, asaquë johua'i ja're çoni cama'ë pa'ijë'ë, më'ëpi tsoe asaquë. Ja cato pëti ëayena saye.

²⁴ Mai Ëjaërepa jo'yaë cato sa'ñe pëti cocare caquë uihuaquë pa'iyë peoji. Jare yo'oma'ë si'aohua'ire de'oye yo'oquë pa'iyë pa'iji, de'oye ye'yaquëpi tayocohua'ire quëcoquë de'oye yo'oquëpi.

²⁵ Sañope co'aye cacohua'ire joyore papi oi quëa nu'ñequëpi jerepa pa'i a'ë, cuasama'quëpi Maija'quëpi çocaina, ja'në yo'ose'e jeoni Maija'quëna ponëni nuñerepa cocare asaja'cohua'i a'ë cuasaquëpi.

²⁶ Cui'ne huati tseani j yëye yo'oja'cohua'i a'ë caquë paçohua'ipi de'hue ña sëtani jëaja'cohua'i a'ë, caquë utequë pa'iyë pa'iji.

3

Pa'i Tëji Mu'seña Yo'oye

¹ Tëji mu'seña co'a mu'seña pa'ija'coa. Jare më'ë asaye pa'iji.

² Ja mu'seña pa'i cato curi ai oicohua'ipi cui'ne co'ye de'oye pa'iyese'e cuasacohua'i pa'ija'cohua'i a'ë, jerepa pa'i a'ë cuasacohua'ipi. Cui'ne yë'ëpi jerepa de'oye yo'oquë a'ë cajë co'ye johua'ija'a sihuacohua'i pa'ija'cohua'i a'ë. Jaje pa'iohua'ipi Maija'quëni sañope caja'cohua'i a'ë. Pëca ja'quëohua'ire sehuocaima'cohua'ipi pa'ija'cohua'i a'ë. Nesi do'ire pëpa toma'cohua'i pa'ija'cohua'i a'ë. Cui'ne Maija'quëre sehuoyere ti oima'cohua'ipi pa'ija'cohua'i a'ë.

³ Paire oima'cohua'i cui'ne ai yo'ocohua'ire ñani ti çocaima'cohua'i pa'ija'cohua'i a'ë. Co'a cocaohua'i pa'ija'cohua'i a'ë. Cui'ne johua'i yëye quëco ti'ama'cohua'i pa'ija'cohua'i a'ë. Ti oiye peoyerepa yo'ocohua'ipi si'aye de'oyere ai sañope yo'ocohua'i pa'ija'cohua'i a'ë.

⁴ Cajeohua'i cayeje pa'ye cajë cosocohua'i pa'ija'cohua'i a'ë, cui'ne ti ja'rujaima'cohua'i pa'ija'cohua'i a'ë. Yë'ë jerepa pa'i a'ë cajë co'ye sihuacohua'i pa'ija'cohua'i a'ë. Cui'ne Maija'quëni coe'jë coa jöhua'i yëyese'e co'eja'cohua'i a'ë.

⁵ Maija'quëre sehuosicohua'i yo'oyeje pa'ye yo'ojëta'a coa caja'cohua'i a'ë, nuñerepa Maija'quëre sehuosicohua'i pa'i tutu peocohua'ipi.

Jaje pa'iohua'ire tsioma'ë pa'ijë'ë.

⁶ Jaje yo'ocohua'i acohua'ipi, nomiohua'i co'ayena timësicohua'ipi coa si'aye yëcohua'i pa'i huë'ñana cacarojajë cajeohua'i de'ojëna, tutu peocohua'ipi, si'aye jöhua'i yëyere necaija'cohua'i a'ë.

⁷ Si'anë ye'yëjëta'a ja nomiohua'i ti nuñerepa pa'yere asa ti'ama'pë pa'ija'cohua'i a'ë.

⁸ Tsoe huë'ña caya dahuëohua'i Janes cui'ne Jambre sañope Moisésre yo'oa'huë'ë. Jaje cui'ne jaohua'ije sañope yo'oja'cohua'i a'ë, nuñerepa cocare, co'ayese'e cuasa ëmëohua'i de'osicohua'ipi, Maija'quë pa'iji cuasayere ne huesocohua'ipi.

⁹ Jaje pa'iquëta'are si'a pai jöhua'i yo'oye asa ti'ani huesëohua'ipi yo'oyë, cajë sehuoma'pëna. Ai jerepa yo'oma'pë pa'ija'cohua'i a'ë, Moisésre caya ëmëohua'i sañope yo'o jujajë pa'ise'eje yo'oja'cohua'ipi.

Tëjyerepa Pablo Timoteore Cuañese'e

¹⁰ Jaje pa'iquëta'are më'ë cato yë'ë ye'ya iñose'ere, yo'oquë pa'iyë, yë'ë pa'ise'ere, yë'ë nesi'i cuasase'ere, Maija'quë pa'iji cuasase'ere, yë'ë paire oise'ere, yë'ë quëcose'ere, sañope yo'oye pa'itoje,

¹¹ cui'ne yecohua'i josa yo'ojëna, ai yo'onije yë'ë quëcose'ere. Cui'ne më'ëpi asayë, jeto Antioquia, Iconia cui'ne Listra daripëa pa'i maca josa yo'ojëna, ai yo'oquëna, Ejaëpi si'aye jare nejocani de'oye pa'iyë isise'e.

¹² Nuñerepa cayë, si'aohua'i Jesús ja're tsioni pa'iyë yëcohua'i cato jaje ai yo'oja'cohua'i a'ë, yecohua'ipi josa yo'ojëna.

¹³ Jaje pa'iquëta'are, co'acohua'i cui'ne cosocohua'i cato jero sa'na ai co'ayere yo'ojë yecohua'ire cosocohua'i pa'ija'cohua'i a'ë, coso cuañosicohua'ipi pa'ijë.

¹⁴ Jaje pa'iquëta'are si'aye më'ë iye a'ë, itirepa caquë asa huesëse'ere ocue pa'i macarepa yo'oquë pa'ijë'ë. Më'ëpi asayë, më'ëre ye'yasicohua'ire.

¹⁵ Cuasajë'ë, cui'ne më'ë cato tsihua'ë pa'inëna Maija'quë toya pëpë caye asaquë a'ë. Më'ëre japi de'oye yo'oquëre ye'yaquë cui'ne huasosiquë pa'iyena saye pa'iji, Cristo Jesuni pa'iji cuasa do'ipi.

¹⁶ Si'a toya pëpë Maija'quëpi quëaquëna, toyasicoa. Jaje pa'ina, Maija'quë cocapi de'oye a'ë, paire ye'yaye, yëhuo quëcoye tayo yo'ocohua'ire, quëa nu'ñeña cui'ne nuñerepa pa'iyena ye'yaye.

¹⁷ Jaje pa'ina, cui'ne Maija'quë coca sehuoquëpi si'aye ai ye'yesiquëpi de'oyese'e nequë pa'ija'quë api.

4

¹ Pai ëjaëje pa'irepa dani ju'isicohua'ire cui'ne huajëcohua'ire pai ñape yo'ose'eje caja'quë Jesucristo cui'ne Diusu ña huë'ñana cuañëñë, më'ëre,

² Maija'quë cocare quëajë'ë caquë. Pai'ipi yëjë asa maca cui'ne pai'ipi asaye coe macaje, ai cuañëquë quëajë'ë, më'ë caye asacaija'cohua'ire. Tayocohua'ire yo'o ma'ñe a'ë caquë yëhuojë'ë. Quëcoquë ye'yajë'ë, yo'o jujama'ë.

³ Nuñerepa cocare pai asaye coe mu'seña ti'aja'coa. Jöhua'i yëyeje pa'iyë ye'yacohua'ini co'eje asaja'cohua'i a'ë.

⁴ Nuñerepa cocare jetyo'jena oani, si'aye pai cayere itire pa'ë cajë asaja'cohua'i a'ë.

⁵ Jaje pa'iquëta'are më'ë cato si'anë më'ë pa'iyere ñare paquë de'oyese'e pa'ijë'ë. Ai yo'oye pa'ito quëcojë'ë. Huaso cocare quëaquë pa'ijë'ë, më'ë nesi'i cuasase'ere si'a yë'quë maca nequë.

⁶ Yë'ë cato Maija'quëna yë'ë capë isisiquëpi pa'iyë. Yë'ë ju'ija mu'se ja'yere pa'iji.

⁷ De'oyepi uihuaquë huë'huë ti'ahuë, tëji du'rure pana, Maija'quë pa'iji cuasayere yo'o jujama'ë.

⁸ Jaje pa'ina, yure cato yë'ëre de'oyerepa pa'iyepi uteji maroje pa'io'ipi, ja mu'serepa Ejaë Jesucristo pai yo'ose'e nuñerepa ca de'huaquëpi isi ja'ñepi. Yë'ëse'ere isiye paja'quë api, si'aohua'ire i co'i coñe ai yëjë utejë pa'icohua'ireje isija'quë api.

Timoteore Quëaye

⁹ Esa dani yë'ëre ñañere caquë yo'ojë'ë.

¹⁰ Demaspi iye yeja co'amañare ai yë do'ire yë'ëre jecoconi saji'i, Tesalónica. Crecentepi Galacia yejana saji'i. Cui'ne Titopi Dalmaciana saji'i.

¹¹ Satena, Lucase'e yè'è ja're çoni pa'iji. Jaje pa'ina, mè'èpi dai Marcote co'eni dajè'è. Jaèpi de'hue yè'è co'amaña yo'oye çocaija'quère.

¹² Cui'ne Tíquico çoni Efeso daripèna jèjo saohuè.

¹³ Mè'èpi dai dacaijè'è, yè'è dèi ju'i ca Troas daripèna Carpo huè'ena jèjo daisicore. Toya pèpèa cui'ne ca'nina toyase'eje dacaijè'è, jare ai cuasayè.

¹⁴ Alejandro, quèna de'huaèpi ai co'aye yo'opi, yè'ère. Ja do'ire Èjaèpi i yo'ose'eje pa'ye saija'què api.

¹⁵ Jaè cato Maija'què cocare, mai quèayere ai sañope yo'oquè api. Jaje pa'ina, ite de'hua ñajè'è, mè'èreje co'aye yo'oquè.

¹⁶ Èjaohua'i ña hue'ñana yè'ère sañope cayere quèa maca ti te'i macaje çocaiye papi. Pajè si'aohua'i yè'ère jèoconi saè'è. Jaohua'i yo'ose'e Maija'quèpi saima'è pa'ijaquè cuasaquè señè.

¹⁷ Jaje pa'iquèta'are mai Èjaèpi yè'è ja're pa'i si'aohua'i judío peocohua'ije i huaso cocare yè'èpi quèaquèna, asaja'cohua'i a'è caquè yè'ère çocai i tuture isipi. Isi maca quèacaè'è, i coca. Jaje jai yai yè'opona satira'siquèni Èjaèpi huasopi, yè'ère.

¹⁸ Jaje cui'ne ñacaija'què api, si'aye co'aye yè'ère nesi'i cayeje. Jaje ñacai paquèpi i cuañe te'tena yè'ère de'huaaja'què api. De'oquère pa'ni, Maija'què. Jaje pa'ijaquè.

Pèpa Tèjijere, Cui'ne De'oye Pa'i Ja'ñere Çocaiye

¹⁹ Pèpayè, Priscare, Aquilare cui'ne Onesíforo tsècapère.

²⁰ Erasto, Corintona pèapi, cui'ne Trófimoni ju'ina, Miletona jèjo daè'è.

²¹ Ja yè'ta'a oco tècahuè ti'ama'nè ai cuasaquè daijè'è, mè'èpi. Pèpayè, Eubulo, Pudente, Lino, Claudia, cui'ne si'aohua'i mai Èjaè do'ijèjeje.

²² Èjaè Jesucristopi mè'è ja're çoni pa'ijaquè Diusupi si'aohua'ire mèsarute, de'oye necaina, pa'ijè'è.

TITO

Pablopi, Titona Toyase'e

¹ Yé'è Pablo, Maija'quère quèacaiquè a'è, Jesucristo jèjo daoquèpi. Maija'què j tsecohua'i pa'ija'cohua'ire ña nèosicohua'ire quèaquèna, asani Maija'què pa'iji cajè mai sehuoyere nuñere pare sehuoni ti pani hueséyere utejè pa'ija'cohua'i a'è caquè jèjo daopi, yé'ère.

² Jaje pa'ina, Maija'què ti cosoma'quèpi ja pa'i ja'ñere ca nèoa'ji'i, yeja ja pa'i huèoma'nè.

³ Maija'què maire huasoquèpi, yé'èpi de'hue quèacaija'què api caquè nesiquèpi yé'è quèaquèna, j cocare yure iñopi, maire j cuasa nèosi maca ti'aèna.

⁴ Yé'è cui'ne mè'è te'e Maija'quère pa'iji cuasa do'ire yé'è mamaquère pa'è, Tito mè'è. Ja do'ire iye toya ja'huaana toyaquè cayè. Diusu Maija'quèpi cui'ne Jesucristo mamire huasoquèpi de'oye necaijèna, ai yo'oye peoye jo'cua pa'ijè'è.

Tito Neñe

⁵ Creta saodohuèna mè'ère jèo dai maca jèo daè'è, ne jujase'ere mè'èpi ne de'hua saoja'què cui'ne pai daripèa ñape sehuosicohua'i èjaohua'ire neja'què caquè, yé'è cuañese'eje pa'ye.

⁶ Tayo yo'oquèna, ca quècoye peoquèrepa pa'ye pa'iji, sehuosicohua'i èjaè. Nèjore te'ore paquèpi cui'ne mamajère sehuosicohua'ire paquèpi, cui'ne co'aye yo'oma'cohua'ire de'oye sehuocohua'ire paquèpi pa'ye pa'iji.

⁷ Sehuosicohua'i èjaè cato Maija'què co'amañere de'oyerepa ñacaija'quèpi pa'iji. Jaje pa'i do'ire nuñerepa de'oye pa'ye pa'iji. Ai jerepa pa'i a'è cuasama'quèpi, jèaquè teni yo'oma'quèpi, çono cuedpema'quèpi, huaajo yèma'quèpi, cui'ne curiquè ai yè coa cosoquè nema'quèpi pa'ye pa'iji.

⁸ Coa ai jerepa de'oye yo'oquè pa'ye pa'iji, j huè'ena daicohua'i pa'ito si'anè de'oye pèpaquèpi, de'oye yo'oye yèquèpi, de'oye cui'ne co'aye pa'ito ta'ñe asaquè yo'oquèpi, nuñerepa yo'oquèpi, Maija'quèna j pa'ye isisiquèpi, cui'ne j pa'yere co'ye ñaquèpi pa'ye pa'iji.

⁹ Cui'ne nuñerepa coca ye'yase'ena tsiojaisiquèpi yecohua'i yo'o jujahuè cuasacohua'ire jerepa yéjè yo'o ja'ñena cocaiye pa'iji, de'o cocapi ye'yajè, cui'ne sañope cacohua'ireje quèa ti'añe pa'iji, asaja'cohua'ire mai pa'ye.

¹⁰ Jai pai pa'iyè, hua saiscocohua'ipi maire sañope cacohua'i, ca'ni tèaye pa'iji cajè cuañecohua'i. Jaohua'ipi do'i peo cocapi cajè paire cosoyè.

¹¹ Jaje cosocohua'ire ai èseye pa'iji, ye'yama'pè pa'ija'cohua'ire, coa curiquère neñu'u cajè johua'i tayo ye'yayepi jai tsècapèa pa'icohua'ire si'aohua'ire ti'ne yo'oyena ye'yacohua'ire.

¹² Jare iti saodohuè Creta aquèpi, yequè mu'seña pa'i ja'ñe quèaquèpi, j cajeohua'ire capi: "Creta pai cato si'anè coa cosocohua'i a'è, airo pai a'è, jai aohua'i a'è cui'ne josaohua'i a'è."

¹³ Jaje cani nuñerepa capi. Jaje pa'i do'ire mè'èpi jaohua'ire tuturepa yèhuoquè quèajè'è, nuñe pa'iohua'ipi Maija'quère pa'iji cuasajè pa'ija'cohua'ire.

¹⁴ Jaje pa'ijè judío pai coa huèoni ca cocare asama'pè cui'ne nuñerepa cocare coejè jèosicohua'i cuañeñere sehuoma'pè pa'ija'cohua'ire.

¹⁵ De'oye cuasajè pa'icohua'ire cato si'a co'amaña de'oyese'e pa'iji. Jaje pa'iquèta'are èa joyo hue'ecohua'ire, cui'ne de'oye cuasama'cohua'ire cato ti peoji de'oye cuasaye, si'a johua'i cuasaye cui'ne johua'ire neñe quèa joyoyè si'sise'e pa'i do'ire.

¹⁶ Jaje pa'iohua'ipi Maija'quère sehuoyè cayè. Cajèta'are johua'i yo'oyepi nuñerepa yo'oye peoji. Jaje pa'ina, yecohua'ire coejè ñacohua'i pa'iyè. Hua saiscocohua'i pa'iyè, cui'ne te'o macareje de'oye yo'o ti'ama'cohua'i pa'iyè.

2

Ai De'oye Pa'iyere Ye'yaye

¹ Mè'è ye'yayeje si'anè Maija'què coca cayeye pa'ye pa'ijaquè.

² Aiohua'ije sa tèto saipe yo'oma'cohua'i pa'ijajè, yecohua'ipi èjaohua'ire ñajèna, pa'ijajè de'oye, cui'ne co'aye ta'ñe asacohua'ipi, Maija'què pa'iji cuasacohua'ipi, paire oicohua'ipi, cui'ne yo'o jujama'cohua'ipi pa'ijajè quèajè'è.

³ Jaje cui'ne ai nomiohua'ije yecohua'ipi èjaohua'ire ñajèna, pa'ijajè, co'a cocare asani yecohua'ina se quèama'cohua'ipi, çono cuedpema'cohua'ipi, coa ai jerepa de'oye ye'yacohua'i pa'ijajè yèhuojè'è.

⁴ Nomi tsj huejasicohua'ire èjère oiye cui'ne mamajère de'oye ñajè paye ye'yajajè.

⁵ Jaje pani iñojèna, nomi tsipi ye'yajè co'aye cui'ne de'oye ta'ñe asajè nuñe pa'icohua'ipi, huè'e co'amaña de'oye pacohua'ipi, paire oicohua'ipi, èjè cuañeñe de'oye sehuocohua'ipi

pa'ijajë. Jaje pa'ijëna, yecohua'ijë Maija'quë cocare cue'cueye paja'cohua'ire caquë yëhuojë'ë.

⁶ Jaje cui'ne pqsëohua'ireje yëhuojë'ë, si'anëpi ìohua'i yëyere meñe quëco tì'acohua'i pa'ijajë'cohua'ire.

⁷ Jaje pa'ina, më'ëpi si'aye de'oye pani ìnojë'ë, jaohua'ire. Ye'yaquë pani nuñerepa caquë de'oyere papi ye'yajë'ë,

⁸ sañope caye peoyere papi. Jaje nuñere pare caquëna, sañope caye pacohua'ipi asajë quëquëni maire sañope co'aye caye paja'cohua' a'ë.

⁹ Co'amaña necaìcohua'ire yëhuojë'ë, sañope tutu sehuocohua'i pa'ima'pë pa'ijajë ìohua'i ëjaohua'ire, coa ai jerepa oijë de'oye sehuojë necaìcohua'i pa'ijajë caquë.

¹⁰ Cui'ne maire huasoquë Diusu coca ye'yayere si'aohua'i de'oyere pa'ni cajë ñaja'cohua'ire, yahue co'amaña imama'pë pa'ijajë, mai pa'yiyere ñani, nuiñerepa yo'ocohua'i a'ë cuasaja'cohua'ire.

¹¹ Maire oiyë Diusu ìnose'ëpi, japi si'a paire huasoye pa'iji.

¹² Jaje pa'ina, japi maire ye'yaji, co'ayere yo'oma'pë nuñese'e yo'ojë Maija'quëre necaiyere. Cui'ne iye yeja pa'i maca ti jëocoyere ye'yaji, co'aye mai yëyere.

¹³ Cui'ne japi ye'yaji, mai Diusu, maire huasoquë Jesucristo dai mu'sere ì ca nëose'ere utejë pa'yiyere.

¹⁴ Jaje pa'ina, mai do'ire jucacaji'i, co'ayere pa'ìcohua'ini huasosi'i caquë, co'ayere pa'isìcohua'ini tsoa tóni ì paire pare pasi'i, de'o co'amañase'e yëcohua'ire caquë, yo'opi.

¹⁵ Jaje pa'ina, si'aye iyere më'ë ye'yaye pa'iji, quëa sëtöquë, cui'ne yëhuo ñu'ñequë, Ëjaërepa cuañequë tutupi, yecohua'ipi më'ëre cue'cueye paja'cohua'ire.

3

Sehuosìcohua'i Yo'oye

¹ Pai ëjaohua'ire, cui'ne paire cuañe tutu pacohua'ire, de'oye ìohua'i cuañeñe sehuojë pa'ijajë, cui'ne de'o co'amañase'e neñe yëcohua'ipi pa'ijajë caquë quëajë'ë.

² Cui'ne yecohua'ire co'acohua' a'ë cama'cohua'ipi, uihuaye yëma'cohua'ipi, de'oye paire yo'ocohua'ipi, cui'ne joyore papi teaye pa'ìohua'i pa'yiyere ìnojë, si'aohua'ire de'oye yo'ojajë caquë.

³ Jal'ne maije huesëcohua'ipi Maija'quë caye sehuocaima'cohua'ipi, ne huesëìcohua'ipi paë'ë. Pa'ijë coa si'aye mai yëye yo'ocohua'ipi tsega cuañosìcohua'ipi paë'ë, co'ayena. Jaje co'ayere pa'ijë yecohua' co'amañare ëa ñajë pëìcohua'ipi, cui'ne paire oima'cohua'ipi, sa'ñe coecohua'ipi paë'ë.

⁴ Jaje pa'ijëna, mai Diusu, maire huasoquëpi si'a paire de'oye necaiyere cui'ne paire oiyere ñno maca,

⁵ ja maca huasopi, maire. Maipi de'oye yo'osi do'ire huasoye papi. Coa ìpi oi teaye ñani huasopi. Jaje huasoquë co'ayere tsoa toquë, huajë paire nepi. Nequë Maija'quë joyopi huajëye pa'iyë jsiipi.

⁶ Cui'ne mai Ëjaë Jesucristo maire huasoquë do'ipi jaiye jsiipi, ì de'o joyore.

⁷ Maipi co'acohua' pa'isìcohua'ipi ì oi do'ipi de'ocohua' pa'ijë ti pani huesëyere mai utejë pa'yiyere pajajë caquë.

⁸ Iye coca nuñere pa'ë. Jaje pa'ina, më'ëre cuañeñë. Iyere ai si'anë cuañequë quëajë'ë, Maija'quëre sehuocohua'ipi asajë de'oyese'e nejë pa'ijajë'cohua'ire. Iye coca si'a paire cçaiye a'ë, cui'ne de'oye a'ë.

⁹ Jaje pa'ina, huesëohua'ì cayere aipë cocare cui'ne cuañese'e caye ayere ca huëoni yë'ose'e cajë uihuayere, yo'oma'pë pa'ijë'ë.

¹⁰ Sehuosìcohua'ire te'e pa'iyë pajë'ë caquë huahuequë yo'oquë pa'ito soini yëhuojë'ë. Te'e panita'a cayayerepa yëhuorena, asama'ë pa'ito eto saojë'ë.

¹¹ Eto saoni nuñe cuasama' do'ire ne huesësiquërepa pa'iji, ì co'aye yo'oyepi nejoquëna, cuasajë'ë.

Pai Ñape Yo'o Jaj'ne Quëaye

¹² Artemasni panita'a Tiqiconi më'ëre ñaja'quëre jëjo saosi maca esa daijë'ë, Nicópolisna yë'ëre tì'ani ñasi'ì caquë. Jaron a oco tëcahuë pëasi'ì cuasa nëohuë.

¹³ De'oye cçaijë'ë, pai yo'oye asaquë ne de'huaquëre Zenasre cui'ne Apolosre, si'aye caraye peoquëna, ai yo'oma'pë so'o saijajë'cohua'ire.

¹⁴ Jaje yo'ocquëna, mai tsecohua'ijë de'oye yo'oyere ye'yējajë, peocohua'ì ai yo'ocohua'ire cçaiye. Ye'yējë yo'ojë de'oye yo'o pai pa'ijajë caquë.

Tëjyerepa Pëpaquë De'oye Pa'ijë'ë Case'e

¹⁵ Si'aohua'i yě'è ja're çoni pa'icohua'i mē'ère pēpayē. Jaje cui'ne jaro pa'icohua'ire si'aohua'ire pēpacaijē'è, cajeohua'ire Maija'quère pa'iji cuasacohua'ire. Maija'quēpi ñacaiyepi si'aohua'ire mēsarute pa'ijaquē. Jaje pa'ijaquē.

FILEMÓN

Pablopi Filemónna Toyapi

¹ Cristo Jesús do'ire yé'ë Pablo tseá cuañosiquè pa'iquèpi Maija'què do'iquè, Timoteo ja're cõni toyayè, iye toya ja'hua, mè'ëna Filemón yèquè oiquèpi te'e co'amañare nequèna.

² Cui'ne mè'ë hu'ëna sehuosicohua'i tsi'sisicohua'ireje cajè toyayè. Cui'ne Maija'què do'ico Apiareje cui'ne Arquipore cajè toyayè, te'e yèquè yo'oyeje pa'ye tutu yo'oquèreje.

³ Maija'què Diosupi cui'ne Jesucristopi ñacaina, ai yo'oye peoquèna, jo'cua, de'oye pa'ijajè.

Paire Oiyè, Cui'ne Maija'què Pa'iji, Filemón Cuasaye

⁴⁻⁵ Maija'quère sehuocohua'ire mè'ë ai oiyere cui'ne Jesure necaiquère pare cuasayere yecohua'ipi quèajèna, asaquèpi yé'ë Maija'quère seña ñape si'anè mè'ë pa'iyere cuasaquè de'oji caquè pèpayè, ìte se maca.

⁶ Jaje pa'ina, mè'èpi yèquè cuasayeje pa'ye Maija'què pa'ire paji cuasaquèpi Cristo ja're pa'ijè, jaiye de'oye yo'oye payere nuñerepa asa tì'ajaquè caquè seccaiyè.

⁷ Cui'ne ai sihuayè, mè'ë Maija'què do'iquèpi paire oiquèpi, sehuosicohua'ire cõcaina, ai oima'pè pa'ijèna, asa huajèquè.

Pablopi Cacaìye Onésimo Pa'iyere Caquè

⁸ Cristo jèjo daoquè a'è caquè mè'ë yo'o ja'ñere cuañe tutu paquèta'a,

⁹ yé'ë Pablo ai huñoupi Cristo Jesús do'ire tseá cuañosiquè pa'iquèpi paire oiyere papi seña yèyè, mè'ère.

¹⁰ Ìño co sitore pa'i quèaquèna, asani Onésimopi sehuoni yé'ë mamaquèje pa'i de'osiquèni caquè seña, mè'ère.

¹¹ Ja'nè tsoe Onésimo jo'yaè pa'i maca coa pa'iquè paji'i, yure cato necaiquère papi, mè'ère cui'ne yé'èreje.

¹² Jaje pa'ina, yé'èpi tì'acquèna, sihuayeje pa'ye ìte sihuajè'è, cui'naèni mè'ë què'rona jèjo saoyè, yure.

¹³ De'o coca quèa do'ire tseasiquè pa'ina, yé'ère mè'ë cõcaira'si sa'rore, pèani cõcaijaquè cara'huè.

¹⁴ Jaje ca'ñe pa'ita'a pañè, mè'èpi de'oji cuasama'èna yo'oyere coequè. Mè'ë yé'ère cõcaiyepi mè'èse'e cuasaquè yo'oye pa'ijaquè caquè. Jèoconi cuañese'eje pa'ye peojaquè,

¹⁵ cuasayè. Yé'èta'a Onésimopi mè'ère jèoconi saji'i, a'ri maña tsoe pa'i sitopi yureta'a ti pa huesojaquè caquè.

¹⁶ Jaje pa'ina, jo'yaèje pa'ire paye peoji, jo'ya nesiquère seña maca pa'i api. Jaje cani cayè, yo'jeije pa'ire papi caquè. Ìte yé'è ai yèyè. Cui'ne mè'èpi ìte jerepa yèye pa'iji, Èjaè Jesure cuasa do'ire Maija'què do'iquère sète.

¹⁷ Jaje pa'ina, mè'èpi yé'è cajei sète, yé'ère sihuaquè pèpayepi pèpajè'è, ìte.

¹⁸ Mè'ère co'aye yo'osiquè pa'ito panita'a, co'amaña do'ire sañe paquè pa'ito yé'èni sejè'è.

¹⁹ Yé'è Pablopi saicasi'i. Yé'è jètèpi toyayè, iye toya e'que, yé'è quèaquèna, sehuosi do'ire, mè'èje yé'ère sañe payè caquè quèa sèto'ñe pa'ita'a pañè.

²⁰ De'oji. Maija'què do'iquè, Cristore cuasaquè sète yé'è case'eje necaijè'è, oi pa'iquèpi quècojaquè, de'oye yo'o huasoje'è.

²¹ De'oye sehuocasipi caquè toyayè, mè'è yo'o ja'ñere asaquè cui'ne asayè, mè'è yé'è case'e jerepa de'oye yo'o ja'ñere.

²² Cui'ne yequeje cayè, mè'ère. Yé'è sani pèaja'to necaijè'è. Uteyè, Maija'quèpi mèsaru señere asaquè. Necaina, sani ñasi'i caquè.

Tèjijerepa Pèpaquè De'oye Pa'ijè'è, Case'e

²³ Jaro mèsarute pèpa saoji, Epafra's Cristo do'ire yé'è ja're cõni tseá cuañosiquè pa'iquèpi.

²⁴ Cui'ne Marcos, Aristarco, Demas cui'ne Lucas yé'è yo'oquèna, cõcaicohua'ipi pèpayè.

²⁵ Jesucristopi ñacaijaquè si'ahua'ire mèsarute. Jaje pa'ijaquè.

HEBREOS

Maija'quëpi I Mamaquëja'a Capi

¹ Tsoe hue'ña Maija'quëpi mai aipëre ìte quëacaicohua'ija'a ca mu'seña jaiye ca'aji'i, cui'ne jaiye tñe pa'ye yo'oyeja'a ca'aji'i.

² Jaje ca'quëpi, yure tëji mu'seña maire ì mamaquëja'a capi. Si'a co'amaña ì ja're de'huasiquë ja're conì, si'aye co'amaña paja'quë ja're conì capi.

³ Jaë api, Maija'quë de'oyere pare miacaiquë. Cui'ne jaë api, Maija'quë pa'iyere maire ìñoquë ìje pa'i api, cui'ne jaëpi si'a co'amaña ì coca tutupi quëco paquërepa. Mai co'aye pa'ise'ere tsoa tonì, jeteyo'je Maija'quë ñu'ico ëja te'tena ja'rupi.

Huññaohua'ire Jerepa Pa'i Api, Maija'quë Mamaquë

⁴ Huññaohua'ire jerepa pa'i de'opi, Maija'quë mamaquëpi, ìohua'i paye jerepa pa'i mamire ìsi cuañosi do'ire.

⁵ Maija'quë ti cama'ë paji'i, te'ireje ì huññaëre:
Më'ë a'ë, yë'ë mamaquë.

Yure më'ëre huëoni pa'ye ìsihuë.

Te'ireje ì huññaëre cama'ë paji'i.

Yë'ë pasi'i, ì péca ja'quë pa'ina,

Ìpi yë'ë mamaquë pa'ija'quë.

⁶ Jaje pa'iquëta'are iye yejana ì mamaquëre te'ire ìsiquë capi:

Si'a ì huññaohua'i ìte do're ja'rujë ai de'oquëre papi cajë sihuajë'ë.

⁷ Maija'quëpi ì huññaohua'i ayere capi, ñeje:

Huññaohua'ire cato tutujë pa'iohua'ire neñë,

cui'ne yë'ëre necaicohua'ini toajë pa'iohua'ire neñë.

⁸ Jaje pa'iquëta'are ì mamaquëre capi:

Ina, Diosu, më'ë cuañeñe cato, ti carajaiñe peoji,

më'ë cuañeñe cato nuñere pa'ë.

⁹ De'oyese'e oi, co'ayere më'ë ai coehuë.

Jaje pa'ina, Diosu, më'ëre, më'ë Diosupi ai sihuayere ìsipi, më'ë cajeohua'ire ìsiye jerepa.

¹⁰ Cui'ne yequeje capi:

Ina, ìti huëo maca më'ëpi Èjaë, yejare nehuë.

Cui'ne më'ëpi ma'tëmoje nehuë.

¹¹ Më'ë de'huase'e cato carajai ja'ñe a'ë. Jaje pa'iquëta'are më'ë cato ti pani huesëja'quë a'ë. Si'aye ja cato co'a de'o huesë ja'ñe a'ë, ju'ì caña yo'oyeje.

¹² Jaje pa'ina, ja yejare cui'ne ma'tëmore më'ëpi ju'ì ca ñeñoje pa'ye ñeñoja'quë a'ë.

Cui'ne ju'ì ca yeconì suñacaiyeje pa'ye më'ëpi neja'quë a'ë.

Jaje pa'iquëta'are, më'ë cato jare ìpi pa'ija'quë a'ë.

Më'ë pa'iyë ti carajaiñe paja'coa.

¹³ Diosu cama'ë paji'i, te'ireje huññaëre:

Ja'rujë'ë, yë'ë ëja te'tena,

më'ëre sañope yo'ocohua'ire më'ë quëo huë'ehuëna të'ya me macaja'a.

¹⁴ Si'ahua'ì huññaohua'ì cato Maija'quëre necaicohua'ìpi joñoase'e pa'iyë, huasosicohua'ì pa'ija'cohua'ire cöcailja'cohua'ire jëjo daosicohua'ìpi.

2

Ña Tayoye Pañu'u Huasosicohua'i Pa'iyere

¹ Jaje pa'ina, mai asasi cocare de'huarepa asacaijë pañu'u, hua saiye paja'cohua'ì.

² Maija'quë cuañeñere huññaohua'ìpi quëase'e nuñerepa coca paji'i. Jaje pa'ina, ìti de'oye sehuocaima'pë co'aye tayo yo'osicohua'ì si'se cuañoahuë'ë, nuñerepa co'a do'ire.

³ Jaje pa'ito ¿mai me jëajaj'cohua'ì a'ni, iye maire huasoye jaiyere ña tayosicohua'ì pani? Iye huaso cocare mai Èjaëpi du'ru macarepa païre quëapi. Ja jeteyo'je ì quëaye asasicohua'ìpi nuñerepa coca'ë cajë asani maireje de quëahuë.

⁴ Cui'ne Maija'quëje ì cocare pa'ë caquë ìñoquë, pai yo'o tì'a ma'ñere jaiye yo'o ìño'pi, jaohuaija'a, ì joyo tutu pai ñapere ì yëyeje ìsisi tutupi yo'oquë.

Jesucristo Païje Pa'i De'ose'e

⁵ Maija'quë huññaohua'ina ìsima'ë paji'i, jaohua'ìpi ëjahua'ì pa'ijë yequë mu'se pa'ija'a yeja, mai se cacore cuañejajë caquë.

⁶ Jaje pa'iquëta'are yequë hue'ña toyase'ena te'ì quëaquë caji:

Ina, Diusu mē'ēpi ite huānēyema'ē cuasahuē.

Juni huesē capē hue'ere do'ire mē'ēpi ai co'a ju'i cōcasi'i caquē yo'ohuē.

⁷ Jaje pa'ina, mē'ēpi ite huīñahua'i huē'ehuē maca pa'ire nehuē, coa nēhui tēcahuē jaje pa'ijaquē caquē:

Jaje pa'isiquēta'are ite de'oyepi ēja de'huani, si'aye mē'ē de'huase'e cuañequere Ējaere pare nehuē, mē'ēpi.

⁸ Si'aye i quēo huē'ehuēna tē'ya meni saoca'ē, mē'ēpi.

Jaje Maija'quēpi i quēo huē'ehuēna tē'ya meni saopi, ti te'oreje hue'sena oañe papi. Jaje pa'iquēta'are mai ja yē'ta'a ñama'pē pa'iyē, si'a co'amaña ite de'oye sehuocaire.

⁹ Jaje pa'iquēta'are ñañē, Jesuni nēhui tēcahuē huīñahua'i huē'ehuē maca pa'i pa'ijaquē caquē Maija'quē nesiquēni. Jaēni Diusupi maini oi si'aohua'i do'ire jucacaijaquē cuasa nēopi. Cuasa nēoēna, ai yo'oquē ju'isi do'ire yure de'oyepi ēja de'huasiquēpi si'aohua'ire jerepa pa'i pa'iji. Pa'ina, jaēni ñañē, mai.

¹⁰ Si'aye Maija'quē co'amañase'e pa'iji, ipi quēcoquēna. Jaje pa'ina, Maija'quē cato yēji, si'aohua'i i mamajēpi i de'o co'amañare cōni payere. Jaje pa'ina, Jesucristoni iohua'ire huasoquēni de'oquere pare nepi, i ai yo'o do'ipi.

¹¹ Jaje pa'ina, Jesucristo cui'ne i huasosicohua'i cōni si'aohua'i te'ini pēca ja'quere payē. Jaje pa'ina, Maija'quē mamaquē maire yo'jedohuē hue'yoye ca'rama'ē pa'iji.

¹² Toyase'e jaje pa'ina, caji:

Mē'ē pa'iyē ayere casi'i yē'ē yo'je tsire

cui'ne jējēs'i, jai pai tsi'si sitona mē'ēre sihuaquē.

¹³ Cui'ne caji, yequeje:

Maija'quēna yē'ē cato quēcōsi'i.

Cui'ne tījupē caji yequeje:

Iye macare pa'iyē, Maija'quē yē'ēre isisi mamajē ja're cōni.

¹⁴ Ina isisi mamajē cato te'e capēre, cui'ne te'e tsiere hue'ecohua'i a'ē. Jaje cui'ne Jesuje paina ai de'oni te'e capē cui'ne te'e tsie hue'equē paji'i, pai hue'eyere. Jaje pa'ipi ju'ji'i, i ju'iñepi huati huani jeo tutu jiosi'i caquē.

¹⁵ Jioni ne huasopi, si'a mu'seña ju'iñere ca'ra do'ire tsea cuañosicohua'ije pa'iohua'i pa'isicohua'ire.

¹⁶ Jaje pa'ina, daima'ē paji'i, huīñahua'ini cōcasi'i caquē. I cato Abraham tsēcāpēni cōcāiyere caquē daji'i.

¹⁷ Ja cōcāiyere caquē maije pa'irepa de'opi, Maija'quē ña huē'ñare pana, de'oyerepa Maija'quē aye yo'oye ñacai Ējaere papi, teaye ñani cōcāiyere papi, cui'ne i ai yo'osi do'ipi pai co'aye yo'oyere sai tocaiquērepa pasi'i caquē.

¹⁸ Jaje pa'ina, neña cuañoquē, ai yo'oquē asasiquēpi, yure maire cōcai cuañoquē pa'ija'quē api, neña cuañojē ai yo'ocohua'ire.

3

Jesupi Moisés Seña Maca Pa'i

¹ Jaje pa'ina, Maija'quē do'ijē mēsaru a'ē, Maija'quē pai acohua'i, i tsecohua'i pa'ijajē caquē soisicohua'i. Jaje pa'iyē sēte Jesús Maija'quē jējo daoquēsē'ere, Maija'quēre sejē yo'oye de'oye ñacai ējaēsē'ere cuasajē pa'ijē'ē, Maija'quē pa'iji cuasaye necaiquēsē'ere.

² Jaje pa'ina, Moisés si'aye Maija'quē huē'e ñacaiquē pa'i maca, de'oye Maija'quēre sehuoquē yo'o t'iaquē pa'iji. Jaje cui'ne Jesuje si'aye de'oye sehuoquē yo'o t'ia'pi, iyere yo'ojaquē caquē Maija'quē sahuasiquēpi.

³ Jaje pa'iquēta'are Jesuni ai Ējaere pare ñajē sihuaye pa'iji, Moisésre sihuaye jerepa, huē'e nequē, je'quē iti huē'e nesiquēpi ai sihua cuañoquē api, iti huē'e jerepa.

⁴ Jaje pa'ina, si'a huē'ña pai nese'epi pa'iji. Jaje pa'iquēta'are Diusu cato te'ipi si'aye nepi, mai ñajēna pa'iyē.

⁵ Moisés cato de'oyerepa yo'o t'iaquē paji'i, ite necaiquē sēte, si'a Maija'quē huē'e ñacai. I necaiye cato paji'i, Maija'quē yeque mu'seña ca ja'ñere quēa iñoquē yo'oye.

⁶ Jaje pa'iquēta'are Cristo cato Maija'quē mamaquē sēte, de'oyerepa i huē'e yo'o t'iaquē ñacai pa'iji. Ja huē'e cato mai a'ē. Mai'pi ite tuijē ocue pa'i macarepa mai uteyere sihuajē pa'ini.

Maija'quē Pai Pēa Huajē Ja'ñe

⁷ Jaje pa'ina, Maija'quē de'o joyopi caji, toyase'ena:

Yurepi, mēsaru Maija'quē caye asasicohua'i pani,

⁸ Jēa joñoa nema'pē pa'ijē'ē, tsoe acohua'i Maija'quēre sañope cajē yo'ose'eje pa'ye.

Jeto cuene yejana Maija'quēre neñasicohua'ije pa'iohua'i pa'ima'pē.

⁹ Jarona mēsaru aiohua'i yē'ēre neñahuē,

tsoe cuarenta ometëca yë'ë yo'oye ñasicohua'ita'a.

¹⁰ Jaje yo'ojëna, jaohua'ire ña jujani yë'ëpi pëi cahuë:

Ti yë'ë ye'yaye asaye coejë,

“si'anëpi yequese'e cuasajë cu'ijë”

¹¹ Jaje pa'ina, jaohua'ire yë'ëpi pëi ca nëohuë,

cacaye paja'cohua'i a'ë, yë'ë jare pëa huajë hue'ñana.

¹² Maija'quë do'ijë, jëa joyo co'acore hue'ema'pë cui'ne Maija'quë huajëquëre pare hua saima'pë pa'ijë'ë, jare de hua ñajë pa'ijë'ë, mësarü cuasayere.

¹³ Coa ai jerepa mu'seña ñape pa'i ñapere sa'ñe yëhuojë ca sëttojë'ë ja yë'ta'a Maija'quë coca, iye mu'se caye tëtö saima'në. Jaje yo'ojë'ë, mësarü acohua'ipi co'ayere coso cuañoni sañope Maija'quëre cajë ne huesëye paja'cohua'ire.

¹⁴ Jaje pa'ina, Cristo payere i ja're conï paja'cohua'i a'ë cani ocue pa'i macarepa, mai du'ru macarepa asase'ena quëco pajë, jëoma'pë tuiye pa'iji.

¹⁵ Jare cuasajë pa'ijë'ë. Iyere ñeje caji:

Yurepi mësarü Maija'quë caye asasicohua'ï pani,

Jëa coeye peyerepa de'oye sehuojë pa'ijë'ë, tsoe acohua'ï sañope cajë yo'ose'eje pa'ye peocohua'ipi.

¹⁶ ¿Ne pate'ni, Maija'quë yë'o' asasicohua'ita'a jeteyo'je ite sañope cacohua'ï de'osicohua'ï? Jaohua'ï cato si'aohua'ï Moisés Egípto yejapi etosicohua'ï paë'ë.

¹⁷ ¿Cui'ne ne ja're conï Maija'quë pëi paquë'ni, cuarenta ometëca? Maija'quë cato pëi paji'ï, co'aye yo'osicohua'ïni, cuene yejana juju tatasicohua'ïni.

¹⁸ ¿Cui'ne neni Maija'quë ca nëou'ni, yë'ë pëa huajë hue'ña cacani huajëye peoji? Ja cato capi: Ite ire papi cuasama'pë sehuocaiye pasicohua'ïni.

¹⁹ Jaje pa'ina, mai tiñarepa ñañë, jaohua'ï caca ti'añe pãse'e ite care paji cajë asacaiye pa'si do'ire.

4

¹ Maija'quë pëa huajë hue'ñana cacaye ca nëose'e pa'iji. Jaje pa'ina, ca'rajë de'oyerepa ñañu'u, mësarü acohua'ipi tsoe carajaji cajë ja pëa huajëyere ti'añe pama'cohua'ïni cajë.

² Jaohua'ire huaso coca quëase'eje pa'ye cui'ne maire quëahuë. Jaje pa'iquëta'are jaohua'ipi Maija'quëre pa'ire paji cuasa ti'añe pãhuë. Ja do'ire coçaiye papi, huaso coca asase'e.

³ Jaje pa'iquëta'are mai pa'iji cuasasicohua'ï cato pëa huajë hue'ñana cacaja'cohua'ipi pa'iyë. Ja ayere Maija'quë ñeje ca nëopi:

Ja do'ire jaohua'ire, yë'ëpi pëi ca nëohuë,

cacaye paja'cohua'i a'ë, yë'ë pëa huajë hue'ñana.

Maija'quë cato iye yeja de'hua tējisi macapi pëa huajë huëopi.

⁴ Jaje pa'ina, yequë hue'ña toyase'e caji, ñeje siete mu'se ayere:

Diusu siete mu'se acona pëa huajëpi, si'a co'amaña ne tējini.

⁵ Toyase'e tijupë ca coji:

Yë'ë pëa huajë hue'ñana cacaye paja'cohua'ï a'ë.

⁶ Jaje cani caji, ja yë'ta'a yecohua'ï cacaye pa'iji, pëa huajë hue'ñana caquë. Du'ru macarepa huaso coca asasicohua'ï cato, iohua'ï de'oye ite ire papi cuasama'pë sehuocaiye pa'si do'ire cacaye pãhuë.

⁷ Jaje pa'ina, Maija'quëpi tijupë yequë caca mu'se pa'ijaquë ca nëopi. Iye mu'se iti mu'se a'ë, caquë. Jaje pa'ina, Maija'quë maire caji, David tsoe hue'ña caquë pa'ise'eja'a ja toyase'ëpi caji, ñeje:

Iye mu'se Maija'quë caye asasicohua'ï pani

jëa joñoa nema'pë de'oye sehuojë pa'ijë'ë.

⁸ Jaje pa'ina, Josuëpi Israel paire pëa huajëye isisiquë pa'ito Maija'quë tijupë yequë mu'se pa'ï ja'ñere caye pa'rapi.

⁹ Jaje pa'ito ja yë'ta'a pa'iji, Maija'quë pa'i cacani pëa huajë ja'ye.

¹⁰ Jaje pa'ina, Maija'quë pëa huajë hue'ñana cacajuë cato co'amañare ne tējini pëa huajësi'quë cacaji, Maija'quë co'amaña ne tējini pëa huajëse'eje pa'ye.

¹¹ Jaje pa'ina, mai tutu yo'oye pa'iji, jaro pëa huajë hue'ñana cacañu'u cajë, tsoe ja'në acohua'ï Maija'quëre coca nuñere pa'ë cuasama'pë yo'ose'ena tuiye pañu'u.

¹² Maija'quë coca cato pa'iyë a'ë cui'ne tutu quë'ye a'ë, si'a te'ña hua'ti niuisico jējēsēñe seña maca jējēsēñe a'ë. Jaje pa'yepi pa'se'e cuasaye cui'ne mai joñoa sa'nahuërepa cuasayena jo timeñe a'ë. Jaje yo'oquë mai cuasayere cui'ne mai yo'oñu'u cuasayere tiña macare pana eto iñoñe a'ë, joyo cuasayere.

¹³ Jaje pa'ina, peoji, Maija'quë de'huase'ëpi ite catiye. Si'aye mai yo'oye macare pare pa'iji, i ña hue'ñare. Jaje pa'ina, ina si'acohua'ï yo'ose'e iñoja'quë a'ë.

Jesu Api, Maija'quë Huë'e Ñacaihohua'i Ëjaërepa

¹⁴ Jesu api, Maija'quë mamaquë Maija'quë huë'e ñacaihohua'i Ëjaërepa, mai mëñe quëco pajë pa'iquë. Jaëpi Maija'quë ña hue'ñare pare cacani pa'iji. Jaje pa'ina, mai ìte tì'añu'u cajë yo'oyere jëoma'pë ocue pa'i macarepa yo'ojë pañu'u.

¹⁵ Maija'quë huë'e ñacai Ëjaëre papi mai tutu peoye teaye ñani cõcasipi, mai ai yo'oyeje pa'ye si'aye neñañe pa'ina, ai yo'oquë tëto saisiquëpi. Jaje pa'iquëta'are jaë cato co'aye ti yo'oma'ë paji'i.

¹⁶ Jaje pa'iyë sëte quëcojë tsiojañu'u, maire oiquë Diusu ñu'i hue'ñana, ìpi maire teaye ñani oi cõcaija'quëre de'oyepi mai ai yo'o maca tì'aëna.

5

¹ Pai ñape Maija'quë huë'e ñacaihohua'i cato ëmëohua'i acohua'ini sahuani isicohua'ipi pa'iyë. Jaohua'i cato Maija'quë ña hue'ñare pana paire cacaija'cohua'ipi pa'iyë. Cui'ne pai co'aye yo'o do'ire Maija'quëna coa isijë cui'ne hua'ire ëojë seccaija'cohua'ipi.

² Ìpi capë tutu peoye asaquëpi Maija'quë huë'e ñacaiquë cato huesëohua'ire cui'ne tayo saicohua'ire yo'o jujama'ë quëcoquë necaiye pa'iji.

³ Jaje pa'ina, ì tutu peoquë tayoyere coquë cui'ne pai tayoyere caquë ëoquë seña pa'iji, saì de'hua cuañoñere caquë.

⁴ Jaje pa'ina, tel'ije cuasaye peoji, yë'ë a'ë, Maija'quë huë'e ñacai ëjaërepa. Maija'quëpi Aaronre nese'eye pa'ye soini ëjaëre nesiquëre me jaje cuasaye'ni.

⁵ Jaje pa'ina, Cristore Maija'quëpi Ëjaëre nepi. I co'ye Maija'quë huë'e ñacai ëjaë pasi'i cani ëjaë de'oma'ë paji'i. Jaje pa'ina, Maija'quëpi capi, ñeje:

Iye mu'se yë'ëpi më'ëre pa'iyë isihuë,
më'ë a'ë, yë'ë mamaquë.

⁶ Yequeje caji, toyase'ë ìte:

Më'ë a'ë, Maija'quë huë'e ñacai Ëjaërepa pani huesëquërepa,
Melquisedecje pa'i.

⁷ Iye yeja Cristo pa'i maca ai teaye tutu caquë Maija'quëre seji'i, otare paque oi, Maija'quëpi junì huesësicohua'ire huëo tutu paquëre asaquë. Jaje seina, ì de'oye sehuocai do'ire Maija'quëpi ì seña asacaji'i.

⁸ Cristo Maija'quë mamaquëta'a ì ai yo'oyeja'a ye'yepi, Maija'quëre de'oye sehuocaiye.

⁹ Jaje yo'oquë ti de'oquërepa de'oni, si'aohua'ire ìte de'oye sehuocaicohua'ire ti pa'iyena huasoquërepa de'opi.

¹⁰ De'ouana, Maija'quëpi ìte ì huë'e ñacai Ëjaëre pare nepi, Melquisedecje pa'ire.

¹¹ Jaiye iye ayere caye pa'iquëta'are airepa jëaji, me quëa tì'añe'ni, mësarupi asaye coeto.

¹² Tsoe mësarù yecohua'ire se ye'yacohua'irepa pati'ñe pa'iohua'ipi ja yë'ta'a a'jiñe mañare Maija'quë coca du'ru ayere ye'yajëna, asacohua'ì maña pa'iyë. Mësarù cui'naohua'ipi tutu peocohua'ì maña co'ì huesëni ojese'ë ucucohua'ì maña pa'iyë, tsoe jëayere ati'ñe pa'iohua'ipi.

¹³ Jaje ojese'ë ucujë pa'icohua'ì cato tsitu'ujë pa'iohua'ì a'ë, ti co'aye cui'ne de'oye asa tì'ama'cohua'ì a'ë.

¹⁴ Jëa aõ cato aiohua'ì a'ñe a'ë, si'aye ta'ñe co'aye cui'ne de'oye asacohua'irepa.

6

¹ Jaje pa'iyë sëte aiohua'ì de'oyena ñese sañu'u, mai du'ru macarepa Cristo aye ye'yese'ere se õani. Cama'pë pañu'u ju'ì hue'ñana sa co'amañare jëoconì pönëñere, cui'ne Maija'quë pa'iji cuasayere.

² Oco doye ye'yayere, sehuosicohua'ì sjopëana patojë seccaiyere, ju'ìsicohua'ì huëiyere, cui'ne Maija'quë pai ñape yo'ose'ë ña tëji ja'ñe ayere.

³ Jaje yo'ojacohua'ì pa'iyë, Maija'quëpi nuñerepa jaje yëë cõcaito.

⁴ Te'erepa miañe ñani cui'ne Maija'quë de'o sëñe isiyë asasicohua'ipi cui'ne Diusu joyo yo'oye asasicohua'ipi,

⁵ cui'ne Maija'quë coca de'oyerepa asasicohua'ipi, cui'ne yequë mu'seña pa'ija'a tutu asasicohua'ipi,

⁶ cui'naohua'ipi co'ye co'isicohua'ì pani tìjupë Maija'quëna pönë cõñe peoji, tsoe johua'ipi Maija'quë mamaquëni tìjupë quejë yo'o do'ire. Me pönëñe'ni, si'aohua'ì ña hue'ñana ìte cue'cuejë yo'oni.

⁷ Jaje yo'ocohua'ì cato yejaje pa'iohua'ì a'ë. Ocoquëna, si'anë saquëyeje pa'iohua'ì a'ë. Jaje pa'ina, ja yejapi ìti yeja necohua'ini de'oye mëani quëcacaico pa'ito, Maija'quëpi ìote de'oye ñacaija'quë api.

⁸ Jaje pa'iquèta'are yejapi de'oye quècacaïma'o co'ayere cui'ne miure quèico pani co'aye ca cuañojacoa. Jaje pa'ina, toapi si'aye èo huesoye pa'iji, io mèase'e.

Utejè Pa'iyepi Ocuè Pa'i Macarepa Paye

⁹ Jaje mèsarute Maija'què do'ijè mañare cajèta'a cuasayè mèsaru cato ìtire pare pa'iyè. Jaje cani cayè, nuñerepa huasosicohua'i pa'i ma'are pa'iyè cajè.

¹⁰ Jaje pa'ina, Maija'què nuñerepa pa'ipi, mèsaru sehuosicohua'ire oijè cõcailjè ìñose'e, cui'ne mèsaru ja yè'ta'a yo'ojè pa'iyè huanèyema'è pasipi.

¹¹ Jaje pa'ina, yèquè cato yèyè, mèsarupi si'anè pai ñape jare jajese'e tèji hue'ñare pana de'oye yo'ocohua'i pa'iyere. Jaje yo'ojè mèsaru uteyere tiñarepa iñoja'cohua' a'è.

¹² Coeyè, mèsarupi josaohua'i ponèñè. Yèquè cato yèyè, mèsarupi Maija'què pa'iji cuasajè yo'o jujama'pè ocue pa'i macarepa tuicohua'ina ñajè ìohua'i tuiyeje tuiyere. Maija'què ca nèose'e paja'cohua'i yo'oyere yo'ojè'è.

¹³ Abrahamre Maija'què ca nèo maca ija'a co'ye ca nèo huesèpi, yecohua'i i jerepa pa'iohua'i peoye sète. Jaje pa'ina, capi:

¹⁴ “Yè'èpi mè'ère de'oye ñacajja'què a'è cui'ne jai pai pa'ija'cohua' a'è, mè'è tsècapè acohua'i yè'èpi necaina.”

¹⁵ Jaje caèna, Abraham quècoci, jeoma'è, utequè ìsi cuaño'pi, ìte ca nèose'ere.

¹⁶ Pa'ipi ca nèocohua'i pani ìohua'i seña maca èjaèna ca nèocohua'i a'è, ìohua'i ca nèose'epi care pase'e pa'ijaquè cajè cui'ne ja maca sañope caye carajaiñe pa'iji.

¹⁷ Jaje pa'ina, Maija'quèje i ca nèose'e paja'cohua'ina, i case'ere tiñe ponañe peoyerepa tiñarepa iñosi'i cuasani ti ca nèo huesopi, ìsire paja'què a'è caquè.

¹⁸ Jaje pa'ina, cayaye pa'iji, i ca nèose'ere ti yeque ponañe peoyerepa, cui'ne Maija'quèje cosoye peoyerepa. Japi maire sihuajè ocue pa'i macarepa pa'iyè isiji, ìpi ñacaina, pa'iyè co'ejè i ca nèose'e utejè pa'isicohua'ire.

¹⁹ Ja uteyepi maire ocue pa'i macarepa cuasajè pa'iyè necaiji, jai yohuè dèquècoci sèani jeo dèorena, te'e macare huahuayeje pa'ye. Jaje cui'ne mai joyoje Maija'què huè'e sa'nahuè ta'tèpo jere pana ja uteyepi se sèasicopi pa'ico Jesús maire ma'a necai caca sitona.

²⁰ Jaje Jesús cacani ti Maija'què huè'e ñacai Èjaèrepa de'opi je'nèna ìote pa'ija'quèpi, Melquisedecje pa'ipi.

7

Jesús Cato Melquisedecje Pa'i Api

¹ Iquè Melquisedec cato Salem pai èjaè paji'i cui'ne Maija'què ti èjaèrepa huè'e ñacai èjaèrepa paji'i. Jaje pa'ipi Abrahamre yequè pai èjaohua'ire uihuaquè meñe quèconi co'iquèna, Melquisedecpi sañope ti'ani ìte Maija'quèpi ñacajjaquè capi.

² Ja maca Abrahampi Maija'què tsere Melquisedecna ìsipi, i uihuaquè nese'ere. Maija'què tse cato si'a jèna pa'ye nesicohua'ipi te'ore Maija'quèna ìsiye a'è, jare ìsipi. Melquisedec cani cayè “Nuñerepa yo'o èjaè” cajè, Salem caye cato cayè, “Jo'cua de'oye pa'iyè” Jaje pa'ina, jo'cua de'oye pa'iyè èjaè caye pa'iji, “Salem Èjaè” cani.

³ Pèca ja'quère, ja'core, i co'ye aiohua'ire ìte cõasi mu'se cui'ne i ju'ise'e huesyè, ti quèase'e peoji. Maija'què mamaquèje pa'i api, Maija'què huè'e ñacai èjaè ti de'o huesèsiquè api.

⁴ De'oji, yure ñajè'è, Melquisedec cato ai èjaèrepa paji'i. Jaje pa'ina, mai ai Abrahampi pai èjaohua'ire uihuaquè se jiose'ere Maija'què tsere Melquisedecna ìsipi.

⁵ Jetye'oye Moisés cuañese'e cato caji coa Levì tsècapè acohua'ise'e Maija'què huè'e ñacai èjaohua'ise'e Maija'què tse paye pa'iji, pai ìsi co'amaña. Jaje pa'ina, jaohua'ise'e co'amaña secohua' a'è, ìohua'ije pa'iohua'ini, Abraham tsècapè acohua'ini.

⁶ Jaje pa'iquèta'are Melquisedec cato Levì tsècapè peoquèta'are Abrahampi Maija'què ca nèose'e paquèpi, Maija'què tsere ìsipi, Melquisedecna. ìsiquèna, Melquisedec de'oyerepa caca'aji'i, ìte.

⁷ Jaje pa'ina, de'oye pa'i ja'ñe, cacaiquè api, jerepa pa'i. Ìti ca cuañoquè cato huè'ehuè maca pa'i api iye cayere sañope ca ti'añe peoji.

⁸ Maija'què tsere coa ìsijèna, pacohua'i cato ju'icohua' a'è. Jaje pa'iquèta'are Melquisedecre cato toyase'e caji, ja yè'ta'a huajèquère.

⁹⁻¹⁰ Jaje pa'ina, Melquisedecpi Abrahamre sañope sani ti'a maca cato ja jojoma'cohua'ipi, si'aohua'i Abraham pai pa'ija'cohua'ipi i capère paè'è. Jaje pa'ina, Abrahampi Melquisedecna saisi maca yure co'amaña secohua'ije si'aohua' Levì tsècapè acohua'ije si'a jèna neni te'ore Maija'quèna ìsiyere saihuè.

¹¹ Maija'què huè'e ñacai èjaohua' levitas tsècapè quèayeja'a Israel pai asahuè, cuañese'e. Jaohua' cato Aarón tsècapè acohua' paè'è. Jaje pa'ina, yure jaohua'ipi cuañese'e sehuojè yo'ocohua'ini nuñe pa'icohua'ire necaicohua' pa'ito, Melquisedecje pa'ipi daiye para'pi

Aarón tsëcapë peoquëpi. Jaje pa'iquëta'are yure cato yequëpi daji'i, Maija'quë huë'e ñacai Ëjaë.

¹² Jaje pa'ina, Maija'quë ñacaiye yequëni neni cui'ne yequë cuañese'eje ponañe pajji'.

¹³ Jaje pa'ina, mai Ëjaëni toyase'e caji, ñeje: "Yequë Israel pai tsëcapë aquë api. Maija'quë huë'e ñacai ëjaohua'i de'oma' tsëcapë aquë api."

¹⁴ Jaje pa'ina, Maija'quë huë'e ñacai ëjaohua'i pa'i ja'ñe ca maca, Moisés ti cama'ë pa'isi tsëcapëja'a, mai Ëjaë cato daji'i, Judá tsëcapëja'a. Jaje yo'ose'ere si'aohua'i mai asayë.

¹⁵⁻¹⁶ Yureta'a pai cuañeñeja'a daima'quëpi, huajëquëpi daji'i, Maija'quë huë'e ñacai Ëjaëre papi, Melquisedecje pa'ipi, i pa'iyë ti nejo tija'ñe peo tuturepa paquëpi, iyepi maire ai tija'ñe asa cuañoñe quëaji.

¹⁷ Jaje pa'ina, daisiquë ayere Maija'quë coca toyase'e caji, ñeje:

Më'ë a'ë, Maija'quë huë'e ñacai Ëjaërepa ti pani huesëquërepa
Melquisedecje pa'i.

¹⁸ Jaje pa'iyë sête ja'në cuañese'ere tutu peoyere cui'ne coçai ma'ñere cui'nare yo'o co ma'ñe ne huesopi.

¹⁹ Jaje pa'ina, Moisés cuañese'e cato nuñe pa'icohua'ire ne tija' ma'ñe pa'iji, pa'ise'ere. Yure cato ai jerepa de'oyere payë, mai utejë pa'iyë. Japi Maija'quëna tsiojañe necaji'i, maire.

²⁰ Jesure cato Maija'quëpi ca nêo huesopi. Jaje pa'iquëta'are yecohua'i Maija'quë huë'e ñacai ëjaohua'ire cato coa hue'yosicohua'i paë'ë, ti ca nêoñe peoye.

²¹ Jaje pa'ina, Ëjaëre cato ca nêo huesoquë capi, toyase'ena ñeje.

Ëjaë ca huesose'e ponëñe peoji.

Më'ë a'ë, yë'ë huë'e ñacai Ëjaërepa ti pani huesëja'quë.

Melquisedecje pa'i.

²² Jaje pa'ina, Jesu api, iye huajë ca nêose'ere ti carajai ma'ñere de'oyerepa necaiquë, ja'në ca nêose'e seña maca de'oyerepa.

²³ Jai pai paë'ë, yecohua'i Maija'quë huë'e ñacaicohua'i ju'ijë carajacohua'i sête.

²⁴ Jaje pa'iquëta'are Jesús cato ti ju'ima'quë sête Maija'quë huë'e ñacaiye yequëna se jecaiye peoji.

²⁵ Jaje pa'i do'ire Maija'quëna tsiojaicohua'ire, ti pani huesëja'cohua'ire huasoji. Cui'ne ti pani huesëquë sête jaohua'i pa'iyere caquë Diusure seçacai pa'iji.

²⁶ Jaje pa'ina, Jesús cato mai yësiquëre papi, Maija'quë huë'e ñacai Ëjaërepa. Jaë cato de'oquë api, ti co'aye peoquë api, cui'ne si'si te'ña mañaje peoquë api. Jaje pa'ipi co'aye yo'ocohua'ire tsioma'quë api. Jaje pa'ini ma'tëmo pa'iyë jerepa pa'ire nesiquë api.

²⁷ Yecohua'i Maija'quë huë'e ñacai ëjaohua'i cato si'a mu'señapi nêicohua'ire huaijë, du'ru macarepa johua'i co'aye yo'o do'ire ëojë isijë Maija'quëre seni toni jeteyo'je pai co'aye yo'oyere ëojë isijë seçacaicohua'i a'ë. Jaje pa'iquëta'are Jesús cato te'ere papi i capë ai yo'o do'ipi Maija'quëre isi tËjipi.

²⁸ Moisés cuañese'e cato hue'yopi, carajacohua'ini Maija'quë huë'e ñacai ëjaohua'i pa'ija'cohua'ire. Jaje pa'iquëta'are cuañese'e jeteyo'je Maija'quë ca nêose'epi hue'yopi, Maija'quë huë'e ñacai Ëjaëre i mamaquëni, nuñerepa de'oquëni, ti pani huesëquëni.

8

Jesupi Maija'quë Huajë Ca Nêose'ëja'a Cacaiquë Api, Maire

¹ Si'aye yëquë case'e ëjarepa iye a'ë. Payë, Maija'quë huë'e ñacai Ëjaëre pare, Maija'quë ñu'ico ëja te'tere ñu'ina, jeto ma'tëmöre.

² Pai nema' huë'ere pa'iji, iore pani, Maija'quë nesi huë'ere, jarote pa'i Maija'quë huë'e ñacai Ëjaë sête, Maija'quë huë'e ñacai pa'iji.

³ Maija'quë huë'e ñacai ëjaohua'i cato, Maija'quëna isise'ere isijë, cui'ne nêicohua'ire huani ëojë seja'cohua'ini nesicohua'ipi pa'iyë. Jaje pa'ina, Jesucristoje i isi ja'ñe paye pa'iji.

⁴ Jaje pa'ina, ipi iye yejare pa'iquë pani Maija'quë huë'e ñacai Ëjaë de'oye para'pi, tsoe Moisés cuañese'eje pa'ye yo'ojë isicohua'ipi Maija'quë huë'e ñacaicohua'i jai pai pa'ito me pa'iquëni.

⁵ Johua'i cato ca'nipi nesi huë'ena Maija'quë ayere necaicohua'i a'ë, ma'tëmo pa'iyë ayere cuasajë yo'o co'amañapi, pai to'ouje pa'yepi. Jaje pa'ina, Moisés huë'ere ne huëo maca Maija'quëpi capi, ite: "Yë'ë më'ëre jeto ai cutihuë iñose'eje pa'iore nejë'ë."

⁶ Jaje pa'iquëta'are mai Ëjaë Jesucristo Maija'quë huë'e ñacai Ëjaërepa cato, jaohua'i yo'ose'e seña maca de'oyere pare yo'oquë pa'iji, huajë cuasa nêose'ere. Ja huajë ca nêose'e cato, de'oyere pare isija'a co'amaña quë'ye a'ë. Ja'në ca nêose'e seña maca pa'ye a'ë.

⁷ Du'ru macarepa ca nêose'epi nuñerepa yo'oye pa'ito tujupë yequë ca nêoñe peora'pi.

⁸ Jaje pa'ina, Maija'quëpi nuñe yo'oma'cohua'ire paire ñani capi:

Yequë mu'seña Israel paire,

cui'ne Judá tsëcapëre huajëye yo'o ja'ñe ca nëoñe pa'ija'coa.

⁹ Jeto Egípto jejapi mësaru aipëre jëtëna tseani etoni sa maca, ca nëose'ejë pa'ye ca nëoñe peosipi:

jaohua'ire cato yë'ë ca nëose'e de'oye sehuocaiye paši do'ire jeocohuë, caji, Ëjaëre papi.

¹⁰ Ja mu'seña tëtto sai maca Israel paire yë'ë ca nëo ja'ñe iye a'ë caji, Ëjaërepa.

Iohua'i cuasa huë'ñana yë'ë cuañëñere tëocasi'i,

cui'ne iohua'i joñoana toyasi'i,

ja maca yë'ë pa'ija'quë a'ë, iohua'i Diosu

cui'ne iohua'i pa'ija'cohua'i a'ë, yë'ë pai.

¹¹ Ja maca cato tsí mañaje cui'ne aiohua'ije si'aohua'i yë'ë coca asacohua'ise'e pa'ija'cohua'i a'ë.

Jaje pa'ijëna, mai Ëjaë cocare asajë'ë, cajë yecohua'ipi cajeohua'ipi,

panita'a te'e tsëcapë acohua'ipi ye'yañu'u cajë yo'oye peosipi,

tsoe yë'ëre ire pani pai ñape asa do'ire.

¹² Cui'ne yë'ëpi iohua'i co'aye yo'ose'ere oni yejecani ti huañëyeja'quë a'ë,

cui'nare cuasa coñe peoyerepa.

¹³ Jaje pa'ina, huajëyere Maija'quëpi ca nëoni, du'ru ca nëose'ere ai co'amaña'ë caji. Jaje pa'ina, ai co'amaña cato peo huë'ña esa carajani huesë ja'ñe a'ë.

9

Iye Yeja Maija'quë Huë'e Cui'ne Ma'tëmo Huë'e

¹ Tsoe huë'ña Maija'quë ca nëose'e cato, iye yeja Maija'quë huë'ena Maija'quë sejë yo'o ja'ñe quë'ye paji'i.

² Ja ca'ni huë'e cato ñeje ne de'huasico paji'i, du'ru macarepa tu'rihuëre, de'o huë'ña hue'yo sitore toa tsëoni nëco sai huë, cui'ne Maija'quëre isisi go, cui'ne mesa paji'i.

³ Cayaye acore capi tēhuasico je tētere paji'i, yequë tu'rihuë ñeje hue'eco ai de'o hue'ñarepa.

⁴ Jarote paji'i, huëo sē ma'ñare ëoco oropi de'o sai huë nesico cui'ne iti ca nëose'e de'hua mahuë, si'a tē'ña oropi jasico paji'i. Cui'ne mahuë sa'nahuëre te'e oro ucu duruhuë paji'i. Iona ma'tëmopi tomesí aore ayasicopi paji'i. Cui'ne jarote paji'i, Aarón tse'lequë pa'isi tupë. Jao cato cui'naopi huajëco de'oni joro quë'ico pa'isico paji'i, cui'ne quëna toñana ca nëose'ere toyase'ere ayasico paji'i.

⁵ Cui'ne ja mahuë ëmëje'ere pa'ë, hui'ñaohua'i capëa quë'iohua'ipi, Maija'quë pa'iyë iñoja'cohua'ire nesicohua'ipi. Iohua'i capëapi mahuë sjo toto si'aore peo huë'ña pë'pëhuë, pai co'aye yo'ose'ere oni yeje huë'ñare. Ja ayere ai jerepa quëaye peoji, yure cato itise'e pa'ijaquë.

⁶ Jaje de'huasicono Maija'quë huë'e ñacaicohua'ipi si'anë jëoñe peoyerepa cacayë, du'ru tu'rihuëna Maija'quëre necaiye yo'ocohua'ipi.

⁷ Jaje pa'iquëta'are yeco seña maca tu'rihuë cato Maija'quë huë'e ñacaicohua'i ëjaëre pase'e cacaye paji'i, te'e ometëcahuëre te'erepa. Cui'ne jarona cacaquë pani saye pa'iji, nëicohua'i tsiere j co'aye yo'o do'ire saiquë, cui'ne pai co'aye yo'o do'ire saicas'i caquë.

⁸ Iye yo'ose'ejë'a, Maija'quë joyopi maire quëaji, ja yë'ta'a du'ru maca tu'rihuëna Maija'quëre seña pa'ito, Maija'quëre ca huë'ñare pana sai ma'api ja yë'ta'a hui'yoma'copi paji'i.

⁹ Si'aye iye yo'ose'e cato quëaji, iye mu'seña pa'icohua'ini. Jaje pa'ina, jarona Maija'quëre isijë, cui'ne nëicohua'ire huajë ëojë secohua'ire de'oye cuasaye ti necaiye papi.

¹⁰ Ja yo'oye cato coa go ainesese'e, ucyuyese'e cui'ne si'si cuya toñese'e ëmëje'ese'e cocajiti. Jaje pa'ina, Maija'quë si'aye yeque pona macaja'a jaje yo'oye paji'i.

¹¹ Jaje pa'iquëta'are Cristo tsoe daji'i. Jaë api, Maija'quë huë'e ñacai Ëjaërepa, si'a de'o co'amaña carajai ma'ñere paquërepa. I ñacai huë'e cato ai de'o huë'ere pa'ë, nuñerepa yo'o huë'e a'ë, pai nema' huë'e a'ë, iye yeja huë'ere caye pañë.

¹² Cristo Maija'quë huë'ena cacapi, j tsierepa isisi'i caquë, cacama'ë paji'i, huequë tsiere, panita'a jo'ya ñama tsiere isisi'i caquë. Jaje pa'ina, te'erepa caca tējipi. Cacani maire tija'acaji'i, huaso cuañoni ti pani huesëyere.

¹³ Huequë ëmëohua'i tsie cui'ne jo'ya ñama ëmëohua'i tsie cui'ne huequë nomi tsj tsie Maija'quëre isi huë'ñana ëosi huata tutu quë'ye paji'i. Jaje pa'ina, itipi co'aye yo'osicohua'ina tsoaru si'sire peocohua'i de'ocohua'ire ne tutu quë'ye pa'iji, ëmëje'ese'e.

¹⁴ Jaje pa'iyë sëte, je ja'yerepa Cristo tsie tutu paquë'ni! Maija'quë joyopi ti pani huesëquëpi yo'oquëna, ija'a co'ye Maija'quëna isiquë ti si'si tē'ña peoquëpi yo'ose'e. Jaje

pa'ina, i tsiepi ju'liñena sayere mai cuasayere peo hue'ña tsoa toçajji, Maija'quë huajëquëre pare de'oye necaijajë caquë.

¹⁵ Jesucristo api, huajëye ca nëose'ere yo'oquë, Maija'quë cajeohua'ire paire necaiquë. Jajë pa'ina, i ju'liñepi sai toçajji'i, ja'në ca nëose'ere yo'ojë tayose'ere, Maija'quë soisicohua'ipi ti pa'iyere i ca nëose'ere pajajë caquë.

¹⁶ Jajë pa'ina, i co'amaña huahueyere ca nëose'epi do'i quë'yerepa pa'ijaquë cani du'ru macarepa iti ca nëosiquëpi ju'isiquë api asayerepa pa'iji.

¹⁷ Iti cuasa nëosiquëpi ja yë'ta'a huajëquë pa'ito ca nëose'e do'i peoye pa'iji. Juquëna, do'i quë'ye paji'i.

¹⁸ Ja do'ire du'ru macarepa cuasa nëose'epi do'i quë'ye pa'ijaquë cajë tsie casose'epi, huëose'e a'ë.

¹⁹ Jajë pa'ina, Moisés si'aohua'ire quëapi, Israel paire cuañese'e cayere. Quëa tējini maja'i naña sēohuë nesicipi catë yoje pa'iona, hisopo tarana huëni huequë cui'ne jo'ya ñama tsiena ocopi co'mesicona co co'i meni cuañese'e toya pēpēna tsiepi sa'cuapi, cui'ne paireje si'aohua'ire tsiepi sa'cuapi.

²⁰ Jajë yo'oquë capi, jaohua'ire: "Iye tsie cato, Maija'quë mēsarū yo'o ja'ñere cuañe nëoñere do'i quë'ye neñere iñoñe a'ë."

²¹ Jajë caquë Moisés, Maija'quë ca'ni huë'eje tsiepi si'a huë'e sa'cuapi cui'ne Maija'quëre necaijë yo'o co'amañaje si'aye tsiepi ne saohuë.

²² Jajë pa'ina, cuañese'e caji: ti si'aye tsie do'ipi de'ocohua'ire neñe pa'iji. Tsie casoye peoto, co'aye yo'osi do'ire sai toñe peoji.

Cristo Ai Yo'ose'epi Co'aye Yo'ose'e Nejocaji'i

²³ Iye yeja ayere ma'tëmo co'amañaje pa'ye nëicohua'ire huaijë isi do'ipi tsoa toñe paji'i. Jajë pa'iquëta'are ma'tëmo pa'ija'cohua'ire cato nëicohua'ire huaijë isiye jerepa pa'yepi tsoa toñe pa'iji.

²⁴ Jajë pa'ina, Cristo, paipi ma'tëmo huë'eje pa'iore nesi huë'ena cacaye papi. I cato jare ma'tëmore pana cacapi. Yure jarote pa'i mai do'ire seçacai pa'iji, i pēca ja'quë ña hue'ña.

²⁵ Maija'quë huë'e ñacai ëjaērepa judío pa'i cato de'o hue'ñare pana ometēca ñape cacaquë api, i tsie peoyere isisi'i caquë. Jajë pa'iquëta'are Cristo cato si'anēpi ju'i i tsie isiquë pa'iyere paji.

²⁶ Jajë yo'oye pa'ito Cristo yeja de'hua maca aquëpi si'anë jucacai patira'pi. Jajë pa'iquëta'are Cristo cato yure tēji mu'seña pa'i maca dani i ju'i do'ipi si'aye co'aye yo'oyere nejocaji'i.

²⁷ Pa'i ju'liñe je'quë te'erepa ju'liñe pa'iji. Ja jeteyo'je cato johua'i yo'ose'e ñani ca tējiyese'e pa'iji.

²⁸ Jajë pa'ye cui'ne Cristoje te'erepa jucacani tējipi, jai pa'i co'aye yo'o do'ire nejocasi'i caquë. Tijupë ñai co maca cato co'ayere nejocasi'i caquë daiye pasipi, ite utejë pa'icohua'ire huasosi'i caquë daija'quë api.

10

¹ Moisés cuañese'e cato pa'i to'ouje pa'ye paji'i, itirepa dai ja'ñe pa'ina. Jajë pa'ina, itirepa peopi, ja do'ire cuañese'e yo'ocohua'ire de'ocohua'ire pare necaiye peopi, ometēca ñape Maija'quëna tsiojajjē nëicohua'ire huaijë isicohua'ire.

² Jajë pa'ina, cuañese'epi de'ocohua'ire tsoa toñe pa'ito Maija'quëre isijjē nëicohua'ire huaiye jēora'huë, co'aye peocohua'ire nëina, asajë.

³ Jajë pa'iquëta'are nëicohua'ire huaijë isijjē yo'oye cato coçajji'i, johua'i co'aye yo'oyere ometēca ñape cuasayere.

⁴ Jajë pa'ina, huequë ëmēohua'i tsie, cui'ne jo'ya ñama tsie, co'aye yo'oyere nejocaiye ti'a ma'ñe paji'i.

⁵ Jajë pa'ina, Cristo iye yejana i caca maca capi, Maija'quëre:

Mē'ere isifu'u cajë, nëicohua'ire huaijë yo'oye, cui'ne co'amaña mē'ere isiye mē'ë cato coequë ñañë.

Jajë pa'ina, mē'ēpi yē'ere capere isihuë.

⁶ Mē'ë cato sihuama'ë pa'iyë, co'aye yo'osi do'ire tsoa toñu'u cajë, nëicohua'ire huani ëojë, cui'ne co'amañare isijjē yo'oyere.

⁷ Ja maca ñani cahuë: "Daiyë, yē'ë mē'ë yēyeje pa'ye yo'osi'i caquë.

Jajë toyase'e pa'iji, toya pēpēna yē'ë yo'o ja'ñe ayere."

⁸ Jajë pa'ina, du'ru macarepa caji, Moisés cuañese'ere yo'ojë co'aye yo'o do'ire nejoñu'u cajë nëicohua'ire huani isijjē, cui'ne ëojë yo'ojëta'are Maija'quë coequë sihuama'ë ñaji.

⁹ Casiquëpi jeteyo'je acore caji: "Daiyë, yē'ë mē'ë yēyeje yo'osi'i caquë." Jajë cani caji, si'aye ja'në nëicohua'ire huaijë isijjē yo'ose'ere nejoñë caquë. Nejonī huajëyere neñë, caquë.

¹⁰ Jaje pa'ina, Jesucristo i capëre ti isi tējiquë, Maija'quë yëyeje pa'ye jucacai do'ipi, mai Maija'quë tsecohua'i de'ohuë.

¹¹ Maija'quë huë'e ñacai ëjaohua'i judío pa'i acohua'i cato si'a mu'señapi isicohua'i a'ë, te'eye pa'yere, si'anë nëicohua'ire huaijë. Jaje yo'ojëta'are ja yo'oye pa'i co'aye yo'ose'ere nejo tija'ne peoye a'ë.

¹² Jaje pa'iquëta'are Jesucristo cato te'ore pare isi tējipi, i ju'iñepi. Ja jeteyo'je yure cato Maija'quë ëja te'tere ja'rusiquëpi ñu'iji.

¹³ Jarote pa'i uteji, ite sañope yo'ocohua'ire Maija'quëpi i quëo huë'ehuëna të'ya meni saojaquë caquë.

¹⁴ Te'e i isiyepi Maija'quë tsecohua'ire ti nuñe pa'iohua'ire nepi.

¹⁵ Jaje pa'ina, Maija'quë joyopi jare nuñere pa'ë caquë quëaquë caji, ñeje:

¹⁶ Yë'ëpi ja mu'seña tëto saisi maca pa'ire ñeje yo'oja'quë a'ë, caji, mai Ejaë:

Iohua'i joñoare pana yë'ë cuañeñere ayaja'quë a'ë,

Cui'ne johua'i cuasa huë'ñana toyaja'quë a'ë, yë'ë cuañeñere.

¹⁷ Cui'ne yequeje caji:

Ti cuasa cõne paja'quë a'ë, johua'i tayojë co'aye yo'ose'ere.

¹⁸ Jaje pa'ina, yure cato tsoe sai tã cuañose'e sëte, co'aye yo'o do'ire sai toñu'u cajë isijë yo'oye peoji.

Maija'quëna Tsiojaiñe Pa'iji

¹⁹ Jaje pa'iyë sëte Maija'quë do'ijë yure cato ca'raye peoyerepa Jesús tsie do'ipi Maija'quë huë'ena i pa'i huë'ñare pana cacaye pa'iji.

²⁰ Jesús ju'i do'ipi huajë ma'a, ti pa'i ma'arepa tsoe tëhuose'ere maire hui'yocaisi ma'aja'a saijë tija'ne pa'iji, i pa'i huë'ñare pana.

²¹ Jaje pa'ina, Jesu api, Maija'quë huë'ere pa'i maire seacai Ejaërepa, Maija'quë huë'e ñacai Ejaë sëte.

²² Jaje pa'ina, nuñe pa'i joñoapi pa'ire paji Maija'quëre cuasacohua'ipi, co'aye cuasaye tsoa tōsicohua'ipi, capëje de'o ocore papi tsoa tōsicohua'ipi, ja yë'ta'a co'acohua'ire nëiñe peocohua'ipi, ca'rama'pë Maija'quë quë'rona sa tsiojañu'u.

²³ Jaje pa'ina, Maija'quëpi i ca nëose'ere isire paja'quë api cuasa do'ire, ti jëa coema'pë ocue pa'i macarepa pañu'u, Maija'quëre pa'ire paji cuasajë mai utejë yo'oyere.

²⁴ Jaje pa'ina, co'eñu'u, pa'ire ai oiyepi, cui'ne de'o co'amañare neñepi, ai pa'ija'core.

²⁵ Jaje pa'ina, mai Ejaë dai mu'se jerepa ja'yere pa'iyë sëte pa'i ñape yecohua'ire ca sëtou'u, de'oye yo'oja'cohua'ire. Jaje pa'ina, si'anë jeoma'pë tsi'iyë pañu'u, tsi'sima'cohua'i yo'oyere ye'yema'pë pañu'u.

²⁶ Jaje pa'iquëta'are maipi tsoe nuñerepa pa'iyë asasicohua'ita'a ja yë'ta'a co'ayere yëjë yo'ocohua'i pa'ito peoji, yeque mai co'aye yo'o do'ire sai toçaiye.

²⁷ Coa Maija'quëre sañope yo'ocohua'ire nejo huë'ñase'le huajëya'ye pa'iose'le uteye pa'iji, toa coro mëi huë'ñapi pa'i ñape yo'ose'le ñani nejo huë'ñapi.

²⁸ Najë'ë, Moisés cuañese'ere, sehuoma'ë yo'osiquëre, cayaohua'i, panita'a toasocohua'i i yo'oye ñasicohua'ipi. Sañope cacohua'i pa'ito ti oima'pë jaëte huani jeoñe paji'i.

²⁹ Jaje pa'ito jerepa si'se cuañoja'cohua'i a'ë, ja tsiepi Maija'quë tsecohua'ire necaisicohua'ita'a, Maija'quë mamaquëre meñe tsa'cujë, Maija'quë ca nëose'le tsiere coecaisicohua'i cui'ne Maija'quë joyore johua'ire oi necai joyore sañope casicohua'i. Ja tsie cato huajëye ca nëose'ere do'i quë'yerepa meñe necaiye a'ë.

³⁰ Maipi asayë, Maija'quë case'e: "Pa'i yo'ose'le nuñerepa ñaquë ne de'huaye cato yë'ë yo'oye a'ë. Yë'ëpi saisi'i." Cui'ne yequeje capi: "Maija'quë i pa'ire ñaquë johua'i yo'ose'eye pa'ye saija'quë api."

³¹ Ai huajëya'ye pa'ye a'ë, Maija'quë huajëquërepa jëñana tomeñe, jaje pa'iohua'ipi.

³² Mësaruja'a mia huë'ña pa'i coca asasi maca ai yo'oye ai pa'ina, quëco paye pajë quëcose'ere cuasajë'ë.

³³ Jaje quëcojëna, mësarua'ire ai co'aye cajë cui'ne co'aye yo'ohuë, si'a pa'i ña huë'ñana. Jaje yo'ojëna, yecohua'ipi iti co'aye yo'o cuañocohua'ina se tsiõni ai yo'oyere paë'ë.

³⁴ Co cuañosicohua'ire mësarupi teaye ñajë cõcaë'ë. Cui'ne mësarua'ire peo huë'ña jiotoje sihuajë ñahuë, jeto ma'tëmõre ti carajaima'co'a maña payë, cuasajë quëcojë.

³⁵ Jaje pa'ina, mësarua'ire Maija'quëpi necaija'quë api cuasajë quëcoyere jeocoma'pë pa'ijë'ë. Ja cuasase'epi mësarua'ire pa'ia'ne tija'cohua'i a'ë.

³⁶ Jaje pa'ina, quëcojë pa'ijë'ë, Maija'quë yëyere yo'oñu'u cajë. Jaje yo'ojë mësarua'ire si'aye i ca nëose'ere paja'cohua'i a'ë.

³⁷ Jaje pa'ina, toyase'e caji:

Esa, ai esa daija'quë api,

Iti daija'quëre casiquëpi, ai tsoe nëima'ë pasipi.

³⁸ Yé'ë tsequë nuñe pa'i cato Maija'quë pa'ire paji cuasa do'ipi pa'ija'quë api,

Jaje pa'iquëta'are sihuama'ë pa'iyë, ja'në pa'ise'ena co'iquëre cato.

³⁹ Jaje pa'iquëta'are mai cato ja'në pa'ise'ena co'ijë nejo cuañocohua'i acohua'i peoyë. Mai cato Maija'quë pa'iji cuasa do'ipi joyo pa'iyena tū'acohua'i acohua'i a'ë.

11

Pa'ire Paji Cuasaye

¹ Pa'ire paji suasaye cato mai uteyere paja'cohua'i a'ë suasajë pa'iyë a'ë, cui'ne mai ña ma'ñere tsoe ñase'eje pa'ye suasajë pa'iyë a'ë, ti jëa coema'pë.

² Jaje pa'ina, mai aihua'i tsoe pa'isicohua'i jaje cuasa do'ipi de'ocohua'irepa ca cuañohuë.

³ Jaje pa'ina, mai pa'ire paji suasacohua'ipi si'a co'amaña mai ñañe peose'ere Maija'quëpi j yë'ose'epi de'huapi, suasayë.

⁴ Pa'ire paji cuasa do'ipi Abel ai de'oyere Maija'quëre isipi, Caïn isiye jerepa pa'yere. Jaje pa'ina, Maija'quëpi ite nuñe yo'okuëre caquë j isiyere sihuacaji'i. Jaje pa'ina, tsoe ju'isiquëta'a Abel ja yë'ta'a pa'ire paji suasayeja'a caji.

⁵ Pa'ire paji, cuasa do'ire Enocre ma'tëmona Maija'quëpi ju'ima'quëre huajëquëre sa'aji'i. Saëna, paipi ite co'e juja'ahuë'ë. Jaje pa'ina, toyase'e caji, Enoc ja yë'ta'a ma'tëmona sa cuañoma'në Maija'quë yëyere yo'oquë pa'aji'i.

⁶ Jaje pa'ina, pa'ire paji suasaye peocohua'i, Maija'quë yëyë yo'o tū'añe peoji. Pa'ire paji suasaye a'ë Maija'quëna tsiojañe. Cui'ne, Maija'quëpi ite co'ecohua'ire jaiye de'oyere pare isi ja'ñere tū'añe.

⁷ Maija'quëpi ti ña ma'ñepi pa'ija'coa, yequë mu'se caquë quëaëna. Pa'ire paji cuasa do'ire Noë de'oye sehuoni jai yohuë de'huapi, j tsëcapëre huasoja'core. Jaje pa'ina, Noë pa'ire paji suasasi do'ipi huaso cuañopi, iye yeja pa'ise'e ne huesëjëna.

⁸ Pa'ire paji cuasa do'ire Abraham Maija'quë soiyë de'oye sehuoni j yeja jëoni, Maija'quë soi hue'ñana saji'i, ite isija yejana. Jarona saiyë, suasama'ë huesërepa sa'aji'i.

⁹ Sani pa'ire paji cuasa do'ipi Maija'quë isisi'i ca nëosi yejare tije pa'ipi ca'nipi nesi huë'ñare pa'aji'i. Pa'isiquëni cui'ne Isaacje cui'ne Jacobje ca'ni huë'ñare pa'ahuë'ë, j isisi'i ca nëose'e pacohua'ipi.

¹⁰ Jaje pa'ina, Abraham Maija'quëpi cuëcueni jëacore pare nesi daripëre utequë pa'aji'i.

¹¹ Pa'ire paji, cuasa do'ire Zara aiopi cui'ne caraopi tutu isi cuañoni mamaquëre coao, ite isisi'i ca nëosiquëni, care papi caco sehuo do'ire.

¹² Jaje pa'ina, Abraham pani tēji mu'señapi j acohua'ire jai paire papi quëna huë ma'ñoco ja'i pa'ire pare cui'ne jai tsiaya tē'tēpa mejahuëje pa'yere pare, cuëcue saoye peoyerepa.

¹³ Si'aohua'i jaohua'i cato Maija'quë ca nëose'e pama'pë jujua'huë'ë. Jaje pa'iquëta'are pa'ire paji suasacohua'i sēte so'opi se ñajë, pa'i ja'ñere sihua'ahuë'ë. Jaje pa'ina, iye yejare tūohua'ipi coa pa'iyë, cuasa'ahuë'ë.

¹⁴ Jaje cacohua'i cato tūñarepa quëayë, ja yë'ta'a yequë yejare johua'i paja yejare co'ejë cu'iyë cajë.

¹⁵ Jaje pa'ina, johua'i daisi yejare suasajë cacohua'i pani tsoe co'ira'huë, johua'i daisi yejana.

¹⁶ Jaje pa'iquëta'are johua'i cato ai de'o yejare pare yëhuë, ma'tëmo yejare. Jaje pa'ina, tsoe de'huacaisiconi de'o daripë, johua'i pa'ija'to paye sēte Maija'quë huajëya' coema'ë pa'iji, johua'i pëca ja'quëre hue'yoto.

¹⁷ Pa'ire paji cuasa do'ire Abraham Maija'quëpi neñasi'i caquë caëna, j ca nëosi mamaquëni huani ëoquë isiquë sēsī'i caquë yo'opi. I mamaquë te'i macani isire pasi'i caquë yo'opi,

¹⁸ Maija'quëpi Isaac do'ija'a jai paire mē'ë acohua'ire paja'quë a'ë ca nëosiquëta'are.

¹⁹ Jaje pa'ina, Abraham cato coa huesë yo'oye papi. Asaquë yo'opi, Maija'quëpi ju'isicohua'ire huëoquë pa'iyere. Jaje pa'ina, ju'isiquëje pa'ini mamaquëre huajëquëre pa copi.

²⁰ Pa'ire paji cuasa do'ipi Isaac, yequë mu'se Jacob cui'ne Esau de'oye pa'i ja'ñere caca'aji'i.

²¹ Pa'ire paji cuasa do'ipi Jacob José mamajëre, pai ñapere johua'i de'oye pa'i ja'ñere caca'aji'i, j ju'ñe tū'asi maca. Cui'ne j doquë cu'i tupëna jëaye tota paquë nëcaquë Maija'quëre de'oquëre pa'ni caquë sihua'aji'i.

²² Pa'ire paji cuasa do'ipi José j ju'i maca Israel mamajëpi Egíptopi yequë mu'se etani saija'cohua'i a'ë caji. Caquë j tara jaje yo'ojë'ë caquë cuañepi.

²³ Pa'ire paji cuasa do'ire Egípto pai éjaëpi tsjire huani jeoñe pa'iji cuañese'e pa'itoje, ca'rama'pë tsihua'ère de'oquë macani ñani oijë Moisésre ja'a coasiquëni pëca ja'quëohua'i toaso ñañëohua'ire yahueni pahuë.

²⁴ Pa'ire paji cuasa do'ipi Moisés posë de'osi maca coepi, Egípto éjaë mamaco, mamaquë hue'yo cuañoñe.

²⁵ Coa ai jerepa Maija'quë pai ja're co'aye yo'o cuañoñere yëpi, co'ayere yo'oquë nëhui tëcahuë maca sihuaye pa'yere coequë.

²⁶ Jaje pa'ina, cuasapi, ai jerepa de'oji, Cristo do'ire Maija'quë tsecohua'i ja're ai yo'oyepi. Jaje pa'ina, Egípto de'o co'amañare do'peoye ñapi, Maija'quë ite isija'a co'amañare jerepa pa'ye cuasaquë.

²⁷ Pa'ire paji cuasa do'ipi Moisés Egípto pai éjaë ite pëiñe ca'rama'ë Egíptopi etani sani, Maija'quëre ñañeje pa'yerepa i yëyere cuasaquë ocue pa'i macarepa paji'i.

²⁸ Pa'ire paji cuasa do'ipi Moisés Egípto eta huajë mu'se tija'quëna, sihuaquë cuañepi, eta sa'noana tsiepi tsoajj'ë caquë. Jaje tsoarena, huani jeo huñaëpi te'ireje Israel pai du'ru mamaquëre pare huaiye paja'quëre capi.

²⁹ Pa'ire paji cuasa do'ipi Israel paije jai Maja'iña yeja jajucore saiyeje pa'ye jeë'ë, yequë je te'tena, ñani cui'ne Egípto paije jeñu'u cajë yo'ojë dutu jujua'huë'ë.

³⁰ Pa'ire paji cuasa do'ipi Israel pai siete mu'seña Jericó daripë tëhuopa yërhueja'a tēja'ahuë'ë. Tēja'aisi maca tëhuopapi jë'ye darëa'co'ë.

³¹ Pa'ire paji cuasa do'ipi Rahab co'a nomioje Maija'quë pai a'ë cuasama'cohua'i ju'ijëna, te'je ju'iñe pao, Israel paire, yahue peocohua'ire de'oye ñacaisi do'ire.

³² ¿Iquere yeque caja'quë a'ni? Jaje pa'ina, yë'ëpi, Gedeón, Barac, Sanson, Jefte, David, Samuel, cui'ne Maija'quëre quëacohua'i yo'ose'ere quëaquë pa'ito mu'sepi caraja'co pa'ini.

³³ Pa'ire paji cuasa do'ipi yecohua'i yejaña siohuë, nuñerepa de'oye cuañecohua'i de'ohuë, Maija'quë ca nëose'ere isi cuañoñuë, jai emu yaiohua'i yë'opojaje si'ñe sahuë.

³⁴ Jai toana u huesëyere yayoñuë, hua'tipi huani jeoñu'u cajë yo'ojëna, catihuë. Sëyë huesësicohua'ipi tutu isi cuañoñi tutu hue'ejë, yequë yejaña soldado paire johua'ire sañope yo'ocohua'ire uihua quëco sahuë.

³⁵ Paë'ë, cui'ne nomiohua'ije cajeohua'i ju'isicohua'ipi cui'naohua'ipi huëtena pasicohua'ije. Yecohua'ipi ai de'oye pa'yena juni huëni pa'yere cajë joye huaso cuañoñe coejë juë'ë, huaijëna, ai yo'ojë.

³⁶ Yecohua'ipi ai yo'ohuë, co'acohua'i a'ë cajëna, si'sejëna, quëna meapi sëajëna, cui'ne co hue'ñana cojëna.

³⁷ Yecohua'ipi, quëna pëapi jea huëa cuañoñuë, yecohua'ipi jopore paja'a yëto tëa cuañojë, panita'a hua'tipi tē'ca tētejëna juë'ë. Yecohua'ipi cabra cui'ne yëi ñama ca'nire ju'ijë si'a hue'ña coa cunirojaë'ë, co'amaña peocohua'ipi, ai co'a ju'ijë oicohua'ipi yecohua'ipi josa yo'ojëna, paë'ë.

³⁸ Airepa de'o paini, si'aohua'i iye yeja paipi de'oye yo'oyere carasicohua'ipi coejëna, johua'i sani pëaja'to peocohua'ipi yeja coñare, cuëne yejañare cui'ne ainoare panirojaë'ë.

³⁹⁻⁴⁰ Maija'quë ña hue'ñana pa'ire paji cuasajë de'oye ite yo'o iñosicohua'ita'a i ca nëose'e isi cuañoñe pahuë, Maija'quëpi yequë mu'seña de'oyerepa necaquëna, mai ja're tsioni nuñe pa'icohua'irepa pa'ijajë caquë ña nëosi do'ire.

12

Jesuse'ere Ñajë Tuñu'u

¹ I Maija'quë pa'iji cuasajë yo'o iñosicohua'ipi maire tēja'tatena pa'iyë sëte jeocoñu'u, si'aye maire déquëye josa yo'oyere cui'ne co'ayepi maire hueñere. Jeocóni jeto ñese sai hue'ñase'e se ñajë huë'huëñu'u.

² Jaje pa'ina, maire de'ocohua'ire nequëna, Maija'quë pa'iji cuasaye isiquëna, Jesuse'ere ñajë tuñu'u. Co'acohua'ise'e soquë sarahuana quë cuañojë ju'icona, huajëya'ye pai ñajëna, ai yo'oquë ju'i ma'ñe caye papi, ai yo'osi jeteyo'je ai sihuaja'quë cuasa do'ire. Jaje pa'ina, Maija'quë éja te'tena ja'rupi.

³ Jaje pa'ina, co'acohua'ipi ite co'aye yo'ojëna, si'aye quëcosiquëre pani Jesuni cuasajë tuijë'ë, yo'o jujani jeoñe paja'cohua'i.

⁴ Ja yë'ta'a mësarú tija'ñe pañë, co'ayere yo'oma'pë pañu'u cajë si'anë sañope yo'ojë ju'iñena.

⁵ ¿Mësarú tsoe huñëyete, Maija'quë mësarute i mamajëre sëte yëhuoquë cayere? Ñeje toyase'e caji:

Yë'ë mamaquë coema'ë pa'ijë'ë, më'ë tayoyere nu'ñequë si'seto.

Yëhuoquë yo'oto yo'o jujahuë cama'ë pa'ijë'ë.

⁶ I oicohua'ini Éjaë cato tayoto nu'ñequë api.

Cui'ne i mamajë de'osicohua'ini Ējã cato si'sequë api.

⁷ Maija'quëpi mësarute mamajëre yo'oyepi yo'oji. Jaje pa'ina, quëcojë'ë, i si'seye. ¿Ique mamaquëpi pëca ja'quëre nu'ñe cuañoma'quë pa'iquë'ni?

⁸ Jaje pa'iquëta'are, Maija'quëpi mësarute si'aohua'ire i mamajëre si'seyeje pa'ye si'sema'ë pa'ito mësaru i mamajërepa peoyë, yecohua'i a'ë.

⁹ Cui'ne mai tsj pa'inë, mai tayoyere nu'ñejë, mai iye yeja ja'quëohua'ipi si'sejë pa'ahuë'ë. Yo'ojëna, maipi johua'ire ëjaohua'ire ñajë ca'rajë de'oye yo'ohuë. ¿Jaje me yo'ojë ai jerepa Maija'quëre ma'tëmo aquëre pare de'oye sehuocajjë yo'o ma'ñeni ti pa'iyere pañu'u cajë?

¹⁰ Iye yeja ja'quëohua'i cato iye yeja nëhui tëcahuë pa'iyere cajë nu'ñejë si'sehuë, johua'i yëyeje pa'iohua'i pa'ijajë cajë. Jaje pa'iquëta'are Maija'quë cato mai de'oye ti pa'iyere caquë si'seji, ije pa'iohua'ire nesi'i caquë.

¹¹ Si'aye ja'a si'se cuaño maca cato a'siyesele pa'iji. Pa'ina, de'oye paji cajë coeyë. Jaje pa'iquëta'are jeteyo'je jo'cua de'oye pa'iyere, cui'ne nuñerepa pa'iyere isiji, tayosi do'ire si'sese'epi.

Maija'quë Yë'ore Asaye Coejë Pa'i Do'ire

¹² De'oji yure jaje pa'iyë sëte huajë tuture papi mësaru jëñare jë'jose'ere mëne mëajë'ë, cui'ne mësaru nëca sju tutu peoyere pi'najë'ë.

¹³ Yo'oni yureta'a nui ma'are pare co'ejë'ë. Co'eni saijë'ë, ja maca do'pë nëcayopi ja'juja'coa. Ja'juni tjjupë soto coñe paja'coa.

¹⁴ Maija'quëna isisicohua'ire papi jai pai ja're jo'cua de'oye pa'iyere cajë yo'ojë'ë. Jaje ina isima'cohua'i pani ti te'ije Maija'quëre ñañe peoji.

¹⁵ De'hua ñajë'ë, mësaru aquëpi, sëje oi joyo hue'equëpi josa yo'oquë jai paire co'a de'huaye peoja'core. Jaje pa'ina, Maija'quë de'oye ñacai isiyere si'aohua'i pañu'u cajë de'oye yo'ojë pa'ijë'ë.

¹⁶ Mësaru acohua'ipi yequë nomiore panita'a yequë ëmëre yo'oma'pë pa'ijajë, panita'a Maija'quë tsere coema'pë pa'ijajë, Esau je'quë hua'i de'hua maca do'ina si'aye maja'yërepa pa'iyë peoquë tomeaji'i.

¹⁷ Ja maca Esaupi pëca ja'quëre de'oye pa'i ja'ñere cacajjë'ë caquë seina, cacaiye pa'aji'i, otarepa oi catoje, mësarupi tsoe iye toyase'ere asacohua'i a'ë.

¹⁸ Mësaru cato Sinaí cutihuëje pa'iona, tsiojajima'pë paë'ë, Israel pai tsiojajjë pa'ise'eje pa'yena, toa tsëni nëcaciona, nea hue'ñana ñamije pa'yena, tutu ai juta hue'ñana. Cui'ne

¹⁹ asama'pë paë'ë, duruhuë juiye pisiyeje, cui'ne Maija'quë yë'ojë asama'pë paë'ë. Ja yë'o caye asacohua'i cato i cuañehere quëco t'j'ama'pë

²⁰ ai jerepa caye pajë'ë, ca'ahuë'ë, ite. I caye cato paji'i: "Ai cutihuëna tsa'cuquëre cato quëna pëapi jea hueñañe paji'i, panita'a uiyopi seso etojajñe paji'i, nëicohua'irejë huaiye paji'i, jaro tsa'cucohua'ire," capi.

²¹ Jaje pa'ina, Moisésje ja ai huajëya'ye pa'iyere ñaquë quëquëquë capi: "Ai ca'raqüë tsasiyë, yë'ëje."

²² Jaje pa'iquëta'are mësaru cato Sión ai cutihuëna tsiosicohua'ipi pa'iyë, Maija'quë huajëquërepa, pa'i daripëna, ma'tëmo Jerusalënna, cui'ne Maija'quëre sihuañu'u cajë jai pai huiñaohua'i tsi'si sitona,

²³ Maija'quë mamajëpi johua'i mamire ma'tëmona toya cuañosicohua'i tsi'si sitona, tsiojajë'ë. Mësaru cato tsiojajë'ë, si'aohua'ire johua'i yo'ose'eje pa'ye ti ca de'huaquë Diusu quë'rona. Pai joñoare Maija'quëpi nuñerepa pa'icohua'ire nesicohua'i quë'rona tsiojajë'ë,

²⁴ huajë ca nëose'le cayere necaisiquë Jesuna cui'ne maire tsoa tsi tsie quë'rona tsiosicohua'ipi pa'iyë, Abel tsie seña maca de'oye maire necaiyena.

²⁵ Jaje pa'ina, coema'pë Maija'quë caye de'oyerepa asañu'u, Maija'quë iye jejapi soiquë caquëna, asacaiye coesicohua'i jëaye pa'ahuë'ë. Jaje pa'ina, ai jerepa jëa t'j'añe peoji, Maija'quë ma'tëmore papi soiquëna, asacaiye coejë yequere asarojaisicohua'i.

²⁶ Ja mu'seña Maija'quëpi caquëna, yeja ñu'cuea'co'ë. Jaje pa'iquëta'are yure cato caji: "Tjjupë iye yeja cui'ne ma'tëmoje ñu'cue coja'coa, yë'ëpi yo'oquëna."

²⁷ Jaje tjjupë cani caji, si'aye i de'huasele ñu'cueye pa'iji caquë, a'jñe nejoñese'e nejoñe pa'iji, jëayerë pase'e nëaja'core.

²⁸ Maija'quë cuañe te'te maire isiyë cato ti nejo ma'ñe a'ë, ja isi do'ire Maija'quëre de'oji cajë pëpayë ca'rajë, ëjaëre pare ñajë, de'oyerepa ite necañu'u.

²⁹ Maija'quë cato peo hue'ñarepa ëo huesoquë api, toajë pa'i api.

13

¿Me Diusu Yëye Yo'ocaiye Pa'iquë'ni?

¹ Maija'quë do'ijë sëte jëoma'pë si'anë sa'ñe oijë pa'ijë'ë.

² Cui'ne mäsaru huë'ena daicohua'ire oijë de'oye necaiye huänëyema'pë pa'ijë'ë. Jaje yo'ojë yecohua'i jë'quë huññahua'i a'ë cuasama'pë huesërepa de'oye ïohua'i huë'ena necaijë pëpa'ahue'ë.

³ Cuasacaijë'ë, co cuañosicohua'ire, mäsarupi ïohua'i ja're co sitore pa'iyeye pa'ye. Mäsaruje cui'ne yo'o cuaño'ne pa'ïohua'i sëte cuasacaijë'ë, co'aye yo'o cuañojë ai yo'ocohua'ire.

⁴ Si'aohua'i huejani pa'iyere ëjarepa ñajë pa'ijë'ë. Jaje pa'ina, huejasicohua'i nëjo ja're cui'ne ëjë ja're yo'ojë pa'ijë'ë. Jaje pa'ima'cohua'ire Maija'quëpi ïohua'i yo'ose'ere saïja'quë api, huejama'cohua'ipi nomiohua'ire yo'orojaicohua'ire, cui'ne nëjore pajëta'a yequë nomiore yo'ocohua'ire.

⁵ Oima'pë pa'ijë'ë, curiquëre. Mäsaru payere sihuajë pa'ijë'ë. Jaje pa'ina, Maija'quëpi caji, maire: "Te'ohua'ire jëo nëcöye paja'quë a'ë, cui'ne jëoco huesoyeje paja'quë a'ë."

⁶ Jaje pa'ina, Maija'quëna quëco pajë caye pa'iji, ñeje:

Ëjaëpi yë'ëre cöcäiquëre pa'ë.

Jaje pa'ina, ti ca'raye pañë, paipi yë'ëre co'aye neñu'u cajë yo'oye pa'itoje.

⁷ Cuasajë'ë, Maija'quë coca quëajë mäsarute sasicohua'i pa'ise'ere, me jaohua'i pate'ni cajë. Ñajë ye'yejë ïohua'i pa'ise'ere tuijë'ë, pa'ire paji cuasajë yo'ose'ere.

⁸ Jesucristo cato ïpi ñamina'a pa'isiquëpi iye mu'seje pa'iji, jare ti pani huesëji, je'nëna.

⁹ Ao aijë ñeje yo'ojë'ë, cajë cuañese'ere si'aye yo'o t'ajë aicohua'ire ja yo'oyepi ti cöcäiye paji. Jaje pa'iquëta'are maire cato ai cöcäiji, Maija'quë maire oiypë, mai joyona tutu isiquëna pa'iyepi. Jaje pa'ina, sehuosicohua'i ja'në ye'yese'ere jëoni t'üne ye'yayena ye'yema'pë pa'ijë'ë.

¹⁰ Mai cato payë, t'üne pa'yere Maija'quëna isise'e. Ja cato iye yeja Maija'quë huë'e ñacaicohua'i a'ñe peoye a'ë.

¹¹ Maija'quë huë'e ñacai ëjaërepa cato pa'i co'aye yo'o do'ire sai to ja'ñere isisi'i caquë tsiere de'o hue'ñarepa hue'yo sitona saquë api. Jaje pa'iquëta'are nëicohua'i cä cato pa'i daripë hue'sena etoni peo hue'ñarepa ëo jëoñe paji'i.

¹² Jaje cui'ne Jesuje i tsie do'ipi i paire nesi'i caquë pa'i daripë hue'sena ai yo'oquë juji'i.

¹³ Jaje pa'ina, jënajë'ë, Jesús ja're pa'i daripë hue'sena etañu'u. Etani ai yo'oñu'u, i tea jüni cuañoquë ai yo'ose'eye pa'ye.

¹⁴ Iye yeja mai peoyë, ti pani huesë daripërepa. Jaje pa'ina, yequë mu'se pa'ija'a daripëre co'ejë saiyë.

¹⁵ Jesucristo do'ija'a Maija'quëre de'oquëre pa'ni cajë sihuaye pa'iji, si'anëpi. Ite jaje cajë sihuaye a'ë, coa isijë yo'oyeje pa'ye. Jaje pa'iyë sëte mai yë'opopi de'oquëre pa'ni Maija'quë cajë sihuañu'u!

¹⁶ Huanëyema'pë pa'ijë'ë, mäsaru co'amañapi peocohua'ire cöcäiyere. Ja'ë, Maija'quëre isijë yo'oye. Jare Maija'quë sihuaquë necaiquë api.

¹⁷ Maija'quë coca mäsarute quëacohua'i cuañëñere de'oye sehuocaijë pa'ijë'ë. Jaohua'i a'ë, mäsaru joñoa ñacaijë pa'icohua'i, Maija'quëna ïohua'i yo'ose'ere quëaja'cohua'i sëte. Jaje pa'ina, mäsarupi de'oye sehuocaito sihuajë neja'cohua'i a'ë. ïohua'ipi co'aji cajë oijë neto mäsarute ïohua'i necaiye ti cöcäiye peosipi.

¹⁸ Si'aye nuñerepa yo'oñu'u cajë yo'osicohua'i sëte, tayose'e peoquëna, asajë jo'cua de'oye pa'iyë, nuñerepa yo'ohuë cuasajë. Jaje pa'ina, yëquëre seccacaijë'ë, cayë, mäsarute.

¹⁹ Maija'quëpi jëjo saokuëna, esa yë'ë sani mäsaru ja're cöni pa'i ja'ñere cajë. Seccacaijë'ë, cayë.

De'oye Pa'i Ja'ñere Caquë Pëpa Tëjijye

²⁰ Jo'cua de'oye pa'iyë isï Diusupi yëi ñama Ëjaëre pare, ju'isiquëni huëosiquëpi, mäsarute ti ca nëo huesose'e necai tsie do'ipi,

²¹ nuñe pa'icohua'ire, si'aye i yëyere yo'oja'cohua'ire nejaquë. Jaje yo'oquë Jesucristo do'ipi maire i sihuaquë ñañere yo'ojaquë. De'oquëre pa'ni cajë si'anëpi ise'ere sihuajë pañu'u. Jaje pa'ijaquë.

²² Maija'quë do'ijë, yë'ë mäsarute yëhuoquë case'ere quëcojë de'oye asacaijë'ë. Nuñerepa caye cato yë'ë mäsarute toyasico nëhuicoa.

²³ Asajë'ë, cui'ne Maija'quë do'iquë Timoteo tsoe eta huajëpi, cosiquë pa'isiquë. ïpi yë'ë quë'rona t'itasiquë pa'ito i ja're cöni sasi'i, mäsarute do'i sai maca.

²⁴ Si'aohua'ire, Maija'quë paire cui'ne mäsarute Maija'quë coca quëajë ñacaicohua'ireje pëpacaijë'ë.

²⁵ Italia yejapi daicohua'ije, mäsarute pëpa saoyë. Maija'quë oi ñacaiyepi si'aohua'ire mäsarute pa'ijaquë. Jaje pa'ijaquë.

SANTIAGO

Tiya Huesésicohua'ini Santiago Toyase'e

¹ Yè'è Santiago, Maija'quère cui'ne Èjaè Jesucristore necaiquëpi pëpayè, Israel doce tsëcapëa acohua'ipi jai hue'ña hua huesëni pa'icohua'ire.

Maija'quë Tq'ñe Asayere Isiye

² Maija'quë do'ijë, jaiye ai yo'oyepi cui'ne co'aye ëayepi mësaruna tì'a maca sihuajë'è.
³ Mësarupi tsoe asayè, ja ai yo'oyepi cui'ne co'aye ëayepi mësaruru pa'ire paji cuasayere neñañe a'è. Jaje pa'ina, ja neñañepi quëcocoehua'i pa'iyere neji.
⁴ Nequëna, quëcosicohua'i pa'ijë nuñe pa'icohua'i cui'ne carase'e peocohua'irepa de'oye pa'iyë.

⁵ Mësaruru acohua'ipi tq'ñe cuasajë yo'oyere carasicohua'i pani sejë'è, Maija'quëni. Seto Maija'quëpi isija'quë api, tq'ñe cuasajë yo'oyere. Maija'quë cato si'aohua'ire tq'tëpo ti peoyerepa cui'ne ti ëseye peoyerepa isiquë api.

⁶ Jaje pa'iquëta'are seña pa'iji, isire paja'quë api cuasajë ti jëa coeye peoyerepa. Jëa coequë cato jai jaira tutupi ju'aquëna, co'poco ñese sani cui'naopi co'ye daio yo'oyeje pa'api.

⁷ Jaje pa'i cato ina Maija'quë isija'quë api cuasama'è pa'ijë'è,
⁸ iye mu'se yeque cuasasiquëpi ñamina'a yequere cuasaquëpi, ocue pa'i macarepa pa'ima'quë cato.

⁹ Maija'quë do'iquëre teaye pa'ini Maija'quëpi jerepa pa'ire necaina, asaquë sihuaye pa'iji.

¹⁰ Cui'neje jaiye co'amaña paquëni Maija'quëpi teaye pa'ire necaina, asaquë sihuaye pa'iji. Jaiye co'amaña paquë cato taya jorohuë jumuse'ejë pa'api, tsoe quëcoye peoquë api.

¹¹ Jaje pa'ina, jaiye paquëpi i cuasaquë yo'ora'ase'ere jëoni esa ju'iquë api, jorohuë maca jumusico airepa ëšë ëoquëna, cueneni de'oye ña cuañöñe carajaini me'meni tomeñeje pa'ye.

Neñañe Cui'ne Co'aye Nëñe

¹² Neñañere quëcoquë taima'quëpi sihuaquë api. Jaje pa'ina, neña tëjisi maca ti pa'i marore isi cuañöja'quë api, Maija'quëre oicohua'ire isisi'i ca nëose'ere. Ja do'ire sihuaquë api.

¹³ Mësaruru aquëpi co'ayere yo'o ëaye nëñe pa'ito cuasama'è pa'ijë'è, Maija'quëpi co'aye yo'o ëaye nëñe neji, cajë. Maija'quë cato co'aye yo'o ëaye nëñe asama'quë api. Cui'ne paipi co'ayere yo'ojajë caquë co'ayere yo'o ëaye nëñe nema'quë api.

¹⁴ Pai cato iohua'ipi co'ayere yë do'ire iohua'i yëyepi quë'rë saquëna, co'aye yo'oyena taicohua'i a'è.

¹⁵ Pai cuasayepi, pai co'ayere yëyepi tsj ëtapëje pa'io de'oni tayo yo'oyere jojoyeje pa'ye etoco. Etona, tayo yo'oyepi ai de'o huesëni yureta'a juni huesëyere jojoyeje pa'ye neco.

¹⁶ Coso cuañöma'pë pa'ijë'è, Maija'quë do'ijë maña.

¹⁷ Si'aye maire de'oyerepa isise'e cato ma'tëmopi Maija'quë isise'e a'è. Ja isiquë cato si'aye ma'tëmo miacohua'ire de'huasiquë api, tñe pa'i ponëma'quë api, cui'ne si'a tëcahuëa tëto saina, cui'neje pa'iquë api.

¹⁸ Isë'e te'i jaje yo'osi'i cuasani maire nuñerepa coca quëayere asani sehuojëna, pa'iyere isipi, maipi du'ru macarepa quëise'ejë pa'iohua'i huajë sëcapë huëocohua'i pa'ijajë caquë.

Nuñerepa Pa'iyë

¹⁹ Jaje pa'ina, Maija'quë do'ijë maña. Si'aohua'i mësaruru cui'ñasicohua'ire papi yecohua'i cayere esa asajë'è. Jaje pa'iquëta'are coca cayere esarepa cama'pë pa'ijë'è. Cui'ne esa pëtitema'pë pa'ijë'è.

²⁰ Pëtitesiquë cato Maija'quë nuñerepa yo'oyere yo'oma'è pa'iji.

²¹ Jaje pa'iyë sëte si'si yo'oye pa'iyë cui'ne jaiye co'ayepi mësaruru tımë huesoni pa'iyere jëocojë'è. Jëoconi teaye pa'iohua'i maña'è cuasajë de'o coca mësaruru joñoana tase'ere pajë'è. Ja coca cato mësaruru joñoa huaso tutu paye a'è.

²² Maija'quë coca asani iti cayeje pa'ye neña pa'iji. Nema'pë coa Maija'quë cocase'e asajë pa'ini co'ye coso cuañösicohua'i pa'iyë.

²³⁻²⁴ Jaje pa'ina, Maija'quë coca quëayese'e asaquëpi iti asase'ejë pa'ye yo'oma'quë cato tsña de'huana me pa'i a'ni caquë i tsia ñani se ponëni sai tsoe huañëyeni me pa'i pate'ni cuasayeje pa'api.

²⁵ Jaje pa'iquëta'are nuñerepa pa'icohua'ire cui'ne tseã cuañoma'cohua'ire ne cocare asani i asase'ere huanëyema'quëpi iti cuañëñere ocuce pa'i macarepa yo'o t'iaquë pa'iquëpi sihuaja'quë api, i yo'oyere.

²⁶ Maija'quëre t'ias'i' caquë yo'ouquëre pa'ë cuasaquëpi i tsemeñore nau nëcoma'quë pani jija' co'ye cosoji. Cosoquëna, i Maija'quëre t'ias'i' caquë yo'oyepi ti cõcã ma'ñe pa'iji.

²⁷ Jaje pa'ina, Maija'quë pai nuñerepa pa'ieyë cato iye a'ë: yëhuiohua'ire cõcãiyë, hua'jeohua'i ai yo'ojëna, cõcãiyë, cui'ne iye yeja si'si yo'oyere pu'pema'cohua'irepa pa'ieyë a'ë.

2

Si'a Yë'quë Maca Yo'oyere Ye'yaye

¹ Mësaruru Maija'quë do'ijëpi mai de'o Ëjaëre pare Jesucristore sehuocohua'ipi paire sahuajë te'ohua'ise'ere de'oye yo'oma'pë pa'ijë'ë.

²⁻³ Jaje pa'ina, yeque mësaruru tsi'si sitona dat'i'ñe pa'i api, te'e jai do'i curi ju'i ca'huaro moñore ju'iquëpi, jai do'i cañare suñasiquëpi daina, cui'ne yequëje curi peoquë teaye pa'ijë ai ju'i care ju'i dat'i'ñe pa'i api. Daina, mësaruru cayë, du'ru daiquëre de'o caña ju'iquëre: "Da ja'rujë'ë, ico de'o ñu'i saihuëna." Jaje cajëta'a yequëni co'amaña peoquëni teaye pa'ini cayë: "më'ë cato ja macare nëcaquë ñajë'ë. Panita'a cayë peo yejana ja'runi ñu'i ñajë'ë."

⁴ Jaje yo'oni tsoe pai yo'oyere ñaquë ca tëji ëjaëje pa'i de'ohuë. De'oni co'aye cuasayepi sa'ñe mësaruru'ja sahuajë yo'oyë.

⁵ Yë'ë yëcuhua'irepa Maija'quë do'ijë iyere asajë'ë: Maija'quëpi iye yeja co'amaña peocohua'ire sahuani i tsecohua'ire nepi. Jaohua'ipi jaiye co'amaña payeje pa'ye Maija'quë pa'ire pai cuasayere pajë cui'ne ite oicohua'ire isisi' ca nëosi co'amañare pajajë caquë.

⁶ Jaje pa'iquëta'are mësaruru co'amaña peocohua'ire teaye pa'iohua'ire co'aye yo'oyë. Jaiye co'amaña pacohua'i pa'i ma'ñe mësaruru ñato mësarute tea ju'ifeje yo'ojë pai ëjaohua'i quë'rona quëre sacohua'i?

⁷ Cui'ne jaohua'ipi yëquë mësarute de'o hue'yosi mamirepa Jesure co'aye sañope caco-hua'i a'ë.

⁸ Mësaruru Maija'quë coca cuañese'ejë pa'ye më'ë quëno maca pa'iquëre oijë'ë, më'ëja'a co'ye oiyëje pa'ye case'ere si'a yë'quë maca yo'o t'iani nuñerepa de'oye yo'oyë.

⁹ Jaje pa'iquëta'are mësaruru paire sahuajë te'ohua'ise'ere de'oye yo'ocohua'i pani co'aye yo'oyë, Maija'quë cuañese'ejë pa'ye yo'oma' do'ire.

¹⁰ Jaje pa'ina, te'i paipi iye cuañese'ere si'aye de'oye yo'ouquëta'a te'o cuañese'ere tayosiquë pani tsoe si'aye tayosiquë pa'iji.

¹¹ Jaje pa'ina, jare ipi Maija'quëpi capi: "Yequë ëmëre, panita'a nomiore yo'oma'pë pa'ijë'ë, huejasicohua'i." Cui'ne capi: "Paire huani jeoma'pë pa'ijë'ë." Jaje case'ere asani yequë nomiore, panita'a ëmëre yo'oma'cohua'ipi ja yë'ta'a paire huani jeocohua'i pani tsoe cuañese'ere sehuoma'quë ponëpi.

¹² Mësaruru si'aye yo'ose'ere iñoñe pa'iji, Cristo yëyere yo'oye panita'a co'ayere. Jaje pa'ina, de'hua ñajë'ë, mësaruru cuasayë cui'ne neñe.

¹³ Ai yo'ocohua'ire oima'pë pa'isicohua'ire cato oiyë peosipi yecohua'i oisicohua'ise'ere de'oye t'iaja'cohua'i a'ë, i Maija'quë pai yo'ose'ejë pa'ye ñaquë de'huasipi.

Nema'pë Cocase'e Caye Co'aji

¹⁴ Maija'quë do'ijë Maija'quëre pa'iji cuasaquë a'ë. Jcaquëta'a ja yë'ta'a nese'e ti peoquëre iquere cõcãiquë'ni, i cuasayë? Jjaje pa'ire i cuasase'epi ite huasoye pa'iquë?

¹⁵ Cañu'u, Maija'quë do'iquëni, panita'a Maija'quë do'iconi caña cui'ne mu'se ai ja'ñe caraquëna.

¹⁶ Mësaruru aquëpi capi: "Señaquë de'oye pa'ijë'ë. Ca'nequë cui'ne si'aye më'ë yëye ai pa'ijë'ë." Jaje caquëta'a ti isiyë paji, ite carayere. Jquere jaje pa'ito coca cõcãiquë'ni?

¹⁷ Jaje pa'ina, ju'isi co'amañaje pa'ye a'ë, Maija'quë pa'iji cuasayepi coa pa'ini, nese'epi peoto.

¹⁸ Te'i paipi ca'ñe pa'i api, ñeje: "De'oji, më'ë cato Maija'quë pa'iji cuasayese'ere payë, nese'e peoquëpi. Jaje pa'iquëta'are yë'ë cato nese'ere payë." Jaje pa'ina, yure yë'ëre iñojë'ë, më'ë Maija'quëre pa'iji cuasayere nese'e peoyepi. Yë'ëpi më'ëre iñosi'i, Maija'quë pa'iji cuasayepi yë'ë nese'ere.

¹⁹ Më'ë Maija'quëre te'i pa'iji cuasaquë pa'ieyë ai de'oji. Jaje cuasani më'ë tayoma'ë pa'iyë. Jaje pa'iquëta'are huatohua'ije cui'ne cuasayë. Cuasajë ca'rajë tsasijë pa'iyë.

²⁰ Jaje pa'ina, Maija'quëre pa'iji cuasajëta'a nema'pë pa'ito ju'isi co'amaña pa'iji, do'i peoye cuasayepi. Jaje pa'ina, ña sëtajë'ë, huesë pa'ima'ë pa'ija'quë.

²¹ Ñajë'ë, mai aire Abrahamre Maija'quëpi nuñe pa'iquëre ca huesopi, i mamaquë Isaacre huani jëosi' caquë yo'osi do'ire.

²² Jaje pa'ina, mē'ē ñañē, Abraham i yo'ose'epi Maija'quē pa'iji cuasayere ñhose'e. Jaje yo'oquēna, Maija'quē pa'iji cuasayepi coa yo'o jujase'e peoye etapi.

²³ Jaje yo'oquēna, Maija'quē coca toyase'e cayepi t̄i'api: "Abrahampi Maija'quēre pa'ire paji cuasa do'ire Maija'quēpi ite nuñe pa'iquēre pare ca huesopi." Jaje pa'ina, Maija'quē cajeire hue'yosiquē paji'i, Abraham.

²⁴ Jaje pa'ina, mēsaru yure ñañē, Maija'quē pa'iji cuasaquē yo'oquēni nuñe pa'iquēre ca huesoye. Coa Maija'quē pa'iji cuasayese'epi nuñe pa'iquē ca hueso cuañoñe peoji.

²⁵ Jaje pa'ina, Rahab co'a nomiore Maija'quēpi nuñe pa'icore ca huesopi, Josué jējo saosicohua'ire pēaja'to isico cui'ne yequē ma'aja'a yahue jējo saosi do'ire.

²⁶ Jaje pa'ina, paipi joyore peoquē pani tsoe ju'isiquē pa'iji. Jaje pa'ye cui'ne Maija'quē pa'iji cuasayepi yo'oye peoto ju'ise'epi pa'iji.

3

Cayere Ye'yaye

¹ De'oji, Maija'quē do'ijē mēsarupi tsoe asacohua'i a'ē, yecohua'ire se ye'yacohua'ipi jerepa iohua'i yo'ose'e ña de'hua cuaño ja'ñe pa'iyē. Jaje pa'i do'ire mēsaru acohua'ipi jai pairepa pa'ima'pē pa'ijē'ē, yecohua'ire se ye'yacohua'i.

² Si'ahua'i tayocohua'ise'e pa'iyē. Jaje pa'iquēta'are te'i paipi i coca cayere ti tayoma'quē pani nuñe pa'iquēre papi jaje pa'i pani, si'aye i pa'iyē nuñerepa ñaqué pa'iquē api.

³ Mai cuañeñe caballopi de'oye sehuocaijaquē cajē yē'opona quēna tarapēre jua nēcocohua'i a'ē. Jaje neni yureta'a si'aēre de'oye pō'nejē sacohua'i a'ē.

⁴ Ñajē'ē, cui'ne jai yohuē yo'oyere. Ai tutu jēayerēpa ju'aquēta'are iti tayoco a'ricona iti tayocuēpi pō'nequēna, i yē hue'ñana saicoa.

⁵ Jaje pa'ye mai tsemeñoje a'rico macata'a jai co'amañare cacao. Jaje pa'ioipi a'ri toa macata'a jai airo tsēni ēoyeje pa'yerepa yo'ocoa.

⁶ Jaje pa'ina, tsemeño cato toaje pa'io, co'aye ne tuture t̄imēsicoa. Jaje pa'ioipi mai capēre pa'io si'a capē co'aye neñe pa'iji, cui'ne si'a mai pa'i ma'aje co'a de'huacoa, mēna tutupi ioni pa'i do'ire.

⁷ Iye yeja pa'icohua'ire nēcocohua'ire, pi'are, añaohua'ire, cui'ne jai tsiaya pa'icohua'ireje, si'aye paipi tseani de'oye ye'yacohua'i a'ē.

⁸ Jaje pa'iquēta'are tsemeño cato ye'ya t̄i'añe peocoa, nau nēco t̄i'añe peocoa. Co'acoo. Tsimaoje pa'ioipi si'aye co'a de'huayerē t̄imēsicoa.

⁹ Jaje pa'ina, iopi Maija'quēre de'oquēre pa'ni cajē sihuajē, cui'ne jare iopi paireje co'acohua'i a'ē cayē, Maija'quēpi ije pa'iohua'ire de'huasicohua'ireje.

¹⁰ Jare iti yē'opopi etaji, de'oye cacaiye, cui'ne yecohua'ire co'aye cayēje. Jaje pa'i ma'ñe a'ē, Maija'quē do'ijē, jaje yo'oye ai co'aji.

¹¹ Te'e oco cojeja'a de'o oco etacona, sēje ocoje cui'na etama'coa.

¹² Maija'quē do'ijē, mēsaru ñato ¿Higuerapi hui'yape ne care quēñe pa'iquē, panita'a cuiya'ipi higuera care quēñe pa'iquē? Jaje pa'ina, ti peoji, te'e oco cojeja'a de'o oco cui'ne asi oco etaye.

Maija'quē T̄a'ñe Asaye Isiye

¹³ Jaje pa'ito, mēsaru aquēpi ta'ñe pa'ipi asa t̄i'asiquē pani iyere i de'oye yo'oquē pa'iyepi cui'ne ja ta'ñe asayepi teaye pa'ire nequēna, nesi co'amañare ññoja'quē.

¹⁴ Jaje pa'iquēta'are mēsaru joyore yecohua'iyayerē ēa ñajē pēñepi cui'ne ai jerepa pasi'i cuasajē yo'oyepi pa'ina, ta'ñe cuasayē caye cato coa cosoye a'ē, cui'ne ti ta'ñe asayere pare coa cayēje pa'ye neñe a'ē.

¹⁵ Jaje pa'ye pa'ima'coa, Maija'quē ta'ñe asayerepa. Ja asase'e cato iye yeja pai cuasani huēose'e a'ē cui'ne pai capē yēyepi huēose'e a'ē, cui'ne huati huēose'e a'ē.

¹⁶ Jaje pa'ina, yecohua'iyayerē ēa ñajē pēñepi cui'ne ai jerepa pa'i pasi'i cuasayepi pa'ito si'aye ne tiya saose'eje pa'yepi pa'iji, coa si'aye co'ayere yo'oyepi.

¹⁷ Jaje pa'iquēta'are Maija'quē ta'ñe asaye isiye cato co'ayena co'me ma'ñe a'ē. Jaje pa'ina, jo'cua pa'iyē, dahuēre pa'iyē, yecohua'iyayerē meñe ñañe peoye pa'iyē, yecohua'ire teaye ñani coçaiye, jaiye de'o co'amañare neñe, si'a yē'quē maca si'ahua'ire yo'oye, cui'ne nuñerepa pa'icohua'ire neñe a'ē.

¹⁸ Jaje pa'ina, jo'cua de'oye pa'ijajē cajē yo'ocohua'i cato jo'cua de'oye pa'i ja'ñere neñē. Ja yo'ojēna, tase'e mēani quēñeje pa'ye quēquēna, nuñerepa yo'oyere tēaja'cohua'i a'ē.

4

Iye Yeja Ayere Ēa Ñañe

¹ ¿Jepi daquē'ni, sa'ñe huajo huaiye, cui'ne mēsaruja'a sa'ñe pēti coca cayē? Ja cato mēsaru sa'nahuēpi etapi, co'aye yo'o ēaye nēñepi mēsaru sa'nahuē uihuaquē pa'iyepi.

² Jaje pa'ina, mäsaru yëyere t̃i'ama'pë pa'i do'ire yecohua'i payere ëa ñajë, huani jeojë yo'ojë, mäsaru yëyere t̃i'añu'u cajë yo'ojë uihuayë, mäsaru. Mäsaru yëyere t̃i'ama'pë pa'iyë. Maija'quëni isijë'ë cajë sëma' do'ire.

³ Jaje pa'ina, mäsarupi sën̄i is̄i cuañoñe pañë, mäsaru co'aye yëyere yo'ojë nejañu'u cajë se do'ire.

⁴ Nëjore pacohua'ipi yequë nomioni yo'ocohua'ijë pa'iohua'i a'ë, mäsaru. Huesëyere mäsaru iye yeja ayere ëa ñajë oicohua'i pani Maija'quëre oima'cohua'i de'ojë, ite sañope yo'ocohua'i pa'iyë. Jaje pa'ina, iye yeja ayere ëa ñajë oicohua'i cato Maija'quë cajeohua'i peoyë, Maija'quëre sañope yo'ocohua'i a'ë.

⁵ Jaje pa'ina, Maire isisi joyopi iye yeja ayere oima'pë pa'ijë'ë, caquë ai oi ësequë ñacajji, maire. Jaje toyase'e cani coa cama'ë pa'iji, care paji.

⁶ Jaje pa'iquëta'are Diusu maire oi cöcaiquë api. Jaje pa'ina, toyase'e caji: "Maija'quë cato teape pa'iohua'ini oi cöcaiquë api, jerepa pa'iohua'i a'ë cuasacohua'ire cato cöcaiyë paquë api."

⁷ Maija'quëna mäsaru pa'iyere isisicohua'irepa pa'ijë'ë ise'ere necaijë'ë, huati yëyere necaima'pë. Jaje yo'ojëna, ña jujani mäsarute jeoni huë'huëjaquë api.

⁸ Maija'quëna tsiojaijë'ë, ipi mäsaruna tsiojaija'quëre. Co'aye yo'ocohua'i tëno tojë'ë, mäsaru jëñare si'si pa'iyere. Maija'quëre oñu'u cajëta'a iye pa'iyere se oijë yo'ocohua'ipi ja si'si pa'iyere tsoa tojë'ë, mäsaru joñoare.

⁹ Otare papi oijë ai co'a ju'ijë'ë, mäsaru co'aye yo'ose'ere cuasajë. Mäsaru sose'epi ota ponëjaquë cui'ne mäsaru sihuayepi oiyena ponëja'quë.

¹⁰ Jaje pa'ina, Maija'quë ña huë'ñare pana teape pa'iohua'i de'ojë'ë, ipi mäsarute jerepa pa'iohua'ire neja'quëre.

Yequë Tayoyere Ñaquë Cama'ë Pa'ijë'ë

¹¹ Maija'quë do'ijë, sa'ñe mäsaruja'a co'acquë api cama'pë pa'ijë'ë. Jaje pa'ina, Maija'quë do'iquëre co'acquë api caquë cato cuañese'e cayere co'aji caji, ipi cuañese'e meñe ña ëjaë de'on̄i. Jaje pa'ina, më'ëpi cuañese'e cayere co'aji caquë pani it̄i cuañese'ere sehuoma'ë pa'i coa më'ëja'a co'ye ñani ca tēji ëjaëje pa'i de'oyë.

¹² Te'i pa'iji, cuañese'e paire isiquë. Jare i api, tayose'e ñani ca tēji ëjaërepa. Cui'ne jare jaëse'e pa'iji, huasoye paquë, cui'ne nejoñe paquë. Jaje pa'ito më'ë iquei macapi më'ë cajei tayoye ñaröj̄i caquë'ni?

Ñamina'a Pa'i Ja'ñe Huesëj̄e Caye

¹³ De'oji, yure iyere asajë'ë. Yure panita'a ñamina'a ja daripëna sani j̄arona te'e om̄etëcahuë pa'ijë co'amaña nejë isijë curi neñu'u, cacohua'i maña.

¹⁴ Ñamina'a mäsaru pa'i ja'ñe huesëyë. Mäsaru cato picoja'a pa'isicota'a peo huë'ña tiya saiyejë pa'iohua'i a'ë.

¹⁵ Jaje pa'ina, mäsaru cato ñeje caye pa'iji: "Ëjaëpi yëna huajëcohua'i pa'ijë iye maña nesi'i panita'a ja yequë co'amañaje nesi'i caye pa'iji."

¹⁶ Jaje pa'iquëta'are mäsaru cato si'a tuturepa cacohua'i a'ë, pa'ire payejë nëina. Si'aye jaje jerepa pa'iohua'ire nëina, tutu caye co'aye a'ë.

¹⁷ Jaje pa'ina, de'oye yo'oye asaquëpi ja yë'ta'a de'oye yo'oma'ë pani tsoe co'aye yo'opi.

5

Jaiye Co'amaña Pacohua'ire Quëaye

¹ Iye jaiye co'amaña pacohua'i asajë'ë. Oijë'ë cui'ne cuijë'ë, mäsaru ai yo'o ja'ñere asa quëquëjë.

² Mäsaru jai do'i co'amaña tsoe ja'juse'e a'ë cui'ne de'o ju'i cañaje pu'jupi ani huesose'e a'ë.

³ Mäsaru oro cui'ne curiquëj̄e yoco ne huesëse'e a'ë. Jaje yoco ne huesëyepi iñoji, mäsaru co'aye yo'oyere. Jaje pa'ina, j̄api mäsaru capëa toa ëoyejë pa'yerepa peo huë'ña ëo huesoja'coa. Mäsaru tēji mu'señare pare jaiye co'amaña de'huani teape payë.

⁴ Mäsaru ts̄ña co'amaña necohua'ire saima'pë pa'ise'epi yure mäsarute sañope iñoji. Iñoquëna, Ëjaërepa tutu quë'ipi j̄ohua'i nesi do'ire saijë'ë, cayere asapi.

⁵ Iye yeja pa'i maca mäsaru de'o huë'ñare pare pa'ijë'ë si'aye mäsaru yëyere yo'ojë sihuajë pa'ë'ë, duruhuequë hui'yape jujuyejë pa'ye jujuhüë. Jaje pa'ina, yure mäsarute huai mu'seña t̄i'api.

⁶ Mäsarupi huani j̄eohüë, ti co'aye yo'oma'cohua'ini, co'acohua'i a'ë cajë, mäsarute sañope yo'o tutu ti peocohua'ini.

Yo'o Jujahuë Cama'pë Quëcoj̄e Uteye

⁷ De'oji. Maija'quë do'ijë. Mësarü cato yo'o jujahuë cama'pë quëcojë utejë'ë, Ëjaë dai macaja'a, tsio taquë je'quë oco tëcahuëare utequë pa'iquë a'ë, ocosi maca tase'epi mëani quëcona tëasi'i caquë.

⁸ Jaje cui'ne mësarujë quëcojë ocue pa'i macarepa pa'ijë'ë, mai Ëjaë daiye tija tëji do'ire.

⁹ Maija'quë do'ijë mësaruj'a sa'ne jaë do'ire ai yo'oyë cajë pëti coca cama'pë pa'ijë'ë, Maija'quëre nejo cuãñoñe pañu'u cani. Tsoe caca sa'rore pa'iji Diosu pa'i yo'ose'e ñani ca tëji ëjaërepa.

¹⁰ Jaje pa'ina, Maija'quë do'ijë ye'yejë'ë, Maija'quë yëye quëacai do'ire tsoe acohua'i ai yo'ojë quëcose'ere.

¹¹ Ai yo'onije quëcosicohua'ire mai cato cayë: ai sihuacohua'i pa'iyë, jaohua'i cato. Mësarupi Job ai yo'oquë quëcose'e cui'ne tëji hue'ñana Maija'quë ite cöcaise'e asacohua'i a'ë. Jaje pa'ina, Maija'quë cato, teaye ñani oi cocaiyepi ini pa'iyë sête cocaija'quë api.

¹² Maija'quë do'ijë, mësarü cayepi do'i quë'ye pa'ijaquë cajë Maija'quëna se ca co'ijaijë care payë cama'pë pa'ijë'ë. Jaje pa'ina, nuñerepa cajë'ë, yecohua'i asajëna. "Jaje pa'iji" casicohua'i pani, jare "jaje pa'iji" case'e pa'ijaquë, cui'ne yecohua'i asajëna, "pañë" casicohua'i pani, jare "pañë" case'e pa'ijaquë. Jaje yo'onita'a mësarü nejo cuãñoñe pa'ia'cohua'i a'ë.

Jujucaija'quë Api, Asajë Señe

¹³ Mësarü aquëpi ai yo'oquë pani Maija'quëre seja'quë, mësarü aquëpi sihuaquë pani Maija'quëre sihuaquë jëjëja'quë.

¹⁴ Mësarü aquëpi ju'iquë pani sehuosicohua'i ëjaohua'ini soija'quë, mai Ëjaë mamipi cajë secacaija'cohua'ire, hui'yapëpi dojë.

¹⁵ Maija'quëpi ju'iquëre jujuja'quë api. Ta'ne cuasajë seto ju'iquëpi co'yaja'quë api. Co'aye yo'osiquë pa'itojë i co'aye yo'ose'ere sai de'huacaise'e pasipi.

¹⁶ Jaje pa'ina, tayo yo'ose'ere pai ñape yecohua'ina se quëajë, pai ñape yecohua'ire secacaijë'ë, Maija'quëre si'aohua'i juju cuãñosicohua'i pañu'u cajë. Jaje pa'ina, nuñe pa'iquëpi Maija'quëre seña cato ai tutu pa'iji, yecohua'ire cöcayie.

¹⁷ Jaje pa'ina, tsoe aquë Maija'quëre quëacaiquë Elías maije pa'ipi ocoma'o pa'ijaco caquë Maija'quëre sequëna, toaso ometëca cui'ne jopo ocöye pao, iye yeja.

¹⁸ Pacona, cui'naëpi Maija'quëre ocojaco caquë sequëna, oco ocona cui'naopi, yeja de'oye mëaco de'o.

¹⁹⁻²⁰ Maija'quë do'ijë, mësarü aquëpi nuñerepa yo'o ma'are hua saquëna, yequëpi, de'o ma'ana cui'naëni ne co'ya cöquë pani jutira'siquëni huasoji, cui'ne jaiye i co'aye yo'orojaise'ere sai de'hua cuãñoji.

1 SAN PEDRO

Pedro Toyase'e Si'a Huë'ña Hua Saisicohua'ina

¹ Yë'ë Pedropi Jesucristo jëjo daoquëpi iye toya ja'hua toyayë, yequë pai yejañare hua saisicohua'ina caquë toyayë: Ponto, Galacia, Capadocia, Asia cui'ne Bitinia pa'icohua'ina.

² Maija'quëpi mësarute sahuapi. Sahuasicohua'ini Maija'quë joyopi Maija'quë tsecohua'ire nepi, mësarupi Jesucristo cuañeñe de'oye sehuocohua'ipi i tsiëpi tsoa tosicohua'i pa'ijajë caquë. Jaje pa'ina, Maija'quëpi de'oye ñacaina, jo'cua de'oye pa'ijë'ë.

Ti Pani Huesëyere Utejë Pa'iyë

³ De'okuëre pa'ni cañu'ü, Maija'quëre mai Èjaë Jesucristo pëca ja'quëre, maire ai oi do'ire tujupë coasicohua'ire nesiquëre Jesucristo juni huëisi do'ipi. Jaje pa'ina, iye yo'osi do'ipi de'oyere pare utejë pa'iyere payë, mai.

⁴ Jaje pa'ina, Maija'quë mësarute caquë ma'tëmo de'huacaisi co'amañare ti ne huesë ma'ñere, si'si ne ma'ñere, cui'ne ti me'me tome ma'ñere paja'cohua'i a'ë, mësarü Maija'quë cuasa do'ipi.

⁵ Jaje pa'ina, mësarute Maija'quëpi i tutupi ñacai pa'iji, mësarupi huasosicohua'i pa'iyere, i ne de'huacaisere tija'ajë caquë. Jare tëji mu'señarepa paja'cohua'i a'ë.

⁶ Ja do'ire mësarü ai sihuajë pa'iyë, coa nëhui tëcahuë jaiye neñañe ai yo'oye pa'itoje.

⁷ Jaje pa'ina, mësarü Maija'quë pa'iji cuasayere ai yo'oyepi neñaquëna, do'i quë'ye etase'epi, toapi neñasi oro do'iyë jerepa seña maca do'i quë'ye etasipi. Oro cato coa carajaiñe a'ë. Neñañe pa'ina, itire pase'e etase'epi Jesucristore ññosi maca Jesucristore sihuajë de'okuëre pa'ni cayere cui'ne ëjaëre pa'ni cayere ññoñe pasipi.

⁸ Jesucristore ñama'pë pa'isicohua'ita'a ite ai oiyë, mësarü. Ite ñama'pë pa'isicohua'ita'a pa'ire paji cuasajë ai de'oyerepa sihuayë, yë'opi ca tija'ne peoyerepa.

⁹ Sihuajë joña huaso cuañone tija'si' i cajë tija'ahuë, mësarü pa'ire paji cuasa do'ipi.

¹⁰ Maija'quëre quëacaicohua'ipi ai tsoe hue'ña mësarute Maija'quë oi coa isi ja'ñere huaso cocare toyacajëta'a huesëhuë. Jaje pa'ina, iquere caquë'ni cuasajë ai co'ehuë, asa tija'ñu'ü cajë.

¹¹ Cristo joyopi Maija'quëre quëacaicohua'ire du'ru quëapi, Cristo ai yo'o ja'ñere cui'ne jeteyo'je i ayere ma'tëmo ayere de'oyerepa pa'i ja'ñere quëapi. Jaje quëaquëna, asajë çjequë pa'ija'quë a'ni, i? cui'ne çje yëhua jaje pa'ija'coa'ni? cajë ai co'ehuë, asañu'ü cajë.

¹² Jaje co'ejëna, Maija'quëpi johua'ire quëapi, iye mësarü quëaye mësarü tse peoji caquë. Yecohua'i tse a'ë caquë quëapi. Ja cato maini capi. Yure jaje pa'ina, iyere Maija'quë huaso cocare mësarute quëacohua'i quëahuë, ma'tëmo jëjo daosi joyo tutupi yo'okuëna. Iye huaso coca cato huiñaohua'ique ai cuasajë itise'e ña ëa ju'iñë.

Maija'quëpi Maire De'ocohua'irepa Pa'iyena Soiyë

¹³ Jaje pa'iyë sëte mësarü cuasayere ne de'huajë'ë, cuepese'eje pa'iohua'i pa'ima'pë. Jaje pa'ijëna, mësaruna Jesús ayere ñño maca, Maija'quë oi co'aiyepi pa'iji, mësarute. Jare cuasajë pa'ijë'ë.

¹⁴ Jaje pa'ina, Maija'quë caye de'oye sehuocai mamajë sëte, Maija'quëre asama'në yëjë pa'ise'ere pa'ima'pë pa'ijë'ë.

¹⁵ Maija'quë mësarute soisiquë ai de'okuë api. Jaje pa'ina, mësarujë de'ocohua'irepa pa'ijë'ë, jje pa'iohua'i.

¹⁶ Jaje pa'ina, toyase'e caji: "De'ocohua'irepa pa'ijë'ë, yë'ëje pa'iohua'irepa."

¹⁷ Mësarupi Maija'quëre "Ja'quë" cajë secohua'i pani si'anë ini ca'rajë pa'ijë'ë, iye yeja mësarü pa'i mu'seña pai ñape yo'ose'eje pa'ye saiquëni, cui'ne si'a yë'quë maca si'aohua'ire yo'okuëni.

¹⁸ Mësarute Maija'quëpi huasopi, mësarü aiohua'i pa'ise'eje pa'ye mësarujë do'i peoyere yo'ojë pa'isicohua'ini. Mësarute huasoni saicaima'ë pajii, oropi panita'a curipi, ne huesëyere. Iye huaso do'i cato saipi, ti ne huesë ma'ñere papi. Jare mësarupi tsoe asacohua'i a'ë.

¹⁹ Cristo tsië do'ipi saicaji'i, mësarute yëi ñama a'si poequëpi, si'si tēja'ne peoquëje pa'ire papi.

²⁰ Cristo cato ja yë'ta'a yeja de'huama'në jaje jucacaija'quëre ca nëosiquë pa'iji. Jaje pa'ipi yure tëji mu'seña mësarü de'oye pa'iyere caquë daji'i.

²¹ Jaje pa'ina, mësarü Cristo do'ija'a Maija'quëre ire papi cuasajë sehuoyë, ju'isiquëni huajëquëre huëoni de'okuëre pare ññosiquëre. Jaje pa'ina, yure mësarü Maija'quë pa'ire paji cuasajë ina quëco pajë pa'iyë, coacaija'quë api cuasajë.

²² Nuñerepa cocare mësaru sehuocai do'ire mësaru joñoa tsoa tohuë, Maija'quë do'ijëre nuñerepa oñu'u cajë. Jaje pa'iyë sête si'a tuturepa pai ñape yecohua'ire oiyë pa'iji, de'o joyore papi.

²³ Jaje pa'ina, mësaru cato yure pai ju'icohua'i mamajë peoyë. Mësaru cato yure Maija'quë coca ti pani huesëyere papi jojosicohua'i a'ë.

²⁴ Jaje pa'ina, toyase'e caji:

Si'a pai iye yeja pa'icohua'i tayajë pa'iohua'i a'ë,

Si'aye johua'i pa'iyepi taya jorojë pa'ye a'ë.

Taya cato cuenecoa. Cuëne huesëcõna, iti joropi tomecoa.

²⁵ Jaje pa'iquëta'are Maija'quë coca cato ti pani huesëye a'ë.

Iye huaso cocare mësarute quëahuë.

2

¹ Jaje pa'iyë sête si'aye co'ayere jeocojë'ë, si'aye cosoyere, coa cayere, yecohua'i payere ëa ñañere, cui'ne yecohua'ire co'a coca cayere jeocojë'ë.

² Jeocõni tsj mañaja'a cõasicohua'i oje yëyejë pa'ye mësaruje joyo pa'i cocare yëjë'ë, huasõcõhua'i ai de'oyere cajë.

³ Mësarupi Ëjaë de'oquërepa pa'iyere nuñerepa ña t'asichua'i pani jaje yëcõhua'i pa'ijë'ë.

Cristo Api, Pa'iyë Quë'i Quëna Pë

⁴ Ëjaëna tsio daijë'ë, pa'iyë pa'i quëna pëna, pai jeocõsiconõ. Jaje pa'iquëta'are Maija'quëre cato j sahuasi quëna përe pa'ë, jai do'i quë'io.

⁵ Jaje pa'ina, mësaru ina tsiojaijë pa'iyë quë'i quëna pëa de'ohuë. De'orena, Maija'quëpi joyo huë'e de'huapi, mësarupi. De'huaëna, ise'ere necaija'cõhua'i pa'iyë. Pa'ijë Jesucristo do'ija'a ai yo'ojë isiyë, Maija'quë sihuaquë ñañere.

⁶ Jaje pa'ina, toyase'e caji:

Yë'ë sahuasicoe pani, de'o quëna përe pare Siõnna qañë,

Iona quëco paquë cato coa quëco tayohuë caquë co'a ju'iñe pasipi.

⁷ Jaje pa'ina, ja quëna përe iore pao cajë asacõhua'ire cato do'i quë'ioyerepa asa cuãñoji. Jaje pa'iquëta'are, toyase'e cayejë pa'ye pa'iji, jaje asama'cõhua'ire cato. Jaje pa'ina, caji, toyase'e ñeje:

Huë'e necõhua'i jeocõsi quëna pëpi

Yure cato si'a huë'e naupa quëna përepa de'o.

⁸ Cui'ne yecõpi caji, ñeje:

Asama'cõhua'ipi ja quëna pëna ju'ajëna, jopi ne taoja'coa.

Jaje pa'ina, jaõhua'i cato Maija'quë coca sehuoma' do'ire ne huesëja'cõhua'i a'ë, i ña

nëose'eje pa'ye.

Maija'quë Pai Pa'iyë

⁹ Mësaru cato j sahuasi pai a'ë. Ëjaëre pase'ere necaija'a pai a'ë. Si'si peo daripë acõhua'i a'ë. Maija'quë tsecõhua'ire pa'ë. Jaje mësaru pa'iohua'i a'ë. Jaje pa'ina, mësarute nea huë'ñare pa'ijëna, Maija'quëpi soipi, mia huë'ñana etani Maija'quë de'oyerepa yo'ose'ere yecõhua'ina quëajajë caquë.

¹⁰ Ja'në cato mësaru j pai peocõhua'i paë'ë. Pa'isicõhua'ipi yure cato j pai de'ohuë. Ja'në mësarute Maija'quë teaye ñani cõcaiyë papi. Yure cato mësarute teaye ñaquë oi cõcaiji.

Maija'quëre Necaiyere Cajë Pa'ijë'ë

¹¹ Maija'quë do'ijë, mësarute señë, mësaru capë yëyere sa'ro nëocõaima'pë pa'ijë'ë caquë, mai joñoa sañope uihuayere. Mësaru cato iye yeja acõhua'i peoyë. Coa daisicõhua'i a'ë.

¹² Jaje pa'ina, de'oyerepa yo'ojë pa'ijë'ë, si'aõhua'ire judío pai peocõhua'ireje. Jaje mësarupi pa'ijëna, yure mësarute sañope co'aye yo'ocõhua'i a'ë casicõhua'ipi mësaru de'oye yo'oyere ñani, Maija'quëre de'oquëre papi caji'cõhua'i a'ë, jõhua'ire Maija'quë huaso mu'se t'iaëna.

¹³⁻¹⁴ De'õji. Maija'quëpi nepi, pai ëjaõhua'ire co'aye yo'ocõhua'ire si'seja'cõhua'ire, de'oye yo'ocõhua'ini de'ocõhua'i a'ë caji'cõhua'ire. Jaje pa'ina, mai Ëjaëre oi do'ire si'a pai ëjaëre si'aõhua'i jerepa pa'ire sête de'oye sehuocaiye pa'iji. Jaje cui'ne si'aõhua'ire iye yeja pai ëjaõhua'ire de'oye sehuocaiye pa'iji.

¹⁵ Jaje pa'ina, Maija'quë cato yëji, mësarupi de'oye yo'ojë pa'ijëna, huesëõhua'ipi ta'ñe cuasama'cõhua'ipi mësarute sañope ca t'iañe peoyere.

¹⁶ Jo'ya nesicõhua'i peoyë, mësaru. Jaje pa'ina, jo'ya nesicõhua'i peoyë cajë co'ayere neñu'u cajë yo'oma'pë pa'ijë'ë. Coa ai jerepa Diusu jo'yaõhua'i a'ë cuasajë, j yëyere yo'ojë pa'ijë'ë.

¹⁷ Si'aohua'ire paire de'oye yo'ojë'ë, ëjaohua'ire yo'oyeje pa'ye. Maija'quë do'ijëre oijë'ë. Maija'quëre ca'rajë'ë. Pai ëjaëreje de'oye yo'ojë'ë, ëjaëre papi cuasajë.

Cristo Mai Yo'o Ja'ñere Iñoquë Ai Yo'opi

¹⁸ Co'amaña necaicohua'i, mësarua ëjaohua'ire de'oye sehuocaijë pa'ijë'ë. De'ocohua'ise'ere mësarute oicohua'ise'ere de'oye yo'oma'pë pa'ijë'ë. Co'a ëjaohua'ireje de'oye sehuojë yo'ojë'ë.

¹⁹ Jaje pa'ina, de'oye a'ë, mësarua de'oye yo'ojëta'are mësarute yecohua'ipi co'aye yo'ojëna, ai yo'oyere quëcoye.

²⁰ Jaje pa'iquëta'are mësarupi co'aye yo'ojë si'se cuañojë quëcoto do'i peoji. Jaje pa'iquëta'are mësarua de'oye yo'o do'ire ai yo'ojë quëcoye paní de'oye a'ë. Do'i pa'iji, Maija'quë ña hue'ña.

²¹ Jare caquë mësarute Diusu soipi, mësarupi Cristo mësarua do'ire ai yo'ose'ere ñani i yo'ose'eje pa'ye mësaruje yo'ojajë caquë.

²² Cristo cato ti te'oreje tayo neñe paquë paji'i, cui'ne paireje cosoma'quë paji'i.

²³ Ite co'aye catoje sañope cui'ne co'ayepi cama'quë paji'i. A'si ite yo'o macaje sañope icohua'ire saisi'i cama'quë paji'i. Coa ai jerepa Maija'quëna jëopi, jaëpi pai yo'oyere ña de'huaquëpi, nuñerepa yo'oquëpi ña de'huaajaquë caquë.

²⁴ Cristopi si'aye mai co'aye yo'oye hue'oní sani cruzuna que cuañopi, maipi co'aye yo'oyere ju'isicohua'ije pa'ye pa'ijë nuñerepa yo'oyere huajëcohua'i pa'ijajë caquë. I a'si do'ipi mësarua huasosicohua'i pa'iyë.

²⁵ Ja'në mësarua yëi ñama ne huesësicohua'ije pa'iohua'ipi paë'ë. Jaje pa'isicohua'ita'a yure cato Cristona co'irena, ipi yëi ñamare ñacaiquë ñañeje ñaquë mësarua joñoaje ñacaiji.

3

Huejasicohua'i Pa'iyere Quëaye

¹⁻² Nomiohua'i, mësarua mësarua ëjëohua'i cuañëñere de'oye sehuojë pa'ijë'ë. Jaje yo'ojëna, mësarua ëjëohua'i sehuoma'cohua'ipi mësarua iohua'ire de'oye ëjaohua'ire ñajë de'oye pa'iyere ñajë sehuoja'cohua'i a'ë, ai yëhuo coca peoye.

³ Mësarua de'ocohua'i ña cuañëñere ëmëje'e capë ëja de'oyere oima'pë pa'ijë'ë, ai de'oye naña yoyere, jai do'i yi'yo se'huoñere, panita'a jai do'i caña suñañere.

⁴ Mësarua de'ocohua'i pa'iyere cato pa'ijaquë mësarua joyopi de'oye cuasayepi, ja'ë tënë ma'ñerepa, a'ji joyopi jo'cua de'oye pa'iyere a'ë, do'i quë'yerepa Maija'quë ña hue'ña.

⁵ Ai tsoe hue'ña nomiohua'i Maija'quëna iohua'í pa'iyere isisicohua'í cato jaje pa'iyepi ëja de'osicohua'í pa'ahuë'ë. Maija'quëna quëco pacohua'í pa'ahuë'ë. Jaohua'í cato, jaje pa'iohua'í iohua'í ëjëohua'í de'oye sehuocohua'í pa'ahuë'ë.

⁶ Jaje pa'io pa'aco'ë, Zara. Jaje pa'ioipi io paquë Abrahamre de'oye sehuoco pacopi ca'aco'ë, "Yë'ë ëjaë". Jaje pa'ina, mësarupi ti ca'rama'pë de'oye yo'ocohua'í paní io mamajë pa'iyë.

⁷ Jaje cui'ne mësaruje ëjëohua'ije mësarua nëjohua'í yëjë cayere de'oye asacohua'í pa'ijë'ë. Paní nomiohua'ípa'í esa jë'ye duruhuëje pa'iohua'í pa'í do'ire iohua'ire ëjaohua'ire ñajë dahuëre paye. Coa ai jerepa Maija'quë oi mësarute pa'iyere isise'eje pa'ye jaohua'ireje isisi do'ire mësarua de'oye ñajë pajë'ë. Jaje yo'ojëna, mësarute josa ta'tëpoje pa'io pa'iyere pasipi, Maija'quëre se maca.

De'oyere Pare Yo'o Do'ire Ai Yo'ocohua'í Pa'iyere

⁸ Jaje pa'ito pai ñape sa'ñe de'oye yo'ojë pa'ijë'ë, te'e nëñiña tsiosicohua'ípa'í sa'ñe Maija'quë do'ijëre oijë. Teaye pa'iohua'ípa'í de'oye yecohua'ire oijë cõcaicohua'í pa'ijë'ë.

⁹ Mësarute co'aye yo'ouna, iteje co'ayepi saima'cohua'í pa'ijë'ë, pëi tea ju'iquëna. Iteje pëijë sañope tea ju'ñepi saima'pë pa'ijë'ë. Coa ai jerepa mësarute sañope cacohua'íni de'oyepi cacaijë'ë, Maija'quëpi de'oye pa'iyena de'huaja'cohua'íni soisicohua'í sëtë.

¹⁰ Jaje pa'ina:

Paipi sihuaquë de'o mu'seña pasi'í cani

I tsemeñore nau nëcoye pa'iji,

Coso coca caye paja'core yë'opopi.

¹¹ Co'aye yo'oyere jëoconi de'oyere yo'ojë pa'ijë'ë.

Jo'cua de'oye pa'iyere co'eni t'ani jare yo'oye pa'iji.

¹² Èjaëpi nuiñe pa'icohua'ire ñacai paji.

Cui'ne iohua'í ite señeje asacai pa'iji.

Jaje pa'iquëta'are co'aye yo'ocohua'ire cato sañope yo'oquë pa'iji.

¹³ ¿Nepi mësarute sañope yo'ojä'cohua'í a'ni, mësarupi si'anë de'oyese'e yo'ocohua'í pa'ito?

¹⁴ Jaje pa'iquëta'are mësarü nuñerepa yo'ojë pa'i do'ire ai yo'oni sihuacohua'i pa'ija'cohua'i a'ë. Ca'rama'pë pa'ijë'ë. Cui'ne co'a ju'ima'pë pa'ijë'ë.

¹⁵ Coa ai jerepa Cristore mësarü joñoa Ejaëre pare pajë'ë. Jaje pa'ina, si'anë cuañesicohua'ipi pa'ijë'ë, mësarü sehuoni utejë pa'iyere paipi seni asañu'u cajë secohua'ire, dahuëre pa'iohua'ipi, ëjaohua'ire ñajë de'oyere papi johua'i sese'ere sehuocaijë'ë.

¹⁶ Jaje pa'ina, mësarü cuasayepi jo'cua pa'ijaquë cani de'oye yo'ojë pa'ijë'ë. Pa'ijëna, mësarü nuñe Cristore sehuocohua'i ëaye pa'iyere co'aye cacohua'ipi johua'i co'aye case'ere cuasajë co'a ju'ija'cohua'i a'ë.

¹⁷ Ai jerepa de'oji, nuñere pare yo'ojë ai yo'oye pa'ito. Jaje Maija'quëpi yë nëoru. Co'ayere yo'o do'ire ai yo'oye cato do'i peoye a'ë.

¹⁸ Mai co'aye yo'o do'ire saicai Cristo ai yo'opi, te'ore pare juni tëjiquë. De'okuëpi ai yo'opi, mai co'acohua'i do'ire, maini Maija'quë quë'rona sasi'i caquë. I capë cato huahuoni ju'isiquë paji'i. Jaje pa'isiquëta'a i joyopi huëoquëna, cui'naëpi huajëquë pani copï.

¹⁹ Ja joyopi sani paire necaise'ere quëapi, tse'a cuañosi joñoare.

²⁰ Ja joñoa cato tsoe hug'ña Noë pa'inë Maija'quëre sehuocaima'cohua'i pa'ijë pa'isicohua'i paë'ë. Jai yohuë de'hua maca Maija'quë yo'o jujama'ë johua'ire utequë pa'i maca ja joñoare quëapi. Coa ocho pai maña huaso cuañojë pa'ahuë'ë, ocopi.

²¹ Maire oco doye cato ocho paire huasose'eje pa'ye a'ë. Jaje pa'ina, Jesucristo juni huëisi do'ipi maire huasoji. Oco doye cato coa iñoñe a'ë, ja huasosicohua'i pa'iyere. Jaje pa'ina, ëmëje'e si'sire tsoa toñere oco doye iñoñe paji. Coa ai jerepa de'oye cuasayere pañu'u cajë Maija'quëre señere iñoji.

²² Maire huasoquë cato ma'tëmona mëni Maija'quë ëja te'tere pa'iji, si'aohua'ire huñahua'ire cui'ne cuañe tutu pacohua'ire meñe cuañequëpi.

4

Diusu Isisi Tutu Pa'iyë Ja'ye Ñacajë Pa'iyë

¹⁻² Cristopi i capë ai yo'oquë ju'iji. Jaje pa'ina, iye cuasayere pajë'ë. Capëpi ju'isiquë cato co'aye yo'oye tëni saisiquë api. Tëni saisiquëpi si'a i iye yeja pa'i maca Maija'quë yëyere yo'oquë pasipi, i capë co'aye yëyere yo'oma'ë, jare cuasajë pa'ijë'ë.

³ Teape tsoe mësarü Maija'quëre sehuoma'cohua'i yo'oyere yo'ojë paë'ë, si'aye yo'oyena sëo measicohua'ipi, co'ayere yëyere, cuepeyere, jai pai tsi'sini aijë ai pisiye yo'ojë cayere, jaiye çono ucuyere, cui'ne Maija'quë api cajë co'ayere sejë yo'ojë paë'ë.

⁴ Jaohua'i cato yure mësarute johua'ire ñañë, mësarupi te'e johua'i ja're çoni co'ayere yo'ojë pa'ima'pëna. Jaje pa'ina, mësarute co'aye cayë.

⁵ Jaje pa'iquëta'are jaohua'i cato johua'i pai ñape yo'ose'ere iñoja'cohua'i a'ë, huajëcohua'ire cui'ne ju'isicohua'ire pai ñape yo'ose'ere saisi'i caquë ña de'huacuëna.

⁶ Jaje pa'ina, ju'isicohua'ire de'o cocare quëapi. Ja cocapi johua'i huajëcohua'i pa'inë yo'ose'ere ña de'huayere caquë, johua'i Diusu pa'iyë isiyepi joyopi pa'ijajë caquë yo'opi.

⁷ Si'a co'amaña carajai mu'leña t'ajai. Jaje pa'ina, mësarü nuñerepa pa'iohua'ipi Maija'quëre señese'e yo'ojë pa'ijë'ë.

⁸ Jaje pa'ina, si'aye jerepa pai ñape sa'ñe oiyere pajë'ë. Paire oiyere cato jaiye co'aye yo'oyere sai de'huacaiye a'ë.

⁹ Pai ñape yecohua'ire de'oye yo'ojë'ë, mësarü huë'ena daicohua'ire, ësema'pë.

¹⁰ Jaiye tiñe pa'ye Maija'quë isiyë de'o co'amaña de'oyerepa necaicohua'i sëte pai ñape yecohua'ire necaijë'ë, mësarü isi cuaño'seje pa'ye.

¹¹ Mësarü joyopi cocare caquë pani Maija'quë coca cayeje pa'ye cajuquë, cui'ne yecohua'ini cocaiquë pani Maija'quë isi tutupi cocaijaquë. Jaje pa'ina, si'aye mësarü nerojaiñe cato Jesucristo do'ija'a, Maija'quëre sihuajë de'oquëre pa'ni ca ja'ñere neñe pa'ijaquë. Maija'quëre cato si'a miañe jare i tse'se'e a'ë, cui'ne si'a co'amaña jare i tse'se'e a'ë, je'nëna. Jaje pa'ijaquë.

Cristore Tuicohua'i Ai Yo'oye

¹² Yë'ë oicohua'i, toa ëoyeje pa'ye jëaye neñañepi mësaruna t'itaja'coa. T'itacona, me neni jaje tiñerepa pa'iquë'ni cuasama'pë pa'ijë'ë.

¹³ Neñañepi pa'ito coa ai jerepa sihuajë'ë, Cristo ai yo'ose'e ayere mësarujë pajë cajë, si'aye i ayere de'oyerepa mësaruj'a iñoquëna, ai sihuaja'cohua'ipi.

¹⁴ Jaje pa'ina, yecohua'ipi Cristore tui do'ire mësarute co'acohua'i a'ë cato mësarü sihuacohua'i pa'iyë pa'iji, Maija'quë de'o joyopi mësarü ja're pa'i do'ire.

¹⁵ Paire huani jëoñere, co'amaña yahue iñere, co'aye yo'oyere, yecohua'i yo'oyere coa cacarójajë ne de'huacaiyere yo'oye peoji, iyere yo'o do'ire ai yo'oquë pani huajëya' ju'iñe pa'iji.

¹⁶ Jaje pa'iquëta'are Cristore tui do'ire ai yo'oquë pani huajëya' ju'iñe peoji. Coa ai jerepa Maija'quëni de'oquëre pa'ni caquë sihuaye pa'iji, ai yo'o do'ire.

¹⁷ Tsoe t'api, Maija'quë tsëcapëre pani iohua'i yo'ose'e ñaquë sai de'hua maca. Jaje mai yo'ose'ere du'ru ñaquë sai de'huaye huëto, çmerepa jaohua'i Maija'quë caye sehuoma'cohua'i yo'o cuãñoja'cohua'i a'ni, ai co'acohua'i cui'ne Maija'quë cuãñeñe yo'oma'pë tayocohua'i?

¹⁸ Nuñe yo'ocohua'ita'a huaso cuãñoñe ai yo'oye pa'iji. Jaje pa'ito, çmerepa co'aye yo'ocohua'i cui'ne tayocohua'i jëa t'aja'cohua'i a'ni?

¹⁹ Jaje pa'ina, Maija'quë yëyepi yo'ojë ai yo'ocohua'i cato jare de'oyere yo'ojë pa'iyë pa'iji, joñase'ere Maija'quëna isini pa'ijë, Maija'quë cato maire ne de'huaquëpi, cui'ne i case'eje yo'o t'iaquëpi.

5

Sehuosicohua'ire Yëhuoye

¹ Yë'ëje sehuosicohua'i ëjaë'ë. Jaje pa'ipi Jesucristo ai yo'oquëna, ñasiquëpi yure yëhuoyë, sehuosicohua'i ëjaohua'ire, mësarü quë'ro pa'icohua'ire, yë'ëje iohua'i ja're çoni Jesús aye de'oyere pare jeteyo'je pajaj'quëpi.

² Mësarupi ñacaija'cohua'i a'ë caquë Maija'quë mësaruna isisicohua'i de'oye cuasajë yo'ojë'ë, Maija'quë yëyëje pa'ye. Yo'oma'pë pa'ijë'ë, cuãñe nëosi do'ire panita'a curiquëre ai yë do'ipi mësarü yë do'ire sihuajë nejë'ë, co'amaña.

³ Cui'ne mësarü tseçohua'i a'ë cuasama'pë pa'ijë'ë, mësarü ñajë pacohua'ire. Coa ai jerepa iohua'ini de'oye pani iñojë'ë, mësarü pa'iyere ñajë tuija'cohua'ire.

⁴ Jaje mësarü yo'onita'a yëi ñamare ñacaicohua'i Èjaërepa dai maca de'o marore pare isi cuãñoja'cohua'i a'ë, ti me'me tomema'coni, cui'ne i ayere de'oyere pare iñoja'coni.

⁵ Jaje cui'ne mësarüje posëohua'ijë sehuosicohua'i ëjaohua'i cayere de'oye sehuocohua'i pa'ijë'ë. Si'ahua'i pai ñape yecohua'ire de'oye sehuocaijë dahuëre pa'ijë'ë. Jaje pa'iyë pacohua'ire cato Diusupi sañope yo'oquë api, jerepa iohua'i a'ë cuasacohua'ire. Jaje pa'iquëta'are dahuëre pa'icohua'ire cato de'oye yo'oquë i oiyepi cçaiquë api.

⁶ Jaje pa'iyë sëte Maija'quë tutu quë'i Èjaëre pa'ë cuasajë i cuãñeñere sehuojë dahuëre pa'ijë'ë, ipi mësarute jerepa tëto saisicohua'ire neja'quëre iti yo'o maca t'iaëna.

⁷ Jaje pa'ina, si'aye mësarü co'a ju'iñe Maija'quëna isijë'ë, mësarute oi ñacaiquëna.

⁸ Nare pajë pa'ijë'ë, sëtasicohua'ipi. Mësarute sañope yo'oquë huati, jai yaije pa'ipi t'ë'ijai mësarute co'equë cu'iji, asi'i caquë.

⁹ Sañope ite quëco saojë'ë, Maija'quë pa'iji nuñerepa cuasayepi. Si'a hue'ña Maija'quë do'ijë pa'icohua'ijë cui'ne ai yo'oye pa'iquëta'are quëcoyë cuasajë mësarüje quëcojë'ë.

¹⁰ Jaje coa nëhui tëcahuë ai yo'osi jeteyo'je Diusupi mësarute de'ocohua'ire nuñerepa pa'iohua'ire tutu quë'iohua'ire, cui'ne t'aja'cohua'ire pa'ë asacohua'ire nesipi, maire ai oi Jesucristo ja're tsioni pa'ijë ti carajai ma'ñere de'oyere pare pajajë caquë soisiquëpi.

¹¹ Jaë api, jerepa pa'i de'oquërepa ti carajaima'quërepa. Jaje pa'ijaquë.

Pëpa Tëjijerepa

¹² Maija'quë do'iquë nuñe pa'iquë Silvanona toya cuãño huë, iye nëhui coca maña. Iye toyase'e cato mësarute yëhuoye a'ë, cui'ne care paye a'ë, Maija'quë maire oi coa isise'ere. Jaje pa'ito çcue pa'i macarepa itire tuijë pa'ijë'ë.

¹³ Babilonia sehuosicohua'i pa'icohua'ipi mësarute pëpa saoyë, mësarute soise'eje pa'ye Diusu soisicohua'ipi, cui'ne yë'ë mamaquëje pa'i Marcosje mësarute pëpa saoji.

¹⁴ Pai ñape yecohua'ire yo'jeire oiyepi oijë su'cuajë sihuajë pëpacaijë'ë.

Si'ahua'i Jesucristore pacacaicohua'i sëte, ipi ñacaina, jo'cua de'oye pa'ijë'ë. Jaje pa'ijaquë.

2 SAN PEDRO

Pedro Toya Cqse'e Hua Saicohua'ina

¹ Yè'è, Simón Pedropi iye toya ja'hua toyayè, mésaruni caquè. Jesucristo jo'yaèpi i jèjo dao-quèpi. Maija'què nuñerepa yo'oquèpi cui'ne Jesucristo paire huasoquèpi, yèquè cuasayeje pa'ye Maija'què pa'iji cuasayere de'oyere pare cuasa tì'añe isisicohua'ina toyayè.

² Maija'què coa isiyè cui'ne jo'cua de'oye pa'iyepi mésarute jerepa pa'ijaquè, mai Èjaè Jesucristore cui'ne Maija'què mésarua cuasa tì'a do'ipi.

Cristore Tuicohua'i Yo'oye

³ Maire Maija'quèpi soipi, i jerepa pa'iyepi cui'ne i de'oyerepa yo'oyepi. Jaje pa'ina, Maija'quèpi i tutupi maire isipi, si'aye caraye peoyerepa, nuñerepa de'oyerepa yo'ojè pa'ija'ñere, ite mai cuasayepi.

⁴ Ja co'amaña do'ija'a jaiye i ca nèse'e ai de'oyere pare jai do'ire maina isipi, maipi iye yeja pai èaye nēñepi co'a de'oyena sayere cati saiscicohua'ipi pa'ijè i pa'iyè ayere tì'ani pa'ijajè caquè.

⁵ Jaje pa'ina, mésarua ai seña maca payere cajè tutu yo'oye pa'iji. Jaje pa'ina, mésarua Maija'què pa'iji cuasayepi de'oyese'e yo'oyere se mèojè'è. De'oyese'e yo'oyepi ta'ñe cuasayere se mèojè'è.

⁶ Ta'ñe cuasayepi yèyere co'ye quèco tì'añere se mèojè'è. Yèyere co'ye quèco tì'añepi yo'o jujama'pè quècoyere se mèojè'è. Yo'o jujama'pè quècoyepi nuñerepa cuasayese'e se mèojè'è.

⁷ Nuñerepa cuasayepi Maija'què do'ijère oiyere se mèojè'è. Maija'què do'ijère oiyepi, si'aohua'ire paire oiyere se mèojè'è.

⁸ Jaje mésarupi iye co'amañare pajè se mèoto mésarua pa'iyè do'i què'ye pasipi, coa pa'iyè peojè. Cui'ne mésarua Cristore cuasase'ere se mèofne pa'iji.

⁹ Jaje pa'iquèta'are iye co'amañare peoquè cato ñama'quèje pa'i api. Panita'a ñaco poreije pa'i api. I ja'nè co'aye yo'ose'e tsoa tçaise'ere huanèyesiquè api.

¹⁰ Jaje pa'ina, Maija'què do'ijè, mésarute Maija'què sahuani i tşecohua'ire nese'ere iñoñu'u cajè ai cuasajè yo'ojè'è. Mésarupi jaje yo'oni co'aye yo'oyena taiñe ti paja'cohua'i a'è.

¹¹ Jaje cui'ne maire huasoquè Jesucristo cuañe tē'tepi mai cacaja'a eta sa'ro jaicorepa hui'yocaisicopi pa'ija'coa.

¹² Jaje pa'ina, mésarupi ta'ñe cuasajè nuñere pare ocue pa'i macarepa pa'itoje ja yè'ta'api yè'è cato mésarute ca sètoquè pasi'i si'aye mésarute ye'yase'ere.

¹³ Jaje pa'ina, yè'è cato iye nuñere pa'è cuasayè. Ja yè'ta'a yè'è huajèquè pa'i maca cato mésarute yèhuo sètoquè pasi'i caquè.

¹⁴ Jaje pa'iquèta'are mai Èjaè Jesucristopi yè'ère quèa iñoipi, mè'è esa iye yeja pa'iyè jeoja'què a'è caquè.

¹⁵ Jaje pa'ina, yè'è ju'isi jeteyo'je yè'è ca sètosi co'amañare si'anè cuasa cuañofne pa'ijaquè caquè, yè'è ai cuasaye ja'ye yo'oyè.

Mai Èjaè De'oyere Ñaño

¹⁶ Mai Èjaè Jesucristo daiye cui'ne i tutu què'irepa pa'iyere yèquè mésarute quèase'e paise'e coa cuasa huèose'ere quèaye pahué. Yèquè ñaco care papi jerepa pa'i pa'ina, ñase'ere quèahuè.

¹⁷ Cui'ne yèquèpi ite ñajè cui'ne asahuè, Maija'quèpi Jesure de'oquère pani, jerepa pa'ini sihuaquè ma'tèmoni de'o yè'orepa "iquè api, yè'è mamaquè, yè'è oiquèrepa. Ini ai sihuaquè pa'iyè," caquèna.

¹⁸ Jaje asahuè, ma'tèmoni yè'ose'e Maija'què caye jutaquèna, jeto de'o cutihuère Èjaè ja're conì pa'i maca.

¹⁹ Jaje cui'ne payè, maire jerepa care paye necai cocaje. Ja cato Maija'quère quèacaicohua'i toyajè pa'ise'ere cayè, jare mésarua de'oyerepa asacaiye pa'iji, toa tsèo pè ñami miacaiyeje pa'ye mésarute miacaiyere. Jaje miacai pasipi, mésarua joñoana, ñata ma'ñocore papi miacaiye tì'a macaja'a.

²⁰ Jaje pa'ina, mésarua cato cuasaye pa'iji. Maija'què coca toyase'e cato pai quèase'e peoye a'è.

²¹ Jaje pa'ina, Maija'quère quèacaicohua'i cato johua'i cuasayepi huèojè caye pa'ahuè'è. Coa ai jerepa Maija'què joyopi quèaquèna, Maija'què yèyere ca'ghuè'è.

2

Coa Cosoye Ye'yacohua'ire Quëaye
(Jud 4-13)

¹ Israel pai Maija'quëre quëacaicohua'ipi pa'iyë, cacohua'i. Coa cosocohua'i pa'ahuëë. Jaje cui'ne mësarü acohua'ijë ye'yacohua'ipi coa cosocohua'i pa'ija'cohua'i a'ë. Jaohua'ipi yahuerëpa johua'i co'aye cuasayere ye'yacohua'i a'ë nejo cocare. Jaje yo'ojëta'ajohua'ire huasosi ëjaëni coa caquë api caja'cohua'i a'ë. Jaje ca do'ire johua'ire ai esa nejoñepi tütasipi.

² Jai pai jaohua'ire tuija'cohua'i a'ë, johua'i co'aye yo'oyere ñajë. Jaohua'i do'ire iye de'ococare, yecohua'ipi co'aye caja'cohua'i a'ë.

³ Jaje pa'ina, ai curiquë yë do'ire mësarü payere sioja'cohua'i a'ë, coa cosoye ye'yayepi yo'ojë. Jaje pa'ina, jaohua'ire cato nejoñepi ti jëa t'añë peoyere papi uteji, tsoe huë'ñana jaje nejoja'cohua'ire ña nëosicohua'ire sëte.

⁴ Diusu j huññaohua'i tayosi do'i sai de'huacaiye pa'aji'i. Coa ai jerepa johua'ire cato huëni ai nea huë'ñare pana toa yejana jeocaj'i'i. Jaohua'i cato pai ñape yo'ose'e ña mu'señarepa ca tējijja'cohua'ipi de'huasicohua'ipi pa'iyë.

⁵ Jaje pa'ye cui'ne yeja tsoe huë'ña pa'isicohua'irejë Diusu sai de'huacaiye pa'aji'i, johua'i tayose'e. Coa ai jerepa ocopi co'je huëa'ji'i. Co'je huëacona, coa Noë macase'ere, iti nuiñe pa'iyere quëasiquëse'ere cui'ne j ja're coni siete pai pa'icohua'ise'ere huasoaj'i'i.

⁶ Jaje cui'ne Sodoma cui'ne Gomorra pai daripëaje Diusupi nejoaj'i'i, huatase'e ëo huesoquë. Iye cato yo'oa'ji'i, jeteyo'je co'a pai pa'icohua'ipi jaje yo'oye co'aye a'ë cuasajë pa ja'ñere caquë.

⁷ Jaje yo'oquë coa Lotse'ere huasoaj'i'i, co'a paipi co'ayere yo'ojëna, ñaquë oi pa'isiquëse'ere. Jaë cato nuñe pa'iquë pa'aji'i.

⁸ Jaje nuñe pa'ipi johua'i quëno macare pa'i si'a mu'señapi si'aye johua'i co'aye yo'oyere asaquë cui'ne ñaquë j de'ocoyopi ai yo'oquë oi pa'aji'i.

⁹ Jaje mai Ejaë cato ina isisicohua'ire neñañere pa'ito huasoquë api. Jaje pa'iquëta'are co'acohua'ire cato pai ñape yo'ose'e ña mu'serepa si'seja'cohua'ini paquë api.

¹⁰ Diusupi si'seja'quë api, si'sire yëjë yo'ojë pa'icohua'ire, ëjaohua'i cayere coejë sañope cacohua'ire. Jaje pa'iohua'ipi huajëya'ye peoyerepa cui'ne ai co'a ju'ima'pë johua'i yëyese'e cuasajë ti ca'rama'pë ëjaohua'ire co'aye cacohua'i a'ë.

¹¹ Jaje pa'iquëta'are huññaohua'i ai tutu pacohua'ita'a ëjaohua'ire co'aye cama'cohua'i a'ë, Maija'quë ña huë'ña.

¹² Jaje pa'iquëta'are jaohua'i cato coa nëtërojaicohua'ijë pa'iohua'i a'ë. Asa t'añë peocohua'i a'ë. Coa johua'ire nëñeje yo'ocohua'i a'ë. Tseani huani jeoja'cohua'ipi jojosicohua'i a'ë. Jaje pa'iohua'ipi johua'i asaye t'ja ma'ñere co'aye a'ë cayë. Ja do'ire nëtërojaicohua'i ju'iñeja pa'ye ai yo'ojë juni huesëja'cohua'i a'ë.

¹³ Yecohua'ire johua'i co'aye yo'osi do'ire sai de'hua cuajñojë yure cato si'a mu'seña anirojajë sihuacohua'irepa pa'iyë, cuasayë. Jaohua'i cato si'si a'sioje pa'iohua'i pa'iyë, mësarü ja're con. Jaje pa'iohua'ipi mësarü ja're con aq aijë sihuayë cajë yo'oyë, johua'ire coto huesose'ere jerepa yo'ocohua'ijë.

¹⁴ Jaje pa'iohua'ipi te'oc macareje, nomiore coa ñañe pañë, jare nomi ëayese'epi ñacohua'i a'ë, tayo yo'oyeje ti jë'joma'cohua'i a'ë. Tutu peocohua'ire cato johua'i yo'oyepi cosojë co'aye yo'oyena ne taocohua'i a'ë. Ai co'amaña tsi'soni payere cajë ta'ñerepa yo'ocohua'i a'ë, Maija'quë co'aye ca nëosicohua'ipi.

¹⁵ Beor mamaquë Balaam co'ayere yo'oquë curiquë nesi'caquë yo'ocohua'ijë pa'ye yo'oyë, jaohua'i cato.

¹⁶ Jaje yo'oquëna, ite burra ti cama'copi pai yë'ore papi j tayoquë yo'oyere ca quëcoaj'co'ë. Jaje cani j cuepequë yo'oyere necaiye pa'aco'ë.

¹⁷ Iye pai cato oco dea pëpi oco peocojë pa'icohua'i a'ë, cui'ne sirioni tutupi t'irona tutu saoyeje pa'iohua'i a'ë, nea huë'ñare pana ti nejoja'cohua'ire ña nëosicohua'ipi pa'iyë.

¹⁸ Jaohua'i cato pa ëaye nëi tutupi ca huëocohua'i a'ë, do'i peo cocapi cajë. Jaje cajë tayocohua'i quë'ropijja'gati huajësicohua'ini, johua'i capë co'aye yëyena capë ëayere sëo mease'ere yo'ojë, cosojë jaohua'ire co'aye yo'oyena ne taocohua'i a'ë.

¹⁹ Jaje yo'ojë cayë iye a'ë, de'oyerepa pani huajëye. Jaje cajëta'are johua'i si'si pa'iyepi jo'ya nesicohua'ire paji. Jaje pa'ina, si'a pai johua'ire yo'ocohua'ijë, quëco t'ama'pë yo'oyere ëjaëre payë. Japi jo'ya nesicohua'ire paquëna, pa'iyë.

²⁰ Jaje pa'ina, maire huasoquë Ejaë Jesucristore asa do'ire iye yeja co'aye pa'iyere cati saicohua'ipi cui'naohua'ini ja'ñë co'aye yo'ose'epi huë cōsicohua'i pani, ja'ñë pa'ise'e seña maca co'a huë'ñana cacayë.

²¹ Ja do'ire ai jerepa de'ora'pi, jaohua'ire nuñerepa pa'i cocare asama'cohua'ipi pa'ito co'aji. Yure cato Maija'quë de'oyerepa cuañeñere iohua'ina isipi, ite asasicohua'ita'a jeoni pa'ijëna.

²² Jaje pa'iquëta'are jaohua'ina tì'api, tsoe case'epi: "Jo'ya yai i siso oasiconi ani coquë api, cui'ne sесе ja'a de'oye tsoa tosicopi ya'o dana cui'naopi cuyacoa."

3

Ëjaërepa Daiyere Quëaye

¹ Maija'quë do'ijë yë'ë oicohua'i, ico cato yë'ë cayaye acore mësarute toya saocoa. Iye cayaye toya saoyena, mësaru nuñerepa cuasajë pa'iyere yëhuo sëtosi'i cuasahuë.

² Jaje pa'ina, huanëyema'pë pa'ijë'ë, Maija'quëre quëacaicohua'i de'ocohua'irepa case'ere, cui'ne Ëjaërepa huasoquë cuañese'ere, jare i jëjo daocohua'i mësarute ye'yase'ere.

³⁻⁴ Cuasajë'ë, iyere: Tëji mu'seña cato iohua'i yëyeje pa'ye co'ayere yo'ocohua'ipi daija'cohua'i a'ë. Jaohua'ipi cue'cue yë'opi, seja'cohua'i a'ë: "Me neo'ni, yure Cristo dasi'i ca nëose'e", mai aipë maña juju satoje yeja de'hua maca acoje pa'ioi nëio carajaico iye yeja.

⁵ Jare secohua'ipi cato tsoe hue'ña Maija'quëpi cuañequëna, ma'tëmo ëjacona, cui'ne yejaje oco da'case'e pa'isicopi oco da'caja'a yeja ëjapi. Jare asacohua'ita'a jare asayere coejë jaje cayë.

⁶ Cui'ne tsoe hue'ña yejaje ocopi co'jeni si'aye iote pa'iyere nejose'ejë asacohua'i a'ë.

⁷ Jaje pa'iquëta'are ma'tëmo cui'ne yeja yure pa'iyere cato toana ëo ja'ñepi pa'iji, Maija'quë cuañe do'ipi de'huase'epi. Ja toapi pai ñape yo'ose'e ña tëji mu'serepa co'acohua'ire ëo huesoquë nejoja'quë api.

⁸ Maija'quë do'ijë yë'ë oicohua'i iyeje huanëyema'pë pa'ijë'ë, mai Ëjaëre cato te'e mu'sepi mil ometëcaje pa'ye pa'iji, cui'ne mil ometëcapi te'e mu'seje pa'ye pa'iji.

⁹ Mai Ëjaë yecohua'i cayeye pa'ye i ca nëose'ere yo'o tì'ama'ë tsoe nëima'ë pa'iji. Coa ai jerepa i cato mësaruni cuasaquë dahuëre yo'o'ji, pai juni huesëyere ësequë. Jaje pa'ina, i cato yëji, si'aohua'i Maija'quëna ponëni co'iyere turo pa'icohua'ipi.

¹⁰ Jaje pa'iquëta'are ti cuasama'topi tì'aja'coa, Ëjaë mu'se cato, co'amaña ñaë daiyeje pa'ye. Ja macarepa ma'tëmo cato peo hue'ñarepa nejosico pasio ai huajëya'yerepa tutu pisiyepi. Ja macarepa ma'tëmo pa'i co'amaña peo hue'ñarepa ëose'e pasipi, cui'ne iye yeja pa'i co'amañaje peo hue'ñarepa ëose'e pasipi.

¹¹ Jaje si'aye nejo ja'ñese'e pa'iji asacohua'i sëte, ai jerepa ina isisicohua'ipi ise'ere cuasajë necaijë pa'iyere pa'iji.

¹² Jaje pa'ina, Diusu yo'o'ja'a mu'se esa tì'ajaquë cajë tutu yo'ojë'ë, Maija'quë yo'o'ja'a mu'serepa tì'añere utejë. Ja mu'se cato si'aye ma'tëmo pa'iyere cui'ne yeja pa'iyere nejo huesose'e pasipi, toa uyepi peo hue'ñarepa ucosi huesoquëna.

¹³ Jaje pa'iquëta'are mai cato huajë ma'tëmore cui'ne huajë yejare utejë pa'iyë. Diusu ca nëose'ere de'oyese'e cui'ne nuñere pase'e pa'ija'tore.

¹⁴ Jaje pa'ina, Maija'quë do'ijë maña iye co'amañare utejë pa'ijë de'oye yo'ojë pa'ijë'ë. Maija'quëpi tütani si'si te'ña peocohua'ire cui'ne co'aye yo'ose'e peocohua'ire de'oye ñaja'quëre.

¹⁵ De'hua cuasajë'ë, mai Ëjaë cato maire oi do'ire esa daiye paji, maipi huasosicohua'i pa'ijajë caquë. Jaje cui'ne toyapi, Maija'quë do'iquë mai oiquë Pabloje, Diusu ite ta'ñe asaye isise'ejë pa'ye.

¹⁶ I mësarute toya saoye ñape iye ayere mësarute capi. Jare caquë toyase'e ayeta'a yeque cato asa tì'añe jëayeque pa'iji. Pa'ina, jare huesëohua'ipi Maija'quë pa'iji cuasaye carasicohua'ipi tñe ponañë. Ja ponañeje pa'ye Maija'quë coca toyase'ejë tñe ponacohua'i sëte, iohua'i nejo cuaño ja'ñere jaje yo'oyë.

¹⁷ Ja do'ire Maija'quë do'ijë, yë'ë oicohua'i mësaru cato iye pa'i ja'ñere cuasacohua'ipi de'hua ñajë pa'ijë'ë, mësaru nuñerepa pa'iyere, co'acohua'ipi mësarute iohua'i cosoyepi ne ta'ojë.

¹⁸ Jaje pa'ina, mësaru cato ai jerepa mai Ëjaë huasoquë Jesucristoni de'oyerepa i pa'iyere asa tì'ajë'ë, i oiyeye pa'ye oiyena ai de'o'ja'cohua'i. Jaëpi de'ouquërepa yure cui'ne je'nëna ti carajaima'quërepa. Jaje pa'ijaquë.

1 SAN JUAN

Pa'i Cocarepa

¹ Toyayë, mësarute du'ru pa'i huëose'ere pare. Jare yëquëpi asajë cui'ne yëquë ñaco care papi ñahuë. Jaje pa'ina, ñajë yëquë jëñapi itire papihuë, pa'i coca ayere. Ja cato cayë.

² Iye pa'i cocapi yëquëna eta iñopi, pëca ja'quë ja're conì pa'ise'epi. Jare yëquëpi ite quëacaicohua'ipi ñani mësarute quëahuë, ja ti pani huesëyere.

³ Yëquë ñase'ere cui'ne yëquë asase'ere mësarute quëahuë, mësarupi yëquë ja're tsioni pa'ijajë cajë, yëquë Maija'quëna cui'ne i mamaquë Jesucristona tsioni pa'iyeye pa'ye.

⁴ Jaje toyayë, mësarute sihuayepi tımëse'erepa pa'ijaquë cajë.

Ësëje Pa'i Api, Maija'quë

⁵ Iye coca cato Jesucristo yëquëre ye'yase'e a'ë. Jare mësarute quëahuë. Maija'quë cato ësë miañeje pa'ye miaquë api, ite ti peoji, nea te'te macaje.

⁶ Jaje pa'ina, maipi i ja're tsioni pa'iyë cacohua'ita'a ja yë'ta'a nea hue'ñare pa'ini coa cosoyë, cayepi cui'ne yo'oyepi.

⁷ Jaje pa'iquëta'are maipi Diosu pa'iyeye mia hue'ñare pa'icohua'ì pani yecohua'ire tsiosicohua'ipi pa'iyë. Jaje pa'ito Jesucristo Diosu mamaquë tsiepi si'aye co'ayere tsoa toçajì, maire.

⁸ Tayo yo'oye peoyë cacohua'ì pani maija'a co'ye cosoyë, nuñerepa pa'iyepi maini peo do'ire jaje cacohua'ipi.

⁹ Jaje pa'iquëta'are tayo yo'oyere cajë oijë Maija'quëna quëato, Maija'quë de'hue necai nuñerepa yo'oja'quë api. Jaje yo'oquë ipi mai co'aye yo'ose'ere sai de'huacai cui'ne si'aye tayo yo'ose'ere tsoa toçajì'quë api.

¹⁰ Maipi tayo yo'oma'cohua'ì a'ë cacohua'ì pani Maija'quëpi coa cosoquëje pa'iyere neñë. I nuñerepa cocare itire pa'ë cajë cama'pë sehuoma'cohua'ipi.

2

Cristo Maire Cacaquë Api

¹ Maija'quë do'ijë iyere toyayë, mësarupi co'aye yo'oma'pë pa'ijajë caquë. Jaje pa'iquëta'are co'aye tayosicohua'ì panije payë, mai do'ire pëca ja'quë ja're ca de'huacaiquëre, Jesucristore nuñe pa'iquëre.

² Jesucristo cato mai tayo yo'oyepi cui'ne si'aohua'ì iye yeja pa'icohua'ì yo'oyepi sai de'huacaise'e pa'ijaquë caquë jucacajì'ì.

³ Jaje pa'ina, Maija'quë cuañese'ere sehuoacacohua'ì pani de'hue ite asa tì'acohua'ipi pa'iyë asayë.

⁴ Jaje pa'ina, yë'ëpi ite asa tì'ahuë caquëpi i cuañese'ere sehuoma'quë pani coa cosoquë api, ñni nuñerepa cocapi peo do'ire.

⁵ Jaje pa'iquëta'are i cocare asaquë i cuañeñeje yo'oquë pani ite nuñerepa oiquëre papi. Jaje pa'ijë i ja're tsiosicohua'ipi pa'iyë asayë.

⁶ Jaje pa'ina, Maija'quëna tsioni pa'iyë caquë pani, Jesucristo pa'ise'eje pa'ye pa'iyepi pa'iji.

Huajë Cuañeñe

⁷ Yë'ë oicohua'ì, mësaru tsoe du'ru huëo maca asajë pa'isi cocare toyayë, tsoe hue'ña cuañese'ere, huajë cuañeñere toyama'ë pa'iyë. Iye cocare mësarupi asahuë.

⁸ Jaje pa'iquëta'are, huajë cuañeñere toyayë. Jaje pa'ina, Jesuni ñajë, cui'ne mësaruni ñajë nuñerepa cocare ñaño pa'iji. Jaje pa'ina, yure cato ñami pa'ise'epi tëto saina, nuñere papi miacajì.

⁹ Jaje pa'ina, mia hue'ñare pa'iyë caquëta'a Maija'quë do'iquëre coequë cato ja yë'ta'a nea hue'ñare pa'iji.

¹⁰ Maija'quë do'iquëre oiquë cato mia hue'ñare pa'iji. Jaje pa'ire co'ayepi ite ne taoñe peoji.

¹¹ Maija'quë do'iquëre coequë cato, nea hue'ñare pa'iji, i sai hue'ñaje huesëquëpi, neañepi ñaco cana tēhuo huesosiquëpi ñama'ë pa'iji.

¹² Tsì maña toyayë, mësarute, mësaru tayo yo'ose'ere Jesucristo do'ipi, sai de'huacaisi do'ire.

¹³ Ja'quëohua'ì toyayë, mësarute de'hue asa tì'arena, ja'a huëo maca pa'isiquëre. Toyayë, posëohua'ì mësarute, huatireje ñese quëcosi do'ire. Toyahuë, mësarute tsj maña de'hue ja'quëre pare asa tì'asi do'ire.

¹⁴ Toyayë, mësarute ja'quëohua'i, ja'a pa'i huëo maca pa'isiquëni de'hue asa t'i'asi do'ire. Toyahuë, mësarute posëohua'i de'hue tutu quë'iohua'i pa'ijë Maija'quë cocapi mësaruni pa'ina, huatire quëcorena.

¹⁵ Jaje pa'ina, oima'pë pa'ijë'ë, iye yejare, cui'ne jote pa'i co'amañare. Jaje pa'ina, iye yejare oito Diusu oiyepe ite peoji.

¹⁶ Si'aye iye yeja ayere paipi t'i'añe cato Maija'quë ise'e peoji, co'ayere capë yëye, ñaco capi ña ëaye, cui'ne jerepa pa'i a'ë cuasaye, si'aye iye cato yeja aye a'ë.

¹⁷ Jaje pa'ina, iye yeja cato si'a jo co'aye yëye çni carajajia'copi pa'ico. Jaje pa'iquëta'are Maija'quë yëyere yo'ocohua'i cato ti pani huesëja'cohua'i a'ë.

Nuñerepa Coca, Cui'ne Cosoye

¹⁸ Huau dohuë, t'i'api, t'ëji mu'señarepa, mësaruni ja'në Cristo sañope yo'oquë daija'quë api cajëna, asase'epi. Jaje pa'iyere yure jai pa'i Cristore sañope yo'ocohua'i etahuë. Jaje pa'ina, t'ëji mu'seña'ë asayë.

¹⁹ Mai ja're pa'isicohua'ipi etahuë, mai acohua'irepa peo do'ire. Jaohua'i yëquë acohua'irepa pani mai ja're patira'huë. Jaohua'i cato etahuë, si'aohua'i mai acohua'ise'e pa'iyere pañere iñojë.

²⁰ Jaje pa'iquëta'are mësarute Cristopi isipi, de'o joyore. Jaje pa'ina, nuñerepa ayere mësaruni asacohua'i pa'iyë.

²¹ Jaje pa'ina, mësarute toyama'ë paë'ë, nuñerepa cocare coa caye a'ë cuasacohua'ire toyayeje pa'ye. Mësaruni nuñerepa cocare asa t'i'acohua'ire sëte. Jaje pa'ina, mësaruni asayë, nuñerepa cocapi cosoye aye pa'iyere peoji.

²² ¿Jequë a'ni, cosoquë? Cosoquë cato Jesure Cristorepa peoquëni coa caye a'ë caquë api. Jaëpi Cristore sañope yo'oquë, mamaquëre cui'ne pëca ja'quëre coa caye a'ë caquë api, cosoquë cato.

²³ Jaje pa'ina, mamaquëre irepa peoquëni coa cayë caquë cato Maija'quëre peoquëpi pa'iji. Jaje pa'iquëta'are mamaquëre ire papi caquë cato Maija'quëre paquëpi pa'iji.

²⁴ Jaje pa'ina, mësaruni ja'a huëo maca asase'epi mësaruni pa'ito mësaruni mamaquëna cui'ne pëca ja'quëna tsiosicohua'ipi pa'ija'cohua'i a'ë.

²⁵ Jaje pa'ina, ti pa'iyere payë, Jesucristo maire ca nëose'ere.

²⁶ Cosocohua'i ayere quëaquë toyahuë, mësarute.

²⁷ Jaje pa'iquëta'are mësaruni cato payë, Maija'quë joyore, Jesucristo isisiconi. Jaje pa'ina, yecohua'i ye'yayere asañu'u cajë yo'oma'pë pa'iyë. Maija'quë joyopi mësarute ye'yaquë pa'iji. I ye'yaye cato carajaj ma'ñe a'ë, nuñere pa'ë, coso ma'ñe a'ë, iti ye'yayeje pa'ye yo'ojë Jesucristo ja're pa'ijë'ë.

²⁸ Yure jaje pa'ito huau dohuë, Cristona tsiosicohua'ipi pa'ijë'ë, i ñai maca quëcojë ca'raye peoyerepa i dai maca ñaja'cohua'i.

²⁹ Jaje pa'ina, mësaruni Jesucristore nuñe pa'ire papi asacohua'ire sëte, si'aohua'ire nuñe yo'ocohua'ire Maija'quë mamajë a'ë, asayë.

3

Maija'quë Mamajë

¹ Ñajë'ë, Maija'quë maire ai oi yë'ë mamajë a'ë cayere. Care paji, mai i mamajë a'ë. Jaje pa'ina, iye yeja pa'i mai pa'iyere asa t'i'añe pañë, Maija'quë pa'iyere asa t'i'ama'cohua'i sëte.

² Jaje pa'ina, mai cato Maija'quë mamajë a'ë. Jaje pa'iquëta'are Maija'quë do'ijë ja'yë'ta'a huesëyë, mai t'ñe pa'iohua'i pa'i ja'ñere. Jaje pa'iquëta'are asayë, Jesucristo ñaisi maca ite ñajë maije ije pa'iohua'i pa'i ja'ñere.

³ Jaje pa'ina, si'aohua'i ina uteye pacohua'i cato johua'ija'a co'ye tsoa toñë, Jesucristoje pa'iohua'irepa, ne'cua peocohua'irepa pañu'u cajë.

⁴ Jaje pa'iquëta'are cañese'ere tayo yo'oquë pani co'aye yo'oji. Jaje pa'ina, tayoye cato cuañese'ere ne jëyoye a'ë.

⁵ Tsoe mësaruni asayë, Jesucristo ti co'aye yo'oma'quëpi iye yejana daise'e, mai tayo yo'ose'ere nejocasi'iquë.

⁶ Jaje pa'ina, i ja're tsioni pa'iquë cato tayo yo'oma'quë api. Jaje pa'iquëta'are tayo yo'oquë cato iteje ñama'quë api, cui'ne i pa'iyere asa t'i'ama'quë api.

⁷ Huau dohuë, yecohua'ina coso cuañoma'pë pa'ijë'ë, nuñere pare yo'oquë cato nuñe pa'iquë api, Jesucristo nuñerepa pa'iyere pa'ye.

⁸ Jaje pa'iquëta'are tayose'ere yo'oquë pa'iquë cato huati tsequë api. Huati cato ja'a huëo maca aquëpi tayose'ere yo'oquë pa'iquë api. Jaje pa'ina, Maija'quë mamaquë huati nese'ere nejosi'iquë daji'i.

⁹ Maija'quë mamaquë de'osiquë cato tayo yo'oyere yo'oma'quë api, Maija'quë ayepi ini pa'i do'ire. Tsoe Maija'quë mamaquë sëte tayo yo'oma'quë api.

¹⁰ Jaje pa'ina, pai yo'oyena ñani asaye pa'iji, Maija'quë mamajëre, cui'ne huati mamajëre, nuñere pare yo'oma'cohua'ipi, cui'ne yecohua'ire oima'cohua'i cato Diusu tsecohua'i peoyë.

Sa'ñe Oijë Pa'ie

¹¹ Pai ñape yecohua'ire oiye pa'iji ca cocare mësaruru macarepa asacohua'i a'ë.

¹² Cañje pa'iohua'i pa'ima'pë pañu'u, huati aquëpi yo'jeire huani jeose'eje pa'iohua'i. Me yo'okuë yo'jeire huani jeose'e ñani, Cañ yo'oyepi co'aye paji'i. Pa'ina, yo'jei yo'oyepi de'oye paji'i. Ja do'ire huani jeopi.

¹³ Jaje pa'ina, Maija'quë do'ijë, iye yeja acohua'ipi mësarute coecohua'i pa'ito ¿me yo'ojë jaje yo'oye'ni? cajë ai cuasama'pë pa'ijë'ë.

¹⁴ Jaje pa'ina, maipi asajë pa'iyë, ja'në ju'iñere pa'isicohua'ipi ti pa'iyena tëto saisicohua'ipi pa'ie, Maija'quë do'ijëre ai oi do'ipi. Jaje pa'iquëta'are Maija'quë do'ijëre oima'quë cato ja yë'ta'a ju'i hue'ñare pa'iji.

¹⁵ Maija'quë do'iquëre coequë cato paire huani jeoquëje pa'i api. Jaje pa'ina, tsoe mësarupi asayë, paire huani jeoñe yëquë cato ti pani huesëye peoquë pa'iyere.

¹⁶ Paire oiye asa t'i'añë, Jesucristo maire oi do'ire ai yo'ose'ere asajë. Jaje cui'ne maije Maija'quë do'ijëni oijë ai yo'ocaiye pa'iji, mai pa'iyepi.

¹⁷ Jaje pa'iquëta'are iye yeja co'amaña paquëpi, Maija'quë do'iquëpi carajani ai yo'okuëna, coçaima'ë coa ñato co'aji. ¿Jaje pa'ire me Maija'quë oiye i joyore pa'iquë'ni?

¹⁸ Huau dohuë maña, jaje pa'ina, coa yë'ose'epi oiyë cama'pë pañu'u. Coa ai jerepa nese'ere papi iñoñu'u, mai nuñerepa oiye.

I Ña Hue'ñare Pana Quëcojë Pa'ie

¹⁹ Iyere asajë, nuñerepa acohua'i a'ë cuasajë cui'ne i ña hue'ñare pana mai joñoaje i tserre pa'ë asajë co'a ju'iñe peoyerepa pa'ija'cohua'i a'ë.

²⁰ Jaje pa'ina, mai joyopi co'acohua'i a'ë sañope caye pa'ito, Maija'quë mai joyo asaye jerepa pa'i sëte jerepa si'aye asaji, mai pa'ie.

²¹ Jaje pa'ina, Maija'quë do'ijë, mai joyopi sañope maire caye peoto co'a ju'iñe peoyerepa Maija'quëna quëcojë pa'iyë.

²² Jaje pa'ijë i yëyere yo'ocohua'ipi, cui'ne i cuañese'ere de'oye sehuoacohua'ipi mai yëyere ite seto ipi isija'quë api.

²³ Iye a'ë, i cuañeñe. Jesucristo cato Maija'quë mamaquë api asani ite tuiye pa'iji. Cui'ne pai ñape yecohua'ire oijë pa'ie pa'iji, Jesús cuañese'eje pa'ye.

²⁴ Jaje pa'ina, i cuañese'e sehuoacohua'i cato Maija'quë ja're con i pa'iyë, Maija'quëpi iohua'ini pa'ina. Maija'quë joyore maina isisi do'ire asayë, Maija'quëpi mai ja're pa'ie.

4

Maija'quë Joyo Cui'ne Cristore Sañope Yo'o Joyo

¹ De'oji, Maija'quë do'ijë. Iye yeja pai Maija'quëre cacacohua'i a'ë cajë, coa cosocohua'i pa'iyë. Ja do'ire si'aohua'ire care payë cuasajë asama'pë pa'ijë'ë. Coa ai jerepa iohua'i case'ere neñajë'ë, Maija'quë joyo ayere pa'ni, iye panita'a co'a joyopi cama'quë cajë.

² Iyena mësaruru Maija'quë joyore papi caquëna, cayë asaye pa'iji, iohua'ini Jesucristoni pai capë quë'irepa daji'i, cajëna.

³ Jesucristore jaje cama'quë cato Maija'quë joyore peoquë api. Cristore sañope yo'o joyore hue'equë api. Ja joyopi daija'quë api asahuë, mësaruru. Ja joyopi yure tsoe iye yeja paire pa'iji.

⁴ Huau dohuë, mësaruru cato Maija'quë tsecohua'i a'ë. Jaje pa'ina, mësarupi iti cosocohua'ini ñese quëcohuë, iye yeja paire pa'iquëre seña maca tutu quë'ipi mësaruru ja're pa'i do'ipi.

⁵ Jaohua'i ja cosocohua'i cato iye yeja acohua'i a'ë. Jaje pa'ina, iye yeja cocare cayë. Cajëna, iye yeja paipi iohua'ire asacaiyë.

⁶ Jaje pa'iquëta'are mai cato Maija'quë tsecohua'i a'ë. Jaje pa'ina, Maija'quë pa'ie asacohua'ipi mai cayere asayë. Maija'quë tsequë peoquë cato mai cayere asayë paji. Jaje yo'oyena, ñañë, Maija'quë joyo hue'equëre.

Diusu Paire Oiquë Api

⁷ Maija'quë do'ijë, pai ñape yecohua'ire oijë pañu'u. Paire oiye cato Maija'quë tse a'ë. Jaje pa'ina, yecohua'ire oicohua'i cato Maija'quë mamajë a'ë, cui'ne Maija'quë pa'ie asacohua'i a'ë.

⁸ Maija'quë cato paire oiquë api. Jaje pa'iquëta'are yecohua'ire oima'quë cato Maija'quë pa'iyere asama'quë api.

⁹ Jaje pa'ina, iye yejana i mamaquëre te'ire, jaë do'ipi pa'ie t'i'ajajë caquë jëjo dao maca maire Maija'quë oiye iñoñu'u.

¹⁰ Jaje pa'ina, i maire oi yo'ose'e cato iye a'ë, mamaquère mai co'aye yo'ose'e sai tocajja'quère jëjo daose'e a'ë, cui'ne Maija'quère ti oima'cohua'ini maire ipi oise'e a'ë.

¹¹ Maija'quë do'ijë, Maija'quëpi ja jerepa maire oisiquère sëte maije pai ñape yecohua'ire cui'ne oiye pa'iji.

¹² Te'ijë Maija'quère ñaco care papi ñasiquëje peoji. Jaje pa'iquëta'are maipi de'huerepa yecohua'ire oini asayë, Maija'quëpi mai ja're pa'iji cajë. Jaje pa'ina, maija'a i oiyeipi eta iñoji, ije pa'i yo'ojë.

¹³ Jaje pa'ina, i joyore maina isisi do'ire asayë, i ja're pa'ijëna, ipi mai ja're pa'iji cajë.

¹⁴ Jaje pa'ina, yëquë i mamaquère ñasicohua'ipi, pëca ja'quëpi mamaquère jëjo daopi, iye yeja paire huasoquère cajë quëayë.

¹⁵ Jaje pa'ina, Jesure Maija'quë mamaquère pare asaquë cato Maija'quë ja're pa'iji. Pa'ina, Maija'quëpi i ja're con i pa'iji.

¹⁶ Jaje pa'ina, i pa'iyere maipi asa ti'ajë i maire oiye oire paye a'ë asajë i oiyeere sehuohuë. Diusu cato oiquë api. Jaje pa'ina, paire oiquë cato Diusu ja're pa'iji. Pa'ina, Diusupi i ja're pa'iji.

¹⁷ Jaje pa'ina, ta'ñe paire oiye pasicohua'i pani, pai ñape yo'ose'e ña mu'serepa mai co'a ju'ima'pë quëaja'cohua'i pa'ija'cohua'i a'ë. Jaje pa'ina, mai cato Jesucristoje pa'iohua'i a'ë, iye yeja pa'i maca.

¹⁸ Paire oiye cato ca'raye peoye a'ë. Jaje pa'ina, paire nuñerepa oiyeipi ca'rayere pi'ra eto saoji. Ca'raye pa'ito nuñerepa oiye ti'ama'quë api.

¹⁹ Maija'quëpi maire du'ru macarepa oji'i. Jaje pa'i do'ire maije ite oiye.

²⁰ Jaje pa'ina, paipi "yë'ë oiye, Maija'quère" caquëpi Maija'quë do'iquère oima'quë pani coa cosoquë api. Jaje pa'ina, Maija'quë do'iquère tiña ñaquëni oiye pani çme Maija'quère ña cuañoma'quère oiye pa'iquë'ni?

²¹ Jaje pa'ina, maipi payë, i cuañese'e ñeje cayere: "Maija'quère oiquë cato Maija'quë do'iquëreje oiye pa'iji."

5

Pa'ire Paji Cuasayepi Iye Yeja Ayere Ñese Quëcoye.

¹ Si'aohua'i Jesure, Cristore papi asacohua'i cato, Maija'quë mamajëre pa'ë. Jaje pa'ina, pëca ja'quère oicohua'ipi mamaquëreje oiye.

² Jaje pa'ina, Maija'quère oijë, i cuañese'ere de'oye sehuocajë pa'ito, asayë, Maija'quë mamajëreje cui'ne oicohua'a' a'ë cajë.

³ Maija'quère oiye cato i cuañese'ere sehuocaiye a'ë, i cuañëñere sehuocaiye cato ai yo'o ma'ñe a'ë.

⁴ Maija'quë mamaquëpi pa'ito iye yeja aye ñese quëcoye pa'iji. Jaje pa'ina, Maija'quë pa'ire paji cuasayepi si'aye iye yeja aye ñese quëcoye necaji.

⁵ Jaje pa'ina, Jesu api, Maija'quë mamaquë asaquë pa'iquëpi iye yeja aye ñese quëcoquë pa'iji.

Maija'quë Mamaquë Ayere Quëaye

⁶ Iquë Jesús cato i do cuañose'epi, cui'ne i ju'i tsie nejose'epi iñoñe paji'i. Cristo api, maire huasoquë. Coa oco doyes'e pa'iyepi, oco dose'e cui'ne i tsie con i paji'i. Maija'quë joyo cato si'aye iyere ñani quëapi, cui'ne nuñerepa ca joyo api.

⁷ Jaje pa'ina, ma'tëmore toascohua'i, iye yo'ose'ere ñasicohua'i pa'iyë, Maija'quë, Co-carepa, cui'ne Maija'quë joyo. Iye toascohua'i cato te'ipi pa'iyë.

⁸ Maija'quë joyopi Jesucristore Maija'quë mamaquë api quëapi, maire. Cui'ne asayë, oco dose'e cui'ne i tsie nejose'ere. Jare cuasajë'ë, toasñe iye yejana iye te'e cuasaye pa'iji, Jesucristo Maija'quë mamaquërepa pa'iyepi.

⁹ Paipi quëaquëna, care paji cuasajë asacaicohua'i a'ë, asacaicohua'i sëte. Maija'quë quëaye jerepa do'i quë'ye sëte asacaiye pa'iji, Maija'quë i mamaquë ayere quëaye.

¹⁰ Jaje pa'ina, Maija'quë mamaquère ire papi caquë asaquë cato i mamaquë ayere, Maija'quë joyo quëayer i joyore paji. Jaje pa'iquëta'are Maija'quë case'ere ire papi cuasama'quë cato Maija'quëni cosoure neji, i mamaquë ayere asacaima' do'ire.

¹¹ Maire quëase'e cato iye a'ë: Maija'quë maire ti pa'iyere isipi. Jaje pa'ina, i mamaquëni iye ti pa'iyepi pa'iji.

¹² Jaje pa'ina, i mamaquère paquëpi ti pa'iyepi paji. Jaje pa'iquëta'are Maija'quë mamaquère peoquë cato ti pa'iyepi peoquë api.

Yëhuo Tëjiquë Caye

¹³ Maija'quë mamaquère ire papi cajë asani sehuosicohua'ina toyayë, iye, mësarupi ti pa'iyere payë cajë asajajë caquë.

¹⁴ Maipi Maija'quë yëyeje pa'ye seto ïpi asacaiji asayë, mai. Jaje pa'ina, co'a ju'iñe pañë Maija'quëpi necaija'quë api cuasajë.

¹⁵ Jaje pa'ina, Maija'quëpi mai señe asacaiji. Asaye sëte mai ïte sese'e tsoe tï'ani payë asajë pa'iyë.

¹⁶ Pa'iji, tayo yo'ose'epi jüni huesëyena sayeje, cui'ne tayo yo'ose'epi ju'iñena sa ma'ñeje pa'iji. Jaje pa'ina, yequëpi, jüni huesëye ne ma'ñere Maija'quë do'iquëpi tayo yo'oquëna, ñani Maija'quëre seccaiye pa'iji. Seccaito Maija'quëpi tayosiquëre pa'iyere isija'quë api. Cama'ë pa'iyë, jüni huesëye neñere tayo yo'ouna, seccaijë'ë caquë.

¹⁷ Si'aye tayo yo'oye co'ayese'e pa'iji. Jaje pa'iquëta'are yeque cato tayose'epi ju'iñena sa ma'ñe a'ë.

¹⁸ Diusuni pëca ja'quëre pacohua'ipi tayo yo'oma'pë pa'iyë, Maija'quë mamaquëpi ñacaina, huatijë pu'pema'ëna.

¹⁹ Jaje pa'ina, maipi asayë, iye yeja paï cato johua'i ëjaë huatipi cuañequëna pa'iyë. Jaje pa'iquëta'are mai cato Maija'quë tsecohua'i a'ë asayë.

²⁰ Asayë, cui'ne Maija'quë mamaquëpi dani maire ta'ñe asaye isise'e, nuñerepa Maija'quë pa'iyere asa tï'ajajë caquë. Jaje pa'ina, asayë, mai nuñere pare pa'iyë, ï mamaquë Jesucristoni. Jãë api, nuñerepa Diusu ti pani huesëyere paquë.

²¹ Tsï dohuë, de'hua ñajë pa'ijë'ë, coso diusuohua'ire, yo'ojë sehuoye.

2 SAN JUAN

Nuñerepa Pa'iyē Cui'ne Ti Oiyē

¹ Aipi yē'ē iye toya ja'hua toyayē, Maija'quē sahuasicona, cui'ne iti tsēcapē acohua'ina caquē, yē'ē nuñerepa ai oicohua'ina. Yē'ēse'e oiyē pañē, cui'ne yē'ē oiyēje pa'ye mēsarute oiyē, nuñerepa cocare asasicohua'ipi.

² Oiyē, mēsarute nuñerepa cocapi yēquē joñoare pa'i do'ire, ja nuñerepa cato mai ja're ti pani huesē ja'ñe a'ē.

³ Jaje pa'ina, Maija'quēpi cui'ne Ējaē Jesucristo Maija'quē mamaquēpi cōni nuñerepa yo'ojē mēsarute oijē i oiyere, jo'cua de'oye pa'iyere, cui'ne teaye pa'iohua'ire ñani cocaiyere isijajē. Isijēna, de'oye pa'ijē'ē.

⁴ Mēsarū mamajē acohua'ipi Maija'quē maire cuñese'ere nuñere pare pa'ijēna, t'ani ñani yē'ē ai sihuahuē.

⁵ Yure jaje pa'ito Maija'quē do'ijē señē, mēsarute. Pai ñape yecohua'ire sa'ñe oijē pañu'u. Iye yē'ē mēsarute toyaye huajē cuñese'e peoji. Tsoe ja'a huēo maca mai asase'e a'ē.

⁶ Paire oijē pa'iyē cato Maija'quē cuñese'eje pa'ye yo'ojē pa'iyē pa'iji. Jaje pa'ina, cuñese'ere tsoe ja'a huēo macana asasicohua'i sēte paire oiyere pa'ijē'ē.

Coa Cosocohua'i

⁷ Jai pai cosocohua'i iye yeja pa'iyē, Jesucristore nuñerepa paije pa'irepa daji'i cama'cohua'i. Jaje pa'ina, ite jaje cama'cohua'i cato cosocohua'i a'ē, cui'ne Cristore sañope yo'ocohua'i a'ē.

⁸ Si'aye mēsarū nesi do'i sa'i cuñoñere cajē de'hua ñajē'ē, mēsarū ai yo'ojē nesi co'amañare nejoñe.

⁹ Cristo ye'yase'ere pa'ima'ē, Cristo ye'yase'ere tēto sani yo'oyē caquē cato, Maija'quēre peoquē api.

¹⁰ Jaje pa'ina, mēsarū quē'rona daicohua'ipi iye ye'yase'ere dama'cohua'i pa'ito, “daijē'ē, huē'ena” cama'pē pa'ijē'ē. Cui'ne pēpayeje pajē'ē.

¹¹ Jaje yo'ocohua'ire pēpaquē cato iohua'i co'aye yo'o tē'huire pa'iji, do'i quē'ye.

Ca Tēji Cocarepa

¹² Jaiye mēsarute caquē toyaye payē. Jaje pa'iquēta'are toya ja'huana tintapi toyaye coeyē. Coa ai jerepa mēsarū quē'rona sani mēsarūni ñaquē cayere yēyē, mai sihuayepi t'ase'erepa pa'ija'co caquē.

¹³ Maija'quē sahuasico mamajēje mē'ere pēpa saoyē, mē a'yo mamajēje pa'iohua'ipi. Jaje pa'ijaquē.

3 SAN JUAN

Gayore Pëpaye

- ¹ Aipi yê'ê toyayê, iye toya ja'hua yê'ê cajeirepa Gayona caquê, yê'ê nuñerepa oiquêna.
- ² Mê'êre Maija'quê do'iquêre sêcakaiyê, ju'ima'quê caquê, si'aye mê'ê yê yo'oye de'oyerepa etaja'quê caquê, mê joyo de'oye pa'ieje pa'ye.
- ³ Yê'ê ai sihuahuê, Maija'quê do'ijêpi dani mê'ê ocue pa'i macarepa nuñere pare pa'i yo'oyere quêajêna, asani.
- ⁴ Peoji, yeque yê'ê sihuaye iyeje pa'ye. Jaje pa'ina, yê'ê mamajêpi nuñere pare pa'ijêna, asani ai sihuayê.
- ⁵ Maija'quê do'iquê mê'ê nuñerepa yo'oyê, Maija'quê do'ijêre yequê huê'ñapi daicohua'ire mê'ê ñama'cohua'ireje çocai yo'oni.
- ⁶ Si'aohua'i Maija'quê do'ijê tsi'si sitona mê'ê aiohua'ire oi yo'oyere quêajêna, asahuê. Jaje pa'ina, señê, mê'êre. Jaohua'ire saijêna, co'amaña caraye pa ja'ñiere çocajê'ê caquê, Maija'quê sihuahuê ñañere yo'ojê'ê caquê.
- ⁷ Jaohua'i cato Jesucristore necaiyere cajê sai huêohuê. Jaje pa'ina, Maija'quê do'ijê peocohua'ipi çocañu'u cato coeyê, iohua'i çocaiyere imañe.
- ⁸ Jaje pa'ina, maipi jaohua'ire ñacaiye pa'iji, nuñerepa cocare quêaja'cohua'ire mai çocai do'ipi.

Diótrefes Co'aye Yo'ose'e Cui'ne Demetrio De'oye Yo'o Iñose'e

- ⁹ Maija'quê do'ijê, mê'ê quê'ro pa'icohua'ina caquê yê'êpi toyahuê. Jaje pa'iquêta'are Diótrefespi yêquê case'ere asacaiye coepi, ipi iohua'i êjaê pasi'i caquê yo'o do'ire.
- ¹⁰ Jaje pa'ina, yê'êpi jarona saisi'quê pani sañope yo'oyere caja'quê a'ê, yêquê yo'o ma'ñere coa cosoquê co'aye sañope caquêre. Jase'e cama'ê cui'ne Maija'quê do'ijêpi ti'acohua'ireje daijê'ê cama'ê yo'oji. Cui'ne yecohua'ipi iohua'i huê'ena saye yêcohua'ireje sama'pê pa'ijê'ê caquê êsequê yo'oji. Cui'ne tsi'sisi huê'ñana eto saokuê yo'oji, iohua'i huê'ena saye yêcohua'ire.
- ¹¹ Maija'quê do'iquê, co'aye yo'o iñoñere tuima'ê pa'ijê'ê. Coa ai jerepa de'oye yo'oquê pa'ijê'ê. De'oye yo'oquêpi Maija'quê tsequê pa'iji. Co'aye yo'oquê cato Maija'quêre ñama'quê api.

Demetrio De'oyerepa Yo'ose'e

- ¹² Si'aohua'i Demetriore de'okuê api cayê. Nuñerepa coca cayeje pa'ye pa'iquê api. Yê'ê i pa'ie ñaqueje de'okuê api cacaiyê. Jaje cajêna, mê'êpi nuñerepa cayê caquê asayê.
- Ca Tëjijerepa*
- ¹³ Jaiye mê'êre caye pañuê. Jaje pa'iquêta'are coeyê, coa toya ja'huana tintapi toyani jêjo saoye.
- ¹⁴ Mê'êre pani ñaquê cayere yêyê. Jaje pa'ina, esa ña huajê'ñe nêiji.
- ¹⁵ Ai cuasama'ê de'oye pa'ijê'ê. Iño pa'icohua'i mê'ê cajeohua'ipi mê'êre pëpa saoyê. Jaje cui'ne yê'êje mê'êre señê, pa'i ñapere yêquê cajeohua'ire yêquê cajeohua'ire jaro pa'icohua'ire pëpacajê'ê caquê.

SAN JUDAS

Judas Toyase'e Maija'quë Soisicohua'ina

¹ Yë'ë Judaspi, Jacobo yo'jeipi, Jesucristo jo'yaëpi iye toya ja'hua toyayë, Maija'quë soisicohua'ina, ina isisicohua'ina, Jesucristopi ñacaina, pa'icohua'ina.

² Maija'quë jo'cua de'oye pa'iyere, Maija'quë paire oiyere, cui'ne ipi teaye ñani oi ccaiyere ai jerepa isi cuañojë pa'ijajë caquë señë.

Coa Cosoye Yë'yacohua'i (2 Pe 2.1-17)

³ Maija'quë do'ijë, yë'ë cato ai toyaye yëhuë, huaso coca ayere mësarui cui'ne yë'ë mai payere. Jaje pa'iquëta'are yure cato yequere toyaquë ai seña pa'iji, mësarute. Ai cuasajë yo'ojë'ë, mai huaso coca ye'yayere nejoñë. Iye ye'yayere si'aye Maija'quë i paina isise'epi.

⁴ Tsoe coa cosojë ye'yacohua'ipi yahurepa mai ja're conï cacasicohua'ipi pa'iyë. Jaohua'ire cato tsoe toyase'epi quëaji, nejoja'cohua'ire ca nëosicohua'ipi pa'iyë. Jaohua'í cato Maija'quëre sañope yo'ocohua'ipi i de'o cocare pare tñe ponani si'si yo'oyere de'oye a'ë cajë ye'yayë, cui'ne mai paquë, mai Èjaë Jesucristo pa'iji cayere coa caye a'ë cacohua'ipi.

⁵ Mësarupi tsoe asacohua'í pa'itöje, mësarute caye yëyë, mësarupi Israel paire Egíptopi etosi jetyo'je, ite ire pare cuasama'cohua'ire nejos'e'ere cuasajajë caquë.

⁶ Cui'ne huiñaohua'ire nea hue'ñare pana cosicohua'ini paji, ti jarote quëna meapi huesicohua'í pani huesëyë. Jaohua'í cato iohua'í ocue pa'í macarepa pa'ima'pë, Maija'quë ja're conï pa'í sito jöconï etasi do'ire. Pa'í ñape yo'ose'e ña mu'serepa ca huesoja'cohua'ipi pa'iyë.

⁷ Huiñaohua'í yo'ose'eje pa'ye Sodoma cui'ne Gomorra cui'ne jo yë'quë maca pa'í daripëaje, nomi yo'oyena ne huesëni pai yo'ojë pa'iyë tëtö sani co'aye yo'ojë yaya maca pa'í toana ëo huea cuañoa'huë'ë. Ja yo'ose'e cato si'aohua'ire quëaye a'ë, jaje yo'oma'pë pa'ijë'ë caquë.

⁸ Jaje yo'ose'e asajëta'a iye cosojë ye'yacohua'í, coa huëo caise'eje pa'yere pa'ijë si'si neñë, iohua'í capë. Cui'ne si'a ëjaohua'í cui'ne iohua'í cuañese'e coejë mai sehuosicohua'í ëjaohua'ireje ca'rama'pë sañope co'ayere cajë pa'iyë.

⁹ Miguel huiñaë ai jerepa tutu quë'iohua'í aquëpi Satanás ja're capi, Moisés capëre ësequë. Èsequëta'a Satanásre sañope cama'ë coa i ñeje capi: Mai Èjaëpi sa'i de'huaye pa'iji, më'ëre.

¹⁰ Jaje pa'iquëta'are iye ëmëohua'í cato iohua'í asa tñ'ama' co'amañare ai co'aye cayë, cui'ne iohua'í coa noni yo'ojë asa tñ'añere, ta'ñe asaye peocohua'í nëtërojaicohua'í asayeje pa'ye asayë. Jaje pa'ina, iohua'í nejo cuaño ja'ñere yo'ojë pa'iyë.

¹¹ Teayerepa jaohua'í maña! Caïn co'aye yo'ose'eje pa'iohua'í pa'iyë, cui'ne Balaam curi yë do'ire Maija'quë paire sañope yo'ose'eje pa'iohua'í pa'iyë. Cui'ne Coré Maija'quëpi pai ëjaë ca nëosiquëre coequë sañope yo'oque ju'aji'i. Jaëje pa'iohua'í pa'iyë, jaohua'í. Jaje pa'í do'ire ai yo'ojë pa'ija'cohua'í a'ë, teayerepa.

¹² Mësarui sa'ñe oi do'ire tsi'sini aijë pa'iyere, jaohua'ipi co'aye si'si a'sioje pa'ye iñoñë, mësarui de'oye tsi'sijë pa'iyena, ca'rama'pë mësarui ja're conï aijë, iohua'ise'e co'ye cuasa do'ire. Cui'ne oco peo sirijë pa'iohua'í a'ë, cui'ne tutupi siri tutu saouna, ti oco isima'o. Cui'ne ocue ñëa quë'i tëcahuëta'a quë'iñe pañeje pa'iohua'í a'ë. Quëima' do'ire ju'isicohua'íje pa'iohua'í pa'iyë. Cui'ne si'a soquë saihuë duta qase'eje pa'iohua'í a'ë, cayayese'e ju'ise'eje pa'iohua'ipi.

¹³ Jaohua'í cato jai tsiaya tuturepa co'poyeje pa'iohua'í a'ë. Jaje pa'iohua'ipi iohua'í si'si yo'oyere ma' oañë, sirijë pa'yere. Jaohua'í cato iohua'í saima'a ne huesosi ma'ñoco a'ë. Jaje pa'ina, ti nea hue'ñare pare pani huesëja'cohua'ire ca huesosicohua'í a'ë.

¹⁴ Adánpi hueóni pani dao hue'ña siete aquë paji'i, Enoc. Jaëpi Maija'quëpi quëaquëna, jaohua'í ayere capi, ñeje: "Ñahuë, Èjaëre jai merepa jai pai ja're i huiñaohua'í ja're daina,

¹⁵ si'a paire tsi'soni iohua'í yo'ose'ere ña de'huasi'í caquë, cui'ne si'aohua'ire co'acohua'ire nejoñë pa'iji ca huesosi'í caquë, jaohua'ipi co'ayere yo'ojë pa'í do'ire, cui'ne Maija'quëre sañope pëjé ca do'ire caquë."

¹⁶ Jaohua'í cato iohua'í payere cuasajë sihuama'pë oi ëa joyo pajë, coa iohua'í co'aye yëyere yo'ojë pa'iyë. Pa'ijë yecohua'í payere neñu'u cuasajë de'o coca mañapi yecohua'ire cacohua'í a'ë, coa jerepa pa'iohua'í a'ë cuasajë.

Sehuosicohua'ire Yëhuoye

¹⁷ Jaje iohua'í pa'iquëta'are mësarui Maija'quë do'ijë, cuasajë'ë, mai Èjaë Jesucristo jëjo saocohua'í mësarute case'ere:

¹⁸ “Tēji mu'seña cato pa'ija'cohua'i a'ë, iohua'i yēyeje pa'ye co'ayere pa'icohua'ipi, Maija'quë ayere cue'cue paipi pa'ija'cohua'ipi.”

¹⁹ Maija'quë joyo peocohua'ipi, coa noni iohua'i yēyepi pa'icohua'ipi, cui'ne paire huahuejē yo'ocohua'i a'ë, te'le paire cuasama'pë.

²⁰ Jaje pa'iquëta'are mësaru cato, Maija'quë do'ijë, ocue pa'i macarepa Maija'quë pa'iji cuasayepi se mëojë pa'ijë'ë, Maija'quë joyo yo'oyepi Maija'quëre sejë pa'icohua'ipi.

²¹ Maija'quë oiyere pa'ijë'ë. Jaje pa'ijë Jesucristo daija'a mu'sere utejë pa'ijë'ë. Jaje pa'ijëna, oi teaye maire ñani ti pani huesēyere isija'quë api.

²² Jëa coecohua'ire teaye ñani oijë pa'ijë'ë, nui cocare pare tuijajë cajë.

²³ Paire oijë pa'icohua'ipi eto huasojë'ë, toare pa'icohua'ire Maija'quëre tija'ajajë cajë. Jaje pa'iquëta'are de'hua ñajë'ë, iohua'i co'aye pa'iyepi si'si ne tuture pacohua'ire.

²⁴ Yure cato Maija'quëpi mësarute taima'pë pa'ija'cohua'ire ne tutu paji, cui'ne i de'oquërepa ña hue'ñana si'si te'ña peocohua'ipi ai sihuacohua'ire eto nëco tutu paji.

²⁵ Maija'quë cato te'i api, de'oquërepa ta'ñe pa'ipi maire huasoquë, mai Ejaë Jesucristo yo'o do'ipi. Si'a miañe paquë api, ëjaohua'i mëñe Ejaëre papi, si'aye i tsese'e a'ë cui'ne i api, iti cuañequë, tsoe ja'a huëo macaje, yureje, cui'ne je'nëna jajese'e. Jaje pa'ijaquë.

APOCALIPSIS

Jesucristo Ìñose'e

¹ Iye cato Diusupi Jesucristona ìñose'e a'è, Jesucristopi ì jo'yare quèajaquè caquè, yequè mu'se esa pa'i ja'ñere. Jaje ìñouna, Jesucristopi ì huìñaère jèjo daopi, ì jo'yaè Juanna quèaja'quère.

² Jaje pa'ina, Juanpi ìti si'aye iye co'amaña cui'ne Maija'què cocare Jesucristopi ìtìre pa'è caquèna, ñasiquèpi quèaquè pa'iyè.

³ Sihuaquè pa'ija'què api, iye toyase'e ñaquèpi, cui'ne sihuacohua'i pa'ija'cohua'i a'è iye Maija'què ìsisi cocare caquèna, asajè ìño toyase'e cayere sehuocohua'ipi, tsoe tì'a tējiji, ìti yo'oja'a mu'seña.

Juan Toyase'e Siete Sehuosi Tsècana Caquè

⁴⁻⁵ Yè'è Juanpi toyayè, siete sehuosicohua'i tsèca Asia yeja pa'icohua'ina caquè, mèsarute ìti pa'iquèpi, tsoe pa'isiquèpi cui'ne daija'quèpi cui'ne ì ñu'i saihuè tìñarepa siete joñoa pa'iyèpi cōni, cui'ne Jesucristo ì case'eje ñaquè cacaisiquèpi, ju'isicohua'i aquèpi du'ru huèisiquèpi iye yeja pa'ì èjaohua'ire meñe cuañequèpi cōni mèsarute de'oye ñacaiyèpi jo'cua de'oye pa'ijè'è. Cristo cato maire oi tayo yo'o tuture nejocaji'i, ì tsièpi.

⁶ Nejonì maire èjaohua'ire cui'ne Maija'quère ì pèca ja'quère pare neaicohua'ire nepi. Jajè api, si'aye miañe paquè, cui'ne si'aye ì tse'e a'è. Jaje pa'ijaquè.

⁷ Sirija'a daija'què api, jare asajè'è. Si'a pa'ì ñaja'cohua'i a'è, ìte, cui'ne ìte a'si yo'osicohua'ije ñaja'cohua'i a'è, cui'ne si'a yeja pa'icohua'ije ìte ñajè ai cuasajè oija'cohua'i a'è. Jaje pa'ija'coa.

⁸ "Yè'è aè, du'ru aquè, cui'ne tējiquè" caji, Èjaè Maija'què si'a tutu què'ire papi, ìti pa'iquèpi ja'nè pa'isiquèpi, cui'ne ìti daija'quèpi.

De'o Cristore Ñase'e

⁹ Yè'è, Juan mèsaru a'yè a'è, Maija'què do'ire. Jaje pa'ina, Jesure tsioni pa'ì do'ire mèsaru ja're te'e pa'iyè, Maija'què cuañe te'te pa'iyere, ai yo'oyere, cui'ne ai yo'ojè quèco tuture. Jaje paquèpi Jesucristo case'ere Maija'què cocare quèa do'ire tsèasiquèpi Patmos hue'e saodohuère paè'è.

¹⁰ Pa'ina, mai Èjaère pare sihua mu'se tì'aèna, Maija'què joyopi yo'oquèna, joyose'e pa'iquè de'osiquèpi Maija'quère seì paè'è. Pa'ì asahuè, yè'è jeteyo'jepi duruhuè juiyèje pa'yerepa tutu caquèna.

¹¹ "Yè'è a'è, du'ru aquèrepa cui'ne tējiquèrepa. Toyajè'è, te'e toya pèpè mè'è ñañere. Toyani Asia yejana jèjo saojè'è, siete sehuosi tsècana Efesona, Esmirnana, Pérgamona, Tiatirana, Sardisna, Filadelfiana, cui'ne Laodiceana."

¹² Caquèna, ¿nepi jaje caye'ni? caquè co'ye ponèquè ñahuè, siete pa'ye oropi nesi sotoanoana, toa tsè'ise'epi pa'ina.

¹³ Ja siete pa'ye pa'ì jopore pare paije pa'ipi, ì quèore paja'a tsoa ju'ì care ju'ì nècapi. Ì coti saihuère paja'a oro tējicapi tèasiquè paji'ì.

¹⁴ Ì naña cato poja'yerepa paji'ì. Yè'è ñama nañaje pa'ye, panita'a po sirioje pa'yerepa paji'ì. Cui'ne ì ñaco capi toa ñoaje pa'yerepa paji'ì.

¹⁵ Cui'ne ì quèo cato de'o quènare de'oyerepa aoni toana èose'eje pa'yerepa ye'hue pa'ye paji'ì. Cui'ne ì yè'o cato jai jupo pisiyeje pa'yerepa tutu pisipi.

¹⁶ Ì èja te'te jètère siete ma'ñocohua'ire papi. Cui'ne ì yè'opopi etapi, hua'ti ñacaje pa'ioire papi si'a te'ña jējèsècore papi. Cui'ne ì tsiapi èsè si'a tuturepa miaquèna, ñañeje pa'yerepa miapi.

¹⁷ Jare ñani ì quèore pana ju'ise'eje pa'ì tājè'è. Tāiquèta'are ìpi yè'ère, ì èja te'te jètèpi patoquè capi:

"Ca'rama'è pa'ijè'è, yè'è a'è du'ru aquè cui'ne tējiquè,

¹⁸ ìti pa'iquè, ju'isiquè pa'isiquèpi yure ti pani hueséyè. Yè'èpi pa'iyè, cui'ne ju'ìñe ìsi tutu payè, cui'ne ju'isicohua'ì pa'ì te'te huiyoquè.

¹⁹ Toyajè'è, mè'è ñase'ere, yure pa'iyere, cui'ne jeteyo'je pa'ì ja'ñere.

²⁰ Iye a'è, siete ma'ñocohua'ì yè'è jètè pa'isicohua'ire quèaye, cui'ne siete pa'ye oropi nesi sotoanoana toa tsè'ise'ere quèaye. Siete ma'ñocohua'ì cato quèayè, siete huìñaohua'ìni, siete tsèca sehuosicohua'ì èjaohua'ìni. Cui'ne ja siete pa'ye toa tsè'ise'e cato quèaji, siete sehuosi tsècapèa pa'iyere.

2

Siete Sehuosi Tsëcapëana Toyase'e: Efeso Sehuosicohua'i Tsëcapëre Quëaye

¹ Efeso sehuosicohua'i tsëcapëre quëacai huiñaëna toyajë'e: 'Ñeje caji, ëja te'te jëtëre siete ma'ñocore paquëpi, cui'ne siete pa'ye oropi nesi sotonanoa toa tsë'ise'e jopoja'a cu'iquëpi.

² Yë'ëpi më'ë yo'oye si'aye asayë. Më'ë jëa co'amañare tutu yo'oquë neñe ñañë. Cui'ne më'ë yo'o jujama'ë pa'ye ñañë. Cui'ne co'a pa'icohua'ire quëco t'iañe pa'icohua'i pa'ijëna, asayë. Asayë, cui'ne ëjaë jëjo daocohua'i a'ë cajë coa cacohua'ire neñani coa cosocohua'ire t'iasë'e.

³ Më'ë cato jë'joye peoyerepa, cui'ne yo'o jujaye peoyerepa yë'ë do'ire ai ai yo'onije yo'oquë a'ë.

⁴ Jaje pa'iquëta'are më'ëre te'ore sañope cacore payë. Më'ë du'ru huëo maca yë'ëre oise'eje pa'ye yure oiye pañë.

⁵ Jaje pa'ina, cuasa ñajajë'ë, më'ë ja'në du'ru macarepa yë'ëre oi pa'ise'ere. Ja maca Maija'quëna ponëni cui'naëpi de'oye yo'ojë'ë, du'ru huëo maca yo'ose'ere. Jaje Maija'quëna ponëma'quë pa'ito më'ëre esa sañope yo'oja'quë a'ë. Sani më'ë toa tsë'isico pa'isicore jioja'quë a'ë.

⁶ Jaje pa'iquëta'are më'ë yeque de'huerepa de'oye yo'oye payë. Ja cato më'ë nicolaítas pai si'si yo'oyere coequë pa'ie a'ë. Yë'ëje jaohua'i yo'oyere coeyë.

⁷ Cajaro hue'equë pani sehuosicohua'i tsëcapëare Maija'quë joyo cayere asajë'ë. Quëcosicohua'irepa etasicohua'ini ajoja'quë a'ë, ti pani huesë soquë yë ayere, Maija'quë tsio pa'iconi.'

Esmirnana Quëaye

⁸ Toyajë'ë, cui'ne Esmirna sehuosicohua'ire quëacai huiñaëna. 'Ñeje caji, du'ru aquë, cui'ne tëjiquë, ju'isiquëpi cui'naëpi pani coquëpi.

⁹ Yë'ëpi ñañë, si'aye më'ë yo'oye, më'ë ai yo'oye cui'ne më'ë co'amaña peoye. Jaje pa'iquëta'are më'ë cato ma'tëmöre jaiye co'amaña paquë a'ë. Yë'ë asayë, më'ëre judío pai a'ë cacohua'ipi co'aye caye. Jaje pa'iquëta'are jaohua'i cato Maija'quë mamajë peoyë. Coa huati ëjaërepa tsecohua'i a'ë.

¹⁰ Ca'rama'ë pa'ijë'ë, më'ë ai yo'o ja'ñere. Jaje pa'ina, mësarü acohua'ire huatipi yo'oquëna, tseani coja'cohua'i a'ë, si'aohua'i mësarupi neña cuañosicohua'i pa'iyere cajë. Ja maca mësarü coa diez mu'seña ai yo'oja'cohua'i a'ë. Mësarü ocue pa'i macarepa pa'ijë'ë, si'aye ai yo'oyepi daitoje. Yë'ëpi mësarute iti pa'isi do'ire ti pa'iyere isija'quë a'ë.

¹¹ Cajaro hue'equë pani asajë'ë, Maija'quë joyo sehuosicohua'i tsëcapëare cayere. Quëcosicohua'i etasicohua'ipi cayaye ju'iñe paja'cohua'i a'ë.'

Pérgamona Quëaye

¹² Toyajë'ë, cui'ne Pérgamo sehuosicohua'i tsëcapëre quëacai huiñaëna: 'Ñeje caji, si'a te'ña jëjësë hua'tiyo paquëpi.

¹³ Yë'ëpi si'aye asayë, më'ë co'amaña yo'oye. Cui'ne asayë, më'ë Satanás cuañe hue'ñare pa'ie. Jaje pa'i hue'ñare pa'iquëta'a më'ë yë'ëre ocue pa'i macarepa tuiyë. Yë'ëre ire pare cuasaye jeoñe pahüë, më'ë. Jarö Satanás pa'i hue'ñana Antipasre yë'ëre quëaciquëre mësarü aquëre huani jëo mu'señaje.

¹⁴ Jaje pa'iquëta'are më'ëre a'ri maña sañope caye payë: Jarote më'ë payë, te'ohua'ise'ere Balaam ye'yaquë pa'ise'ere jeoñe coecohua'ire. Jaëpi Balacre ye'yapi, Israel paire ne taojaquë caquë. Cui'ne pai de'huasi diusure isisi hua'i aña de'oji, cui'ne nomiohua'ire coa yo'orojañe de'oji cajë'ë caquë, yëhooquë pa'aji'i.

¹⁵ Cui'ne jarote më'ë payë, yecohua'ireje nicolaítas ye'yase'ë jeoñe coecohua'ire.

¹⁶ Jaje pa'ina, Maija'quëna ponëjë'ë, më'ë Maija'quëna ponëma'quë pa'ito, yë'ëpi më'ë quërona esa sani jaohua'ire uihua'quë a'ë, yë'ë yë'opo eta hua'tiyopi.

¹⁷ Cajaro hue'equë pani asajë'ë, Maija'quë joyo sehuosicohua'i tsëcapëare cayere: Si'aye quëcosicohua'i etasicohua'ini ajoja'quë a'ë, yahuesi manare pare, joyo tutu isi aorepa. Cui'ne po quëna përe isija'quë a'ë, iti pëna te'e huajë mami pajje ti ñama'coni toyasiconi. Coa iti isisiquëse'e ñañe pasipi.'

Tiatirana Quëaye

¹⁸ Toyajë'ë, cui'ne Tiatira sehuosicohua'i tsëcapëre quëacai huiñaëna: 'Ñeje caji, Maija'quë mamaquë, toa ñoare pajje pa'ye ñaco ça hue'equëpi, cui'ne j quëore, broncere de'o quëñare de'oyerepa aose'eje pa'ye hue'equëpi.

¹⁹ Yë'ëpi si'aye asayë, më'ë yo'oye. Ñañë, më'ë paire oiye, më'ë Maija'quë pa'iji cuasaye, cui'ne më'ë quëcoyë. Cui'ne asayë, më'ë du'ru huëo maca yo'ose'e ai jerepa yure yo'oquë pa'ie.

²⁰ Jaje pa'iquëta'are mël'ère a'ri maña sañope caye payë. Mël'ëpi jao Jezabelre Maija'quë ayere cayë cacore coa quëcoquë io co'aye yo'oye ñaquëna, yël'ë jo'yare io ye'yayepi cosoco ye'yaco nomiohua'ire coa yo'orójaiñena cui'ne pai de'huasi diusuohua'ire isise'ere añaena.

²¹ Yël'ëpi jaote tsoe maca pa'iyë isihuë, jopi cuasa ñajani Maija'quëna ponëjaco caquë. Jaje pa'iquëta'are jopi coeco ponëñe paco. Cui'ne ëmëohua'ire yo'oyejë jeofne paco.

²² Ja do'ire yël'ëpi jote cai saiñuëna jëjo oaja'quë a'ë. Cui'ne jote yo'ocohua'ini, ai ai yo'oyepi neja'quë a'ë, io co'aye yo'oyere ña jujani Maija'quëna ponëma'cohua'i pa'ito.

²³ Cui'ne io mamajërejë huani jgaja'quë a'ë. Jaje yo'oquëna, si'a sehuosicohua'i tsëcapëa yël'ë api si'aye pai cuasaye cui'ne joyo pa'iyë ñaquë asaja'cohua'i a'ë. Jaje pa'ina, yël'ëpi mësarute pai ñape yo'ose'eje pa'ye sai de'huaja'quë a'ë.

²⁴ Jaje pa'iquëta'are, mësarute yecohua'ire Tiatira pa'icohua'ire cayë: Mësaruru yo'o ja'ñe ai jerepa cuañeña pañë, ja co'aye ye'yayere tuima'cohua'ire, cui'ne Satanás tsëre ta'ñe asayere pa'ë cajë ye'yayere asama'cohua'ire.

²⁵ Jaje pa'iquëta'are mësaru yure payere de'hua ñajë pajë'ë, yël'ë dai macaja'a.

²⁶ Quëcosicohua'i etasicohua'ini, yël'ë yëyere yo'ojë pa'isicohua'ini, pai yejaña cuañë ëjahua'ire neja'quë a'ë,

²⁷ yël'ë ja'quë yël'ère cuañë ëjaëre nese'eje pa'ye. Ja maca quëna tarapëpi cajijë jai pai yejaña cuañëja'cohua'i a'ë, ya'o cua'conoa té'ca jo'a saoyejë pa'ye yo'ojë.

²⁸ Cui'ne jahua'ire cato ñata tome macarepa miacai ma'ñocore pani isija'quë a'ë.

²⁹ Cajaro hue'ecohua'i pani asajë'ë, Maija'quë joyo sehuosicohua'i tsëcapëare cayere.'

3

Sardisna Quëaye

¹ Toyajë'ë, cui'ne Sardis sehuosicohua'i tsëcapëre quëacai huiñaëna: 'Ñeje caji, siete Maija'quë joñoa paquëpi, cui'ne siete ma'ñocore paquëpi: Yël'ëpi si'aye asayë, mël'ë yo'oye, cui'ne mël'ë huajëquërepa pa'iyë caquëta'a ju'isiquëpi pa'iyë.

² Sëtajë'ë. Sëtani tutu yo'oquë ne huëojë'ë. Ja yël'ta'a iti nëa mañare tsoe carajani tëjyere mël'ë yo'oye Maija'quë ña hue'ñana caraëna, ñahuë.

³ Cuasa ñajajë'ë, mël'ère ye'yase'ere jare pa'ijë'ë, cui'ne ponëjë'ë, Maija'quëna. Jaje mël'ëpi sëtama'quë pa'ito, yël'ëpi ñaëje pa'i saija'quë a'ë, mël'ë quë'rona mël'ë utema'ë pa'i maca.

⁴ Jaje pa'iquëta'are jaro mël'ë pa'i hue'ña Sardis daripëre mël'ë payë, te'ohua'i mañare johua'i ju'i caña si'si nema'cohua'ire. Co'aye yo'oyere yo'oma'cohua'ire cayë. Jahua'ipi yël'ë ja're coní cui'ija'cohua'i a'ë, poja'i ju'i cañare suñasicohua'ipi do'i quë'iohua'i pa'iyë sète.

⁵ Quëcosicohua'i etasicohua'ipi jaje poja'i cañare suña cuañoja'cohua'i a'ë, cui'ne johua'i mamije pa'i toya pëpëna toyase'ere ni'no jëoma'ë pasi'i, coa ai jerepa yël'ë ja'quë ña hue'ñana, cui'ne j' huiñaohua'i ña hue'ñana icohua'i yël'ë tsëcohua'i a'ë casi'i.

⁶ Cajonoa hue'equë pani asajë'ë, Maija'quë joyo sehuosicohua'i tsëcapëare cayere.'

Filadelfia Quëaye

⁷ Toyajë'ë, cui'ne Filadelfia daripë sehuosicohua'i tsëcapëre quëacai huiñaëna: 'Ñeje caji ti de'oquëpi, cui'ne nuñerepa pa'iquëpi, pai ëjaë David hui'yocore paquëpi, ipi hui'yosiquë pa'ito yecohua'ije sjo t'jañe peoquëpi, cui'ne ipi siosiquë pa'itoje hui'yo t'jañe peoquëpi.

⁸ Yël'ëpi si'aye mël'ë yo'oye ñañoë. Yël'ëpi mël'ë ña hue'ñana eta sa'ro hui'yo nëohuë, yecohua'ije ti sjo t'jañe peoconi. Mël'ë a'ri maña tutu hue'equëje de'hue yël'ë case'ere sehuoquë de'oye yo'ohuë. Jaje yo'oreque yël'ère do'i peoquë api caye pahuë, mël'ë.

⁹ Jaje pa'ina, yël'ëpi Satanás sehuosicohua'i tsëcapë acohua'ire mël'ëna sani do're ja'ruja'cohua'ire jëjo saosi'i, judio pai a'ë cajë yël'ë sehuosicohua'ire sañope yo'ocohua'ipi, coa cosocohua'ire. Jaje yo'oquëna, ñajë asa t'ajajë, yël'ë mël'ère oi payere.

¹⁰ Yël'ë cuañese'le si'anë mël'ë yo'o jujama'ë yo'o t'jahuë. Jaje yo'o do'ire mël'ère yël'ëpi ñacasi'i, ai yo'oye peojuquë caquë, si'a iye yeja pa'icohua'ire neña maca t'asi maca.

¹¹ Esa yël'ë daiyë. De'hua ñaquë pajë'ë, mël'ë co'amaña yecohua'ipi mël'ère isi ja'ñe ca nëose'ere sioye paja'cohua'ire.

¹² Quëcosicohua'ini yël'ëpi Maija'quë huë'e jëhuopa tupëa nesi'i, jaropi ti etaye paja'cohua'ire, cui'ne johua'ina toyasi'i yël'ë Diusu mamire j' tsëcohua'ire pa'ë iñoñere, cui'ne yël'ë Diusu pa'i daripë mamire toyasi'i, huajë Jerusalén ma'tëmo daico mamire, cui'ne yël'ë huajë mamire toyasi'i, johua'ina.

¹³ Cajonoa hue'equë pani asajë'ë, Maija'quë joyo sehuosicohua'i tsëcapëare cayere.'

Laodiceana Quëaye

¹⁴ Toyajë'ë, cui'ne Laodicea daripë sehuosicohua'i tsëcapëre quëacai huiñaëna: 'Ñeje caji, iti nuñerepa pa'iquëpi, iti ñasiquëpi, nuñerepa iye coca caquëpi, Maija'quëre si'aye ne huëocaisiquëpi, jerepa du'ru aquëpi.

¹⁵ Yé'èpi si'aye ta'ñe asayé, mè'è yo'oye. Asayé, mè'è sēsēma'quē cui'ne uma'quē pa'iyē. De'ora'pi, mè'èpi sēsēquē panita'a uquē pa'ito.

¹⁶ Jaje pa'iquēta'are mè'è cato sēsēquēje cui'ne uquēje peoquē a'è. Mè'è cato coa quēo ja'iquē a'è, matu ocoje pa'iohua'ipi coa pa'iyē, de'oye yo'oma'cohua'ipi cui'ne co'aye yo'oma'cohua'ipi. Jaje pa'ina, mè'ère yē'è yē'opoj'a' a' siso jēosi'i.

¹⁷ Jaje pa'iquēta'are mè'èpi cayē, jaiye co'amaña paquē a'è, si'aye de'oye saiji, cui'ne ti carayeje peoji. Jaje caquē mè'è pa'iyē ña sētama'è pa'iyē. Mè'è cato teaye pa'ipi, co'amaña peoquēpi, ñama'quēpi, cui'ne peoyopi pa'iyē, mè'è.

¹⁸ Jaje pa'ina, yēhuoyē, mè'ère yē'èna hueroj'è, toana cua'coni nesi curiquēre pare. Yureta'a ja maca nuñerepa jaiye co'amaña paquē pa'ija'quē a'è, cui'ne hueroj'è, yē'èna poja'i cañare, mè'è huajēya'ye peoyo pa'iyere pē'pējaquē. Cui'ne ñaco ca tsa'se écoje yē'èna hueroj'è, japi neni ñaquē pa'ija'quē.

¹⁹ Si'aohua'ire yē'è oicohua'ire cato, tayojēna, yē'èpi si'sequē yēhuo nu'ñequē a'è. Jaje pa'iyē sēte tutu yo'okuē ja'ñe pa'ise'e jeoni Maija'quēna ponēj'è.

²⁰ Ina, yē'èpi eta sa'rore nēcaquē soiyē. Jaje soiquēna, asasicohua'i aquēpi yē'è yē'ore asani hui'yo catu i hu'èna cacani i ja're çoni aija'quē a'è.

²¹ Quēcōsicohua'i etasicohua'ini, yē'è cuañequē ñu'ico yē'quē macana ñoja'quē a'è. Yē'è quēcōsiquēpi ja'quē ñu'ico acona pa'ruse'eye pa'ye, i cuañequē ñu'iconā.

²² Cajonā hue'equē pani asaj'è, Maija'quē joyopi sehuosicohua'i tsēcāpēare cayere.' "

4

Ma'tēmo Pa'icohua'i Maija'quēre Ti De'oquērepa Caye

¹ Ja yo'o tējisi jeteyo'je ñahuē, ma'tēmore eta sa'ro hui'yosicopi pa'ina, yē'ère du'ru macarepa duruhuē tuturepa juijēna, pisiyeje pa'yere papi casiquēpi capi: "Iñōna mēij'è. Iñosi'i mè'ère, iye tēto sai jeteyo'je pa'i ja'ñere."

² Jaje ca maca tsoe joyo pa'iquē de'ohuē. Jaje pa'i ñahuē, te'e cuañequē ñu'i saihuē ma'tēmōna ñosiconi. Ja ñu'i saihuēre te'i ja'rusiquēpi ñuiji'i.

³ Iote ñu'iquē cato miaquērepa paji'i, jaspe hue'yosi quēna pēje pa'irepa poja'icorepa, panita'a cornalina quēnaoje pa'irepa. I ñu'i saihuē émēje'ere na'ñamequē sē'ise'eye pa'i paji'i, i miañepi ña etojaiñerepa miapi, ña'jo quē'i quēnao esmeralda hue'yosi quēnaoje pa'yerepa.

⁴ Jao i cuañequē ñu'i saihuē yērēhuere yequē veinticuatro cuañejē ñu'i saire, veinticuatro aiohua'i ja'rusicohua'ipi ñu'è, poja'i caña suñasicohua'ipi, cui'ne curi manoare puasicohua'i pa'è.

⁵ Joporepa ñu'i saihuēpi mujuē ye'hueyeje cui'ne ai pisiye cui'ne mujuē cayeye etapi, cui'ne ñu'ico tiñare pare siete toa tsēopēa paji'i, toa tsēni nēcāse'epi. Ja cato Maija'quē siete jofioapi ña cuañopi.

⁶ Ñu'ico tiñare pare paji'i. Jairaje pa'ioipi ña etojai yeja paji'i. Cuañequē ñu'i saihuē nēico yē'quē macare cuatro pa'iohua'i pa'è, ñaco ca timēsicohua'ipi jeteyo'je cui'ne tiña ña hue'ñaje.

⁷ Du'ru macarepa aquē cato jai yaije pa'i paji'i. Cayaye aquēpi duruhuequē émēje pa'i paji'i. Toasoñe aquēpi pa'i tsiaje pa'ioire hue'equē paji'i. Cui'ne cajese'e aquēpi jai huihue huēni saieje pa'i paji'i.

⁸ Jaohua'i cato pa'i ñape seis jaē capēa hue'ecohua'i pa'è. Jaje pa'iohua'ipi ñaco case'epi timēsicohua'i pa'è, hue'se cui'ne sa'ñahuēje. Jaje pa'iohua'ipi, ñami cui'ne mu'se cayē jēoma'pē ñeje cahuē:

De'oquērepa, de'oquērepa, de'oquērepa,

Ējaē Diusu si'a tuturepa paquē,

tsoe pa'isiquē, yure pa'iquērepa, cui'ne cui'naēpi daija'quēpi pa'iquē.

⁹ Ñaco ca timēsicohua'ipi ñu'i saihuē ñu'iquēre pare pēpajē, de'oquēre pa'ni Ējaērepa ti pani huesēquērepa cayē ñape,

¹⁰ veinticuatro aiohua'ipi do're ja'rujē i ña hue'ñana yo'ohuē, ñi de'oquēre pa'ni cajē, cui'ne i ñu'ico tiñare pana iohua'i manoare ti pa'iquēre pana isijē jea oejē cahuē ñeje:

¹¹ Mè'è a'è, yēquē Ējaē cui'ne yēquē ja'quē.

Mè'ère de'oquēre pa'è, Ējaēre pa'è, si'a tutu quē'ire pa'è cayē pa'iji, si'aohua'i.

Mè'èpi yēni si'aye de'huasi do'ire.

5

Yēi Ñama Cui'ne Toya Pēpē

¹ Ja maca ñahuë, ñu'i saihuë ñu'iquëpi i ëja te'tere toya pëpë tynasiconi tse'equë ñu'ina, sa'ñahuë cui'ne hue'se toyasiconi. Jaje pa'ioni siete pa'ye ëjaërepa tse a'ë quëayere je'na sëose'ere sjosico paji'i.

² Pa'ina, cui'ne ñahuë, te'e huiñaëre tutu quë'ipi tutu ñeje caquëna: “¿Nepi toya pëpë sjosicore ini hui'yo t'i'aja'cohua'i a'ni?”

³ Jaje pa'iquëta'are ma'tëmo yeja cui'ne yeja huë'ehuë pajië ti peohuë, te'ijë toya pëpë hui'yo t'i'ani ñaquëje.

⁴ Ja maca yë'ëpi ai oë'ë, toya pëpë hui'yoni ña t'i'acquëje peo do'ire ña jujani.

⁵ Jaje oina, aiohua'i aquëpi capi, yë'ëre:

“Oima'ë pa'ijë'ë, ai jërepa tsoe Judá pai aquëpi pai ëjaë David tsëcapë aquëpi jai yai hue'yosiquëpi, jãëpi quëcopi, si'aye. Jãëpi toya pëpë cui'ne ïote siete pa'ye hue'ese'ere ne tëtë saolja'quë api.”

⁶ Ja maca ñu'ico t'iña macarepa cuatro pa'iohua'i pa'icohua'ipi jopore pare, cui'ne aiohua'i jopore pare yëi ñama nëina, ñahuë. Coa nëji'i. I cato huani jëose'ëje pa'ipi. Jaje pa'ipi siete eyohuëa cui'ne siete ñaco ca hue'equë paji'i. Ja siete ñaco ca cato Maija'quë joñoa si'a yejaña jëjo saose'e pa'iyepi ña cuañopi.

⁷ Jãë yëi ñamapi sani toya pëpë jiji'i, ñu'i saihuë ñu'iquërepa ëja te'te pa'iconi.

⁸ Toya pëpë i maca cuatro pa'iohua'ipi, cui'ne veinticuatro aiohua'ipi do're ja'ruhuë, yëi ñama t'iñare pana. Pai ñape aiohua'i pahuë, te'e ta'të pepë cui'ne te'e ucu duruhuë, curi nesiquë. Jana huëo së ma'ñaje pa'ye timëse'ere pahuë. Ja cato Maija'quë acohua'i Maija'quëre seña paji'i.

⁹ Jaohua'ipi huajë jëjëñere jëjëhuë, ñeje:

Më'ëse'e te'i pa'iyë, toya pëpë ini ïote sjo saose'e pa'ye ne hui'yo saolja'quë,

Huahuosiquëpi më'ë tsie do'ipi si'a yequë paire,

Ti coca cacohua'ire, cui'ne si'a yejaña pa'icohua'ire huerocaë'ë, Maija'quëna isisi'i caquë.

¹⁰ Më'ëpi jaohua'ire ëjaohua'ire nehuë, yëquë ja'quëre necaicohua'ire.

Neina, iye yeja cuañecohua'i pa'ija'cohua'i a'ë.

¹¹ Ja jeteyo'je ñahuë. Ñaquë asahuë, jai pai huiñaohua'i caye pisiyere. Cuañequë ñu'ico yërëhue pa'icohua'i cayere, cui'ne cuatro pa'iohua'i cayere, cui'ne veinticuatro aiohua'i caye pisiyere asahuë. Jai merepa jai pai paë'ë, tsi'isisicohua'i.

¹² Jaohua'ipi ai tutu ñeje cahuë:

Yëi ñama te'i pa'iji, huahuosiquëpi.

Jãë cato ai de'oguëre papi, ja do'ire si'aye isiyë pa'iji, ite.

Ne t'i'a tuture, si'aye payete, ta'ñe asayepi neñere, si'a tuture,

Ëjaë api, cuasajë de'oyerepa sehuoyere, i de'oyerepa nese'ere ñani sihuajë cayere, cui'ne ite oijë de'oji cayere.

¹³ Asahuë, cui'ne si'aye Maija'quë de'huasi co'amañapi ma'tëmopi, yejapi, cui'ne yeja huë'ehuë te'tepi cui'ne jai tsaiyapi, ñeje cahuë:

Ñu'i saihuë ñu'iquërepa, cui'ne yëi ñama, si'aye pajajë cajë, de'ocohua'ire pa'ni cuasajë caye, Ëjaë api, cuasajë de'oyerepa sehuojë yo'oye, i de'oyerepa yo'oyere ñani sihuajë caye, cui'ne

si'aohua'i Ëjaërepa de'oye,

Je'nëna jaje pa'ijaquë.

¹⁴ Cajëna, cuatro pa'iohua'ipi sehuojë cahuë:

“Jaje pa'ijaquë.”

Cajëna, veinticuatro aiohua'ipi do're ja'runi ite Ëjaëre pa'ni cajë pëpajë yo'ohuë.

6

Siete Sëase'e

¹ Ja maca ñahuë, yëi ñama du'ru macarepa siete pa'ye sjosie'e aconi ne hui'yoquëna. Ja maca asahuë, cuatro pa'iohua'i aquëpi mujuë cayejë caquëna, ñeje:

“Dani ñajë'ë.”

² Caquëna, ñaquëna, po caballopì paji'i. Pa'ina, ite tuiquëpi te'e sa'co saihuë papi. Paquëna, marote ite isipi. Isina, si'aohua'ire quëcoquërepa etapi, si'aohua'ire quëcoquë pa'ija'quëpi.

³ Yëi ñamapi cayaye acore ini ne hui'yo maca cayaye aquë pa'iquëpi capi:

“Dani ñajë'ë.”

⁴ Caquëna, yequë caballopì etapi. Jãë cato maja'iquë paji'i. Ite tuiquëpi iye yeja de'oye pa'iyë sioja'a tuture isi cuañosiquë paji'i. Jaje pa'ipi pai de'oye pa'iyere siouna, sa'ñe huani ju'ija'cohua'i a'ë caquë jai hua'tiyore isi cuañosiquë paji'i.

⁵ Yëi ñamapi toasoñe acore ne hui'yo maca asahuë, toasoñe aquë pa'iquëpi ñeje caquëna:

“Dani ñajë'ë.”

Caquëna, ñahuë, nea caballoni. Ñaquëna, ite tuiquëpi i jëtëre cuëcucore papi.

⁶ Cui'ne asahuë, pa'icohua'i jopore papi yë'ose'e ñeje caquëna:

“Te'e kilo trigo ñsiye pa'iji, te'e mu'se nesi do'i. Tres kilo cebada ñsiye pa'iji, te'e mu'se yo'osi do'i. Jaje pa'iquëta'are hui'yape, cui'ne o'sata'a nejoma'pë pa'ijë'ë.”

⁷ Yëi ñamapi cuatro acore hui'yo maca asahuë, cuatro aquë pa'iquëpi ñeje caquëna:

“Dani ñajë'ë.”

⁸ Caquëna, ñaquë ñahuë, së'ñoja'i caballoni. Ite tuiquë cato juni huesëye i mami hue'equë paji'i. Pa'ina, i jeteyo'jeja'a daji'i, ju'isicohua'i pa'i hue'ña ayere quëaquëpi. Jaë juni huesëye hue'equëna, ñise'e paji'i, yeja cuatro pa'ye huahuese'e ayere, te'ore cuañeja'a tuture, huajo sa'ñe huaiyepi, ao ëa ju'iñepi, ju'i dahuë neñepi, cui'ne airo acohua'i ai yëcohua'i pa'icohua'ire, pa'ire aicohua'i pa'i ja'ñe neñe cuañeja'quëre.

⁹ Yëi ñamapi cinco acore hui'yo maca ñahuë, Maija'quëre ñisjë tëo toto huë'ehuëre Maija'quë coca quëa do'ire huahuosicohua'i joñoa pa'ijëna.

¹⁰ Pa'ijë jaohua'ipi cahuë, ai tutu:

“Ëjaërepa de'oquë, më'ë ca nëose'eje pa'ye yo'o t'iaquërepa, çje yëhua më'ë yeja pa'icohua'i yëquëre huaisi do'i sa'i toja'quë a'ni, ñohua'i yo'ose'eje pa'ye ñaquë?”

¹¹ Cajëna, jaohua'ire poja'i ju'i cañare suñacani capi, pëa huajëjë pa'ijë'ë, a'rima tsoe maca, mësarü acohua'ita'a, Cristore necai do'ire ju'ise'eje pa'ye, mësarü ja'i pai huahuo t'iajajë.

¹² Yëi ñamapi seis acore ne hui'yosi maca ñahuë. Ñaquëna, ai tutu yejapi ñu'cueo, cui'ne ësejje neaquë de'opi, ju'tena, oijë suñacoje pa'i neaquërepa. Cui'ne ñañëpi maja'iquërepa tsieje pa'i de'opi.

¹³ Cui'ne ma'ñocohua'ijje ma'tëmopi yejana tømehuë, soquë huiña ca ai tutuquëna, tømëheje pa'ye.

¹⁴ Ja maca cui'ne ma'tëmoje toya ja'hua maca tuna huesoyeje pa'ye peo hue'ña ne huesëo. Ne huesëcona, si'aye ai cuti, cui'ne saodohuëa t'irose'ena sani huesëpi.

¹⁵ Ja maca iye yeja ëjaohua'ipi coñana cacajë catihuë, ai cuti quëna coñana. ñohua'i ja're con, jai ëjaohua'i, soldado pai ëjaohua'i, co'amaña pa ëjaohua'i, cuañe tutu pa ëjaohua'i, cui'ne si'aohua'i pa'ire necai jo'yaohua'i, cui'ne jo'yaohua'i peocohua'ijje catihuë.

¹⁶ Catijë cahuë, ai cutire, cui'ne quëna pëare:

“Yëquëre tømeco yahuejë'ë, ñu'i saihuë ñu'iquëre pare cui'ne yëi ñama pëi yo'oye ñama'pë pa'ija'cohua'ire.”

¹⁷ Jaje cahuë, ñohua'ire si'se mu'sere papi t'iaëna, çnepi quëcoye pa'iquë'ni?

7

Israel Pai Acohua'ire Toyase'e

¹ Ja jeteyo'je ñahuë, cuatro huiñaohua'ipi pai ñape yeja huë'ehuë te'tere, ëmëje'e te'tere, cui'ne ëse mëi te'tere, cui'ne ëse du'i te'tere nëcäjë tutupi iye yejana, jai tsiayana, cui'ne soquë ñëana ju'ama'quëni cajë ësejë pa'icohua'ire.

² Ñahuë, cui'ne yequë huiñaëre ëse mëi te'tepi daina. Jaë cato Maija'quë huajëquërepa, sëoconi paquë paji'i. Jaëpi ai tutu capi, cuatro huiñaohua'ire, yeja, jai tsiaña, co'a de'huaja'a tutu jsi cuañosicohua'ire:

³ “Co'aye nema'pë pa'ijë'ë, yeja cui'ne jai tsiaña, cui'ne soquë ñëaje, ja yë'ta'a Maija'quë sahuasicohua'ire ñohua'i tsia t'ñare pana toya sëoma'pë pani.”

⁴⁻⁸ Cui'ne ja maca asahuë, ciento cuarenta y cuatro mil pai pa'iyë, si'a Israel pai, ñohua'i tsia t'ñare pana toya sëo cuañosicohua'i, cayere.

Doce mil Judá tsëcapëre,
doce mil Ruben tsëcapëre,
doce mil Gad tsëcapëre,
doce mil Aser tsëcapëre,
doce mil Neftalí tsëcapëre,
doce mil Manases tsëcapëre,
doce mil Simeón tsëcapëre,
doce mil Leví tsëcapëre,
doce mil Isacar tsëcapëre,
doce mil Zabulón tsëcapëre,
doce mil José tsëcapëre, cui'ne
doce mil Benjamín tsëcapëre pa'iyë, cayere.

Poja'i Caña Ju'icohua'i

⁹ Ja jeteyo'je ñahuë, jai pa'ire si'a yejaña pa'icohua'ipi pai ñape tsëca t'ñe pa'i pai, cui'ne pai ñape tsëca t'ñe coca cacohua'ire. Jaohua'ipi ñu'i saihuë t'ñare pare, cui'ne yëi ñama t'ñare

pare, ti pajiye cuçcucue tijañe peoyerepa paë'ë. Jaohua'ipi poja'i caña ju'icohua'ipi iohua'i jëñare sehua ja'oje pa'yere cajijë nëcahuë.

¹⁰ Cajijë nëcajë si'aohua'i cuihuë:

Maire huasoye cato

ñu'i saihuë ñu'iquërepa Maija'quë,

Cui'ne Yëi ñama tse a'ë.

¹¹ Cajëna, ñaquëna, Maija'quë huiñaohua'ipi ñu'i saihuë aiohua'i, cui'ne cuatro pa'iohua'i yërehueja'a nëca të'ljaisicohua'ipi paë'ë. Pa'ijë Maija'quëre de'oquëre pa'ni cajë pëpajë yejare pana tsiapi pu'pe co'i mejë yo'ohuë.

¹² Ñeje cajë:

¡Jaje pa'ija'quë! Je'nëna Maija'quë tse pa'ijaquë, de'oquëre pa'ni cajë sihuaye, ¡de'oyerepa yo'oyere sihuajë caye, ta'ñe asayepi neñere, de'oye yo'opi cuasajë ite sihuaye,

Ëjaë api, cuasajë de'oyerepa sehuojë yo'oye, si'a ne tija'a tutu paye, cui'ne si'a tutu hue'eye, si'anë.

Jaje pa'ijaquë.

¹³ Ja maca aiohua'i aquëpi yë'ëre seji'i:

“¡Jeropi daisicohua'ipi icohua'i poja'i caña suñasicohua'i pa'iyeni?”

¹⁴ Cajëna, yë'ëpi cahuë:

“Ëjaë më'ëpi ta'ñe asayë.”

Caquëna, ¡pi capi:

“Icohua'i cato jaiye ai yo'oye tëtö saiscicohua'i a'ë. Jaje pa'iohua'ipi iohua'i caña joja torena, Yëi ñama tsiepi poja'i cañarepa ne tosicohua'i a'ë.

¹⁵ Jaje pa'iohua'ipi Maija'quë ñu'i saihuë tijañe pare pa'iyë. Pa'ijë mu'señapi, ñamiñapi Maija'quë huë'ere necajë pa'iyë. Pa'ijëna, ñu'i saihuë ñu'iquëre papi iohua'ire ñacai pasipi.

¹⁶ Jaje pa'ina, yure cato ai yo'oye paja'cohua'i a'ë, aó ëaye, oco ëaye, ëse ëoye, cui'ne josa ëse uyeje asama'pë pa'ija'cohua'i a'ë.

¹⁷ Yëi ñama, ñu'i saihuë quëno maca nëiquëpi yëi ñamare ñacaiyeje pa'ye ñacasipi. Jaje yo'oquë pa'iyë ¡si oco coñana saquë ocujaja'quë api. Yo'oquëna, Maija'quëpi iohua'i oise'ere tëtö jeocajaja'quë api.”

8

Siete Aco Sjosico Hui'yoye Cui'ne Ma'ña Ëcco, Curi Nesico

¹ Yëi ñamapi siete aco sjosicore ne hui'yo maca ñahuë, ma'tëmopi nëhui tëcahuë jo'cuarepa jeo nëina.

² Ja maca ñahuë, siete huiñaohua'ire Maija'quë tijañe pare nëcajëna. Jaohua'ina siete duruhuëa ¡sise'e paji'i.

³ Ja jeteyo'je yequë huiñaëpi daji'i, huëo së ma'ña curi cua'corore daquëpi. Dani nëcapi, Maija'quëre ¡sijë tëtö toto tijañ macare pana. Nëcaquëna, jaiye ¡sipi, huëo së ma'ñare curipi nesico Maija'quëre ¡sijë tëtö totona tëtöquë ëoquëna, cui'ne Maija'quë tsecohua'i señepi te'e mëijaquë caquë.

⁴ Ja ma'ña picopi cui'ne Maija'quë tsecohua'i señepi cõni Maija'quë quë'rona tija'api, huiñaëpi ¡ti ma'ña ëo cua'coro cajiquë nëcaquëna.

⁵ Ja maca huiñaëpi Maija'quëre ¡sijë tëtö toto toa tara pa'iyepi huëo së ma'ña cua'corona ayapi. Ayani yejana jeo topí. Jeo to macarepa mujuë caye, ai pisiye, ye'hueye cui'ne yeja ñu'cueye paji'i.

Duruhuë Pisiye

⁶ Ja maca siete huiñaohua'ipi siete duruhuëa pacohua'ipi juñu'u cajë ne de'huahuë.

⁷ Ja maca du'ru jui huëo huiñaëpi duruhuë juisi maca sësë pepi, cui'ne toana tsie co'mese'epi yejana tompëpi. Ja maca toasoñe pa'ye yeja huahuese'e acopi te'e te'te u huesëpi. U huesëquëna, soquëje te'e u huesëpi, toasoñe acopi te'e te'te, cui'ne si'a taya u huesëpi.

⁸ Cayaye aquëpi huiñaë ¡ duruhuë juisi maca, ai cõtihuëje pa'io'pi toa tsë'isiconi jai tsiayana jeo de'oyeje ña cuañopi. Ja maca toaso tël'huña, jai tsiaña pa'iyepi te'e tël'hui tsie da'ca de'o nëji'i.

⁹ Ja maca jai tsiaña pa'icohua'i jujuhuë, te'e tël'hui, toaso tël'huña jai tsiaña pa'icohua'ipi. Cui'ne toaso tël'huña jaiye barco pa'ise'epi, te'e tël'hui ne huesëpi.

¹⁰ Toasoñe aquëpi huiñaë juisi maca, ma'tëmopi jai ma'ñoco tompëpi. Tomëquë toaso tël'huña tsiaña, cui'ne oco coña pa'ise'ena te'e tël'hui tompë huesopi, toa cañarepa në'suquëpi.

¹¹ Jaë ma'ñoco cato ¡ mami hue'equë paji'i, Sëjeñe. Jaëpi toaso tël'huña tsiaña, cui'ne oco coña pa'ise'ere tompëquë te'e tël'hui sëje oco ne huesopi. Ja do'ire jai paji jujuhuë.

¹² Cajese'e aquëpi huiñaë i duruhuë juisi maca, ësëpi co'a de'opi, te'e te'te, toaso të'huiña huahuese'e pa'ise'epi. Ñañë cui'ne ma'ñocohua'i toaso të'huiña huahuese'e pa'ise'epi te'e të'hui co'a de'ohuë. Ja maca toaso të'huiña mu'se cui'ne ñami pa'ie te'e te'te miañe peopi.

¹³ Ja jeteyo'je ñahuë, jai huihuere ma'tëmoja'a huahuarojai tutu caquëna:

“Teayerepa iye yeja pa'icohua'i maña, merepa neja'cohua'i a'ni, toaso huiñaohua'i duruhuëa juni co maca.”

9

¹ Cinco aquëpi duruhuë jui maca ñahuë, jai ma'ñocopi yejana tomequëna. Jaë ma'ñocopi isihuë, tome huesë coje hui'yocore.

² Ja jeteyo'je tome huesë hue'ñare hui'youna, jaropi pico mëji'i, jai cua'coro toa suasico mëñeje pa'yerepa. Jaro tome huesë cojepi pico etaquë ësëre cui'ne iye de'oto nea hue'ñarepa ne huesopi.

³ Ja picopi etahuë, pu'suje pa'iohua'ipi. Etajë si'a yeja hua huesëhuë. Jaohua'i cato puni a'siye ja'ye a'si tuture isi cuañosicohua'i paë'ë.

⁴ Jaohua'ina cuañese'e paji'i, taya yeja pa'ie, cui'ne yejapi tayaje pa'ye ña cuañoñe, cui'ne soquë ñëa nejoñe pa ja'ñere, coa Maija'quë tsecohua'ire pa'ë iñoñere iohua'i tsia tñia macare pana sëoma'cohua'ise'ere ne ja'ñere.

⁵ Jaje pa'iquëta'are paire huani jeoñere pare ësësicohua'i paë'ë. Jaje pa'ina, coa cinco ñañëohua'ire a'si ju'iñe totacohua'i paë'ë. Cui'ne iohua'i totase'e cato puni a'siye ja'ye a'siye paji'i.

⁶ Ja mu'seña cato pai ju'iñere yëja'cohua'i a'ë. Jaje yëjëta'a juni huesëye paja'cohua'i a'ë, ju'iñepi peoquëna.

⁷ Pu'su cato caballo huajo sajë ne de'huase'ejë pa'iohua'i paë'ë. Iohua'i siopëre curi marojë pa'ioire pahuë. Iohua'i tsiapi pai tsiaje pa'io paji'i.

⁸ Cui'ne nomiohua'i ñañaje pa'ye hue'ehuë. Iohua'i kujire airo yai cujije pa'ye hue'ehuë.

⁹ Cui'ne quëna ju'i cañare suñase'ejë pa'iohua'i paë'ë, iohua'i jëa ja'ñere. Cui'ne iohua'i jaë capëapi jai pai caballo quërëcoja'a huajo sajë huë'huëjëna, pisiyeje pa'ye pisiipi.

¹⁰ Puni jicomaaje pa'ye hue'ecohua'i paë'ë. Jarote dahuë hue'ecohua'i paë'ë, cinco ñañëohua'ire a'siyere.

¹¹ Pu'suohua'ire cuañe ëjaë cato tome huesë coje huiñaë paji'i. Hebreo coca cato Abadón hue'equë paji'i. Griego coca cato Apolión hue'equë paji'i. Jaje cani iti Nejoquë caye a'ë, pai coca cato.

¹² Du'ru macarepa ai yo'oye tëto saji'i. Jaje pa'iquëta'are ja yë'ta'a cayaye carapi.

¹³ Seis aquë huiñaë jui maca yë'ose'e pisiquëna, asahuë, Maija'quë quë'ro oropi nesi totore cuatro pa'i eyohuëapi.

¹⁴ Ja caye cato seis aquë huiñaëni duruhuë paquëni capi, ñeje:

“Joye saojë'ë, cuatro huiñaohua'ire sëasicohua'ipi jai ya Efrautes të'tëpa ñu'icohua'ire.”

¹⁵ Ja maca iti case'ejë cuatro huiñaohua'ire joyesicohua'i paë'ë. Jaohua'i cato toasoñe pa'ye huahuese'e pai pa'icohua'ire huaija'cohua'ipi etahuë. Iti hora, mu'se, ñañë, cui'ne ometëcahuë t'asi maca jare caquë ne de'huasicohua'ipi etahuë.

¹⁶ Ja maca de'hue se asahuë, doscientos millones soldado pai pa'ie, caballore tuijë huajo sacohua'i.

¹⁷ Jaje pa'ye ñahuë, cani ñañeje pa'ye caballohua'ire. Iohua'ire tuicohua'i cato coti saihuëare toaje pa'yere papi suñasicohua'i paë'ë, iohua'i jëa ja'ñe. Jaje pa'yepi ma ja'ñe, yeque ñal'jo quë'ye cui'ne yeque së'ñoja'iñe paji'i, azufreje pa'ye. Caballohua'i cato airo yai siopëje pa'ye hue'ecohua'i paë'ë. Jaje pa'iohua'i yë'opoapi toa, pico, cui'ne së'ño ja'ñe azufre etapi.

¹⁸ Ja maca toasoñe pa'ye huahuese'e pai pa'icohua'i te'e të'hui jujuhuë, caballo yë'opaja'a toasoñe pa'ye co'ayerepa: toa, pico, cui'ne së'ño ja'ñe etasi do'ire.

¹⁹ Ja cabalohua'i cato johua'i yë'opare cui'ne iohua'i jicomaare tutu pahuë. Iohua'i jicoma cato ña siopëaje pa'ye paji'i. Japi paire co'aye nehuë.

²⁰ Jaje pa'iquëta'are ja ju'i dahuëna ju'ima'cohua'i cato co'aye yo'oye jeoma'pë huatiohua'ire tuiyere, de'huase'ere oro, po curi, bronce hue'yosi quëna, cui'ne soquë de'huase'ere señere jeoma'pë paë'ë. Asa ma'ñere, ñama'cohua'ini, cui'ne cu'i ma'ñere sejë paë'ë.

²¹ Cui'ne jeoma'pë paë'ë, paire huani jëañe, paire dahuë neñe, nomiohua'ire coa yo'ojë pa'ie, cui'ne co'amaña ñañe.

10

¹ Ja maca ñahuë, yequë huiñaëre tutu quë'ipi ma'tëmopi cajequëna, sirioipi ca'nesiquëpi. I sïopë cato na'ñamequëpi ca'huario puasiquë paji'i. Cui'ne i tsia cato mia merepa miaco paji'i, ësëje pa'io. Cui'ne i nëcañoaje toa tsëni nëcase'eje pa'ye paji'i.

² A'ri toya pëpë hui'yosiconi cajipi. Cajiquëpi i ëja te'te quëo ja'huapi jai tsiayana se tïtopaquë, i ari te'te quëo ja'huapi yejana tsa'cu papi.

³ Ja maca tutu cui, airo yai jaiquërepa cayeje pa'yerepa. I cui si maca mujuë cayeje pa'yerepa siete yë'o tuturepa cajëna, asahuë.

⁴ Siete yë'o tuturepa ca tösï maca toyara'huë. Ja case'ere toyasi'i caquë yo'ouquëna, ma'tëmopi capi, yë'ëre:

“Coa asajë'ë, më'ëse'e. Toyama'ë pa'ijë'ë, siete yë'o tuturepa case'e.”

⁵ Ja jetyo'je ñahuë, jai tsiayana cui'ne yejana tïto pasiquëpi huiñaëpi i ëja te'te jëtëpi ma'tëmona mëne nëoquë

⁶ ti pani huesëquëre pana, yeja, ma'tëmo, jai tsiaña, cui'ne si'aye jote pa'ïye nesiquëre pana se ca co'ijai care payë caquë ñeje capi:

“Yeque tsoe ute co'ne peoji.

⁷ Siete aquë huiñaë duruhuë jui maca tï'asipi, Maija'quë yahue cuaca nëose'e payepi, i jo'ya ite quëacacohua'ire i ca nëose'eje pa'ye.”

⁸ Ja maca asahuë, ma'tëmopi yë'ë asasi yë'opi ca coquëna, ñeje:

“Sani ijë'ë, a'ri toya pëpë hui'yosiconi jai tsiayana, cui'ne yejana tïto paquë huiñaë cajiconi.”

⁹ Caëna, sani huiñaëre sei'ë, a'ri toya pëpëre isijaquë caquë. Seina, ipi capi, yë'ëre:

“Ico, ñni aijë'ë, më'ë yë'opo cato payaoje pa'io pasipi. Jaje pa'isicota'a më'ë ëtatu'una sëjeco ponëja'coa.”

¹⁰ Caëna, huiñaë cajicore ñni a'ri toya pëpë aë'ë. Ai maca yë'ëre cato saija'ico payaoje pa'iorepa paji'i. Jaje pa'isicota'a ëtatu'una sëjecorepa de'opi.

¹¹ Ja maca yë'ëre cahuë:

“Tijupë pai daripëa pa'icohua'ire, cui'ne yequë coca cacohua'ire, cui'ne yequë yejaña pa'icohua'ire, cui'ne pai ëjaohua'ire quëaye pa'iji, Maija'quë cayere.”

11

Caya Quëacacohua'i

¹ Ja maca yë'ëre catë tarapëje pa'ioni cuëcujë'core jsihuë. Isini cahuë:

“Huëni Maija'quë huë'ere ñna jsi toto saihuëre, cui'ne jote pa'ijë sëcuhua'ire cuëcujë'ë.

² Jaje pa'iquëta'are cuëcuma'ë pa'ijë'ë, hue'se de'otota'ë. Jaro cato Maija'quëre sema'cuhua'ina jsi sito a'ë. Jaohua'ipi si'a de'o daripë tsa'cu huesoja'cuhua'i a'ë, cuarenta y dos ña'neohua'ire.

³ Ja maca yë'ëpi cayaohua'ire oicohua'i suña'neje pa'yere suñasicohua'ini jëjo saoja'quë a'ë, yë'ë aye quëaja'cuhua'ire mil doscientos sesenta mu'seña.”

⁴ Icohua'i caya quëacohua'i cato si'a yeja Ejaërepa tïñare pare nëcajë pa'icohua'i paë'ë. Jaohua'i cato caya olivo sqquë ñëa'ë, cui'ne caya sotonoa toa tsë'ise'e paji'i.

⁵ Paipi jaohua'ire co'aye yo'oñu'u cajë yo'ocohua'i pa'ito coa yë'opopi toa sëco ëo huesocohua'i a'ë, ti peo hue'ñarepa. Jaje ne huëa cuaño'ne pa'iji, iohua'ire saño'pe yo'ocohua'i.

⁶ Jaohua'i cato Maija'quë coca quëa macaja'a ocoye pa ja'ñere ne tutu pacohua'i paë'ë, cui'ne ocoje tsie pona tutu pacohua'ipi yeja paire coa si'aye ai yo'oye necohua'i paë'ë, iohua'i yëyeje pa'ye.

⁷ Jaje pa'iquëta'are iohua'i quëaye saosi maca, tome huesë cojepi nëtë mëoni huajëya'ye pa'ipi jaiquë aipi jaohua'ire quëco huesoni, tsëani huani jëapi.

⁸ Huani jëaëna, iohua'i capëa jai daripë ma'ñare jëocose'epi uija'coa, Ejaëre quësi daripëre. Jaro cato Sodoma, cui'ne Egípto hue'yosi daripë a'ë, co'a daripë pa'i do'ire.

⁹ Jaje jëocosi capëapi toaso mu'seña cui'ne jopoja'a uina, si'aohua'i maña ñaja'cuhua'i a'ë. Tï pai, yequë coca cacohua'i, cui'ne yequë daripëa pa'icohua'i, si'a yejaña pa'icohua'i ñajëta'a tama'pë pa'ija'cuhua'i a'ë, coe do'ire.

¹⁰ Iye yeja pa'icohua'i cato ai sihuaja'cuhua'i a'ë, jaohua'i ju'isi do'ire. Jaje pa'ina, pai ñape sa'ne co'amaña isija'cuhua'i a'ë. Maija'quë coca quëajë iohua'ire josa yo'osicohua'ipi peojëna, jaje sihuaja'cuhua'i a'ë.

¹¹ Jaje sihuajëta'are toaso mu'seña joporepa pa'i maca Maija'quëpi cui'naohua'ini huëo copï. Ja maca si'aohua'i iohua'ire ñasicohua'i quëquë huesëhuë.

¹² Ja maca cayaohua'i quëacacohua'ipi asahuë, tutu ma'tëmopi yë'ose'e ñeje caquëna:

“Mëijë'ë, iñona.”

Si'aohua'i iohua'ire pëicohua'i ñajëna, sirioja'a ma'tëmona mëni huesëhuë.

¹³ Ja maca yeja ñu'cueo. Ñu'cuecona, jai daripëpi diez te'ña huata tomeo. Huata tomeona, siete mil pai jujuhuë. Ja maca huajëcohua'i nëasicohua'ipi quëquë huesëni Maija'quë ma'tëmo pa'iquëre de'oquëre pa'ni cajë yo'ohuë.

¹⁴ Ñeje tëto saji'i, cayaye nejoñe aye. Jaje pa'iquëta'are ja yë'ta'a toasoñe aco tëto saiye carapi, tita'aja'coa.

Siete Duruhuë Acore Juise'e

¹⁵ Siete aquë huñaë ñ duruhuë juisi maca asahuë, ma'tëmopi tutu yë'o cajëna, ñeje: Iye yeja yure cato

Mai Ëjaë cui'ne ñ Cristo cuañeñere pa'iji.

Jaje pa'ina, ñpi carajaiñe peoyerepa cuañequë pa'ija'quë api.

¹⁶ Ja maca veinticuatro aihua'ipi Maija'quë ña hue'ñare pare cuañejë ñu'i saire ñu'icohua'ipi Maija'quëre de'oquëre pa'ni cajë ñohua'i tsiapi yejare pana në mejë yo'ohuë, ñni ai cuasajë.

¹⁷ Ñeje cajë yo'ohuë:

De'oji. Ëjaë më'ëre pëpayë,

Si'aye pa'ire pare.

Yure, cui'ne tsoejë pa'iquëre pare,

Jaje pa'ipi yure si'a më'ë tuturepa ñni

Cuañe huëoquëre iye yeja.

¹⁸ Iye yeja pai cato më'ëre pë'ë.

Jaje pa'iquëta'are më'ë pëi mu'sere papi tija'api.

Tija'ëna, yure cato ju'isicohua'ire ñohua'i yo'ose'eje pa'ye ñaquë ca de'huaja'quë a'ë, më'ë.

Ca de'huaquë më'ë jo'yaohua'ire isija'quë a'ë, de'huacaisi co'amañare.

Jaje më'ë isija'quë a'ë, më'ëre quëacaicohua'ire.

Më'ëna ñisicohua'ire, ëjaëre papi cajë nuñerepa sehuojë pa'icohua'ire,

Si'ahua'ire, aihua'ire panita'a tsireje.

Iye yeja paire nejocohua'i pa'isicohua'ire cato më'ëpi nejoja'quë a'ë.

Jaje pa'ina, de'oji, më'ëre cayë.

¹⁹ Ja maca Maija'quë huë'e ma'tëmo pa'icopi hui'yona, jarote paji'i, Maija'quë maire huajëye ca nëose'e de'huase'epi. Ja maca mujuë ye'hueyeje pa'ye, ai pisiye, mujuë ai cayeye pa'ye, yeja ñu'cuyë cui'ne sësë carapëa tomeñe paji'i.

12

Nomio Cui'ne Jai Pë'ëje Pa'i Yo'ose'e

¹ Ja maca jaiye ma'tëmopi ññoñere ñahuë. Ñaquëna, te'o nomio ësë miañeje pa'yere ca'nesico paco'ë, ju'i ca ca'neñeje pa'ye. Jaje pa'ioipi ñañëni meñe tsa'cu paco paco'ë, cui'ne doce ma'ñocopi ño sjo'pë puasico paco'ë.

² Jaje pa'ioipi tsj ëtapë paco'ë. Pa'ioipi tsj co'a huëoni a'si ju'io, ai cuio.

³ Ja jeteyo'je ñahuë, ma'tëmona yequë ñaiquëna. Ñaiquëna, jai pë'ëje pa'ipi maja'iquëpi, siete sjo'pëa hue'equëpi, diez cajohuëa hue'equëpi, cui'ne ñti sjo'pëa ñape maro pu'ñe paji'i.

⁴ Jaje pa'ipi ñ jicomopi toaso të'huiña ma'ñocohua'i pa'iyere te'e te'te ma'ñocohua'ire yejana ne darëpi. Jaëpi nomio tsj coasi'li caco yo'o tija'are pana nëca dani utepi, coasi maca tsihua'ëre asi'li caquë.

⁵ Ja maca nomioipi tsihua'ëni coao, si'a yejaña pa'icohua'ire quëna tarapëpi cajiquë cuañeja'quëni. Jaje pa'iquëta'are ño mamaquëre cato siconi Maija'quë quë'rona ñ ñu'i saihuë quë'rona sahuë.

⁶ Sarena, nomioipi cuëne yejana catio. Maija'quë jote caquë necai sitona, jote mil doscientos sesenta mu'seña ajojë paja'tona.

⁷ Ja jeteyo'je ai uihuaye paji'i, ma'tëmopi. Pa'ina, huñaë Miguelpi cui'ne ñ huñaohua'i conji jai pë'ëje pa'ire cui'ne ñ huñaohua'ire uihuahuë.

⁸ Jaje uihuajë jai pë'ëje pa'ire cui'ne ñ huñaohua'ire quëcorena, ñohua'i pa'ija'to ma'tëmo peoquëna,

⁹ ja maca jai pë'ëje pa'ire cui'ne ñ huñaohua'ire yejana jeo tohuë, tsoe hue'ña aña, huati cui'ne Satanás hue'equëre, si'a yeja paire cosoquëre.

¹⁰ Ja maca asahuë, ma'tëmopi tutu ñeje caquëna:

“Maija'quë do'ijëre ñamiñapi, cui'ne mu'señapi Maija'quë ña hue'ñana sañope caquë pa'isiquëre eto saosi do'ire yureta'a tija'are papi, huaso maca, Maija'quë si'a tutu quë'ire papi cuañe maca, Jesucristo cuañe Ëjaërepa pa'i maca.

¹¹ Maija'quë do'ijë, cato Yëi ñama tsiepi cui'ne Maija'quë coca cayeje pa'ye nuñerepa iohua'i pa'ise'epi coní mënare quëcohuë. Jaje pa'ina, iohua'i pa'iyë nejoñe ca'raye pañuë. Pajë coa ai jerepa jujunije jujun'u, cuasahuë.

¹² Sihua'j'ë, ma'tëmo pa'icohua'i. Jaje pa'iquëta'are teayerepa yeja pa'icohua'i maña, cui'ne jai tsiaya pa'icohua'i, huati mësaru quë'rona cajepi pëtitesiquëpi ìte nejoñe ja'yere pa'ina, ñaquë."

¹³ Jai pë'ëje pa'ipi yejana jeo tosiquëpi pa'i ña jujani tsihua'ëre coasiconi huajo huëopi.

¹⁴ Jaje huajo huëouma, nomiore jai huihue care isihuë, io ja'jëco cuene yejana io quë'rona sai ja'ñere, aña peo huë'ñana so'ona. Jaron a toaso ometëca jopore paja'a ajojëna, pa'ija'copi saija'coa.

¹⁵ Jaje pa'ina, añapi nomiore io yë'opo siso etosi ocopi tsiaya neni col'je me tosi'i caco yo'ouona,

¹⁶ nomiore yejapi coçao jai pë'ëje pa'i oco nese'ere peo huë'ñarepa ya'ani nëo hueso.

¹⁷⁻¹⁸ Jaje yo'osi maca jai pë'ëje pa'ipi ai pëti huëopi, nomiore. Jaje pa'ina, io tsëcapëre Maija'quë cuañese'e sehuocohua'ire, Jesucristo quëase'ere nuñerepa coca tuicohua'ire uihuasi'i caquë saji'i.

13

Cayahua'i Huajëya'ye Pa'iohua'i

¹ Jai tsiaya mejahuëre nëcaquë ñahuë, jai tsiayapi huajëya'ye pa'ipi etani tumaquëna, siete siopëa, cui'ne diez cajohuëa quë'ipi, cajohuëa ñape maro pu'iñe paji'i, cui'ne i siopëare Maija'quëre cue'cuejë Maija'quë mamire sëose'ere hue'eye paji'i.

² Iquë huajëya'ye pa'i yë'ë ñasiquë cato airo yaije pa'i paji'i. Jaje pa'ipi oso quëoje pa'ye hue'epi, cui'ne i yë'opore jai yai yë'opojë pa'lore hue'epi. Jaje pa'ina, jai pë'ëje pa'ipi i tuture, i cuañequë ñu'i hue'ñare, cui'ne ëjaë cuañequë pa'yere isipi.

³ Iquë huajëya'ye pa'i siopëa acopi te'o jai a'sio ai paji'i. Pa'iona, paipi ñajë ju'ija'quë api cajë ñasichua'ita'are ja'ju huesësico paco'ë. Jaje pa'ipi co'yasi do'ire paipi ña quëquëni ina tui huëohuë.

⁴ Ja maca jai pë'ëje pa'ire huajëya'ye pa'ire ëjaëre papi cuasajë sei'ë, huajëya'ye pa'ire tutu isisi do'ire. Jaje cui'ne iti tutu isi cuañosiquëreje sei'ë, ñeje cajë:

"¿Nepi iquëje pa'iohua'i pa'iyë'ni? ¿Nepi ìte uihua t'ñe pa'iquë'ni?"

⁵ Jaiye Maija'quëre sañoje caja'a coca isi cuañosiquë paji'i. Jaje pa'ipi cuarenta y dos ñañoehua'ire cuañëja'quë paji'i.

⁶ Jaje pa'ipi ñeje yo'opi: Maija'quëre sañoje capi, i de'o hue'ñare co'aye capi, cui'ne ma'tëmo pa'icohua'ireje co'aye capi.

⁷ Cui'ne Maija'quë tsecohua'ire sañoje uihuaquë ñese quëco ja'ñe isi cuañosiquë paji'i, cui'ne si'a pa'i, tsëcapëa pa'icohua'ire, si'a pa'i yequë coca cacohua'ire, cui'ne si'a yejaña pa'icohua'ire cuañëja'a tutu isi cuañosiquë paji'i.

⁸ Jaje pa'ini si'aohua'i iye yeja pa'icohua'i iohua'i mami yeja de'huama'në Yëi ñama ai yo'ouquë ju'isiquë pa'iyë toya pëpëna toyama'cohua'ise'e jaëre sei'ë.

⁹ Cajoro hue'ecohua'i pani asajë'ë.

¹⁰ Co hue'ña tseani saja'cohua'ire ña nëosichua'ire cato jare tseani co hue'ñana saja'cohua'i a'ë. Hua'tipi huaija'cohua'ire ña nëosichua'ire cato jare hua'tipi huani jeoja'cohua'i a'ë. Jaje pa'ina, Maija'quë tsecohua'i cato quëcocaiyere, cui'ne Maija'quë pa'ire paji cuasayerer paye pa'iji, quëco t'aja'cohua'i.

¹¹ Ja jeteyo'je yequëre huajëya'ye pa'ire ñahuë, yejapi etaquëna. Jaë cato caya cajohuëa hue'equë paji'i, yëi ñama cajohuëaje pa'yere. Jaje pa'ita'a jai pë'ë cayeje pa'ye caquë paji'i.

¹² Jaje pa'ipi du'ru macarepa etasiquë huajëya'ye pa'i tutuje pa'yere paquë paji'i. Jaje pa'ipi du'ru etasiquë ña hue'ñana si'aohua'ire yeja pa'icohua'ire cuañepi, du'ru macarepa etasiquëni ai cuasajë ìre papi cajë, jai a'sio aire hue'esiquëpi ja'jusiquëni sejë'ë caquë.

¹³ Cui'ne jaiye pa'i yo'o t'ia ma'ñe yo'opi. Yo'ouquë pa'i ña hue'ñana ma'tëmopi yejana toa tomeñe ne iñoquë yo'opi.

¹⁴ Du'ru macarepa etasiquë huajëya'ye pa'i ña hue'ñana yo'o iño ja'ñe isise'epi yo'ouquë iye yeja pa'icohua'ire cosopi. Cosoquë cuañepi, du'ru etasiquëje pa'ire nejë'ë caquë, hua'ti totasiquëta'a ja yë'ta'a huajëquë pa'iyëje pa'ire.

¹⁵ Maija'quë ësema'ë pa'ina, cayaye aquë etasiquë huajëya'ye pa'ipi pa'i de'huasiquëna, tutu isipi, du'ru aquëje pa'ire nesiquëna. Jaje isina, yë'equë, cui'ne coca caquë pa'i, yecohua'ire ìte do're ja'runi sema'cohua'ire huani jeojë'ë, cuañepi.

¹⁶ Yequeje cui'ne yo'opi, si'aohua'ire a'ricohua'ire, jaicohua'ire, jaiye co'amaña pacohua'ire, co'amaña peocohua'ire, de'oye pa'icohua'ire, jo'yaohua'ire, ëja te'te jëtëna panita'a tsia tñare pana toyaye pa'iji, caquë.

¹⁷ Jaje pa'ina, huajëya'ye pa'i mamire, panita'a i mamire cuëcuyere toyama'cohua'i pani co'amaña hueroyeje ti peopi. Cui'ne se yo'oyeje peopi, curiquë nesi'i caquë.

¹⁸ Iye cato ai ta'ñe cuasaye asa ti'añe paji'i. Asa ti'aquëpi cuasarepa caye paji'i, huajëya'ye pa'i mamire cuëcueni toyase'ere. Ja cuëcuese'e cato pai mami cuëcuese'e a'ë. Ja cuëcuese'e cato seiscientos sesenta y seis a'ë.

14

144.000 Pai Jëjëne

¹ Ñahuë, Yëi ñamare Sión cutihuëre nëina. Jarote i ja're coni paë'ë, ciento cuarenta y cuatro mil pai. Iohua'i tsia tiñarepa Yëi ñama mamipi cui'ne i pëca ja'quë mamipi toyasicohua'i pi.

² Ja jeteyo'je asahuë, ma'tëmopi jai jupo pisiyeje, mujuë ai tutu t'ë'cana pisiyeje, cui'ne jai pai ta'tëpe pëa ta'tëjëna, pisiyeje pa'ye pisiquëna.

³ Jaje pisiquëna, jaohua'ipi huajë jëjëñere jëjëhuë, iti cuañequë ñu'i sai huë tiñare pana, cuatro pa'iohua'i ña huë'ñana, cui'ne aiohua'i ña huë'ñana. Ja jëjëñere cato ja ciento cuarenta y cuatro mil pa'icohua'ise'e ye'yesicohua'i a'ë.

⁴ Icohua'i cato nomiohua'ire yo'oye, si'si de'oye pasicohua'ipi, de'ocohua'ire pa'ë. Jaje pa'iohua'ipi Yëi ñamase'ere tuyë, coa si'a huë'ña i sai huë'ñaje. Jaohua'i cato yeja pa'icohua'ini huasosicohua'ipi pa'iyë, du'ru quëise'eje pa'yere Maija'quëna, cui'ne Yëi ñamana isisicohua'ipi.

⁵ Icohua'i cato ti coso coca cama'cohua'irepa paë'ë. Jaje pa'ina, jaohua'ire tayocohua'i a'ë ca ti'añe ti peoji.

Toaso Huiñaohua'i Quëase'e

⁶ Ja maca ñahuë, yequë huiñaëre ma'tëmaja'huahuaquë saina, iye yeja pa'icohua'ire si'aohua'ire yequë paire, ti coca cacohua'ire cui'ne si'a yejaña pa'icohua'ire ti pani huesë cocare quëasi'i caquë.

⁷ Jaje pa'ipi tutu capi, ñeje:

“Maija'quëre ca'rajë'ë. De'oquëre pa'ni cajë sihuajë'ë, ise'ere. Tsoe ti'api, pai ñape yo'ose'e ñaquë sai de'huaja'a mu'se.”

⁸ Ja maca cayaye aquëpi huiñaë capi, ñeje:

“Tsoe nejosicoa, jai Babilonia. Tsoe nejosicoa, pai mañare iye yeja pa'icohua'ire io co'aye yëyepi o'cua cuepasio.”

⁹ Ja maca toasoñe aquë huiñaëpi ai tutu capi, ñeje:

“Paipi huajëya'ye pa'ini, cui'ne ije pa'ire de'huasiquëni, de'oquëre pa'ni cuasajë ñajë sihuacohua'ire, cui'ne jëtëna panita'a tsiana i ayere toya cuañosicohua'ire cato,

¹⁰ Maija'quë pëi si'se seje conore ucuja'cohua'i a'ë, co'ayere pare, i pëi ne de'huase'ere. Jaje ai yo'oja'cohua'i a'ë, toa cui'ne, azufre coni tsë'i sitona Maija'quë huiñaohua'i, cui'ne Yëi ñama ña huë'ñana.

¹¹ Iohua'i tsë'i sitore pana ujë ai yo'ojëna, pico mëiñe je'nëna mëio nëija'coa, si'a mu'señapi, cui'ne si'a ñamiñapi, pëa huajëye ti peojë. Jare jaje pa'ijajë huajëya'ye pa'ire, cui'ne ije pa'ire de'huasiquëre seje, cui'ne i mami ayere toya cuañosicohua'ire.

¹² Iye cato Maija'quë pai i cuañese'e sehuocohua'ire, cui'ne Jesure nuñerepa tuicohua'ire yëhuoye a'ë, quëcojë yo'o jujama'pë pa'iyë a'ë.”

¹³ Ja maca asahuë, ma'tëmopi yë'ose'e yë'ëre caquëna:

“Toyajë'ë, iyere: 'Sihuaye pa'iji, iye macapi seña maca Ejaë ja're tsioni ju'isicohua'i cato.' Jaje pa'iji caji, Maija'quë jopyoi. Jaohua'i cato iohua'i yo'oyere ne tējini pëa huajëja'cohua'i a'ë, iohua'i nese'e ja're con.”

Yeja Co'amaña Tëaye

¹⁴ Ja maca ñahuë, te'ire Jesuje pa'ipi, Pai Mamaquë huë'yosiquëje pa'ire, poja'i sirio ëmëje'na ja'rusiquëpi ñu'ina. Jaë cato orore pase'e nesi marore pu'iquë paji'i. Jaje pa'ipi hua'ti ca'huarore ai jëjësëcore pani cajipi.

¹⁵ Cajiquëna, Maija'quë huë'epi yequë huiñaëpi etapi. Etani ai tutu cuiquë capi, siriore ñu'iquëre:

“Më'ë hua'ti ca'huarore meñe jua co'i meni tējajë'ë. Tsoe ti'api, iti tēja macarepa. Jaje pa'ina, yeja pa'iyë quere huesëpi.”

¹⁶ Ja maca siriore ñu'iquëpi i tēcapi yejana meñe jua co'i meni yeja pa'iyere tēapi.

¹⁷ Ja jeteyo'je ñaquëna, yequë huiñaëpi Maija'quë huë'e ma'tëmo pa'icopi etani hua'ti ca'huaro ai jëjësëconi cajiquë saji'i.

¹⁸ Ja maca yequë huiñaëpi etapi, Maija'quëre isijë tēo toto quë'ropi. Jaë cato toare cuañë tutu paquë paji'i. Jaëpi tutu cui'pi, hua'ti ca'huaro cajiquëre ñeje caquë:

“Mē'ē hua'ti ca'hua jējēsēcopi meñe jua co'i meni cuiya'i jure tējāj'ē. Tsoe ya'ji sapi, yeja pa'iyē.”

¹⁹ Jaje ca maca huiñaēpi i hua'ti ca'huaropi iye yejana se ya'cue col'jani cuiya'i jure tēapi, iye yeja cuiya'i tsiña ayere. Tēani ja maca ayapi, jai cua'corona tsa'cu jo'a sao ja'ñere. Ja yo'oye cato iñoji, Maija'quē paire si'se ja'ñere co'ayere papi.

²⁰ Jai daripē hue'sena cuiya'i tsa'cu jo'a huesose'e paji'i. Jaro jai cua'coropi tsiere pase'e etapi. Io huaiñe cato caballo yē'opo sēa macare paja'a huaiñe paji'i, cui'ne io jaiyepi paji'i, trecientos kilómetros pa'i jaira.

15

Huiñaohua'ipi Siete Pa'ye Tējiyerepa Ai Yo'o Ja'ñere Paye

¹ Ma'tēmore ñaquē ñahuē, yeque jaiye huajēya'ye pa'ye iñoñere: Siete huiñaohua'ipi siete tējiyerepa ai yo'o ja'ñere pajēna, ñahuē. Ja yo'oyepi Maija'quē pēi yo'o tēji ja'ñe paji'i.

² Ñahuē, cui'ne jai jairaje pa'ioipi toapi pa'iyeye pa'iot'a ña etojai yejare, jao jai jairaje pa'io, tsiña de'huaje pa'io, co'sija'lico yē'quē macare nēcahuē, Maija'quē tā'tēpe isise'ere cajicohua'ipi. Jaohua'i cato huajēya'ye pa'ire, cui'ne ije pa'ire de'huasiquēre quēcocohua'i paē'ē, i ayere toyama'cohua'ipi.

³ Jaohua'ipi Moisés Maija'quē jo'yaē jējēse'ere, cui'ne Yēi ñama ayere jējēñere jējēhuē. Johua'i jējēse'e cato caji:

Si'aye mē'ē de'huase'e de'oyere pa'ē.

Mē'ē ma'a cato nuñere pa'ē.

Cui'ne care paye a'ē.

Mē'ē a'ē, si'a pai Ējaērepa je'nēna.

⁴ ¿Nepi mē'ēre Ējaēre pare ñajēta'a ca'rama'pē pa'ija'cohua'i a'ni?

¿Nepi mē'ēre de'oquēre pa'ni cajē sihuaye paja'cohua'i a'ni?

Mē'ēse'e te'i pa'iyē, de'oquērepa.

Jaje pa'ina, mē'ē nuñerepa yo'oyere paire iñosi do'ire

Si'a hue'ñapi pai dani mē'ēre de'oquēre pa'ni cuasajē ñajē sihuaja'cohua'i a'ē.

⁵ Ja jeteyo'je ñahuē, ma'tēmopi Maija'quē huē'epi maire ca nēose'e de'huasi hue'ñapi hui'yoquēna.

⁶ Jaro Maija'quē huē'epi siete huiñaohua'i etahuē, siete ai yo'oye neñere pacohua'ipi. Jaohua'i cato poja'i cañare ai miañere suñasicohua'ipi, cui'ne curi nesi tēi cañapi coti saiñuēre paja'a tēasicohua'i paē'ē.

⁷ Ja jeteyo'je ñahuē, cuatro pa'iohua'i aquēpi siete huiñaohua'ina pai ñapere curipi nesi duruhuēare Maija'quē pēi co'ayerepa si'se ja'ñere tīmēse'ere isiquēna, Maija'quē ti pani huesēquē tsere.

⁸ Maija'quē huē'e cato Maija'quē tuture papi pico, cui'ne i de'oye miañere papi pico tīmē huesosico paco'ē. Pa'iona, iñi huē'e te'ije cacaye ti peopi, siete huiñaohua'i payepi siete ai yo'oye neñepi tēto saie pato.

16

Siete Pa'ye Ai Yo'oyere Tīmēsi Duruhuēa

¹ Ja maca asahuē, Maija'quē huē'epi tutu yē'ose'e pīsiquēna, siete huiñaohua'ini ñeje caquē:

“Sani yejana do'ejē'ē, Maija'quē pēi si'seyere siete duruhuēa pa'iyere.”

² Jaje ca maca du'ru aquē huiñaēpi i caji duruhuēre yejana dopi. Do maca huajēya'ye pa'i mamire toya cuañasicohua'ipi, cui'ne ije pa'ire de'huasiquēre secohua'ipi ca'mi co'ayere pare ai a'siyere etahuē.

³ Cayaye aquēpi huiñaē i caji duruhuēpi jai tsiayana do maca jai tsiayapi paire huasiquē tsieje pa'yerepa pōñēpi. Ja do'ire tsiaya pa'icohua'i si'aohua'i juju sahuē.

⁴ Toasōñe aquēpi huiñaē i pa duruhuēpi tsiañana, cui'ne oco eta coñana dosi maca tsie de'opi, oco.

⁵ Ja jeteyo'je asahuē, tsiaya huiñaēpi ñeje caquēna:

“Mē'ē nuñerepa pa'i a'ē, pai yo'ose'e johua'i yo'ose'eje pa'ye saiquēpi, Diusu de'oquērepa yure pa'iquē, cui'ne tsoeje pa'isiquē.”

⁶ Mē'ē ñare paquē jaohua'ire sañhuē, mē'ē paire cui'ne mē'ē coca quēacaicohua'i tsie nejosi do'ire. Jaje pa'ina, mē'ēpi yure johua'ire tsiere ocuahuē, me pasi'ni, jare jaje sañe pa'ito johua'i yo'osi do'ire.”

⁷ Asahuē, cui'ne Maija'quēre isijē tēo saiñuēpi ñeje cacona:

“Jaje pa'ijē'ē, Ējaērepa si'aye pa'irepa mē'ē cato pai ñape yo'ose'ere ñaquē yo'oni nuñerepa yo'oyē, tayoma'ē.”

⁸ Cuatro aquëpi huiñaë ì caji duruhuëpi ësëna dopi, paire ëoja'a tuture isiquë. Dosi maca ësëpi si'a toarepa paire ëopi.

⁹ Ja maca si'aohua'ire ai a'si ëo huesoquëta'are ìohua'i co'aye yo'oye jëoni Maija'quëna ponëma'pë paë'të. Cui'ne ìte de'oquëre pa'ni cayeje pahuhë. Coa ai jerepa ìni co'aye cahuë, si'aye iye ai yo'oye meñe cuañeqüëni.

¹⁰ Cinco aquëpi huiñaë ì caji duruhuëpi huajëya'ye pa'i ñu'i hue'ñana do maca, ì cuañe hue'ñapi nea hue'ñarepa de'o. Ja maca pai cato a'si ju'ijë ìohua'i tsemëñoana cücühuë.

¹¹ Jaje ai yo'onije ìohua'i co'aye pa'iyere jëoñe pahuhë. Pajë coa ai jerepa Maija'quë ma'tëmo aquëni co'aye cahuë, ìohua'i a'si ju'i do'ire, cui'ne ja'ju yëma'a a'sire hue'e do'ire.

¹² Seis aquë huiñaëpi ì caji duruhuëpi Eufrate jai tsiayana do maca, tsiayapi cuene huesëo, ma'are necaio, ësë mëi hue'ña pa'i pai ëjaohua'i daija'a ma'are.

¹³ Ja maca ñahuë, jai pë'ëje pa'i yë'opoja'a, huajëya'ye pa'i yë'opoja'a, cui'ne Maija'quëre quëacaiquëje pa'ita'a coa cosoquë yë'opoja'a toaso joñoa co'acohua'ipi jojoje pa'ìohua'ipi etajëna.

¹⁴ Ja joñoa cato co'a huatiohua'i paë'të. Pai yo'o tja ma'ñere yo'ocohua'i paë'të. Jaohua'i cato etahuë, iye yeja pai ëjaohua'ire si'aohua'ire tsi'soñu'u cajë. Maija'quë si'aye pa'irepa ja're uihuaja'a mu'sere pare cajë yo'ohuhë.

¹⁵ Ñajë'të, yë'ë utema'tore papi daiyë, co'amaña ñaë daiyeje pa'ye. Sihuaquë pasipi. Sëtasiquëpi cui'ne ì ju'i cajë de'oye ñaquë paquë cato cui'ne huajëya'ye peoyo pai ñajëna, cui'ye paja'quëpi.

¹⁶ Ja maca pa'i ëjaohua'ipi tsi'sisihuhë, hebreo coca cato Armagedón hue'yo sitona.

¹⁷ Siete aquë huiñaëpi ì caji duruhuëpi peo de'otona do maca ñu'i saiuhë quë'ropi Maija'quë huë'e ma'tëmopi ai tutu yë'ose'e pisipi, ñeje:

“Tsoe ne saohuhë.”

¹⁸ Ja maca jaiye mujuë ye'hueyeje pa'ye pisiye cui'ne mujuë të'cayeje pa'ye paji'i. Pa'ina, yejaje tsasipi noni ñu'cuyeje jerepa yeja ñu'cuesi do'ire. Tsoeje pai ja jerepa ñu'cuyeje ti ñama'cohua'i a'ë.

¹⁹ Jaje tutu ñu'cuëco jai daripë toaso t'e'ña hua'que saco'ë, cui'ne si'a yejaña jai dari pa'iyeye peo hue'ñarepa hua'que tome sapi. Ja maca Maija'quëpi jai daripë Babiloniare ì pëi si'se çono da'care ì jëjo daose'ere peo hue'ñarepa ocuasili' cuasapi.

²⁰ Yeja ñu'cue maca si'a saodohuëa, cui'ne ai çuti ne huesë sapi.

²¹ Cui'ne ma'tëmopi jai sësë carapëa aipi paina tomepi, cuarenta kilos dëquëyepi. Ja maca paipi Maija'quëre co'aye cahuë, sësë carapëa do'ire, cui'ne ìohua'ire jaiye ai yo'oye pa'i do'ire.

17

Co'a Nomiohua'i Pëca Ja'corepa

¹ Ja maca te'i siete huiñaohua'i aquëpi daji'i, yë'ë quë'rona. Siete duruhuëa pacohua'i aquëpi dani capi, yë'ëre:

“Dajjë'të. Iñosi'i, më'ëre, co'a nomiohua'i pëca ja'core pare iye yeja oco da'ca ëmëje'na ja'rusicopi ñu'icore si'se ja'ñere.

² Iye yeja pai ëjaohua'i jãoni yo'ojë paë'të. Cui'ne iye yeja pa'icohua'ipi jo co'aye yo'oyena ucu cuepe huesëhuë.”

³ Ja jeteyo'je Maija'quë joyopi yë'ëre çani ñañeje pa'ye iñoquëna, ñaquëna, huiñaëpi yë'ëre cuene yejana sapi. Saëna, jãrona ñahuë, nomioipi huajëya'ye pa'ini maja'iquëni ja'rusicopi ñu'iona. Ina Maija'quëre cue'cuejë caye toyasi mamí quë'i paji'i. Jaje pa'ipi siete sjo'pëa, cui'ne diez cajohuëa hue'equë paji'i.

⁴ Jao nomio cato ai maja'icopi nea maja'i toya quë'ioni suñasicopi paco'ë. Oropi ëja de'osico paco'ë, ai de'o quënapí, cui'ne perlaspi. Io jëtëpi oro duruhuëare cajio, coe ëaye pa'ye si'si tjemësoni, cui'ne jo ëmëohua'i yo'oye tjemësoni.

⁵ Io tsia tñare pare jo ayere quëa mamipi toyase'ere hue'eo, ñeje cayere: EJAOREPA BABILONIA, CO'A NOMIOHUA'I, CUI'NE SI'AYE IYE YEJA CO'AYE PA'YEE PËCA JA'COREPA.

⁶ Ja jeteyo'je de'oyerepa ña tjaquëna, jao cato cuëpeco paco'ë, Maija'quë tscëohua'i tsiena, cui'ne Jesure quëacohua'ire huaisicohua'i tsiena. Jare ñani yë'ë ai cuasahuë.

⁷ Jaje ai cuasaquëna, huiñaëpi capi, yë'ëre:

“¿Me yo'oquë ai cuasaquë'ni? Quëasi'i, më'ëre nomio iñoñe ayere pare, pajje asa ma'ñere. Cui'ne huajëya'ye pa'i jore saquë siete sjo'pëa cui'ne diez cajohuëa hue'equë iñoñere pare quëasi'i.

⁸ Më'ë huajëya'ye pa'ire ñasiquë cato tsoe ja'në pa'isiquë api. Jaje pa'ipi yure nejosiquë api. Jaje pa'iquëta'are cui'naëpi mëija'quë api, tome huesë hue'ñapi, ja yë'ta'a ìte nejo huesoye tja'ma'ëna. Ja maca yeja pa'icohua'i yeja de'hua maca ìohua'i mamí pa'i toya pëpëna

toya cuañoma'cohua'i cato ai cuasajë huajëya'ye pa'ire ñaja'cohua'i a'ë, ja'në pa'isiquëpi nejosiquëpi, cui'naëpi pani coquëna.

⁹ Iye macare pa'iji, ta'ñe asacohua'ipi de'hue asa ti'añe. Siete siopëa cato quëaji, siete ai cutüre, nomio ñu'iñere. Jare cui'ne quëaji, yequeje siete ëjaohua'i pa'iyere.

¹⁰ Jaohua'i acohua'ipi cinco pai ëjaohua'i cuañema'cohua'i de'ohuë. De'orena, te'i jaohua'i aquëpi yure cuañequë pa'iji. Yequëse'e ja yë'ta'a daiye paji. Jaë tējirepa daisi maca ai tsoe tēcahuë se pani coñe peosipi.

¹¹ Jaë huajëya'ye pa'i tsoe ja'në pa'isiquëpi yure nejosiquë cato ocho aquë api, pai ëjaë de'osiquë. Jare ipi siete acohua'i aquë pa'isiquëpi, i nejo cuaño ja'ñena sai saji, jaë cato.

¹² Më'ë diez cajohuëa ñase'e cato quëaji, diez pai ëjaohua'ini ja yë'ta'a cuañe huëoma'cohua'ini. Jaje pa'iquëta'are jaohua'i cato coa te'e nëhui tēcahuë maca huajëya'ye pa'i ja're cuañe ja'ñere isi cuañoja'cohua'i a'ë.

¹³ Icohua'i pai ëjaohua'i cato te'e jaje yo'oñu'u cuasayere pajë huajëya'ye pa'ina, iohua'i tuture cuañe ëjaohua'i pa'iyere ina isija'cohua'i a'ë.

¹⁴ Jaohua'ipi Yëi ñamare sañope uihuaja'cohua'i a'ë. Jaje uihuajëta'are Yëi ñamapi quëcoja'quë api, iohua'ire, ma'tëmo Ëjaë sëte, cui'ne pai ëjaohua'i mëne Ëjaë sëte. Ipi Maija'quë soisicohua'ire, i sahuasicohua'ire, cui'ne nuñerepa ise'ere tuicohua'ire paquë uihuaja'quë api."

¹⁵ Huiñaëpi yequeje capi, yë'ëre:

"Më'ë ñaquëna, co'a nomiopi ñu'isico cato pai pa'iyere a'ë, si'a pai tsëcapëa'ë, tiñe coca cacohua'i a'ë, cui'ne si'a yejaña pa'icohua'i a'ë.

¹⁶ Më'ë diez cajohuëa cui'ne huajëya'ye pa'ini pa'ina, ñase'epi co'a nomiore coeja'cohua'i a'ë. Jaje cojë jeocorena, peoyo pa'ija'coa. Pa'iona, io care aija'cohua'i a'ë, cui'ne toapi iote ëoja'cohua'i a'ë.

¹⁷ Jaje yo'oja'cohua'i a'ë, Maija'quëpi iohua'i joñoana i yëyeje pa'yere yo'ojajë caquë neina. Jaohua'ipi huajëya'ye pa'ina, iohua'i pai ëjaohua'i cuañecohua'i pa'iyere isiñu'u cuasaja'cohua'i a'ë, te'e, Maija'quë case'e yo'o ti'a macajaja.

¹⁸ Më'ë ñasi nomio cato ja jai daripëre pa'ë. Iye yeja pai ëjaohua'ire meñe cuañe daripëre pa'ë."

18

Babilonia Nejo Cuañose'e

¹ Ja jeteyo'je ñahuë, yequë huiñaëre ma'tëmopi cajequëna, ai cuañe tutu quë'ire papi. Cajequëna, i miañepi yejana miañerepa ju'api.

² Jaëpi ai tutu cui'pi, ñeje:

"Tsoe nejosicoa, jai Babilonia. Tsoe nejosicoa, huatiohua'i huë'ña de'o huesëo, si'si joñoa pa'i huë'ña de'o, si'a si'siohua'i cui'ne si'aye coe ëaye pa'ye tsiaro de'o.

³ Si'a yejaña pa'icohua'i io co'aye yëyena ucu cuepe huesëhuë. Iye yeja pai ëjaohua'ipi ioni yo'ojë paë'ë. Cui'ne iye yeja co'amaña isicohua'ipi jaiye co'amaña pacohua'i ponëhuë, io yë do'ire paipi coa huerose'epi coa curiquë nejoñere imajë."

⁴ Ja maca asahuë, ma'tëmopi yë'ose'e ñeje pisiquëna:

"Etajë'ë, ja daripëpi yë'ë tsecohua'i, cui'na maca io co'aye yo'oye yo'oma'pë pa'ija'cohua'i, cui'ne io ai yo'o ja'ñepi mësarute ti'añe paja'core.

⁵ Io tayo yo'oyepi ma'tëmope pana timëse'erepa pa'iji. Ja co'aye yo'oyere Maija'quë huänëyema'ë ñaquë pa'iji.

⁶ Io yecohua'ire isise'e ja'ye ioteje isijë'ë. Paire io yo'ose'eje pa'ye co'ye iona isijë'ë. Isiquë te'ore se cojë'ë. Io yecohua'ire ocuasi'i caco co'mese'eje pa'ye cui'ne yecore se co'me cojë'ë, io ucuja'core, ai dacorepa pa'ija'core.

⁷ Ëjaore pa'ë caco sihuaco yo'ose'eje pa'ye a'si ju'iñere, cui'ne ai yo'oyere isijë'ë. Jao cato io joyopi cuasaco ñu'ico pai ëjaorepa ñu'iñeje ñu'iñë, iye macare, hua'jeo peoyë, ai yo'oye paja'coa'ë caco.

⁸ Jaje caco ñu'icore te'e mu'sepi io ai yo'oye ti'aja'coa, ju'iñe, ai yo'oco oiye, cui'ne ayo ëa ju'iñe, cui'ne toana ëo jeo cuañoja'coa. Jaje nejo cuañoja'coa, Ëjaërepa Maija'quë tutu quë'ire papi nejoquëna."

⁹ Iye yeja pai ëjaohua'ipi iote yo'ojë iote yëjë pa'isicohua'ipi ai cuasajë oija'cohua'i a'ë, iopi uco pico mëiona, ñajë.

¹⁰ Iote si'seyere ñajë ca'rajë so'ona pëa nëcani jaropi caja'cohua'i a'ë:

"Ina, teayere pa'ë, jai daripë Babilonia si'a dari maña tēto saiscorepa më'ëre si'seye esarepa tūta'pi."

¹¹ Si'a yeja cu'ijë co'amaña isicohua'ipi iote ai cuasajë co'a ju'ijë oija'cohua'i a'ë, iohua'i jaiye co'amaña dajëna, huerocopi peocona.

¹² Iye paji'i, iohua'i pase'e: oro, poja'i curi, ai de'o quëna ça, perlas hue'yosi pëa, ai de'o nea maja'i çaña, cui'ne maja'i çaña, huëo së soquë nese'e, jai cujípi de'huase'e, de'o soquëpi nese'e, së'ño ma ja'ñe broncepti nese'e, jëa quënapí nese'e, jëa quëna marmol hue'yosi quëna nese'e,

¹³ Canela, huëo së ma'ña: incienso, mirra, cui'ne jaiye ma'ña, cuiya'i o'sa çono, hui'yape, de'o toase'e pan ne ja'ñe, trigo, huequëohua'ire, yëi ñamare, caballore, caballo quëréye, jo'yaohua'ire paire huerocohua'ijë peohuë.

¹⁴ Ja maca jai daripëre caja'cohua'i a'ë, ñeje:

“Më'ë yë'o pa'ise'ere, saija'i ocue ça yure më'ë peoyë. Ti më'ë nejo huesohuë, më'ë de'ocorepa ña cuañose'e, cui'ne më'ë jai co'amaña pase'e.”

¹⁵ Ja jai daripëna co'amañare isijë jaiye curiquë nesicohua'ipi, io si'se cuañõñere ca'rajë so'opi ñajë ai cuasajë co'a ju'ijë oija'cohua'i a'ë.

¹⁶ Oijë caja'cohua'i a'ë:

“Teayerepa, teayerepa jai daripë, jai do'i çaña nomio suñase'eje pa'iorepa ña cuañohuë, më'ë. Më'ë ju'ico cato nea ma ja'ñe cui'ne maja'i çañarepa, paji'i. Jaje pa'iore ju'icopi oropi, perlaspi, cui'ne de'o quënapí ëja de'osico paë'ë, më'ë.

¹⁷ Jaje pa'isicota'a coa nëhui tëcahuë maca jai co'amaña peo hue'ña ne huesëpi.”

Si'aohua'i jai yohuëa ëjaohua'i cui'ne iti quëhuicohua'i tsiaya cu'i do'ipi curiquë necohua'i so'ona pëa nëcani,

¹⁸ jai daripë uco pico mëiñere ñajë cuihuë:

“Yequë jai daripë cui'ne pa'io peoco.”

¹⁹ Jaje cajë ai cuasajë co'a ju'ijë oijë iohua'i sjoöpëana yeja pa'i ne'ñapi nehuë. Jaje yo'ojë oijë cuihuë:

“Teayerepa, teayerepa, jai daripë, më'ë co'amañare huerojëna, jaiye curiquë pacohua'i de'ohuë, jai yohuëa pacohua'i. Jaje pa'isicota'a coa nëhui tëcahuë maca më'ë peo hue'ña ne huesëhuë.”

²⁰ Ma'tëmo acohua'i cato ai sihuajë'ë, jai daripë peo do'ire. Sihuajë'ë, Maija'quë tseçohua'i, Maija'quë jëjo daocohua'i, cui'ne Maija'quë caye quëacaicohua'i. Maija'quë jãote nejoni mësarute co'aye yo'osi do'ire nuñerepa saiquë yo'opi.

²¹ Ja maca huññaë ai tutu quë'ipi quënaore toacoje pa'ioni ñni mëne mëani jai tsiayana jëo dëoquë capi:

“Ñeje më'ë jai daripë Babilonia jëoco cuañoja'coa'ë. Ja maca më'ëre tijupë ña çoñe paja'cohua'i a'ë.

²² Tijupë ta'tëpe, pi'cohuëa, cui'ne duruhuëa më'ë ma'añapi písiquëna, asa çoñe paja'cohua'i a'ë. Co'amaña necohua'ijë peoja'cohua'i a'ë, më'ëre. Jai to'ohuë toaye písiyeje asa çoñe paja'cohua'i a'ë.

²³ Toa tsë'ipë miañeje peoja'coa, më'ëre. Cui'ne huejajëna, pa'i tsi'si hue'ñapi písiyeje peoja'coa, më'ë co'amaña iye yeja jerepa pa'iohua'i pa'isicohua'ita'are, cui'ne më'ëje iye yeja paire më'ë dahuë yo'oyepi coa cosoco nesicota'are.”

²⁴ Ja jai daripëre paji'i, Maija'quë caye asajë quëacaicohua'i tsie, Maija'quë tseçohua'i tsie, cui'ne si'aohua'i iye yeja pa'icohua'ire huani jëosicohua'i tsie.

19

¹ Ja jeteyo'je asahuë, ma'tëmopi jai pai tutu ñeje cajëna:

¡Aleluya! De'ouquëre pa'ni Maija'quë cajë ìte sihuañu'u, Maija'quë tse a'ë, huasoye, i de'oyerepa, jerepa pa'irepa pa'iye.

² Maija'quë cato pai yo'ose'eje pa'ye ñaquë yo'oni nuñerepa yo'oji, tayoma'ë.

Jaje pa'ina, co'a nomiore nejopi.

Iye yeja paire io co'aye yo'oyepi co'a de'huascore,

¡jo'ya mañare huaisi do'ire ìote nejopi.

³ Huññaohua'ipi tijupë ca çohuë:

“¡De'ouquëre pa'ni Èjaë cajë ìte sihuañu'u! Io ucona, pico mëiñe ti jëoñe peoyerepa pa'iona.”

⁴ Ja maca veinticuatro aiohua'ipi cui'ne cuatro pa'iohua'ipi yejare pana në mejë Maija'quëre de'ouquëre pa'ni cuasajë sihuajë yo'ohuë, ñu'i saihuë ñu'iquëre ñeje cajë:

“Jaje pa'ijaquë. De'ouquëre pa'ni. Èjaë cajë ìte sihuañu'u.”

⁵ Ja maca cuañequë ñu'i saihuë quë'ropi yë'ose'e ñeje písipi:

De'ouquëre pa'ni cajë Maija'quëre

Si'aohua'i tsi cui'ne aiohua'ijë,

Si'aohua'i ìte necaijë,

Ìte Èjaëre pare ñajë ca'rajë pa'isicohua'ipi sihuajë'ë.

Yēi N̄ama Huejaquēna, Pai Sihuajē Tsi'si Mu'se

⁶ Asahuē, cui'ne jai pai cajēna, pisiyeje pa'ye pisiquēna, jupo tsa'io pisiyeje pisiquēna, cui'ne mujūē tē'cayeje pa'ye pisiyeje pisiquēna. Japi pīsipi, ñeje:

¡De'oquēre pa'ni Ējaē cajē ite sihuahu'u! Maija'quē si'aye pa'ire papi, Ējaēre papi cuañe huēopi.

⁷ Sihuahu'u, sihuayena daijani ite de'oquēre pa'ē mē'ē cañu'u.

Tsoe t̄'api, Yēi ñama hueja mu'serepa.

Jaje pa'ina, i nējo tsoe ěja de'osicorepa pa'ico.

⁸ Jaona isihuē, de'o cañarepa si'si peoyere, cui'ne miañere suña ja'ñe.

Ja de'o cañarepa cato quēaji, sehuosicohua'i Maija'quē tsecohua'i nuñerepa yo'ojē pa'iyere.

⁹ Ja maca huiñaēpi yē'ēre capi:

“Toyajē'ē, sihuacohua'i pa'iyē, Yēi ñama hueja maca pa'ija'cohua'ire soisicohua'ipi.”

Yequeje cui'ne capi:

“Iye coca cato Maija'quē nuñerepa cocare pa'ē.”

¹⁰ Jaje caquēna, asani yē'ēpi huiñaē quēo yē'quē macana do're ja'ruhuē, ite, de'oquēre pa'ni cuasaquē sihuasi'i caquē. Jaje yo'oquēna, ipi yē'ēre capi:

“Jaje yo'oma'ē pa'ijē'ē. Yē'ēje Maija'quē jo'yaē'ē. Mē'ēje pa'i a'ē. Mē'ē cui'ne Maija'quē do'ijē conī payē, Jesús ayere quēacaiquēre.”

Jaje pa'ina, Maija'quēni mē'ē cato jaje do're ja'ru sihuaquē yo'ojē'ē, mēsaru paquē Jesús ayere quēacaiquē cato cui'na ěapi, yē'ēre pa'i ja'ñere quēa joyo.

Caballo Poja'iquēre Tuiquē Ayere Quēaye

¹¹ Ja maca ñahuē, ma'tēmopi hui'yosico pa'iona. Jaropi ñaipi, caballo poja'iquēpi. Ite tuiquē cato it̄i case'ejē yo'oquērepa, cui'ne nuñerepa care paquē hue'equē paji'i, i mami. Jaje pa'ipi nuñerepa cuañequēpi cui'ne nuñerepa huajoje yo'opi.

¹² I ñaco ca cato toa tsēni nēcase'ejē pa'yerepa paji'i. I s̄iopēre jaiye manoa pu'iquē paji'i. Jaje pa'ipi isē'e te'i asa mamire toyase'ere papi, yecohua'ijē ti asa ma'ñere.

¹³ Cui'ne tsiepi tsoasi ju'i care ju'i saji'i. I mami cato: Maija'quē coca hue'equēpi.

¹⁴ Inī ma'tēmo soldado paipi tuē'ē, de'o caña suñasicohua'ipi, poja'i cañare, cui'ne si'si peoyere ju'icohua'ipi po caballohua'ini tuijē.

¹⁵ I yē'opojā'a hua'ti jējēsēcopi etapi, iye yeja pa'icohua'ire nejoja'copi. Jaēpi quēna tarapēpi cajiquē cuañeja'quē api. Jaēpi pai ñape yo'ose'ere saisipi, cuiya'i da'ca nesi'i caquē tsa'cu jo'aquē yo'oyeje pa'ye. Cui'ne jaēpi ocuaja'quē api, Maija'quē tutu quē'repa pēi si'seyere.

¹⁶ I ju'i care, cui'ne i quēsore ñeje toyase'ere hue'epi: “Pai ějahua'i mēñe Ējaērepa, it̄i meñe cuañequērepa.”

¹⁷ Ja jetye'oje ñahuē, huiñaēpi ěsēna tsa'cu paquē nēcacuēna. Jaēpi ai tutu cui'ni, si'aohua'ire peo de'oto ja'jējē cu'icohua'ire ñeje caquē:

“Daijē'ē, tsi'sini, Maija'quē na'iquēna, aōñe aija'cohua'i.

¹⁸ Dani aijē'ē, pai ějahua'i ca, soldado pai ějahua'i ca, tutu quē'iohua'i ca, caballo ca, johua'ire tuisicohua'i ca, coa si'aohua'i ca, jo'yaohua'i peocohua'i ca, jo'ya ne cuañosicohua'i ca, a'ricohua'i ca, cui'ne jaicohua'i ca, aija'cohua'ipi cui'ni.”

¹⁹ Ja maca ñahuē, huajēya'ye pa'ire, cui'ne iye yeja pai ějahua'ire, johua'i soldado pai ja're conī pa'ijēna. Jaohua'i cato caballore tuiquēre, cui'ne i soldado paire uihuañu'u cajē tsi'sisicohua'ipi paē'ē.

²⁰ Jaē huajēya'ye pa'i cato tseā cuañosiquē paji'i, coa cosoquē quēaquē ja're conī, i ña hue'ñana jaiye pai yo'o t̄'a ma'ñere yo'o iñosiquē ja're. Ja yo'o iñoñeja'a quēaquē paire cosopi, huajēya'ye pa'i mami toya cuañosicohua'ini, cui'ne ije pa'ire de'huasiquēre sihuajē yo'osicohua'ini. Ja maca, huajēya'ye pa'ire, cui'ne coa cosoquē quēaquē pa'isiquēre tseani ja huajēcohua'ini toa jairana azufre tsēni nēcasicona, jeo dēo cuañohuē.

²¹ Yecohua'i cato huani jeo cuañohuē, caballo tuiquē yē'opo eta hua'tiyona. Ja maca si'a ja'jēcohua'i tsi'sini jaohua'i care ocue t̄imē huesēhuē.

20

Mil Ometēca Aye

¹ Ja jetye'oje ñahuē, ma'tēmopi huiñaē tome huesē hue'ña s̄ioconi cui'ne quēna mere tse'equē cajequēna.

² Jaēpi cajeni jai pē'ēje pa'ire tsoe hue'ña añare, huati jare ipi Satanás hue'equēre quēna mepi sēapi, mil ometēca ñu'ija'quēni.

³ Ja maca ite sēani mil ometēcāja'a paire cosoma'ē pa'ija'quēre tome huesē hue'ñana jeo t̄oni s̄ioñopi. S̄ioni eta sa'rona hui'yoye peoji, caquē toya sēo huesopi. Jaje pa'iquēta'are mil ometēca t̄'asi maca joye cuañosiquē pa'ija'quē api, a'ri tēcahuē maca pa'ija'quēpi.

⁴Ja jeteyo'je ñahuë, paipi cuañejë ñu'i saire ja'rusicohua'ipi ñu'ijëna, pai ñape yo'ose'e ñajë ca de'huaja'a tutu isi cuañosicohua'ire. Ja maca ñahuë, Maija'quë coca case'eje pa'ye, cui'ne Jesús case'eje pa'ye nuñerepa tui do'ire, sipëa të'ca tëte cuañosicohua'i joñoare. Jaohua'i cato huajëya'ye pa'ire, cui'ne jje pa'ire de'huasiquere de'loquere pa'ni cuasajë yo'oye pasicohua'i a'ë. Cui'ne i mamije toya cuañone pasicohua'i a'ë, iohua'i tsiana, panita'a iohua'i jëtëna. Jaohua'ipi huajëcuhua'i pani cojë Cristo ja're mil ometëca tsañehüë.

⁵Jaje pa'iquëta'are yecohua'ita'a huëiye pahüë, mil ometëca tëto saisi maca huëija'cohua'ipi. Iye cato du'ru macarepa ju'isicohua'i huëiye a'ë.

⁶Sihuacohua'i pa'iyë, Maija'quë tsecohua'ipi, du'ru macarepa ju'isihua'i huëiye huëicohua'i. Jaohua'ire cayaye ju'iñe aco ne hueañe peoji. Coa ai jerepa jaohua'i cato Maija'quëre cui'ne Cristore necaijë pa'ija'cohua'i a'ë. Cui'ne i ja're cõni mil ometëca cuañëja'cohua'i a'ë.

Huati Nejo Cuañose'e

⁷Mil ometëca tëto saisi maca Satanáspi etosiquë pa'ija'quë api.

⁸Pa'i ja maca si'aohua'ire yeja pa'icohua'ire cosoquë cui'ne Gogre cui'ne Magogre cosoja'quë api. Cosoquë jaohua'i soldado paire jai paire meja asi tsiaya të'tëpa ñañeje pa'yerepa tsi'soja'quë api, uihuaja'cohua'ire.

⁹Ja maca jaohua'ipi si'a yejañapi dani si'aore sa tëhuo të'ija'ë, Maija'quë tsecohua'i i oicohua'i pa'i daripëre huañu'u cajë. Jaje yo'ojëta'are ma'tëmopi toa tome ëo huesopi, peo hue'ñarepa.

¹⁰Ja maca huati paire cososiquere toa jairana azufre quë'iona jeo deo cuañopi, huajëya'ye pa'ire, cui'ne coa cosoquë paire quë'asiquere jeo deo sitona. Jaron a yo'ojë pa'ija'cohua'i a'ë, mu'señapi, cui'ne ñamifñapi carajaiñe peoyerepa.

Poja'i Ñu'i Saihuëre Pare Ñu'i Pai Ñape Yo'ose'e Ca De'huaye

¹¹Ja maca ñahuë, poja'i ñu'i saihuëre, cui'ne jote ñu'iquëre. Jaë ña hue'ñare papi yeja cui'ne ma'tëmo catihuë. Catijëta'are ti peopi, tirona se jëani pa'iyëje.

¹²⁻¹³Ja maca ñahuë, ju'isicohua'ire, jaicohua'ire, cui'ne a'ricohua'ire, ñu'i saihuë tiñare pare nëcajëna. Si'aohua'i tsiayana, cui'ne yejana ju'ijë pa'isicohua'i, etasicohua'i pa'ë. Ja maca toya pëpëapi hui'yose'e paji. Pa'ina, cui'ne pa'i toya pëpëre pajë hui'yosico paji. Ja maca ju'isicohua'ipi jare iohua'i yo'ose'eje pa'ye ca tëji cuañohüë, ja toya pëpëana toyase'eje pa'ye.

¹⁴Ja jeteyo'je juni huesëye cui'ne ju'isicohua'i pa'i hue'ñaje ña coñe peopi, toa jairana jeo deosi do'ire. Iye toa jaira cato cayaye acore se juni huesë coñe a'ë.

¹⁵Cui'ne jaron a jeo deo cuañohüë, si'aohua'i pa'i toya pëpëna iohua'i mami toya cuañoma'cohua'i.

21

Huajë Ma'tëmo Cui'ne Huajë Yeja

¹Ja jeteyo'je ñahuë, huajë ma'tëmöre cui'ne huajë yejare. Du'ru pa'isi ma'tëmo cui'ne du'ru yeja, cui'ne jai tsiaya tsoe peopi.

²Ja maca yë'ë Juanpi ñahuë, de'o daripëre pare, huajë Jerusalénre, ma'tëmopi cajecona, Maija'quë pa'i ña hue'ñapi. Nomio io huejaja'quëre caco de'oyere suñani ëja de'ose'eje pa'io paco'ë.

³Ja maca asahuë, ma'tëmopi tutu yë'ose'e ñeje jutaquëna:

“Maija'quë pa'i hue'ña yure cato pai ja're cõni pa'iyë a'ë, iohua'i ja're pa'ija'quëpi. Iohua'ipi i pai pa'ija'cohua'i a'ë. Pa'ijëna, Maija'quëpi iohua'i pëca ja'quë pa'ija'quë api.

⁴Ja maca Maija'quëpi iohua'i oise'e tëno jecasipi. Ja maca ju'iñe, ai yo'oye, ai cuasajë oiye, a'siye peosipi, tsoe tëto saise'e sëte, ja'në pa'io pa'ise'e.”

⁵Ja maca ñu'i saihuë ñu'iquëpi capi:

“Yë'ëpi si'aye huajëyese'e ne saoyé.”

Yequeje capi:

“Toyajë'ë. Iye coca care paye a'ë. Itina quëcojë pa'iyë a'ë.”

⁶Jaje ca toquë capi, yë'ëre:

“Tsoe ne saohüë. Yë'ë a'ë, du'ru aquërepa cui'ne tëjiquë, je'nëna pa'iquë. Oco ëa ju'iquëni yë'ëpi ocuasi' pa'i oco cojerepa ayere do'i peoyerepa.

⁷Si'aye quëcosiquë etasipi, yë'ëre i pëca ja'quëre paja'quë api, cui'ne ini yë'ë mamaquëre paja'quë a'ë, si'aye iyere paja'quë api, mamaquë pa'i do'ire.

⁸Jaje pa'iquëta'are yë'ëre tuiyere yo'o jujacohua'ire, sehuoye jëa coecohua'ire, paire coecohua'ire, huaicohua'ire, yequë nomiohua'ire yo'ocohua'ire, dahuë yo'ocohua'ire, pai

nese'ere ëjare pa'ë cuasacohua'ire, cui'ne coa cosocohua'ire saiye pasipi, toa cui'ne azufre tsë'isi jairana, cayaye acore se jüni huesë hue'ñana."

Huajë Jerusalén

⁹Ja maca siete huiñahua'i aquëpi daji'i, siete ucu duruhuëa tëjyerepa ai yo'oye tımëse'ere pasiquëpi. Jaëpi dani capi, yë'ëre:

"Daijë'ë. Më'ëre iñosi'i, Yëi ñama huejaja'core, i nëjore."

¹⁰Huëo canı ñañeje pa'ye ñahuë. Ñaquëna, huiñaëpi yë'ëre jai cutihuëna sapi. Sani iñopi jai Jerusalén daripëre de'ocore pani, ma'tëmopi Maija'quë quë'ropi cajecona.

¹¹Ja daripë cato Maija'quë miañe ju'ayepi miaco paco'ë. Io miañe cato de'o quëna pë miañeje pa'ye paji'i, Jaspe hue'yosi quëna miañeje pa'ye, ña etojai quëna huëje pa'ye paji'i.

¹²Ja daripë yërehueja'a jai ëmë tëhuopa tëhuosico paji'i. Jaje pa'ioni doce eta sa'noa paji'i. Eta sa'noa ñape te'le huiñaë nëcapi. Cui'ne eta sa'noa ñape doce Israel pai tsëca mamire toyase'e paji'i.

¹³Ësë mëi te'tere toaso eta sa'noa paji'i. Ëmëje'le te'tere toaso eta sa'noa, huë'ehuë te'tere toaso eta sa'noa, cui'ne ësë du'i hue'ñare toaso eta sa'noa paji'i.

¹⁴Jai daripë tëhuopa cato doce quëna pëana quëco paco paji'i. Ja quëna pëana Yëi ñamapi doce jëjo daosicohua'i mamire toyase'e paji'i.

¹⁵Yë'ë ja're conı huiñaë coca caquë cato i jëtëre oro tarapëre catë tarapëje pa'iore cajipi, jai daripë cuëcueja'coni, io eta sa'noa, cui'ne io tëhuopa.

¹⁶Jai daripë cato si'a yë'quë maca jaico paji'i, je'ñe tēcapë tsoaye ja'ye si'ao. Huiñaëpi i cuëcuecopi jai daripë cuëcuequëna, caya mil cui'ne docientos kilómetros paji'i. Io tsoaye, io mëne tsoaye cui'ne io je'ñe tēcapëje cui'na ja'yese'e paji'i.

¹⁷Ja jeteyo'je tëhuopa tsoayerere cuëcuepi. Cuëcuequëna, sesenta y cinco metros paji'i. Pai cuëcueyeje pa'ioipi huiñaëje cuëcueye sëtë jaje paji'i.

¹⁸Jaspe hue'yosi quëna pëapi nesico paco'ë, tëhuopa. Cui'ne iti daripëpi orore pase'e nesico paco'ë, sa ña etojaicorepa.

¹⁹Tëhuo pa quëco pa quëna pëa cato coa si'a de'o quëna pëapi ëja de'huase'e paji'i. Iyepi du'ru huëo hue'ña cato, jaspe hue'yosi quëna, cayaye aco zafiro hue'yosi quëna, toasoñe aco ágata hue'yosi quëna, cajese'e aco esmeralda hue'yosi quëna,

²⁰Cinco aco onice hue'yosi quëna, seis aco cornalina hue'yosi quëna, siete aco crisólitopi hue'yosi quëna, ocho aco berilo hue'yosi quëna, nueve aco topacio hue'yosi quëna, diez aco crisoprassa hue'yosi quëna, once aco jacinto hue'yosi quëna, doce aco amatista hue'yosi quëna paji'i.

²¹Doce eta sa'noa cato doce perlaspi nese'e paji'i. Pa'ina, te'le perlapi te'le eta sa'ro tëhuocore nesico paji'i. Èja ma'arepa cato orore pase'e nesicopi sa ña etojaicorepa paco'ë.

²²Ja daripë ti peopi, Maija'quëre se huë'e. Me neni pa'ico'ni, jare i Maija'quë si'aye pa'ire papi, cui'ne Yëi ñamapi conı huë'ëje pa'iohua'i pa'ito.

²³Ja daripë cato ësë, cui'ne ñañë miacaiye peoji. ¿Me neni jaohua'i miacaiye'ni? Tsoe Maija'quëpi de'oyerepa miato, cui'ne i Yëi ñamapi conı toa tsëöpëje pa'ipi miato.

²⁴Huasosi yejaña pa'icohua'i cato ja daripë miacaiyeja'a cu'ija'cohua'i a'ë. Cui'ne pai ëjaohua'ipi iohua'i de'oyere jona isija'cohua'i a'ë.

²⁵Io eta sa'noa sjoñe ti peosipi mu'se, cui'ne jaro cato ñamije peosipi.

²⁶Iona sajë isija'cohua'i a'ë, iye yeja pa'icohua'i Maija'quë de'o necaise'ere iñoñere, cui'ne pai yejaña ëjaërepa cajë de'oyerepa sehuojë pa'yere.

²⁷Jaro cato cacaye peoji, si'si nese'e, ai co'ayererepa yo'ocohua'i, panita'a cosocohua'ije. Jaro cato cacaja'cohua'i a'ë, iohua'i mami Yëi ñama tsëco pa'i toya pëpëna toyasicohua'ise'e.

22

¹Ja maca huiñaëpi iñopi, co'sija'i tsiayapi pa'iyë isı ocose'ere. Jaje pa'ioipi Maija'quë cui'ne Yëi ñama ñu'i hue'ñapi etapi.

²Cui'ne ja eta ñapi jai daripë ëja ma'a jopore pare paji'i. Cui'ne tsiaya tëtëpañare pa'i soquë ñëapi nëcahuë. Te'le ometëcahuë quëicohua'ipi ñañë ñape quëico paji'i. Io ja'o cato yejaña pa'icohua'ire jujuye paji'i.

³Jaro cato peosipi, co'aye pa'ise'e. Maija'quë cuañë ñu'ico cui'ne Yëi ñama cuañë ñu'ico ja daripëre paji'i. Pa'ina, i jo'yapi ite ñajë sihuaja'cohua'i a'ë, Èjaëre pare sëtë.

⁴I tsiare pare ñaja'cohua'i a'ë. Najë cui'ne i mamire iohua'i tsia tıñare pana toyase'e hue'ëja'cohua'i a'ë.

⁵Jaro cato peosipi, ñami. Iote pa'icohua'i cato toa tsëo pë miañere co'ema'pë pa'ija'cohua'i a'ë. ¿Me neni co'eye'ni? Jare ipi Maija'quë Èjaëre papi miacai pa'ija'quëre. Cui'ne iohua'ipi Maija'quë ja're conı je'nëna carajañe peoyerepa pa'ija'cohua'i a'ë.

Jesucristo Daiye Ja'yere Pa'iji

⁶ Ja maca huiñaëpi capi, yè'ère:

“Iye coca cato nuñere pa'ë. Cui'ne itina quëco pajë pa'iyere pa'ë. Jare ipi Èjaë Maija'quë i joyore jëjo saopi, ite quëacaicohua'ire yequë mu'se pa'i ja'ñe quëaja'quëpi caquë. Yureta'a i huiñaëre jëjo daopi, i jo'yare quëaja'quëre yure maca esa yo'o huëo ja'ñere.

⁷ ¡Yè'ëpi esa daija'quë a'ë!”

Sihuaquë pa'ija'quë api, iye toya pëpë yequë mu'se yo'o ja'ñere quëayere asaquë yo'oquë pa'iquë cato.

⁸ Yè'ë Juanpi itire ñaquë, cui'ne iyere asahuë. Ja ñaquë asa tējisi maca yè'ère iñosiquë huiñaë quëo yè'quë macana do're ja'ruhuë, ite ëjaëre papi caquë sihuaquë yo'ose'e caquë.

⁹ Jaje yo'oquëna, ipi capi, yè'ère:

“Maija'quëre necaiquë a'ë. Më'ëje pa'i a'ë. Cui'ne më'ë ja're acohua'i i coca quëacaicohua'ije pa'i a'ë. Coa si'aohua'i iye toya pëpëna toyase'ere de'oye sehuocohua'ije pa'i a'ë. Maija'quë necaicohua'ipi pani Maija'quëni jaje sihuaquë yo'ojë'ë.”

¹⁰ Cui'ne yequeje capi:

“Iye toya pëpëre tsjoma'ë pa'ijë'ë, si'aohua'ipi ñajajë caquë. Yequë mu'se tëto sai ja'ñere iye toya pëpëna toyase'ere, iti case'e huëo maca t'i'a tējiji.

¹¹ Na'i huesésicoa. Jaje pa'ina, coa ñajë'ë, co'aye yo'oquë jare co'ayere yo'oquë pa'ijaquë, si'si nesiquë jare si'si pa'ijaquë. Jaje pa'isiquëta'are de'oquë cato jare de'oquë pa'ijaquë. Maija'quëna i pa'iyë isi huesosiquë cato, jare i ja're pa'i huesëja'quë.

¹² Yè'ëpi esa daija'quë a'ë. Dai dayë, cui'ne isija'a co'amañaje. Pai ñapere isija'quë a'ë, i yo'ose'ëje pa'ye.

¹³ Yè'ë a'ë, si'anë pa'iquëpi pa'iyë. Yè'ë a'ë, du'ru aquërepa, cui'ne tējiquërepa, iti huëosiquë cui'ne saquërepa.”

¹⁴ Sihuacohua'i pa'iyë, johua'i caña de'oye jojacobhua'ipi. Jaohua'ipi pa'i soquë yë ayere de'oye ocueye pa'iji. Cui'ne jai daripë eta sa'noaja'a de'hue cacaye pa'iji.

¹⁵ Jaje pa'iquëta'are, hue'sena pëaja'cohua'i a'ë, tiro yo'ocohua'i cato, paire dahüë necohua'i, yequë nomiore yo'ocohua'i, paire huani jeocohua'i, pai de'huase'ere ëjare pa'ë cajë yo'ocohua'i, cui'ne cosoyere oijë cosocohua'i.

¹⁶ “Yè'ë Jesupi yè'ë huiñaëre jëjo saohuë, sehuosicohua'i tsëcare si'aye quëaja'quëre. Yè'ë a'ë, David tsëcapë aquë. Yè'ë a'ë, ñata tomesi macarepa miacai ma'ñocorepa.”

¹⁷ Maija'quë joyopi cui'ne Yëi ñama nējopi con'i cayë:

“Daijë'ë. Jaje daijë'ë cayere asani cui'neje cajë'ë. Oco ëa ju'iquë pani dani ucujë'ë, pa'iyë isi ocore pare ti curi do'i peoyerepa.”

¹⁸ Yè'ëpi si'aohua'ire du'ru quëa nëoñë, iye toya pëpëna Maija'quë yequë mu'se yo'o ja'ñe toyase'ere asacohua'ire. Jaje pa'ina, paipi iye case'ere ai seña maca se mëocaisiquë pa'ito, Maija'quëpi iteje ai yo'oyere se mëocaija'quë api, iye toya pëpë toyase'e ayepi.

¹⁹ Iye toya pëpë ayere, yequë mu'se pa'i ja'ñere quëaquë toyase'ere a'ri maña nejocatu iti nejocaisiquëreje Maija'quëpi pa'i soquë yë ocueye peoyë. Cui'ne de'o daripëna cacaye peoyë. Iye toya pëpë cato quëaji, ja pa'i oco ayere, cui'ne ja de'oyerepa daripë ayere.

²⁰ Iye yo'o ja'ñe quëasiquëpi caji: “Yè'ëpi esa daija'quë a'ë.” Jaje pa'ija'quë. ¡Daijë'ë, Èjaë Jesús!

²¹ Mai Èjaë Jesucristopi mësarute si'aohua'ire i oiyeipi ñacai paja'quë. Jaje pa'ija'quë.